

Nyeme Jore Kadasi



The New Testament in Anufo (Chokosi)

Nyeme Jore Kadasi
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source files dated 29 Jan 2022
fe36d0e6-2a60-5e15-8d1c-8bf275389598

Contents

MATIO 1
MARAKO 52
LUKA 83
YOHANE 136
SAYOOWAM 171
ROMAFOM 221
1 KORINTOFOM 244
2 KORINTOFOM 265
GALATIYAFOM 279
EFESOFOM 287
FILIPIYAFOM 295
KOLOSIYAFOM 301
1 TESALONIKAFOM 306
2 TESALONIKAFOM 310
1 TIMOTI 313
2 TIMOTI 319
TITOSI 323
FILEMON 326
HIBURUFOM 328
YAKOBO 346
1 PETORO 352
2 PETORO 359
1 YOHANE 363
2 YOHANE 369
3 YOHANE 370
JUDA 371
SAYIKEREWA 373

Labari kpa n bo MATIO akere i ni

Kabo ba kere Yesu nam дума барасu ni

¹ Ahin дума kereewam kere ti Yesu Kristo nam busu wo, fiteeri Abraham ko tu Feme Davidi fa ba juuri sangha bo bu wuuri yiri Yesu ni. I nam n busu yaa ni, ² Abraham wuuri Izaki, na Izaki awu Jakobu, na Jakobu awu Yuda ni i niemam, ³ na Yuda awu Farese ni Zara bo bu ni yo la Tama ni, na Farese awu Hesarom, na Hesarom awu Aram, ⁴ na Aram awu Aminadabu, na Aminadabu awu Naasoni, na Naasoni awu Salemo, ⁵ na Salemo awu Boosi bo i ni yo la Rahabu ni, na Boosi gusu awu Yobedi bo i ni yo la Ruti ni, na Yobedi gusu anya awu Yese ⁶ bo i gusu wuuri Feme Davidi ni.

To, na Feme Davidi awu Feme Solomon bo i ni yo la Yuriya yi ni, ⁷ na Feme Solomon gusu awu Feme Robowam, na Feme Robowam awu Feme Abiya, na Feme Abiya awu Feme Asafu, ⁸ na Feme Asafu awu Feme Yosafati, na Feme Yosafati awu Feme Yoram, na Feme Yoram awu Feme Yoziya, ⁹ na Feme Yoziya awu Feme Yowatam, na Feme Yowatam awu Feme Ahazi, na Feme Ahazi awu Feme Hezekiya, ¹⁰ na Feme Hezekiya awu Feme Manase, na Feme Manase awu Feme Amoni, na Feme Amoni awu Feme Yosiya, ¹¹ na Feme Yosiya awu Feme Yekoniya ni i niemam. Nyini sangha n ye bu mierei Yisarelifom fiteeri bu asien su koori Babiloniya asien su n a.

¹² Bu faari bu koori Babiloniya n dee n sin ni, na Feme Yekoniya awu Salatiyeli, na Salatiyeli awu Zorobabeli, ¹³ na Zorobabeli awu Abiyidu, na Abiyidu awu Eliyakimu, na Eliyakimu awu Azore, ¹⁴ na Azore awu Sadoki, na Sadoki awu Akim, na Akim awu Eliyudu, ¹⁵ na Eliyudu awu Eleyaza, na Eleyaza awu Matan, na Matan awu Jakobu nyinga bekun, ¹⁶ na nyini Jakobu n awu Yosefu, Mariya hun. Mariya wuuri Yesu bo bu fere i ka Kristo n a, Tiidefo n bo Nyeme ase ka i sunma i ni.

¹⁷ To, nyini kere ka fiteeri Abraham fa ba juuri Feme Davidi, bu tiiri nanam buru ni nna wo, na fiteeri Feme Davidi fa ba juuri sangha bo bu mierei Yisarelifom koori Babiloniya asien n su ni, bu tiiri nanam buru ni nna wo, na fiteeri nyini sangha n fa ba juuri sangha bo bu wuuri Kristo Tiidefo ni, bu gusu tiiri nanam buru ni nna wo.

Kabo bu wuuri Yesu Kristo ni

¹⁸ Kabo bu wuuri Yesu Kristo n yaa. Bu yo faari i ni Mariya ceeri Yosefu wo, ama, kana bu ba ja i ko i hun n dika ni, na ba fa nu ka i bita nyinse bo i fite Nyeme Awiewie Casi n dee yiko nu wo. ¹⁹ I hun Yosefu yo ti sono bo i yo sa bo i ko atin su Nyeme do o, nyini ti, wo koro ma ka i wura i yi n nyinse jama nu, na wo fa sunsunni ka i yaki i asiri nu. ²⁰ Sangha bo i wo birisi su n so ni, na Micera n dee mereke aba i do alele nu, aba ase i ka, "Feme Davidi anuma Yosefu, ma a soro sere ka a ja Mariya, na a fa i ko u dika, dama Nyeme Awiewie Casi ni maari i nyinse n a. ²¹ I wu baabieso na a fere i ka Yesu, i bu la ka Tiidefo, dama yiri ba yi i minem fite bu satiem nu a." ²² To, nyini n kere yoori so, adena i ma Nyeme noanie kanfo n noanie n ba yo yuwa, kabo wo joko ka,

²³ "Sunguru bo wo nya si ma bieso ba nyinse,

na i wú baabieso,
 na bu fère i ka *Emanuweli*,"
 i bu la ka, Nyeme wo ya do. ²⁴ Sanja bo Yosefu tengeeri ni, na wo yo kabo Micera n dæ mereke n seeri i ni, na wo fa Mariya aba i dika. ²⁵ Ama, i ni yiri asanja má bara ni bieso, haari Mariya ba wuuri baabieso, na Yosefu atun i duma ka Yesu.

2

Kabo asarambaa koresiyifom baari Yesu busu nie ni

¹ Sanja bo bu wuuri Yesu mie n bo bu fere i ka Betilehem na i wo Yudiya awore n nu ni, nyini sanja ni Herode ti nyini awore n nu feme a. Na asarambaa koresiyifom nbem afite wie afiiri, aba Yerusalem aba abisa ka, ² "Baa n bo ba wu i na i bá yo Yudafom feme n wo ni wo? Ya nu i asarambaa wie afiiri do, ye ya na ya ba na ya ba kutu i a." ³ Feme Herode tiiri so ni, na jore n amie i ni Yerusalemfom kere. ⁴ Na wo fere Nyeme sayoowa donguyofom nkpienkpienm, ni Nyeme noanie kerefom kere atien bu noo, na wo bisa bu ka, "Ye bu wú Kristo Tiidefo n ni wo?" ⁵ Na ba bo i nu ka, "Betilehem bo i wo Yudiya asien n su ni, dama kabo Nyeme noanie kanfo n kereeri i lee. Micera n na o,

⁶ 'Woro Betilehem bo a wo Yuda asien n su ni,
 a ti má mie kaan.

Woro ti Yuda asien n su miem anyunuyifom kun a,
 dama ka feme n bo m yi i na i bá yo m mine Yisarelifom tiifo ni,
 i fite u do."

⁷ Na Feme Herode afere asarambaa koresiyifom n asiri nu na i si sanja bo asarambaa n tiere ni. ⁸ Na wo kere bu ka, "Am ko Betilehem, na am ko nienie nyunyumi, na nzen am nuuri baa ni, am kpie am nyi ba se m na m gusu ko kutu i." ⁹ Feme n jooori bu do wieeri so n na ba de atin, bu wo ko su so ni, na ba nu asarambaa n bo bu nuuri i wie afiiri ni, ka i du bu mo haari na wo ko ajina awuru n bo baa n wo nu n ti su. ¹⁰ Bu nuuri asarambaa n so ni, na bu ahore ajo agaya. ¹¹ Na ba ko awura awuru n nu, na ba nu baa n ni i ni Mariya na ba kutu i, na ba yo i anse. Na ba nya ateke bu kurukum, na ba yi aceerim ace i. Aceerim n la sika, ni tulaalee nvanvanifo be, i ti samene wo, ni baka nyunvuin nvanvanifo. ¹² Nyini sin na ba fa atin be akpie bu nyi ako bu bosu, dama Nyeme ase bu alele nu ka má bu ko Feme Herode do kun.

Kabo Yosefu faari Yesu ni i ni nmati koori Ijipiti ni

¹³ Asarambaa koresiyifom n ko wieeri ni, na Micera n dæ mereke aba Yosefu do alele nu, aba ase i ka, "Yasu fa baa n ni i ni na am nmati ko Ijipiti asien su, má nyini Feme Herode wo baa nienie su na i kun i. Am ko wo do haari een bo m bá kaaki ba ma am noo ka am yasu do." ¹⁴ Na Yosefu ayasu afa baa n ni i ni nmati kongue n kere, na ba ko Ijipiti asien n su, ¹⁵ na ba wo do haari Feme Herode aba awu. Ahin yoori so ni, i ma kabo Micera n ma i noanie kanfom n yo jooori n yo yiiwa a. I na, "Ma fere m wa n afite Ijipiti asien n su."

Kabo Feme Herode ma bu kuunri nbaabieso kan kanm ni

¹⁶ Sanja bo Feme Herode ba faari nu ka asarambaa koresiyifom n adadaka i ni, na wo fa yaa agaya, na wo ma i sojam noo ka bu ko Betilehem mie n nu, ni i aheme aheme n kere su na bu ko kun nbaabieso kan kanm

kere bo ba wu bu kisa, ko ju afo nnyo, dama i sunsun ka sanja n bo asarambaa koresiyifom n na asarambaa n tieeri ni, wo ju ka afo nnyo. ¹⁷ Nyini kere ka, kabo Nyeme noanie kanfo Jeremiya yo jooori n ayo yiiwa. I na,

¹⁸ “Ya ti awie bo nga Rama mie kpiri nu, sun ni ahoresaaki wo do, bara Rakeli susun i nbaam busu.

Wo kete ka ma be kpata i, dama i nbaam wo ma bere kun.”

Kabo Yosefu faari Yesu ni i ni fiteeri Ijipiti baari Nazareti ni

¹⁹ Sanja bo Feme Herode ba wuuri ni, na Micera n dee mereke aba Yosefu do alele nu Ijipiti asien n su, aba ase i ka, ²⁰ “Yasu fa baa n ni i ni, na am kpie am nyi ko Yisareli asien su, dama minem bo bu kpiiri ka bu kun baa ni, ba wu.” ²¹ Na Yosefu ayasu afa baa n ni i ni, na ba kpie bu nyi ako Yisareli asien n su. ²² Ama, sanja bo i tiiri ka Akilawu adi i si Feme Herode femeya n Yudiya awore n nu ni, na sere ati i ni kabo i ko wo do. Na Nyeme mereke aba i do alele nu, aba akere i kabo i yo, na wo yasu ako Galili awore n nu ako awo mie be bo bu fere i ka Nazareti n su. ²³ Nyini n kere ka, kabo Nyeme ma i noanie kanfom n jooori n yo yiiwa a, fa ko Kristo Tiidefo n do. I na, “Bu fere i ka Nazaretifo o.”

3

Kabo Yohane Nyeme Nzue Biefo n kaanri Nyeme jore ni

¹ Nyini sanja n na Yohane Nyeme Nzue Biefo n ako Yudiya boro kpantain n nu, ko sukan Nyeme jore, i na, ² “Am kaaki am wo, dama sanja n adodo bo Nyeme Feme ba nie i minem su.” ³ Yiri Yohane n ye Nyeme noanie kanfo Esaya yo jooori i jore n a. I na, “Sono be subo ndoori boro kpantain n nu se ka, ‘Am sese Mibie n atin n su, na am yo i atin n dongu.’ ”

⁴ Yohane wuruari sutara bo bu faari nyooma ndore wuuri i a. Na wo fa jina abo i wi nu. I diire yo la lalom ni wie wo. ⁵ Na mine afite Yerusalem mie kpiri n nu, ni Yudiya dee awore miem kere su, ni Yodan dee bue n kere aba i do, ⁶ na ba kan bu ngasi ni bu satie kere akere Nyeme, na Yohane abie bu Nyeme nzue Yodan kunma n nu.

⁷ Ama, sanja bo i ba juuri ka Farasifom ni Sadusifom dongu suba i do ka i bie bu Nyeme nzue ni, na wo se bu ka, “Ambere burukoonufom bo am ti ka woom ni, na seeri am ka am nmati fite nyini suicin kekereke n bo Nyeme sufa ba am do n nu a? ⁸ Am yo sakpa bo i kere ka am akaaki am wo. ⁹ Na ma am sunsun ka Abraham ti am na n dee ti, na am koro fite nyini suicin n nu. M suse am wo lee, ka, Nyeme koro ma ahin yabuem ni kaaki nbaam ma Abraham. ¹⁰ Nyeme asi i samba n nana ase baka kere bu na i kpie i ji sin nu, yiri bo i suuwa ti ma kpa ni. ¹¹ Mini sufa nzue bie am a, na am yo casi, bo i kere ka am akaaki am wo, ama, yiri bo i wo m sin suba n tara m fieo, m ti kaan ni bo m dodo i. Yiri fa Awiewie Casi n ni sin yo am casi a, kabo sono bie nzue na i yo casi ni. ¹² I bita i ngani kpaja fieeba bo i ba bobo ngani n gbangba n su, na i kpaja yi ngani mbaa n fa go i bondo nu, na i nya yara kunkun n sin n bo i je na i no ma n nu.”

Kabo Yohane bieeri Yesu Nyeme nzue ni

¹³ Nyini sangga n na Yesu afite Galili awɔre n nu, aba Yohane dɔ Yodan kunma n nu ka Yohane biɛ i Nyemɛ nzue. ¹⁴ Ama, na Yohane akete ka i biɛ má Yesu Nyemɛ nzue ni. I ɲa, “Má i ti ye ni ka wɔɔ biɛ m Nyemɛ nzue a, ye nzu ti ye a ɲa mini biɛ u a?” ¹⁵ Ama, na Yesu abɔ i nu ka, “Ma ya yo sɔ adena ya yo deke kɛrɛ bo Nyemɛ koro ni.” I seeri sɔ n na Yohane asoro su. ¹⁶ Sangga bo Yohane biɛeri Yesu Nyemɛ nzue n wieleri n na i fiteeri nzue n nu ni, kpenɲa na angoro ateke, na wɔ ɲu ka Nyemɛ Awiewie n ajura ka tiywa dɛɛ su aba atana i ɲu. ¹⁷ Dɔ na wɔ ti akonvi be ɲga angoro, i ɲa, “Ahin ti m wa a, m koro i agaya, m ahore ajo i ɲu.”

4

Kabo Sitana yoori Yesu na i nie ni

¹ Nyini sin na Nyemɛ Awiewie Casi n afa Yesu akɔ boro kpantain n nu ka Sitana kɔ yo i na i nie, ka i yɔ yiri Sitana n dɛɛ koroowa nzen i yɔ má.

² Dɔ na Yesu acici i nɔɔ haari cɛɛn aburana, kɔɲɲue ni wiesu bo i di má pui, na ahɔɛ aba ati i. ³ Na Sitana bo bu kaaki fere i ka ɲɲeesɔfɔ n aba ase i ka, “Nzen a ti Nyemɛ Wa, se ahin yabuɛm n na bu kaaki diire.” ⁴ Ama, na Yesu abɔ i nu ka, “Ba kɛrɛ i Nyemɛ Jɔrɛ Kadasi n nu ka, ‘Má diire ɲgumi ma sɔnɔ ɲɔɔ a,

ama, i de noanie kɛrɛ bo i fite Nyemɛ dɔ n gusu.’ ”

⁵ Na Sitana n akaaki afa Yesu akɔ Yerusalem mie kpiri n nu, na wɔ kɔ afa i ajina Nyemɛ Sereebiri Awuru n tii su lenɲɲe, na wɔ se i ka, ⁶ “Nzen a ti Nyemɛ Wa, ti tɔ asiɲɲu na m nie. Dama ba kɛrɛ i Nyemɛ Jɔrɛ Kadasi n nu ka,

‘Nyemɛ má i mɛrekem nɔɔ na bu nie u dika.’

Ba kaaki akɛrɛ i ka,

‘Bu fá bu saa so u nu,

na má u jaa bo yabuɛ be.’ ”

⁷ Na Yesu ase i ka, “Ba kaaki akɛrɛ i Nyemɛ Jɔrɛ Kadasi n nu bekun ka, ‘Má a yo Micera Nyemɛ n na a nie kabo i yiko ti barasu.’ ”

⁸ Nyini sin na Sitana n afa i akɔ buka be tii su lenɲɲe, na wɔ kere i durunya n nu asien kɛrɛ, ni kabo bu ti na bu yo nyumi barasu. ⁹ Na wɔ se i ka, “Nzen a kutu suuri m, m fá nyinim n kɛrɛ ma u.” ¹⁰ Na Yesu ase i ka, “Wɔɔ Sitana, fa cinsi m bi bere. Dama ba kɛrɛ i Nyemɛ Jɔrɛ Kadasi n nu ka,

‘Kutu Micera u Nyemɛ ni,

na a su yiri ɲgumi.’ ”

¹¹ Na Sitana n akɔ ayaki i, na Nyemɛ mɛrekem aba i dɔ na ba ba asu i.

Kabo Yesu boori i juma bu Galili awɔre n nu ni

¹² Na sangga bo Yesu ba tiiri ka ba tara Yohane anyi i dansaraka ni, na wɔ fite bere akɔ Galili awɔre n nu. ¹³ I yasuri Nazareti mie n nu ni, na wɔ kɔ awo Kapenam mie kpiri n bo i wo dodo Galili kunma kpiri ni, na i wo Zabulonfɔm ni Nafatalifɔm dɛɛ awɔre n nu ni. ¹⁴ I kɔ tanaari dɔ ni, adena kabo Nyemɛ noanie kanfɔ Esaya yo jɔjɔri n yo yiiwa. I ɲa,

¹⁵ “Zabulon ni Nafatalifɔm, am so am sui,

ambere bo am wo dodo kunma kpiri n bo i wo Yodan kunma n wie afiiri dɛɛ bue ni,

ambere bo am wo Galili awɔre n ni, deke bo bu ti má Yudafɔm wo ni, am so am sui.

¹⁶ Minem bo bu wo awosin nu ni,

ba ɲu wein bambaka ni.
Na bo bu wo awosin ni yiwee nu ni,
berɛ ye sin ni jé ta wein ma bu a.”

¹⁷ Fite nyini sanɣa n na Yesu abo i bu sukan Nyemɛ jɔrɛ, i ɲa, “Am kaaki am wo, dama sanɣa n aju bo Nyemɛ Fɛmɛ bá niɛ i minɛm su.”

Kabo Yesu fereeri jombaa tarafɔ nbem ka bu su i su ni

¹⁸ Na sanɣa bo Yesu sunati Galili kunma kpiri n nɔɔ su ni, na wɔ ɲu mine nnyɔ nbem, bu ti sɔnɔ kun nbaam wɔ. Berɛ la Simon bo bu fere i ka Petoro ni, ni i niema Andere. Bu wo bu diendiɛ sandi su kunma kpiri n nu, dama bu ti jombaa tarafɔm wɔ. ¹⁹ Na Yesu ase bu ka, “Am bra na am ba su m su na m má am tien minɛm nɔɔ ma m, kabo am tara jombaam ni.” ²⁰ I seeri sɔ ni, na ba kaba ayaki bu diendiem ni, na ba su i su.

²¹ I nati kɔɔri i nyunu kaan, na wɔ ɲu mine nnyɔ nbem bekun, bu ni bu si, bu fere i ka Zɛbedi, berɛ la Yakobo ni i niema Yohane. Bu ni bu si n wo lee nu suyo bu diendiem dɔɲgu, na Yesu afere bu. ²² Dɔ na ba kaba afite lee n nu ayaki bu si ni, na ba su i su.

Kabo Yesu kaanri Nyemɛ jɔrɛ na i ma tukpakifɔm nyaari laifɛ ni

²³ Na Yesu abara aye Galili awɔrɛ n kɛrɛ nu, na i sukere minɛm bu tientienbunɔɔ sɔɔm n nu, deke bo bu sere Nyemɛ na bu kere minɛm Nyemɛ jɔrɛ nu ni, na i sukan labari kpa n fa kɔ Nyemɛ fɛmɛya n su, na wɔ ma minɛm bo bu la tukpaki barasu barasu n kɛrɛ anya laifɛ. ²⁴ Na i duma ata abara aye Siriya awɔrɛ n kɛrɛ nu, na ba sɔ minɛm bo bu la tukpaki barasu barasu kɛrɛ, ni bo bu di yaari agaya bu ɲuniɛmbaa nu, aba i dɔ ka i ma bu nya laifɛ. Ajinim wo bu nbem ɲu, na nbem tɔ ɲgbiti, na nbem gusu saam ni bu jaam awu, na wɔ ma bu kɛrɛ anya laifɛ. ²⁵ Na jama beberebe afite Galili awɔrɛ n nu, ni Miɛ Burum dɛɛ awɔrɛ n nu, ni Yerusalem miɛ kpiri n nu, ni Yudiya dɛɛ awɔrɛ n nu, ni Yodan kunma n sin dɔ, na bu kɛrɛ aba asu i su.

5

Kabo minɛm yo na bu nya terefɛ Nyemɛ dɔ ni

¹ Yesu ɲuuri jama n ni, na wɔ fun akɔ atana buka be su. Na i susufɔm n aba i dɔ. ² Na wɔ bo i bu ka i kere bu, i ɲa,

³ “Berɛ bo bu ti yaarifɔm bu ahore su ni,
terefɛ wo bu dɔ,
dama Nyemɛ fɛmɛya n ti bu dɛɛ wɔ.

⁴ Berɛ bo bu ahore asaaki ni,
terefɛ wo bu dɔ,
dama Nyemɛ dá bu ahore a.

⁵ Berɛ bo bu yo bu ɲu kaan ma Nyemɛ ni,
terefɛ wo bu dɔ,
dama Nyemɛ bá fa durunya n ma berɛ wɔ.

⁶ Berɛ bo bu nyunu aboro ka bu yo sa bo i kɔ atin su
kabo sɔnɔ la konviki fa kɔ diire ni nzue busu ni,
terefɛ wo bu dɔ,
dama Nyemɛ bá ma bu akunnuyi a.

⁷ Berɛ bo bu si aɲunfɔ ni,
terefɛ wo bu dɔ,
dama Nyemɛ bá si bu aɲunfɔ a.

- ⁸ Bere bo bu ahorembaa ti casi ni,
terefie wo bu do,
dama bere ba ny Nyeme a.
- ⁹ Bere bo bu kpata aluwa ni,
terefie wo bu do,
dama Nyeme ba fere bu ka i nbaam a.
- ¹⁰ Bere bo bu yo sa bo i ko atin su n dee ti
na minem kere bu wuwuruwa ni,
terefie wo bu do,
dama Nyeme femeya n ti bere dee a.”

¹¹ Na Yesu akaaki ase ka, “Amberere bo minem ba kpie am nzuko, na bu kere am wuwuruwa, na bu bu kore barasu kere so am, na i kere fite ka am ti m deem dee ti, terefie wo am do. ¹² Bu ba yo am so, am ma am ahore jo agaya, dama am nya nkato bambaka Nyeme do. I fite ka, kabo bu yo kereeri dawa dee Nyeme noanie kanfom n wuwuruwa n lee.”

Kabo Yesu na i susufom ti ka njin ni wein ni

¹³ Na Yesu ase ka, “Amberere, m susufom ni, am ti ka njin wo durunya n nu a. Ama, nzen njin fiefie nya ba saari wieri, i koro yo ma i fiefie kun. Nyini sangha ni, wo ka ngbeen lee, nka bu fa butu wo, na minem tientien sangha i ni fa. ¹⁴ Amberere ti wein bo i ta ma durunya n nufom a. Mie kere bo i wo kperere su, sono kere ni u wo. ¹⁵ Sono be nya so ma fitana su na i fa gangha butu su, ama, i fa taka deke su angoro wo na i ta wein ma awuru n nufom kere. ¹⁶ Nyini ti, am ma am wein ta durunya n nu, na sono kere ni am sakpa yoowa, adena bu kansi am Si Nyeme bo i wo angoro ni.”

Kabo Yesu na ya su Nyeme noanie kpamaawa n su barasu ni

¹⁷ Na Yesu ase ka, “Fa ko Moyisi noanie kpamaawa n ni Nyeme noanie kanfom dee kereawa n su, ma am sunsun ka ma ba ka m ba ce bu se wo. Ai, ma ba ma ka m ba ce bu se wo, ama, ma ba ka m ma i kere ba yo yiiwa a. ¹⁸ Nahore ye m suse am na, kabo angoro ni asienngu toko wo bere ni, bu yi ma noanie n be haari kampiti so n mmoo fite ma noanie kpamaawa n nu, haari na i deke n kere ba awieeri. ¹⁹ Nyini ti, sono kere bo i buuri Nyeme noanie maawa n kampiti so mmoo ngbeen, na i kereeri minem ka bere gusu yo so, bu fere i mi ka sono kaan Nyeme femeya n nu. Ama, sono kere bo i suuri Nyeme noanie kpamaawa n su na i kereeri minem ka bu gusu yo so, bu fere i mi ka sono bambaka Nyeme femeya n nu. ²⁰ Nyini ti, m suse am wo lee, ka, kana am ba wura Nyeme femeya n nu, ma ka am yo sa bo i ko atin su Nyeme do n tara Farasifom, ni Nyeme noanie kerefom dee ni.”

Kabo Yesu kere fa koori yaafa su ni

²¹ Na Yesu akaaki ase ka, “Am ati ka bu seeri ya nam ka, ‘Ma a kun sono,’ na ‘Nzen woro kere bo a kuunri sono, bu di u jore.’ ²² Ama, m suse am wo lee, ka, woro kere bo a faari yaa u benggu ni, wo yo daka ka bu di u jore. Sasu bekun, woro kere bo a seeri u benggu ka i ti sono ngbeen, wo yo daka ka bu fa u jina Yudafom joredifo nkpienkpienm n nyunu na bu di u jore. Na nzen woro kere bo a seeri u benggu ka i ti sinnzin, Nyeme fa u wura ceema sin n nu. ²³ Nyini ti, nzen a fa u aceeri aba ka a ba sere Nyeme, na a tenge su ka u ni u benggu be la ngasi, ²⁴ yaki u aceeri n yoowa yoobiri n ka, na a ko na am ko yo am afien dongu, na a nya ba fa u aceeri n ma Nyeme. ²⁵ Nzen u ni be la jore, na nzen i koro ka i fa u ko jore diibiri,

jokoti tara i mi n jaa, na má jore n ju jore diibiri n ni, má nyini, i mi ni fá u kó wura joredifo n saa nu, na yiri gusu fá u ma dansaraka niefó ni, na yiri gusu nyá nyi u. ²⁶ Nahore ye m suse u n a, nzen a woori do na a to má kaari n kere awie má, a nyá má atin fite má dansaraka n nu.”

Kabo Yesu kere fa koori ajaa ciire saaki su ni

²⁷ Na Yesu akaaki ase ka, “Am ati ka ba se ka, ‘Má a saaki ajaa ciire.’
²⁸ Ama, mini, m suse am wo lee, ka, woro kere bo a nie bara, na u konvi wuraari i, i ti ka a saaki ajaa ciire u ahore su wo lee. ²⁹ Nzen u nyumbaa n kun cin u wuraari satie nu, lokoti yi i tu. I ti ye ni ka a fun u nuniembaa n bue kun, ni bo a fa u nuniembaa n kere wura ceema sin nu. ³⁰ Nzen u saa fomboro cin u wuraari satie nu, kaba kpie i tu. I ti ye ni ka a fun u nuniembaa n bue kun, ni bo a fa u nuniembaa n kere wura ceema sin nu.”

Kabo Yesu kere fa koori bara ajaa yaki su ni

³¹ Na Yesu akaaki ase ka, “Sasu bekun, ba kaaki ase am ka, ‘Sono kere bo i yaki i yi ajaa, i ti ye ni ka i mi ma bara n ajaa yaki kadasi bo i kere ka i hun ayaki i ajaa.’ ³² Ama, mini, m suse am wo lee, ka, sono kere bo i faari i yi jiiri, na wo yo má ka bara n ako somaya ye i fa i jiiri a, na nzen bara n ko jaari bieso fofore, i mi n ma bara n asaaki ajaa ciire lee. Na sono bo i faari bara n jaari, yiri gusu asaaki ajaa ciire lee.”

Kabo Yesu kere fa koori ndie taanwa su ni

³³ Na Yesu akaaki ase ka, “Am akaaki ati ka ba se ya nam ka, ‘Má a tan ndie na a kaaki woro u noo, ama, ma u sui wo ndie bo a tan i ama Micera n su, na a yo i.’ ³⁴ Ama, mini, m suse am wo lee, ka, má am tan ndie mmoo fieo. Má am tan angoro, dama Nyeme femeya n woobiri lee. ³⁵ Má a tan asienngu gusu, dama i ti Nyeme jaa gbagbaa jinaabiri wo. Má a tan Yerusalem, dama i ti ya Micera Feme n dee mie kpiri wo. ³⁶ Má a kaaki se ka a tan u tiawa, dama a koro yo má u tiijmie kun mmoo fofoe, wara biri. ³⁷ Am ma am noanie kere yo tika. Nzen i ti ‘Een,’ am se ka, ‘Een.’ Nzen i ti ‘Ai’ gusu a, am se ka, ‘Ai.’ Sin nyini sin, noanie kere bo i buka su n fite Sitana do o.”

Kabo Yesu kereeri ka má ya fa minem satie to bu kaari ni

³⁸ Na Yesu akaaki ase ka, “Am ati ka ba se ka, ‘Nzen sono yi u nyumbaa, woro gusu yi i mi dee, na nzen i bo tuuri u jee, woro gusu tu i mi dee.’
³⁹ Ama, mini, m suse am wo lee, ka, nzen sono yoori u satie, má a woro satie ma i mi. Haari nzen be fiinri u nyoonu, kaaki bue nyinga n gusu ma i na i fin buka su. ⁴⁰ Nzen be cici u lekisi ka i fa u ko jore diibiri, na i de u tanlee kaan n be i wo i bu ni, kaba yi i tii su dee bambaka n mmoo buka i su. ⁴¹ Nzen fangafó be miexeri u ka a so i soori ko ju ajaari natiwa akpii kun ma i, kaba fa i ko ju akpii nnyo. ⁴² Sono bo i sereeri u deke be, má a kpie i, na sono bo i na a fie i deke be, má a kete.”

Kabo Yesu kereeri ka ya koro minem bo bu kpo ya ni

⁴³ Na Yesu akaaki ase ka, “Am ati ka ba se ka, ‘A koro sono bo i koro u ni, na a kpo sono bo i kpo u ni.’ ⁴⁴ Ama, mini, m suse am wo lee, ka, am koro am kprofom, na am sere Nyeme ma bo bu kere am wuwuruwa ni, ⁴⁵ adena am yó am Si Nyeme bo i wo angoro ni nbaam. Dama yiri ma wiefite ma satiefofom, ni sakpayofom kere a, na i kaaki ma nzue to ma bo bu yo sa bo i ko atin su i do ni, ni bo bu yo má sa bo i ko atin su i do n kere.”

46 Nzen am nya koroori minem bo bu koro am ngumi ni, nzu nkato, ye am nya i a? Dama haari lampodefom bo bu sisi minem ni mmoo yo so o.
 47 Na nzen am bisa am danfom ngumi ahin, am sunsun ka am ayo nzu sakpa ye be koro yo ma i a? Bo bu su ma Nyeme ni mmoo koro yo so, ma so? 48 To, am ma am woowa n ti kpa bo i la ma anjusu, kabo am Si Nyeme bo i wo angoro n dee woowa n ti kpa bo i la ma anjusu ni.”

6

Kabo Yesu kereeri ya ka ya ce yaarifom aceeri barasu ni

1 Na Yesu ase bu ka, “Am si am nu sa, na ma am yi am nyemesu sayoowa fite fofoe nu, adena minem nu i na bu kansu am. Nzen am yoori so, am nya ma nkato be, am Si Nyeme bo i wo angoro n do.

2 Nyini ti, nzen a na a ce yaarifom aceeri, ma a bo ndoori na sono kere ti, kabo burukoonufom yo i bu tientienbunoo soo n nu, ni mie kunnu atingberem n su ni, dama bu yo so o, adena minem kansu bu. Nahore ye m suse am n a, bere nkato awieeri lee, ye ba du mo anya i n a. 3 Ama, nzen a na a ce yaarifom aceeri, ma a ma be nu i fieo, na bu si sa bo a suyo i ni, 4 adena u aceeri n yo asiri nu. Do na u Si Nyeme bo i nu sa kere bo a yo i asiri nu ni, n to u kaari.”

Kabo Yesu kereeri ya nyemesere atin barasu ni

5 Na Yesu akaaki ase ka, “Nzen sanja bo am ba susere Nyeme, ma am yo kabo burukoonufom yo ni, dama bere koro ka bu sujina bu tientienbunoo soom n nu, ni deke bo atingberem jaja nu ni, na bu sere Nyeme adena minem nu bu. Nahore ye m suse am n a, bu nkato awieeri lee, ye ba du mo anya i n a. 6 Ama, sanja bo a ba susere Nyeme, wura u sooo na a nyi u ano, na a sere u Si Nyeme bo be nu ma i ni, na u Si Nyeme bo i nu sa kere bo a yo i asiri nu ni, nya to u kaari.

7 Na sanja bo am ba susere Nyeme, ma am yo nanmie kabo bo bu su ma Nyeme n yo ni, dama bu sunsun ka bu jooori beberebe n ye Nyeme de bu sere a. 8 Ma ambere yo ka bere, dama am Si Nyeme si am sa koroowa kere n mmoo ka, ye am nya sere i a.

9 Nyini ti, kabo i ti ye ni ka am sere Nyeme yaa.

‘Ya Si, bo a wo angoro ni,
 ma minem bu u dama casi ni.

10 Ma u femeya n bra.

Ma u koroowa yo asienngu fen, ka aleceema nu.

11 Ma ya nyuma dee ceen nu, ya noo nu diire.

12 Fa ya ngasi fa ce ya,

kabo ya gusu afa ace bo bu do ya ngasi ni.

13 Ma a ma deke be yo ya na ya wura satie nu,
 ama, yi ya fite anyumbiri nu.

[Dama, u dee la femeya, ni fanga, ni jirima sanja kere. Ami.]’

14 Dama nzen am fa minem ngasi ce bu, am Si Nyeme bo i wo angoro n gusu fa am dee ce am. 15 Ama, nzen am afa ma minem ngasi ace ma bu, am Si Nyeme bo i wo angoro n gusu fa ma am dee ce ma am.”

Kabo Yesu kereeri ya ka ya cici ya noo ni

16 Na Yesu akaaki ase ka, “Sanja bo am sucici am noo, ma am nie anjuno nie kabo burukoonufom yo ni, bu yo ma bu nu nyankandi, adena minem

ɲu ka ba cici bu nɔɔ. Nahɔɛ ye m suse am n a, bu ɲkatɔ awieeri lɛɛ, ye ba du mɔ anya i n a. ¹⁷ Ama, nzen a ba sucici u nɔɔ, yo u ɲu nyankandi, ¹⁸ adena má minem si nu ka a sucici u nɔɔ, má ka u Si Nyeme bo be ɲu má i ni, na yiri u Si Nyeme bo i ɲu sa kere bo a yo i asiri nu ni n tó u kaari.”

Kabo Yesu ɲa ya tien ajɛke nɔɔ se Nyeme dika n nu ni

¹⁹ Na Yesu akaaki ase ka, “Má am tien ajɛke nɔɔ se durunya n nu fɛn, bo watarawam muka i na i kpɔɔ, na i tɔ ɲgambulaari, na awiefɔm gusu bá wura wɔ i. ²⁰ Ama, am tien ajɛke nɔɔ se Nyeme dika n nu, bo watarawam koro muka má i, na i koro tɔ má ɲgambulaari, na awiefɔm gusu koro wura wɔ má i. ²¹ Dama deke bo u ajɛke wo ni, u ahorembaa kere gusu wɔ ɔ.”

Kabo Yesu kereeri anyumbaa kpa jɔɛ ni

²² Na Yesu akaaki ase ka, “Ya nyumbaa ni ti ka fitana ma ya ɲuniembaa n a. Nzen u nyumbaa nya ti kpa, u ɲuniembaa n kere tá wein n wɔ lɛɛ. ²³ Ama, nzen u nyumbaa nya ti má kpa, u ɲunie kere wo awosin nu wɔ lɛɛ. Nyini ti, nzen wein wo má u ɔɔ, nyini n la ka, a wo awosin bambaka bo i la má aɲusu nu lɛɛ.”

Kabo Yesu ɲa ya daafi Nyeme ɲu barasu ni

²⁴ Na Yesu akaaki ase ka, “Sɔnɔ kun koro sanɲa su má mibiɛm nnyɔ. Nzen i ɲa i yó sɔ, i kpó kun wɔ, na i kóro nyinga ni, wara i bóro i nyi su kun n wɔ, na i bú nyinga ni ɲgbeɛn. Am koro sanɲa su má Nyeme ni ajɛke.”

²⁵ Na Yesu akaaki ase ka, “Nyini ti, m suse am wɔ lɛɛ, ka, má am tana sukoko fa kɔ am ɲɔɔ su, kabo am dí, ni kabo am nú, na má am kaaki sukoko fa kɔ am ɲunie su, kabo am nyá suturam bo am fá wura na am kára. Dama ɲɔɔ n tara diire, na aɲuniembaa n gusu tara suturam, má sɔ? ²⁶ Am nie anumam, haari ni bo bu ɔɔ má ni, na bu kaaki kpɛ má ni, bu tambu gɔ má bondo nu gusu, se am Si Nyeme ma bu diire ye bu di a. Ambere la anyunuyi tara anumam, má sɔ? ²⁷ Am nu, ɲma tana koko fa kɔ i koroowam su ye i mi koro buka i ɲɔɔ tintiin su haari kaan sɔ a? ²⁸ Ye nzu ti ye am ma suturam sa mie am a? Am nie kabo wuram bo pum barasu barasu a. Bu yo má juma be, bu tu má gise. ²⁹ Ama, m suse am wɔ lɛɛ, ka, haari Feme Solomon, ni i neɲe n kere bo i yo la i ni, wɔ la má sutura bo i yo nyumi juuri nyini wura pum ni be. ³⁰ Nzen wuram bo bu wo bere nyuma, na ahunma a ɲú ka ba kpɛ bu na bu yara bu, ye Nyeme nie bu dika, nzu ti ye i nie má ambere bo am tara wuram ɔ n a? Ambere, am yarada n ti kaan sɔ. ³¹ Nyini ti, má am tana koko se ka, ‘Ye ya dí nzu wɔ?’ wara ‘Ya nú nzu wɔ?’ wara ‘Ya wúra nzu wɔ?’ ³² Dama bo bu su má Nyeme ni, bere sunsun sɔ sanɲa kere a. Am Si Nyeme si ka am koro nyinim n kere. ³³ Nyini ti, am du mɔ kpini Nyeme femeya n ni sa bo i kɔ atin su i ɔɔ n busu ka, na i nyá ba fa nyini dekem n kere buka am su. ³⁴ Nyini ti, má am koko fa kɔ ahunma su, ahunma mmɔɔ kpini i deɛ. Dama nyuma deɛ sunsunni mmɔɔ ase su.”

7

Kabo Yesu ɲa má ya jɔɔ be jɔɛ jaraki i ni

¹ Na Yesu ase bu ka, “Má am jójó be jóré na am jaraki i, adena má Nyeme gusu jójó amberé jóré jaraki am. ² Dama kabo am jójó am bengum jóré jaraki bu ni, so ye Nyeme gusu jójó am gusu jóré jaraki am a. Góngó bo am fa susu ma minem ni, so ye Nyeme gusu fá susu ma am a. ³ Nzu ti ye a nie ñu wura mbaa n bo i wo u niwa nyumbaa nu, ye a nie ñu má yeenzin n bo i wo u ðee nyumbaa n nu a? ⁴ A yo se koro se u niwa ka, ‘Ma m yi wura mbaa n bo i wo u nyumbaa nu ni,’ ye sanja kere yeenzin n wo u ðee nyumbaa n nu a? ⁵ Woro burukonufo ni, du mo yi yeenzin n bo i wo u nyumbaa nu n ka, na a nya ñu asi nyunyumi na a yi wura mbaa n bo i wo u niwa n ðee nyumbaa nu ni.

⁶ Má am se ka am fa deke bo i ti casi fa ma caam, nzen am yoori so, bu kpíe bu nyi fon tara am wo, na bu kán titi am nu. Sasu bekun, má am se ka am fa afere fofoem bo bu la go agaya, fa tu afam. Má nyini, bu tíentien i su wura fa nu wo.”

Kabo Yesu ña Nyeme de ya nyemesere barasu ni

⁷ Na Yesu akaaki ase bu ka, “Am sere deke bo am koro i Nyeme do, na i má am. Am niénié deke bo am koro i do, na am ñú i. Am bobo anó ni, na i téke i ma am. ⁸ Dama soro kere bo i sere Nyeme deke be, i má i, na soro kere bo i niénié deke be, i ñú i, na soro kere bo i bobo anó ni, i téke i ma i. ⁹ Amberé nu, ñma ye i wa sere i diire, ye i mi kéte na i fá yabue ma i wa n a? Ai, be yo má so. ¹⁰ Wara, amberé nu, ñma ye i wa sere i jombaa ye i kéte na i fá woo ma i wa n a? Ai, be yo má so. ¹¹ To, amberé, haari ni bo am ti satieyofom ni, am si aceeri kpam bo am fá ce am nbaam, nzu ti ye nzen am sereeri am Si Nyeme bo i wo angoro ni, i koro ma má am aceeri kpam a?

¹² Nyini ti, kabo am koro ka minem yó ma am ni, am yo i so ma bu, dama Nyeme noanié kpamaawa n jóré n kere lee, na i noanié kanfom ðee buka su.”

Kabo Yesu jójó fa kóori anó n bo i ti fii n jóré ni

¹³ Na Yesu akaaki ase ka, “Am fa anó n bo i ti fii n na am wura. Dama atin n bo i fa minem kó saakiibiri ni, i anó n ti teteré wo, na i natiiri ti má kekere, nyini ðee ti, minem dongu fa yiri wo. ¹⁴ Ama, atin n bo i fa minem kó ngóo woobiri ni, i anó n ti fii wo, na i atin gusu nati ti kekereke, nyini ðee ti, minem bo bu ñu nyini atin n na bu su i su ni, bu sunnu má.”

Kabo Yesu ña ya fa minem sayoowa fa si bu ni

¹⁵ Na Yesu akaaki ase ka, “Am si am ñu sa ni korefom bo bu yo bu ñu ka bu ti Nyeme noanié kanfom ni. Bu yo bu ñu benle ka nbóem wo, ama, bu ti ka bedim wo, na bu ti tie. ¹⁶ Bu sayoowa n nu, ye am koro fa si kabo bu ti barasu a. Am anu ka buwe asu koto? Wara, am anu ka bedikantonja asu ndorowa? Ai. ¹⁷ Ama, i ti so o lee, ka baka kpa kere su suuwa kpa a, na baka ngbeen kere su suuwa ngbeenngbeen. ¹⁸ Baka kpa koro su má suuwa ngbeen, na baka ngbeen gusu koro su má suuwa kpa. ¹⁹ Baka kere bo i su má suuwa kpa, bu kpíe i wo, na bu fa ji sin nu. ²⁰ Nyini ti, bo bu yo bu ñu ka bu ti Nyeme noanié kanfom ni, bu sayoowa n nu, ye am koro fa si kabo bu ti barasu a.”

Kabo Yesu jójó fa kóori jina céen n jóré ni

²¹ Na Yesu akaaki ase ka, “Má soro kere bo i bo fere m ka, ‘M Mibie, m Mibie,’ ni wura Nyeme femeya n nu a, se má ka bo bu yo m Si Nyeme bo i

wo angoro n dɛɛ koroowa ni. ²² Jina cɛɛn n ba juuri, mine dongu bá se m ka, ‘Ya Mibiɛ, niɛ e. Ya yo faari u dɛɛ duma, na ya fa akan Nyɛmɛ jɔrɛ, na ya fa u duma n afɔn ayi ajinim afite minɛm nɔ, na ya kaaki afa u duma n ayo alekutura sam dongu.’ ²³ Na m nya se bu ka, ‘Amberɛ satieyofɔm ni, am fa cinsi m bi berɛ. M si má am cɛɛn n be cɛɛn n be da.’ ”

Miɛnu fa kɔ ataari tafɔ nnyɔ nbem jɔrɛ

²⁴ Na Yesu akaaki ase ka, “Nyini ti, sɔnɔ kɛrɛ bo i tiiri m dɛɛ nɔaniɛm n na i deeri i na i fa yoori juma, i mi ti ka alecirafɔ be bo i taari i awuru na i seeri i jaa n yabue su n wɔ. ²⁵ Na nzue aba atɔ, na wawa n kɛrɛ ayi asandi, na anuma akpisi awuru ni, ama, wɔ tɔ má, dama i jaa jina yabue su n dɛɛ ti. ²⁶ Ama, sɔnɔ kɛrɛ bo i tiiri m dɛɛ nɔaniɛm n na wɔ de má i, afa ayo má juma, i mi ti ka sinnzin be bo i taari i awuru nmiɛ nu n wɔ. ²⁷ Na nzue aba atɔ, na wawa n kɛrɛ ayi asandi, na anuma akpisi awuru n na i kɛrɛ abereki atɔ liim. Nyini awuru n tɔɔwa n tiiri tie haari.”

²⁸ Saɔga bo Yesu ba jɔjɔri sɔ wieeri n na jama n ayo alekutura fa kɔ i kereewa n su, ²⁹ dama i kereewa n awo i nɔgumi ni Yudafɔm dɛɛ Nyɛmɛ nɔaniɛ kerefɔm ni. I kereewa n nu la yiko.

8

Kabo Yesu tuntuunri kokofɔ be ni

¹ Saɔga bo Yesu juraari buka n su ba juuri n na jama beberebe asu i su. ² Na kokofɔ be aba i dɔ, na wɔ ba akutu i nyunu asere i ka i buka i, i nɔa, “M Mibiɛ, nzen a koro ka a ma m nya laifiɛ, a koro ma m nya i.” ³ Na Yesu atɛnɔge i saa anana i nɔ, na wɔ se i ka, “M koro. Nya laifiɛ.” Na kokobi n akaba ayaki sɔnɔ n na wɔ nya laifiɛ. ⁴ Dɔ na Yesu ase i ka, “Má a se ka a se be ahin jɔrɛ ni, ama, kɔ na a kɔ fa u nɔ kere Nyɛmɛ sayoowa donɔguyofɔ ni, na a kɔ yo yoowa n bo Moyisi yo kereeri dawafɔm ni, dama nyini kere minɛm ka a nya u nɔ a.”

Kabo soja kpɛn be yoori Yesu yarada agaya ni

⁵ Saɔga bo Yesu kɔ wuraari Kapenam miɛ kpɛri n nu ni, na Romafɔm soja kpɛn be aba asere Yesu jande ka i buka i, ⁶ i nɔa, “M Mibiɛ, m gbefɛnɛ da awuru, i saa ni i jaa kɛrɛ awu, i sudi wahara agaya.” ⁷ Na Yesu ase i ka, “M bá na m ma i nya laifiɛ.” ⁸ Na soja kpɛn n ase i ka, “M Mibiɛ, m ti kaan ni be a ba m dika. Ama, haari a ma nɔaniɛ n mmɔɔ, m gbefɛnɛ ni nyá laifiɛ. ⁹ Dama mini mmɔɔ ni m tii n wo sɔnɔ saa nu wɔ, na mini gusu nya la m dɛɛ sojam bo m niɛ bu su. Na bo m nya se i ka, ‘Kɔ fɛn,’ na i kɔ, na m se nyingga gusu ka, ‘Bra fɛn,’ na i ba. Na m se m akɔɔ n gusu ka, ‘Yo ahin,’ na i yo i.” ¹⁰ Saɔga bo Yesu tiiri sɔ ni, na wɔ yo alekutura, na wɔ se minɛm bo bu su i su n ka, “Nahɔrɛ ye m suse am n a, ma nya anɔ má sɔnɔ bo i la yarada agaya ka ahin sɔnɔ n nɔsu, haari fa saɔga ni Yisareliɔm mmɔɔ. ¹¹ M suse am wɔ lɛɛ, ka, minɛm beberebe fite durunya n wie afiiri, ni wie atɔɔri kɛrɛ, na bere, ni Abraham, ni Izaki, ni Jakɔbu bá saɔga tana Nyɛmɛ femɛya n nu, na bu dí na bu nú. ¹² Ama, na minɛm n bo má i ti ye ni ka berɛ wo Nyɛmɛ femɛya n nu ni, na Nyɛmɛ fa bu tu awosin nu. Dɔ na bu sún, na bu kán bu saa.” ¹³ Na Yesu anya ase soja kpɛn n ka, “Kɔ awuru. Kabo a yo yarada ni, i yó sɔ ma u a.” Na soja kpɛn n gbefɛnɛ n anya laifiɛ, nyini saɔga n bo Yesu fa jɔjɔri ni.

Kabo Yesu tuntuunri tukpakifom beberebe Petoro dika ni

¹⁴ Sanja bo Yesu wurari Petoro dika n na wo ɲu ka Petoro sibara da soro, i la ma i ɲu, yakoko abo i. ¹⁵ Na Yesu aso i saa nu, na yakoko n ayaki i, na bara n ayasu, na wo ko ayo diire ama i.

¹⁶ Nyini cɛn n naaso, na ba fa minem beberebe n bo ajinim wo bu ɲu ni, aba Yesu do. Na wo ma ajinim noo na ba fite, na wo tuntun tukpakifom na bu kere anya laifie. ¹⁷ I yoori so, na noanie n bo Nyeme noanie kanfo Esaya yo jooori i n yo yiiwa wo, i ɲa, “Na wo de ya afite ya torem, ni ya tukpaki kere nu.”

Minem bo bu koro ka bu su Yesu su n jore

¹⁸ Sanja bo Yesu ɲuuri jama n so ni, na wo se i susufom n ka bu kpie ko kunma kpiri n bukun do. ¹⁹ Na Nyeme noanie kerefo kun aba Yesu do, aba ase i ka, “Ya Kerefo, deke kere bo a ko, m su u su wo.” ²⁰ Na Yesu ase i ka, “Naakum la kunmam, na anumam gusu la tierim, ama, mini Adamande Wa n yiri, m la ma m tii daabiri.” ²¹ Na i susufom n kun be gusu ase i ka, “M Mibie, ma m du mo ko yo m si sutura ka, na m nya ba su u su.” ²² Ama, na Yesu ase i ka, “Woro su m su, na a yaki bo ba wu ni, na bu se bu beɲu.”

Kabo Yesu kereeri ka i la yiko tara anjuma ni nzue ni

²³ Nyini sin na Yesu awura lee nu, na i susufom n asu i su. ²⁴ Bu wo ko su so ni, na anjuma bambaka be ayasu nzue n nu, na i subo nzue go lee n nu. Ma lee ni suyi ni nzue wo. Ama, nyini sanja na Yesu wo daafiri su. ²⁵ Na i susufom n ako atenje i, na ba se i ka, “Ya Mibie, de ya tii ji, ma nyini, ya wu awie.” ²⁶ Na wo se bu ka, “Nzu ti ye am soro sere so a? Amberɛ, am yarada n ti kaan so o.” Na wo yasu atien anjuma n ni nzue n ɲu, na dika n kere atara jum. ²⁷ Na ba yo alekutura, na ba se ka, “Nzu sonombiri barasu la ahin, bo anjuma ni nzue n mmoo de i noanie a?”

Kabo Yesu fon yiiri ajinim fiteeri mine nnyo nbem ɲu ni

²⁸ Sanja bo Yesu kpieri kunma kpiri n ko juuri awore n bo bu fere i ka Gadara n ni, na i ni mine nnyo nbem aye, bu fite fanjunmam nu wo, ajinim wo bu ɲu. Bu ti tie haari bo be koro nati sin ma nyini awore n nu. ²⁹ Bu ɲuuri Yesu so ni, na ba tien afere i, bu ɲa, “Nyeme Wa, a koro nzu ya nu fen a? A ba ka a ba ma ya ɲu anyumboro wo ka, na sanja n nya ju, nzen se?” ³⁰ Nyini sanja afam beberebe wo di su, bu waari ma ni bere, ³¹ na ajinim n asere Yesu ka, “Nzen a ɲa a fon ya fite minem n ɲu, ma ya ko fun afam n ɲu.” ³² Na Yesu ase bu ka, “Am ko.” Na ba fite ayaki minem ni, na ba ko afun afam n ɲu. Dika n nu bere, na bu kere anmati acoondi ako ato kunma kpiri nzue n nu, na nzue n adi bu. ³³ Afa sasafom ni ɲuuri nyini n so ni, na ba ɲmati ako mie n kunnu ako abo ndoori, fa ko sa n bo wo yo n su. Na ba kan sa kere bo i tuuri minem n bo ajinim woori bu ɲu ni. ³⁴ Na mie n nufom kere pepere afite ako Yesu do. Sanja bo bu ko ɲuuri i so ni, na ba sere i jande ka i fite bu awore n nu.

9

Kabo Yesu tuntuunri sono bo i saam ni i jaam awu ni

¹ Na Yesu akaaki awura lee n nu, akpie ako i bosu. ² Do na mine nbem afa sono be aba i do, i saam ni i jaam awu. Bu soori i ni i dasu kere baari a. Yesu ɲuuri kabo bu yoori i yarada n so ni, na wo se sono n bo i saam ni

i jaam awu n ka, “M wa, ma u ahore si, dama ma fa u satie ace u.” ³ Do na Yudafom Nyeme nɔanie kerefom nbem asunsun bu ahore su ka, “Ahin sɔnɔ n sujɔɔ wura Nyeme ngasi nu.” ⁴ Yesu siiri bu sunsunni nu sɔ ni, na wɔ bisa bu ka, “Nzu ti ye am bita sunsunni tie am ahore su a?” ⁵ Bɔnɔ ti kekereke a, bo m se ka, ‘Ma fa u satie ace u,’ nzen, ‘Yasu fa u dasu n na a nati’ n a? ⁶ Ama, m kere am ka mini Adamande Wa n la yiko durunya n nu bo m fa minem satie ni bu ngasi ce bu.” Na wɔ se sɔnɔ n ka, “Yasu fa u dasu n na a kɔ awuru.” ⁷ Na sɔnɔ n ayasu, na wɔ kɔ awuru. ⁸ Saŋga bo jama n ŋuuri nyini n sɔ ni, na ba yo alekutura, na ba kansi Nyeme, kabo wɔ ma minem nyini yiko n ni.

Kabo Yesu fereeri Matio ka i ba su i su ni

⁹ Na Yesu ayasu do ako. I wo ko su so ni, na wo ŋu lampodefɔ be, bo bu fere i ka Matio, ka i tana i juma yooberi. Na Yesu ase i ka, “Yasu bra na a ba su m su.” Na wo yasu asu i su.

¹⁰ Saŋga bo Yesu wo Matio dika, sudi diire ni, na satieyofom, ni lampodefom beberebe aba Yesu ni i susufom n do, na ba saŋga adi diire. ¹¹ Farasifom ŋuuri nyini so ni, na ba bisa Yesu susufom n ka, “Nzu ti ye am kerefom ni lampodefom, ni satieyofom saŋga di diire a?” ¹² Na Yesu ati bu joɔɔwa n na wo bo bu nu ka, “Minem bo bu la laifie n koro ma ayirifo, ma ka bo bu la ma laifie ni koro a. ¹³ Am ko na am ko fiiti Nyeme nɔanie n nu na am ti i bu, kabo ba kere i ka, ‘M koro anunfo si tara bo am yo yoowa ma m.’ Ma ba ma ka m ba fere minem bo bu ŋa bu yo sa bo i ko atin su Nyeme do n wo, ama, m baari ka m ba fere satieyofom wo.”

Kabo Yesu kereeri nɔɔ cici jɔre ni

¹⁴ Na Yohane susufom n aba Yesu do, aba abisa i ka, “Nzu ti ye yere ni Farasifom cici ya nɔɔ, ye u dee susufom bere cici ma?” ¹⁵ Na Yesu abo bu nu ka, “Am sunsun ka konyafom koro wo ni ahoresaaki, saŋga bo konyafan n toko wo bu do ni? Ama, saŋga suba bo bu ba yi konyafan n fite bu nu, nyini saŋga n ye bu nya cici bu nɔɔ a.”

¹⁶ Na Yesu akaaki ase ka, “Be koro fa ma sanvuin fɔfore kpa to ma tani dawa kunma, nzen i yoori so, sanvuin fɔfore ni son tani dawa n wo, na i teke i kunma buka su. ¹⁷ I kaaki ti soɔ bekun ka be koro fa ma nzan nyiwa fanɔafo go ma dundu dawa bebete nu, nzen i yoori so, dundu ni tie wo, na i ka ngbeen, na nzan n kere songi butu. Ama, i ti ye ni ka, bu fa nzan nyiwa fanɔafo go dundu fɔfore biiwa nu wo, na bu fa taka bo pui yo ma i.”

Bara tukpakifo be, ni baabara be yiwee jɔre

¹⁸ Saŋga bo Yesu wo joɔ su so ni, na Yudafom kpian be bo i nie bu tientienbunɔɔ soɔ n su n aba akutu i nyunu, ase i ka, “M wa baabara awu, jina n nu bere. Bra na a ba fa u saa nana i ŋu, na i nya ngɔɔ.” ¹⁹ Na Yesu ayasu, na i ni yiri ako, na i susufom n asu su.

²⁰ Do na bara be woori jama n nu, i bita abiɛeri i afo buru ni nnyo lee bo i kpu na i kpie ma. Na wo sakati awura jama n nu Yesu sin, afa i saa akan Yesu tanlee n jaa bu. ²¹ Dama i seeri i kunnu ka, “Haari ma fa m saa kaanri i tanlee ni mmɔɔ, m nya laifie.” ²² Na Yesu akaaki anie anu i, na wo se i ka, “M wa, ma u ahore si. Yarada n bo a yo m ni, yiri ma a nya laifie a.” Dika n nu bere, na bara n anya laifie.

²³ Saɗga bo Yesu ko juuri kpien n dika ni, na wo ɗu see mbie kanfom, ni jamam ka bu wo nanmie su. ²⁴ Na wo se bu ka, “Am fa sin fite, baabara n awu ma, wo daafi wo.” Ama, na ba siri i. ²⁵ I foonri jama n kere fite wieeri ni, na wo nya awura soƙ n bo baabara n da nu n nu, na wo ko atara i saa, na wo yasu. ²⁶ Na nyini labari n abara aye do dee awore n kere nu.

Kabo Yesu tuntuunri anyinsin nnyo nbem na bu ɗuuri asi ni

²⁷ Na Yesu afite bere, i suko n na anyinsin nnyo nbem asu i su, subo fere i, bu ɗa, “Feme Davidi anuma, si ya aɗunfo.” ²⁸ Na saɗga bo Yesu ko wuraari awuru n nu ni, na anyinsin n aba i do na wo bisa bu ka, “Am yo yarada ka m koro ma am nya laifie?” Na ba bo i nu ka, “Een, ya Mibie, ya yo yarada.” ²⁹ Do na wo fa i saa akan bu nyumbaam, na wo se bu ka, “Kabo am ayo m yarada ni, i yo so ma am.” ³⁰ Na bu nyumbaam n ateke, na ba ɗu asi. Na Yesu abobo bu ni nahore su ka, ma bu ma be si sa n bo wo yo i ni. ³¹ Ama, na ba ko abo ndoori abara aye do dee awore n kere nu, fa ko sa n bo Yesu ayo i ni.

Kabo Yesu ma bobo be nyaari laifie ni

³² Saɗga bo anyinsin n fite koori n dee sin, na mine nbem afa sono be aba Yesu do, ajini ayo i bobo wo. ³³ Yesu fon yiiri ajini n fiteeri sono n ɗu wieeri n na wo koro ajojo. Na jama n ayo alekutura, na ba se ka, “Ya nya ɗu ma ahin sa n be ɗusu ceen be, Yisareli asien n su.” ³⁴ Ama, na Farasifom n ase ka, “Ajanim kere dee feme ni ma i yiko ye i koro fon yi ajinim n a.”

Kabo Yesu siiri jama ni aɗunfo ni

³⁵ Na Yesu abara aye mie ngbingbirim, ni kan kanm n kere su, na i sukere minem, bu tientienbunoo soom n nu, na i sukan labari kpa n fa ko Nyeme femeya n su, na wo tuntun mine bo tukpaki barasu barasu n kere bita bu ni, na ba nya laifie. ³⁶ Saɗga bo Yesu ɗuuri jama n na wo si bu aɗunfo, dama ba di wahara, na bu la ma bukafu. Bu ti ka nbom bo bu la ma sasafu o. ³⁷ Na wo se i susufom n ka, “Fiesu diire n sunnu, ama, bo bu ko i tambu n sunnu ma. ³⁸ Nyini ti, am sere Mibie n bo i dee la fie n ka i sunma jumayofom na bu ko i tambu.”

10

Kabo Yesu yiiri mine buru ni nnyo ka bu yo i jaramasam ni

¹ Na Yesu afere i susufu buru ni nnyom ni, na wo ma bu yiko ka bu ko sufon yi ajinim fite minem ɗu, na bu ma tukpakifom barasu barasu kere nya laifie. ² I jaramasa buru ni nnyom n bo i yiiri bu n duma n la Simon, bo bu fere i ka Peto ni, ni i niema Andere, ni Yakobo ni i niema Yohane bo bu si la Zebedi ni, ³ ni Filipu, ni Batolomeyo, ni Tomasi, ni Matio bo i ti lampodefɔ ni, ni Yakobo bo i si la Alafeyo ni, ni Tadayo, ⁴ ni Simon bo i tu ɗgoni fa ko i asien su ni, ni Yudasi Isikariyoti bo i ba toori Yesu ni.

⁵ Na Yesu asunma nyini mine buru ni nnyom n na wo ma bu ahin noanie ni, i ɗa, “Ma am ko miem bo bu ti ma Yudafo miem n nu, wara am wura Samariyafom mie be nu. ⁶ Ama, am ko Yisarelifom bo bu ti ka nbom na ba mini n do. ⁷ Am ko na am ko kan Nyeme jore kere bu, na am se bu ka, saɗga n adodo bo Nyeme Feme ba nie i minem su. ⁸ Na am ma tukpakifom nya laifie, na am teɗge bo ba wu ni, na am ma kokofom nya laifie, na am

fɔn yi ajinim fite minem ɲu. Kabo ma ma am ahin yiko n na ma de má pui ni, am gusu yo sɔ n na má am de pui. ⁹ Má am se ka am bita ɲwaa be, haari ɲwaa kaan mmɔɔ. ¹⁰ Ahin atin n bo am sukɔ i ni, má am se ka am bita kuruku, má am fa tanlɛɛ be buka bo am wura i n su, má am fa gbagbaa, má am fa kpama, dama jumayofɔ kere ti ye ni ka bu ma i diire wo.”

¹¹ Na wo se ka, “Mie kpiri, wara mie kan kan kere bo am kɔ wuraari nu, am nienie sɔnɔ kpa, na am kɔ wo i dɔ, haari am bá fite mie n nu. ¹² Awuru kere bo am kɔ súwura nu, am bisa bu dɔnggu, na am se bu ka Nyeme yo bu kisi. ¹³ Nzen nyini awuru n nufɔm deeru am wɔfɔ, am ma nyini kisi n ka bu dɔ, ama, nzen ba de má am, am kaaki de nyini kisi n bu dɔ. ¹⁴ Sasu beku, nzen awuru, wara mie bo am kɔ wuraari nu, na ba de má am wɔfɔ, wara ba soro má am su ka bu ti am nɔanie ni, am fite yaki nyini awuru n wara mie ni, na am kpɔnkpɔn yi am jaa tuturi kere. ¹⁵ Nahɔre ye m suse am n a, jina cɛɛn, Nyeme cín nyini mie n nufɔm sui tara Sodom ni Gomora miem n nu satieyofɔm ni.”

Kabo Yesu ɲa bu bá kere i jaramasam wuwuruwa barasu ni

¹⁶ Na Yesu akaaki ase bu ka, “Am ti fen. M susunma am wo lɛɛ kabo nɔɔɛm kɔ sanɲa bedim nu barasu ni. Nyini ti, am fa ɲɔnɔlɛ na am tara am ɲu ka woom, na am yo am ɲu benlɛ ka tiuwam. ¹⁷ Am si am ɲu sa, dama mine bá fa am wura jɔredifɔm saa nu, na bu fín am ɲgbere bu tientienbunɔɔ sɔɔm n nu. ¹⁸ Mini dɛɛ ti, bu cín am wura gominam ni nfeɛm saa nu. Nyini má am atin na am di m daani kere bere a, ni bo bu ti má Yudaɔm n kere. ¹⁹ Sanɲa bo bu bá faari am wuraari jɔredifɔm saa nu ni, má am ma am ahore saaki fa kɔ kabo am kó jojo barasu. Nyini sanɲa n ba juuri, Nyeme má am nɔanie ye am jojo a. ²⁰ Nɔanie ni fite má am dɔ, ama, i fite am Si Nyeme dɛɛ Awiewie n dɔ, ye am jojo a.

²¹ Gorɔm ni niemam bá to bu benɲu ma bu kpɔfɔm na bu kún bu, na nbaasim to bu nbaam, na nbaam kéte bu wufɔm ɲu, na bu má minem kun bu wufɔm ni. ²² Mini dɛɛ ti, sɔnɔ kere kpó am. Ama, worɔ kere bo a mindi deeru nyini n kere kɔ juuri i awieeri su, Nyeme dé u tii ji. ²³ Sanɲa bo bu bá sukere am wuwuruwa mie be su, am ɲmati kɔ mie nyinga su. Nahɔre ye m suse am n a, am koro kan má Nyeme jɔre bara ye má Yisareli miem kere su ka, ye mini Adamande Wa ni kpíe m nyi ba.

²⁴ Sɔnsɔnɔ tara má i kerefɔ, akɔɔ gusu tara má i mibie. ²⁵ Nzen sɔnsɔnɔ n ba juuri i kerefɔ n juubiri, i ti ye ni ka i nyunu yi i tii. Na nzen akɔɔ n ba juuri i mibie n juubiri, i ti ye ni ka i nyunu yi i tii. Nzen bu nya fereeri awurufɔbie n ka Belazɛbuli, bo bu kaaki fere i ka Sitana ni, nyini sanɲa bu fére i dikafɔm bere kere ka se wo lɛɛ?”

Kabo wo yo daka ka ya soro Nyeme ɲgumi ni

²⁶ Na wo kaaki ase bu ka, “Nyini ti, má am soro sere ni minem. Dama deke be wo má bere bo i wo fieɛwa nu na bu bá ɲu má i, deke be gusu wo má bere bo i wo asiri nu na bu bá si má i. ²⁷ Deke kere bo m jojo seeri am kɔngue, wo yo daka ka am jojo i wiesu wo. Na deke kere bo m tuuri i asuturi am dɔ, wo yo daka ka am bo i ndoori na sɔnɔ kere ti i. ²⁸ Má am soro minem bo bu koro kun aɲuniɛmbaa n na bu koro kun má awiewie n ni. Ama, am soro Nyeme bo i koro saaki awiewie n ni aɲuniɛmbaa n kere, cɛɛma sin nu ni. ²⁹ Am si ka nɲɔrem nnu ɲwaa ti kaan sɔɔ, má sɔ? Ama, bu kun n kpɛin mmɔɔ tó má asienɲu bo i ti má ya Si Nyeme

koroyanu. ³⁰ Haari am tiiŋmie kere mmɔɔ bo i wo am tii su ni, Nyeme si i kere nɔ. ³¹ Nyini ti, má am soro sere. Am la anyunuyi Nyeme dɔ tara njɔrem beberebe.”

³² Na Yesu akaaki ase bu ka, “Sɔnɔ kere bo i kan kereeri minem ka i ti m susufɔ, mini gusu bá kan kere m Si Nyeme bo i wo angoro n ka i mi ti m dɛɛ wɔ. ³³ Ama, sɔnɔ kere bo i keteeri minem nyunu ka i ti má m susufɔ, mini gusu bá kete m Si Nyeme bo i wo angoro n nyunu ka i mi ti má m dɛɛ.”

Kabo Yesu ŋa wɔ fa kpakpaakinu aba barasu ni

³⁴ Na Yesu akaaki ase bu ka, “Má am sunsun ka ma ba ka m fa tanalaifɛ ba ma durunya n nufɔm wɔ. Ma ba má ka m fa tanalaifɛ ba, ama, m faari lue baari a. ³⁵ M baari ka m ba kpura baa ni i si tii wɔ, na m kpura baabara ni i ni tii, na m kaaki kpura baa n ni, ni i wa yi tii, ³⁶ na sɔnɔ dikafɔm káaki i kpɔfɔm.

³⁷ Sɔnɔ kere bo i koro i si, wara i ni tara mini, i ti má ye ni ka i mi wo m dɔ. Na sɔnɔ kere bo i koro i wa baabiesɔ, wara baabara tara mini, i ti má ye ni ka i mi wo m dɔ. ³⁸ Na sɔnɔ kere bo i sɔ má i yiwee baka jaanu n na i su m su, i ti má ye ni ka i mi wo m dɔ. ³⁹ Sɔnɔ kere bo i ŋa i kpini i ŋɔɔ busu, i mi bá fun i, ama, na sɔnɔ kere bo i tɔori i ŋɔɔ mini dɛɛ ti, i mi nyá ŋɔɔ.”

Kabo sɔnɔ kere bo i deeri Yesu susufɔm wɔfɔ nyá i ŋkatɔ ni

⁴⁰ Na Yesu akaaki ase bu ka, “Sɔnɔ kere bo i de am wɔfɔ, i mi de mini wɔ lɛɛ, na sɔnɔ kere bo i de mini, i mi de yiri bo i sunmaari m wɔ lɛɛ. ⁴¹ Sɔnɔ kere bo i de Nyeme nɔaniɛ kanfɔ ka i ti Nyeme nɔaniɛ kanfɔ n dɛɛ ti, i mi nyá ŋkatɔ kabo Nyeme nɔaniɛ kanfɔ nya i n wɔ, na sɔnɔ kere bo i de sɔnɔ bo i yo sa bo i kɔ atin su Nyeme dɔ, na wɔ de i ka i yo sa bo i kɔ atin su n dɛɛ ti, i mi nyá ŋkatɔ kabo sɔnɔ bo i yo sa bo i kɔ atin su n nya i n wɔ. ⁴² Nahɔre ye m suse am n a, sɔnɔ kere bo i saari nzue niniki kaan sɔ mmɔɔ, maari m susufɔ n bo i ti bu kere kaan n kun, ka i mi ti m dɛɛ susufɔ n ti, i mi nyá i ŋkatɔ.”

11

¹ Sanɔga bo Yesu jɔjɔri i susufɔm n dɔ wieeri ni, na wɔ jɛngbe Galili awɔre n nu mie miem su, sukere minem, na wɔ kan Nyeme jɔre.

Kabo Yohane Nyeme Nzue Biefɔ n sunmaari i susufɔm Yesu dɔ ni

² Nyini sanɔga ni, ba nyi Yohane Nyeme Nzue Biefɔ n dansaraka sɔrɔ. Na wɔ ti sam kere bo Kristo Tiidefɔ n suyo bu ni, na wɔ sunma i susufɔm ka bu kɔ bisa i ka, ³ “Wɔrɔ ye bu yo seeri ka a bá n a, nzen ya ŋmínda sɔnɔ fɔfɔre be wɔ?” ⁴ Na Yesu abɔ bu nu ka, “Am kpie am nyi kɔ se Yohane fa kɔ sam bo am ati bu na am anju bu ni, ka ⁵ anyinsinm anju asi, wɔbukam akoro anati, kokofɔm anya laifɛ, asaturim ati asui, minem bo ba wu n atɛngɛ, na yaarifɔm gusu akoro ati labari kpa ni. ⁶ Terefie wo minem bo bu yo m yarada na bu la má sika be ni mini n dɔ.”

⁷ Sanɔga bo Yohane susufɔm kaaki sukɔ ni, na Yesu ajɔjɔ jama n dɔ, fa kɔ Yohane ŋusu jɔre, i ŋa, “Sanɔga bo am fite kɔri Yohane dɔ, boro kpantain n nu ni, am kɔri ka am kɔ ŋu nzu wɔ? Am kɔri ka am kɔ ŋu sɔnɔ bo i ti ka barankpaati fofoe bo anuma n kankan i wɔ? ⁸ Nzen má nyini, nzu ti ye am kɔri a? Am ŋa am kɔ ŋu sɔnɔ bo i wura sutura ŋgbingbiri wɔ? Ai, am si ka minem bo bu wura nyini suturam ni, bu wo nfemem dika a.

9 Nzen má nyini, nzu ti ye am koori a? Am koori ka am ko ɲu Nyeme noanie kanfo ɔ? Eɛn, m suse am wɔ lɛɛ, ka, am aɲu sɔno bo i tara Nyeme noanie kanfo. 10 Dama Yohane ye bu yo kerɛeri i Nyeme Jɔre Kadasi n nu ka,

‘Nyeme ɲa o,

“M dú mɔ sunma m sunmafo n na i dú u mɔ,
yiri kó yo u atin n dɔɲgu se u a.”’

11 Nahɔre ye m suse am n a, Yohane Nyeme Nzue Biefo n la má abɛngu, bo i tara i durunya n nu. Ama, sɔno kerɛ bo i ti kaan, Nyeme femeya n nu n tara yiri Yohane.” 12 Na Yesu akaaki ase ka, “Fite sanɲa bo Yohane Nyeme Nzue Biefo n boori Nyeme jɔre kan n bu ni, fa ba ju ni kisa, ye Nyeme femeya n ɲuuri kekerɛke a, na minem afa anyumboro ka bu wura nu de i. 13 Nyeme noanie kanfom kerɛ, ni Moyisi du mɔ kerɛeri Nyeme Jɔre Kadasi n nu fa ko Nyeme femeya n su ka, ye Yohane nya baari a. 14 Nzen am yó bu noaniem yarada, Yohane la yiri n bo bu yo kerɛeri ka Eliya káaki ba n a. 15 Bo i koro ka i ti ahin jɔre n bu, i ti ye ni ka i so i sui na i ti.”

16 Na Yesu akaaki ase ka, “Ye m fá nzu fa sunsun kabo nyumafɔ ti a? Bu ti ka nbaatuma kan kanm bo bu tana goosu wɔ. Na bu sufere bu bɛngu, 17 bu ɲa, ‘Ya kan tere ama am, ama, am abo má kereba. Ya di sɛɛ jue ama am, ama, am asun má.’ 18 Deke bo i ti na m se sɔ n la ka, Yohane ba juuri ni, i ciciiri i nɔɔ ɔ, i di má diire, i nu má nzan yiri fieo, nyini ti, na ba se ka ajini wo i ɲu a. 19 Ama, mini Adamande Wa n ba juuri, na m ni mine asaɲa adi, na ya sanɲa anu, na ba se ka, ‘Am nie, ahin sɔno n yiri, i ti ayaakpirifo ɔ, na i nu nzan nahɔre su. Wɔ tara lampodefom, ni satieyofom danfoya.’ Tɔ, minem kere bo bu su Nyeme dɛɛ alecira n atin n su ni, bu sayoowam kere ka i ti nahɔre a.”

Kabo Yesu ɲa miɛ nbem n nufom bá ɲu anyumboro barasu ni

20 Miem bo Yesu yoori alekutura sam beberebe nu ni, bu minem n akaaki má bu wo, nyini ti, na Yesu akan bu ndie, 21 i ɲa, “Ambere Korazinfom, am bá ɲu anyumboro. Ambere Besayidafom gusu, am bá ɲu anyumboro. Alekutura sam bo m yo maari am ni, má nzen m yoori bu Tiro ni Sidon miɛ kpirim n nu, má minem n akaaki bu wo dada kerɛ na bu fa pirim bɔto, ni nzuin yo bu yoowa n bo i kere ka bu ahore asaaki, bu satie yoowa n dɛɛ ti ni. 22 Ama, m suse am wɔ lɛɛ, ka, jina cɛɛn, Nyeme bá cin am sui tara Tiro ni Sidon dɛɛ satieyofom. 23 Ambere Kapenamfom gusu, am sunsun ka Nyeme bá ye am su ko aɲgoro wɔ? Ai, i bá yo am kaan wɔ, na i fá am cɔɔndi ko Yiweefom Woobiri nu. Alekutura sam bo m yo maari am ni, má nzen m yoori bu Sodom miɛ kpiri n nu, má kisa, miɛ n toko wo bere haari ni nyuma. 24 Ama, m suse am wɔ lɛɛ, ka, jina cɛɛn, Nyeme bá cin am sui tara Sodom dɛɛ satieyofom.”

Kabo Yesu jɔjɔ fa koori kabo i woowa ti barasu ni

25 Nyini sanɲa n na Yesu ase ka, “M Si Nyeme, wɔwɔ ti aɲgoro ni asienɲu kerɛ Mibiɛ a. M da u asi ka a fa nyini dekem bo alecirafoɲm ni sifoɲm si má i ni, ayi akere bo bu ti ka nbaatam ni. 26 M Si, i ti nahɔre wɔ, kabo a koroori ka i yo lɛɛ.”

27 Na wɔ kaaki ase bu ka, “M Si Nyeme afa deke kerɛ awura m saa nu. Be si má Nyeme Wa ni, má ka i Si Nyeme si i a, na be gusu si má i Si ni, má ka Baa ni si i a, ni minem bo Baa n koro ka i yi i kere bu ni, bere si i a.”

²⁸ Na wɔ kaaki ase ka, “Amberɛ kɛrɛ bo am sɔ sɔɔri nɔnɔɔri n na am afie ni, am bra m dɔ, na m má am ɲumiyi. ²⁹ Am de m sɔɔri ni, na am ma am wo ti kabo m dɛɛ n ti ni, dama m ti bɛnle wɔ, na m yo m ɲu kaan. Mini dɔ ye am nyá ɲumiyi a. ³⁰ Dama kereewa n bo m fa ma am n ti má kekereke, na sɔɔri n gusu bo m fa sɔ am n wo má nɔ.”

12

Kabo Yesu jɔɔ fa kɔɔri ɲumiyi cɛɛn jɔrɛ ni

¹ Nyini sanɓa n na Yesu ni i susufɔm ni sunati sin alembaa fie be nu, Yudaɓɔm ɲumiyi cɛɛn ni. Na ahɔɛ ati i susufɔm ni, na ba bubu be akpɛsɛ. ² Sanɓa bo Farasifɔm ni ɲuuri nyini sɔ ni, na ba se Yesu ka, “Níɛ fɛn. Kabo u susufɔm ni suyo ni, Nyɛmɛ nɔaniɛ kpamaawa n kere ka má be yo sɔ, ɲumiyi cɛɛn ni.” ³ Na wo se bu ka, “Am nya kan má Nyɛmɛ Jɔrɛ Kadasi n nu, kabo Fɛmɛ Davidi yo yoori sanɓa bo ahɔɛ tiiri i ni i minɛm na ba si má kabo bu yo ni, nzen sɛ? ⁴ Ahɔɛ n ti, na wɔ kɔ awura Nyɛmɛ Sereebiri Awuru n nu, na wɔ di kpɔnɔ n bo ba fa ama Nyɛmɛ ni, na wɔ ma i minɛm ni be. Ama, am si ka ya dɛɛ atin n su, Nyɛmɛ sayoowa dɔɲɔguyofɔm ɲgumi ti ye ni ka bu di nyini kpɔnɔ n a. ⁵ Sasu bekun, am nya kan má Nyɛmɛ Jɔrɛ Kadasi n nu, kabo ɲumiyi cɛɛn n kɛrɛ cɛɛn, na Nyɛmɛ sayoowa dɔɲɔguyofɔm ni saaki ɲumiyi cɛɛn n ciire ni, na bu yo bu yoowam Nyɛmɛ Sereebiri Awuru n nu, na be se má bu pui, nzen sɛ? ⁶ M suse am wɔ lɛɛ, ka, deke bo i tara Nyɛmɛ Sereebiri Awuru n wo fɛn. ⁷ Ba kɛrɛ i Nyɛmɛ Jɔrɛ Kadasi n nu ka, Nyɛmɛ ɲa o, ‘M koro aɲunfɔ si tara bo am yo yoowa ma m.’ Nzen má am si nyini nɔaniɛ n bu, má am ma má bu di minɛm jɔrɛ cin bu sui, bɛrɛ bo bu la má ɲgasi be ni. ⁸ Dama mini Adamande Wa ni ti ɲumiyi cɛɛn n Mibiɛ n a.”

Kabo Yesu tuntuunri sɔnɔ asaa fuin be ɲumiyi cɛɛn ni

⁹ Na Yesu ayasu dɔ akɔ awura bu tientienbunɔɔ sɔɔ n nu. ¹⁰ Sɔnɔ asaa fuin be woori dɔ. Na mine nbem akoro ka bu sɔ Yesu ɲɔɔɛ na bu jára ki i ka na wɔ saaki ɲumiyi cɛɛn n ciire ni. Dɔ na ba bisa i ka, “Atin wo nu ka ya koro ma sɔnɔ nya laifíɛ, ɲumiyi cɛɛn ni?” ¹¹ Na Yesu abɔ bu nu ka, “Am nu, ɲma ye i bɔɛ ti kun n kpɛin ye i toori kunma ɲɔɲɔɲɔ nu ɲumiyi cɛɛn n ye i mi wúra yi má i a? ¹² Adamande tara bɔɛ fieo. Nyini ti, ya dɛɛ atin n su, atin wo nu ka ya yo sakpa ɲumiyi cɛɛn ni.” ¹³ Na wɔ nya ase sɔnɔ n ka, “Tenɓe u saa ni.” Na wɔ tenɓe i saa ni, na i saa n ayo fanɓa bekun ka nyinga ni. ¹⁴ Dɔ na, Farasifɔm n afite akɔ asese bu ɲu su, kabo bu yó na bu kun Yesu.

Kabo amususufɔ n bo Nyɛmɛ ayi i n ti barasu ni

¹⁵ Sanɓa bo Yesu siiri nu sɔ ni, na wɔ yasu bɛrɛ. Na jama beberebe asu i su, na wɔ ma bu tukpakifɔm kere anya laifíɛ. ¹⁶ Na wɔ bɔbɔ bu ka, má bu ma be si i sɔnɔ nzuin nu. ¹⁷ I yoori sɔ, adena kabo Nyɛmɛ nɔaniɛ kanfɔ Esaya yo jɔɔɔri n yo yíiwa a, i ɲa,

¹⁸ “Nyɛmɛ ɲa o,

‘M amususufɔ bo ma yi i ka i yo m sa koroowa n yaa.

Yiri ye m koro i a, m ahore ajo i ɲu.

M má m Awíɛwíɛ n ba wura i ɲu.

Na i kó kan kere durunya n nufɔm kere
kabo m nahore atin n ti barasu.

¹⁹ I ni be sé má akuruwa, wara i tientien má.

I káaki yo má nanmie atinberem su.

²⁰ I búbu má janja wura bo wɔ biri,
na i nó má fitana bo i je má nyunyumi.

I wó bere sɔ

haari na m nahore atin n bá kunma deke n kere.

²¹ Na durunya n nufom kere bá ti i duma ni,
na bu yó i tama.' ”

Kabo Farasifom tuunri Yesu nzuin ka i ni Sitana dɛɛ ti kun ni

²² Nyini sin na ba fa sɔnɔ be aba Yesu dɔ, ajini ayo i anyinsin ni bobo wɔ. Na Yesu ama wɔ nya laifie, na wɔ koro ajojo, na wɔ ŋu asi. ²³ Na minem kere ayo alekutura, na ba bisa bu ŋunju nu ka, “Feme Davidi anuma n lee, nzen se a?” ²⁴ Ama, Farasifom tiiri sɔ n na ba se ka, “Belazebuli bo i ti ajinim kere dɛɛ feme ni, yiri ŋgumi ma ahin sɔnɔ n yiko dɛɛ ti, ye i koro fon yi ajinim n a.”

²⁵ Yesu siiri bu sunsunni n sɔ n na wɔ se bu ka, “Femeya kere bo i nya kpakpaakiiri nu wieeri, nyini femeya ni ká ngbeen wɔ. Awuru, wara mie kere gusu bo i nya kpakpaakiiri nu wieeri, nyini awuru, wara mie ni sáandi wɔ. ²⁶ Nyini ti, nzen má Sitana bo i ti ajinim kere feme n nya fon i ajinim fite minem ŋu, má nyini kere ka ba kpakpaaki nu lee. Ye i yó se ye i femeya ni koro jina a? ²⁷ Tɔ, ye nzen am ŋa Belazebuli maari m yiko, ye m fa fon yi ajinim a, ye ŋma maari am dɛɛ minem ni yiko ye bu bita fon yi bu n a? Nyini ti, kabo am minem yoori ni, nyini kere ka am la má nahore. ²⁸ Ama, Nyeme dɛɛ Awiewie ni ma m yiko ye m fa fon yi ajinim a. Nyini n kere ka Nyeme Feme wo am nu sunie i minem su lee.

²⁹ Bekun, i bá yo se ye be koro wura sɔnɔ fangafɔ dika na i fin i nenge a, má ka wɔ tara i fangafɔ acin i nyama ka? Nyini sin na i nyá koro fin i nenge bo i wo awuru n nu.

³⁰ Sɔnɔ kere bo i jina má m sin, i mi ti m kpɔfɔ ɔ. Na sɔnɔ kere gusu bo i buka má m na ya tien minem nɔɔ, i mi sandi minem wɔ. ³¹ Nyini ti, m suse am wɔ lee, ka, Nyeme koro fa minem satie kere fa ce bu, haari fa ko sangga ni jore ngbeenngbeen kere bo bu jɔjɔri i fa ko Nyeme dɔ, ama, sɔnɔ kere bo i jɔjɔ wuraari Awiewie Casi ni ŋgasi nu, Nyeme fá má i mi ŋgasi ce má i. ³² Sɔnɔ kere bo i jɔjɔ wuraari mini Adamande Wa ni ŋgasi nu, Nyeme fá i mi ŋgasi ce i. Ama, sɔnɔ kere bo i jɔjɔ wuraari Awiewie Casi ni ŋgasi nu, Nyeme fá má i mi ŋgasi ce má i, fite kisa haari fa ko fa ba.”

Kabo Yesu ŋa ya fa minem woowa fa si kabo bu ti ni

³³ Na Yesu akaaki ase bu ka, “Baka kere bo i nya ti kpa, su suuwa kpa a, na baka kere gusu bo i nya ti má kpa, su suuwa tietie wɔ. Dama baka kere suuwa, ye a fa si kabo i ti a. ³⁴ Amberɛ burukɔnufom ka woom ni, kabo am ti satieyofom sɔ ni, am yo se koro yo sakpa bekun a? Dama dekem n bo am sunsun bu am ahore su n ye am jojo bu a. ³⁵ Sɔnɔ kpa ni i deke kpa kere bo i bita i, fa sakpa ba a. Na sɔnɔ tie gusu ni i deke tie bo i bita i, fa satie ba a. ³⁶ M suse am wɔ lee, ka, jina cɛn, Nyeme dí sɔnɔ kere jore fa ko jore ngbeenngbeen kere bo i yo jɔjɔri i. ³⁷ Dama u nɔanie jɔjɔwa má a fite nu a, na u nɔanie jɔjɔwa gusu má bu di u jore cin u sui a.”

Kabo Yesu keteeri ka i yó má alekutura sa bo bu koro i ni

³⁸ Na Nyeme noanie kerefom, ni Farasifom nbem ase Yesu ka, “Ya Kerefom, ya koro ka a yo alekutura sa be kere ya na ya ngu i.” ³⁹ Na Yesu ase bu ka, “Ambere nyumafom, satieyofom bo am su ma Nyeme ni, ye am koro ka m yom alekutura sa be na am nie a? Ai, m yom ma alekutura sa be na am ngu i fieo, ma ka alekutura sa n bo Nyeme yo yoori i maari i noanie kanfo Jona ni ngumi. ⁴⁰ Dama kabo Jona yo woori jombaa bambaka be kunnu ko juuri lesan, kongue ni wiesu ni, so ye mini Adamande Wa ni ba wo asien n bu ko ju lesan, kongue ni wiesu a. ⁴¹ Jona yo kaanri Nyeme jore kereeri Ninevafom na ba kaaki bu wo. Jina een, bere ba yasu jina na bu jaraki ambere nyumafom, dama kisa, m suse am wo ka, mini tara Jona, ama, am akete ka am kaaki ma am wo. ⁴² Feme bara be yo fiteeri haari i bosu Seba wo, na i ba ti Feme Solomon dee alecira jooowa noanie ni. Jina een, yiri ba yasu jina na i jaraki ambere nyumafom nahore su, dama kisa, m suse am wo ka, mini tara Feme Solomon, ama, am ade ma noanie ni.”

Kabo ajini ba kaaki ba i woobiri dawa na i ti barasu ni

⁴³ Na Yesu akaaki ase bu ka, “Nzen ajini nya fite yakiiri sona, i ko jengbe bara ye boro kpantain nu wo, deke bo nzue wo ma, na i ko nienie woobiri bo i tana yi i numi. Nzen wo nya ma woobiri, ⁴⁴ nyini sanja, a ti ka i na, ‘Ma m kpie m nyi ko m woobiri dawa ni.’ Na i kaaki ko, i ko ngu ka ba kpara dika n nyunyumi, asese deke kere su, be wo ma nu. ⁴⁵ Na i nya ko fa ajinim nso, bo bu ti tie tara yiri ni i tii, na bu kere ba wura woobiri dawa n nu. Nyini sanja, a ngu ka sona n woowa ayo tie atara kabo i yo ti dawa ni. So ye i ba yo ma ahin nyumafom bo bu satieyo asunnu n a.”

Minem bo bu ti Yesu ni, ni i ninbaam nahore su n jore

⁴⁶ Yesu toko wo minem do joo su ni, na i ni, ni i niemam aba aka ajina dasin, na ba se ka bu koro ka bu joo i do o. ⁴⁷ Na minem ni kun ase i ka, “Ti fen, u ni, ni u niemam jina dasin koro ka bu joo u do.” ⁴⁸ Sona n seeri i so wieeri ni, na Yesu ase i ka, “Ma m kere u bo bu ti m ni, ni m niemam.” ⁴⁹ Na wo fa i saa akere i susufom ni, na wo se ka, “Nie fen. M ni, ni m niemam n yaa. ⁵⁰ Dama sona kere bo i yo m Si Nyeme bo i wo angoro n dee sa koroowa, yiri ti m siwa, ni m niwa, ni m ni a.”

13

Mienu fa ko kabo do doo rifo be sandiiri alembaa ni

¹ Nyini een n na Yesu afite awuru n nu ako atana Galili kunma kpiri n nso su, ka i kan Nyeme jore kere jama ni. ² Na jama beberebe atien bu nso i do. Bu sunnuuri beberebe so n dee ti, na wo wura lee nu atana, na bere aka ajina nzue n nso su. ³ Na wo bo mienum na wo kere bu dekem beberebe. I na, “Doo rifo be fiteeri so o, ka i ko sandi alembaa. ⁴ Sanja bo i wo sandi su ni, na alembaa ni nbem atoto atin n nso, na anumam aba atambu bu ami. ⁵ Na nbem atoto tieka su, deke bo fa sunnu ma ni, fa n sunnu ma n dee ti, wo ce ma, na wo fi, ⁶ ama, wie ba fiteeri agaya ni, na ba waandi, dama bunlui n akpama abi ma. ⁷ Na alembaa ni nbem atoto loloe nu, na loloe n anyi akata bu ngu. ⁸ Ama, na alembaa ni nbem atoto asien kpa su, na wo nyi awura mbaa zoi zoi.” ⁹ Na Yesu ase bu ka, “Bo i koro ka i ti ahin jore n bu, i ti ye ni ka i so i sui na i ti.”

Deke bo i ti na Yesu boori bu mienu n ni

¹⁰ Nyini sin na i susufom n aba i do, aba abisa i ka, “Nzu ti ye a nya ba na a jajo minem do, a bo bu mienu a?” ¹¹ Na Yesu abo bu nu ka, “Ambere ye Nyeme ma am asi i femeya n nu asiri jore kere a, ama, bere bo ba ka ni, i ma bu si ma i. ¹² Dama sono kere bo wo nya deke be Nyeme do na i mi si i bita, Nyeme buka i su wo, na i nya beberebe, ama, bo i si ma i bita, haari ni nyini kaan n bo i la i ni, Nyeme de i do o. ¹³ Deke bo i ti na m bo bu mienu n la ka, bu nie wo, ama, bu nu ma pui. Bu so bu sui wo, ama, bu ti ma deke n bo bu so bu sui ka bu ti i n bu. ¹⁴ Bu ti so n dee ti, ye Nyeme nonie kanfo Esaya yo jajo niiri bu n a, i na,
 ‘Nyeme na o,

Am so am sui ni nahore su,
 ama, am ti ma deke bo am so am sui
 ka am ti i n bu.

Am kaaki nie ni nahore su,
 ama, am nu ma pui.

¹⁵ Dama ahin minem tii ti kekereke,
 ba to bu sui na ma bu ti,
 ba kata bu nyumbaa na ma bu nu.

Ma nyini, bu nyumbaa nu i wo,
 na bu sui ti,
 na bu si bu ahore su,
 na bu kaaki bu wo,
 na m ma bu nya laifie.’

¹⁶ Ama, ambere la terefie, dama am nu asi, na am kaaki ti asui. ¹⁷ Nahore ye m suse am n a, Nyeme nonie kanfom ni minem beberebe bo bu yo sa bo i ko atin su Nyeme do n kere koroori ka bu nu deke bo am anu i ni, ama, ba nu ma i, na ba koro ka bu ti deke bo am ati i ni, ama, ba ti ma i.”

Kabo Yesu kereeri mienu n bu fa ko dodorifo n su ni

¹⁸ Na Yesu ase i susufom ni ka, “Am so am sui, na m se am mienu n bu, fa ko dodorifo n bo i sandiiri alembaa n su. ¹⁹ Nbem de Nyeme nonie n fa ko i femeya n su kabo alembaa n totori atin so n wo. Bu nya tiiri Nyeme nonie n na bu ti ma i bu, i ce ma, na Sitana bo i ti sono tie ni, ba yi nonie n fite bu ahore su, a nu ka bu wara afi i sa. ²⁰ Nbem gusu de Nyeme nonie n kabo alembaa totori tieka su n wo. Bu nya tiiri Nyeme nonie ni, a nu ka ba de i ndende ni ahorejo, ²¹ ama, i da ma bu ahore su. Bu kaaki ti ka alembaa n bo bu bunlui akpama abi ma n wo. I woori bu do kaan so, na nzen wahara, wara kekereke be ba tuuri bu, fa ko bu Nyeme su n su, a nu ka ba fa ati. ²² Nbem gusu de Nyeme nonie n kabo alembaa n totori loloe nu n wo. Bu nya tiiri Nyeme nonie ni, a nu ka bu sunsuni kere wo deke bo bu yo na bu asiri kata su, na bu koro kabo bu yo na bu nya ajeko kere, na bu ahore bi fa ko durunya n nu nengem su, na Nyeme nonie n koro da ma bu ahore su na i yo juma. Bu ti ka alembaa n bo i wura ma mbaa n wo. ²³ Ama, nbem de Nyeme nonie n kabo alembaa n totori asien kpa su n wo. Bu nya tiiri Nyeme nonie ni, na bu de i, na bu fa yo juma, na i yo kperere beberebe.”

Mienu fa ko wura mbaa fiwa ni

²⁴ Na Yesu abo bu mienu be bekun. I na, “Kabo Nyeme Feme ba nie i minem su yaa. Sono be ko sandiiri n voni i fiesu a. ²⁵ Een n be kongue n so o, sanja bo sono kere ada adaafi ni, na i kpofa be anya ayasu ako afa

jan̄mɔŋgu n̄voni asandi n̄voni fie n̄ nu. ²⁶ Saŋga bo n̄voni n̄ ba fi suko nyinse ni, na jan̄mɔŋgu n̄voni n̄ gusu atu asaŋga n̄voni kpa n̄ nu. ²⁷ Na awurufobie ni akɔɔm aba i do, aba ase i ka, ‘Ya mibie, m̄ ŋa ya sandiiri n̄voni kpa fie n̄ nu e. Ye jan̄mɔŋgu n̄voni n̄ fiteeri ni, ko saŋgaari nu a?’ ²⁸ Na wɔ bo bu nu ka, ‘M̄ kpɔfo be ko yoori nyini a.’ Na i akɔɔm n̄ abisa i ka, ‘Ye a koro ka ya ko tutu jan̄mɔŋgu n̄voni n̄ butu wɔ, nzen se a?’ ²⁹ Na wɔ bo bu nu ka, ‘Am yaki i, dama nzen am ŋa am tutu jan̄mɔŋgu n̄voni ni, am saŋga tutu i ni n̄voni kpa n̄ kere wɔ. ³⁰ Am ma bu kere saŋga nyi, haari n̄voni n̄ kpie bá ju. Nyini saŋga na m̄ nya se n̄voni kpiefɔm ni ka bu kpie i kere na bu cin wɔro jan̄mɔŋgu n̄voni n̄ tien i nɔɔ yara i ka. Nyini saŋga na bu nya tien n̄voni kpa ba go m̄ bondo nu.’ ”

Miɛnu fa ko alembaa kaan be jɔre su

³¹ Na Yesu abo bu miɛnu be bekun. I ŋa, “Kabo Nyeme femeya n̄ ti yaa, i ti ka alembaa kaan kabo nyem mbaa ti n̄ wɔ, bo sɔno be doori i fiesu ni. ³² Yiri ti alembaam kere kaan, ama, bu nya ba doori na i fiiri, i tara toro nyawam n̄ kere bambaka, i koro nyi na i tetereki asambaam bo anumam koro yo bu tieirim su.”

Miɛnu fa ko kpɔno ayiri n̄ su

³³ Na Yesu akaaki abo bu miɛnu be bekun. I ŋa, “Kabo Nyeme femeya n̄ ti yaa, i ti ka ayiri bo bu fa go kpɔno samene nu na i yasu ni, na bara be fa goori samene beberebe nu, na i kere yasuuri n̄ wɔ.”

Deke bo i ti na Yesu boori nyini miɛnum ni

³⁴ Ahin n̄ kere, Yesu boori jama n̄ miɛnu wɔ. Nahɔre, i se má bu pui, má ka miɛnu ye i bo bu a. ³⁵ I yoori so, adena nɔanie n̄ bo Nyeme nɔanie kanfo n̄ yo jɔɔri n̄ yo yiiwa a. I ŋa, “Nyeme ŋa o, ‘M̄ bó bu miɛnu wɔ, na m̄ má bu si deke n̄ bo ba si má i, fite haari durunya n̄ bumboori ni.’ ”

Kabo Yesu kereeri wura mbaa fiwa n̄ miɛnu n̄ bu ni

³⁶ Saŋga bo Yesu cin yakiiri jama n̄ na i ko wuraari awuru n̄ nu ni, na i susufɔm n̄ aba i do, aba ase i ka, “Ya koro ka a yi jan̄mɔŋgu n̄voni n̄ deɛ miɛnu n̄ bu kere ya.” ³⁷ Na wɔ bo bu nu ka, “Sɔno n̄ bo i sandiiri n̄voni kpa n̄ la mini Adamande Wa ni. ³⁸ Fie n̄ la durunya ni, na n̄voni n̄ la minem bo bu fa Nyeme yo bu femɛ ni. Na jan̄mɔŋgu n̄voni n̄ la Sitana deɛ minem ni. ³⁹ Ye kpɔfo n̄ bo i fa jan̄mɔŋgu n̄voni n̄ saŋga n̄voni kpa n̄ nu n̄ la Sitana. N̄voni kpie saŋga n̄ la durunya n̄ awieeri, ye n̄voni n̄ kpiefɔm la Nyeme merɛkem ni. ⁴⁰ Kabo bu tientieɛnri jan̄mɔŋgu n̄voni n̄ nɔɔ, na bu yaraari i ni, so ye i bá yo durunya n̄ awieeri a. ⁴¹ Mini Adamande Wa ni súnma Nyeme merɛkem, na bu bá tambu yi satieyɔfɔm kere, ni deke kere bo i wura minem konvi na bu yo satie. ⁴² Na Nyeme merɛkem ni fá bu tu ceema sin nu, do na bu sún, na bu kán bu saa. ⁴³ Na bo bu yo Nyeme sa koroowa n̄ yiri nya yo wein ka wie, bu Si Nyeme femeya n̄ nu. Bo i koro ka i ti ahin jɔre n̄ bu, i ti ye ni ka i so i sui na i ti.”

Miɛnu fa ko ajeke n̄ bo bu fundu seeri n̄ su ni

⁴⁴ Na Yesu akaaki abo bu miɛnu be bekun. I ŋa, “Kabo Nyeme Feme nie i minem su yaa, i ti kabo sɔno be ko ŋuuri ajeke be, bo ba fundu i ase

fie be nu n wɔ. I ŋuuri i sɔ n na wɔ kaaki akata su, na ahorejɔ aba i do agaya, na wɔ kɔ atɔ i nenje kɛrɛ bo i la i ni, na wɔ kpɛie i nyi aba ato nyini asien ni.”

Miɛnu fa kɔ afere fofoe be bo i la anyunuyi agaya n su ni

⁴⁵ Na Yesu akaaki ase ka, “Bekun, kabo Nyemɛ Fɛmɛ niɛ i minem su yaa, i ti kabo watafɔ be bo i nati niɛniɛ afere fofoem bo bu la anyunuyi agaya na i to n wɔ. ⁴⁶ Saŋga bo i ba kɔ ŋuuri be bo i la anyunuyi na i la gɔ agaya ni, na wɔ kɔ atɔ i nenje kɛrɛ, na wɔ fa ato i.”

Miɛnu fa kɔ jombaa tarafɔm diɛndiɛ su ni

⁴⁷ Na Yesu akaaki ase ka, “Bekun, kabo Nyemɛ Fɛmɛ niɛ i minem su yaa, i ti ka diɛndiɛ be bo bu fa sandiiri nzue nu, na bu taraari jombaa barasu barasu kɛrɛ n wɔ. ⁴⁸ Saŋga bo diɛndiɛ n yiiri ni jombaam ni, na ba cin i afite kpɛrɛ su, na ba tana ka bu yiya jombaam ni. Bo bu nya ŋuuri ka bu ti kpakpam ni, na bu fa bɛrɛ ji bu jombaa tara bɔtɔm nu. Na bu nya fa bo bu ti má kpam fikindi tu. ⁴⁹ I bá yo sɔ sɔ, durunya n awieeri, Nyemɛ má i mɛrɛkɛm ni nati ba yi satieyofɔm n fite bo bu yo sa bo i kɔ atin su Nyemɛ do nu, ⁵⁰ na i fa satieyofɔm ni tu cɛema sin nu. Do na bu sún, na bu kán bu saa.”

Miɛnu fa kɔ nenje fɔfɔrɛ ni nenje dawa su ni

⁵¹ Na Yesu abisa bu ka, “Am ati ahin miɛnu n kɛrɛ bu?” Na ba bɔ i nu ka, “Ya ti i bu.” ⁵² Na Yesu ase bu ka, “Tɔ, sɔnɔ kɛrɛ bo i kere Nyemɛ nɔaniɛ ni, na i siiri kabo Nyemɛ Fɛmɛ atin ti barasu, i mi ayo ka awurufɔbiɛ bo i yi i nenje fɔfɔrɛ ni i nenje dawa fite i nenje woobiri sɔɔ n nu, na i fa ma minem wɔ.”

Kabo Yesu ŋa Nyemɛ nɔaniɛ kanfɔ la má jirima i bɔsu ni

⁵³ Saŋga bo Yesu boori nyini miɛnu kɛrɛ kɔ wieeri ni, na wɔ yasu dika n nu do. ⁵⁴ Na wɔ kpɛie i nyi akɔ i bɔsu. Na wɔ kan Nyemɛ jɔrɛ akere minem, bu tientienbunɔɔ sɔɔ n nu. Na bo bu tiiri i kereewa n kɛrɛ ayo alekutura. Na ba bisa bu ŋunju nu ka, “Nifansu ye ahin sɔnɔ n nyaari nyini alecira n ni yiko koro yo nyini alekutura sam n a? ⁵⁵ Má kámpenta n wa n lɛɛ? Má i ni la Mariya a? Má Yakobo, ni Yosefu, ni Simon, ni Yudasi n gɔrɔ n lɛɛ? ⁵⁶ Am niɛ e. Má i niɛma nbaram kɛrɛ wo ya nu fen n a? Ye nifansu ye ahin sɔnɔ n kɔ sɔnsɔɔnri i si n kɛrɛ a?” ⁵⁷ Na ba bu i ŋgbɛɛn. Na Yesu ase bu ka, “Deke n kɛrɛ bu ma Nyemɛ nɔaniɛ kanfɔ jirima a, má ka i bɔsufɔm, ni i gisannufɔm ŋgumi do.” ⁵⁸ I bɔsufɔm ayo má i yarada n dɛɛ ti, wɔ yo má alekutura sam beberebe do.

14

Kabo bu kuunri Yohane Nyemɛ Nzue Bieɔ n barasu ni

¹ Nyini saŋga ni, na Fɛmɛ Herode ati Yesu ŋga. ² Na wɔ se i nkpiɛn-kpiɛnm bo bu wo i nyunu n ka, “Yohane Nyemɛ Nzue Bieɔ n lɛɛ, ye wɔ tenje i yiwee n nu a, nyini ti ye i la yiko koro yo nyini alekutura sam kɛrɛ a.” ³ Fɛmɛ Herode yo ma bu taraari Yohane nyiiri i wɔ, dama yiri Fɛmɛ Herode yo fiinri i gɔrɔ Filipu yi Herodiya jaari wɔ. ⁴ Má pui ti, Yohane yo seeri Fɛmɛ Herode ka, “Nyemɛ nɔaniɛ kpamaawa n kere ka a la má atin ka a fa u gɔrɔ yi ja i ŋgɔɔ su.” ⁵ Má Fɛmɛ Herode yo koroori ka i kun Yohane wɔ, ama, i soroori Yudafɔm jama n wɔ, dama ba se ka Yohane

ti Nyeme noanie kanfo o. ⁶ Na Feme Herode baawu ceenkpiri di ceen, na Herodiya wa sunguru ago agore feme ni i jama n kere nyunu, na feme n ahore ajo. ⁷ Nyini ti, na wo tan ndie ase sunguru n ka, "Deke kere bo a koro, se m, na m ma u." ⁸ Na sunguru n ni ase i ka i ko se ka i koro Yohane Nyeme Nzue Biefo n tiawa a. Na wo ko ase feme n ka, "M koro ka na a fa Yohane Nyeme Nzue Biefo n tiawa ma m perente nu kisa kisa." ⁹ Feme n tiiri so ni, na i ahore asaaki, ama, ndie n bo i taanri i jama n nyunu n dee ti, wo koro akaaki ma i noo. Na wo ma noo ka bu yo sunguru n koroowa ma i. ¹⁰ Nyini ti, na wo ma bu ako akpie Yohane tii dansaraka soo n nu do. ¹¹ Na ba fa i tiawa n ada perente n nu, aba ama sunguru ni, na yiri gusu afa ako ama i ni. ¹² Na Yohane susufom n aba afa fuin n ako ase i, na ba ko ama Yesu labari.

Kabo Yesu maari nbiesom akpii nnu ni bu minem diire ni

¹³ Yesu tiiri Yohane n jore labari n so ni, na wo fa lee ako deke bo mine n wo ma, i ni i susufom ngumi. Minem tiiri so ni, na ba fite mie miem su anati bu jaa su, asa i su. ¹⁴ Sanga bo Yesu ko fiteeri lee n nu ni, na wo ru jama beberebe, na wo si bu anunfo, na wo ma tukpakifom bo bu woori do n anya laifie. ¹⁵ Nyini ceen n naaso sanga, na i susufom n aba i do, aba ase i ka, "Kisa wie ato, ya wo boro gusu wo lee. Ma minem n atin na bu ko mie kunnu, na bu ko nya diire be to di." ¹⁶ Na Yesu ase bu ka, "I ti ma deke bo bu ko pui, ambere mmoo ni am tii nya deke be ma bu na bu di." ¹⁷ Na ba se i ka, "Deke bo ya la i fen n kere ti kpono nnu wo, ni jombaa nnyo." ¹⁸ Na wo se bu ka, "Am fa bu ba ma m fen." ¹⁹ Na wo ma minem noo ka, bu tantana wura fiefiewa n su. Na wo fa kpono nnu ni, ni jombaa nnyo ni, na wo ye i tii su angoro na wo da Nyeme asi. Na wo nya akpiekie kpono n nu afa ama i susufom ni, na bere gusu afa ama minem ni. ²⁰ Na sono kere adi, na bu kunnu ayi. Na i susufom n atambu kpono ni jombaa sinsin n bo bu diiri na i kaari ni, na ba nya kandie buru ni nnyo. ²¹ Minem bo bu diiri kpono n ni jombaa n kere ko yasuuri nbiesom akpii nnu wo, ba kan ma nbaram ni nbaatumam awura ma nu.

Kabo Yesu natiiri nzue su ni

²² Nyini sin na Yesu ama i susufom n awura lee n nu na bu du i mo kpie ko kunma kpiri n buekun, na yiri aka na i kaari jama ni. ²³ I kaariiri jama n wieeri ni, na wo fun ako kperere be su i ngumi ka i ko sere Nyeme. Haari wie ba tooi kere, i toko wo do i ngumi. ²⁴ Nyini sanga na lee n yiri wo nzue n afien dede do, na nzue nyama sukpara i, dama anjuma sun bu ko bu sin wo. ²⁵ Na fa ko akonyuma ciciri su, na wo nati nzue n su suba bu do. ²⁶ Sanga bo bu ruuri ka i nati nzue n su ni, na sere ati bu agaya, bu na, "Nuni lee o." Na ba bo awie, sere n dee ti. ²⁷ Kpenga na Yesu ajojo bu do, na wo se bu ka, "Am ma am ahore si, mini a, ma am soro sere." ²⁸ Na Petoro ase i ka, "M Mibie, nzen i ti woro nahore su a, se m ka m nati nzue n su bra u do." ²⁹ Na Yesu ase i ka, "Bra." Na Petoro afite lee n nu sunati nzue n su sukoo Yesu do. ³⁰ Ama, sanga bo i ruuri ka anjuma ni sukpie agaya so ni, na sere akaaki ati i, kpenga i suwura nzue n bu. Na wo bo awie ase ka, "M Mibie, de m tii ji." ³¹ Kpenga na Yesu alaandi i saa aso i nu, na wo se i ka, "Woro, u yarada n ti kaan so. Nzu ti ye u sunsuni ti nnyo nnyo a?" ³² Na bu nnyo n kere awura lee n nu, na anjuma n atara. ³³ Na i susufom bo bu wo lee n nu n kere akansi i, bu na, "A ti Nyeme Wa a, nahore su."

Kabo Yesu ma tukpakifom beberebe nyaari laifje ni

³⁴ Na ba kpɛ zue n aba aju awɔre n bo bu fere i ka Genesareti ni. ³⁵ Na dofom asi ka Yesu lee, na ba sunma ako ase awɔre n nufom kere, na ba fa tukpakifom kere aba Yesu do, ³⁶ na ba sere i jande ka i ma bu fa bu saa kan i tanlee n jaa bu. Na bo bu yoori so n kere anya laifje.

15

Yudafom nana sayoowa jɔre

¹ Na Farasifo nbem, ni Yudafom Nyeme noanie kerefom afite Yerusalem mie kpɛri n nu aba Yesu do, aba abisa i ka, ² "Nzu ti ye u susufom n akete ya nam sayoowa n a? Dama bu nmisi ma bu saa ka, na bu nya di diire."

³ Na Yesu abo bu nu ka, "Nzu ti ye am akete Nyeme noanie maawa n ye am su am dee sayoowam su a? ⁴ Dama Nyeme ama noo ka, 'Bu u si, ni u ni.' Ye wo kaaki ase ka, 'Sono kere bo i jɔɔɔri i si, ni i ni jɔre tie, wo yo daka ka bu kun i mi.' ⁵ Ama, ambere kere ka nzen sono be la deke be bo i ti ye ni ka i fa buka i si, ni i ni, i koro se bu ka, 'Deke bo ma m nja m fa ma am ni, ma fa ayi saraka ama Nyeme.' ⁶ Am suse ka i mi koro kpɛ i si, ni i ni n nyini deke n lee. Nyini n kere ka am abu Nyeme dee noanie ni ngbeen lee, ye am su am dee sayoowam n su a. ⁷ Ambere burukoonufom ni, nahore ye Nyeme noanie kanfo Esaya yo kaanri am jɔre n a. Wo kere i kadasi n nu ka, Nyeme nja o,

⁸ 'Ahin minem ni, bu ma m jirima bu noo nu bere wo, ama, i wo ma bu ahore su.

⁹ Bu kansu m ngbeen wo, dama bu kere mine adamande dee kereewam wo, na bu se ka nyini kereewa n fite Nyeme do o.' "

Kabo Yesu na diire diiwa koro yo ma sono fin ni

¹⁰ Na Yesu afere jama n aba i bi, na wo se bu ka, "Am so am sui na am ti jɔre n bo m sujɔɔ i ma am n bu. ¹¹ Ma diire bo i wura sono noo nu n yo i fin a, ama, jɔɔɔwa bo i fite sono noo nu ni, yiri yo i fin a."

¹² Na i susufom n aba i do, aba abisa i ka, "A si ka u jɔre n bo a jɔɔɔri i n asun ma Farasifom n nu e?"

¹³⁻¹⁴ Na Yesu ase i susufom n ka, "Ma am bo bu nu, bu ti ka anyinsinm wo. Anyinsin gusu nya bitaari i benggu anyinsin n kpama, bu kere ko to kunma nu wo. Baka kere bo m Si Nyeme bo i wo angoro n ata ma i, i cin tu i wo."

¹⁵ Na Petoro ase i ka, "Kere ya anyundere n bu, bo a na sono noanie jɔɔɔwa yo i fin ni." ¹⁶ Na Yesu abisa bu ka, "Nka ambere gusu ati ma jɔre n bu lee? ¹⁷ Deke bo i wura sono noo nu, wura i kunnu wo, na i ko je yi i, ma so? ¹⁸ Ama, jɔɔɔwa bo i fite sono noo nu fite i ahore su wo, nyini yo i fin a. ¹⁹ Dama deke bo i wo sono ahore su ma i sunsunki tie a. I koro ma i nati sukun minem, na i suyo sakaraya, na i susaaki ajaa ciire, na i suwo, na i nati sudi kore daani, na i nati susaaki minem duma. ²⁰ Nyini dekem kere koro yo sono fin a. Ama, nzen sono di diire na wo nmisi ma i saa, i yo ma i fin."

Kabo bara bo i ti ma Yudafɔ yoori Yesu yarada ni

²¹ Na Yesu afite bere ako awɔre n bo i dodo Tiro ni Sidon mie kpɛrim ni. ²² Na bara be aba Yesu do, i ti ma Yudafɔ, i ti Kananafɔ o, bo i fite nyini awɔre n nu. Na wo bo afere Yesu, ase i ka, "M Mibie, Feme Davidi anuma,

si m anjunfo. Ajinim wo m wa baabara nu, sukere i yaari agaya.”²³ Ama, Yesu abo ma i nu. Na i susufom n aba i do, aba asere i jande, ase i ka, “Fon bara n na i ko. Nie kabo i su ya su, yo nanmie barasu a.”²⁴ Na Yesu ase ka, “Nyeme asunma m Yisarelifom bo bu ti ka nbocem na ba mini ni ngumi do a.”²⁵ Na bara n aba akutu i nyunu, ase i ka, “M Mibie, buka m.”²⁶ Na Yesu ase i ka, “I ti ma ye ni ka, a fa nbaatumam diire na a fa ma caam.”²⁷ Na bara n ase i ka, “M Mibie, a la nahore, ama, haari ni nyini mmoo, caam n tambu diire n bo bu fom di, na i toto asienggu n na bu fa di.”²⁸ Na Yesu ase i ka, “A ti bara yaradayofoo, nahore su. Nyini ti, kabo a koro ni, i yo so ma u a.” Dika n nu bere, na i wa n anya laifie.

Kabo Yesu ma mine beberebe nyaari laifie barasu ni

²⁹ Na Yesu afite bere, asu Galili kunma kpiri n su, na wo ko afun atana buka be su.³⁰ Na jama beberebe afa wobukam, ni anyinsinm, ni bo bu saam ni bu jaam awu ni, ni bobom, ni tukpakifom beberebe, ka i ma bu laifie, na wo ma bu anya laifie.³¹ Na minem n ayo alekutura, ni kabo bu nuuri ka bobom sujoo, na minem bo bu saam ni bu jaam awu n anya laifie, na wobukam sunati, na anyinsinm suju asi ni, na ba kansi Nyeme n bo bere Yisarelifom su i ni.

Kabo Yesu maari nbiesom akpii nna ni bu minem diire ni

³² Na Yesu afere i susufom ni, na wo se bu ka, “Ahin jama n la m anjunfo, dama i nyuma lesan lee bo bu wo m do na bu la ma deke bo bu di. M koro ma ka m yaki bu na bu ko awuru ni ahoe, ma nyini, bu nbem to cin atin nu wo.”³³ Na i susufom n abisa i ka, “Ye nifansu ye ya nya diire ma ahin jama beberebe n so n na bu di na bu kunnu yi a?”³⁴ Na Yesu abisa bu ka, “Am la kpoo nye wo?” Na ba bo i nu ka, “Ya la kpoo nso wo, ni jombaa kan kan nbem.”³⁵ Na Yesu ama jama n nco ka bu tana asienggu.³⁶ Na wo fa kpoo nso n ni jombaa ni, na wo da Nyeme asi, na wo kpiekpie i nu, na wo fa ama i susufom ni, na bere gusu afa ama jama n ka bu di.³⁷ Bu kere diiri, na bu kunnu ayi. Na i susufom n atambu sinsin kaawa n kandie nso.³⁸ Minem bo bu diiri diire ni, nbiesom ngumi ko yasuri akpii nna a, ba kan ma nbaram ni nbaatumam awura ma nu.³⁹ Na Yesu anya kaari jama ni, na ba ko awuru, na wo nya awura lee nu, ako awore n bo bu fere i ka Magadan n nu.

16

Kabo Yesu keteeri ka i yo ma alekutura sa bo bu koro i ni

¹ Na Farasifom, ni Sadiusifo nbem aba Yesu do, na ba koro ka bu so i nge. Nyini ti, na ba se i ka i yo alekutura sa be bo i kere ka i yiko n fite Nyeme do o.² Na Yesu ase bu ka, “Sanga bo wie nya ba suto, na am nu ka angoro n kere ayo kokore, a ti ka am na, ‘Ahunma dika ni bo, dama i ti kokore wo.’³ Nzen ngarama fuun, na am nu ka angoro asanga kokore ni biri, a ti ka am na, ‘Nyuma nzue to.’ Am koro nie angoro n na am si sa bo i ba yo, ama, am koro si ma sam bo bu suyo jina n nu n yiri bu.⁴ Amberere nyumafoo, satieyofom bo am su ma Nyeme ni, ye am koro ka m yo alekutura sa be na am nie? Ai, m yo ma alekutura sa be na am nu i fieo, ma ka alekutura sa n bo Nyeme yo yoori i maari Jona ngumi ni.” I seeri so wieeri ni, na wo yaki bu, na wo ko.

Bɔbɔɔwa fa kɔ Farasifɔm ni Sadusifɔm dɛɛ kereewam n su

⁵ Saɗga bo Yesu susufɔm n kpɛ kɔ juuri kunma kpɛri n bue kun dɔ ni, na bu wara afi diire sa, ba bita mǎ kɔnɔ nu. ⁶ Na Yesu ase bu ka, “Am si am ŋu sa ni Farasifɔm ni Sadusifɔm dɛɛ kɔnɔ ayiri n bo bu fa gɔ kɔnɔ nu na i yasu ni.” ⁷ Na ba se bu ŋuŋu nu ka, “Ya bita mǎ kɔnɔ aba mǎ n dɛɛ ti, ye i se sɔ n a.” ⁸ Na Yesu afa nu kabo i susufɔm n sujɔɔ bu ŋuŋu nu ni, na wɔ se bu ka, “Amberɛ bo am yarada n ti kaan sɔ ni, nzu ti ye am sujɔɔ am ŋuŋu nu ka am bita mǎ kɔnɔ a? ⁹ Am nya ti mǎ sa n bu, nzen sɛ? Am tenge mǎ su ka m yo faari kɔnɔ nnu kpɛkpɛ maari mine akpii nnu? Ye bo i kaari ni, kandɛ nye ye am sasaari a? ¹⁰ Ye kɔnɔ nso n bo m yo fa kpɛkpɛ maari mine akpii nna n di? Kandɛ nye ye am sasaari a? ¹¹ Ye nzu ti ye am si mǎ ka m sujɔɔ mǎ kɔnɔ jɔɛ a? M ŋa am si am ŋu sa ni Farasifɔm ni Sadusifɔm dɛɛ kɔnɔ ayiri n bo bu fa gɔ kɔnɔ nu na i yasu ni.” ¹² Na ba nya asi ka i suse mǎ bu ka bu si bu ŋu sa ni Farasifɔm ni Sadusifɔm dɛɛ kɔnɔ ayiri n wɔ, ama, i ŋa bu si bu ŋu sa fa kɔ bu kereewa n dɛɛ atin su wɔ.

Kabo Petoro kereeri ka Yesu ti barasu ni

¹³ Saɗga bo Yesu fa ba juuri Sizariya Filipiya dɛɛ miɛ kan kanm su ni, na wɔ bisa i susufɔm ka, “Minem fa mini Adamande Wa n bu ŋma a?” ¹⁴ Na ba bɔ i nu ka, “Nbem ŋa wɔɔ la Yohane Nyeme Nzue Biɛfɔ n a, nbem ŋa wɔɔ la Nyeme nɔanie kanfɔ Eliya, nbem ŋa wɔɔ la Nyeme nɔanie kanfɔ Jeremiya, ye nbem gusu ŋa a ti dawa dɛɛ Nyeme nɔanie kanfɔ nyiŋgam n kun wɔ.” ¹⁵ Na wɔ nya abisa bu bekun ka, “Ye amberɛ fa m bu ŋma a?” ¹⁶ Na Simon Petoro abɔ i nu ka, “Wɔɔ ti Kristo Tiidefɔ n a, Nyeme n bo i wo bɛɛ saɗga kɛɛ n dɛɛ Wa ni.” ¹⁷ Na Yesu ase i ka, “Simon Jona wa, terefɛ wo u dɔ. Dama mǎ adamande yiiri ahin jɔɛ n bu kereeri u ka a jɔɔ a, ama, m Si Nyeme bo i wo aŋgoro ni yi kereeri u a. ¹⁸ Nyini ti, m suse u wɔ lɛ ka, wɔɔ ti Petoro a, u dama bu la ka yabue ni. Nyini yabue n su ye m ma m jama minem kɛɛ jina a, na yiwee mmɔɔ koro yo mǎ bu pui. ¹⁹ M fá Nyeme femeya n aɔ kadombaam ma u, na deke kɛɛ bo a ma minem atin ka bu yo i durunya n nu fɛn, i ti sɔ ɔ lɛɛ, Nyeme dɔ. Na deke kɛɛ bo a ma mǎ minem atin ka bu yo i durunya n nu fɛn, i kaaki ti sɔ ɔ lɛɛ, Nyeme dɔ.” ²⁰ Nyini sin, na Yesu abɔɔ i susufɔm ni ka mǎ bu ma be si ka yiri ti Kristo Tiidefɔ n a.

Kabo Yesu jɔɔ fa kɔɔri i yiwee n su ni

²¹ Fite nyini saɗga n fa kɔ, na Yesu abo i bu sukere i susufɔm n ka, “Wɔ yo daka ka m kɔ Yerusalem na m kɔ di wahara dɔŋgu fite Yudaɔm nkpienkpienm, ni Nyeme sayoowa dɔŋguyoɔ nkpienkpienm, ni Nyeme nɔanie kerefɔm dɔ na bu kɔn m. Ama, na i lesan cɛɛn, na Nyeme mǎ m tenge m yiwee n nu.” ²² Na Petoro afa i ako aheme, na wɔ jaraki i ase i ka, “M Mibiɛ, mǎ a se ka a se sɔ, Nyeme yo u kisi ni nyini sa ni. Nyini koro yo mǎ cɛɛn be da.” ²³ Na Yesu ace anɛ Petoro na wɔ tien i ŋu ase i ka, “Sitana, fa cinsi m bi bɛɛ. A sukanda m atin wɔ. A sunsun mǎ kabo Nyeme sunsun ni. A sunsun kabo adamande sunsun n wɔ.”

²⁴ Na Yesu ase i susufɔm n ka, “Sɔnɔ kɛɛ bo i koro ka i su m su, wɔ yo daka ka i mi wara fi i tienɗu sa koroowa sa, na i fa i yiwee baka jaanu n sɔ, na i su m su. ²⁵ Dama sɔnɔ kɛɛ bo i koro ka i fa i ŋɔɔ fie, i mi bá fun i. Ama, sɔnɔ kɛɛ bo i tɔɔri i ŋɔɔ mini ni m labari kpa n dɛɛ ti, i mi

nyá ngɔɔ. ²⁶ Nzen sɔnɔ nyaari durunya n nu deke n kɛrɛ, na i fuunri i ngɔɔ, i kpɛrɛ la bɔnɔ? Nzu deke ye sɔnɔ fá kaaki i ngɔɔ a? ²⁷ Dama mini Adamande Wa ni bá ba ni m Si Nyeme jirima woowa n nu, ni i mɛrɛkɛm ni, na m nyá tɔ sɔnɔ kɛrɛ kaari, kabo i juma, wara i sayoowa ti barasu. ²⁸ Nahɔrɛ ye m suse am n a, am nbem wo fɛn bo am wu má, má ka am aba aɲu ka mini Adamande Wa ni suba ka m bá niɛ m fɛmɛya n su.”

17

Kabo Yesu ɲunie kaakiiri wo barasu ni

¹ Lesɛn cɛɛn sin na Yesu afa Petoro, ni Yakobo, ni yiri Yakobo niɛma Yohane, afun akɔ buka lenlɛnge be su, bu ni yiri ngumi. ² Bu woori dɔ n na ba ɲu ka i ɲunie akaaki wo, na i nyunuawa aje ka wiɛ, na i tanlɛɛ n akaaki fofoe papasi. ³ Dɔ na ba ɲu mine nnyɔ nbem atie bu ɲu, na bu ni Yesu subo anzama, berɛ la Moyisi ni Eliya, dawa dɛɛ Nyeme nɔanie kanfɔm ni. ⁴ Na Petoro ase Yesu ka, “M Mibie, i ti kpa ka na ya wo fɛn. Nzen má a soro su, m bó nambue nsan fɛn, u dɛɛ kun, Moyisi kun, na Eliya gusu dɛɛ kun.” ⁵ Saɲga bo i jina wo jɔjɔɔri su n na yinyingɔ papasi akata bu ɲu, na ba ti akonvi be ɲga yinyingɔ n nu, na wo jɔjɔ bu dɔ, i ɲa, “M wa koroowa lɛɛ bo m ahore ajo i ɲu. Am de i nɔanie.” ⁶ I susufɔm n tiiri akonvi ni ɲga sɔ ni, na sɛrɛ ati bu agaya, na ba butu asiɛngɔ. ⁷ Na Yesu aba afa i saa akan bu, na wo se ka, “Má am ma sɛrɛ ti am, am yasu.” ⁸ Na ba ye bu tii su anie, ba ɲu má sɔnɔ be kun, má ka Yesu ngumi.

⁹ Na saɲga bo bu ba sujura buka n su ni, na Yesu abɔbɔ bu ka, “Má am be se ka i bo sa n bo am aɲu i n sufa kere sɔnɔ be, haari fa kɔ saɲga bo mini Adamande Wa ni bá wu na Nyeme bá ma m tenge m yiwee n nu ka.” ¹⁰ Dɔ na i susufɔm n abisa i ka, “Ye nzu ti ye Nyeme nɔanie kerefɔm n bita jɔjɔ ka wo yo daka ka Eliya dú mɔ ba ka, ye Kristo Tiidefɔ ni bá ba n a?” ¹¹ Na wo bɔ bu nu ka, “I ti nahɔrɛ wo ka, Eliya dú mɔ ba na i bá sɛsɛ deke n kɛrɛ su. ¹² Ama, m suse am wo lɛɛ, ka, Eliya adu mɔ aba, na minem asi má i, na ba yo i kabo bu koro. Sɔ ye mini Adamande Wa n gusu bá di wahara minem saa nu a.” ¹³ Dɔ na i susufɔm n anya asi ka i jɔjɔ Yohane Nyeme Nzue Bieɔ n dɛɛ jɔrɛ wo.

Kabo Yesu fɔn yiiri ajini fiteeri baa be ɲu ni

¹⁴ Saɲga bo Yesu ni i susufɔ nsanm ni kpieeri bu nyi ba juuri jama n bi ni, na sɔnɔ be aba akutu i nyunu, ¹⁵ ase i ka, “M Mibie, si m wa baabiesɔ n aɲunfɔ. I tɔ ngbiti wo, bo i di wahara agaya. Saɲga kɛrɛ bo i nya ba yasu i ɲu, i fa i wura sin nu wo, wara nzue nu. ¹⁶ Ma fa i aba u susufɔm n dɔ lɛɛ ka bu ma i nya laifie, ama, ba koro atuntun má i na i nya laifie.” ¹⁷ Na Yesu ase bu ka, “Amaa. Ambere satieyofɔm, am la má yarada fieo. Nyuma sa ye m wo am dɔ fɛn a? Ye m yó sawɔrɛ ni ambere kɔ ju se wo? Am fa baa n ba ma m fɛn.” ¹⁸ Na Yesu atien ajini n ɲu, na wo fite ayaki baa ni. Dika n nu berɛ, na baa n anya laifie.

¹⁹ Nyini sin na Yesu susufɔm n aba i dɔ, berɛ ngumi, aba abisa i ka, “Nzu ti ye yerɛ akoro afɔn má nyini ajini n a?” ²⁰ Na Yesu abɔ bu nu ka, “I fite ka am yarada n ti kaan sɔ n dɛɛ ti a. Nahɔrɛ ye m suse am n a, nzen am yoori Nyeme yarada bo i kɔ juuri kabo nyem mbaa ti ni mmɔɔ, am koro se nyini buka n ka, ‘Fite fɛn kɔ dɔ,’ na i kɔ. Deke wo má berɛ bo i

yó kekereke ma am. [²¹ Ama, nyini ajini n n̄usu sɔ koro fite yaki má sɔno ngb̄een sɔ, má ka nyemesere ni n̄oo cici.]”

Kabo Yesu jɔjɔ fa kɔɔri i yiwee n su bekun ni

²² Saŋga bo i susufɔm ba tiɛnri bu n̄oo Galili awɔre n nu ni, na Yesu ase bu ka, “Bu bá tɔ mini Adamande Wa n ma mine nbem, ²³ na bu kún m, ama, bu kuunri m wieri, i lesan cɛen, Nyeme má m tenje m yiwee n nu.” I jɔjɔri sɔ ni, na i susufɔm n ahore asaaki agaya.

Kabo Yesu tɔɔri Nyeme Sereebiri Awuru n nu lampo kaari ni

²⁴ Saŋga bo Yesu ni i susufɔm n ba juuri Kapenam mie kp̄iri n nu ni, na Nyeme Sereebiri Awuru n nu lampodefɔm n aba Petoro dɔ, aba abisa i ka, “Am kp̄ien n tɔ Nyeme Sereebiri Awuru n nu lampo kaari, nzen i tɔ má?” ²⁵ Na Petoro abɔ i nu ka, “I tɔ wanla.” Saŋga bo Petoro kɔ juuri awuru n nu n na Yesu adu mɔ abisa i dɔ ka, “Simon, ye wɔɔ ɔa se wɔ? N̄mam tɔ lampo ɔwaa ma durunya n nu fen nfemem a, miɛnbaam nzen wɔfɔm?” ²⁶ Na Petoro abɔ i nu ka, “Wɔfɔm.” Na Yesu ase i ka, “Nzen i nya tiiri sɔ de, miɛnbaam tɔ má lɛɛ. ²⁷ Ama, yere koro má ka ya wura bu ɔgasi nu. Nyini ti, kɔ kunma kp̄iri n nu na a kɔ fa u kuwa n ji nu, jombaa kere bo a du mɔ taraari i, nie i n̄oo nu, a n̄u ɔwaa bo i ju mini ni wɔɔ dɛɛ Nyeme Sereebiri Awuru n nu lampo ɔwaa tɔ. Fa i na a fa kɔ tɔ mini ni wɔɔ tii su kaari.”

18

Kabo Yesu kereeri sɔno bo i tara bu kere ni

¹ Nyini saŋga ni, na Yesu susufɔm n aba i dɔ, aba abisa i ka, “N̄ma yo ya kere tii Nyeme femeya n nu a?” ² Dɔ na Yesu afere baa kaan be, aba ajina bu afien. ³ Na wɔ se ka, “Nahore ye m suse am n a, am wúra má Nyeme femeya n nu, má ka am kaaki am wo na am yo am n̄u ka baatuma kaan. ⁴ Nyini ti, sɔno kere bo i yo i n̄u kaan ka ahin baa ni, yiri ti minem kere tii Nyeme femeya n nu a. ⁵ Sɔno kere bo i deeri ahin baakan n n̄usu m dɛɛ ti, wɔ de mini wɔ lɛɛ.”

Kabo wɔ yo daka ka má sɔno wura satie nu ni

⁶ Na Yesu akaaki ase ka, “Wɔɔ kere bo u sayoowa ma ahin nbaatuma kan kanm n be bo i yo m yarada n be wuraari satie nu ni, i ti má kpa. Nzen má bu faari ɔgani san yabue bambaka ciciiri u kɔm na bu fa u kɔ tu tieku nu ka nzue di u, i ti ye tara bo a ma ahin nbaatuma kan kanm n be wura satie nu ni. ⁷ Durunya n nufɔm bá n̄u anyumboro, dama bu yo sam bo bu ma mine kaaki bu sin bo m dɛɛ atin n wɔ. Nyini sam ni yo wɔ, saŋga kere, ama, sɔno kere bo i ma nyini sam yoori ni, yiri bá n̄u anyumboro.

⁸ Nzen u saa, wara u jaa cin u wura satie nu a, kaba kp̄ie i fa tu na a ka asaasin, wara, ajaasin, na a nyá u n̄u kɔ Nyeme dɔ. I ti ye ni bo a la u saa n̄nyɔ ni u jaa n̄nyɔ n kere, na bu ba fa u tu cɛema sin n bo i n̄o má n a. ⁹ Nzen n nyumbaa kun gusu cin u wura satie nu a, lokoti yi i tu na a ka anyunu kun, na a nyá u n̄u kɔ Nyeme dɔ. I ti ye ni bo a la u nyumbaa n̄nyɔ n kere na bu ba fa u tu cɛema sin nu ni.”

Miɛnu fa kɔ bɔɛ bo wɔ mini n su ni

¹⁰ Na Yesu ase ka, “Má am se ka am bu ahin nbaatuma kan kanm n be ngb̄een. M suse am wɔ lɛɛ, ka, bu dɛɛ merkem bo bu wo angoro ni, wo

m Si Nyeme nyunu sanƙa kere a. [¹¹ Dama, mini Adamande Wa n baari ka m ba nienie bo ba mini n wo, na m de bu tii ji.]

¹² Nzen sono la nbœm yaa, na bu nu kun miniiri, am sunsun ka i yo se wo? I yaki aburangaona ni ngona n wura diibiri kperε n su, na i kó nienie kun n bo wo mini ni, má so? ¹³ Nahore ye m suse am n a, nzen i nienie kó ñuuri nyini kun ni, i ahore jo i ñu tara aburangaona ni ngona n bo ba mini má ni. ¹⁴ I ti so o lee, am Si Nyeme bo i wo angoro n do, i koro má ka ahin nbaatumam kun n kpein mmoo mini.”

Kabo ya niwa yo ya satie na ya yo barasu ni

¹⁵ Na Yesu akaaki ase ka, “Nzen woro kere bo u niwa yoori u satie be, kó i do na u ni yiri mine nnyo ni ngumi, na a se i ka wo yo u satie. Nzen i tiiri i bu ka wo yo u satie, i toko ti u niwa lee. ¹⁶ Ama, nzen i keteeri, yo anie na a nya sono kun, wara mine nnyo buka u ñu su, na am kó ñu i, adena mine nnyo, wara mine nsan n bo ba ti jore n yo u daanifom. ¹⁷ Nzen i keteeri bere gusu, na a nya fa i sereya n kó Kristo jama n kere do. Nzen i nya keteeri Kristo jama ni, am fa i ka sono bo i su má Nyeme, wara satieyofó bo wo kete ka i kaaki má i wo lee.”

¹⁸ Na Yesu akaaki ase ka, “Nahore ye m suse am n a, deke kere bo am ma minem atin ka bu yo i durunya n nu fen, i ti so o lee Nyeme do, na deke kere bo am ma minem atin ka bu yo i durunya n nu, i kaaki ti so o lee Nyeme do.

¹⁹ Nahore ye m suse am bekun n a, sanƙa kere bo am mine nnyo yoori am nookun, na am sereeri m Si Nyeme deke be, i yó i ma am. ²⁰ Dama deke kere bo mine nnyo, wara nsan tieenri bu noo m dee duma n nu, m wo bu do.”

Mienu fa kó kaari bitafó nnyo nbem su ni

²¹ Nyini sin na Petoro aba Yesu do, aba abisa i ka, “M Mibie, nzen m niwa nati yo m satie sanƙa kere, kpe nye ye m fa i satie ce i a? Kpe nso, nzen se?” ²² Na Yesu abo i nu ka, “Ai, m suse u wo lee ka, má kpe nso co, ama, kpe aburasoso busu nso.” ²³ Na Yesu akaaki ase ka, “Nyini ti, kabo Nyeme femeya n ti yaa. Feme be yo woori bere a, ceen n be na wo se ka i bu akunta ni i akoom bo bu wo i do yo juma ni, na i si njwaa bo bu bita i. ²⁴ Sanƙa bo i boori i bu na i bu akunta ni, na ba fa i akoo n kun be bo i bita i njwaa kaari bo i la má noo, aba i do. ²⁵ Kabo njwaa n sunnu so na i koro to má kaari n ni, na feme n ama noo ka bu to i ni i yi, ni i nbaam, ni i deke kere bo i la i, na bu fa to kaari ni. ²⁶ Na akoo n akutu i mibie n nyunu asienggu, asere i ka, ‘Jande, si m anjufó, na m kó nienie njwaa n na m bá to kaari ni.’ ²⁷ Na i mibie n asi i anjufó, na wo fa kaari n ace i, na wo yaki i aji. ²⁸ I fiteeri bere, na i ni i benggu akoo n kun be bo i gusu bita i kaari n aye, i dee n sunnu má fieo. Na wo so i benggu n kom nu amie i, na wo se i ka, ‘To m kaari n kisa kisa bere.’ ²⁹ Na i benggu n akutu haari asienggu, asere i ka, ‘Jande, si m anjufó, na m kó nienie u njwaa na m bá to u kaari.’ ³⁰ Ama, na wo kete, na wo kó anyi i benggu n saraka, na wo se i ka má ka wo to i kaari ni. ³¹ I benggu nyingam ñuuri sa n bo wo yo i n so ni, na bu ahore asaaki agaya, na ba kó ase feme n sa n bo wo yo i n kere. ³² Do na feme n afere i, ase i ka, ‘Woro satieyofó ngbœn ni, a sereeri m dee ti, ye m yakiiri u kaari n kere bo a bita i n fa ceeri u a. ³³ Má wo yo daka ka woro mmoo siiri u benggu n anjufó na a fa ce i, kabo m ñuuri u anjufó na m fa ceeri u ni.’ ³⁴ Na yaa ati feme n agaya, na wo ma bu afa

nyini akoo n ako anyi i saraka, ka i ko di wahara do, haari fa ko ju sangha bo i ba to kaari n kere wie.”³⁵ Na Yesu ase bu ka, “Nzen am afa ma am bengum satie ace ma bu am ahore su, so ye m Si Nyeme bo i wo angoro ni cin am sui a.”

19

Kabo Yesu kereeri minem fa ko ajaa ni ajaa yaki atin su ni

¹ Sangha bo Yesu jooori ahin jorem n kere wieeri ni, na wo yasu Galili awore n nu, ako Yudiya dee awore n nu, na wo ko akpie Yodan kunma n buekun do. ² Na jama beberebe asu i su, na wo ma tukpakifom bo bu wo jama n nu n anya laifie.

³ Na Farasifo nbem aba i do, ka bu ba so i nge fa ko i noanie jooowa n su, na ba bisa i ka, “Ya dee atin n su, atin wo nu ka sono koro fa i yi ji deke be dee ti?” ⁴ Na Yesu abo bu nu ka, “Ye ba kere i Nyeme jore Kadasi n nu se wo? Ba kere ka, fite durunya n bumboori, sangha n bo Nyeme yiiri adamande ni, i yiiri bieso ni bara wo, ⁵ na wo se ka, ‘Nyini dee ti, i ti ye ni ka bieso n kpaaki i gisan yaki i si ni i ni, na i ni i yi n sangha wo. Nyini sangha, bu mine nnyo n ayo deke kun lee.’ ⁶ Bu wo ma bu ngungumi kun. Nyini ti, deke bo Nyeme anya asanga i awie, ma sono kpaaki i nu kun.” ⁷ Na ba bisa Yesu bekun ka, “Ye nzu ti ye Moyisi yo maari atin ka, nzen sono koro ka i fa i yi ji, i ti ye ni ka i mi ma bara n ajaa yaki kadasi ka, na i nya fa i ji a?” ⁸ Na Yesu abo bu nu ka, “Am ahorembaa kekereke n dee ti, ye Moyisi yo maari am nyini atin n a. Ama, fite durunya n bumboori, i yo ti ma so. ⁹ M suse am wo lee, ka, sono kere bo i faari i yi jiiri, na wo yo ma ka bara n ako somaya ye i fa i jiiri, na i jaari bara fofore, i mi n asaaki ajaa ciire lee.”

¹⁰ Na i susufom n ase i ka, “Nzen i nya tiiri so yiri, fa ko bieso ni bara do, i ti kpa ka ma be ja ajaa.” ¹¹ Na wo se bu ka, “Ma sono kere koro su ahin noanie n su a, ma ka bere bo Nyeme adu mo afa ama bu ni. ¹² Dama deke bo i ti na mine nbem ja ma ajaa n la ka, bu bieso dika yo ma juma n dee ti, nbem gusu, ba sa bu wo, ye nbem gusu kete ajaa fa ko Nyeme femeya n jore dee ti. Nyini ti, sono kere bo i koro de ahin noanie ni, i mi de i.”

Kabo Yesu yoori nbaatumam kisi barasu ni

¹³ Na mine nbem afa nbaatumam aba Yesu do, ka i fa i saa nana bu nu na i sere Nyeme ma bu. Ama, na i susufom n atien minem ni nu. ¹⁴ Na Yesu ase bu ka, “Am ma nbaatumam n bra m do, ma am fon bu. Dama bere nusu so ye Nyeme femeya n ti bu dee a.” ¹⁵ Na wo fa i saa anana bu nu na wo yo bu kisi, na wo nya afite bere ako.

Gbefene nengefɔ n ni i nyemesu jore

¹⁶ Een be, na gbefene be aba Yesu do, aba abisa i ka, “Ya Kerefo, m yo nzu sakpa ye m ba nya ngoo n bo i la ma awieeri n a?” ¹⁷ Na Yesu abo i nu ka, “Nzu ti ye a bisa m fa ko deke bo i ti sakpa su a? Sono kun n kpein wo bere bo i ti kpa. Nzen a koro ka a nya ngoo, su Nyeme noanie maawam n su.” ¹⁸ Na wo bisa Yesu ka, “Noanie maawa nbonon?” Na Yesu abo i nu ka, “Ma a kun sono. Ma a saaki ajaa ciire. Ma a wo. Ma a di kore daani. ¹⁹ Bu u si ni u ni. Koro u benngu kabo a koro u nu ni.” ²⁰ Na gbefene n ase i ka, “Ma su nyini noanie maawa n kere su, ye nzu kaari a?” ²¹ Na Yesu ase i ka, “Nzen a koro ka u woowa n ti kabo Nyeme koro ka i ti n wo, ko na

a kɔ tɔ u aja kere, na a fa ɲwaa n ma yaarifom, na a bá nya ajekɛ Nyemɛ dɔ, na a bra, ba su m su.” ²² Saɲga bo gbefene n tiiri nyini sɔ ni, na wɔ yasu ako ni ahoresaaki, dama i la nenje agaya n deɛ ti.

²³ Na Yesu ase i susufom n ka, “Nahore ye m suse am n a, i yó kekereke ni bo nengefɔ wura Nyemɛ femeya n nu. ²⁴ M suse am wɔ bekun lɛɛ ka, kabo nyɔoma sin misini bue nu ni, i ti má kekereke tara má kabo nengefɔ yo na i wura Nyemɛ femeya n nu ni.” ²⁵ Saɲga bo Yesu susufom n tiiri nyini n sɔ ni, na ba yo alekutura agaya, na ba bisa i ka, “Ye nzen i ti sɔ, ɲma koro fite nu a?” ²⁶ Na Yesu anie bu dɔ, na wɔ se ka, “Ahin ti deke bo adamande koro yo má i, ama, Nyemɛ dɔ, i ti má pui, dama Nyemɛ koro yo deke kere.”

²⁷ Na Petoro ase i ka, “Tɔ, ye yere ayaki deke kere susu u su e. Ye ya nyá nzu wɔ?” ²⁸ Na Yesu ase bu ka, “Nahore ye m suse am n a, saɲga bo mini Adamande Wa n ba tanaari m jirima tanaabiri n durunya fɔfɔre n nu, m má ambere bo am asu m su ni tana femeya bie buru ni nnyom n su, na am nie Yisarelifom anɔ buru ni nnyom n su. ²⁹ Na sɔnɔ kere bo i yakiiri i awuru, wara i ninbaam, wara i si, ni i ni, wara i nbaam, wara i asienm, mini deɛ ti, i mi nyá nyini n kere ɲusu yaa i ɲɔɔ su, na i káaki nya ɲɔɔ bo i la má awieeri. ³⁰ Am mine dongu bo bu wo mɔ kisa ni bá ka sin, na bo bu ka sin kisa n bá du mɔ.”

20

Miɛnu fa kɔ fie fɔ be ni i npadifom su ni

¹ Na Yesu akaaki ase ka, “Nyemɛ femeya n ti ka sɔnɔ be bo i yasuuri alecin ɲgarama fuun, ka i kɔ niɛniɛ npadifom na bu kɔ yo i fie juma n wɔ. ² Na i ni bere adi gɔ, na wɔ soro su ka i tɔ bu lekun jumayoowa ɲkatɔ, jete ɲwaa kun. Na wɔ fa bu ako fie n su. ³ Na fa kɔ kerefi ɲgona saɲga, na wɔ kaaki ako anu ka mine nbem tana gɔɔsu, bu yo má pui. ⁴ Na wɔ se bu ka, ‘Am ma ya kɔ m fie n su, na am kɔ yo m juma, na m to am kaari, kabo am jumayoowa ti barasu.’ ⁵ Nyini ti, na ba kɔ. Na kerefi buru ni nnyɔ saɲga, na wɔ kaaki ako gɔɔsu, ako anu ka mine nbem jina, na wɔ fa bu ako i fie n su. Na kerefi nsan saɲga, na wɔ yo sɔ bekun. ⁶ Na fa kɔ naaso kerefi nnu saɲga, na wɔ kɔ anu ka mine nbem jina ɲgbeen, bu yo má pui. Na wɔ bisa bu ka, ‘Nzu ti ye am ba jina fen ɲgarama kun kere ɲgbeen sɔ, na am yo má pui a?’ ⁷ Na ba bɔ i nu ka, ‘Be afa má ya ka ya yo i juma.’ Na wɔ se bu ka bere gusu kɔ na bu kɔ yo juma i fie n su. ⁸ Saɲga bo wie ba tɔɔri n na fieɔ n fere i juma niesufɔ n na wɔ se i ka, ‘Fere jumayofom n kere na a tɔ bu kaari. Bo i bu tɔ bo bu baari kasin n ka, na a nya ba tɔ bo bu duuri mɔ baari ni.’ ⁹ Na bo bu baari ka sin n kere aba, na wɔ tɔ bu jete ɲwaa kun kun. ¹⁰ Saɲga bo i ba kpuraari bo bu duuri mɔ baari ni, bu sunsuunri ka bu deɛ ɲkatɔ tara bo bu kaari sin baari n deɛ n wɔ. Ama, bu tɔɔri bu kere jete ɲwaa kun kun wɔ, kabo bu tɔɔri kasinfom ni. ¹¹ Bu deerɛ ɲwaa wieeri sɔ ni, na ba ɲunuti fie n fɔ ni. ¹² Bu ɲa, ‘A tɔ kasinfom bo ba yo má juma kpa be ni ɲkatɔ nyunyumi, na kabo a tɔɔri bu ni, a tɔ yere gusu bo ya baari ɲgarama kun kere, na ya ba adi yaari, na wie abo ya n gusu sɔ ɔ.’ ¹³ Ama, na fie n fɔ n abɔ nu, ase bu kun ka, ‘M don, ti fen, ma sisi má am e. Bo mini si i n la ka, am soroori su ka am yo lekun juma, na am de jete ɲwaa kun wɔ. ¹⁴ Nyini ti, de u ɲwaa na a kɔ. M koro ka m ma kasinfo n kabo m maari u n wɔ. ¹⁵ M la má atin ka m yo m ɲwaa kabo

m koro, nzen se? Wara, a si m kore fa ko m sakpa bo ma yo i n wo? ”
 16 Na Yesu ase bu ka, “Ahin mienu n bu la ka, minem bo ba ka sin kisa ni, ba du mo, na bo ba du mo kisa n ba ka sin.”

Kabo Yesu jajo fa korri i yiwee n su kpe nsan su ni

17 Sanga bo Yesu ni i susufom, ni jama n sukɔ Yerusalem mie kpiri n nu ni, bu wo ko su so ni, na wo fere i susufo buru ni nnyom n ako aheme, na wo se bu ka, 18 “Am ti fen. Ya sukɔ Yerusalem lee, do ye bu ko tara mini Adamande Wa n a, na bu fa ma Nyeme sayoowa donguyofɔ nkpienkpienm ni, ni Nyeme noanie kerefom ni, na bu di m jore, na bu soro su ka bu kun m. 19 Na bere gusu nya fa m wura minem bo bu ti ma Yudafom saa nu, na bu yo m anzasi, na bu fin m ngbere, na bu nya kpama m baka jaanu n su na m wu, na i lesan ceen, na Nyeme ma m tenge m yiwee n nu.”

Kabo Yesu kereeri ka mofɔ yo i nu kaan ni

20 Na Zebedi yi afa i nbaa nnyom n aba akutu Yesu nyunu, asere i ahoroma ka i yo sa be ma i. 21 Na Yesu abisa i ka, “A koro ka m yo nzu ma u a?” Na bara n abo i nu ka, “M koro ka a ma nɔɔ ka sanga bo a ba diiri i femeya ni, a ma m ahin nbaa nnyom ni atin na bu nu kun tana u saa fomboro su, na kun gusu tana u saa bie su.” 22 Na Yesu ase bu ka, “Am si ma deke bo am susere i n ti a. Am koro di wahara n bo m di i ni?” Na ba bo i nu ka, “Een, ya koro yo i kere.” 23 Na Yesu ase bu ka, “Nahore, am di wahara n bo m di i ni. Ama, mini la ma atin bo m ma am be tana m saa fomboro su, na be tana m saa bie su. Ama, m Si Nyeme asese nyini tanaabiri n su, afa ase minem bo yiri ni i tii ayi bu n a.”

24 Sanga bo i susufo burum n ba tiiri kabo Zebedi nbaa nnyom n seeri Yesu ni, na ba fa yaa bu nu. 25 Na Yesu afere bu kere aba i bi, na wo se bu ka, “Am si tenle su ka minem bo bu su ma Nyeme, na bu yo bu nu nkpienkpienm ni, bere mie bu minem a, na bu tereterefom gusu kere kabo bu yiko ti barasu. 26 Ama, i ti ma ye ni ka ambere yo so. Nzen sono bo i koro ka i wura i nu kpiri am kere nu, wo yo daka ka i mi yo i nu kaan, na i su am. 27 Na bo i kaaki koro ka i yo am mofɔ, i ti ye ni ka i mi yo am kere akoo, 28 kabo mini Adamande Wa n ni m tii aba ma ka minem su m ni, ama, m baari ka m ba su minem wo, na m wu ma bu, na m de mine dongu tii ji.”

Kabo Yesu tuntuunri anyinsin nnyo nbem na bu nuuri asi ni

29 Sanga bo Yesu, ni i susufom ni sufite mie kpiri n bo bu fere i ka Yeriko ni, na jama beberebe asu bu su. 30 Bu sukɔ ni, anyinsin nnyo nbem tana atin n nɔɔ su. Sanga bo bu tiiri ka Yesu susin ni, na ba bo afere i, bu na, “Ya Mibie, Feme Davidi anuma, si ya anunfo.” 31 Na jama n atien bu nu ka bu yaki nanmie. Ama, na ba kaaki abo afere abuka su ka, “Ya Mibie, Feme Davidi anuma, si ya anunfo.” 32 Na Yesu aka ajina, na wo fere bu, na wo bisa bu ka, “Am koro ka m yo nzu ma am a?” 33 Na ba bo i nu ka, “Ya Mibie, ya koro ka a ma ya nu asi wo.” 34 Na Yesu asi bu anunfo, na wo fa i saa akan bu nyumbaa ni, kpena na ba nu asi, na ba su i su.

21

Kabo Yesu fuunri kaako wuraari Yerusalem ka feme dee su ni

¹ Bu kɔ ɲa bu dodo Yerusalem miɛ kpiri n nu, na bu ɲa bu wura miɛ n bo bu fere i ka Befage ni, nyini miɛ n dodo buka n bo bu fere i ka Oliva Buka n wɔ, dama oliva bakam gɔ su wɔ. Dɔ na Yesu asunma i susufɔm n nu nnyɔ, ² na wɔ se bu ka, “Am kɔ miɛ kaan n bo i wo am nyunu dɔ ni, am kɔ juuri, am ɲu ka kaako be minda, i wa jina i bi bɛrɛ. Am nyangɔ i ni baa n kɛrɛ bra. ³ Nzen be bisaari am ka nzu ti ye am sunyangɔ i a, am se i ka Mibiɛ ni koro bu a, na i má am kaaki fa bu ba kisa kisa.”

⁴ Ahin yoori sɔ ɔ, adena Nyɛmɛ nɔaniɛ kanfɔ n nɔaniɛ n bo i yo jɔjɔri i n yo yiiwa a, i ɲa,

⁵ “Se Siyonfɔm ka,

Am niɛ, am fɛmɛ ni suba n a.

Wɔ yo i ɲu taraka, i fun kaako wɔ.”

⁶ Na i susufɔm n akɔ ayo kabo i seeri bu ni. ⁷ Na ba fa kaako n ni i wa n aba, na ba fa bu suturam anana bu ɲu, na Yesu afun atana su. ⁸ Na mine beberebe afa bu suturam atɛrɛki ase atin n nu, na nbem gusu abubu nyawa asese atin n nu. ⁹ Na jamam bo bu du i nyunu n ni bo bu wo i sin n kɛrɛ, subo kuyigindi, bu ɲa,

“*Hosana*. Ya kansɔ Fɛmɛ Davidi anuma ni.

Tɛrɛfiɛ wo yiri n bo i suba Micɛra n dɛɛ duma n nu n dɔ.

Ya kansɔ Nyɛmɛ bo i wo aɲgoro ni.”

¹⁰ Yesu kɔ wuraari Yerusalem ni, na miɛ n abo nu, na ba bisa ka, “Ye sɔnɔ bɔnɔ la ahin a?” ¹¹ Na jama n abo nu ka, “Ahin ti Yesu wɔ, Nyɛmɛ nɔaniɛ kanfɔ n bo i fite Nazareti miɛ n bo i wo Galili awɔrɛ n nu ni.”

Kabo Yesu fɔnri watafɔm fiteeri Nyɛmɛ Sereebiri Awuru n nu ni

¹² Na Yesu akɔ awura Nyɛmɛ Sereebiri Awuru n nu, na wɔ fɔn nɛnge tɔfɔm ni tofɔm kɛrɛ afite awuru n nu, na wɔ kaaki ɲwaa kaakifɔm teebirim, ni tiywa tofɔm biɛm kɛrɛ alanlanɲa. ¹³ Na wɔ se bu ka, “Ba kɛrɛ i Nyɛmɛ Jɔrɛ Kadasi n nu ka, Nyɛmɛ ɲa o, ‘M awuru ni, bu bá fere i ka awuru bo bu bá sere Nyɛmɛ nu wɔ.’ Ama, amberɛ afa i yo awiefɔm fiɛbiri.”

¹⁴ Na anyinsinm, ni wɔbukam aba i dɔ, Nyɛmɛ Sereebiri Awuru n nu, na wɔ ma bu anya laifɛ. ¹⁵ Saɲga bo Nyɛmɛ sayoowa dɔnguyofɔ nkpiɛnkpiɛm, ni Nyɛmɛ nɔaniɛ kɛrɛfɔm n ɲuuri sam n bo i yoori bu ni, ni kabo nbaatumam bo bu woori Nyɛmɛ Sereebiri Awuru n nu bo tuntunri i ka, “*Hosana*. Ya kansɔ Fɛmɛ Davidi anuma ni,” na yaa ati bu. ¹⁶ Nyini ti, na ba bisa Yesu ka, “A ti kabo nbaatumam n ase ni e?” Na Yesu abɔ bu nu ka, “Ɛn, ma ti. Am nya kan má kabo ba kɛrɛ i Nyɛmɛ Jɔrɛ Kadasi n nu n wɔ? Bo ba kɛrɛ ka,

‘Wɔrɔ Nyɛmɛ ye a kere nbaatumam, ni nbaatuma kan kanm,

kabo bu kansɔ u nahɔrɛ su a.’”

¹⁷ Na Yesu ayaki bu bɛrɛ, na wɔ fite miɛ n nu akɔ Betani miɛ n nu, akɔ ada dɔ.

Kabo Yesu yoori damba baka be ɲgbɛɛn ni

¹⁸ I alecin ɲgarama fuun, na Yesu sukpie i nyi kɔ Yerusalem miɛ n kunnu, na ahɔɛ ati i. ¹⁹ Na wɔ niɛ aɲu damba baka be, atin n nɔɔ, na wɔ kɔ anie ka i nyá suuwa n be di. Ama, i kɔ juuri baka n bu ni, wɔ ɲu má pui su, se nyawa ɲgumi a. Dɔ na wɔ se baka n ka, “Sin nyuma sin, wɔrɔ su má suuwa kun.” Dika n nu bɛrɛ, na baka n akaba awu. ²⁰ Saɲga bo i susufɔm n ɲuuri nyini n sɔ ni, na ba yo alekutura. Na ba bisa i ka, “Nzu ti ye baka n wuuri ndende sɔ a?” ²¹ Na Yesu abɔ bu nu ka, “Nahɔrɛ ye m suse am n a, wɔrɔ kɛrɛ bo a yoori Nyɛmɛ yarada na a yo má sika, a koro yo sa n bo

ma fa ayo ahin damba baka n be. Má ahin ni ngumi, haari nzen a seeri ahin buka n ka, 'Yasu kó to tieku n nu,' i yó sò ɔ. ²² Nzen am yoori yarada, deke kere bo am sere Nyeme ka am koro i, Nyeme yó i ma am."

Kabo bu bisaari Yesu deke bo i yiko n fite ni

²³ Na Yesu akpie i nyi aba awura Nyeme Sereebiri Awuru n nu, na i sukere minem. I wo kere su sò n na Nyeme sayoowa dongyuofom, ni Yudafom nkpienkpienm aba i do, na ba bisa i ka, "Nma deɛ yiko nu ye a yo nyini sam kere a? Nma ma u nyini yiko ni, ye a yo nyini sam n a?" ²⁴ Na Yesu abo bu nu, ase bu ka, "Am ma m du mo bisa am bisaawa kun be ka, na nzen am boori m nu, na m gusu nya se am deke bo m yiko n fite. ²⁵ Nma maari Yohane atin ye i ba biɛeri minem Nyeme nzue n a? Nyeme nzen adamande?" Na ba se akuruwa bu nju nu, kabo bu bo Yesu nu barasu. Bu na, "Nzen ya se i ka Nyeme maari i atin a, i bisa ya ka ye nzu ti ye ya da má Yohane nu a? ²⁶ Ama, nzen ya seeri i ka adamande do, ya soro sere ka jama ni yáki má ya. Má pui ti, dama soro kere soroori su ka Yohane yo tiiri Nyeme noanie kanfo ɔ nahore su." ²⁷ Nyini ti, na ba bo i nu ka, "Ya si má." Na yiri gusu ase bu ka, "Mini mmoo sé má am soro bo i deɛ yiko nu na m yo ahin sam n kere ni."

Miɛnu fa ko soro be ni i nbaa nnyo nbem su

²⁸ Na Yesu abisa bu ka, "Am sunsun ka ahin miɛnu bu la ka se wo lee? Soro be yo woori bere a, i la nbaabiesom nnyo. Cɛɛn be na wo ko kpien n do, ako ase i ka, 'M wa, ko baka suuwam fie n nu, na a ko yo juma nyuma.' ²⁹ Na baa n ase i ka, 'M kó má.' Ama, kasin, na baa n aba akaaki i sunsuni, na wo ko. ³⁰ Na wo ko nyinga n do, ako ase i gusu. Na baa n ase i ka, 'Ma ti, m kó.' Ama, wo ko má. ³¹ To, bu mine nnyom n nu, nma yoori i si n sa koroowa?" Na ba bo i nu ka, "Baakpien ni." Do na Yesu ase bu ka, "Nahore ye m suse am n a, lampodefom ni sakaram kere sufa Nyeme yo bu femɛ yaki am. ³² Dama ka, Yohane baari ka i bá kere am sa bo i ko atin su Nyeme do ɔ, ama, am ayo má i yarada, na lampodefom ni sakaram, bere ayo i. Haari ni bo am juuri kabo bu yoori yarada ni, am akaaki má am wo, na am yo i yarada."

Kabo Yesu boori miɛnu niiri Yudafom nkpienkpienm ni

³³ Na Yesu ase bu ka, "Am so am sui na am ti miɛnu n be bekun. Awuru-fobie be yo woori bere a, na wo do i baka suuwa barasu be fie, na wo kanda abara aye fie ni. Na wo lokoti yabue bambaka be kunma, ka i sumiemie baka suuwam ni nzue go nu. Na wo ta kpafiri lenlenge be ka bu tana su sunie fie n kere su, na wo nya afa fie n awura i npadifom saa nu. Na wo ko atin. ³⁴ Sanja bo i siiri ka wo ka kaan na baka suuwam n bí ni, na wo sunma i akoom i npadifom n do ka bu ko de i deɛ bo ba nya i n bra. ³⁵ Akoom n ko juuri ni, na ba bo bu nu kun, na ba kun nyinga, na ba tu nyinga n gusu yabue. ³⁶ Na soro n asunma i akoo nyingam bekun, bu sunnu tara ciciri deɛm ni, na npadifom n ayo bu kabo bu yoori ciciri su deɛm ni. ³⁷ Na kasin, na wo ba asunma i wa, na wo se ka, 'Bu má m wa n yiri jirima.' ³⁸ Ama, sanja bo npadifom n juuri ka baa ni suba ni, na ba se bu nju nu ka, 'I wa n bo i dí i aja n lee suba n a. Am bra na ya kun i na aja n kere ká ya deɛ.' ³⁹ Do na ba tara i, na ba cin i atu baka suuwa fie n aheme, na ba kun i." ⁴⁰ Na Yesu anya abisa bu ka, "Am sunsun ka fie fo n ba baari, i yó nyini npadifom ni se wo?" ⁴¹ Na ba bo i nu ka, "I bá ma

nyini mine tiefom n kere wu kenkesi yiwee wo, na i fa fie n wura npadifo foforem saa nu, bere bo bu ma i nya i dea baka suuwam, sanja bo bu ba biiri ni."

⁴² Na Yesu ase bu ka, "Am nya kan ma kabo ba kere i Nyeme Jore Kadasi n nu ni, nzen se? Bu na,

'Yabue n bo bondo tafom n faari i tuuri ni,
yiri ye wo kaaki bondo n jaa yabue n kere tii a.

Micera ni yoori i so a.

Ya nu i na wo yo ya alekutura.' "

⁴³ Na Yesu ase bu ka, "M suse am wo lee, ka, bu de Nyeme femeya n fite am do, na bu fa ma minem bo bu bita i na i la kpereni." [⁴⁴ Na wo kaaki ase ka, "Sono kere bo i kpaasiiri ahin yabue n su, i mi bubu nu wo mumuku, na sono kere gusu bo ahin yabue n toori i nu, i san i mi samene wo."]

⁴⁵ Nyeme sayoowa danguyofom, ni Farasifom n tiiri mieenu n bo Yesu boori i so ni, na ba fa nu ka i boori i niiri bere wo. ⁴⁶ Nyini ti, na ba kpini atin kabo bu yo na bu tara i, ama, bu soroori jama n wo, dama bu kere na i ti Nyeme noanie kanfo o.

22

Mieenu fa ko konyaya di ni nu bambaka n su

¹ Na Yesu akaaki abo mieenu be bekun, i na, ² "Kabo Nyeme femeya n ti yaa. Feme be yo seseri i wa konyaya di ni nu su fa seeri a. ³ Na wo sunma i akoom ka bu ko fere minem bo wo du mo abaandi bu ka bu ba konyaya di ni nu ni, ka bu bra. Ama, na ba kete ka bu ba ma. ⁴ Na wo kaaki asunma akoo nyingam ka bu ko se bere n bo wo du mo abaandi bu n ka, 'Am bra, dama ma yo m di ni nu n siriya kere awie. Haari ma kun m tooram, ni nengendore bo bu la lui ni, ayo siriya kere awie. Am bra na am ba konyaya di ni nu ni.' ⁵ Ama, bu be mmoo abo ma bu nu. Na ba ka bu juma n yo su. Kun koori i fiesu wo, na nyinga gusu ako i juma yobiri. ⁶ Na nyingam n atara i akoom ni, na ba kere bu wuwuruwa, na ba kun bu. ⁷ Do na yaa ati feme n agaya, na wo sunma i sojam, na ba ko akun nyini mine kunfom ni kere, na ba yara bu mie ni. ⁸ Na wo fere i akoom ni, na wo se bu ka, 'Konyaya di ni nu n ayo siriya, ama, minem bo m duuri mo baandiiri bu ka bu ba di i ni, i ti ma ye ni ka bu di i kun. ⁹ Nyini ti, am fite ko atingberem su, na am ko fere minem barasu kere bo am nuuri bu ni, ka bu bra konyaya di ni nu ni.' ¹⁰ Na akoom n ako atingberem su, ako atien minem kere bo bu ko nuuri bu n noo aba, mine kpam ni tiem kere. Na konyaya awuru n ayi ni jama beberebe.

¹¹ Na feme n ako, ka i ko nie jama ni, na wo nu ka sono kun be wo jama n nu, i wura ma konyaya sutura. ¹² Na feme n abisa i ka, 'M don, a yo se wuraari awuru n nu fen, ye a wura ma konyaya sutura a?' Ama, sono n akoro abo ma i nu. ¹³ Na feme n ase i ngbefenem ka, 'Am tara i, na am cici i saam, ni i jaam nyama, na am fa i tu dasin do, awosin n nu. Do na i sun, na i kan i saa.' " ¹⁴ Na Yesu anya ase bu ka, "Minem bo Nyeme afere bu n sunnu, ama, bo wo yi bu n sunnu ma."

Kabo bu soori Yesu ngee lampo to busu ni

¹⁵ Na Farasifom n afite ako asese su kabo bu so Yesu ngee, na bu nya i taraabiri fa ko i noanie jooowa su. ¹⁶ Na ba sunma bu susufom, ni Feme

Herode minem Yesu do, na ba ko ase i ka, “Ya Kerefo, ya si ka a ti nahore sefo o, na a kere minem kabo Nyeme atin ti nahore su, na u cece wo ma kabo minem jojo nu, dama a nie ma sono jinaabiri ti. ¹⁷ To, a na se wo? Ya dee atin n su, atin wo nu ka ya to lampo ma Romafom Feme Kpiri Siza, nzen atin wo ma nu?” ¹⁸ Ama, na Yesu asi ka bu bita sunsuni tie wo, na wo se bu ka, “Amber burukonufom ni, nzu ti ye am sukoro ka am so m ngea? ¹⁹ Am fa njwaa n bo bu fa to lampo kaari n bra na m nie.” Na ba fa njwaa n aba ama i, ²⁰ na wo de njwaa n anie, na wo bisa bu ka, “Nma dee tii ni i duma wo njwaa n su n a?” ²¹ Na ba bo i nu ka, “Feme Siza dee a.” Na Yesu ase bu ka, “To, deke bo i ti Feme Siza dee, am fa ma Feme Siza, na deke bo i ti Nyeme dee, am fa ma Nyeme.” ²² Sanja bo bu tiiri ahin noanie n so ni, na ba mie, na ba ko ayaki i.

Kabo bu bisaari Yesu fa koori yiwee tenje jore su ni

²³ Nyini ceen n gbingbin na Sodusifo nbem aba Yesu do. Bu dee kereewa la ka Nyeme tenje ma minem bu yiwee n nu n a. Na ba abisa i jore be, bu na, ²⁴ “Ya Kerefo, Moyisi yo seeri ka, nzen sono wu yakiiri i yi, na i ni bara n anya ma baa, wo yo daka ka i niema n fa kunafom n na bu wu nbaam ma yiri n bo wo wu ni. ²⁵ To, sono be yo laari nbaabiesom nso wo, ya nu fen, na baakpien n aja bara, na wo wu ayaki bara ni, ba wu ma baa. ²⁶ So ye bo i to i su nnyo su, ni nsan su n yoori a, haari fa ko kpuraari nso su ni. ²⁷ Na bara n ni i tii aba aka sin awu. ²⁸ To, kabo bu mine nso n kere aja bara n na ba wu so ni, ceen bo Nyeme ba tenje minem bu yiwee n nu ni, bara ni ka nma dee tenle su a?”

²⁹ Na Yesu abo bu nu ka, “Am amini atin. Dama am ti ma deke bo ba kere i Nyeme jore Kadasi n nu n bu, na am kaaki si ma kabo Nyeme yiko n ti barasu. ³⁰ Dama sanja bo Nyeme ba tenje minem bu yiwee n nu ni, ajaa wo ma bere kun. Ama, nyini ceen ni, sono kere kaaki ka Nyeme merkem bo bu wo angoro n wo, dama bu ja ma ajaa kun. ³¹ Na fa ko kabo Nyeme ba tenje minem bu yiwee n nu barasu ni, am akan ma Nyeme jore Kadasi n nu kabo i yo seeri am n wo, nzen se? I na, ³² ‘Mini ti Abraham, ni Izaki, ni Jakobu dee Nyeme n a.’” Na Yesu asa su ase bu ka, “To, kabo Nyeme na i ti nyini minem n dee Nyeme ni, nyini kere ka bu toko la ngoo lee, dama Nyeme ti ma bo ba wu n dee Nyeme, ama, i ti bo bu la ngoo ni dee Nyeme a.” ³³ Minem n tiiri i kereewa n so ni, na ba yo alekutura.

Nyeme noanie maawa n bo i tara bu kere n jore

³⁴ Sanja bo Farasifom tiiri ka Yesu ajojo ayi Sodusifom ni, na ba tien bu noo i do. ³⁵ Na bu nu kun be, bo i ti Nyeme noanie kerefo n abisa Yesu bisaawa be ka i so i ngea. I na, ³⁶ “Ya Kerefo, Nyeme noanie maawa n bo i wo i noanie kpamaawa n nu ni, bono tara bu kere a?” ³⁷ Na Yesu abo i nu ka, “Ba kere ka, ‘Koro Micera u Nyeme ni, ni u ahorembaa kun, ni u awiewie, ni u sunsuni kere.’” ³⁸ Ahin ti noanie maawa n bo i tara i kere a. ³⁹ Bo i to su nnyo su n ti ka nyini n wo. Ka o, ‘Koro u bengu kabo a koro u nu ni.’ ⁴⁰ Kabo ba kere Nyeme noanie kpamaawam n kadasi n nu, ni Nyeme noanie kanfom n dee n nu ni, i kere jina ahin noanie maawa nnyom n su wo.”

Kristo Tiidefo n bo i ti Feme Davidi anuma n jore

⁴¹ Sanja bo Farasifo nbem ba tientienri bu noo ni, na Yesu abisa bu jore be fa ko Kristo Tiidefo n su. I na, ⁴² “Am fa Kristo Tiidefo n bu nma a?”

Am sunsun ka i ti n̄ma d̄e anuma a?" Na ba b̄o i nu ka, "I ti Feme Davidi anuma a." ⁴³ Na Yesu abisa bu ka, "Ye nzu ti ye Nyeme Awiewie n ba wuruari Feme Davidi n̄u, ye i fereeri i ka i Mibie a? I n̄a,

⁴⁴ "Na Micera n ase m Mibie n ka,
"Ba tana m saa fomboro su fen,

haari m bá má u kpofom kere ba kutu u jaa bu." '

⁴⁵ To, nzen Feme Davidi mmoo ni i tii yo fereeri Kristo n ka i Mibie, ye Kristo n yo se kaaki yo Feme Davidi anuma a?" ⁴⁶ Be akoro anya má noanie be abo má i nu. Nyini ti, fite nyini c̄een n sin, be abo má su ka i bisa Yesu jore bekun.

23

Kabo Yesu na mine si bu nu sa ni Yudafom tereterefo nbem ni

¹ Na Yesu ajojo i susufom n ni jama n do, na wo se bu ka, ² "Nyeme noanie kerefom, ni Farasifom n ade Moyisi d̄e jinaabiri ni, ye bu kere minem Nyeme noanie kpamaawa n a. ³ Nyini ti, deke kere bo bu fa kere am ni, am soro i su, ama, má am yo sam bo bu yo bu ni, dama bere yo má sam bo bu kere ka minem yo bu ni. ⁴ Bu cici soori nonoori so minem wo, ama, bere ni bu tii soro má su ka bu fa bu saa kan i. ⁵ Deke kere bo bu yo i, bu koro ka minem nu bu wo, na bu kansu bu. Bu kere Nyeme noanie n wo, na bu yo i ka sebe, na bu fa cici bu n̄uma su, adena minem nu i. Na bu yo bu tanlee noo njorem tintiin. ⁶ Nyini minem n anya awura bu tientienbunoo soom n nu ni, wara ba nya afere bu tientienbunoo bambaka diire diibirin ni, bu koro ka bu tana kpirikoro tanaabirin wo. ⁷ Bu koro ka minem suyo bu anse goosu wo, na bu ma bu jirima, na bu fere bu ka, 'Ya Kerefo.' ⁸ Amber̄e, má am ma be fere am ka 'Ya Kerefo,' dama am la kerefo kun n kpein wo. Amber̄e kere ti nibaam wo. ⁹ Má am fere be ka am si, durunya n nu fen, dama am la Si kun n kpein wo, yiri wo angoro n a. ¹⁰ Má am ma be fere am ka i kpien, dama am kpien ti kun n kpein wo, yiri la Kristo Tiidefo ni. ¹¹ Bo i ti am kere tii ni, wo yo daka ka yiri su am a. ¹² Sono kere bo i wura i nu kpiri, Nyeme yo i mi kaan, na sono kere bo i yo i nu kaan, Nyeme wura i mi kpiri."

Kabo Yesu na Yudafom tereterefo nbem ba nu anyumboro ni

¹³ Na Yesu akaaki ase ka, "Amber̄e Nyeme noanie kerefom, ni Farasifom n bo am ti burukoonufom ni, am bá nu anyumboro. Am kanda minem wo, adena má bu su Nyeme femeya n atin su, dama amber̄e ni am tii kete ka am su má i atin n su, na am sukanda bo bu koro ka bu su i su ni. [¹⁴ Amber̄e Nyeme noanie kerefom ni Farasifom n bo am ti burukoonufom ni, am bá nu anyumboro. Am sisi nkunafom na am fin bu nen̄gem wo, na am jina sere Nyeme ce, adena minem nu ka am ti mine kpam wo. Jina c̄een, amber̄e bá nya suicin tara minem kere.]

¹⁵ Amber̄e Nyeme noanie kerefom ni Farasifom n bo am ti burukoonufom ni, am bá nu anyumboro. Am kpie tiekum wo, na am ko miem bo bu waarim su, adena am nya sono kun mmoo bo i kaaki i wo na i su am su, na san̄ga bo am nya nyaari i mi, am ma i satie yoowa tara am d̄e wo, adena yiri dú am mo ko c̄ema sin nu.

¹⁶ Amber̄e bo am ti ka anyinsinm na am kere minem atin ni, am bá nu anyumboro. Am n̄a nzen sono taanri ndie fa ko Nyeme Sereebiri Awuru n do, i ti má pui. Ama, nzen sono kere bo i taanri sika nen̄gem n bo bu

wo Nyeme Sereebiri Awuru n nu ni, i mi ma i ndie taanwa n yo yiiwa. ¹⁷ Ambere bo am ti ka anyinsin sinnzinm ni, bono tara i benngu a? Sika nenngem ni, nzen Nyeme Sereebiri Awuru n bo yiri ma sika nenngem n yo casi n a? ¹⁸ Am kaaki na, nzen sono taanri Mikun n yoowa yoobiri ni, i ti ma pui. Ama, nzen sono taanri aceerim bo ba fa ase Mikun n yoowa yoobiri n su ni, wo yo daka ka i mi ma i ndie taanwa n yo yiiwa. ¹⁹ Ambere bo am ti ka anyinsinm ni, bono tara i benngu a? Aceerim ni, nzen Mikun n yoowa yoobiri n bo i ma aceerim n yo casi n a? ²⁰ Nyini dee ti, sono kere bo i taanri Mikun n yoowa yoobiri ni, i mi atan i ni dekem kere bo bu wo su n wo lee. ²¹ Na sono kere bo i taanri Nyeme Sereebiri Awuru ni, i mi atan i ni Nyeme bo i wo nu n wo lee. ²² Na nzen sono kere bo i taanri angoro ni, i mi atan Nyeme femeya bie n wo lee, ni yiri Nyeme bo i tana su ni.

²³ Ambere Nyeme noanie kerefom, ni Farasifom n bo am ti burukoonufom ni, am ba na anyumboro. Am yi am jakam ma Nyeme wo, haari ni am maakunm, ni ngetem, ni nvanvanm kere, ama, am yo ma sam bo Nyeme noanie kpamaawa n kere ka am yo bu n na bu la anyunuyi tara bu kere ni. Bere la nahore sam, ni anunfo si, ni yaradayo. Wo yo daka ka na am yo nyini sam sanja kere, na am fa jaka yiiwam buka su. ²⁴ Ambere ti ka anyinsinm na am kere minem atin ni. Am kpokpo yi nminsennm bo bu ti kan kanm n wo, am deke nuuwam nu, ama, na am sanja nu nyoomam bere, am deke nuuwam nu.

²⁵ Ambere Nyeme noanie kerefom, ni Farasifom n bo am ti burukoonufom ni, am ba na anyumboro. Am nmisi am kopum ni taalem sin wo, ama, na bu kunnu ayi ni dekem bo am fin bu fanja, ni anyii sayoowam wo. ²⁶ Wo na Farasifo bo a ti ka anyinsin ni, du mo yo u kopu n kunnu casi ka, na i sin n gusu nya yo casi.

²⁷ Ambere Nyeme noanie kerefom, ni Farasifom n bo am ti burukoonufom ni, am ba na anyumboro. Am ti ka fanjunmam bo ba bo bu nzue fofoe kpakpari, na bu yo nyunyumi n wo, ama, bu kunnu yiri ayi ni fuin buwem wo, ni fin barasu kere. ²⁸ Am ti so o lee. Am ma minem na am ka am ti minem bo bu yo sa bo i ko atin su Nyeme do n wo, ama, am ahore su ayi ni burukoonu, ni satiem wo.”

Kabo Yesu na Nyeme ba cin Yudafo tereterefo nbem sui barasu ni

²⁹ Na Yesu asa yo ase ka, “Ambere Nyeme noanie kerefom, ni Farasifom n bo am ti burukoonufom ni, am ba na anyumboro. Am yo fanjunmam dongu fa ma Nyeme noanie kanfom wo, na am yo minem bo bu yo sa bo i ko atin su Nyeme do n fanjunmam nyunyumi. ³⁰ Na am se ka, nzen ma ambere yo woori bere, am nam sanja ni, ma am kun ma Nyeme noanie kanfom n ni, kabo am nam yo woori bu ni. ³¹ Nyini ti, am asoro su ka am ti bere bo bu yo kuunri Nyeme noanie kanfom n dee busu nufom wo lee. ³² To, i ti ye ni ka am de am nam jinaabiri ni, na am yo bu satie yoowam n ko wie. ³³ Ambere burukoonufom bo am ti woom na am ti ka pumpuni nbaam ni, am yo se ye am koro nmati fite nu, bo am wura ma cema sin n nu a? ³⁴ Nyini ti ye m sunma Nyeme noanie kanfom, ni mine alecirafom, ni kerefom am do n a. Am kun bu nbem, na am fa bu nbem sense baka jaanu n su, na am fin bu nbem ngbere, am tientienbunoo soom n nu, na am ko mie miem su na am kere bu wuwuruwa. ³⁵ Nyini dee ti, Nyeme cin ambere sui fa ko kabo am nam yo kuunri minem bo bu yo sa bo i ko atin su Nyeme do durunya n nu. Bu yo woori so o fite sanja n bo bu kuunri

sono be bo i yo sa bo i ko atin su Nyeme do n na bu fere i ka Abeli ni, fa ba juuri sangha n bo bu kuunri sono be bo bu fere i ka Zakariya, Berakaya wa ni. Yiri ye am kuunri i Nyeme Sereebiri Awuru n nu, Casi Kere Casi Soo n ni Mikun yoowa yoobiri n afien n a. ³⁶ Nahore ye m suse am n a, nyini n kere dee ti ye Nyeme ba cin ambere nyumafom sui n a.”

Kabo Yesu ahore saaki maari Yerusalemfom barasu ni

³⁷ Na Yesu abo awie ase ka, “Keto, keto, ambere Yerusalemfom. Ambere kuunri Nyeme noanie kanfom n a, na minem bo Nyeme sunmaari bu am do ni, am atu bu yabue. Sangha kere m koroori ka m tien am noo, na m fa m saa bara ye am, kabo ako tien i nbaam noo, i lanjpete nu ni, ama, am soro ma m su. ³⁸ Am nie fen, Nyeme yaki am nu ji, na am mie n ka ngbeen. ³⁹ M suse am wo lee, ka, fite kisa fa ko, am nu ma m kun, ma ka sangha bo am ba se ka, ‘Terefie wo yiri n bo i suba Micera n dee duma n nu n do.’”

24

Kabo Yesu seeri ka Nyeme Sereebiri Awuru ni ba bereki barasu ni

¹ Sangha bo Yesu fiteeri Nyeme Sereebiri Awuru n nu na i wo ko su ni, na i susufom n aba i do, aba ase i ka i nie kabo Nyeme sereebiri n ti barasu a. ² Na wo se bu ka, “M na am anu ahinm kere e? Nahore ye m suse am n a, yabue kun n kpein n mmoo ba nana ma i benju su. Bu ba bereki i kere go lee.”

Kabo Yesu kere fa koori durunya n awieeri su dee jore ni

³ Sangha bo Yesu fun ko tanaari Oliva Buka n su ni, na i susufom n aba i do, bu ni yiri ngumi, na ba se i ka, “Ya Kerefɔ, se ya, sangha bono ye ahin sam kere ba yo a? Ye nzu deke ba kere ya ka sangha n adodo bo a ba bekun, na durunya n ba awieeri a?”

⁴ Na Yesu abo bu nu ka, “Am si am nu sa, na ma am ma be dadaka am. ⁵ Dama mine dongu ba fa m duma ba, na bu se ka, ‘Kristo Tiidefo n la mini wo.’ Na bu dadaka mine beberebe. ⁶ Sangha bo am ba ti aluwa nga fen, wara bu sukun lue do, ma am ma am ahore saaki. Wo yo daka ka nyini sam n kere ba yo sin ka, ama, ma am nie ka durunya n awieeri lee. ⁷ Daanfie daanfie ba kun lue ni bu benjgum, na nfemem kun lue ni bu benju nfemem. Na asien ba kpisi awore aworem nu, na ahoe to. ⁸ Nyini n kere ba yo kabo bara kutu ceen bumboori dee wahara n ti n wo.”

⁹ Nyini sangha, na bu tara am ma yikofom na bu kere am wuwuruwa, na bu kun am. Mini dee ti, sono kere kpo am. ¹⁰ Nyini sangha n na mine dongu ba kete m na bu su ma m kun, na bu to bu benju, na bu kpo bu benju. ¹¹ Na korefom dongu bo bu yo bu nu ka bere ti Nyeme noanie kanfom ni ba ba, na bu dadaka minem beberebe. ¹² Satieyo ba sunnu n dee ti, mine dongu koro ba ko i sin. ¹³ Ama, woro kere bo a mindi deeri nyini n kere ko juuri i awieeri, Nyeme de u tii ji. ¹⁴ Na bu ba kan ahin labari kpa n fa ko Nyeme femeya n jore su, kere durunya n nufom, na adamande kere ti i ka, na durunya n nya ba awieeri.”

Anyumaa ciire sa n bo i ba n jore

¹⁵ Na Yesu akaaki ase bu ka, “Am ba nu anyumaa ciire sa be bo Nyeme mmoo kpo i n na Nyeme noanie kanfo Danieli yo jooori i jore ni, ka i jina soo casi n bo i wo Nyeme Sereebiri Awuru n nu ni. Ma sono kere bo i kan

ahin kadasi n ti i bu nyunyumi. ¹⁶ Nyini sanja ni, wɔrɔ kere bo a tiiri i nja na a wo Yudiya asien n su, nmati kɔ bukam n su. ¹⁷ Wɔrɔ kere bo a wo kpata nu, má a wura gisan nu fa pui. ¹⁸ Na wɔrɔ kere gusu bo a wo fiesu, má a kpie u nyi kɔ awuru kɔ fa u sutura be. ¹⁹ Nyini sanja ni yó kekereke agaya ma nyinsefɔm, ni nbaram bo bu nbaam toko nu ni. ²⁰ Am sere Nyeme ka má nyini sa n yó buke sanja, wara Yudafoɔm Njumiya cɛn ni. ²¹ Nyini sanja ni wahara bo mine dí i, i tára wahara kere bo ba di i asin ni, fite sanja n bo Nyeme yiiri durunya ni, haari ni kisa. Nahɔre, nyini wahara n nusu bá má kun. ²² Ama, Nyeme akpie nyini sanja n su. Nzen má wɔ kpie má i su, má sɔnɔ wo má bere bo i nya nja, ama, i dɛe tienɔ minem bo wɔ yi bu n dɛe ti, ye wɔ kpie sanja n su a. ²³ Nyini sanja ni, na nzen be bá se am ka, 'Am nie, Kristo Tiidefoɔ ni wo fen n a,' wara, 'Am nie, yiri wo dɔ n a,' má am de i mi noanie ni. ²⁴ Dama kɔrefo nbem bá ba, na bu yó bu nja ka bere ti Kristo n a, na nbem gusu yó bu nja ka bu ti Nyeme noanie kanfoɔm wɔ. Bu yó alekutura sam beberebe fa kere am, na nzen bu koro nyaari atin, bu dá daka Nyeme dɛe minem mmɔɔ bo wɔ yi bu ni. ²⁵ Am bere, am ti fen, ma se am wɔ lɛe ka, na sanja n nyá ba ju. ²⁶ Na nzen be bá seeri am ka, 'Am nie, Kristo ni wo boro kpantain n nu dɔ n a,' má am kɔ dɔ. Wara, nzen be bá seeri am ka, 'Yiri fie sɔrɔ dɔ n a,' má am yo i mi yarada. ²⁷ Dama mini Adamande Wa n ba ni, i bá ti kabo nzue kpese na i ta bara ye deke kere n wɔ, fite wie afiiri fa kɔ ju wie atɔri n wɔ. ²⁸ Deke kere bo deke fuin nya wo, petem bara ye dɔ ɔ."

Kabo Adamande Wa ni bá kaaki ba barasu ni

²⁹ Na Yesu akaaki ase bu ka, "Sanja bo nyini wahara n kere ba siinri, 'Awosin káta wie n su, na sara n gusu tá má bo minem nja i. Na asarambaam fite angoro titi tɔtɔ, na angoro n kere kpisi.'

³⁰ Nyini sanja ni, na mine nja deke be angoro bo i kere ka mini Adamande Wa ni suba. Na minem bo bu wo durunya n nu n kere bó awie, na bu nyá nja ka mini Adamande Wa ni sufite angoro yinyingɔ n nu suje piepieu suba ni yiko bambaka ni. ³¹ Na bu tí ka awie be sukpara ni fanja su, na n nyá sunma Nyeme merékem durunya n awɔre n kere nu, na bu tien minem bo Nyeme ayi bu durunya n nu n kere noɔ."

Kabo Yesu nja ya fa damba baka fa se nyaari barasu ni

³² Na Yesu akaaki ase ka, "Am fa damba baka n fa se nyaari. Sanja bo am ba nja ka i nyawa akpɔnkpɔn, na i sufie fie fɔfɔre ni, am si ka dɔdɔri sanja adodo lɛe. ³³ Mini Adamande Wa n ba ni bá yo sɔ ɔ. Sanja bo am ba nja ka nyini sam kere bá suyo ni, am si tenle su ka sanja n adodo lɛe, i cé má kun. ³⁴ Nahɔre ye m suse am n a, ahin nyumafɔm busu kere wú wie má ka, ye nyini sam kere bá yo a. ³⁵ Angoro n ni asiengɔ n kere bá la awieeri, ama, m dɛe noanie n yiri la má awieeri cɛn be."

Kabo Yesu seeri ka ya si ya nja sa fa kɔ i ba n su ni

³⁶ Na Yesu akaaki ase ka, "Be si má sanja ni, wara cɛn n bo m bá kpie m nyi ba ni. Haari Nyeme merékem bo bu wo i dɔ ni, ni mini bo m ti i wa ni mmɔɔ si má. Má ka ya Si Nyeme ngumi si a. ³⁷ Mini Adamande Wa n ba sanja ni yó kabo sɔnɔ be bo bu fere i ka Nowa sanja na i yoori n wɔ. ³⁸ Sanja bo wɔmbu n nya di má durunya n ni, sɔnɔ kere woori di ni nu

su wɔ, na nbaram ni nbiesom suja bu beɲgum, fa kɔ juuri haari cɛɛn n bo Nowa wuraari lee bambaka n nu ni. ³⁹ Minem ayo asi má sa bo i bá yo ni, haari cɛɛn n bo wɔmbu n ba diiri bu kere ni. I yó sɔ ɔ, fa kɔ sanɲa n bo mini Adamande Wa ni bá ba ni. ⁴⁰ Nyini sanɲa ni, mine nnyɔ bá wo juma yo su fiesu, na Nyeme má bu bá fa kun n kɔ yaki kun ni. ⁴¹ Na nbaram nnyɔ wo ŋgani saanbiri, na Nyeme má bu bá fa kun n kɔ yaki kun ni. ⁴² Tɔ, nyini ti, má am fa am ŋu ji na am daafi, dama am si má cɛɛn n bo am Mibie ni bá ni. ⁴³ Am si tenle su ka nzen má awurufobie n si sanɲa bo awiefɔ ni bá i dika na i bá wɔ i, má i tana ŋminda a, na awiefɔ n koro ba wura má. ⁴⁴ Nyini ti, amberɛ gusu kpa am ŋu sanɲa kere, dama mini Adamande Wa ni, m bá sanɲa bo am sunsun má ka m bá n wɔ.”

Miɛnu fa kɔ akɔɔ nbem dabuɲu n jɔre

⁴⁵ Na Yesu akaaki ase ka, “Akɔɔ kpɛn n bo i la dabuɲu na i kaaki la alecira n la ŋma a? Yiri la bo i mibie n afa akɔɔ nyingam awura i saa nu ka i kpaaki diire nu ma bu, sanɲa bo i ti ye ni ka i ma bu ni. ⁴⁶ Nzen i mibie n ba ŋuuri ka i suyo i juma kabo i seeri ka i yo ni, terefie wo nyini akɔɔ n do. ⁴⁷ Nahɔre ye m suse am n a, mibie ni fá i aja kere wura nyini akɔɔ n saa nu wɔ, na i nɛ i dika. ⁴⁸ Ama, nzen i ti akɔɔ tiefɔ, i súnsun ka i mibie ni kpɛ má i nyi nde. ⁴⁹ A ŋu ka i subo akɔɔ nyingam wɔ, na i súdi, na i ni nzan nufɔm sunu bo. ⁵⁰ Do, na i mibie n ba kpɛeri i nyi baari cɛɛn bo i sunsun má ka i bá, na i kaaki si má ba n sanɲa ni. ⁵¹ Nyini sanɲa n na i mibie n cín i sui agaya, na i fá i bo burukɔɔnufɔm n su. Do na i sún, na i kán i saa.”

25

Miɛnu fa kɔ nsunɲuru buru nbem jɔre

¹ Na Yesu akaaki ase bu ka, “Sanɲa bo mini Adamande Wa ni bá ba, na Nyeme Feme bá nɛ i minem su ni, i yó ka nsunɲuru buru nbem bo bu faari bu fitanam ka bu kɔ kpa konyafan atin n wɔ. ² Bu mine nnu tiiri alecirafom wɔ, na nnu nyingam n ati sinnzinm. ³ Na sinnzinm n afa bu fitanam, ama, ba bita má ŋguin nu, ⁴ na alecirafom n bere afa ŋguin abita nu. ⁵ Na ba kɔ anɲminda konyafan n ace, wɔ ba má nde, na daafiri aba ati nsunɲurum ni, na ba daafi. ⁶ Na jinanjin sanɲa, na ba ti ka bu subo ndoori ka, ‘Konyafan ni suba o, am fite na ya kɔ kpa i atin.’ ⁷ Na nsunɲuru burum kere ayasu, ayo bu fitanam doŋgu. ⁸ Na sinnzinm n ase alecirafom ni ka, ‘Am bu am ŋguin n be ma ya, ya fitanam ni sunɔ.’ ⁹ Na alecirafom n ase bu ka, ‘Ai, ya ŋguin ni koro ju má ya ni amberɛ kere. Am kɔ ŋguin tofom do, na am kɔ to.’ ¹⁰ Na nsunɲuru sinnzinm n akɔ ka bu kɔ to ŋguin ni. Bu kɔ wieeri ni, na konyafan n aju. Na nsunɲuru nnum bo ba kpa bu ŋu ni, asu i su, awura konyaya awuru n nu. Na ba tu anɔ ni. ¹¹ Kasin, na nsunɲuru nyingam bo bu kɔɔri ŋguin to ni, aba ajina anɔ n nu, abo afere i ka, ‘Ya mibie, ya mibie, teke anɔ n ma ya na ya wura.’ ¹² Na konyafan n ase bu ka, ‘Ai, nahɔre ye m suse am n a, m si má am cɛɛn be cɛɛn be.’” ¹³ Na Yesu ase i susufom n ka, “Tɔ, nyini ti, má am fa am ŋu ji na am daafi, dama am si má cɛɛn n bo m bá ni.”

Miɛnu fa kɔ akɔɔ nsan nbem dabuɲu n jɔre

¹⁴ Na Yesu ase bu ka, “Sanɲa bo m bá ba ni, i yó kabo sɔnɔ be sukɔ atin, na i fereeri i akɔɔm, na i faari i nenɲe kere wuraari bu saa nu, ka bu nɛ

i dika n wɔ. ¹⁵ Na wɔ fa ηwaa akpaaki bu kere nu, kabo bu koro bita i barasu. I faari ηwaa n busu nnu maari kun wɔ, na wɔ fa busu nnyɔ n ama kun gusu, na wɔ nya afa busu kun n ama nyinga ni. Na wɔ kɔ atin ni. ¹⁶ Na bo i maari i busu nnu ni afa abo wata bu, na wɔ nya i ηusu nnu abuka su. ¹⁷ Na bo i maari i busu nnyɔ n gusu ayo sɔ, na wɔ nya i ηusu nnyɔ abuka su. ¹⁸ Ama, bo i maari i seseewa kun ni kɔ funduuri kunma wɔ, na wɔ fa i dɛɛ ηwaa n awura nu, na wɔ kata su. ¹⁹ Na bu mibie n akɔ ace dɔ, haari na wɔ ba aba ka i ba nie kabo bu bita i ηwaa n barasu ni. ²⁰ Na bo i maari i busu nnu n afa i dɛɛ ηwaa aba, na wɔ se i mibie n ka, 'M mibie, nie. A maari m ηwaa n busu nnu wɔ, ama, ma nya i ηusu nnu abuka su.' ²¹ Na i mibie n ase i ka, 'Nfan. Wɔrɔ akɔɔ kpa bo a la dabuɔ ni, kabo a kere ka a la dabuɔ ni, m fá dɔngɔ n mmɔɔ wura u saa nu na a nie i dika. Bra na a ba nya ahorejɔ n bo má nya i n be.' ²² Na bo i maari i busu nnyɔ n gusu aba ase i mibie n ka, 'M mibie, nie. A maari m ηwaa n busu nnyɔ ɔ, ama, ma nya i ηusu nnyɔ abuka su.' ²³ Na i mibie n ase i ka, 'Nfan. Wɔrɔ akɔɔ kpa bo a la dabuɔ ni, kabo a kere ka a la dabuɔ ni, m fá dɔngɔ n mmɔɔ wura u saa nu na a nie i dika. Bra na a ba nya ahorejɔ n bo ma nya i n be.' ²⁴ Kasin, na bo i maari i seseewa kun ni aba, na wɔ se ka, 'M mibie, m si u sa ka a ti sɔnɔ fangafɔ ɔ. Deke bo a dɔ má i ni, a kpie nyini wɔ. Na deke bo a bobo má i ni, a tientien nyini nɔɔ a. ²⁵ Nyini ti ye sere tiiri m a, na ma fundu kunma afa u ηwaa n afie i nu. Yiri yaa, de u deke.' ²⁶ Na i mibie n akaaki ase i ka, 'Wɔrɔ akɔɔ tie nviyafɔ ni, a si tenle su ka deke bo ma dɔ má i ni, m kpie nyini wɔ, na deke bo ma bobo má i ni, m tientien nyini nɔɔ a. ²⁷ Tɔ, má a si ka i ti sɔ ni, má wɔ yo daka ka a fa m ηwaa n kɔ seeri banɔkifɔm dɔ, na má m ba kpieeri m nyi baari, má m de m deke na m nya kperɛ buka su.' ²⁸ Dɔ na mibie n ase i minem ka, 'Tɔ, am de ηwaa ni i dɔ kisa kisa, na am fa ma akɔɔ n bo i bita ηwaa n busu buru ni. ²⁹ Dama sɔnɔ kere bo wɔ nya deke na i mi si i bita, bu má i buka su wɔ, na i nyá beberebe, ama, bo i si má i bita, haari ni nyini kaan n bo i la i ni, bu cín de i dɔ ɔ. ³⁰ Ama, m ahin akɔɔ ngbɛɛn ni, am fa i tu awosin n nu, deke bo i sún, na i kán i saa.' "

Kabo Yesu bá di minem jɔre barasu ni

³¹ Na Yesu akaaki ase ka, "Sanga bo mini Adamande Wa ni bá baari ni m jirima woowa n nu ni, ni Nyeme merɛkem kere ni, m bá tana m jirima femeya bie n su. ³² Na durunya n nu minem kere bá tien bu nɔɔ m nyunu, na m kpáaki bu nu, busu nnyɔ, kabo bɛsasafɔ kpaaki yi nbɔɛm ni sirim nu barasu ni. ³³ Na m má m dɛɛ minem bo bu ti ka nbɔɛm ni jina m saa fɔmbɔrɔ su, na m má bo ba ka na bu ti ka sirim ni jina m saa bie su. ³⁴ Na mini femɛ n sé bo bu wo m saa fɔmbɔrɔ su n ka, 'Ambere bo m Si Nyeme ayo am kisi ni, am bra na am ba de femeya n bo wɔ sɛsɛ i su ase ama am, fite durunya n bumboori kere ni. ³⁵ Deke bo i ti na m se am sɔ n la ka, ahɔɛ yo tiiri m, na am ama m diire. Nzuehɔɛ yo tiiri m, na am ama m nzue. M yo baari am dɔ ka wɔfɔ, na am ade m. ³⁶ M yo kaari m bu ngbɛɛn, na am ama m sutara. M yo daari tukpaki, na am aba anie m dika. Bu yo nyiiri m dansaraka, na am ako anie m busu.' ³⁷ Dɔ na m minem bo bu yo sa bo i kɔ atin su ni nyá bo m nu ka, 'Ya Mibie, sanga bɔnɔ ye ya ηuuri ka ahɔɛ ati u, ye ya maari u diire a, wara nzuehɔɛ ati u, ye ya maari u nzue a? ³⁸ Sanga bɔnɔ tenle su, ye a baari ya dɔ ka wɔfɔ, ye ya deeru u a, wara sanga bɔnɔ

ye a kaari u bu ngbeɛn, ye ya maari u sutura a? ³⁹ Saɗga boɔo ye ya ɗuuri ka a daari tukpaki, wara saɗga boɔo ye bu nyiiri u dansaraka, ye ya ko niɛeri u busu a?' ⁴⁰ Do na m nya bo bu nu ka, 'Nahore ye m suse am n a, saɗga kere bo am yo yoori sakpa fa maari m ahin ninbaa kan kanm ni kun, am yo maari mini wo lee.' ⁴¹ Na m nya se bo bu wo m saa bie su n ka, 'Ambere bo m Si Nyeme ayo am ngbeɛn na wo fa noo tie ase am ɗu ni, am fa cinsi m bi bere na am ko wura sin n bo i no ma n nu, nyini sin n ye ba toro i afa ase Sitana ni i dee meretekem n a. ⁴² Deke bo i ti na m se am so n la ka, ahoe yo tiiri m, ama, am ama ma m diire. Nzuehose yo tiiri m, ama, am ama ma m nzue. ⁴³ M yo baari am dika, ama, am ade ma m wofa. M yo kaari m bu ngbeɛn, ama, am ama ma m sutura. M yo daari tukpaki, wara m yo woori dansaraka nu, ama, am ako anie ma m busu.' ⁴⁴ Do na bere bo bu wo m saa bie su ni nya bo m nu ka, 'Ya Mibie, saɗga boɔo ye ya ɗuuri u ka ahoɛ ati u, wara nzuehose ati u, wara a baari ya wofa, wara a kaari u bu ngbeɛn, wara a daari tukpaki, wara a woori dansaraka, ye ya buka ma u a?' ⁴⁵ Na m nya kaaki se bu ka, 'Nahore ye m suse am n a, saɗga kere bo am ayo ma sakpa, ama ma m ahin ninbaa kan kanm ni kun, am ayo ama ma mini wo lee.' ⁴⁶ Na nyinim bere ko wo suicin n bo i la ma awieeri n nu. Ama, na bo bu yo sa bo i ko atin su Nyeme do ni, bere ko wo ngoo bo i la ma awieeri n nu."

26

Kabo bu seseeri su ka bu tara Yesu ni

¹ Saɗga bo Yesu kereeri nyini kereewam kere wieeri ni, na wo se i susufoɔm ni ka, ² "Am si ka wo ka lennyo o, na bu di Butara ceenkpiri ni. Do ye bu nya mini Adamande Wa n taraabiri a, na bu kpama m baka jaanu n su."

³ Do na Nyeme sayoowa donɗuyofa nkpienkpienm ni, ni Yudafoɔm nkpienkpienm n atien bu noo bu kpien n dika, bu fere i ka Kayafasi, yiri ti Nyeme sayoowa donɗuyofa kere kpien a, ⁴ na ba fa seseu ka bu tara Yesu asiri nu na bu kun i. ⁵ Na ba se bu ɗuɗu nu ka, "Ma am ma ya yo i ceenkpiri n saɗga. Ma nyini, minem ni kete yo naɗmie wo, na bu sutientien."

Kabo bara be faari tulaaleɛ goori Yesu tii su ni

⁶ Yesu woori Betani mie n nu wo, soɔo be dika, bu fere i ka Simon, i yo ti kokofa o. ⁷ Saɗga bo Yesu wo diire di su ni, na bara be aba i do, ni tulaaleɛ tuwa nvanvani bo i la go agaya. Na wo teke tulaaleɛ tuwa n noo, na wo kaaki tulaaleɛ n kere ago Yesu tii su. ⁸ Yesu susufoɔm ni ɗuuri i so ni, na yaa ati bu agaya, na ba bisa bu ɗuɗu nu ka, "Nzu ti ye wo saaki i so a?" ⁹ Ma ya toori nyini tulaaleɛ ni, ma ya nya ɗwaa beberebe, na ma ya fa nyini ɗwaa n ma yaarifom." ¹⁰ Na Yesu asi sunsunni bo bu bita i, na wo se bu ka, "Nzu ti ye am sukan bara ni ndie a? Sakpa lee ye wo yo ama m n a. ¹¹ Am ni yaarifom ni wo bere saɗga kere a, ama, mini, m wo ma am do saɗga kere. ¹² Tulaaleɛ n bo wo kaaki ago m ɗu ni, i kere ka i nzee bo wo fa ayo m siriya afa anminda m yiwee ceen lee. ¹³ Nahore ye m suse am n a, deke kere bo bu ba kaanri Nyeme labari kpa n durunya n kere nu, bu kan i sayoowa n na minem tenge i su."

Kabo Yudasɛ seseeri su ka i to Yesu ni

¹⁴ Na Yesu susufo buru ni nnyom nu kun bo bu fere i ka Yudasi Isikariyoti ni, ako Nyeme sayoowa dongyufo nkpienkpienm ni do, ¹⁵ ako abisa bu ka, "Nzen m tɔɔri Yesu maari am, am má m nzu wo?" Na ba kan jete njwaa aburasan, afa ama i. ¹⁶ Fite nyini cɛɛn n na Yudasi akpini atin kabo i yó na bu nya Yesu taraabiri.

Kabo Yesu ni i susufom diiri cɛɛnkpiri diire ni

¹⁷ Na cɛɛnkpiri n bo bu di i ni kpɔɔ bo bu go má ayiri nu na i yasu ni, i lekun cɛɛn, na Yesu susufom n aba i do, aba abisa ka, "A koro ka ya ko ni ko sese Butara cɛɛnkpiri n diire n su se a?" ¹⁸ Na wo se bu ka, "Am ko mie n kunnu, sɔɔɔ be wo do, na am ko se i ka, 'Ya Kerefɔ n ɔa o, i sangɔ n aju. Na i ni i susufom ni bá di Butara cɛɛnkpiri diire ni, u dika n nu.'" ¹⁹ Na Yesu susufom n ako ayo kabo i seeri bu ni, na ba sese Butara cɛɛnkpiri n diire n su.

²⁰ Na naaso sangɔ, na Yesu ni i susufo buru ni nnyom n aba atana ka bu di diire ni. ²¹ Sangɔ bo bu tana wo diire n di su ni, na Yesu ase bu ka, "Nahore ye m suse am n a, am nu kun bá to m ma m kpɔfom a." ²² Na bu ahore asaaki, na bu kun kun n kere abisa i ka, "M Mibiɛ, ye m ɔa má mini yiri e?" ²³ Na Yesu abo bu nu ka, "Am nu kun bo m ni yiri sangɔ fa ya saa wura taale kun nu ni, yiri to m a." ²⁴ Mini Adamande Wa ni wú kabo ba kere i Nyeme Jore Kadasi n nu ase ka m wú n wo, ama, sɔɔɔ n bo i to mini Adamande Wa n ni, i mi bá ɔu anyumboro. Má ba wu má i mi n mmɔɔ, má i ti ye." ²⁵ Na Yudasi bo i to Yesu n abisa i ka, "Ya Kerefɔ, m ɔa má mini yiri e?" Na Yesu abo i nu ka, "Kabo a jɔjɔri ni, i ti so ɔ."

Ya Mibiɛ kasin diire n jore

²⁶ Sangɔ bo Yesu ni i susufom ni wo diire n di su ni, na Yesu afa kpɔɔ, na wo da Nyeme asi, na wo bubu i nu, na wo fa ama bu, na wo se bu ka, "Am de ahin kpɔɔ n na am di, i ti m ɔuniɛmbaa a." ²⁷ Na wo kaaki afa awa ni nzan, na wo da Nyeme asi, na wo fa ama bu, na wo se bu ka, "Am kere nu be." ²⁸ Ahin nzan n ni, i mi bá ɔu anyumboro. Má ba wu má i mi n mmɔɔ, má i ti ye." ²⁹ Na wo kaaki ase bu ka, "M suse am wo lɛɛ, ka, m nú má ahin nzan bekun, má ka cɛɛn be bo m ni ambere bá sangɔ nu i fofore, m Si Nyeme femeya n nu ni."

³⁰ Nyini sin na ba di jue akansi Nyeme, na ba fite ako Oliva Buka n su.

Kabo Yesu seeri i susufom n ka bu bá ɔmati yaki i ni

³¹ Do na Yesu ase i susufom ni ka, "Nyuma deɛ kɔngue n nu, am kere ɔmati yaki m, dama ba kere i Nyeme Jore Kadasi n nu ka, Nyeme ɔa, 'M bó kun boesasafɔ ni, na nboɛm bá sandi.'

³² Ama, m bá tengeeri m yiwee n nu, m dú am mo ko Galili awore n nu."

³³ Na Petoro ase i ka, "Nzen ahinm kere ɔmati yakiiri u, mini ɔmati yaki má u da." ³⁴ Na Yesu ase Petoro ka, "Nahore ye m suse u n a, nyuma kɔngue n nu, kana akonyuma bá bo, a kete kpe nsan ka a si má m." ³⁵ Na Petoro akaaki ase i ka, "Mini sé má so da. Nzen haari wo yo daka ka mini ni wɔɔ kere sangɔ wú mmɔɔ, ɔka ya wú wo." Na i susufom n kere ase so.

Kabo Yesu jeke tiiri na i ko sereeri Nyeme ni

³⁶ Na Yesu ni i susufom n ayasu ako aju awore be bo bu fere i ka Gesemane ni, na Yesu ase i susufom ni ka, "Am tana fen nminda m, na m ko do ko sere Nyeme." ³⁷ Na wo fa Petoro ni Zebedi nbaa nnyom ni, na ba ko mo kaan. Bu ko juuri do, na ahoresaaki aba i do agaya, na i jeke ati. ³⁸ Na wo se bu ka, "Ahoresaaki aba m do agaya, i yo m ka m wu wo mmoo. Am wo fen na am nminda m. Ma am daafi." ³⁹ Na wo ko deke kaan, na wo butu i kunnu su. Na wo sere Nyeme, i na, "M Si Nyeme, nzen ma a soro su, yi m fite ahin anyumboro n bo i suba m do n nu. Haari ni nyini mmoo, ma a yo kabo m koro ni, ama, yo kabo a koro ni."

⁴⁰ I sere Nyeme wieeri ni, na wo kpie i nyi ako anu ka i susufo nsanm ni wo daafiri su. Na wo bisa Petoro ka, "Nzu ti ye am mine nsan n kere be mmoo koro kpie ma daafiri haari kaan so mmoo a?" ⁴¹ Na wo kaaki ase bu ka, "Am kpie daafiri, na am sere Nyeme adena ma deke be yo am na am wura satie nu. Ahorembaa n koro nyemesu, ama, anuniembaa n ayoroki."

⁴² Na wo kaaki ako asere Nyeme bekun, i na, "M Si Nyeme, nzen i ti u dee koroyanu ka m fite ma ahin anyumboro n bo i suba m do n nu, ma u dee koroowa n yo." ⁴³ Na wo kpie i nyi aba i susufom n do, na wo ba anu ka ba daafi bekun, dama daafiri ati bu agaya. ⁴⁴ Na Yesu ayaki bu bekun, na wo ko asere Nyeme kpe nsan su, ni nyini noanie jooowa kun bo i du mo jooori i ni. ⁴⁵ Nyini sin, na wo kpie i nyi aba i susufom n do, aba anu ka bu toko wo daafiri su, na wo se bu ka, "Am toko daafi yi am nuni wo? Am nie, sanja n aju, wo to mini Adamande Wa ni ama satieyofom. ⁴⁶ Am nie, sono n bo wo to m lee. Am yasu na ya ko."

Kabo bu taraari Yesu barasu ni

⁴⁷ Na sanga bo Yesu toko wo jooori su ni, na Yudas bo i ti Yesu susufo buru ni nnyom nu kun aju ni jama beberebe. Bu bita takobem ni koromam. Nyeme sayoowa donguyofom, ni Yudafom nkpienkpienm ni sunmaari bu a. ⁴⁸ Na Yudas bo i tooori Yesu ni akere jama n nyaari su kabo bu si Yesu na bu tara i. I na, "Sono n bo m ko biti i ni, yiri lee. Am tara i." ⁴⁹ Sanga bo bu ko juuri deke bo Yesu wo ni, na Yudas akaba ako i do, na wo se i ka, "Ya Kerefo." Na wo biti i, na wo yo i anse. ⁵⁰ Na Yesu ase i ka, "M don, yo deke n bo a koro ka a yo i ni ndende." Na minem n aba atara Yesu, na ba bita i kenken. ⁵¹ Na Yesu susufom n nu kun acin aworo i takobe, na wo kpie sono be sui, nyini sono n ti Nyeme sayoowa donguyofom kpien n ako o. ⁵² Na Yesu ase i ka, "Fa u takobe n kaaki wura i bue nu. Dama minem kere bo bu fa takobe yo juma ni, bere gusu ba wu ni takobe wo. ⁵³ A si ma ka nzen ma m sereeri m Si Nyeme, i sunma i merkem asese asese buru ni nnyo, na bu ba buka m kisa kisa bere? ⁵⁴ Ama, nzen m nya yoori so, kabo ba kere i Nyeme Jore Kadasi n nu ka wo yo daka ka i yo so ni, i yo se ye i ba yo yiiwa?"

⁵⁵ Na Yesu abisa jama n ka, "M ti finfo o, ye am fa takobem ni koromam na am ba tara m a? Een kere een m ni ambere wo Nyeme Sereebiri Awuru n nu a, ye m kere minem a, ama, am atara ma m. ⁵⁶ Ama, ahin kere yo so, adena kabo Nyeme noanie kanfom akere i Nyeme Jore Kadasi n nu n yo yiiwa a." Do na i susufom n kere anmati ayaki i.

Kabo bu fa Yesu koori jore diibiri ni

⁵⁷ Na bo bu taraari Yesu n afa i ako Kayafasi do, yiri ti Nyeme sayoowa donguyofom kpien n a. I dika n nu ye Nyeme noanie kerefom ni, ni

Yudafom nkpienkpienm n tieenri bu nɔɔ a. ⁵⁸ Na Petoro asu Yesu su, i woori dede kaan ni yiri, haari i kɔ wuruari Nyeme sayoowa dɔnguyofom kpien n dika gisan nu. I wuruari gisan n nu ni, na wɔ kɔ asanga atana tintinijinafom nu, adena i ɲu sa n bo i yo n awieeri. ⁵⁹ Na Nyeme sayoowa dɔnguyofom nkpienkpienm ni, ni Yudafom tereterefom n kere anienie minem bo bu bá di kore daani fa kɔ ɲgasi bo Yesu ado i ni, adena bu nya i taraabiri na bu kun i. ⁶⁰ Haari ni bo mine beberebe fite jina diiri kore daani n kere, ba nya má jore bo bu fa kpie sɔ i. Kasin na mine nnyɔ nbem ayasu ajina, ⁶¹ na ba se ka, “Ahin sɔnɔ n ɲa yiri koro fufu Nyeme Sereebiri Awuru ni, na i káaki ta i lesan afien.” ⁶² Na Nyeme sayoowa dɔnguyofom kpien n ayasu ajina, na wɔ bisa Yesu ka, “A la má bonu be fa kɔ ahin jore n bo minem ni akpie asɔ u n su?” ⁶³ Ama, na Yesu amɔ i nɔɔ. Na Nyeme sayoowa dɔnguyofom kpien n ajojo i dɔ bekun, i ɲa, “Kisa, m koro ka a tan Nyeme bo i wo bere sanga kere ni. Nzen wɔɔ ti Nyeme Wa n bo i ti Kristo Tiidefo ni, se ya.” ⁶⁴ Na Yesu abɔ i nu ka, “Kabo a jojɔri ni, i ti sɔ ɔ. Ama, m suse am kere wɔ lee ka,

‘Fite nyuma fa kɔ, am bá ɲu mini Adamande Wa ni

ka m tana Nyeme Yikofɔ n saa fombɔɔ su,

na am ɲú ka m fite aɲgoro yinyingɔ n nu suba.’ ”

⁶⁵ Yesu bo nu sɔ wieeri ni, na Nyeme sayoowa dɔnguyofom kpien n asɔn i tanlee. Na wɔ se ka, “Wɔ jojo awura Nyeme ɲgasi nu. Ya koro má daanifo bekun. Amberɛ mmɔɔ ti kabo wɔ jojo awura Nyeme ɲgasi n nu e. ⁶⁶ Ye am ɲa se wɔ?” Na bu kere ase ka, “Wɔ kan ciire jore lee, wɔ yo daka ka i wu.”

⁶⁷ Na ba yi nanzue ago Yesu nyunuawa nu, na ba bo i, na ba bo i nyɔɔnu, ⁶⁸ na ba se i ka, “Wɔɔ Kristo Tiidefo ni, ɲma bo u a? Kan kere ya.”

Kabo Petoro keteeri ka i si má Yesu ni

⁶⁹ Bu wo nyini kere su ni, na Petoro toko tana gisan n nu, na afani be aba i bi, na wɔ se Petoro ka, “Wɔɔ mmɔɔ yo woori nyini Yesu Galilifo n dɔ ɔ.” ⁷⁰ Ama, na Petoro akete bu kere nyunu ase ka, “Ai, m si má nyini jore n bo a sujɔjo i ni mmɔɔ.” ⁷¹ Na Petoro afite akɔ gisan n anɔ n nu, na afani nyinga be aba aɲu i, na wɔ se minem bo bu jina bere n ka, “Ahin sɔnɔ ni mmɔɔ yo woori Yesu Nazaretifo n dɔ ɔ.” ⁷² Na Petoro akete bekun, na wɔ tan ndie, i ɲa, “Mini si má nyini sɔnɔ ni mmɔɔ.” ⁷³ Wɔ ce má na minem n bo bu jina bere n gusu ase Petoro ka, “Nahɔre, a ti bu kun wɔ, dama u jojɔɔwa ni kere sɔ a.” ⁷⁴ Na Petoro atan ndie afa i saa awura sin nu, i ɲa, “M si má nyini sɔnɔ ni.” Kpenɲa na akɔnyuma abo. ⁷⁵ Na Petoro atenje su kabo Yesu seeri i ni, i ɲa “Kana akɔnyuma bá bo, a kéte kpe nсан su ka a si má m.” Na wɔ fite akɔ asun agaya.

27

Kabo bu faari Yesu kɔ jinaari Gomina Pilato nyunu ni

¹ Na alecin sanga na Nyeme sayoowa dɔnguyofom nkpienkpienm, ni Yudafom nkpienkpienm n atana asese su kabo bu yo barasu na bu kun i. ² Na ba wura i jɔɔkɔ, na ba fa i akɔ ama Pilato bo i ti Romafom gomina ni.

Kabo Yudasi kuunri i ɲu ni

³ Sanga bo Yudasi bo i tɔɔri Yesu n tiiri ka ba ma nɔɔ ka bu kun Yesu ni, na wɔ yo m si n sɔ, na wɔ kaaki awɔɔ jete ɲwaa aburasan n aba ama

Nyeme sayoowa dɔɔguyofɔ nkpienkpienm, ni Yudafɔm nkpienkpienm ni.

⁴ Na wɔ se bu ka, “Ma yo satie kabo ma tɔ sɔnɔ bo i la má ngasi be na bu kun i ni.” Na ba se i ka, “Ya cɛɛ bonɔ wo nyini nu a? U dɛɛ jɔre lɛɛ.”

⁵ Na Yudasi afa ɔwaa n atu Nyeme Sereebiri Awuru n nu, na wɔ fite ako awura i kɔm nyama akun i ɔu.

⁶ Na Nyeme sayoowa dɔɔguyofɔ nkpienkpienm n afa ɔwaa ni, na ba se ka, “Ahin ɔwaa n ti mbunja yiiwa ɔwaa a. Nyeme noanie kpamaawa n kere ka má be fa i ɔusu fa sanja Nyeme Sereebiri Awuru dɛɛ ɔwaa n nu.”

⁷ Na ba yo anɔɔse, afa ɔwaa n ato asien be, bo bu fere i ka yakati tafo juma yoobiri ni, ka bu fa yo wɔfɔm seebiri. ⁸ Nyini ti ye bu fere nyini asien n ka Mbunja Asien, haari ni nyuma sɔ n a. ⁹ Dɔ na noanie n bo Nyeme noanie kanfo Jeremiya yo jɔɔɔri n ayo yiiwa, i ɔa, “Ba fa jete ɔwaa aburasan n bo Yisarelifɔm kere soroori su ka bu tɔ i kaari, sɔnɔ n dɛɛ ti ni, ¹⁰ na ba fa ɔwaa n ato yakati tafo juma yoobiri, kabo Micera n seeri m ka bu yó lɛɛ.”

Kabo Gomina Pilato bisaari Yesu jɔre ni

¹¹ Na ba fa Yesu ako ajina Gomina Pilato n nyunu, na wɔ bisa Yesu ka, “Wɔɔɔ ti Yudafɔm fɛmɛ n a?” Na wɔ bo i nu ka, “Kabo a jɔɔ ni, i ti sɔ ɔ.”

¹² Na Nyeme sayoowa dɔɔguyofɔ nkpienkpienm, ni Yudafɔm nkpienkpienm akpie jɔre asɔ Yesu, ama, wɔ bo má be nu. ¹³ Na Gomina Pilato abisa i ka, “A ti má jɔre n kere bo ba kpie asɔ u ni?” ¹⁴ Ama, Yesu abɔ má jɔre n haari kun be mmɔɔ nu, na gomina n abirisi agaya kabo wɔ bo má nu ni.

Kabo Gomina Pilato maari nɔɔ ka bu kun Yesu ni

¹⁵ Afɔ kere afɔ, Butara cɛɛkpiri n nya ba ju, Romafɔm gomina yi dansaraka n bo jama n koro ka i yi i ji n wɔ. ¹⁶ Nyini sanja ni, sɔnɔ be woori dansaraka n nu dɔ, bu fere i ka Barabasi, i ti má jɔre bu, sɔnɔ kere si i sa.

¹⁷ Na sanja bo jama n kere ba tiɛɛri bu nɔɔ ni, na Gomina Pilato abisa bu ka, “Am koro ka m yi ɔma ma am a, Barabasi ni, nzen Yesu n bo bu fere i ka Kristo Tiidefo ni?” ¹⁸ I seeri sɔ ni, dama i siiri tenle su ka bu si Yesu kɔre ti ye bu faari i ba wuraari i saa nu a.

¹⁹ Sanja bo Gomina Pilato wo Yesu jɔredi su ni, na i yi asunma ase ka, “Má a se ka a yo nyini nahɔrefɔ n sa be, dama anuma kɔɔgue, ma cin alele fa kɔ nyini sɔnɔ n dɔ bo wɔ mie m agaya.”

²⁰ Ama, na Nyeme sayoowa dɔɔguyofɔ nkpienkpienm, ni Yudafɔm nkpienkpienm n awura jama n bu sin ka bu sere Gomina Pilato ka i yi Barabasi ma bu, na i kún Yesu. ²¹ Ama, na Gomina Pilato akaaki abisa jama n ka, “Nyini mine nnyɔm ni nu, am koro ka m yi ɔma ma am a?” Na ba bo i nu ka, “Barabasi.” ²² Na Gomina Pilato abisa bekun ka, “Ye ahin Yesu n bo bu fere i ka Kristo Tiidefo ni, am koro ka m yó i se wɔ?” Na bu kere abɔ i nu ka, “Kpama i baka jaanu n su na i wu.” ²³ Na Pilato abisa ka, “Ye nzu satie ye wɔ yo i a?” Ama, na ba kaaki atien kpa agaya bekun ase ka, “Kpama i baka jaanu n su na i wu.”

²⁴ Sanja bo Gomina Pilato ɔuuri ka i koro yo má jɔre n dɔɔgu, haari ni bo wɔ boro i nyi na i yo i dɔɔgu ni, jama n akete sukoro ka bu yo nanmie. Nyini ti, na wɔ fa nzue aɔmisi i saa, jama n kere nyunu, na wɔ se bu ka, “M saa wo má ahin sɔnɔ n yiwee nu. Am dɛɛ jɔre lɛɛ.” ²⁵ Na jama n kere ase i ka, “Tɔ, ma i yiwee ni ngasi su ya su, ni ya anumam kere.” ²⁶ Dɔ na Gomina Pilato ayi Barabasi aji, na wɔ ma sojam n afin Yesu ngbere, na wɔ nya afa i awura bu saa nu ka bu kɔ kpama i baka jaanu n su na i wu.

Kabo sojam yoori Yesu anzasi ni

²⁷ Na Gomina Pilato n dɛɛ sojam n afa Yesu awura i gisan n nu, na ba tien bu benɗu sojam kere nɔɔ abara aye i. ²⁸ Na ba yi Yesu sutura bo i wura i ni, na ba fa tanlɛɛ kokɔre yorom be ka femɛya tanlɛɛ dɛɛ su awura i. ²⁹ Na ba fa buwe anɗo i ka kaba dɛɛ su, na ba fa aforo i tii ka femɛya kere dɛɛ su. Na ba fa kpama awura i saa nu, na ba kutu i nyunu suyo i anzasi, bu ɗa, “Yudafom Feme ni, ya yo u anse.” ³⁰ Na ba yi nanzue ago i ɗu, na ba de kpama ni i do, na bu sufin i tii baka. ³¹ Bu ba yoori i anzasi n wieeri ni, na ba yi tanlɛɛ kokɔre yorom ni, na ba kaaki afa i tienɗu dɛɛ sutura n awura i. Na ba nya afa i ako ka bu ko kpama i baka jaanu n su.

Kabo bu kpamaari Yesu baka jaanu n su ni

³² Sanga bo bu sukɔ ni, na bu ni Sirenefo biɛ be aye, bu fere i ka Simon. Na sojam n amie i ka i so Yesu baka jaanu ni. ³³ Na ba ko aju awore be bo bu fere i ka *Gologota* ni, *Gologota* n bu la ka Tereawa Woobiri. ³⁴ Na ba sanga nzan ni ayiri wiwi barasu be ama Yesu ka i nu na i jo yaari ni, ama, i kaanri i nɔɔ ɔ, na wo kete, wo nu ma i. ³⁵ Na ba nya akpama i baka jaanu n su, na ba ye i su ajina. Bu yoori so wieeri ni, na ba tu mbaa na bu si kabo bu kpaaki i suturam nu, bu ɗuɗu nu. ³⁶ Nyini sin na ba ka atana sunie Yesu. ³⁷ Na ba kere jore n bo bu kpie soori i ni, afa abo akpama i baka jaanu n tii su, kerɛewa n la ka, “Yesu bo i ti Yudafom Feme n lɛɛ.” ³⁸ Na ba kpama finfo nnyo nbem baka jaanu su adodo i, bu kpamaari kun i saa fomboro su, na ba kpama kun n gusu i saa bie su.

³⁹ Na minem kere bo bu sin do ni, subobo bu tii, na ba kpie i nzuko, bu ɗa, ⁴⁰ “Woro bo a ɗa a fufu Nyeme Sereebiri Awuru n na a kaaki ta i lesan afien n lɛɛ, de u tii ji. Nzen a ti Nyeme Wa nahore su, jura baka jaanu n su.” ⁴¹ So ye Nyeme sayoowa donɗuyofo nkpienkpienm, ni Nyeme nonie kerefom, ni Yudafom nkpienkpienm n gusu yoori i anzasi a, ⁴² bu ɗa, “Wo de minem tii aji, ama, i sukoro de ma yiri ni i tii. M ɗa i ti Yisareliɓom Feme n wo e. To, ma i jura baka jaanu n su bra kisa kisa na ya nie, na ya yo i yarada. ⁴³ I daafi Nyeme ɗu a, ye i ɗa i ti Nyeme Wa a. To, nzen Nyeme koro i a, ma i de i tii ji kisa na ya nie.” ⁴⁴ Haari na finfo nnyom n bo bu kpamaari bu dodoori Yesu ni mmoo akpie i nzuko so.

Kabo Yesu wuuri ni

⁴⁵ Wiesu kerefi buru ni nnyo sanga na awosin akata asien n kere su, haari naaso kerefi nsan. ⁴⁶ Na fa ko nyini sangani, na Yesu abo awie kpa ase ka, “Eli, Eli, lama sabatani?” I bu la ka, “M Nyeme, m Nyeme, nzu ti ye a yaki m aji a?” ⁴⁷ Na mine nbem jinaari bere, bu nbem ni tiiri so ni, na ba se ka, “Am ti, ahin soɔn n sufere Eliya.” ⁴⁸ Kpenɗa na bu nu kund anmati afa mene, ado nzan gagaraki be nu, na wo fa awo baka su alaandi ato Yesu nɔɔ ka i nu. ⁴⁹ Ama, na nyingam n ase ka, “Am yaki na ya nie, ka Eliya ba de i tii ji?”

⁵⁰ Na Yesu abo awie kpa, na wo nya ayo Nyeme dɛɛ. ⁵¹ Do na tani bambaka n bo bu fa kanda kpaakiiri Soɔ Casi n bo i wo Nyeme Sereebiri Awuru n nu n ati nu nnyo, fa i angoro ko jura i asienɗu. Na asien n akpisi, na yabue ngbingbirim akpakpaaki nu. ⁵² Na fanɗunmam ateke, na Nyeme minem donɗu bo ba wu n atenɗe bu yiwee nu. ⁵³ Na ba fite fanɗunmam n nu, na sangani bo Yesu ba tengeeri i yiwee n nu ni, na ba ko awura Yerusalem mie kpiri n nu, na mine donɗu anu bu. ⁵⁴ Na soja kpian

n ni i sojam n bo bu jina niɛɛri Yesu ni, na bu ɲuuri kabo asien n kpisiiri barasu, ni kabo sa n kɛrɛ yoori ni, na sɛrɛ ati bu agaya, na ba se ka, "Ahin sɔnɔ n ti Nyemɛ Wa a nahɔrɛ su."

⁵⁵ Na nbaram beberebe bo bu su i su fite Galili awɔrɛ n nu na bu buka i ni, ajina dede suniɛ Yesu. ⁵⁶ Bu nu nbem la Mariya bo i fite Magadala miɛ n nu ni, ni Mariya n bo i nbaam la Yakobo ni Yosefu ni, ni Zɛbedi yi.

Kabo bu yoori Yesu sutura barasu ni

⁵⁷ Na naasɔ sanɲa na nenɲefɔ be aba, i fite Aramatiya miɛ kpiri n nu wɔ, bu fere i ka Yosefu. Yiri mmɔɔ ti Yesu susufɔm kun wɔ. ⁵⁸ Na wɔ kɔ asere Gomina Pilato ka i fa Yesu ɲuniɛ n ma i. Na Gomina Pilato ama nɔɔ ka bu kɔ fa ma i. ⁵⁹ Na Yosefu akɔ ayi Yesu fuin n apɔɔndi nzee fɔfɔrɛ nu, ⁶⁰ na wɔ kɔ ase i faɲkunma nu, yiri Yosefu dɛɛ tienɲu yabuɛ buɛ faɲkunma n bo ba lokoti i fɔfɔrɛ ni. Na wɔ nya akundu yabuɛ bambaka afa atɔ faɲkunma n anɔ ni, na wɔ kɔ. ⁶¹ Na Mariya Magadalafɔ ni, ni Mariya nyinga n atana afa bu nyunu awɔ faɲkunma ni.

Kabo tintinjinafɔm jina ɲmindaaari Yesu faɲkunma ni

⁶² Na alecin fɔfɔrɛ bo i ti Yudafɔm ɲumiyi cɛɛn ni, na Nyemɛ sayoowa dɔɲguyofɔ nkpienkpienn, ni Farasifɔm n akɔ Gomina Pilato dɔ. ⁶³ Na ba kɔ ase i ka, "Ya si, ya tenɲe su ka sanɲa bo nyini kɔrɛfɔ n yo la ɲɔɔ ni, na wɔ se ka yiri wuuri, i lesan cɛɛn, i tenɲe i yiwee n nu. ⁶⁴ Nyini ti, ma nɔɔ na bu kɔ jina ɲmindaaari faɲkunma ni, fa kɔ ju haari lesan cɛɛn ni, má nyini, i susufɔm ni koro kɔ wɔ yi i ɲuniɛ ni, na bu bu kɔrɛ ka wɔ tenɲe wɔ. Nyini sanɲa, kasin dɛɛ kɔrɛ ni tára bumboori dɛɛ ni." ⁶⁵ Na Gomina Pilato ase bu ka, "Am fa tintinjinafɔm, na am ma bu kɔ jina ɲmindaaari faɲkunma n kabo am koro i barasu ni, na má be koro yo pui." ⁶⁶ Nyini ti, na ba kɔ ata atɔ faɲkunma n anɔ n kɛrɛ, na ba ma tintinjinafɔm n ajina ɲmindaaari abara aye i, adena má be koro yo pui.

28

Kabo Yesu tenɲeeri i yiwee n nu ni

¹ Yudafɔm ɲumiyi cɛɛn n sin dɛɛ alecin, bakue n bumboori, mɔnɛ cɛɛn ɲgarama fuun, na Mariya Magadalafɔ ni, ni Mariya nyinga ni, akɔ ka bu kɔ niɛ Yesu faɲkunma ni. ² Kpenɲa na asien n akpisi agaya, dama Micera n mɛrɛke be fiteeri anɲoro jura ba kundu yiiri yabuɛ bambaka n faɲkunma n anɔ n su a, na wɔ fun atana su. ³ Na wɔ ta fofoe papasi ka nzue kpɛsɛɛwa dɛɛ su, na i sutura n kɛrɛ ayo fofoe ka cisen. ⁴ Na sɛrɛ ati tintinjinafɔm ni, na bu ɲuniɛ subobo bu, na ba yo ka ba wu dɛɛ su wɔ.

⁵ Na Nyemɛ mɛrɛke n ase nbaram n ka, "Má am ma sɛrɛ ti am. M si ka am nienie Yesu bo bu kpamaari i baka jaanu n su n wɔ. ⁶ I wo má fɛn. Wɔ tenɲe i yiwee n nu, kabo i yo seeri am ni. Am ba nie deke bo bu faari i seeri ni. ⁷ Am kpie am nyi na am kɔ se i susufɔm ni ka wɔ tenɲe i yiwee n nu. Am ti fɛn, i sudu am mɔ kɔ Galili awɔrɛ n nu, dɔ ye am kɔ ɲu i a. Ma se am lɛɛ."

⁸ Na ba fite faɲkunma n nu ndende ni sɛrɛ, ama, ni ahoreɲɔ, na ba ɲmati na bu kɔ se i susufɔm ni. ⁹ Bu sukɔ ni, kpenɲa na bu ni Yesu aye, na wɔ yo bu anse. Na ba kutu i jaa bu, na ba ma i jirima. ¹⁰ Na wɔ se bu ka, "Má am ma sɛrɛ ti am. Am kɔ se m ninbaam ka bu kɔ Galili, dɔ ye bu kɔ ɲu m a."

Kabo tintinijinafom seeri sa n bo i yoori ni

¹¹ Sanja bo nbaram n wo ko su ni, na tintinijinafom nbem ako mie n kunnu, ako ama Nyeme sayoowa doguyoyo nkpienkpienm ni labari, fa ko sa n kere bo wo yo n su. ¹² Na Nyeme sayoowa doguyoyo nkpienkpienm, ni Yudafo nkpienkpienm n atien bu noo, afa asese su, na ba ma tintinijinafom ni nwaa beberebe, ¹³ na ba se bu ka, "Am se minem ka, sanja bo am adaafi kongue n ye i susufom ni ba wo yiiri i a. ¹⁴ Na nzen haari gomina n ba tiiri nyini labari ni, yere kan de am tii, na i yo ma am pui." ¹⁵ Na tintinijinafom n ade nwaa n na ba ko ase minem kabo nkpienkpienm n seeri bu ni. Nyini dee ti ye nyini labari n abara aye Yudafo dɔ, fa ba ju haari ni nyuma n a.

Kabo Yesu faari i nju kereeri i susufom ni

¹⁶ Na i susufo buru ni kunm n ako Galili awore n nu na ba fun ako buka n su, deke bo Yesu seeri bu ka bu ko ni. ¹⁷ Sanja bo bu ko njuuri i ni, na ba kutu ama i jirima, ama, bu nbem asunsun ka ma yiri lee. ¹⁸ Na Yesu acin adodo bu, na wo se bu ka, "Nyeme afa angoro ni asienngu fen kere yiko, afa awura m saa nu. ¹⁹ Nyini ti, am ko durunya n kere nu, na am ma daanfie kere yo m susufom. Na am bie bu Nyeme nzue, Si, ni Baa, ni Awiewie Casi n dee duma nu. ²⁰ Na am kere bu ka bu de m noanie maawa n kere bo ma fa ama am ni. Am ti fen, m wo am dɔ, sanja kere, fa ko haari durunya n awieeri."

Labari kpa n bo MARAKO akere i ni

Kabo Yohane Nyeme Nzue Biefo kaanri Nyeme jore ni

¹ Ahin jore ni, i ti Nyeme Wa Yesu Kristo dee labari kpa n wo. Kabo i boori i bu yaa. ²⁻³ Nyeme yo seeri i wa n ka, “Ti fen, m sunma m sunmafo n na i du u mo, yiri sese u atin n su a.

Yiri ko subo ndoori boro kpantain n nu se ka, ‘Am sese Mibie n atin n su, na am yo i atin n dogu.’”

Na Nyeme ama ba kere nyini jooowa n kere Nyeme noanie kanfo Esaya dee kadasi n nu. ⁴ Nyini sono n bo Nyeme sunmaari i n la sono be bo bu fere i ka Yohane Nyeme Nzue Biefo ni. I baari boro kpantain n nu, na i sukan Nyeme jore, i na, “Am kaaki am wo na m bie am Nyeme nzue, na Nyeme fa am ngasi ni am satie kere ce am.”

⁵ Na Yudiya asiensufom, ni Yerusalem mie nufom kere afite aba i do, na ba kan bu ngasi ni bu satie kere bo ba yo i akere Nyeme, na Yohane abie bu Nyeme nzue Yodan kunma n nu.

⁶ Yohane sutura wuraawa yo ti deke bo bu faari nyoma ndore wuuri i a, na wo fa jina abo i wi nu. I diire yo la lalom ni wie wo. ⁷ I kaanri Nyeme jore, i na, “Sono be wo m sin suba, i tara m fieo, m ti kaan ni bo m dodo i. ⁸ Mini afa nzue abie am a, na am yo casi, ama, yiri fa Nyeme Awiewie Casi n wura am nyu yo am casi a, kabo sono bie nzue na i yo casi ni.”

Kabo Yohane bieeri Yesu Nyeme nzue ni

⁹ Nyini sangga n na Yesu afite Nazareti, mie n bo i wo Galili awore n nu ni, na wo ba Yohane do, na Yohane abie i Nyeme nzue Yodan kunma n nu. ¹⁰ Sangga bo Yesu fiteeri nzue n nu ni, kpengga na wo nyu ka angoro n ateke, na Awiewie Casi n ajura ka tiwa dee su aba atana i nyu. ¹¹ Na wo ti akonvi be nga angoro, i na, “Woro ti m wa a, m koro u agaya, m ahore ajo u nyu.”

Kabo Sitana yoori Yesu na i nie ni

¹² Nyini jinaabiri n nu na Awiewie Casi n ama Yesu ako boro kpantain n nu. ¹³ I woori do een aburana, i ni boro nengem woori do a, na Sitana ayo i na i nie ka, i yo yiri Sitana n dee koroowa, nzen i yo ma. Ama, Yesu asoro ma su. Na Nyeme merkem aba asu i.

Kabo Yesu fereeri jombaa tarafon nna nbem ka bu su i su ni

¹⁴ Sangga bo bu taraari Yohane nyiiri i dansaraka n sin, na Yesu ako Galili awore n nu, na i sukan labari kpa n fa ko Nyeme atin n su kere minem, ¹⁵ i na, “Sangga naju bo Nyeme Feme ba nie i minem su. Am kaaki am wo, na am de Nyeme labari kpa n na am yo i yarada.”

¹⁶ Ye i ba sunati sin Galili kunma kpiri n noo su, na wo nyu jombaa tarafon nnyo nbem. Bere la Simon ni i niema Andere. Bu wo bu diendie sandi su kunma kpiri n nu. ¹⁷ Na Yesu ase bu ka, “Am bra na am ba su m su, na m ma am tien minem noo ma m, kabo am tara jombaa ni.” ¹⁸ I seeri so ni, na ba kaba ayaki bu diendiem ni, na ba su i su.

19 I nati koori mo kaan bekun, na wo ngu mine nnyo nbem. Bere la Yakobo ni i niema Yohane. Bu fere bu si ka Zebedi. Bu wo lee nu suyo bu diendiem dongu. 20 Do na wo fere bu ka bu su i su, na ba yaki bu si ni, ni i npaadifom n lee n nu, na ba su i su.

Kabo Yesu fon yiiri ajini sono be ngu ni

21 Na ba ko aju mie kpiri n bo bu fere i ka Kapenam su. Na Yudafoim Njumiyi ceen na Yesu awura bu tientienbunoo soo n nu, bo bu sere Nyeme na bu kere Nyeme jore nu ni, na wo kan Nyeme noanie akere minem ni. 22 Na bu kere ayo alekutura fa ko i kereewa n su, dama i kereewa n awo i ngumi ni Yudafoim dee Nyeme noanie kerefoim ni. I kereewa n la yiko. 23 Nyini sanja n nu na sono bo ajini wo i ngu n aba bu do bu tientienbunoo soo n nu, na wo bo awie 24 ase ka, "Yesu Nazaretifo, a koro nzu ya nu fen a? A ba ka a ba yo ya ngbeen wo? M si u sa, woro ti sono casi n bo Nyeme asunma u n a." 25 Na Yesu atien ajini n ngu ase ka, "Mo u noo bere, na a fite yaki sono ni." 26 Na ajini n akpisi sono ni, na wo ciindi afite ayaki i. 27 Na minem kere ayo alekutura ako asin su, na ba bisa bu ngu nu ka, "Ee. Nzu la ahin? I ti kereewa fofore wo. Ahin sono n la yiko bo i koro ma ajinim n mmoo noo na bu de i." 28 Nyini ti na Yesu duma akaba ata abara aye Galili awore n kere nu.

Kabo Yesu tuntuunri tukpakifom beberebe Simon dika ni

29 Sanga bo i fiteeri tientienbunoo soo n nu ni, na i ni Yakobo ni Yohane ako awura Simon ni Andere dika. 30 Bu ko juuri awuru n nu ni, na ba se Yesu ka Simon sibara la ma i ngu, yakoko abo i, i da sono. 31 Na wo ko aso i saa nu aye i su atana, na yakoko n ayaki i, na wo ko ayo diire ama bu.

32 Nyini ceen n naaso, dika bibiri sanja, na minem afa tukpakifom kere ni minem bo ajinim wo bu ngu n aba Yesu do. 33 Na mie n nu jama n kere aba atien bu noo i do anungbere n nu. 34 Na wo tuntuun tukpaki barasu barasufom beberebe, na ba nya laifie, na wo fon ayi ajinim gusu beberebe. Wo du ma su na ajinim n jojo, dama bu si i sa.

Kabo Yesu kaanri Nyeme jore Galili awore n nu ni

35 Na alecin akonyuma ciciri su, na Yesu ayasu afite ako dede awore be nu i ngumi, na wo ko asere Nyeme. 36 Na Simon ni i bengum ako i nienie. 37 Bu ko nuuri i ni, na ba se i ka, "Sono kere sunienie u busu." 38 Na Yesu ase bu ka, "Am ma ya ko mie nyingam n su na m ko kan Nyeme jore kere bu gusu, dama ka nyini ti ye m baari durunya n nu a." 39 Na wo bara aye Galili awore n kere nu, sukan Nyeme jore bu tientienbunoo soom n nu, ye i fon yi ajinim minem ngu a.

Kabo Yesu tuntuunri kokofa be ni

40 Na kokofa be aba Yesu do, na wo ba akutu i nyunu asere i jande ka i buka i. I na, "Nzen a koro ka a ma m nya laifie, a koro ma m nya i." 41 Na Yesu ngu i anunfo, na wo tenje i saa anana i ngu, na wo se i ka, "M koro. Nya laifie." 42 Na kokobi n akaba ayaki sono n na wo nya laifie. 43 Na Yesu ama i atin ka i ko, na wo boko i 44 ase i ka, "Ma a se ka a se be ahin jore ni, ama, ko na a ko fa u ngu kere Nyeme sayoowa donguyoyofo ni, na a ko yo yoowa n bo Moyisi yo kereeri dawafom ni, dama nyini kere minem ka a nya u ngu a." 45 Ama, na wo ko abo ndoori, na labari n abara aye deke n

kere, nyini ti, Yesu akoro ayi má i ñu fofoe nu miem be nu kun, i fiëeri i ñu aheme wó, na mine afite awore n kere nu aba i dó.

2

Kabo Yesu tuntuunri sɔɔ bo i saam ni i jaam awu ni

¹ I yoori lennyo na Yesu akpie i nyi aba Kapenam mie kpiri n nu, na labari abara aye ka i wo awuru, ² na mine atien bu nɔɔ i dɔ agaya haari fofoe anya má aɔ n bo bu fa wura sɔɔ n nu mmɔɔ, na Yesu akan Nyeme jore sukere bu. ³ I wo bu kere su ni, na mine nbem aba i dɔ, bu nu mine nna sɔ sɔɔ bo i saam ni i jaam awu. ⁴ Jama n sunnuuri sɔ n dɛɛ ti, ba koro anya má fofoe bo bu fa sɔɔ n dodo Yesu, na ba fiiti sɔɔ n bo Yesu wo nu n angoro buekun, na ba fa i ni i dasu n kere acɔɔndi afa i ada sɔɔ n nu. ⁵ Yesu ñuuri kabo bu yoori i yarada n sɔ ni, na wo se sɔɔ n bo i saam ni i jaam awu n ka, “M dɔn, ma fa u satie ace u.”

⁶ Tɔ. Yudafɔm Nyeme nɔanie kerefɔm nbem tana bere, na ba sunsun bu ahore su ka, ⁷ “Ahin sɔɔ n la atin bɔɔ ye i jɔɔ wura Nyeme ñgasi nu sɔ a? Be wo má bere bo i koro fa minem satie ni bu ñgasi ce, sin Nyeme ñu.” ⁸ Na Yesu afa nu i ahore su fa kɔ bu sunsunni bo bu bita i n su, na wo bisa bu ka, “Nzu ti ye am bita nyini sunsunni ni am ahore su a? ⁹ Bɔɔ ti kekereke a, bo m se sɔɔ n ka, ‘Ma fa u satie ace u,’ nzen, ‘Yasu fa u dasu n na a nati n a?’ ¹⁰ M kere am ka mini Adamande Wa n la yiko durunya n nu bo m fa minem satie ni bu ñgasi ce bu.” Na wo se sɔɔ n ka, ¹¹ “Wɔɔ, yasu fa u dasu n na a kɔ awuru.” ¹² I kaba yasu faari i dasu n wo, na wo fite jama n kere nyumbaa nu. Na bu kere ayo alekutura, na ba kansi Nyeme, na ba se ka, “Ya nya ñu má ahin sa n ñusu cɛɛn be.”

Kabo Yesu fereeri Levi ka i su i su ni

¹³ Na Yesu akaaki akpie i nyi akɔ Galili kunma kpiri n nɔɔ su, na jama beberebe akɔ atien bu nɔɔ i dɔ, na wo kan Nyeme jore akere bu. ¹⁴ I wo natiiri su susin ni, na wo ñu lampodefɔ be bo bu fere i ka Levi, Alafeyo wa ni, ka i tana i juma yooberi, na Yesu ase i ka, “Yasu bra na a ba su m su.” Na wo yasu asu i su.

¹⁵ Na Yesu akɔ Levi dika ka i kɔ di diire. Na satieyofɔm, ni lampodefɔm beberebe asu i su. Diire n diibiri dɔ ni, na bu dɔngɔ aba atana Yesu ni i susufɔm n dɔ, na ba sanɔa adi diire. ¹⁶ Na Nyeme nɔanie kerefɔm nbem bo bu su Farasifɔm dɛɛ atin su ni, anu ka Yesu ni satieyofɔm, ni lampodefɔm tana sudi diire, na ba bisa i susufɔm ni ka, “Nzu ti ye Yesu ni lampodefɔm, ni satieyofɔm sanɔa di diire a?” ¹⁷ Na Yesu ati bu jɔɔɔwa n na wo bo bu nu ka, “Minem bo bu la laifie n koro má ayirifo, má ka bo bu la má laifie ni koro a. Ma ba má ka m bá fere minem bo bu ña bu yo sa bo i kɔ atin su Nyeme dɔ n wo, ama, m baari satieyofɔm n dɛɛ ti wo.”

Kabo Yesu kereeri nɔɔ cici jore ni

¹⁸ Cɛɛn be na Yohane dɛɛ susufɔm ni Farasifɔm sucici bu nɔɔ, na mine nbem aba na ba bisa Yesu ka, “Nzu ti ye Yohane susufɔm ni Farasifɔm dɛɛ susufɔm cici bu nɔɔ, ye u dɛɛm bere cici má?” ¹⁹ Na Yesu abo bu nu ka, “Am sunsun ka konyafɔm koro cici bu nɔɔ sanɔa bo konyafan n toko wo bu dɔ ni, nzen se? Ai, sanɔa bo konyafan n wo bu dɔ ni, bu yo má nyini. ²⁰ Ama, sanɔa suba bo bu bá yi konyafan n fite bu nu, nyini sanɔa n ye bu nyá cici bu nɔɔ a.”

²¹ Na Yesu akaaki ase ka, “Be koro fa má sanvuin fɔfɔre kpa tɔ má tani dawa kunma, nzen i yoori sɔ, sanvuin fɔfɔre ni sɔn tani dawa n wɔ, na i téke i kunma n agaya buka su. ²² I kaaki ti sɔ ɔ bekun ka be koro fa má nzan nyiiwa fangafɔ gɔ má dundu dawa bebete nu, nzen i yoori sɔ, dundu ni tíe wɔ, na i ká ngbɛen, na nzan n kere sóngi. Ama, i ti ye ni ka bu fá nzan nyiiwa fangafɔ gɔ dundu fɔfɔre biiwa nu.”

Kabo Yesu jɔɔ fa kɔɔri Njumiyi cɛen n jɔre ni

²³ Yudaɔm Njumiyi cɛen be, na Yesu ni i susufɔm ni sunati sin alembaa fie be nu, na i susufɔm n abubu be akpɛse. ²⁴ Na Farasifɔm n ase i ka, “Níe fɛn. Nzu ti ye u susufɔm ni suyo sɔ a? Nyeme nɔaniɛ kpamaawa n kere ka má be yo sɔ, Njumiyi cɛen ni.” ²⁵ Na wɔ bɔ bu nu ka, “Am nya kan má Nyeme Jɔre Kadasi n nu, kabo Feme Davidi yo yoori sanja bo i ni i minem miɛeri diire busu n wɔ, nzen se? ²⁶ Nyini sanja Abiyata yo ti Nyeme sayoowa dɔnguyɔfɔm kere kpɛn n a. Ahɔe n ti, na Feme Davidi akɔ awura Nyeme Sereebiri Awuru n nu, na wɔ di kpɔnɔ n bo ba fa ama Nyeme ni, na wɔ ma i minem be. Ama, am si ka ya dɛe atin n su, Nyeme sayoowa dɔnguyɔfɔm ngumi di nyini kpɔnɔ n a.”

²⁷ Na Yesu akaaki ase bu ka, “Adamande dɛe ti ye Nyeme yiiri Njumiyi cɛen n a, má Njumiyi cɛen n dɛe ti ye Nyeme yiiri adamande a. ²⁸ Nyini ti, Njumiyi cɛen ni mmɔɔ, mini Adamande Wa ni ti i Mibiɛ a.”

3

Kabo Yesu tuntuunri sɔnɔ asaa fuin be Njumiyi cɛen ni

¹ Na Yesu akaaki akɔ tientienbunɔɔ sɔɔ n nu dɔ bekun. Sɔnɔ asaa fuin be woori dɔ. ² Na minem bo bu wo dɔ n atu bu nyumbaa anie Yesu, na bu nie ka i túntun asaa fuin n Njumiyi cɛen ni, nzen i túntun má i, adena bu sɔ i ngɛe na bu járaiki i ka wɔ saaki Njumiyi cɛen n ciire ni. ³ Na Yesu ase asaa fuin n ka, “Ba jina afien fɛn.” ⁴ Na wɔ bisa bu ka, “Ya dɛe atin n su, atin wo nu ka ya yo sakpa Njumiyi cɛen ni, nzen ya yo satie wɔ? I kaaki ti ye ni ka ya de ngɔɔ, nzen ya yi ngɔɔ ɔ?” Ama, ba bɔ má i nu. ⁵ Na Yesu anie bu nyunu abara aye, na wɔ fa yaa bu ɔ, na i ahore asaaki fa kɔ bu atii kekere n dɛe ti, na wɔ se sɔnɔ n ka, “Teɔge u saa ni.” Na wɔ teɔge i saa ni, na wɔ yo fangɔ bekun. ⁶ Na Farasifɔm n akaba afite tientienbunɔɔ sɔɔ n nu akɔ Feme Herode minem dɔ, na ba sese bu ɔ su kabo bu yɔ na bu kún Yesu.

Kabo jama beberebe tiɛenri bu nɔɔ Yesu dɔ ni

⁷ Nyini sin na Yesu ni i susufɔm n afite akɔ kunma kpɛri n nɔɔ su, na jama beberebe afite Galili awɔre n nu asu i su. Nbem gusu fiteeri Yudiya dɛe awɔre n nu, ⁸ ni Yerusalem mie kpɛri n nu, ni Idumeya dɛe awɔre n nu, na nbem gusu afite Yodan kunma n wie afiiri ni, ni Tiro ni Sidon dɛe bue ni. Bu tiiri kabo Yesu yoori alekutura sam barasu ni, nyini ti ye bu baari i dɔ a. ⁹⁻¹⁰ Yesu ama tukpakifɔm beberebe anya laifie n dɛe ti, bo bu la tukpaki kere koro ka bu mie bu nyi wɔ, na bu sakati wura na bu fa bu saa kan i. Nyini ti, na wɔ se i susufɔm ni ka bu kpa bu ɔ ni lee ma i, na nzen minem ba ɔ bu mie i ɔ na i koro wura lee n nu. ¹¹ Sangɔ kere bo minem bo ajinim wo bu ɔ ni nya ɔuuri i, bu kutu i nyunu wɔ, na bu ciindi na bu se ka, “Wɔrɔ ti Nyeme Wa n a.” ¹² Na wɔ bɔbɔ ajinim ni ni anyumboro ka, má bu ma be si i sɔnɔ nzuin nu.

Kabo Yesu yiiri mine buru ni nnyo ka bu yo i jaramasam ni

¹³ Na Yesu afun ako buka be su, na wo fere mine n bo i koroori ka bu ba i do ni, na ba ba i do. ¹⁴ Na wo yi bu nu buru ni nnyo, na wo fa bu ayo i jaramasam ka bu wo i do, na i susunma bu ka bu ko sukan Nyeme jore, ¹⁵ na wo ma bu yiko ka bu ko sufon yi ajinim minem nu. ¹⁶ I jaramasa buru ni nnyom ni bo i yiiri bu n la Simon bo Yesu tuunri i duma ka Petoro ni, ¹⁷ ni Yakobo ni i niema Yohane, bo bu si la Zebedi na Yesu kaaki tuunri bu duma ka *Bowanaje*, i bu la ka bu tientien agaya ka nzue wo. ¹⁸ Bu nbem gusu la Andere, ni Filipu, ni Batolomeyo, ni Matio, ni Tomasi, ni Yakobo bo i si la Alafeyo ni, ni Tadayo, ni Simon bo i tu ngoni fa ko i asien su ni, ¹⁹ ni Yudasi Isikariyoti bo i ba toori Yesu ni.

Kabo minem na Yesu ni Sitana dee ti kun ni

²⁰ Na Yesu ako awuru, na jama aba atien bu nno bekun bo i ni i susufom n akoro anya ma tana bo bu di diire mmoo. ²¹ Na sanja bo i minem tiiri i nga ni, na ba ko ka bu ko fa i ba awuru, dama minem na i nyunu akan i. ²² Na Yudafom Nyeme nonie kerefom bo bu fiteeri Yerusalem mie kpiri n nu n ase ka, "Belazebuli bo i ti ajinim kere dee feme ni, wo i nu a." Na ba kaaki ase ka, "Yiri ajinim kere feme ni ma i yiko ye i koro fon yi ajinim n a." ²³ Bu seeri so ni, na Yesu afere bu, na wo bo bu mienu. I na, "Sitana koro yo se fon yi i dee ajinim minem nu a? ²⁴ Ya fa i ka, nzen femeya nya kpaakiiri nu wieeri, nyini femeya ni koro jina a? Ai, i koro jina ma. ²⁵ Na nzen awuru gusu bo i minem nya kpaakiiri nu, nyini awuru ni koro jina a? Ai, i koro jina ma. ²⁶ Nzen Sitana dee femeya n nya kpaakiiri nu wieeri, i koro jina a? Ai, i koro jina ma. Nzen i nya yoori so, i fanja wie wo. ²⁷ Be koro wura ma sono fanjafu dika na i fin i nenje, ma ka wo tara i fanja acin i nyama ka, ye i nya koro fin i nenje n bo i wo awuru n nu a."

²⁸ Na Yesu akaaki ase ka, "M suse am nahore wo lee ka, Nyeme koro fa minem satie kere fa ce bu, haari fa ko sanja jore ngbeenngbeen kere bo bu jooori i fa ko Nyeme do, ²⁹ ama, sono kere bo i joo wuraari Awiewie Casi ni ngasi nu, Nyeme fa ma i mi ngasi ce ma i, dama i mi ayo satie bo i la ma awieeri lee." ³⁰ Deke bo i ti na Yesu seeri so n la ka, bere Nyeme nonie kerefom ni, bu na ajini wo i nu a.

Minem bo bu ti Yesu ni, ni i ninbaam nahore su n jore

³¹ Na Yesu ni, ni i niemam aba i do awuru n bo i wo nu ni, na ba ka ajina dasin asunma ka bu fere i. ³² Na jama beberebe atana abara aye yiri Yesu na ba se i ka, "Ti fen. U ni, ni u niemam wo dasin koro u." ³³ Na wo se bu ka, "Am ma m kere am bo bu ti m ni, ni m niemam." ³⁴ Na wo nie abara aye minem bo bu tana bara yeeri i ni, na wo se bu ka, "Am nie. M ni, ni m niemam n yaa. ³⁵ Sono kere bo i yo Nyeme sa koroowa, yiri ti m siwa, ni m niwa, ni m ni a."

4

Mienu fa ko kabo dodoorifo be sandiiri alembaa ni

¹ Na Yesu akaaki ako Galili kunma kpiri n nno su, na wo bo i bu sukere minem Nyeme jore, na jama beberebe atien bu nno i do. Jama n sunnuuri beberebe n dee ti, na wo wura lee nu atana nzue n nu, na jama n kere atien bu nno fa dodo nzue n nno su. ² Na wo bo mienu, na wo kere bu dekem beberebe. I na, ³ "Am ti fen. Dodoorifo be yo fiteeri so, ka i ko

sandi alembaa. ⁴ Sanġa bo i wo sandi su ni, na alembaam nbem atoto atin n nɔɔ, na anumam aba atambu bu ami. ⁵ Na nbem atoto tieka su, deke bo fa sunnu má ni, na fa sunnu má n deɛ ti, na wo ce má, na wo fi, ⁶ ama, sanġa bo wie ba fiteeri agaya ni, na wo waandi, dama bunlui n akpama abi má n deɛ ti. ⁷ Na alembaa ni nbem atoto lolɔe nu, na lolɔe n anyi akata i ŋu, nyini ti, wo koro awura má mbaa. ⁸ Ama, na alembaam ni nbem atoto asien kpa su, na wo nyi awura mbaa zoi zoi." ⁹ Na Yesu ase bu ka, "Bo i koro ka i ti ahin jore n bu, i ti ye ni ka i so i sui na i ti."

Deke bo i ti na Yesu boori bu miɛenu n ni

¹⁰ Na sanġa bo i kaari i ni i susufɔ buru ni nnyom ni, ni minem bo bu wo i do sanġa kere ni, na ba bisa i nyini miɛenu n bu. ¹¹ Na wo bo bu nu ka, "Amberɛ ye Nyeme ama am asi i femeya n nu asiri jore a, ama, minem bo bu su má m su ni, m bo i miɛenu kere bu a, ¹² adena i yó kabo ba kere i Nyeme Jore Kadasi n nu ni, ka,

'Bu níe ní nahɔre su,
ama, bu ŋú má pui.

Bu só bu sui ni nahɔre su,
ama, bu tí má deke n bo bu so bu sui ka bu ti i n bu,
dama nzen má bu tiiri i bu, má bu káaki bu wo wo,
na Nyeme fá bu satie ce bu.' "

Kabo Yesu kereeri miɛenu n bu ni

¹³ Na Yesu abisa bu ka, "Am ati má ahin miɛenu n bu? Ye am yó se ti miɛenu nyingam n kere bu a? ¹⁴ Ahin miɛenu n bu la ka, doɔɔɔriɔ n ti ka sɔnɔ n bo i kan Nyeme jore n wo. ¹⁵ Mine nbem de Nyeme noanie n kabo alembaa n totoori atin n nɔɔ n wo. Bu nya tiiri Nyeme noanie n na bu de i, i ce má, na Sitana bá yi noanie n fite bu ahore su, a ŋu ka bu wara afi i sa. ¹⁶ Mine nbem gusu de Nyeme noanie n kabo alembaa n totoori tieka su n wo. Bu nya tiiri Nyeme noanie ni, a ŋu ka ba de i ndende ni ahorejo, ¹⁷ ama, i da má bu ahore su. Bu kaaki ti ka alembaa n bo i bunlui akpama abi má n wo. I woori bu do kaan so na nzen wahara, wara kekereke be ba tuuri bu fa ko bu nyemesu n su, a ŋu ka ba fa ati. ¹⁸ Nbem gusu de Nyeme noanie n kabo alembaa n totoori lolɔe nu n wo. Bu nya tiiri Nyeme noanie ni, ¹⁹ ama, bu sunsunní kere wo kabo bu yó na bu asiri káta su, na bu koro kabo bu yó na bu nyá ajeke kere, na bu ahore bi fa ko durunya n nu nengem su, na Nyeme noanie n koro da má bu ahore su na i yo juma. Bu ti ka alembaa n bo i wura má mbaa n wo. ²⁰ Ama, mine nbem de Nyeme noanie n kabo alembaa n totoori asien kpa su n wo. Bu nya tiiri Nyeme noanie ni, na bu de i, na bu fa yo juma na i yo kperɛ beberebe."

Kabo sɔnɔ koro so má sin su na i fa fie ni

²¹ Na Yesu abisa bu ka, "Am nya ŋu ka sɔnɔ be aso fitana su na i fa ganġa butu su, nzen má nyini i fa ko se gado bu? I fa taka deke su angoro wo bo sɔnɔ kere koro ŋu i, má sɔ? ²² Dama deke be wo má bere bo i wo fieɛwa nu, na bu bá ŋu má i, na deke be gusu wo má bere bo i wo asiri nu, na bu bá si má i. ²³ Sɔnɔ kere bo i koro ka i ti ahin jore n bu, i ti ye ni ka i so i sui na i ti."

²⁴ Na wo se bu ka, "Am si am ŋu sa ni kabo am ti noanie barasu ni. Gɔŋgɔ bo am fa susu ma minem ni, so ye Nyeme gusu fá susu ma am a, na bo Nyeme yó ma am ni tara so n mmɔɔ. ²⁵ Dama sɔnɔ kere bo wo nya

deke be Nyeme do na i mi si i bita, Nyeme buka i su wo, ama, bo i si ma i bita, haari ni nyini kaan n bo i la i ni, Nyeme de i do o.”

Mienu fa ko kabo alembaa fi barasu ni

²⁶ Na wo kaaki ase bu ka, “Nyeme femeya n ti ka kabo dodoorifo be ko sandi alembaa i fiesu n wo. I dee la ka i sandi wo, ²⁷ na i ko da kongue, na i tenge alecin. Nyini sangha n ye alembaa n fi a, na i sunyi, i si ma kabo i yoori barasu. ²⁸ Asien n buka alembaa n ye i fi a. I nya fi wieeri, na i nyi, na i nyinse, na i woro, na i nya bi mbaa. ²⁹ Alembaa n ba bi ni, i kpie sangha lee, na i kpie i.”

Alembaa kaan be jore

³⁰ Na wo kaaki ase bu ka, “Ya fa nzu deke fa sunsun Nyeme femeya n a? Wara ya fa mienu barasu bono ye ya bo i fa kere kabo Nyeme femeya n ti a? ³¹ I ti ka nyem mbaa bo bu do i wo. Yiri ti alembaa n kere kaan durunya n nu a. ³² Ama, bu nya ba doori i na i fiiri, i tara toro nyawam n kere bambaka, i koro nyi na i tetereki asambaa asambaa bo anumam koro yo bu tierim nu.”

³³ Na Yesu afa nyini mienu n ni mienu nyingam beberebe akan Nyeme jore akere bu, kabo sono kere koro ti i bu barasu. ³⁴ Jama n nya woori i do, i se ma bu pui, ma ka mienu ye i bo bu a, ama, i ba kaari i ni i susufom ni, na i nya yi i bu kere kere bu.

Kabo Yesu kereeri ka i la yiko tara anjuma ni nzue ni

³⁵ Nyini ceen n naaso sangha, na Yesu ase i susufom n ka, “Am ma ya kpie ko kunma kpiri n buekun do.” ³⁶ Na i susufom n acin ayaki jama ni, na ba ba awura lee n bo Yesu wo nu n nu, na ba ko. Na nbem gusu afa lee nbem na ba su i su. ³⁷ Na anjuma bambaka be ayasu, na i subo nzue go lee n nu. Ma lee ni suyi ni nzue wo. ³⁸ Nyini sangha ni, Yesu afa piti ason i tii, ye i wo daafiri su lee n sin, na ba ba atenge i ase i ka, “Ya Kerefo, nzen ya suwu, u cece wo ma ya nu fan?” ³⁹ Na wo yasu na wo tien anjuma n nu, na wo se nzue n ka, “Da surum.” Na anjuma n atara, na dika n kere atara jum. ⁴⁰ Na wo se bu ka, “Nzu ti ye am soro sere so a? Am yo ma m yarada?” ⁴¹ Na sere akaaki ati bu agaya, na ba bisa bu nu nu ka, “Nzu sonombiri barasu la ahin bo anjuma ni nzue n mmoo de i noanie a?”

5

Kabo Yesu fon yiiri ajinim sono be nu ni

¹ Na Yesu ni i susufom n akpie kunma kpiri n ako aju Gerasafom dee awore n nu. ²⁻³ Sangha bo Yesu fiteeri lee n nu ni, na sono be afite fanjunma nu aba akpa i atin. Nyini sono n nati da fanjunma nu wo, dama ajini wo i nu. Sono be wo ma bere bo i koro tara i cici i ni joroko n mmoo kun, ⁴ dama sangha kere bu bo i tobari wo na bu wura i joroko buka su, ama, haari ni nyini n mmoo i titi joroko n wo na i kaaki bo sandi tobari n nu. Be wo ma bere bo i la fanja koro tara i jina kun. ⁵ Kongue ni wiesu kere i wo fanjunma nu so o, ni bukam su na i suciindi, na i sufa yabue kpiekpie i nu. ⁶⁻⁸ Na wo nu Yesu sangha bo i toko wo dede ni yiri ni, na Yesu atien ajini n nu ase i ka, “Ajini, fite yaki nyini sono ni.” Na sono n anmati ako akutu Yesu nyunu, na wo ciindi ase ka, “Yesu, Micera Nyeme Kpiri n Wa, a koro nzu m do fen a? M sere u wo, Nyeme ti, ma a ma m nu anyumboro.” ⁹ Na Yesu abisa i ka, “Bu fere u se?” Na wo bo i nu ka, “Bu fere m ka Jama

Beberebefo, dama ya sunnu.” ¹⁰ Na wo sere Yesu jande ka má i fon bu fite nyini awore n nu. ¹¹ Nyini sangha afam beberebe wo dodo bere, bu wo buka be su sudi, ¹² na ajinim n asere Yesu ka, “Ma ya ko fun afam n ju.” ¹³ Na Yesu ama bu atin na ba fite ako afun afam n ju. Afam n ju akpii nnyo dika, na bu kere anmati accondi ako ato kunma kpiri nzue n nu, na nzue n adi bu.

¹⁴ Afa sasafom juuri nyini n so ni, na ba nmati ako abo ndoori mie kunnu, ni aheme aheme kere su. Na mine aba anie sa n bo i yoori ni. ¹⁵ Na ba ba Yesu do, na ba ju sono n bo ajinim n yo woori i ju n ka i tana Yesu bi wura tanlee, ni i nyunu koroya su, na sere ati bu. ¹⁶ Na minem bo bu juuri sa n yobiri ni, akan jore n kere akere jama n fa ko sa n bo i tuuri sono n bo ajinim yo woori i ju ni, ni sa n bo i tuuri afam ni. ¹⁷ Bu tiiri jore n so ni, na ba nya asere Yesu jande ka i yasu bu awore n nu. ¹⁸ Sangha n bo Yesu suwura lee n nu na i ko ni, na sono n bo ajinim yo woori i ju ni, asere i jande ka i ma i su i su. ¹⁹ Ama, na Yesu akete, na wo se i ka, “Kpie u nyi ko awuru na a ko kan kere u lamokom fa ko sakpa n bo Mibie n ayo ama u ni, ni kabo wo si u anunfo barasu ni.” ²⁰ Na sono n akpie i nyi ako akan sakpa n kere bo Yesu ayo ama i ni, abara aye Mie Burum dee awore n nu, na sono kere ayo alekutura.

Bara tukpakifo be, ni baabara be yiwee jore

²¹ Na Yesu awura lee n nu akpie i nyi akpie kunma kpiri n buekun do, na jama beberebe aba atien bu nso i bi nzue n nso su. ²² Na Yudafo kpien be wo bere, yiri nie bu tientienbunso so n su a. Bu fere i ka Yarusi. Na wo ba Yesu do nzue n nso su na wo kutu i jaa bu, ²³ na wo sere i jande. I na, “M wa sunguru ato cin. Bra na a ba fa u saa nana i ju na i nya ngoo ni laifie.” ²⁴ Na Yesu asu i su na ba ko.

Na jama beberebe asu Yesu su haari bu ko sumie i ju. ²⁵ Bara be woori jama n nu, i bita abieeri i afo buru ni nnyo lee bo i kpu na i kpie ma. ²⁶ Wo di wahara, na wo saaki i njwaa kere atuntun i ju ayirifom do dede haari wo ba afie, ama, wo nya ma laifie se tukpaki n buka su ko. ²⁷ Na wo ti Yesu nga, na wo sakati awura jama n nu Yesu sin, afa i saa akan Yesu tanlee ni. ²⁸ Dama i seeri i kunnu ka, “Nzen m koro yoori anie faari m saa kaanri i tanlee n mmoo, n nya laifie.” ²⁹ Na wo yo so n kpenja na i abieeri n akpie, na yiri ni i ti anu ka wo nya laifie. ³⁰ Jina n nu bere na Yesu afa nu ka i yiko n be afite i junie nu ako ayo juma. Na wo kaaki anie jama n nu, na wo bisa ka, “Nma faari i saa kaanri m tanlee n a?” ³¹ Na i susufom n ase i ka, “Woro mmoo anu kabo jama n amie u barasu, ye nzu ti ye a bisa ka, nma fa i saa kaanri u a?” ³² Ama, na wo nie abara aye na i si sono n bo i yoori so ni. ³³ Na sere ati bara ni, i jina, i junie kere subobo i fa ko sa n bo i tuuri i ni, na wo ba akutu Yesu nyunu, na wo kan jore n kere ni i nahore atin su akere i. ³⁴ Na Yesu ase i ka, “M wa, yarada n bo a yo m ni, yiri ma a nya laifie a. Ko awuru ni ahoreda, na ma u tore n ba u ju kun.”

³⁵ Sangha n bo Yesu toko wo jajo su ni, na mine nbem afite tientienbunso so n kpien n dika aba ase i ka, “U wa n wo ma bere. Nyini ti, ma a dama ya Kerefo n kun.” ³⁶ Na jore n ato Yesu sui nu, ama, na wo se kpien n ka, “Ma a ma sere ti u, woro yo m yarada.” ³⁷ Wo soro ma su ka be su i su kun, ma ka Petoro, ni Yakobo, ni i niema Yohane. ³⁸ Bu ko juuri kpien n dika ni, na Yesu awura anu ka mine beberebe suyo nanmie, bu susun subo

awie. ³⁹ Na wɔ bisa bu ka, “Nzu ti ye am suyo nanmie sun sɔ a? Baabara n awu má, wɔ daafi wɔ.” ⁴⁰ Na ba siri i. Na wɔ fɔn bu kere afite, na wɔ fa baabara n si ni i ni, ni i susufɔ nsanm ni, na ba kɔ sɔɔ n bo baabara n da nu ni. ⁴¹ Na wɔ kɔ atara i saa, na wɔ se i ka, “*Talita kumi*.” I bu la ka, “Sunjuru kaan, n ɔa a yasu.” ⁴² Kpenjga na sunjuru n ayasu anati. I yo ti afɔ buru ni nnyɔ baa a. Na minem kere bo bu woori bere n ayo alekutura agaya. ⁴³ Na Yesu abobo bu ni nahore su ka má bu ma be si sa n bo wɔ yo i ni, na wɔ se ka bu ma baa n deke be na i di.

6

Kabo Yesu ɔa Nyeme noanie kanfo la má jirima i bosu ni

¹ Ye Yesu yasu kɔori i bosu na i susufɔm n asu i su. ² Na Yudafɔm Njumiyi cɛɛn n na wɔ kɔ bu tientienbunɔɔ sɔɔ n nu, na wɔ kɔ akan Nyeme jɔre akere bu. Minem bo bu tiiri i kereewa n kere yoori alekutura. Na ba bisa bu nɔnɔ nu ka, “Nifansu ye ahin sɔnɔ n kɔ sɔnsɔnri i si n kere a? Bu maari i alecira bɔnɔ ɔ? Ye alekutura sam bo i yo bu ni, i yo se yo bu a?” ³ Má Mariya wa n bo i ti kempenta n lɛɛ? Má Yakobo ni Yose ni Yuda ni Simon n gɔrɔ n lɛɛ? Am niɛ e. Má i niema nbaram mmɔɔ wo ya nu fen n a?” Na ba bu i nɔnɔ. ⁴ Na Yesu ase bu ka, “Deke kere bu ma Nyeme noanie kanfo jirima, má ka i bosufɔm ni i lamokom ni i gisannufɔm do nɔnɔ.” ⁵ Nyini ti, wɔ koro ayo má alekutura sa be i bosu do se i faari i saa nanaari tukpakifo nbem nɔ wɔ, na ba nya laifie. ⁶ Na wɔ yo i awarabo kabo i bosufɔm n ayo má i yarada ni.

Kabo Yesu sunmaari i susufɔ buru ni nnyɔm ni

Na Yesu abara aye aheme miem n kere su, na i sukere minem. ⁷ Na wɔ fere i susufɔ buru ni nnyɔm ni, na wɔ sunma bu nnyɔ nnyɔ, na wɔ ma bu yiko ka bu kɔ sufɔn yi ajinim fite minem nɔ. ⁸⁻⁹ Na wɔ se bu ka, “Má am fa puitiripui kɔ ahin atin n bo am sukɔ ni, diire o, kuruku o, nɔwaa o. Ama, am fa kpama ni gbagbaa yiri. Má am se ka am fa tanle buka bo am wura i n su.” ¹⁰ Na wɔ kaaki ase bu ka, “Am kɔ juuri mie be su, awuru kere bo am kɔ wuraari nu, am ka nyini awuru n nu, haari am bá fite mie n nu. ¹¹ Sasu bekun mie bo am kɔ wuraari nu na ba de má am wɔfɔ, na ba kaaki asoro má am su ka bu ti am noanie ni, am fite yaki nyini mie n ni, na am kɔnɔnɔn yi am jaa tuturi kere. Nyini dí daani kere bu ka bu woowa ti má kpa.” ¹² Na i susufɔm n afite ako akan Nyeme jɔre akere minem ka bu kaaki bu wo. ¹³ Na ba fɔn ayi ajinim minem beberebe nɔ, na ba sere Nyeme ama tukpakifo dɔnɔ, na ba fa nɔnɔn agɔ bu nɔ, na ba nya laifie.

Kabo bu kuunri Yohane Nyeme Nzue Biefo n barasu ni

¹⁴ Na Feme Herode ati nyini sa n kere, dama Yesu дума ata abara aye deke kere. Na mine nbem ase ka, “Yohane Nyeme Nzue Biefo n ye wɔ tenje i yiwee n nu a, nyini ti ye i la yiko koro yo nyini alekutura sam kere a.” ¹⁵ Ama, na nbem ase ka, “Yiri la Eliya a.” Na nbem gusu ase ka, “I ti Nyeme noanie kanfo ka dawa deem wɔ.” ¹⁶ Ama, Feme Herode tiiri nyini ni, na yiri ase ka, “Yohane bo m kɔieeri i ti n ye wɔ tenje a.” ¹⁷ Feme Herode yo ma bu taraari Yohane nyiiri wɔ, dama yiri Feme Herode afin i gɔrɔ Filipu yi Herodiya afa aja. ¹⁸ Má pui ti, dama Yohane ase Feme Herode ka, “Nyeme noanie kpamaawa n kere ka a la má atin

ka a fa u goro yi ja i ngoo su.” ¹⁹ Yohane seeri so ni, na Herodiya afa i ngasi na wo fo anminda i kabo i nya i na i kun i. Ama, wo koro anya ma i, ²⁰ dama Feme Herode ni i tii soroori Yohane ka i ti sono fofoe bo i yo sa bo i ko atin su Nyeme do o. Wo koro ma ka pui yo i. Na Feme Herode ajimi fa ko noanie n kere bo Yohane kan maari i n su, ama, haari ni nyini mmoo, i koro ka i suti i noanie n wo.

²¹ Ceen be so o na Herodiya aba anya Yohane taraabiri. Nyini ceen n ye Feme Herode sugo i baawu ceen agore n a. Na wo fere i gomina mine ngbingbirim, ni i soja nkpienkpienn, ni Galili mine teretereform kere ka bu ba di na bu nu. ²² Agore n nu ni, na Herodiya wa sunguru awura ago akere Feme Herode ni i jamam, na bu kere ahore ajo. Do ye feme n seeri sunguru n ka, “Deke kere bo a koro, se m, na m ma u.” ²³ Na wo tan ndie ase i ka, “Haari a nga m kpaaki m femeya n buekun ma u mmoo, m fa ma u.” ²⁴ Na sunguru n afite ako abisa i ni ka, “Ye m sere nzu wo?” Na i ni n ase i ka, “Ko se i ka a koro Yohane Nyeme Nzue Biefo n tiiawa a.” ²⁵ Na wo nmati akpie i nyi ndende aba ase Feme Herode n ka, “M koro ka na a fa Yohane Nyeme Nzue Biefo n tiiawa ma m perente nu kisa kisa.” ²⁶ Feme n tiiri so ni, na i ahore asaaki agaya, ama, ndie n bo i taanri i jama n nyunu n dee ti, wo koro akaaki ma i noo. ²⁷ Kpenja na feme n asunma soja nmindafom n kun ka i ko fa Yohane tiiawa bra. Na wo ko akpie i tii dansaraka soo n nu do. ²⁸ Na wo fa ada perente n nu aba ama sunguru ni, na yiri gusu afa ako ama i ni ni. ²⁹ Sangha bo Yohane susufom tiiri so n na ba ba afa fuin n ako ase i.

Kabo Yesu maari nbiesom akpii nnu ni bu minem diire ni

³⁰ Na jaramasam n akpie bu nyi aba i do, na ba kan sam kere bo ba yo i n akere i, ni kabo ba kan Nyeme jore akere mine barasu. ³¹ Jama n dee ti, ba nya ma anyunkoro bo bu di diire. Nyini ti, na Yesu ase bu ka, “Am ma ya ko deke bo minem wo ma, na am ko yi am nuni.” ³² Na bere ngumi afa lee ni na ba ko. ³³ Bu yasu suko ni, na minem dongu anu bu, na ba si bu, na ba fite mie miem su nmati adu bu mo ako aju deke bo bu suko ni. ³⁴ Sangha bo Yesu fiteeri lee n nu ni, na wo ngu jama beberebe, na wo si bu anunfo, dama bu ti ka nbocem bo bu la ma sasafu o, na wo kere bu dekem beberebe. ³⁵ Na sangha bo wie ba suto ni, na i susufom n aba i do aba ase i ka, “Kisa, wie suto, ya wo boro gusu wo lee. ³⁶ Ma minem n atin na bu ko mie kunnu ni aheme aheme miem su na bu ko nya diire be to di.” ³⁷ Ama, na Yesu ase bu ka, “Ambera mmoo ni am tii nya deke be ma bu na bu di.” Na ba se i ka, “Nzen a nga ya to kpoko ma ahin jama n kere, ya di nwaa beberebe.” ³⁸ Na wo bisa bu ka, “Ambera la kpoko nye wo? Am nienie na am nie.” Na ba ko anie na ba bo i nu ka, “Kpoko nnu ni jombaa nnyo wo bere a.” ³⁹ Na Yesu ase i susufom n ka bu ma jama n tana asese asese wura fiefieewa n su. ⁴⁰ Na ba tana asese asese yaa yaa ni aburunnu. ⁴¹ Na wo fa kpoko nnu ni, ni jombaa nnyo ni, na wo ye i tii su angoro, na wo da Nyeme asi. Na wo kpiekpie kpoko nnu n nu, na wo fa ama i susufom n ka bu fa ma minem ni, na wo fa jombaa nnyo n gusu akpaaki bu kere nu. ⁴² Na bu kere adi na bu kunnu ayi. ⁴³ Na ba tambu kpoko, ni jombaa sinsin bo bu diiri na i kaanri ni, na ba nya kandie buru ni nnyo. ⁴⁴ Minem bo bu diiri kpoko n ni jombaa n kere yasuri nbiesom akpii nnu wo.

Kabo Yesu natiiri nzue su ni

⁴⁵ Nyini sin na Yesu ama i susufom n awura lee n nu na bu du i mo kpie ko Besayida mie nu kunma kpiri n buekun, na yiri aka na i kaari jama ni. ⁴⁶ I kaari bu wieeri ni, na wo fun ako buka n su ka i ko sere Nyeme. ⁴⁷ Sangga bo ale ba saanri ni, lee n aju kunma kpiri n afien, na Yesu ngumi aka kunma kpiri n sin. ⁴⁸ Na wo ju ka i susufom n sudi wahara lee n kaanbiri, dama anjuma sun bu ko bu sin wo. Na fa ko akonyuma ciciri su, na wo nati nzue n su suba bu do, na wo yo ka i susin bu ju. ⁴⁹ Sangga bo bu juuri ka i nati nzue n su ni, na ba sunsun ka, jumi a, na ba bo awie. ⁵⁰ Bu kere juuri i so ni, na sere ati bu agaya. Kpenga na Yesu ajojo bu do, na wo se bu ka, "Am ma am ahore si, mini a, ma am soro sere." ⁵¹ Na wo wura lee n nu, na anjuma n atara. Na i susufom n kere ayo alekutura agaya. ⁵² Dama ba koro ati ma i bu kabo i la yiko koro faari kpono nnu maari jama beberebem ni, bu ahorembaa ti kekereke n dee ti.

Kabo Yesu ma tukpakifom beberebe nyaari laifie ni

⁵³ Na ba kpie nzue n aba aju awore n bo bu fere i ka Genesareti n nu, na ba minda lee n aheme. ⁵⁴ Bu fiteeri lee n nu kpenga ni, na minem n asi ka Yesu lee. ⁵⁵ Na ba nmati abara aye miem n kere su, na deke kere bo bu tiiri i nga, bu so bu tukpakifom ni bu dasum kere ba i do o. ⁵⁶ Na nzen i koori aheme miem wara mie kunnu, deke kere bo i fa, bu fa bu tukpakifom ba i do so o, na bu sere i jande ka i ma bu fa bu saa kan i tanlee n jaa bu. Na bo bu yoori so n kere anya laifie.

7

Yudafom nana sayoowa jore

¹ Na Yudafom Nyeme nonie kerefom nbem bo bu fite Yerusalem mie kpiri n nu ni, ni Farasifom n aba atien bu noo Yesu do. ² Na ba ju ka Yesu susufom n nbem sudi diire bu saa fin, ba nmisi ma bu saa kabo bu nana sayoowa ti barasu ni. ³ Dama Farasifom ni Yudafom kere la bu saa nmisi sayoowa bo i ti bu nana sa a. Bu nya na bu di diire, bu du mo yo nyini sa n wo ka, na bu nya di. ⁴ Nzen haari bu fiteeri go ba juuri awuru, bu di ma nengem bo ba fa aba ni, ma ka ba nmisi i ka, na bu yo bu nana sayoowa bo bu yo na bu di ni. Bu sayoowam sunnu. Bu nbem la ka bu nmisi awam ni dundum ni ayabam wo. ⁵ Na Farasifom ni, ni Yudafom Nyeme nonie kerefom n abisa Yesu ka, "Nzu ti ye u susufom n su ma ya nam sayoowa n su, ye bu di diire bu saa fin a?" ⁶ Na Yesu ase bu ka, "Nahore ye Nyeme nonie kanfo Esaya yo kaanri am jore ka am ti burukoonufom n a. Wo kere i kadasi n nu ka, Nyeme na o, 'Ahin minem ni, bu ma m jirima bu noo nu bere wo, ama, i wo ma bu ahore su.

⁷ Bu kansi m ngbeen wo, dama bu kere mine adamande dee kereewam wo, na bu se ka nyini kereewa n fite Nyeme do o.' "

⁸ Na Yesu ase bu ka, "Am ace Nyeme nonie maawa n ase buekun, na am nya susu adamande dee sayoowam su."

⁹ Na wo se bu bekun ka, "Am la nahore bo am akpie mbenle ayaki Nyeme nonie maawa n na am asu am dee sayoowam su ni. ¹⁰ Dama Moyisi ase ka, 'Bu u si ni u ni.' Na wo kaaki ase ka, 'Sono kere bo i jooori i si, ni i ni jore tie, wo yo daka ka bu kun i mi.' ¹¹ Ama, ambera kere ka nzen sono be la deke be bo i ti ye ni ka i fa buka i si ni i ni, i koro se bu ka 'I

ti *Koroban* wɔ.' I bu la ka, 'Deke bo má m fa ma am ni, ma fa ayi saraka ama Nyɛmɛ.' ¹² Nyini sanɔa ni, am akere ka i mi n koro buka má i si n ni i ni n lɛɛ. ¹³ Nyini n kere ka am abu Nyɛmɛ dɛɛ nɔaniɛ n nɔbɛɛn lɛɛ, ye am su am dɛɛ sayoowam n bo am kere bu n su a. Na am la ahin sayoowam dɔnɔɔ bo am kaaki yo bu sɔ ɔ."

Kabo Yesu ɲa diire diiwa koro yo má sɔnɔ fin ni

¹⁴ Na Yesu akaaki afere jama n aba i bi bekun, na wɔ se bu ka, "Am kere so am sui na am ti jɔre n bo m sujɔɔ ma am n bu. ¹⁵ Deke bo i wura sɔnɔ nɔɔ nu koro yo má i mi fin, ama, deke bo i fite i mi ahore su yo i mi fin a. [¹⁶ Bo i koro ka i ti ahin jɔre n bu, i ti ye ni ka i so i sui na i ti.]"

¹⁷ Sanɔa bo Yesu ba cinsi yakiiri jama n na i wuraari awuru n nu ni, na i susufɔm n abisa i nyini anyunderɛ n bu. ¹⁸ Na wɔ se bu ka, "Nka amberɛ gusu ati má jɔre n bu lɛɛ? Amberɛ si má ka deke bo i wura sɔnɔ nɔɔ nu koro yo má i fin, ¹⁹ dama deke bo sɔnɔ di, i wura má i ahore su se i wura i kunnu wɔ, na i kaaki je yi i, má sɔ?" Yesu afa ahin jɔɔɔwa n akere ka diire be la má ciire. ²⁰ Na wɔ kaaki ase bu ka, "Deke bo i fite sɔnɔ ahore su, nyini yo i fin a. ²¹ Dama deke bo i wo i ahore su ma i sunsunni tie a. I koro ma i nati suyo sakaraya, na i suwɔ, na i sukun minɛ, ²² na i susaaki ajaa ciire, na i nyunu suboro neɲge kpini su, na i suyo satietiem, na i sudadaka minem, na i suyo sa nɔbɛɛnnɔbɛɛn bo i cɛɛ wo má nu, na i susi kɔre, na i nati susaaki minem duma, na i la karambani, na i nati suyo sinnzinya sam. ²³ Nyini satie n kere mmɔɔ nya fite sɔnɔ ahore su, nyini ma i mi kaaki findifo a."

Kabo bara bo i ti má Yudafo yoori Yesu yarada ni

²⁴ Na Yesu ayasu akɔ awɔre n bo i wo dodo Tiro ni Sidon mie kpirim ni, na wɔ kɔ awura awuru be nu benle ka má sɔnɔ be ɲu i. Ama, wɔ koro afie má i ɲu. ²⁵ Na bara be ati i nɔa na wɔ ba ndende aba akutu i jaa bu. Ajini wo i wa baabara ɲu. ²⁶ Bara n ti má Yudafo, i ti Fonisiyafɔ ɔ, bo i fite Siriya awɔre n nu wɔ. Na wɔ sere Yesu jande ka i fɔn yi ajini n bo i wo i wa n ɲu ni. ²⁷ Na Yesu ase i ka, "Ma nbaatumam n du mɔ di na bu kunnu yi ka, dama i ti má ye ni ka a fa nbaatumam diire na a fa ma caam." ²⁸ Ama, na bara n ase i ka, "M Mibie, a la nahore, ama, haari ni nyini mmɔɔ, caam n tambu nbaatumam n diire n bo bu di na i tɔtɔ asiɛnɔɔ n na bu fa di." ²⁹ Na Yesu ase i ka, "U nɔaniɛ jɔɔɔwa n dɛɛ ti, kɔ awuru. Ajini n afite ayaki u wa ni." ³⁰ Na wɔ kɔ awuru akɔ anɔa ka i wa n da i dasu su, ajini n afite ayaki i.

Kabo Yesu tuntuunri asuturi be barasu ni

³¹ Na Yesu ayasu Tiro awɔre n nu akɔ aju Sidon mie kpiri n nu, na wɔ fa bere asin Mie Burum dɛɛ awɔre n nu, aba aju Galili kunma kpiri n nɔɔ su. ³² Na mine nbem afa sɔnɔ be aba Yesu dɔ, i ti asuturi wɔ, na i koro jɔɔɔ má nyunyumi. Na ba sere Yesu jande ka i fa i saa nana i ɲu na i nya laifie. ³³ Na Yesu afa sɔnɔ n afite jama n nu, i ni yiri nɔgumi, na wɔ fa i saa marakam awura i suim nu, na wɔ yi nanzue ago i saa su afa akan sɔnɔ n taferema, ³⁴ na Yesu aye i tii su anie angoro na wɔ ɲuundi, na wɔ se sɔnɔ n ka, "Efata." Nyini la ka, "Teke." ³⁵ Jina n nu bere, na sɔnɔ n sui n ateki, na i taferema n gusu akaaki anyanɔi nu, na wɔ koro ajojɔ nyunyumi. ³⁶ Na Yesu abɔɔɔ bu ka má bu ma be ti ka wɔ tuntun sɔnɔ ni, ama, kabo i bɔbɔɔri bu barasu ni, bu boori ndoori n gusu sɔ ɔ bara yeeri a.

³⁷ Na mine ayo alekutura haari ako asin su, bu ŋa, "I sayoowa kere kaba ti kpa a. I ma asuturim ti asui wo, na bobom jojo."

8

Kabo Yesu maari minem akpii nna diire ni

¹ Nyini sangja n na jama beberebe aba atien bu nɔɔ Yesu do bekun, bu la má deke bo bu di, na wo fere i susufom ni, na wo se bu ka, ² "Ahin jama n la m arjunfo, dama i nyuma lesan lee bo bu wo m do na bu la má deke bo bu di. ³ M koro yaki má bu na bu ko awuru ni ahɔe, má nyini, bu to cin atin nu wo, dama bu nbem fite dede." ⁴ Na i susufom n ase i ka, "Ye nifansu ye ya koro nya diire ahin boro n nu fen ma ahin minem n kere na bu kunnu yi a?" ⁵ Na wo bisa bu ka, "Am la kpono nye wo?" Na ba bo i nu ka, "Nso." ⁶ Na wo ma jamam n nɔɔ ka bu tana asienɔgu, na wo fa kpono nso n na wo da Nyeme asi. Na wo kpiekpie i nu ama i susufom n ka bu fa ma jama ni. Na bere gusu afa akpakpaaki bu nu. ⁷ Bu la jombaa kan kan nbem gusu, na wo fa ada Nyeme asi, na wo fa ama i susufom n ka bu fa nyini n gusu ma jama ni. ⁸ Bu diiri na bu kunnu ayi. Na i susufom n atambu sinsin kaawa n kandie nso. ⁹ Jama ni ju akpii nna dika. Na Yesu anya akaari bu na ba ko awuru. ¹⁰ Na i ni i susufom n awura lee ako Damanuta dee awore n nu.

Kabo Farasifom koroori ka Yesu yo alekutura sa na i keteeri ni

¹¹ Na Farasifo nbem aba i do, na ba se akuruwa ni Yesu. Bu koroori ka i yo alekutura sa be bo i kere ka i yiko n fite Nyeme do, adena bu nya i ngee soobiri. ¹² Na wo njuundi ni dimi i ahore su, na wo se ka, "Nzu ti ye ambere nyumafom koro ka m yo alekutura sa na am nju i a? M suse am nahore wo lee ka, m yo má alekutura sa ma má ambere nyumafom fuu." ¹³ Na wo yasu ayaki bu, na wo wura lee n nu akpie ako kunma n buekun do.

Bobɔɔwa fa ko Farasifom ni Feme Herode kereewam n su

¹⁴ Na i susufom n wara afi diire sa, ba bita má pui, má ka kpono kun n kpein woori lee n nu a. ¹⁵ Na Yesu atu bu fo, i ŋa, "Am si am nju sa ni Farasifom, ni Feme Herode dee kpono ayiri n bo bu fa go kpono n nu na i yasu ni." ¹⁶ Na ba jojo bu nju nu ka, "Ya la má kpono n ti, ye i su se so n a." ¹⁷ Na Yesu afa nu kabo i susufom n sujojo bu nju nu ni, na wo bisa bu ka, "Nzu ti ye am sujojo ka am bita má kpono a? Am nya si má deke bo m sujojo i ni, am nya ti má sa n bu? Am ahorembaa ti kekereke wanla. ¹⁸ I baari se ye am la anyumbaa na am nju má asi a? Ye am la asui na am ti má? Am tenge má su ka ¹⁹ m yo faari kpono nnu kpiekpie maari mine akpii nnu? Ye bo i kaari ni, kandie nye ye am sasaari a?" Na ba bo i nu ka, "Kandie buru ni nnyo." ²⁰ Na Yesu akaaki abisa bu bekun ka, "Ye kpono nso n bo m yo fa kpiekpie maari mine akpii nna n di? Sinsin kandie nye ye am sasaari a?" Na ba bo i nu ka, "Kandie nso." ²¹ Na wo se bu ka, "Haari ni kisa, am nya ti má i bu?"

Kabo Yesu tuntuunri anyinsin be na i njuuri asi ni

²² Bu ko juuri Besayida mie n nu, na mine nbem afa anyinsin be aba Yesu do, na ba sere i jande ka i fa i saa nana i nju na i nya laifie. ²³ Na wo so sɔnɔ n saa nu afa i afite mie n nu, na wo yi nanzue ago i nyumbaa n nu. Na wo fa i saa anana i nju, na wo bisa i ka, "A nie, a nju deke be e?" ²⁴ Na

anyinsin n aye i tii su anie, na wo se Yesu ka, “M ɲu minem ka bu nati, ama, bu ti ka bakam wo.” ²⁵ Na Yesu akaaki afa i saa anana i nyumbaa n su bekun, na anyinsin n anie ghirim, na wo ɲu ka i nyumbaam n ateke, na wo ɲu deke kere casi. ²⁶ Na Yesu ase i ka, “To atin nu ko awuru, na ma a se ka a fa mie n nu.”

Kabo Petoro kereeri ka Yesu ti barasu ni

²⁷ Na Yesu ni i susufom n ayasu ka bu ko Sizariya Filipu mie kan kanm su. Bu wo natiiri su ni, na wo bisa i susufom n ka, “Minem fa m bu ɲma a?”

²⁸ Na ba bo i nu ka, “Bu ɲa woro ti Yohane Nyeme Nzue Biefo n a, nbem ɲa woro ti Nyeme noanie kanfo Eliya a, ye nbem gusu ɲa a ti dawa dee Nyeme noanie kanfo nyingam n kun wo.” ²⁹ Na wo bisa bu bekun ka, “Ye ambere fa m bu ɲma a?” Na Petoro abo i nu ka, “Woro ti Kristo n a, Tiidefo n bo Nyeme ase ka i sunma i ni.” ³⁰ Na Yesu abobo bu ka ma bu ma be si ka yiri ti Kristo Tiidefo n a.

Kabo Yesu jɔɔ fa kɔori i yiwee n su ni

³¹ Nyini sin na wo bo i bu sukere i susufom n ka, “Wo yo daka ka mini Adamande Wa n di wahara dongu, na Yudafo nkpienkpienm, ni Nyeme sayoowa donguoyofo nkpienkpienm, ni Nyeme noanie kerefo kere ba kete m ɲu na bu kun m. Ama, lesan ceen sin na m tɛnge m yiwee n nu.” ³² Na wo kan sa n kere bu kpain akere bu. Na Petoro afa i ako aheme, na wo jaraki i ase i ka, “Ma a se ka a kan nyini jore ni.” ³³ Ama, na Yesu ace anie i susufom ni, na wo tien Petoro ɲu ase i ka, “Sitana, fa cinsi m bi bere. A sunsun ma kabo Nyeme koro ni. A sunsun kabo adamande koro n wo.”

Kabo Yesu jɔɔ fa kɔori kabo minem su i su ni

³⁴ Na Yesu afere jama n ni i susufom n na wo se bu ka, “Sono kere bo i koro ka i su m su, wo yo daka ka i mi wara fi i tiengu sa koroowa sa, na i fa i yiwee baka jaanu n so, na i su m su. ³⁵ Dama sono kere bo i koro ka i fa i ɲgoɔ fie, i mi ba fun i. Ama, sono kere bo i toori i ɲgoɔ mini ni m dee labari kpa n dee ti, i mi nya ɲgoɔ. ³⁶ Nzen sono nyaari durunya n nu deke n kere na i fuunri i ɲgoɔ, i kperere la bono? ³⁷ Nzu deke ye sono koro fa kaaki i ɲgoɔ a? ³⁸ Nyumafom ti satieyofom wo, bo bu su ma Nyeme. Ambere bo am wo bu nu, na nyinse ti am fa ko mini ni m noanie n dee ti ni, so ye nyinse ti mini Adamande Wa n gusu fa ko am su, sanja bo m ba ba ni m Si Nyeme jirima woowa n nu, ni i mereke casim ni.”

9

¹ Na wo se bu ka, “Nahore ye m suse am n a, am nbem wo nu fen bo am wu ma, ma ka am aba anu ka Nyeme femeya n aba ni yiko.”

Kabo Yesu ɲunie kaakiiri wo barasu ni

² Lesen ceen sin na Yesu afa Petoro ni Yakobo ni Yohane afun buka lenlenge be su, bu ni yiri ngumi. Bu wo do n na ba ɲu ka i ɲunie akaaki wo, ³ na i tanlee n akaaki fofoe papasi bo i ɲusu nya ma durunya n nu. ⁴ Do na mine nnyo nbem atie bu ɲu, na bu ni Yesu subo anzama. Bere la Eliya ni Moyisi, dawa dee Nyeme noanie kanfom ni. ⁵⁻⁶ Na sere ati Petoro ni susufo nyingam ni, na Petoro ajimi agaya na i nɔɔ afinfin i. Nyini ti na wo se Yesu ka, “Ya Kerefo, i ti kpa ka ya wo fen. Ma ya bo nambue nsan, u dee kun, Moyisi dee kun, na Eliya gusu dee kun.” ⁷ Na yinyingu akata

bu ɲu, na ba ti akonvi be ɲga yinyingɲu n nu, na wɔ ɔɔɔ bu dɔ. I ɲa, “M wa koroowa lɛɛ. Am de i nɔaniɛ.”⁸ Bu tiiri ɔɔɔowa n sɔ ni, kɛɲga na ba niɛniɛ abara aye, ama, ba ɲu má sɔnɔ be kun, má ka Yesu ɲgumi wo bu dɔ a.

⁹ Na sanɲa bo bu ba sujura buka n su ni, na Yesu abɔɔ bu ka, “Má am be se ka i bo sa n bo am aɲu i n su fa kere sɔnɔ be, haari fa kɔ sanɲa bo mini Adamande Wa ni bá wu na m tɛɲge m yiwee n nu ka.”¹⁰ Na ba de i nɔaniɛ ni, ama, na ba bakati abisa bu ɲuɲu nu ka, “Ye nzu la ka, i bá wu na i tɛɲge i yiwee n nu a?”¹¹ Na ba bisa Yesu ka, “Ye nzu ti ye Nyeme nɔaniɛ kerefom n bita ɔɔɔ ka Eliya dú mɔ ba ka, ye Kristo Tiidefɔ ni bá ba n a?”¹² Na wɔ bɔ bu nu ka, “I ti nahɔre wɔ ka Eliya dú mɔ ba na i ba sɛse deke n kere su. Bu kɛɛri sɛ Nyeme ɔre Kadasi n nu fa kɔ Adamande Wa n dɔ a? Ba kere ka i bá di wahara agaya, na mine bú i ɲgbeɛn.”¹³ Ama, m suse am wɔ lɛɛ, ka, Eliya adu mɔ aba, na minem ayo i kabo bu koro, kabo ba kere i Nyeme ɔre Kadasi n nu lɛɛ.”

Kabo Yesu fɔn yiiri ajini fiteeri baa be ɲu ni

¹⁴ Sanɲa bo Yesu ni i susufɔ nsanm ni kpieri bu nyi ba juuri i susufɔ nyinɲam bi ni, na ba ɲu ka jama beberebe atien bu nɔɔ abara aye bu. Ye Nyeme nɔaniɛ kerefom n nbem bita bu ni akuruwa.¹⁵ Jama n ɲuuri Yesu sɔ ni, na ba yo alekutura, na ba bo nu aɲmati akpa i atin ayo i anse.¹⁶ Na wɔ bisa bu ka, “Am se nzu akuruwa a?”¹⁷ Sɔnɔ be woori jama n nu na wɔ bɔ i nu ka, “Ya Kerefɔ, ma fa m wa baabiesɔ aba u dɔ ka a tuntun i ma m, dama ajini bobom wo i ɲu.”¹⁸ Sanɲa kere bo ajini n anya aba afa i, a ɲu ka wɔ fa i abo asiɲɲu, na i nanzue sufite fufuku, na i sukɛɛ i jee, na i kese i ɲu. Ma sere u susufom n ka bu fɔn yi ajini ni, ama, ba kura má nu.”¹⁹ Na Yesu ase bu ka, “Amaa. Ambere nyumafom, am la má yarada fieo. Nyuma sa ye m wo am dɔ fen a? Ye m yó sawɔre ni ambere kɔ ju sɛ wɔ? Am fa baa n ba ma m.”²⁰ Na ba fa baa ni aba i dɔ, na sanɲa bo ajini n ɲuuri Yesu ni, kɛɲga na wɔ kpisi baa ni, na wɔ fa i abo asiɲɲu, na wɔ da sukundu, na nanzue fufuku sufite i nɔɔ nu.²¹ Na Yesu abisa i si n ka, “Sanɲa bɔnɔ ye tukpaki n taraari i a?” Na si n abɔ i nu ka, “I kaan nu kere a.”²² Sanɲa kere bo i nya ba yasɔ i ɲu, i fa i wura sin nu wɔ, wara nanzue nu ka i kun i. Nyini ti, nzen a koro buka ya, si ya aɲunfɔ na a buka ya.”²³ Na Yesu ase i ka, “Nzu ti ye a ɲa nzen m koro buka u a? Deke be ti má kekereke ma má minem bo bu yo Nyeme yarada ni.”²⁴ Kɛɲga na baa n si asa Yesu nɔɔ su ka, “Ma yo yarada, ama, i sunnu má. Buka m na i sunnu.”²⁵ Na Yesu aɲu ka jama n sunmati ba i dɔ, na wɔ tien ajini n ɲu, i ɲa, “Wɔɔ ajini n bo a ma baa n ayo bobo ni asuturi ni, mini suse u ka a fite yaki i a, na má a kpie u nyi ba i dɔ kun.”²⁶ Kɛɲga na wɔ ciindi na wɔ kpisi baa n agaya, na wɔ fite ayaki i, na baa n aka ada ka wɔ wu dɛɛ su. Na minem n dɔɲɲu ase ka wɔ wu wɔ.²⁷ Ama, na Yesu atara i saa aye i su, na wɔ jina.

²⁸ Yesu ba wuraari awuru n nu ni, na i susufom n aba i dɔ, bere ɲgumi, abisa i ka, “Nzu ti ye yere akoro afɔn má nyini ajini n a?”²⁹ Na wɔ bɔ bu nu ka, “Be koro fɔn má nyini ajini n ɲusu sɔ, má ka nyemesere.”

Kabo Yesu ɔɔɔ fa kɔɔri i yiwee n su bekun ni

³⁰ Na Yesu ni i susufom n ayasu bere ako asin Galili awɔre n nu. Wɔ koro má ka be si i woobiri,³¹ dama i sukere i susufom wɔ. Na wɔ se bu ka, “Bu bá tɔ mini Adamande Wa n ma mine nbem na bu kún m, ama, bu

kuunri m wieeri, i lesan cɛɛn sin, na m tɛŋge m yiwee n nu.” ³² I jɔjɔri sɔ ni, i susufɔm n ati má i bu, ama, sere dɛɛ ti, ba koro abisa má i jɔre be.

Kabo Yesu kereeri sɔnɔ bo i tara bu kere ni

³³ Na ba kɔ aju Kapenam miɛ kpiri n nu, na sangba bo bu wo awuru n nu ni, na Yesu abisa i susufɔm n ka, “Am wo atin n nu suba ni, am se nzu akuruwa a?” ³⁴ Ama, na bu kere atɔ amuna, dama bu wo atin n nu dɔ ni, na ba se akuruwa bu ŋɔɔɔ nu fa kɔ sɔnɔ bo i tara bu kere bu nu. ³⁵ Na wo tana, na wo fere bere i susufɔ buru ni nnyɔm ni, na wo se bu ka, “Sɔnɔ kere bo i koro ka i kaaki mɔfɔ, wo yo daka ka i mi yo i ŋu kaan tara am kere na i kaaki yo am kere dɛɛ amususufɔ.” ³⁶ Na wo fa baa kaan be aba ajina bu aɛɛn, na wo biti i, na wo se bu ka, ³⁷ “Wɔrɔ kere bo ade ahin baakan n ŋusu m dɛɛ ti, a deeri mini wo lɛɛ. Bekun, wɔrɔ kere gusu bo a nya deeri mini, a de m Si Nyeme bo i sunmaari m wo lɛɛ.”

Kabo Yesu ŋa bo i fite má i sin, jina i sin ni

³⁸ Na Yohane ase i ka, “Ya Kerefɔ, ya ŋuuri ka sɔnɔ be afa u duma sufa fɔn yi ajinim fite minem ŋu, ye ya ŋa ya yaki má i, dama i wo má ya nu n dɛɛ ti.” ³⁹ Na Yesu ase ka, “Má am se ka am kanda i, dama sɔnɔ kere bo i nya sufa m duma n yo alekutura sam, i mi bá koro kaaki jɔjɔ má jɔre tie fa kɔ m dɔ. ⁴⁰ Dama sɔnɔ kere bo i fite má ya sin, i mi jina ya sin wo lɛɛ. ⁴¹ M suse am nahɔre wo lɛɛ, ka sɔnɔ kere bo i maari am nzue ka am nu dama am su mini dɛɛ ti, i mi nyá i ŋkatɔ.”

Kabo wo yo daka ka má sɔnɔ wura satie nu ni

⁴² Na Yesu akaaki ase bu ka, “Wɔrɔ kere bo u sayoowa ma ahin nbaatuma kan kanm n be bo i yo m yarada n be wuraari satie nu, i ti má kpa. Nzen má bu faari ŋgani san yabue bambaka ciciiri u kom, na bu fa u kɔ tu tieku nu, i ti ye tara bo a ma ahin nbaatuma kan kanm n be wura satie nu ni. ⁴³⁻⁴⁴ Nzen u saa n be cin u wura satie nu a, kaba kpie i na a ka asaasin, na a nyá u ŋu kɔ Nyeme dɔ. I ti ye ni bo a la u saa nnyɔ n kere na a wura cɛɛma sin n bo i nɔ má n nu. ⁴⁵⁻⁴⁶ Nzen u jaa n be cin u wura satie nu a, kaba kpie i na a ka ajaasin, na a nyá u ŋu kɔ Nyeme dɔ. I ti ye ni bo a la u jaa nnyɔ n kere na bu ba fa u tu cɛɛma sin nu. ⁴⁷ Nzen u nyumbaa kun gusu cin u wura satie nu a, lokoti yi i tu, na a ka anyunu kun, na a wúra Nyeme femeya n nu. I ti ye ni bo a la u nyumbaa n nnyɔ n kere na bu ba fa u tu cɛɛma sin nu. ⁴⁸ Dɔ dɛɛ kakabam ni bo bu wura mine bo ba wu ni, bere wu má cɛɛn be, na sin n gusu bo i je nɔ má.

⁴⁹ Kabo bu fa njin nyina saraka nenje kere su fa ma Nyeme, na i yo casi barasu ni, sɔ ye Nyeme cin sɔnɔ kere sui na i yó casi. ⁵⁰ Ya si ka njin yo fie, ama, nzen i fiefie nya ba saari wieeri, i koro yo má fiefie kun. Am ma am wo yo fie ka njin am benju nu, na am wo ni tanalaifie.”

10

Kabo Yesu kereeri minem fa kɔ ajaa ni ajaa yaki atin su ni

¹ Yesu yasuri Kapenam miɛ kpiri n nu, na wo kɔ Yudiya dɛɛ awɔre n nu, na wo kpie ako Yodan kunma n buekun dɔ fan, na jama beberebe ayandi aba atiɛn bu nɔɔ i dɔ. Na wo kere bu kabo sangba kere na i kere bu barasu ni.

² Na Farasifɔ nbem aba i dɔ ka bu sɔ i ŋgeɛ fa kɔ i nɔanie n jɔjɔowa su, na ba bisa i ka, “Ya dɛɛ atin n su, atin wo nu ka sɔnɔ koro fa i yi ji i?” ³ Na

Yesu abo bu nu ka, “Nɔɔɔnɛ maawa bɔɔɔ ye Moyisi yo fa maari am a?”
⁴ Na ba bo i nu ka, “Moyisi yo maari atin ka nzen sɔɔɔ koro ka i fa i yi ji, i ti ye ni ka i mi ma bara n ajaa yaki kadasi ka, na i nya fa i ji.”⁵ Na Yesu ase bu ka, “Am ahorembaa kekereke n dɛɛ ti ye Moyisi yo kɛɛɛri nyini nɔɔɔnɛ maawa maari am a.”⁶ Ba kɛɛɛ i Nyɛmɛ Jɔɛ Kadasi n nu ka fite durunya n bumboori, ‘Nyɛmɛ yiiri biesɔ ni bara a.’⁷ Na wɔ se ka, ‘Nyini dɛɛ ti, i ti ye ni ka biesɔ n kpaaki i gisan yaki i si ni i ni, na i ni i yi sanga wo.’⁸ Nyini sanga bu mine nnyɔ n ayo deke kun lɛɛ.’ Bu wo mǎ bu ngungumi kun.⁹ Nyini ti, deke bo Nyɛmɛ anya asanga i awie, mǎ sɔɔɔ kpaaki i nu kun.”

¹⁰ Sanga bo Yesu ni i susufɔm ba juuri awuru ni, na ba bisa i nyini nɔɔɔnɛ n bu.¹¹ Na wɔ se bu ka, “Sɔɔɔ kɛɛɛ bo i faari i yi jiiri, na i jaari bara fɔfɔɛ, i mi n asaaki ajaa ciire ni i yi n bo wɔ fa i aji n lɛɛ.”¹² Sasu bekun, bara kɛɛɛ bo i yakiiri i hun ajaa, na i kɔ jaari biesɔ fɔfɔɛ, nyini bara n gusu asaaki ajaa ciire lɛɛ.”

Kabo Yesu yoori nbaatumam kisi ni

¹³ Minem sufa bu nbaam ba Yesu dɔ ka i fa i saa nana bu ŋu na i yo bu kisi, ama, na i susufɔm n atien bu ŋu.¹⁴ Yesu ŋuuri i susufɔm sayoowa n sɔ ni, na yaa ati i, na wɔ se bu ka, “Am ma nbaatumam n bra m dɔ, mǎ am fɔn bu. Dama bere ŋusu sɔ ye Nyɛmɛ femɛya n ti bu dɛɛ a.”¹⁵ Nahɔɛ ye m suse am n a, wɔɔɔ kɛɛɛ bo a de mǎ Nyɛmɛ femɛya n nu jɔɛ kabo baatuma de deke i saa nnyɔ ni, a wúra mǎ Nyɛmɛ femɛya n nu.”¹⁶ Na wɔ kuku nbaatumam ni i saa nu, na wɔ fa i saa anana bu ŋu, na wɔ yo bu kisi.

Nenɛfɔ n ni nyɛmɛsu jɔɛ

¹⁷ Nyini sin na Yesu ayasu dɔ sukɔ. I wo kɔ n su ni, na sɔɔɔ be aɲmati aba akutu i nyunu, na wɔ bisa i ka, “Ya Kerefɔ sɔɔɔ kpa, m yɔ se ye m bá nya ngɔɔ n bo i la mǎ awieeri n a?”¹⁸ Na Yesu abo i nu ka, “Nzu ti ye a fere m ka sɔɔɔ kpa a? Be ti mǎ kpa sin Nyɛmɛ ŋu.”¹⁹ Ye m ŋa a si Nyɛmɛ nɔɔɔnɛ maawam ni e, bu ŋa, ‘Mǎ a kun sɔɔɔ. Mǎ a saaki ajaa ciire. Mǎ a wɔ. Mǎ a di kɔɛ daani. Mǎ a sisi sɔɔɔ. Bu u si ni u ni.’”²⁰ Na sɔɔɔ n abo i nu ka, “Ya Kerefɔ, ma su nyini nɔɔɔnɛ maawa n kɛɛɛ su haari m kaan nu.”²¹ Na Yesu anie sɔɔɔ n na wɔ koro i agaya, na wɔ se i ka, “Deke kun ye wɔ kpie u su a. Kɔ na a kɔ tɔ u aja kɛɛɛ, na a fa ŋwaa n ma yaarifɔm, na a bá nya ajekɛ Nyɛmɛ dɔ, na a bra ba su m su.”²² Yesu seeri i sɔ n na i ŋunie ayɔɔɔki i. Na wɔ kɔ awuru ni ahoresaaki, dama i la nenɛ agaya n dɛɛ ti.

²³ Na Yesu anie i susufɔm n abara aye, na wɔ se bu ka, “I yɔ kekereke bo nenɛfɔ wura Nyɛmɛ femɛya n nu.”²⁴ Na i susufɔm n ayo alekutura ni nyini jɔɔɔwa ni. Ama, na Yesu ase bu bekun ka, “Njam, i ti kekereke ka nenɛfɔm wura Nyɛmɛ femɛya n nu.”²⁵ Kabo nyɔɔma sin misini bue nu ni, i ti mǎ kekereke tara mǎ kabo nenɛfɔ yo na i wura Nyɛmɛ femɛya n nu ni.”²⁶ Na i susufɔm n amie akɔ asin su, na ba bisa bu ŋuŋu nu ka, “Ye nzen i ti sɔ e, ŋma koro fite nu a?”²⁷ Na Yesu anie bu dɔ na wɔ se ka, “I ti deke bo adamande koro yo mǎ i, ama, Nyɛmɛ dɔ, i ti mǎ pui, dama Nyɛmɛ koro yo deke kɛɛɛ.”

²⁸ Na Petoro ase i ka, “Tɔ, ye yɛɛ ayaki deke kɛɛɛ susu u su e.”²⁹ Na Yesu ase ka, “Nahɔɛ ye m suse am n a, sɔɔɔ kɛɛɛ bo i yakiiri i awuru, wara i ninbaam, wara i ni, wara i si, wara i nbaam, wara i asien, mini

ni m labari kpa n dɛɛ ti, ³⁰ i mi nyá nyinim sɔ ɲusu yaa i ɲɔɔɔ su. I nyá awurum, ni ninbaam, ni nim, ni nbaam, ni asiɛnm, na minem má i di wahara, na fa kɔ fa ba i nyá ɲɔɔɔ bo i la má awieeri. ³¹ Ama, mine dɔɲgu bo bu wo mɔ kisa ni bá ka sin, na bo bu ka sin kisa n bá du mɔ.”

Kabo Yesu jɔɔ fa kɔɔri i yiwee n su kpe nsan su ni

³² Saɲga bo Yesu ni i susufɔm sukɔ Yerusalem miɛ kpiri n nu ni, na Yesu adu bu mɔ sunati, na i susufɔm n ajimi, na sere ati minem bo bu suuri i su ni, na wɔ kaaki afere i susufɔ buru ni nnyɔm n akɔ ahɛmɛ, na wɔ jɔɔɔ bu dɔ bekun fa kɔ sa n bo i bá tu i ni. ³³ I ɲa, “Am ti fɛn. Ya sukɔ Yerusalem lɛɛ, dɔ ye bu kó tara mini Adamande Wa n a, na bu fá m ma Nyɛmɛ sayoowa dɔɲguyofɔ nkpienkpiɛnm ni, ni Nyɛmɛ noaniɛ kerefɔm ni, na bu dí m jɔrɛ, na bu sóro su ka bu kún m. Na bɛrɛ gusu nyá fa m wura minem bo bu ti má Yudafɔm saa nu, ³⁴ na bu yó m anzasi, na bu yí nanzue gɔ m ɲu, na bu fín m ɲgbere, na bu nyá kun m, na i lesan cɛɛn sin, na m tɛɲge m yiwee n nu.”

Kabo Yesu kereeri ka mɔfɔ yo i ɲu kaan ni

³⁵ Na Zɛbedi nbaam Yakobo ni Yohane aba Yesu dɔ aba ase i ka, “Ya Kerefɔ, ya koro ka deke kɛrɛ bo ya sere u, a yo i ma ya.” ³⁶ Na wɔ bisa bu ka, “Am koro ka m yo nzu ma am a?” ³⁷ Na ba se i ka, “Saɲga bo a bá tana u jirima tanaabiri ni, ya koro ka a ma ya kun tana u saa fɔmbɔɔɔ su, na kun gusu tana u saa biɛ su.” ³⁸ Na Yesu ase bu ka, “Am si má deke n bo am susere i n ti a. Am kóro dí wahara n bo m dí i ni, am káaki koro wu yiwee n bo m wú i ni, nzen se?” ³⁹ Na ba bɔ i nu ka, “ɛɛn, ya kóro yo i kɛrɛ.” Na Yesu ase bu ka, “Nahɔrɛ. Am dí wahara n bo m dí i ni, na am káaki wu yiwee n bo m wú i ni. ⁴⁰ Ama, mini la má atin bo m má am be tana m fɔmbɔɔɔ su, na be tana m biɛ su. Ama, Nyɛmɛ asese nyini tanaabiri n su, afa ase ama minem bo yiri ni i tii ayi bu n a.”

⁴¹ Saɲga bo i susufɔ burum ni tiiri kabo Yakobo ni Yohane n seeri Yesu ni, na ba fa yaa bu ɲu. ⁴² Na Yesu afere bu kɛrɛ aba i bi, na wɔ se bu ka, “Am si tenle su ka minem bo bu su má Nyɛmɛ n na bu yo bu ɲu nkpienkpiɛnm ni, bɛrɛ miɛ bu minem a, na bu tereterefɔm gusu kere kabo bu yiko ti barasu. ⁴³ Ama, wɔ ti má ye ni ka ambɛrɛ yo sɔ. Nzen sɔɔɔ be koro ka i wura i ɲu kpiri am kɛrɛ nu, i ti ye ni ka i mi yo i ɲu kaan, na i su am. ⁴⁴ Na bo i kaaki koro ka i yo am mɔfɔ, i ti ye ni ka i mi yo am kɛrɛ akɔɔ. ⁴⁵ Dama mini Adamande Wa n ni m tii aba má ka minem su m wɔ, ama, m baari ka m ba su minem wɔ, na m wu ma bu, na m de minem dɔɲgu tii ji.”

Kabo Yesu tuntuunri anyinsin be na i ɲuuri asi ni

⁴⁶ Na ba kɔ aju miɛ kpiri n bo bu fere i ka Yeriko ni. Saɲga bo Yesu ni i susufɔm, ni jama beberebe n sufite miɛ n nu ni, anyinsin be tana atin n nɔɔ wo sere su. Bu fere i ka Batimeyo, Timeyo dɛɛ wa. ⁴⁷ I tiiri ka Yesu Nazaretifɔ ni susin ni, na wɔ tien afere i, i ɲa, “Yesu, Fɛmɛ Davidi anuma, si m aɲunfɔ.” ⁴⁸ Na jama n atien i ɲu ka i yaki naɲmiɛ. Ama, na wɔ kaaki atien kpa abuka su ka, “Fɛmɛ Davidi anuma, si m aɲunfɔ.” ⁴⁹ Na Yesu aka ajina, na wo se bu ka, “Am fere i ma m.” Na ba fere anyinsin ni, na ba se i ka, “Ma u ahore si na a yasu, i fere u.” ⁵⁰ Na wɔ fikindi i zaba n atu, na wɔ warakpin, na wɔ ɲmati akɔ Yesu dɔ. ⁵¹ I kɔ juuri dɔ n na Yesu abisa i ka, “A koro ka m yo nzu ma u a?” Na anyinsin n abɔ i nu ka, “Ya Kerefɔ,

m koro ka a ma m ŋu asi wɔ.” ⁵² Na Yesu ase i ka, “Kɔ. Yarada n bo a yo m ni, nyini ma a nya laifie a.” Kpenɔa na wɔ kaba anɔ asi, na wɔ su i su ako.

11

Kabo Yesu wurari Yerusalem ka femɛ dɛɛ su ni

¹ Bu kɔ ŋa bu dodo Yerusalem miɛ kpɪri n nu, na bu ŋa bu wurari miɛm bo bu fere bu ka Befage ni Betani n ni, nyini miɛm n dodo buka n bo bu fere i ka Oliva Buka n wɔ, dama oliva bakam gɔ su wɔ. Dɔ na Yesu asunma i susufɔm n nu nnyɔ, ² na wɔ se bu ka, “Am kɔ miɛ kaan n bo i wo am nyunu dɔ ni, am kɔ ŋa am wurari miɛ n nu, am ŋu ka kaakobaa be minda, be nya fun má i. Am nyanɔi i bra. ³ Nzen be bisaari am ka nzu ti ye am sunyanɔi i a, am se i ka am Mibiɛ ni koro i a, ama, i má am kaaki fa i kpɪe i nyi ba kisa kisa.” ⁴ Na ba kɔ, na ba kɔ anɔ ka kaakobaa n minda anɔ be nu atɪngbere n su, na ba nyanɔi i. ⁵ Na mine n bo bu jina dɔ n abisa bu ka, “Am suyo nzu lɛɛ, am sunyanɔi kaakobaa n kɔ ni wɔ?” ⁶ Na ba se minɛm n kabo Yesu seeri bu ni, na ba ma bu atin. ⁷ Na ba fa kaakobaa n aba Yesu dɔ, na ba fa bu suturam anana kaakobaa n ŋu, na Yesu afun atana su. ⁸ Na mine beberebe afa bu suturam atɛɛki ase atin n nu, na nbem gusu abubu nyawa asese atin n nu. ⁹ Na bo bu du i nyunu n ni bo bu wo i sin n kɛɛ subo kuyigindi, bu ŋa, “*Hosana*. Ya kansi Nyɛmɛ.

Tɛɛfiɛ wo yiri n bo i suba Micɛra n dɛɛ duma n nu n dɔ.

¹⁰ Tɛɛfiɛ wo ya si Davidi femɛya n bo i suba n dɔ.

Ya kansi Nyɛmɛ bo i wo anɔgoro ni.”

¹¹ Na Yesu awura Yerusalem miɛ kpɪri n nu, na wɔ kɔ Nyɛmɛ Sereebiri Awuru n nu. I kɔ juuri dɔ na wɔ niɛ abara aye deke n kɛɛ. Nyini sangɔ wiɛ atɔ, nyini ti, na i ni i susufɔ buru ni nnyɔm n akpɪe bu nyi ako Betani.

Kabo Yesu yoori damba baka be ŋgbɛɛn ni

¹² Na i alecin na ba yasɔ Betani miɛ n nu sukɔ, na ahɔɛ ati Yesu. ¹³ Na wɔ niɛ anɔ damba baka be ni i nyawa, ka i wo dede, na wɔ kɔ anɛ ka i nyá suuwa n be di. Sangɔ bo i kɔ juuri baka n bu ni, wɔ ŋu má pui su, baka n jina ni nyawa ŋgumi wɔ, dama nyini sangɔ n ti má damba su sangɔ. ¹⁴ Na wɔ se baka n ka, “Sin nyuma sin, sɔnɔ di má u suuwa kun.” I seeri sɔ n na i susufɔm n ati.

Kabo Yesu fɔnri watafɔm fiteeri Nyɛmɛ Sereebiri Awuru n nu ni

¹⁵ Sangɔ bo Yesu ni i susufɔm kɔ juuri Yerusalem miɛ kpɪri n nu ni, na wɔ kɔ awura Nyɛmɛ Sereebiri Awuru n nu, na wɔ fɔn nɛnge tɔfɔm ni tɔfɔm kɛɛ afite awuru n nu, na wɔ kaaki ŋwaa kaakifɔm n teebirim n ni tiwa tɔfɔm n biɛm kɛɛ alanalanga. ¹⁶ Wɔ soro má su na be sɔ sɔɔri nati sin Nyɛmɛ Sereebiri Awuru n nu. ¹⁷ Na wɔ kɛɛ minɛm ka, “Ba kɛɛ i Nyɛmɛ Jɔɛ Kadasi n nu ka, Nyɛmɛ ŋa o, ‘M awuru ni, bu bá fere i ka awuru n bo bu bá sere Nyɛmɛ n nu fa ma durunya n nufɔm kɛɛ wɔ.’ Ama, ambɛɛ afa i ayo finfɔm woobiri.”

¹⁸ Nyɛmɛ sayoowa dɔnguyɔfɔ nkpienkpiɛnm n ni Nyɛmɛ nɔaniɛ kɛɛfɔm n tiiri sa n bo Yesu yoori i ni, na ba kpɪni atin kabo bu yó na bu kún i, dama ba soro i. Deke bo i ti na bu soroori i n la ka, mine dɔngɔ tiiri i kɛɛewa n na ba yo alekutura. ¹⁹ Nyini cɛɛn n naaso, na Yesu ni i susufɔm n afite miɛ n nu.

Kabo Yesu seeri ya ka ya yo Nyeme yarada ni

²⁰ Alecin ngarama bu ba susin sukɔ na ba ŋu ka damba baka n awu ako akpura haari i bunlui. ²¹ Na Petoro atenjege su kabo Yesu seeri baka n ni, na wɔ se i ka, “Ya Kerefo, nie. Damba baka n bo anuma na a jojo goori i ŋu ni, wɔ wu.” ²² Na Yesu ase bu ka, “Am yo Nyeme yarada. ²³ Nahore ye m suse am n a, wɔɔ kere bo a se ahin buka n ka, ‘Yasu kɔ to tieku n nu,’ na a yo má sika na a yo yarada ka deke n bo a seeri i ni, i yó, Nyeme yó i ma u. ²⁴ Nyini ti, m suse am wɔ lee, ka, deke kere bo am sere Nyeme ka am koro i, am yo yarada ka am anya i, Nyeme yó i ma am wɔ. ²⁵ Sangka kere bo am ba susere Nyeme, na be ado am ngasi, am fa i mi ni ngasi ce i ka, adena am Si Nyeme bo i wo angoro n gusu fá am dee ce am. [²⁶ Nzen am fa má am benɔm ngasi ce má bu, am Si Nyeme bo i wo angoro n gusu fá má am dee ngasi ce má am.]”

Kabo bu bisaari Yesu deke bo i yiko n fite ni

²⁷ Bu fa ba juuri Yerusalem mie kpiri n nu bekun, na Yesu awura Nyeme Sereebiri Awuru n nu, na i sunati bara ye i. I wo do so o n na Nyeme sayoowa donɔguyofɔ nkpienkpienm, ni Nyeme noanie kerefom, ni Yudafo nkpienkpienm n aba i do, ²⁸ na ba bisa i ka, “Nma dee yiko nu ye a yo nyini sam kere a? Nma ma u nyini yiko n ye a yo nyini sam n a?” ²⁹ Na Yesu abo bu nu ka, “Am ma m du mo bisa am bisaawa kun be ka, na nzen am boori m nu, na m gusu nyá se am deke bo m yiko n fite. ³⁰ Nma maari Yohane atin ye i ba bieeri minem Nyeme nzue n a? Nyeme nzen adamande? Am bo m nu.” ³¹ Na ba se akuruwa bu ŋuŋu nu, kabo bu bo Yesu nu barasu. Bu ŋa, “Nzen ya seeri i ka Nyeme maari i atin a, i bisa ya ka, ye nzu ti ye ya da má Yohane ŋu a? ³² Ama, nzen ya se i ka adamande do?” Do gusu na ba soro jama ni. Má pui ti, dama soɔo kere soroori su ka Yohane yo ti Nyeme noanie kanfo o nahore su. ³³ Nyini ti, na ba bo i nu ka, “Ya si má.” Na yiri gusu ase bu ka, “Mini mmoo sé má am soɔo bo i dee yiko nu na m yo ahin sam n kere ni.”

12

Kabo Yesu boori mieenu niiri Yudafo nkpienkpienm ni

¹ Na Yesu abo bu mieenum. I ŋa, “Soɔo be yo woori bere a, na wɔ do i baka suuwa barasu be fie, na wɔ kanda abara aye fie ni. Na wɔ lokoti yabue bambaka be kunma, ka i sumiemie baka suuwam ni nzue go nu. Na wɔ ta kpafiri lenlenge be ka bu tana su sunie fie n kere su, na wɔ nya afa fie n awura i npadifoɔm saa nu. Na wɔ ko atin. ² Sangka ba juuri bo i si ka baka suuwam n abi ni, na wɔ sunma i akooɔm kun i npadifoɔm n do ka i ko de i dee bo ba nya i n bra. ³ Akooɔ n ko juuri ni, na ba tara i abo i, na ba fon i akpie i nyi i saa ngbeen. ⁴ Na fie n fo n asunma i akooɔ n kun bekun, na ba tara i abo i atie i tii, na ba kpa i nyinye. ⁵ Na wɔ kaaki asunma kun bekun, na ba kun yiri. Akooɔ kere bo fie n fo n nya sunmaari i a, a ŋu ka bu bo i wɔ, wara bu kun i wɔ. ⁶ Soɔo kun n kpein be ba kaari a, yiri la i wa koroowa ni. Yiri ye i ba kaari sin sunmaari a, na wɔ se ka, ‘Bu má m wa n yiri jirima.’ ⁷ Ama, na nyini npadifoɔm n ase bu ŋuŋu nu ka, ‘I wa n bo i dí i aja n lee suba n a. Am bra na ya kun i na aja n kere ká ya dee.’ ⁸ Do na ba tara i, na ba kun i, na ba cin i afite fie n nu afa i atu.” ⁹ Na Yesu anya ase bu ka, “Am sunsun ka fie n fo ni yó se wɔ? I bá kun nyini npadifoɔm n kere wɔ, na i fá fie n wura mine foforem saa nu.” ¹⁰ Na

wɔ sa su ase ka, “Amberɛ ni am tii akan Nyemɛ Jɔrɛ Kadasi n nu anɔ i kabo ba kerɛ i barasu. Bu ɲa,

‘Yabuɛ n bo bondo tafɔm n faari i tuuri ni,
yiri ye wɔ kaaki bondo n jaa yabuɛm kerɛ tii a.

¹¹ Micera ni yoori i sɔ a.

Ya ɲu i, na wɔ yo ya alekutura.’ ”

¹² Yesu seeri sɔ ni, na YudaƆm nkpienkpiɛnm n akpini atin kabo bu yo na bu tara i, dama bu faari nu ka miɛnu n bo i boori i ni, i niiri berɛ wɔ, ama, bu soroori jama n dɛɛ ti, na ba yasu ako ayaki i.

Kabo bu sɔɔ Yesu ɲɛɛ fa kɔ lampo tɔ busu ni

¹³ Nyini sin na nkpienkpiɛnm n asunma Farasifɔm ni Fɛmɛ Herode mine nbem na bu ba sɔ Yesu ɲɛɛ na bu ti i nɔaniɛ. ¹⁴ Na ba ba ase i ka, “Ya KereƆ, ya si ka a ti nahɔrɛ seƆ ɔ, u cɛɛ wɔ má kabo mine jɔjɔ nu, dama a niɛ má sɔnɔ jinaabiri ti, ama, a kere minɛm wɔ nahɔrɛ su kabo Nyemɛ atin ti barasu. Tɔ, ya dɛɛ atin n su, atin wo nu ka ya tɔ lampo ma Romafɔm Fɛmɛ Kpɪri Siza, nzen atin wo má nu?” ¹⁵ Ama, na Yesu asi ka bu ti burukɔɔnufɔm wɔ, na wɔ bisa bu ka, “Nzu ti ye am sukoro ka am sɔ m ɲɛɛ a? Am fa ɲwaa bra na m niɛ.” ¹⁶ Na ba fa ɲwaa n aba ama i. Na wɔ de ɲwaa n anie, na wɔ bisa bu ka, “Nɲma dɛɛ tii ni i duma wo ɲwaa n su n a?” Na ba bo i nu ka, “Fɛmɛ Siza dɛɛ a.” ¹⁷ Na Yesu ase bu ka, “Deke bo i ti Fɛmɛ Siza dɛɛ, am fa ma Fɛmɛ Siza, na deke bo i ti Nyemɛ dɛɛ, am fa ma Nyemɛ.” Na ba miɛ ni i nɔaniɛ ni.

Kabo bu bisaari Yesu fa kɔɔri yiwee tenge jɔrɛ su ni

¹⁸ Na YudaƆm asɛɛ barasu nbem bo bu fere bu ka Sadusifɔm ni, aba Yesu dɔ. Bu dɛɛ kereewa la ka Nyemɛ tɛnɛge má minɛm bu yiwee n nu n a. Na ba ba abisa i jɔrɛ be, bu ɲa, ¹⁹ “Ya KereƆ, Moyisi yo kerɛɛri nɔaniɛ be maari ya, ka nzen sɔnɔ wu yakiiri i yi, na i ni bara n anya má baa, wɔ yo daka ka i niɛma n fa kunaƆ n na bu wu nbaam ma gɔrɔ n bo wɔ wu ni. ²⁰ Tɔ, sɔnɔ be yo laari nbaabiesɔm nso, na baakpiɛn n aja bara, na wɔ wu ayaki bara ni, ba nya má baa. ²¹ Na bo i tɔ i su n afa kunaƆ n aja, na yiri gusu awu ayaki bara ni, ba nya má baa. Na bo i tɔ i su nsan su n gusu afa i aja bekun. ²² I yo sɔ ɔ, na bu nso n kerɛ aja bara n abara ayɛ, na bu kerɛ awu ayaki i, ba nya má baa, na bara n gusu aba aka sin awu. ²³ Kabo bu mine nso n kerɛ aja bara n na ba wu sɔ ni, cɛn n bo Nyemɛ bá tenge minɛm bu yiwee n nu ni, bara ni ká ɲma dɛɛ wo?”

²⁴ Na Yesu abɔ bu nu ka, “Am amini atin. Deke bo i ti na am amini atin n la ka, am ti má deke bo ba kerɛ i Nyemɛ Jɔrɛ Kadasi n nu n bu, na am kaaki si má kabo i yiko n ti barasu. ²⁵ Dama sanɲa bo Nyemɛ má minɛm tenge bu yiwee n nu ni, ajaa wo má berɛ kun. Ama, nyini cɛn ni, sɔnɔ kerɛ káaki ka Nyemɛ mɛrɛkem bo bu wo angoro n wɔ. ²⁶ Na fa kɔ kabo Nyemɛ bá tenge minɛm bu yiwee n nu ni, am kaanri Moyisi dɛɛ kadasi ni, nzen am akan má i? Kabo i kerɛɛri fa kɔ sanɲa bo sin n jeeri buwe baka n su n na Nyemɛ jɔjɔori i dɔ ni, i ɲa, ‘Mini ti Abraham, ni Izaki, ni Jakɔbu dɛɛ Nyemɛ n a.’ ” ²⁷ Na Yesu asa su ase bu ka, “Kabo Nyemɛ ɲa i ti nyini minɛm n dɛɛ Nyemɛ ni, nyini kere ka bu toko la ɲɔɔ lɛɛ, dama Nyemɛ ti má bo ba wu n dɛɛ Nyemɛ, ama, i ti bo bu la ɲɔɔ n dɛɛ Nyemɛ a. Nyini ti, kabo am ɲa Nyemɛ tɛnɛge má minɛm bu yiwee n nu, am amini fieo.”

Nyemɛ nɔaniɛ maawa n bo i tara bu kerɛ n jɔrɛ

²⁸ Na Nyeme noanie kerefom kun anu kabo Sadusifom ni Yesu seeri bu bengu akuruwa ni, i tiiri kabo Yesu boori bu nu nyunyumi so ni, na wo ba abisa i ka, "Nyeme noanie maawam ni, bono tara bu kere a?" ²⁹ Na Yesu abo i nu ka, "Noanie n bo i tara bu kere n yaa, ba kere ka, 'Ambere Yisarelifom, am ti fen, ya Micera Nyeme n ti kun wo. ³⁰ Koro Micera u Nyeme ni, ni u ahorembaa kun, ni u awiewie, ni u sunsunni, ni u fanga kere.' ³¹ Bo i to su nnyo n la ka o, 'Koro u bengu kabo a koro u nu ni.' Noanie maawa be wo ma bere bo i tara ahin nnyom ni." ³² Na Nyeme noanie kerefo n ase Yesu ka, "Angba. Ya Kerefo, i nahore atin su lee ye a kan i n a. Ya Micera Nyeme n ti kun wo. Nyeme be wo ma bere sin i nu. ³³ Wo kaaki ayo daka ka ya koro Nyeme ni ya ahorembaa kun, ni ya sunsunni, ni ya fanga kere, na ya kaaki koro ya bengu kabo ya koro ya koro ya nu ni, nyini nnyom n ti ye tara bo ya yo tiem, ni bo ya yi sarakam ma Nyeme ni." ³⁴ Na Yesu anu ka sono n abo i nu kpa, na wo se i ka, "A waari ma ni Nyeme femeya ni." Nyini sin, be abo ma su ka i bisa Yesu jore bekun.

Kristo Tiidefo n bo i ti Feme Davidi anuma n jore

³⁵ Sangga bo Yesu woori Nyeme Sereebiri Awuru n nu sukere Nyeme noanie ni, na wo bisa minem jore be fa ko Kristo Tiidefo n su. I na, "Nzu ti ye Nyeme noanie kerefom n bita joko ka Kristo n ti Feme Davidi anuma a? ³⁶ Dama Awiewie Casi n yo wuraari Feme Davidi nu ni, na yiri ni i tii ase ka, 'Na Micera ase m Mibie n ka, 'Ba tana m saa fomboro su fen, haari m ba ma u kpofom kere ba kutu u jaa bu.'" ³⁷ To, Feme Davidi mmoo ni i tii fereeri Kristo n ka i Mibie wo, ye Kristo n yo se kaaki yo Feme Davidi anuma a?"

Kabo Yesu na mine si bu nu sa ni Nyeme noanie kerefom ni

Ye jama beberebe n jina tiiri Yesu noanie n ni ahorejo a. ³⁸ I woori bu kere n su ni, na wo se bu ka, "Am si am nu sa ni Nyeme noanie kerefom ni, deke bo bu koro i n la ka, bu wura sutura ngbingbirim wo, na bu nati sujengbe, na sono kere suyo bu anse goosu. ³⁹ Nyini minem n anya awura bu tientienbunoo soom n nu ni, wara ba nya afere bu tientienbunoo bambaka diire diibirim ni, bu koro ka bu tana kpirikoro tanaabirim wo. ⁴⁰ Nyini minem n so fin nkunafom nengem wo, na bu jina sere Nyeme ce, adena minem nu ka bu ti mine kparam wo. Jina ceen, bere ba nya suicin tara minem kere."

Kabo kunafu be yiiri saraka barasu ni

⁴¹ Na Yesu ako atana adodo alaka bo minem yi bu saraka nwaa wura nu ni, na i sunie kabo minem yi saraka barasu. Nengefom dongu yiiri nwaa beberebe wuraari saraka n nu. ⁴² Na kunafu yaarifo be gusa aba ayi nwaa kaan be bo i koro to ma pui awura saraka n nu. ⁴³ Do na Yesu afere i susufom n na wo se bu ka, "Nahore ye m suse am n a, nyini kunafu n ayi nwaa atara minem n kere. ⁴⁴ Dama nengefom la nwaa beberebe n dee ti, ye ba yi be a. Ama, nyini kunafu n ni i yaari n kere, i deke kere bo i la i lee, ye wo yi i n a."

¹ Saŋga bo Yesu sufite Nyeme Sereebiri Awuru n nu ni, na i susufom n nu kun be aba ase i ka, “Ya Kerefo, nie nyini yabue ngbingbirim ni. Nie kabo bu ti a. Nie nyini awuru bambaka ni. Nie kabo ba ta i barasu a.”
² Na Yesu ase i ka, “M ŋa a ŋu nyini ataari ngbingbirim n e? Yabue kun n kpein n mmoo ba nana ma i beŋgu su. Bu ba bereki i kere go o lee.”

Kabo Yesu kere fa koori durunya n awieeri su dee jore ni

³ Na Yesu ako afun atana Oliva Buka n su sunie Nyeme Sereebiri Awuru ni. Na saŋga bo yiri ni Petoro ni Yakobo ni Yohane ni Andere woori bu ngumi ni, na ba bisa i ka, ⁴ “Ya Kerefo, se ya, saŋga bono ye ahin sam n kere ba yo a? Ye nzu deke ba kere ya ka saŋga n adodo bo nyini sam n kere ba yo a?”
⁵ Na Yesu anya ase bu ka, “Am si am ŋu sa na ma am ma be dadaka am.”
⁶ Dama mine dongu ba fa m duma n ba, na bu se ka, ‘Yiri la mini n a.’ Na bu dadaka mine beberebe.
⁷ Saŋga bo am ba ti aluwa nga fen, wara bu sukun lue do, ma am ma am ahore saaki. Wo yo daka ka nyini n kere ba yo ka, ama, ma am nie ka durunya n awieeri lee.
⁸ Daanfie daanfie ba kun lue ni bu beŋgum, na nfemem kun lue ni bu beŋgu nfemem. Na asien ba kpisi awore aworem nu, na ahoe to. Nyini n kere ba yo kabo bara kutu een bumboori dee wahara n ti n wo.

⁹ Am si am ŋu sa, dama bu ba fa am wura joredifom saa nu, na bu bo am bu tientienbunoo soom n nu. Mini dee ti, na bu di am jore gominam ni nfemem nyunu. Nyini ma am atin, na am di m daani kere bu a.
¹⁰ Ama, wo yo daka ka daanfie kere du mo ti labari kpa n ka, ye durunya n awieeri ba ju a.
¹¹ Saŋga n bo bu ba faari am koori jinaabiri, na bu ko di am jore ni, ma am ma am ahore saaki fa ko kabo am ko joko barasu. Noanie kere bo i to am noo nyini saŋga ni, am joko i, dama i fite Awiewie Casi n do o, i fite ma am do.

¹² Gorom ni niemam ba to bu beŋgu ma bu kpofom na bu kun bu, na sim to bu nbaam, na nbaam kete bu wufom ŋu, na bu ma minem kun bu wufom ni.
¹³ Ama, woro kere bo a mindi deer ni nyini n kere ko ju i awieeri, Nyeme de u tii ji.”

Anyumbaa ciire sa n bo i ba ba n jore

¹⁴ Na Yesu akaaki ase bu ka, “Am ba ŋu anyumbaa ciire sa be bo Nyeme mmoo kpo i, ka bu ma i jina Nyeme Sereebiri Awuru n nu, deke bo wo yo ma daka ka i jina, na i saaki i ni. Ma sono kere bo i kan ahin kadasi n ti i bu nyunyumi. Nyini saŋga ni, woro kere bo a tiiri i nga, na a wo Yudiya asien n su, ŋmati ko bukam n su.
¹⁵ Woro kere bo a wo kpata nu, ma a wura gisan n nu fa pui.
¹⁶ Na woro kere gusu bo a wo fiesu, ma a kpie u nyi ko awuru ko fa u sutura be.
¹⁷ Nyini saŋga ni yo kekere agaya ma nyinsefom, ni nbaram bo bu nbaam toko nu ni.
¹⁸ Am sere Nyeme ka ma nyini sa n yo buke saŋga.
¹⁹ Nyini saŋga ni, wahara bo mine di i, i tara wahara kere bo ba di i asin, fite saŋga n bo Nyeme yiiri durunya ni haari ni kisa, nyini wahara n ŋusu ba ma kun.
²⁰ Ama, Micerca n akpie nyini saŋga n su. Nzen ma wo kpie ma i su, ma sono wo ma bere bo i nya ngoo, ama, i dee tienzu minem bo wo yi bu n dee ti, wo kpie saŋga n su a.
²¹ Nyini saŋga ni, nzen be ba se am ka, ‘Am nie, Kristo Tiidefo ni wo fen n a,’ wara ‘Am nie, yiri wo do n a,’ ma am de i ni noanie ni.
²² Dama korefo nbem ba ba na bu yo bu ŋu ka bere ti Kristo n a, na nbem gusu yo bu ŋu ka bu ti Nyeme noanie kanfom wo. Bu yo alekutura sam beberebe

fa kere am, na nzen bu koro nyaari atin, bu dádaka Nyeme dæe minem bo wo yi bu ni. ²³ Amberæ, ma se am i kere wo læe ka, na sanja n nyá ba ju. Am si am ñu sa.”

Kabo Adamande Wa ni bá kaaki ba barasu ni

²⁴ Na Yesu akaaki ase bu ka, “Sanja bo nyini wahara n kere ba siinri, ‘Awosin káta wie n su,
na sara n gusu tá má bo minem ñu i.

²⁵ Na asarambaam fíte angoro titi toto,
na angoro n kere kpísi.’

²⁶ Na minem nyá ñu ka mini Adamande Wa ni sufite angoro yinyingú n nu suje piépiéu suba ni yiko bambaka. ²⁷ Na m nyá sunma Nyeme merékem durunya n awóre n kere nu, na bu tíentien Nyeme minem bo Nyeme ayi bu durunya n nu n kere nɔɔ.”

Kabo Yesu ña ya fa damba baka fa se nyaari barasu ni

²⁸ Na Yesu akaaki ase ka, “Am fa damba baka n fa se nyaari. Sanja bo am ba ñu ka i nyawa akpɔnkpɔn, na i sufieñe fɔfore ni, am si ka dɔdɔori sanja adodo læe. ²⁹ Mini Adamande Wa n ba ni bá yo sɔɔ. Sanja bo amberæ gusu bá ñu ka nyini sam kere bá suyo ni, am si tenle su ka sanja n adodo læe, i cé má kun. ³⁰ Nahore ye m suse am n a, ka bo bu la ñgɔɔ kisa n wú wie má ka, ye nyini sam kere bá yo a. ³¹ Angoro ni asienngu kere bá la awieeri, ama, m dæe nɔanié n yiri la má awieeri cæn be.”

Kabo Yesu seeri ka ya si ya ñu sa fa kɔ i ba n su ni

³² Na Yesu akaaki ase ka, “Be si má sanja ni, wara cæn n bo m bá kpíe m nyi ba ni. Haari Nyeme merékem n bo bu wo i dɔ ni, ni mini bo m ti i wa n mmɔɔ si má. Má ka ya Si Nyeme ñgumi si a. ³³ Nyini ti, am si am ñu sa. Má am fa am ñu ji, dama am si má sanja n bo m bá ni. ³⁴ Mini Adamande Wa n baawa ni bá yo ka sɔnɔ be ye wo yasu i dika ka i kɔ atin. Sanja bo i ba sukɔ ni, na wo fa i awuru n awura i akɔm saa nu, na wo ma bu kere ni bu juma bo bu yo. Na wo se danmindafɔ n ka má i fa i ñu ji haari fa kɔ sanja bo i bá ba. ³⁵ Amberæ mmɔɔ si má sanja bo mini Awurufɔbié ni bá ba. Nzen ñgarama a? Naasɔɔ? Kɔngue jinanjin? Akɔnyuma bo sanja? Be si má. Nyini ti, má am fa am ñu ji, ³⁶ na má am daafi na m bá fura am nu. ³⁷ Deke bo m sujɔɔ se am ni, m jɔɔ ni sɔnɔ kere pepere wo læe, ka, má am fa am ñu ji na am daafi.”

14

Kabo bu sɛsɛeri su na bu tára Yesu ni

¹ Nyini sanja ni, wo ka lennyɔɔ, na bu di bu cænkpíri nbem. Bu fere kun n ka Butara cænkpíri, bo bu di i na bu tenge su kabo Nyeme yo deeri bu nam tii fiteeri Ijipitífɔm asien su ni. Na kun la bo bu di i ni kpɔnɔ bo bu go má ayiri nu na i yasu ni. Na Nyeme sayoowa dɔnguyɔfɔ nkpienkpienm ni, ni Nyeme nɔanié kerefɔm ni, anienie atin kabo bu yó barasu na bu tára Yesu kun i fiæwa nu. ² Na ba se bu ñunju nu ka, “Má am ma ya yo i cænkpíri n sanja. Má nyini, minem ni kéte yo nanmie wo, na bu sutenant.”

Kabo bara be gɔɔri Yesu tii su tulaalæ ni

³ Yesu woori Betani mie n nu wo, sɔnɔ be dika, bu fere i ka Simon, i yo ti kokofoɔ. Sanja bo Yesu wo diire di su ni, na bara be aba ni tulaalæ

tuwa nvanvani bo i la go agaya. Na wo bo abu tulaale tuwa n noo, na wo kaaki tulaale n kere ago Yesu tii su. ⁴ Na yaa ati minem ni nbem bo bu wo do ni, na ba se bu nju nu ka, "Nzu ti ye wo saaki tulaale n so a?" ⁵ Ma ya tooi i, ma ya nya nwaa beberebe, na ya fa ma yaarifom." Na ba kan bara ni ndie agaya. ⁶ Na Yesu ase bu ka, "Am yaki i benle. Ma am kan i ndie. Sakpa lee ye wo yo ama m n a. ⁷ Am ni yaarifom ni wo bere sanja kere a, na nzen sanja be am ba koro ka am yo bu sakpa, am yo bu. Ama, mini, m wo ma am do sanja kere. ⁸ Wo yo i dee fanga nyaari lee, wo kaaki tulaale n ago m ju ka i dee nzee bo wo fa ayo m siriya fa ko m yiwee ceen lee. ⁹ Nahore ye m suse am n a, deke kere bo bu ba kaanri Nyeme labari kpa ni durunya n kere nu, bu kan i sayoowa n na minem tenje i su."

Kabo Yudasi seseeri su ka i to Yesu ni

¹⁰ Na Yudasi Isikariyoti bo i ti Yesu susufo buru ni nnyom ni kun be ni, ako Nyeme sayoowa donguyofonkpienkpienm ni do, ka i ko to Yesu ma bu. ¹¹ Bu tiiri labari n so ni, na bu ahore ajo, na bu gusu atan ndie ama i ka bu ma i nwaa. Na Yudasi akpini atin kabo i yo barasu na bu nya Yesu taraabiri.

Kabo Yesu ni i susufom diiri ceenkpiri diire ni

¹² Na ceenkpiri n bo bu di i ni kpono bo bu go ma ayiri nu na i yasu ni, i lekun ceen, nyini ceen ye bu kun nbombaam bo bu di na bu tenje Butara ceenkpiri n su n a, na Yesu susufom n abisa i ka, "A koro ka ya ko ni ko sese Butara ceenkpiri n diire n su se a?" ¹³ Na Yesu afere bu nu nnyo na wo se bu ka, "Am ko mie n kunnu. Am ni sono be ye. I so nzue dundu. Am su i su, ¹⁴ ko awuru n bo i ko wura nu ni, na am bisa awurufobie n ka, 'Ya Keref n ja, soo bono nu ye i ni i susufom ni di Butara ceenkpiri n diire n a?' ¹⁵ Na i kere am angoro soo bambaka n bo ba yo i dongu ase ni, do ye am sese diire n su se ya." ¹⁶ Na i susufom ni ako mie n nu, na ba ko anu deke n kere so, kabo Yesu seeri bu ni, na ba sese Butara ceenkpiri diire n su.

¹⁷ Na naaso sanja, na Yesu ni i susufo buru ni nnyom ni kere aba do. ¹⁸ Na sanja bo bu tana wo diire n di su ni, na Yesu ase bu ka, "Nahore ye m suse am n a, am nu kun ba to m ma m kpofom a. I mi ni mini susanga di diire n a." ¹⁹ Na bu ahore asaaki, na bu kun kun n kere abisa i ka, "Ye m ja ma mini yiri e?" ²⁰ Na Yesu abo bu nu ka, "Ambere buru ni nnyom nu kun yo nyini a, i mi ni mini susanga fa ya saa wura taale kun nu a. ²¹ Mini Adamande Wa ni wu kabo ba kere i Nyeme Jore Kadasi n nu ase ka m wu n wo, ama, sono n bo i to mini Adamande Wa n ni, i mi ba ju anyumboro. Ma ba wu ma i mi n mmoo, ma i ti ye."

Ya Mibie kasin diire n jore

²² Sanja bo Yesu ni i susufom ni wo diire n di su ni, na Yesu afa kpono, na wo da Nyeme asi, na wo bubu i nu, na wo fa ama bu, na wo se bu ka, "Am de ahin kpono n na am di, i ti m juniembaa a." ²³ Na wo kaaki afa awa ni nzan, na wo da Nyeme asi, na wo fa ama bu, na bu kere anu be. ²⁴ Na wo se bu ka, "Ahin nzan n ti m mbunja lee, ye m sufa ma am n a. Yiri ye Nyeme sufa sesesu na i di i di n a. Minem dongu satie dee ti, ye m mbunja ni songi go a." ²⁵ Na wo kaaki ase bu ka, "Nahore ye m suse

am n a, m nú má nzan be kun, má ka cœen n bo m bá nu i fɔfɔre Nyeme femeya n nu ni.”

Kabo Yesu seeri i susufɔm n ka bu bá ŋmati yaki i ni

²⁶ Nyini sin na ba di jue akansi Nyeme, na ba fite ako Oliva Buka n su. ²⁷ Na Yesu ase i susufɔm n ka, “Am kere bá ŋmati yaki m, dama ba kere i Nyeme Jɔre Kadasi n nu ka, Nyeme ŋa, ‘M bó kun bœesasafɔ ni, na nbœem bá sandi.’”

²⁸ Ama, m bá tengeeri m yiwee n nu ni, m dú am mɔ kɔ Galili awɔre n nu.” ²⁹ Na Petoro ase i ka, “Nzen ahinm kere ŋmati yakiiri u, mini ŋmáti yaki má u da.” ³⁰ Na Yesu ase Petoro ka, “Nahɔre ye m suse u a, nyuma kɔngue n nu, kana akonyuma bá bo kpe nnyɔ su, a kéte kpe nsan ka a si má m.” ³¹ Na Petoro abo i hoe ase i ka, “Mini sé má sɔ da. Nzen haari wɔ yo daka ka mini ni wɔrɔ kere sánɔga wu mmɔɔ, ya wú ɔ.” Na i susufɔm n kere ase sɔ.

Kabo Yesu jeke tiiri na i kɔ sereeri Nyeme ni

³² Na ba yasu ako aju awɔre be bo bu fere i ka Gesemane ni, na Yesu ase i susufɔm ni ka, “Am tana fen ŋminda m, na m kó sere Nyeme.” ³³ Na wɔ fa Petoro ni Yakobo ni Yohane na ba kɔ mɔ kaan. Bu kɔ juuri dɔ na ahoresaaki aba i dɔ agaya, na i jeke ati. ³⁴ Na wɔ se bu ka, “Ahoresaaki aba m dɔ agaya, i yo m ka m wú ɔ mmɔɔ. Am wo fen na am ŋminda m. Má am daafi.” ³⁵ Na wɔ kɔ dede kaan, na wɔ butu i kunnu su, na wɔ sere Nyeme ka nzen má i koro ma ahin anyumboro n sin yaki i. ³⁶ I ŋa, “*Abba*,” i bu la ka, “M Si, wɔrɔ koro yo sa kere a. Nyini ti, yi m fite ahin anyumboro n bo i suba m dɔ n nu. Ama, má a yo kabo m koro ni, se kabo a koro ni.”

³⁷ I sere Nyeme wieeri ni, na wɔ kpie i nyi ako anu ka i susufɔ nsanm ni wo daafiri su. Na wɔ tenge bu na wɔ se Simon Petoro ka, “Simon, a daafi wɔ? A koro kpie má daafiri, haari kaan sɔ mmɔɔ?” ³⁸ Na wɔ kaaki ase bu ka, “Am kpie daafiri, na am sere Nyeme, adena má deke be yo am na am wura satie nu. Ahorembaa n koro nyemesu, ama, anuniembaa n ayɔrɔki.” ³⁹ Na wɔ kaaki ako asere Nyeme bekun ni nyini nɔanie jɔjɔwa kun bo i du mɔ jɔjɔri ni. ⁴⁰ Na wɔ kpie i nyi aba i susufɔm n dɔ, na wɔ ba anu ka ba daafi bekun, dama daafiri ati bu agaya. Ba koro ase má i pui.

⁴¹ Na wɔ kɔ asere Nyeme kpe nsan su, akaaki aba anu ka bu toko wo daafiri su, na wɔ se bu ka, “Am toko daafi yi am ŋumi wɔ? Wɔ se su. Sanga n aju, wɔ tɔ mini Adamande Wa ni ama satieyɔfɔm. ⁴² Am nie, sɔnɔ n bo wɔ tɔ m læ. Am yasu na ya kɔ.”

Kabo bu taraari Yesu barasu ni

⁴³ Na sanga bo Yesu toko wo jɔjɔri su ni, na Yudasi bo i ti Yesu susufɔ buru ni nnyɔm nu kun aju ni jama beberebe. Bu bita takobem ni kɔrɔmam. Nyeme sayoowa dɔnguyɔfɔ nkpienkpienm n ni Nyeme nɔanie kerefɔm ni, ni Yudafɔm nkpienkpienm ni sunmaari bu a. ⁴⁴ Na Yudasi bo i tɔɔri Yesu ni akere jama n nyaari su kabo bu sí Yesu na bu tara i. I ŋa, “Sɔnɔ n bo m kó biti i ni, yiri læ. Am tara i, na am bita i kenken, na am fa i kɔ.” ⁴⁵ Sanga bo i kɔ juuri ni, i kaba kɔɔri Yesu dɔ ɔ, na wɔ bo afere i ka, “Ya Kerefɔ.” Na wɔ biti i, na wɔ yo i anse. ⁴⁶ Na minem n atara Yesu na ba bita i kenken. ⁴⁷ Na Yesu susufɔm bo bu jina bere n nu kun acin ayi i takobe, na wɔ kpie sɔnɔ be sui, nyini sɔnɔ n ti Nyeme sayoowa dɔnguyɔfɔm kpian n akɔɔ ɔ.

48 Na Yesu abisa bu ka, “M ti finfo ɔ ye am fa takobem ni kɔrɔmam na am ba tara m a? 49 Cɛn kere cɛn m ni ambere wo Nyeme Sereebiri Awuru n nu a, ye m kere minem a, ama, am atara má m. Tɔ, i ti ye ni ka kabo ba kere i Nyeme Jɔre Kadasi n nu ka bu yó m ni yo yiiwa.” 50 Na i susufom n kere anmati ayaki i.

51 Na gbefene be gusu su Yesu su. I kara tani ngumi wɔ. Na ba laandi ka bu tara i, 52 na wɔ foro bu saa anmati ayaki tani ni, i bu ngbeen.

Kabo bu fa Yesu kɔri jɔre diibiri ni

53 Na ba fa Yesu ako Nyeme sayoowa dɔnguyofom kpien n dika, na Yuda-fom tereterefom kere aba atien bu nɔɔ. Bere la Nyeme sayoowa dɔnguyofom nkpienkpienm ni, ni Yuda-fom nkpienkpienm ni, ni Nyeme noanie kerefom ni. 54 Na Petoro asu Yesu su, ama, i woori dede kaan ni yiri, na wɔ ko awura Nyeme sayoowa dɔnguyofom kpien n dika gisan nu. Na wɔ ko asanga atana tintinjinafom n nu atun sin. 55 Na Nyeme sayoowa dɔnguyofom nkpienkpienm ni, ni Yuda-fom tereterefom n kere anienie minem bo bu bá di daani fa ko ngasi bo Yesu ado i ni, adena bu nya i taraabiri na bu kun i, ama, ba nya má jɔre bo bu fa kpie so i. 56 Na daani difom beberebe afite ajina akpie kɔre aso Yesu, ama, bu noanie n ayo má kun. 57 Na mine nbem gusu ayasu ajina akpie kɔre aso Yesu, 58 bu na, “Ya tiiri ka i na, i fúfu ahin Nyeme Sereebiri Awuru n bo minem taari i ni, na lesan afien, na i káaki ta fɔfɔre bo i ti má kabo adamande ataari ti ni.” 59 Haari ni nyini n mmɔɔ, bu noanie ni ayo má kun.

60 Na Nyeme sayoowa dɔnguyofom kpien ni ayasu ajina tereterefom n afien, na wɔ bisa Yesu ka, “A la má bonu be fa ko ahin jɔre n bo minem ni akpie aso u n su?” 61 Ama, na Yesu amɔ i nɔɔ, wɔ bo má jɔre be nu.

Na Nyeme sayoowa dɔnguyofom kpien ni abisa i bekun ka, “Wɔrɔ ti Nyeme n bo ya kere kansu i n deɛ Wa, Kristo Tiidefo n a?” 62 Na Yesu abo i nu ka, “Mini lɛɛ. Na

‘am bá ŋu mini Adamande Wa ni,

ka m tana Nyeme Yikofɔ n saa fɔmbɔrɔ su,

na am ŋú ka m fite angoro yinyingɔ n nu suba.’ ”

63 Yesu bo nu so wieeri ni, na Nyeme sayoowa dɔnguyofom kpien ni ason i tanlɛɛ. Na wɔ se ka, “Ya koro má daanifo bekun. 64 Ambere mmɔɔ ti kabo wo jojo awura Nyeme ngasi n nu e. Ye am na se wɔ?” Na bu kere ase ka wɔ kan ciire jɔre, nyini ti, wɔ yo daka ka i wu. 65 Bu kaanri so wieeri ni, na bu nbem ayi nanzue agɔ Yesu ŋu, na ba fa sanvuin acin akata i nyumbaa, na ba bobo i, na ba se i ka, “Wɔrɔ Nyeme noanie kanfo ni, kan kere ya sonɔ n bo i boori u ni.” Na tintinjinafom n gusu afinfin i nyɔɔnu.

Kabo Petoro keteeri ka i si má Yesu ni

66 Bu wo nyini kere su ni, na Petoro toko wo gisan n nu, na afani be aba i bi, yiri ti Nyeme sayoowa dɔnguyofom kpien n deɛ afani kun a. 67 Sanga bo i nie ŋuuri Petoro ka i wo sin tuunbiri n ni, na wɔ nie Petoro nyunu dika gbirim, na wɔ se i ka, “Wɔrɔ mmɔɔ yo woori nyini Yesu Nazaretifo n do ɔ.” 68 Na Petoro akete, i na, “Ai, m si má nyini jɔre n bo a sujɔjo i ni.” Na wɔ fite gisan n nu aba lɛɛ n nu. Nyini sanga ni na akonyuma abo kpekun. 69 Na afani n aba anu i do, na wɔ kaaki ase minem bo bu jina bere ni ka, “Ahin sonɔ n ti bu nu kun wɔ.” 70 Ama, na Petoro akete bekun.

Wɔ ɔɛ má na bo bu jina bere n gusu ase Petoro ka, “Nahore a, a ti bu nu kun wɔ, dama wɔwɔ mmɔɔ ti Galilifo ɔ.” ⁷¹ Na wɔ tan ndie afa i saa awura sin nu, i ɲa, “M si má sɔnɔ n bo am sujɔɔ i jɔre ni.” ⁷² Kpeɲga na akɔnyuma n abo kpe nnyɔ su, na Petoro atenɲe su kabo Yesu seeri i ni, i ɲa, “Kana akɔnyuma bá bo kpe nnyɔ su, a kéte kpe nsan su ka a si má m.” Na i ahore asaaki, na wɔ sun.

15

Kabo bu faari Yesu kɔ jinaari Gomina Pilato nyunu ni

¹ Na alecin saɲga na Yudafoɱ tereterefoɱ kere atien bu nɔɔ. Bere la Nyeme sayoowa doɲguyofɔ nkpienkpienm ni, ni Yudafoɱ nkpienkpienm ni, ni Nyeme noanie kerefoɱ ni. Na ba tana ase se su kabo bu yó Yesu. Na ba wura i jɔrɔkɔ, na ba fa i akɔ ama Gomina Pilato. ² Na Gomina Pilato abisa i ka, “Wɔrɔ ti Yudafoɱ femɛ n a?” Na wɔ bo i nu ka, “Kabo a jɔɔ ni, i ti sɔ ɔ.” ³ Na Nyeme sayoowa doɲguyofɔ nkpienkpienm ni akpie jɔre beberebe asɔ i. ⁴ Na Gomina Pilato abisa i bekun ka, “A la má noanie bo a bo bu nu? Nie jɔre beberebe bo ba kpie asɔ u a.” ⁵ Ama, Yesu abɔ má jɔre be nu, na Gomina Pilato abirisi kabo Yesu abɔ má nu ni.

⁶ Afo kere afo Butara ceenkpiri n nya ba ju ni, Gomina Pilato yi dansaraka n bo jama n sere i ka i yi i ji n wɔ. ⁷ Nyini saɲga ni sɔnɔ be woori dansaraka sɔɔ n nu do, bu fere i ka Barabasi. Saɲga be minem yo keteeri gomina n ɲu wɔ, na ba tu lue, na i ni i beɲgu ketemafɔ nbem akun minem, nyini ti, na ba tara bu anyi bu dansaraka. ⁸ Tɔ. Kabo afo kere afo Gomina Pilato n yi dansaraka n kun ma bu ni, na jama n aba atien bu nɔɔ i bi na bu kere sɔnɔ n bo i yi ma bu ni. ⁹ Na Gomina Pilato abisa bu ka, “Am koro ka m yi Yudafoɱ femɛ ni ma am a?” ¹⁰ I seeri sɔ ni, dama i si tenle su ka Nyeme sayoowa doɲguyofɔ nkpienkpienm ni si Yesu kɔre ti ye bu faari i ba wuraari i saa nu a. ¹¹ Na Nyeme sayoowa doɲguyofɔ nkpienkpienm n awura jama n bu sin ka bu se Gomina Pilato ka i yi Barabasi ji ma bu. ¹² Na Gomina Pilato abisa bu ka, “Ye ahin sɔnɔ n bo am fere i ka Yudafoɱ femɛ ni, am koro ka m yo i se wɔ?” ¹³ Na jama n atien ase ka, “Kpama i baka jaanu n su na i wu.” ¹⁴ Na Gomina Pilato ase bu ka, “Ye nzu satie ye wɔ yo i a?” Ama, na ba kaaki atien agaya bekun ase ka, “Kpama i baka jaanu n su na i wu.” ¹⁵ Do na Gomina Pilato akoro ka i jɔ jama n ahore, nyini deɛ ti, na wɔ yi Barabasi aji, na wɔ ma sojam afin Yesu ɲgbere, na wɔ nya afa i awura bu saa nu ka bu kɔ kpama i baka jaanu n su na i wu.

Kabo bu yoori Yesu anzasi ni

¹⁶ Na ba fa Yesu awura gomina n gisan n nu, na ba fere bu beɲgu sojam kere ka bu tien bu nɔɔ. ¹⁷ Na ba wura Yesu tanlee kɔkɔre yorom ka femeya tanlee su, na ba fa buwe aɲɔ i ka kaba deɛ su, na ba fa aforo i tii ka femeya kere deɛ su, adena bu yo i anzasi. ¹⁸ Na ba yo bu ɲu ka bu suma i jirima, bu ɲa, “Yudafoɱ Femɛ ni, ya yo u anse.” ¹⁹ Na bu sufinfin i tii baka, na bu suyi nanzue go i ɲu, na bu sukutu i nyunu. ²⁰ Bu ba yoori i anzasi n wieeri ni, na ba yi tanlee kɔkɔre yorom ni, na ba kaaki afa i tienɲu deɛ sutura n awura i. Na ba nya afa i akɔ ka bu kɔ kpama i baka jaanu n su.

Kabo bu kpamaari Yesu baka jaanu n su ni

²¹ Saɲga bo bu sukɔ ni, na bu ni Sirenefoɱ bie be aye, bu fere i ka Simon, Alekizanda ni Rufusu si lee. I fite aheme suba mie kunnu, na sojam n

amie i ka i so Yesu baka jaanu ni. ²² Na ba fa Yesu ako deke bo bu fere i ka *Gologota* ni, *Gologota* n bu la ka Tereawa Woobiri. ²³ Na mine nbem asannga nzan ni ayiri barasu be ama i ka i nu, na i jo yaari, ama, wo nu ma i. ²⁴ Bu yoori nyini n kere wieeri ni, na ba nya akpama i baka jaanu n su, na ba ye i su ajina, na ba tu mbaa na bu si kabo bu kpaaki i suturam nu, bu nju nu.

²⁵ Bu kpamaari i baka jaanu n su ngarama kerefi ngona a. ²⁶ Na ba kere jore n bo bu kpie soori i ni, na ba fa abo akpama i baka jaanu n tii su, kerewa n la ka, "Yudafom Feme n lee." ²⁷⁻²⁸ Na ba kpama finfo nnyo nbem baka jaanu su adodo i, bu kpamaari kun i saa fomboro su wo, na ba kpama kun n gusu i saa bie su. ²⁹ Na minem kere bo bu sin do ni subobo bu tii, na bu sukpie i nzuko, bu na, "Enehēen, woro bo a na a fufu Nyeme Sereebiri Awuru n na a kaaki ta i lesan afien n lee, ³⁰ jura baka jaanu n su na a de u tii ji." ³¹ Na Nyeme sayoowa dongyufo nkpienkpienm ni, ni Nyeme noanie kerefo ni gusu suyo i anzasi bu nju nu, bu na, "Wo de minem tii aji, ama, i sukoro de ma yiri ni i tii. ³² Am ma ya nie Yisarelifom Feme n bo i na i ti Kristo Tiidefo ni, nzen i koro juraari baka jaanu n su kisa kisa, ya yo i yarada." Na mine nnyom ni bo bu kpamaari bu dooori i ni mmoo akpie i nzuko.

Kabo Yesu wuuri ni

³³ Wiesu kerefi buru ni nnyo sannga na awosin akata asien n kere su, haari naaso kerefi nsan. ³⁴ Na nyini sannga ni, na Yesu abo awie kpa ase ka, "*Eli, Eli, lama sabatani?*" I bu la ka, "M Nyeme, m Nyeme, nzu ti ye a yaki m aji a?" ³⁵ Na minem nbem jinaari bere, bu nbem n tiiri so ni, na ba se ka, "Am so am sui na am ti, i sufere Eliya." ³⁶ Na bu kun nu anmati afa mene ado nzan gagaraki be nu, na wo fa awo baka su alaandi ato Yesu no ka i nu, na wo se ka, "Am yaki i na ya nie, ka Eliya ba jura i baka jaanu n su." ³⁷ Na Yesu abo awie kpa kpekun, na wo nya ayo Nyeme dee. ³⁸ Na tani bambaka n bo bu fa kpaakiiri soo casi n bo i wo Nyeme Sereebiri Awuru n nu n ati nu nnyo, fa i angoro ko jura asiengu. ³⁹ Na soja kpien n bo i jinaari baka jaanu n nyunu juuri kabo Yesu boori awie na i wuuri barasu ni, na wo se ka, "Ahin sono n ti Nyeme Wa a nahore su."

⁴⁰ Na nbara nbem ajina dede sunie Yesu. Bu nu nbem la Mariya bo i fite Magadala mie n nu ni, ni Salome, ni Mariya n bo i nbaam la Yakobo kaan n ni Yose. ⁴¹ Bere yo suuri Yesu su wo sannga bo i wo Galili awore n nu na bu subuka i. Nbaram beberebe gusu yo woori do bo bu suuri i su baari Yerusalem mie kpiri n nu.

Kabo bu yoori Yesu sutura barasu ni

⁴² Kabo nyini een n tiiri Njumiyi een n kpokpo een ni, i naaso wie, ⁴³ na Yosefu bo i fite Aramatiya mie kpiri n nu ni, na wo fa ahoresi na wo ko anu Gomina Pilato, na wo sere i ka i fa Yesu njunie n ma i. Yosefu yo ti sono jirimafoo Yudafom tereterefo n nu, na i sunsunni kere yo la ka, i nminda sannga bo Nyeme ba di i femeya n wo. ⁴⁴ Gomina Pilato tiiri kabo wo se ni, na wo yo alekutura kabo Yesu akaba awu ni. Na wo sunma afere soja kpien n na i bisa i na i ti ka Yesu wuuri ni, wo ce? ⁴⁵ I tiiri soja n noanie wieeri ni, na wo ma Yosefu atin ka i ko fa i njunie ni. ⁴⁶ Na Yosefu ato nzee, na wo yi fuin n baka jaanu n su, na wo fa nzee ni apooni i. Na wo ko afa i awura yabue bu bo ba lokoti i ayo i fanjunma n nu, na wo fa i ase nu, na wo kundu yabue bambaka afa ato fanjunma n ano ni. ⁴⁷ Na

Mariya Magadalafō ni, ni Mariya n bo i wa la Yose ni ajina anie anu deke bo bu seeri Yesu ni.

16

Kabo Yesu tengeeri i yiwee n nu ni

¹ Na naaso sanja bo Njumiye ceen n asin ni, na Mariya Magadalafō ni, ni Salome, ni Mariya n bo i wa la Yakobo ni, aba ato tulaalee nvanvani ka bu fa ko go Yesu njunie n su. ² Na Yudafom bakue n bumboori, mone ceen ngarama fuun, fa ko wie tie sanja, na ba ko Yesu fanjunma n su. ³ Sanja bo bu sukō ni, na ba bisa bu bengu ka, “Nma kō kundu yi yabue n bo i to fanjunma n anō n ma ya?” ⁴ Deke bo i ti na bu seeri so n la ka, yabue n ti bambaka agaya. Na ba tu bu tii anie anu ka yabue n to má anō ni. ⁵ Na ba wura yabue bue fanjunma n nu anu ka gbefene be tana nu saa fomboro su, i wura tanlee fofoe yorom be, na ba yo alekutura. ⁶ Na wo se bu ka, “Má am yo alekutura. M si ka am nienie Yesu Nazaretifo n bo bu kpamaari i baka jaanu n su n wo. Wo tenge i yiwee n nu. I wo má fen. Am nie, deke bo bu faari i seeri n yaa. ⁷ Am kpie am nyi na am ko se Petoro ni nyingam n kere ka wo du am mo sukō Galili, do ye am kō nu i a, dama kabo i yo seeri am lee.” ⁸ Na ba fite fanjunma n nu ni njmatiiri, na bu njunie subobo bu ni sere. Ba bo má su ase má be, dama sere ati bu agaya.

Kabo Yesu faari i nu kereeri Mariya Magadalafō ni

[⁹ Mone ceen ngarama fuun ye Yesu tengeeri i yiwee n nu a. I du mo yiiri i nu kereeri Mariya Magadalafō n wo. Yiri la bara n bo Yesu fon yiiri ajini nsom i nu ni. ¹⁰ Na wo ko atu Yesu susufom ni ka bu wo ahoresaaki ni sun su, na wo se bu ka wo nu Yesu. ¹¹ Sanja bo i seeri bu ka Yesu atenge i yiwee n nu na wo nu i ni, ba de má i noanie ni.

Kabo Yesu faari i nu kereeri i susufō nnyo nbem ni

¹² Nyini sin na Yesu susufō nnyo nbem afite Yerusalem mie kpiri n nu sukō aheme, na wo yi i nu akere bu, bo ba koro afa má nu nde ka yiri lee. ¹³ Na ba kpie bu nyi aba ase nyingam n ka ba nu Yesu, ama, haari ni nyini mmoo, ba de má.

Kabo Yesu faari i nu kereeri i susufō buru ni kunm ni

¹⁴ Nyini kere sin na sanja bo i susufō buru ni kunm n wo diire di su ni, na wo yi i nu akere bu. Na wo jaraki bu kabo bu ahorembaa ti kekereke ni, ni kabo ba yo má yarada ni minem bo bu nuuri i sanja bo i tengeeri i yiwee n nu na bu ba seeri bu ni. ¹⁵ Na wo se bu ka, “Am ko durunya n kere nu na am ko kan m labari kpa n kere adamande kere. ¹⁶ Na sono kere bo i yoori m yarada, na am bixeri i Nyeme nzue, Nyeme dé i tii ji, ama, bo ba yo má yarada ni, Nyeme dí bu jore na i yó bu ngbeen. ¹⁷ Na bo bu yoori yarada, bu nyá yiko bo bu koro yó ahin alekutura sam ni. Bu fá muma fon yi ajinim fite minem n nu, na bu jójo anie barasu bo bu si má bu, ¹⁸ na nzen bu taraari woom wara bu diiri nenje diiwa n mmoo, i yó má bu pui. Bu fá bu saa nana tukpakifom nu, na bu nyá laifie.”

Kabo Nyeme faari Yesu fun koori angoro ni

¹⁹ Sanja bo Mibie Yesu jooori bu do wieleri ni, na Nyeme afa i afun ako angoro ako atana i saa fomboro su. ²⁰ Na i susufom n ako deke n kere ko sukan i labari kpa ni, na Mibie n awo bu do abuka bu, na wo ma bu

yiko, na ba yo alekutura sam bo i kere ka bu labari kpa kaanwa n kere ti nahore wo.]

Labari kpa n bo LUKA akere i ni

¹ Ya si Teyoflosi, mine danggu boroori bu nyi na ba kere sam bo bu yoori ya nu fen n afa ase. ² Kabo jore n ti na bu kereri i ni, yiri ye minem seeri ya n a, nyini minem bo bu woori i bumboori ni, bere njuri i a, bere kaanri a. ³ To, kabo mini ni m tii ayi koresi anie sereya n kere, fite sanja n bo jore n boori i bu ni, ma nu ka i ti kpa ka mini gusu kere i kere sese i su na i ko atin su fa ma woro Teyoflosi bo a la anyunuyi ni, ⁴ adena a si ka bo ba kan akere u n kere ti nahore wo.

Kabo Nyeme mereke n korri Zakariya do n jore

⁵ Sanja bo Herode yo ti Yudiya fema ni, Nyeme sayoowa dangguyofa be wo bere, bu fere i ka Zakariya. I fite Abiya dee Nyeme sayoowa dangguyofom asese n nu wo. Bu fere i yi дума ka Elizabeti, yiri mmoo ti Aaron busu nufu o. ⁶ Bere nnyom kere yo ti minem bo bu su Nyeme nahore su wo, na bu deeri i noanie maawam ni, na bu yoori dekem kere bo i se ka minem yo i ni. ⁷ Ama, ba wu ma baa, dama Elizabeti ti njoroka a, na bekun i ni i hun n kere ayo nkpienm agaya.

⁸ Een n be, na Zakariya awo Yudafom Nyeme Sereebiri Awuru n Soo Casi n nu suyo i Nyeme sayoowa dangguyofa juma, dama nyini een n ti bu dee busu nufom een wo. ⁹ Nyeme sayoowa dangguyofom la bu nana sayoowa be. Bu tu mbaa a, na bu yi bu nu kun. Nyini een ni, bu yiiri Zakariya a, ka i wura bu Nyeme Sereebiri Awuru n Soo Casi n nu, na i kunkun ayiri kunkuunwa nvanvani. Nyini ti, na wo ko awura nu. ¹⁰ Ayiri nvanvani n kunkun sanja ba juuri ni, na jama kere aka gisan nu susere Nyeme. ¹¹ Na Nyeme mereke aba ayi i nu akere Zakariya, i jina Mikun n yoowa yoobiri fomboro su, deke bo wo kunkun ayiri nvanvani n ni. ¹² I njuri mereke n so ni, na wo bo biri, na sere ati i. ¹³ Ama, na mereke n ase i ka, "Zakariya, ma a ma sere ti u. Nyeme ade u sere ni. U yi Elizabeti ba wu baabieso, na a tun i дума ka Yohane. ¹⁴ Baa n bo i wu i n dee ti, u ahore jo agaya ko sin su, na mine danggu gusu ahore jo. ¹⁵ Baa ni ba yo sono bambaka a Nyeme do. Wo yo ma daka ka i nu nzan fieo. Haari i ni kunnu, ye Nyeme Awiewie Casi ni wura i nu a. ¹⁶ Na i ma Yisareli busu nufom danggu kpie bu nyi ba yiri Micera Nyeme n bo i ti ye ni ka bu su i n do. ¹⁷ Awiewie Casi n fanga wo yiri nu ka Nyeme noanie kanfo Eliya a, yiri du Micera nyunu a, adena i yo nbaasim ni bu nbaam afien danggu a, na i kaaki mine keteewam sunsunni, na bu yo mine kpa, na i sese Nyeme minem su se i."

¹⁸ Na Zakariya ase Nyeme mereke n ka, "Nzu deke ye m fa si ka jore n bo a sujojo i ni yo nahore a? Dama ma yo kpien, m yi gusu ayo buke."

¹⁹ Na mereke n ase i ka, "Bu fere m ka Gabiriyeli. Mini wo Nyeme nyunu a. Ye wo sunma m u do ka m fa ahin labari kpa n ba ma u a. ²⁰ Ti fen. Noanie n bo m sujojo i ni ba yo nahore wo, sanja bo Nyeme koro ka i yo ni. Ama, a yo ma m noanie n yarada dee ti, a to amuna, na a koro jojo ma haari een bo a ba nu ka noanie n bo m sujojo i n ayo nahore."

²¹ Nyini sanġa n kere minem n toko jina gisan nu n̄minda Zakariya, na ba birisi deke bo i ti na wɔ ɛ Sɔɔ Casi n nu sɔ ni. ²² Sanġa bo i ba fiteeri ni, wɔ koro ajojo má bu dɔ. Dɔ na ba fa nu ka wɔ n̄u alekutura deke be Sɔɔ Casi n nu. Dama wɔ koro ateke má i nɔɔ ajojo má, se i fa i saa jojo bu dɔ a.

²³ Sanġa bo Zakariya ba yoori i juma kere wieeri Nyeme Sereebiri Awuru n nu ni, na wɔ kpie i nyi ako i bosu. ²⁴ Wɔ ɛ má, na i yi Elizabeti anyinse. Wɔ yi má i n̄u fofoe nu haari sara nnu. ²⁵ Na wɔ se ka, “Kisa, ya Micera n anie anu m anjunfo. Wɔ yi m afite nyinse bambaka nu.”

Kabo Nyeme mereke n koori Mariya dɔ n jore

²⁶ Sanġa bo Elizabeti nyinse n ba juuri sara nsen ni, na Nyeme asunma mereke Gabiriyeli mie be bo i wo Galili awore n nu, na bu fere i ka Nazareti ni, ²⁷ ka i ko fa labari ma sunguru be bo bu fere i ka Mariya ni. Nyini sanġa, ba fa i ace biesɔ be, bu fere i ka Yosefu, i fite Feme Davidi dee busu n nu wɔ. I ni Mariya nya sanġa da má, dama wɔ nya ja má i. ²⁸ Na mereke n awura i n̄u, na wɔ se i ka, “Sunguru, m yo u anse ni terefie. A di Nyeme ahoroma, na i kaaki wo u dɔ.” ²⁹ Mariya tiiri ahin noanie n ni, na wɔ yo i alekutura, na wɔ birisi ase ka, “Ahin anse yoowa n bu la ka se wo lee?” ³⁰ Na mereke n ase i ka, “Mariya, má a ma sere ti u. A di Nyeme ahoroma beberebe. ³¹ So u sui na a ti. M n̄a a bá nyinse, na a wú baabiesɔ, na a tún i duma ka Yesu. ³² I bá yo sɔnɔ bambaka, na bu fere i ka, Nyeme Feme Kpiri n Wa. Ya Micera Nyeme fá i na Davidi femeya bie ma i, ³³ na i yó Jakobu busu nufom feme sanġa kere, na i dee femeya ni lá má awieeri.” ³⁴ Na Mariya abisa mereke n ka, “Ye ahin yó se koro yo a? Dama m nya si má biesɔ.” ³⁵ Na mereke n abo i nu ka, “Nyeme Awiewie Casi ni bá wura u n̄u, na Nyeme dee yiko n bá wo u dɔ. Nyini ti, baa n bo a wú i ni, i bá yo baa casi wo, na bu fére i ka Nyeme Wa. ³⁶ Nie fen, Elizabeti bo i ti u lamoko ni, yiri bo bu n̄a i ti n̄oroka ni, haari ni bo wo yo buke ni, wo nyinse, i sara nsen lee. ³⁷ Pui wo má bere bo Nyeme koro yo má i.” ³⁸ Na Mariya ase i ka, “Tɔ, m ti Micera n afani wɔ. Ma nyini sam kere yo ma m kabo a se ni.” Na mereke n ako ayaki i.

Kabo Mariya ko nieeri Elizabeti busu ni

³⁹ Nyini dee sin, wɔ ɛ má, na Mariya akpa i n̄u, na wɔ yasu ndende ako Zakariya ni i yi Elizabeti bosu ka i ko nie bu busu. Nyini mie n wo Yudiya asien n su bukam n afien wɔ. ⁴⁰ Na wɔ ko awura Zakariya dika, na wo yo Elizabeti anse. ⁴¹ Elizabeti tiiri Mariya anse yoowa n ni, na baa n bo i wo i kunnu n akpisi i n̄u. Dɔ na Awiewie Casi n awura Elizabeti n̄u, ⁴² na wo bo awie kpa, i n̄a, “Nyeme ayo u kisi atara nbaram kere, wɔ kaaki ayo baa n bo a bita i nyinse n kisi. ⁴³ Nzu jirima la ahin n bo Nyeme afa ama m n a, ka m Mibie dee ni aba anie m busu a? ⁴⁴ Dama m tiiri u anse yoowa n na baa n bo i wo m kunnu ni, akaba akpisi i n̄u ni akunnujo. ⁴⁵ Terefie wo u dɔ, dama a yo yarada ka Mibie n noanie n bo wo kan akere u ni, i bá yo yiiwa angba.”

Kabo Mariya diiri jue kansiri Nyeme ni

⁴⁶ Na Mariya ase ka,
“M kansi Mibie ni m ahorembaa su.

⁴⁷ M ahore ajo Nyeme n̄u, yiri bo i ti m Tiidefo ni.

⁴⁸ Haari ni bo m ti i afani n kere ni, i wara afi má m sa.

Fite nyuma fa ko, minem kere bá fere m ka terefiefo.

49 Dama ka Micera yiko kere fo ni ayo sakpa beberebe ama m,
i duma ti casi.

50 Sanja kere sanja i si anjunfo o,
i si minem bo bu soro i n kere anjunfo o.

51 Wo fa i yiko asaa ni, afon asandi karambanifom,
ni bu sunsunni tie n kere.

52 Wo yi nfeme bambakam afite bu femeya biem n su,
na wo ye tarakam saa su.

53 Wo ma ahofom nenje kpakpam na bu kunnu ayi,
na wo fon nenjefom na ba ka bu saa ngbeen.

54-55 Sesesu n bo i yo faari na i diiri i di ni ya nam ni,
wo ma i ayo yiiwa,
ye wo ba abuka Yisarelifom bo bu su i ni.

I wara afi má Abraham sa.

Wo si i ni i sinfom kere anjunfo sanja kere.”

56 Na Mariya aka Elizabeti bi, sara nsan, na wo nya aba akaaki ako i bosu.

Kabo bu wuuri Yohane Nyeme Nzue Biefo n ni

57 Elizabeti kutu ceen ni, na wo wu baabieso. 58 Na Elizabeti tanafom, ni i lamosim tiiri ka Micera n ayo i sakpa bo i la má anjusu ni, na bu ni yiri kere kunnu ajo. 59 Baa n lemocue ceen n ba juuri ni, na ba tien bu nco na bu wura i kenkenne, na bu tun i duma. Má bu koro ka bu fa i si Zakariya duma fa tun i a. 60 Ama, na i ni ase ka, “Ai, bu fére i ka Yohane wo.” 61 Na ba se i ka, “U lamosi nu, bu fere nma so a?” 62 Na ba fa bu saa ajojo baa n si n do, na bu si duma bo i koro ka bu fa tun i wa ni. 63 Do na Zakariya afa i saa akere ka, bu má i deke be na i kere, na wo de i na wo kere ka, “I duma la Yohane.” Na nyini jore n ayo bu kere alekutura. 64 Jina n nu bere, na Nyeme ateke i nco na wo bo i bu ajojo bekun, na i sukansi Nyeme. 65 Na sere ati bu tanafom kere. Na minem akan nyini sa n bo i yoori n jore abara aye Yudiya awore n bukam n kere su. 66 Na minem kere bo bu tiiri i n afa jore n ase bu ahore su na bu susunsun, na ba bisa bu nu ka, “Baa n ba nyiiri, i yo nzu baa lee?” Bu seeri so ni, dama bu kere anju ka Micera n yiko n wo i nu.

Kabo Zakariya kaanri Nyeme noanie n ni

67 Na Awiewie Casi n awura baa n si Zakariya nu, na wo kan Nyeme noanie, i na,

68 “Am ma ya kansu ya Micera ni,
yiri bo i ti Yisarelifom Nyeme ni.

Dama ka wo ba anie i minem busu,
na wo de bu tii aji.

69 Wo ma ya tiidefo fangafu,
i fite i amusuisufu Feme Davidi dee busu n nu wo.

70 Nyeme yo maari i noanie kanfo casim jojori dawa sanja
71 ka i bá de ya tii fite ya kprofom,
ni bo bu koro má ya n saa nu.

72 So ye i kereeri ka i si ya nam anjunfo,
na i wara fi má i sesesu casi n sa a.

73-74 I yo faari nyini sesesu n na wo di i di ni ya na Abraham
ka i de ya tii fite ya kprofom saa nu,

¹⁵ Saŋga bo mɛrɛkɛm n fiteeri bu dɔ kpɛeri bu nyi kɔɔri aŋgoro ni, na nbɔɛsasafɔm ni ase bu ŋuŋu nu ka, “Am ma ya kɔ Betilehem miɛ n nu na ya kɔ ŋu deke n bo wɔ yo na Mɛcɛra n ayi akere ya ni.” ¹⁶ Nyini ti, na ba kɔ ndende, na ba kɔ aŋu Mariya ni Yosefu, na ba ŋu baa n gusu ka i da nɛŋgɛndɔrɛm diire diibiri alaka n nu. ¹⁷ Saŋga bo bu kɔ ŋuuri baa n ni, na ba kan nɔaniɛ n kɛrɛ bo mɛrɛkɛ n fa maari bu fa kɔ baa n ŋusu jɔrɛ n akere minɛm. ¹⁸ Na minɛm kɛrɛ bo bu tiiri kabo nbɔɛsasafɔm seeri bu ni, n ayo alekutura. ¹⁹ Na Mariya afa nyini sereya n kɛrɛ bo i yoori ni ase i ahore su. ²⁰ Na nbɔɛsasafɔm n akpɛie bu nyi akɔ bu nbɔɛm n bi, na bu sukansi Nyɛmɛ na bu subo tuntun i fa kɔ deke n kɛrɛ bo ba ŋu i na ba ti i n dɛɛ ti. Deke n kɛrɛ yoori kabo mɛrɛkɛ n seeri bu n wɔ.

Kabo bu tuunri Yesu duma ni

²¹ Saŋga bo lemɔcɛɛ cɛɛn n ba juuri ni, na ba wura baa n kɛnkɛnɛ, na ba tun i duma ka Yesu. Duma n bo mɛrɛkɛ n fa maari i ka, na i ni nyinseeri i n lɛɛ.

Kabo bu faari Yesu kɔɔri Nyɛmɛ Sereebiri Awuru n nu barasu ni

²² Na cɛɛn n aju bo Yosefu ni Mariya kɔ yo bu fin ŋmisi sayoowa kabo Nyɛmɛ nɔaniɛ kpamaawa n bo i fa maari Moyisi n kereeri ka bu yo ni. Nyini ti, na ba fa baa n akɔ Yerusalem miɛ kpɛiri n nu na bu kɔ fa i wura Mɛcɛra n saa nu. ²³ Kabo ba kɛrɛ i Mɛcɛra n nɔaniɛ kpamaawa n nu ni, ba kɛrɛ ka, “Baabiesɔ kɛrɛ bo i ti i ni sunjuru baa, i ti ye ni ka bu fa i kɔ ma Mɛcɛra ni, na i yɔ i dɛɛ.” ²⁴ Na ba kɔ ayo yoowa, kabo Mɛcɛra n nɔaniɛ kpamaawa n akere ka bu yo i ni, bu faari bumbuku wara tiiwa nnyo yoori yoowa n a.

²⁵ Nyini saŋga ni, sɔnɔ be wo Yerusalem, bu fere i ka Simeyon. I yo ti sɔnɔ bo i yo sa bo i kɔ atin su Nyɛmɛ dɔ ɔ, na i ti sɔnɔ bo i soro Nyɛmɛ, na i ŋminda fa kɔ saŋga bo Yisarelifɔm nya bu tiide n wɔ. Na Awiewie Casi n wo i ŋu. ²⁶ Na Awiewie Casi n ama wɔ si ka i wú má, má ka i nyumbaa aba aŋu Kristo ni, Tiidefɔ n bo Mɛcɛra n ase ka i súnma i ni. ²⁷ Na Awiewie Casi n ama Simeyon akɔ Nyɛmɛ Sereebiri Awuru n nu. Nyini saŋga n ye Yesu si ni i ni gusu afa i akɔ ka bu kɔ yo yoowa kabo Nyɛmɛ nɔaniɛ kpamaawa n akere ka bu yo n a. ²⁸ Simeyon ŋuuri baa n sɔ ni, na wɔ kaba ade baa ni i saa nu, na wɔ kansi Nyɛmɛ, i ŋa,

²⁹ “M Mibie, u nɔaniɛ n bo a yo seeri m ni, ayo yiiwa,
ma mini u akɔɔ n atin kisa na m fite durunya n nu ni ahoreda.

³⁰ Dama kisa mini ni m tii nyumbaa aŋu Tiidefɔ ni,

³¹ yiri ye a sɛsɛ i su,

ye a ma minɛm kɛrɛ nyumbaa aŋu i a.

³² Yiri ti wein n a, na i kére minɛm u atin ni,

bɛrɛ bo bu ti má Yudaɔm ni,

na i wúra Yisarelifɔm kpɛiri,

bɛrɛ bo bu ti u dɛɛ minɛm ni.”

³³ Simeyon jɔjɔri baa n jɔrɛ sɔ ni, na i si ni i ni ayo alekutura. ³⁴ Na Simeyon asere Nyɛmɛ, na wo yo bu kisi. Na wɔ se baa n ni ka, “Ahin baa n ye Nyɛmɛ ayi i ka i má Yisarelifɔm dɔŋgu kpaasi, na dɔŋgu gusu yásu n a. Yiri yɔ deke bo i ti alekutura sa, na minɛm dɔŋgu bá kete i. ³⁵ Sɔ ye i bá yi bu asiri nu sunsunni tiɛm kɛrɛ fite fofoe nu a. Na yiri ti, u ahore sáaki agaya, kabo takobe kpɛie sɔnɔ na i yo ya ni.”

36-38 Nyini sanɓa n nu nɔ ɔ, na bara be, i ti Nyeme noaniɛ kanfo ɔ, na i gusu wo do, na wo ba baa n bi. I duma la Anna, na bu fere i si ka Fanuweli, Aseri deɛ busu nufɔa. Bara n ti buke wo nahore su, i jaari i hun, bu afo nso ye i kaari kunafɔ a. Nyini sanɓa ni, i la afo aburamocue ni nna. Wo kpaaki ayaki ma Nyeme Sereebiri Awuru ni, i cici i nɔɔ so ɔ, na i ko susere Nyeme, wiesu ni kojgue. I ba juuri baa n bi ni, na wo da Nyeme asi na yiri gusu ajojo baa n jore akere minem kere bo bu nminda ka Nyeme sunma Tiidefo n na i de Yisarelifom tii ji ni.

Kabo bu faari Yesu kɔɔri awuru ni

39 Sanɓa bo Yosefu ni Mariya yoori yoowa n kere bo Micera n noaniɛ kpamaawa n kere ka bu yo n wieeri ni, na ba kpie bu nyi ako bu bɔsu Nazareti bo i wo Galili awore n nu ni. 40 Na baa n anyi, na wo nya fanɓa ni alecira, na Nyeme ahoroma awo i do agaya.

Kabo bu faari Yesu kɔɔri Yerusalem mie kpiri n nu ni

41 Afo kere afo, Yesu si ni i ni ko Yerusalem mie kpiri n nu wo, na bu ko di Butara ceenkpiri, bo bu di i na bu tenge su kabo Nyeme yo deeri bu nam tii fiteeri Ijipitifom asien su ni. 42 Sanɓa bo Yesu ba juuri afo buru ni nnyo ni, na ba ko na bu ko di ceenkpiri n kabo bu yo afo kere afo ni. 43 Bu ba diiri ceenkpiri n wieeri na bu sukpie bu nyi ko awuru ni, na Yesu yiri aka Yerusalem do. I si ni i ni asi ma ka wo ka do. 44 Bu sunsuni la ka i wo abengu natiirifom n nu wo, nyini deɛ ti, bu wo ko su wo haari wie ko suto. Do na ba bo i bu sunienie i, bu lamosim ni bu danfom nu. 45 Ama, ba nu ma i, na ba nya kpie bu nyi ako Yerusalem na bu ko nienie i. 46 I lesan ceen na ba ko anju ka i tana Nyeme Sereebiri Awuru n nu, Nyeme noaniɛ kerefom afien suso i sui, na i subisa bisaawam. 47 Na minem bo bu tiiri n noaniɛ n kere ayo alekutura, fa ko kabo i la si na i bo noaniɛ bisaawam nu barasu ni. 48 Na sanɓa bo i si ni i ni ba juuri i n na ba mie, na i ni abisa i ka, "M wa, nzu ti ye a yo ya so a? A ma mini ni u si ahore asaaki ako asin su, haari ya nati wo u nienie su." 49 Na wo se bu ka, "Nzu ti ye am nati nienie m busu a? Am si ma ka wo yo daka ka m wo m Si awuru n nu wo?" 50 Ama, ba ti ma noaniɛ n bo i seeri bu nu n bu.

51 Na Yesu asu bu su, na ba kpie bu nyi ako Nazareti mie n nu, na wo de bu noaniɛ. Na i ni afa nyini sam kere ase i ahore su. 52 Na Yesu sunyi, na i alecira subuka su, na i sayoowam susun Nyeme ni adamande kere nu.

3

Kabo Yohane Nyeme Nzue Biefo n kaanri Nyeme jore ni

1 Romafom feme kpiri bo bu fere i ka Siza Tiberiyosi n diiri i femeya ni, afo buru ni nnu, nyini sanɓa ye sɔno be bo bu fere i ka Pantiyo Pilato n ti Yudiya awore n nu gomina, na sɔno be bo bu fere i ka Herode n nie Galili awore n nu su, na i goro bo bu fere i ka Filipu n gusu nie awore nnyo nbem bo bu fere bu ka Iturayo ni Taronitido n su, na sɔno be bo bu fere i ka Lusaniya n gusu nie awore n bo bu fere i ka Abilene n su.

2 Nyini sanɓa ni, Anasi ni Kayafasi jina Nyeme sayoowa dongyoyofom kere kpien n jinaabiri a. Na Nyeme afa i noaniɛ n ama Yohane Zakariya wa, boro kpantain n nu. 3 Nyini ti, na Yohane ako Yodan kunma n awore n kere n nu sukan Nyeme jore, i na, "Am kaaki am wo na m bie am Nyeme nzue, na Nyeme fa am ngasi ni am satie kere ce am." 4 So ye wo yo yiiwa, kabo Nyeme ma ba kere i noaniɛ kanfo Esaya deɛ kadasi n nu ka,

“Sɔnɔ be subo ndoori boro kpantain n nu ka,
 ‘Am sese Mibiɛ n atin su,
 na am yo i atin n dɔngu.

5 Na bu bá bereki bukam n ni kperɛm kere,
 na bu bá tɔtɔ kunma kunma kere bo i wo buka n bu,
 na atin kere bo wo biri, bu bá tenge,
 na bu bá tɔtɔ i kunma kunma n kere.

6 Na adamande kere bá ɲu kabo Nyeme dé bu tii ji barasu ni.”

7 Na jama beberebe afite aba Yohane dɔ ka i bie bu Nyeme nzue. Na wo se bu ka, “Ambere burukɔnufɔm bo am ti ka woom ni, ɲma seeri am ka am ɲmati fite suicin kekereke n bo Nyeme sufa ba am dɔ n nu a?” 8 Am yo sakpa bo i kere ka am akaaki am wo. Na má am sunsun ka, Abraham ti am na dɛɛ ti, na am koro fite nyini suicin n nu. M suse am wo lɛɛ, ka, Nyeme koro ma ahin yabuɛm ni kaaki nbaam ma Abraham. 9 Nyeme asi i samba n nana ase baka kere bu na i kpie i ji sin nu, yiri bo i suuwa ti má kpa ni.”

10 Na jama n abisa Yohane ka, “Ye ya yo se wo lɛɛ kisa n a?” 11 Na wo bo bu nu ka, “Sɔnɔ kere bo i la tanlɛɛ nnyɔ, i mi ma sɔnɔ bo i la má be n kun, na bo i la diire gusu yo sɔ.” 12 Na lampodefɔ nbem aba i dɔ ka i bie bu Nyeme nzue, na ba bisa i ka, “Ya Kerefɔ, ye ya yo se wo?” 13 Na wo se bu ka, “Má am de ɲwaa kɔ tara kabo i ti ye ni ka am de ni.” 14 Na soja nbem gusu aba i dɔ aba abisa i ka, “Ye yere di, ya yó se wo?” Na wo se bu ka, “Má am mie be de ɲwaa i dɔ, na má am tun be nzuin. Am ma am nyunu yi am ɲkatɔ.”

15 Na minɛm bo bu tana niɛ Kristo n atin nu ka i ba ni, yiri Tiidefɔ n bo Nyeme ase ka i súnma i ni, bu sunsun ka, beni, kisa Yohane ti Kristo Tiidefɔ n a. 16 Yohane siiri nyini dɛɛ ti, na wo se bu ka, “Mini sufa nzue bie am a, na am yo casi, ama, bo i tara m fieo wo m sin suba. M ti kaan ni bo m dodo i. Yiri fá Awiewie Casi n ni sin yo am casi a, kabo sɔnɔ bie nzue na i yo casi ni. 17 I bita i ɲgani bakiti fieba suba, na i bá bakiti yi ɲgani mbaa n busu gɔ i bondo nu, na i nya yára kunkun n sin n bo i je na i nɔ má n nu.”

18 Sɔ ye Yohane kaanri labari kpa n kereeri minɛm a, na wo jɔjɔ jɔre dɔngu ase bu ka bu kaaki bu wo. 19 Ama, na Yohane akan Feme Herode ndie ka wo fa i gɔɔ yi Herodiya aja i hun ɲgɔɔ su, na wo kaaki ayo sa ɲgbɛɲgbɛɛn beberebe. 20 I satie bo i ti tie tara i kere n la ka i taraari Yohane nyiiri i dansaraka a.

Kabo Yohane bieeri Yesu Nyeme nzue barasu ni

21 Sangba bo Yohane bieeri minɛm Nyeme nzue ni, na wo bie Yesu gusu. Bu bieeri i wieeri, na i susere Nyeme ni, dɔ na aɲgoro n ateke, 22 na Awiewie Casi n ajura aba atana i ɲu ka tiiwa dɛɛ su. Na wo ti akonvi be ɲga aɲgoro, i ɲa, “Wɔrɔ ti m wa a, m koro u agaya, m ahore ajɔ u ɲu.”

Yesu Kristo nam duma yaa

23 Sangba bo Yesu boori i juma n bu ni, nyini sangba i la afɔ aburasan. Mine yo sunsun ka i si la Yosefu bo i ti Heli wa n wo, na Heli si la 24 Matati, na Matati si la Levi, na Levi si la Meleki, na Meleki si la Yanayi, na Yanayi si la Yosefu nyinga n bo 25 i si la Matatiya ni, na Matatiya si la Amosi, na Amosi si la Nahumu, na Nahumu si la Esili, na Esili si la Nagayi, 26 na Nagayi si la Maati, na Maati si la Matatiya nyinga n bo i si la Semeni ni,

na Semeni si la Yoseki, na Yoseki si la Yoda, ²⁷ na Yoda si la Yowanani, na Yowanani si la Resa, na Resa si la Zorobabeli, na Zorobabeli si la Salatiyeli, na Salatiyeli si la Nieri, ²⁸ na Nieri si la Meleki nyinga n bo i si la Adi ni, na Adi si la Kosamu, na Kosamu si la Elimadamu, na Elimadamu si la Eri, ²⁹ na Eri si la Yosuwu, na Yosuwu si la Eliyeza, na Eliyeza si la Yorimu, na Yorimu si la Matati nyinga bekun, na nyini Matati n si la Levi nyinga bekun, ³⁰ na nyini Levi n si la Simeyon, na Simeyon si la Yuda, na Yuda si la Yosefu nyinga n bo i si la Yonamu ni, na Yonamu si la Eliyakimu, ³¹ na Eliyakimu si la Meliya, na Meliya si la Menna, na Menna si la Matata, na Matata si la Natani, na Natani si la Feme Davidi, ³² na Feme Davidi si la Jese, na Jese si la Yobedi, na Yobedi si la Boosi, na Boosi si la Sala, na Sala si la Naasoni, ³³ na Naasoni si la Aminadabu, na Aminadabu si la Adimini, na Adimini si la Arani, na Arani si la Hesarom, na Hesarom si la Farese, na Farese si la Yuda nyinga n bo ³⁴ i si la Jaköbu ni, na Jaköbu si la Izaki, na Izaki si la Abraham, na Abraham si la Tara, na Tara si la Nakoro, ³⁵ na Nakoro si la Seruku, na Seruku si la Ragawu, na Ragawu si la Faleki, na Faleki si la Ebera, na Ebera si la Sala nyinga bekun, ³⁶ na nyini Sala n si la Keena, na Keena si la Arafakadi, na Arafakadi si la Semu, na Semu si la Nowa, na Nowa si la Lameki, ³⁷ na Lameki si la Matusala, na Matusala si la Henoki, na Henoki si la Yareti, na Yareti si la Maleheeli, na Maleheeli si la Keena nyinga bekun, ³⁸ na Keena n si la Enosi, na Enosi si la Seti, na Seti si la Adam, na Adam si la Nyeme.

4

Kabo Sitana yoori Yesu na i nie ni

¹ Awiewie Casi n woori Yesu ñu agaya, na wö fite Yodan kunma n awöre n nu, na Awiewie Casi n afa i ako boro kpantain n nu kò sukere i atin. ² I woori dö ceen aburana, na Sitana ayo i na i nie ka, i yó yiri Sitana n dee koroowa, nzen i yó má i. Nyini ceen aburana n kere ni, wö di má pui, nyini dee sin, na ahöe aba ati i. ³ Na Sitana n ase i ka, “Nzen a ti Nyeme Wa, se ahin yabue n na i kaaki diire.” ⁴ Ama, na Yesu abo i nu ka, “Ba kere i Nyeme Jöre Kadasi n nu ka, má diire ñgumi ma söno ñgöo a.”

⁵ Na Sitana afa i afun ako angoro lenlenge, na i nyumbaambaa n nu bere, na wö kere i durunya n nu asien n kere. ⁶ Na wö se i ka, “Wö ye m má a nie ahin asien n kere su a, na m fá bu ajekem kere ma u, dama Nyeme afa i kere awura m saa nu, na mini gusu koro fa ma söno kere bo m koro. ⁷ Nzen a kutu suuri m, m fá nyinim kere ma u.” ⁸ Na Yesu ase i bekun ka, “Ba kaaki akere i Nyeme Jöre Kadasi n nu ka, ‘Kutu Micera u Nyeme ni, na a su yiri ñgumi.’”

⁹ Na Sitana n akaaki afa Yesu ako Yerusalem mie kpiri n nu, na wö fa i ako ajina Nyeme Sereebiri Awuru n tii su lenlenge, na wö se i ka, “Nzen a ti Nyeme Wa, fite fen ti to asienngu na m nie. ¹⁰ Dama ba kere i Nyeme Jöre Kadasi n nu ka, ‘Nyeme má i meretekem nöo ka bu nie u dika na bu kanda u.’”

¹¹ Ba kaaki akere i ka, ‘Bu fá bu saa so u nu, na má u jaa bo yabue be.’”

¹² Ama, na Yesu akaaki ase i ka, “Ba kaaki akere i Nyeme Jöre Kadasi n nu ka, ‘Má a yo Micera Nyeme n na a nie kabo i yiko ti barasu.’”

¹³ Sanga bo Sitana n yoori Yesu yoowa barasu n kere na i nie i ni, na wo ko ayaki Yesu ka.

Kabo Yesu boori i juma bu Galili awore n nu ni

¹⁴ Na Yesu akpie i nyi ako Galili awore n nu, ni Awiewie Casi n dee yiko nu. Na i labari abara aye nyini awore n kere pepere nu. ¹⁵ Na wo kere minem Yudafo m tientienbunoo soom nu, na sono kere akansi i.

Kabo Yesu na Nyeme noanie kanfo la ma jirima i bosu ni

¹⁶ Na Yesu ako Nazareti mie n nu, do ye bu taari i a, na wo nyi, na Yudafo m Numiyi ceen n be, na wo ko bu tientienbunoo soom n nu, kabo i nati ko ni. Na wo yasu ajina ka i kan Nyeme Jore Kadasi ni, ¹⁷ na ba fa Nyeme noanie kanfo Esaya dee kadasi n ama i. Na wo teke i, na wo nie anju awore n bo ba kere i nu ka,

¹⁸ "Micera n Awiewie n wo m do,

dama wo yi m ka m kan labari kpa n kere jaarifom.

Na wo sunma m ka m ko minem bo ba tara bu domuem n do,

na m se bu ka m ba de bu tii ji,

na m ko anyinsinm do,

na m se bu ka m ba teke bu nyumbaa,

na m ko minem bo bu bita bu mie n do,

na m se bu ka m ba de bu tii ji,

¹⁹ na m bo ndoori ka,

afon n nu Micera ni ma i minem di i ahoro ma."

²⁰ Na Yesu akan awie, na wo kata Nyeme Jore Kadasi n su, na wo fa ama i bitafo ni, na wo tana. Na minem kere bo bu wo tientienbunoo soom n nu n afa bu nyumbaa akpama i ju. ²¹ Na wo se bu ka, "Nyuma dee ceen n nu, ahin Nyeme Jore Kadasi n bo ma kan i na am ati i ni, ayo yiiwa." ²² Na sono kere akan kpa ama i, na ba yo alekutura kabo i noanie jooowa n ti kpa barasu ni, na ba bisa bu nju nu ka, "Ma Yosefu wa n lee?"

²³ Na Yesu ase bu ka, "M si tenle ka am bo m ahin anyundera ni ka, 'Ayirifo, tuntun u ju.' Na am se m ka, 'Sam n bo ya tiiri ka a yoori bu Kapenam mie kpiri n nu ni, yo bu u bosu fen gusu na ya nie.'" ²⁴ Na Yesu akaaki ase bu ka, "Nahore ye m suse am n a, Nyeme noanie kanfo la ma jirima haari kaan so mmoo i bosufom do. ²⁵ Am tenge su kabo Nyeme noanie kanfo Eliya dee sanga n na nzue ato ma afon nsan ni kpaaki nu, na ahoe bambaka too ri ni. I ti nahore wo ka, nyini sanga, kunafo m beberebe woori Yisareli asien n su, ²⁶ ama, Nyeme asunma ma Eliya nyini kunafo m be do, se i sunmaari i kunafo kun be do a, i wo mie be bo bu fere i ka Zarefati na i ti ma Yudafo m mie kpiri n wo, i wo Sidon dee awore n nu wo. ²⁷ Sasu bekun, Nyeme noanie kanfo Elisa dee sanga, i ti nahore wo ka kokobi yo taraari minem beberebe Yisareli asien n su, ama, Nyeme ama wo tuntun ma bu kun n kpein mmoo, se i tuntuunri kokofa kun be wo, bu fere i ka Naama, i ti ma Yudafo, i fite Siriya awore nu wo."

²⁸ Minem bo bu wo soom n nu n tiiri so ni, na yaa ati bu agaya. ²⁹ Na ba yasu aso i nu, acin i afite mie n nu ako kpere n bo mie n wo su ni, ka bu fa i ji buka n bu asienju. ³⁰ Ama, na wo nati asin jama n afien ako.

Kabo Yesu fon yiiri ajini sono be ju ni

³¹ Do na wo ko mie kpiri n bo bu fere i ka Kapenam na i wo Galili awore n nu ni, na Numiyi ceen ni, na wo ko awura bu tientienbunoo soom n nu sukere minem. ³² Na ba yo alekutura fa ko i kereewa n su, dama i jooowa

n la yiko. ³³ Na sɔnɔ be wo tientienbunɔɔ sɔɔ n nu dɔ, ajini wo i ɲu, na wo bo awie kpa ase ka, ³⁴ “Oi, Yesu Nazaretifo, a koro nzu ya nu fen a? A ba ka a ba yo ya ɲgbɛɛn wɔ, nzen se? M si u sa, wɔrɔ ti sɔnɔ casi bo Nyeme asunma u n a.” ³⁵ Na Yesu atien ajini n ɲu ase ka, “Mɔ u nɔɔ bere na a fite yaki sɔnɔ ni.” Na ajini n akpisi sɔnɔ n abo asiɲgu jama n kere nyunu, na ba fite ayaki sɔnɔ ni, ba ma má i mandim be. ³⁶ Na minem kere ayo alekutura, na ba bisa bu ɲuɲu nu ka, “Nzu alekutura nɔanɛ jɔjɔowa n la ahin? Dama i la yiko nahɔre su bo i koro ma ajinim nɔɔ na bu fite yaki sɔnɔ.” ³⁷ Na i labari n abara aye nyini awɔre n kere nu.

Kabo Yesu tuntuunri tukpakifɔm beberebe Simon dika ni

³⁸ Na Yesu afite tientienbunɔɔ sɔɔ n nu, na wɔ kɔ awura Simon dika, na ba se i ka Simon sibara la má i ɲu, yakɔkɔ abo i agaya. ³⁹ Na Yesu ako ajina i bi, na wɔ ma yakɔkɔ n nɔɔ ka i fite yaki bara ni. Na wɔ fite ayaki i, na bara n akaba ayasu, na wɔ kɔ ayo diire ama bu.

⁴⁰ Na naasɔ dika bibiri sanɲa, na minem n afa tukpaki barasu barasu fɔm kere aba Yesu dɔ ka i tuntun bu, na wɔ fa i saa anana bu ɲu, na bu kere anya laifɛ. ⁴¹ Na wɔ fɔn ayi ajinim n gusu afite minem beberebe ɲu, na ajinim n acindi, na ba se i ka, “Wɔrɔ ti Nyeme Wa n a.” Ama, na Yesu akan ajinim n ndie, wɔ du má su na bu jɔjɔ, dama bu si ka yiri ti Kristo n a, Tiidefo n bo Nyeme ase ka i súnma i ni.

Kabo Yesu kɔ kaanri Nyeme jɔre Yudaɔm tientienbunɔɔ sɔɔm nu ni

⁴² Ale ba ciinri, na Yesu afite miɛ n nu akɔ awo awɔre be nu i ɲgumi. Na minem n akɔ i nienɛ, na sanɲa bo bu kɔ ɲuuri i ni, na ba kpini atin kabo bu yo na má i kpaaki yaki bu. ⁴³ Ama, na wɔ se bu ka, “Wɔ yo daka ka m kɔ miɛ nyingam gusu su na m kɔ kan labari kpa fa kɔ Nyeme femeya n su kere bu gusu, dama ka nyini ti ye Nyeme sunmaari m a.” ⁴⁴ Nyini ti, na wɔ bara aye sukan Nyeme jɔre ni, tientienbunɔɔ sɔɔm nu bu awɔre n kere nu.

5

Kabo Yesu fereeri i susufɔ ciciri su dɛɛm ni

¹ Cɛɛn be na Yesu jina Genesareti kunma kpiri n nɔɔ su, na jama beberebe abara aye i, na bu susun bu benɲu ka bu ju i bi na bu ti Nyeme nɔanɛ ni. ² Dɔ na wɔ ɲu lee nnyɔ nbem ka bu wo kunma n nɔɔ su. Jombaa tarafɔm n afite ayaki leem wo bu diendiɛm ɲmisi su. ³ Na Yesu awura lee n kun nu, nyini lee n ti Simon dɛɛ wɔ, na Yesu ase Simon ka i sun lee n kɔ kaan. Na Yesu atana lee n nu, na i sukere jama ni.

⁴ Sanɲa bo i kere wieri ni, na wɔ se Simon ka, “Sun lee n na i kɔ ɲgongɔ n nu, na am sandi am diendiɛm na am tara jombaa.” ⁵ Na Simon ase Yesu ka, “M Mɔfɔ, ya yo jumam ni anyumboro anuma kɔngue kere fa ba ju haari ni kisa, ya tara má pui. Ama, nzen a se sɔ yiri, m fá diendiɛm n sandi nzue n nu.” ⁶ Na ba fa diendiɛm n asandi nzue n nu, na ba tara jombaa beberebe haari má diendiɛm ni jinaari ka bu sɔn ɔ. ⁷ Nyini ti, ba fa bu saa apaati bu lamɔkɔm bo bu wo lee nyinga n nu ka bu ba buka bu. Na ba yiɲi jombaam n agɔ lee nnyɔ n nu, na ba yi haari leem ni jinaari ka bu sa nzue wɔ. ⁸ Sanɲa bo Simon Petoro ɲuuri nyini sɔ ni, na wɔ kɔ akutu Yesu jaa bu ase i ka, “M Mibie, cinsi m bi bere, dama m ti satieyofɔ ɔ.” ⁹ Deke bo i ma i seeri sɔ n la ka, i ni nyingam kere ayo alekutura fa kɔ kabo ba tara nyini jombaa beberebe n barasu ni. ¹⁰ Yakobo ni Yohane

gusu woori bere, bu si la Zebedi, bu ni Simon sanja tara jombaa n a. Na bu gusu ayo alekutura. Na Yesu ase Simon ka, “Má a ma sere ti u, fite kisa fa kò, m má a sutiën minëm nõõ ma m, kabo a tara jombaa ni.” ¹¹ Na ba cin ayi lee n afite nzue n aheme, na ba yaki deke n kere bere, na ba su i su.

Kabo Yesu tuntuunri kokofò be ni

¹² Ceen n be sò ò, na Yesu wo mië be su, kokofò be wo nyini mië n nu. Sanja bo i ñuuri Yesu sò ni, na wò ñmati aba akutu, na wò fa i nyunu abutu asienjgu, na wò sere i jande ka, “M Mibie, nzen a koro ka a ma m nya laifie, a koro ma m nya i.” ¹³ Na Yesu atenjege i saa anana i ñu na wò se i ka, “M koro. Nya laifie.” Na kokobi n akaba ayaki sònò ni. ¹⁴ Na Yesu abòbò i ase i ka, “Má a se ka a se be, ama, kò na a kò fa u ñu kere Nyeme sayoowa dõnguyofò ni, na a kò yo yoowa n bo Moyisi yo kereeri dawafòm ni, dama nyini kere minëm ka a nya u ñu a.”

¹⁵ Ama, haari ni nyini mmòò, na i labari abara aye deke n kere, na minëm aba i dõ na bu ba ti Nyeme jore kaanwa n na i tuntun bu tukpaki barasu barasu kere na bu nya laifie. ¹⁶ Ama, yiri ba yo, i yi i ñu kò deke bo minëm wo má n wò, na i kò sere Nyeme.

Kabo Yesu tuntuunri sònò bo i saam ni i jaam awu ni

¹⁷ Ceen n be sò ò, Yesu wo minëm kere su, na Farasifòm nbem, ni Yuda-fòm Nyeme nõanie kerefòm tana bere. Bu fiteeri mië miëm bo bu wo Galili ni Yudiya awõrem n nu, ni Yerusalem mië kpiri n nu baari a. Na Nyeme ama Yesu yiko bo i tuntun tukpakifòm na bu nya laifie. ¹⁸ Dõ na mine nbem asò sònò be ni i dasu aba, i saam ni i jaam awu, na bu sumie bu nyi ka bu fa i wura sò n nu wò, na bu fa i se Yesu nyunu. ¹⁹ Ama, jama n sunnuuri sò n dëe ti, ba koro anya má atin. Nyini ti, na ba fa i afun sò n tii su, na ba fiiti anya fofoe, na ba cõõndi i ni i dasu n kere ase jama n afien Yesu nyunu. ²⁰ Yesu ñuuri kabo bu yoori i yarada n sò ni, na wò se bie n ka, “Ma fa u satie ace u.”

²¹ Na Nyeme nõanie kerefòm ni Farasifòm n abisa bu ñuñu nu ka, “Sònò bònò la ahin bo i jòjò wura Nyeme ñgasi nu sò a? Be wo má bere bo i koro fa minëm satie ni bu ñgasi ce bu, sin Nyeme ñgumi ñu.” ²² Na Yesu afa nu fa kò bu sunsunnì bo bu bita i n su, na wò se bu ka, “Nzu ti ye am bita nyini sunsunnì ni am ahore su a? ²³ Bònò ti kekereke a, bo m se ka, ‘Ma fa u satie ace u,’ nzen, ‘Yasu nati’ n a? ²⁴ M kére am ka mini Adamande Wa n la yiko durunya n nu bo m fa satie ni ñgasi ce.” Na wò se sònò n bo i saam ni i jaam awu n ka, “Wòrò, yasu fa u dasu n na a kò awuru.” ²⁵ Kpenja na sònò n ayasu jama n kere nyunu, na wò fa i dasu n na i sukansi Nyeme sukò awuru. ²⁶ Na bu kere ayo alekutura agaya, na ba kansì Nyeme, na sere ati bu, bu ña, “Nyuma, ya ñu alekutura sam bo ya nya ñu má i.”

Kabo Yesu fereeri Levi ka i ba su i su ni

²⁷ Nyini sin, na Yesu afite bere, na wò kò anu lampodefò be bo bu fere i ka Levi, i tana i juma yooibiri. Na Yesu ase i ka, “Yasu bra na a ba su m su.” ²⁸ Na Levi ayaki deke n kere, ayasu asu i su.

²⁹ Na Levi afa Yesu akò i dika, na wò kò ayo di ni nu bambaka, na ba tien bu nõõ adi, bu ni lampodefòm beberebe, ni mine nyinga nbem. ³⁰ Na Farasifò nbem ni Nyeme nõanie kerefòm nbem bo bu ni bere wo ni, anjuntuti i, na ba bisa Yesu susufòm n ka, “Nzu ti ye am ni lampodefòm, ni

satieyofom sanja di diire na am nu nzan a?" ³¹ Na Yesu ase bu ka, "Minem bo bu la laifie n koro má ayirifo, má ka bo bu la má laifie ni koro a. ³² Ma ba má ka m ba fere minem bo bu na bu yo sa bo i kó atin su Nyeme do n wo, ama, m baari ka m ba fere satieyofom wo, na bu kaaki bu wo."

Kabo Yesu kereeri nwo cici jore ni

³³ Na mine nbem aba abisa Yesu ka, "Nzu ti ye Yohane dee susufom ni Farasifom deem cici bu nwo na bu sere Nyeme sanja kere sanja ye u deem bere di ye bu nu a?" ³⁴ Na Yesu abo bu nu ka, "Am koro mie má konyafom ka bu cici bu nwo, sanja bo konyafan n toko wo bu do ni. ³⁵ Ama, sanja suba bo bu ba yi konyafan n fite bu nu, nyini sanja n ye bu nya cici bu nwo a."

³⁶ Na Yesu abo ahin mieenu n akere bu, i na, "Sono koro fa má sanvuin fofore kpa to má tani dawa kunma, nzen i yoori so, sanvuin fofore ni son dawa n wo, i to má su. ³⁷ I kaaki ti so o bekun ka be koro fa má nzan nyiwa fanjafogó gó má dundu dawa bebete nu, nzen i yoori so, dundu ni tie wo, na i ká ngbeen, na nzan n kere songgi butu. ³⁸ Ama, i ti ye ni ka bu fa nzan nyiwa fanjafogó gó dundu fofore biiwa nu. ³⁹ Sono nya nuuri nzan nyiwa wieeri, i koro má nzan mone kun. A ti ka i na, 'Nzan nyiwa ni ti kpa a.' "

6

Kabo Yesu jajo fa koori Nnumiyi ceen jore ni

¹ Nnumiyi ceen be, na Yesu ni i susufom ni sunati sin alembaa fie be nu, na i susufom n abubu be, na ba nunuka i bu saa nu akpese. ² Na Farasifo nbem abisa bu ka, "Nzu ti ye am suyo so a? Nyeme noanie kpamaawa n kere ka má be yo so Nnumiyi ceen." ³ Na Yesu abisa bu ka, "Am nya kan má Nyeme Jore Kadasi n nu, kabo Feme Davidi yo yoori sanja bo ahoe tiiri i ni i minem na ba si má kabo bu yo n wo, nzen se? ⁴ Ahoe n ti, na wo ko awura Nyeme Sereebiri Awuru n nu, na wo fa kpono n bo ba fa ama Nyeme ni, na wo di, na wo ma i minem be. Ama, am si ka ya dee atin n su, Nyeme sayoowa dongyoyofom ngumi di nyini kpono n a." ⁵ Na Yesu ase bu ka, "Mini Adamande Wa ni ti Nnumiyi ceen n Mibie a."

Kabo Yesu tuntuunri sono asaa fuin be Nnumiyi ceen ni

⁶ Na Nnumiyi ceen n be bekun, na Yesu ako awura tientienbunwo so n nu, na wo kere minem. Sono be woori do, i saa fomboro awu. ⁷ Nyeme noanie kerefom ni Farasifom nbem woori do, na ba koro ka bu nya nge bo bu so Yesu na bu nya i taraabiri. Nyini ti, ba tu bu nyumbaa anie Yesu, na bu nie ka i tuntun sono asaa fuin n Nnumiyi ceen ni, nzen i tuntun má i. ⁸ Ama, na Yesu asi bu sunsunni bo bu bita i, na wo se sono asaa fuin n ka, "Yasu bra ba jina afien fen." Na sono n ayasu ako ajina do. ⁹ Na Yesu abisa bu ka, "Ya dee atin n su, atin wo nu ka ya yo sakpa Nnumiyi ceen ni, nzen ya yo satie wo? I kaaki ti ye ni ka ya de ngoo, nzen ya kun wo?" ¹⁰ Na Yesu anie bu nyunu abara aye, na wo nya ase sono asaa fuin n ka, "Tenge u saa ni." Na sono n ayo so, na i saa n ayo fanja bekun. ¹¹ Na yaa ati bu agaya, na ba bo i bu afa sesesu kabo bu yo Yesu barasu.

Kabo Yesu yiiri mine buru ni nnyo ka bu yo i jaramasam ni

¹² Nyini sanja n na Yesu afun ako buka be su ka i ko sere Nyeme, na wo sere Nyeme nyini kongue n kere. ¹³ Sanja bo ale ba ciinri ni, na wo fere

i susufom ni, na wo yi bu nu, buru ni nnyo, na wo fa bu ayo i jaramasam. ¹⁴ Bere la Simon bo Yesu tuunri i duma ka Petoro ni, ni i niema bo bu fere i ka Andere ni, ni Yakobo, ni Yohane, ni Filipu, ni Batolomeyo, ¹⁵ ni Matio, ni Tomasi, ni Yakobo bo i si la Alafeyo ni, ni Simon bo i tu ngonni fa ko i asien su ni, ¹⁶ ni Yudasi bo i si la Yakobo ni, ni Yudasi Isikariyoti bo i ba tooiri Yesu ni.

Kabo Yesu kaanri Nyeme jore na i ma tukpakifom nyaari laifie ni

¹⁷ Na Yesu ni i jaramasam n acoundi buka n aba ajina awore be nu, i susufom nyingam beberebe woori do, ni jama beberebe. Bu fiteeri Yudiya dee awore n kere nu wo, ni Yerusalem mie kpiri n nu, ni Tiro ni Sidon awore n bo i wo tieku n noo su ni. ¹⁸ Bu baari ka bu ba ti i kereewa n wo, na i tuntun bu, na minem bo ajinim wo bu nu kere bu yaari n gusu aba, na wo tuntun bu, na ba nya laifie. ¹⁹ Minem kere boro bu nyi wo, na bu fa bu saa kan i, dama yiko fite i do ye bu kere nya laifie a.

Kabo terefie ni anyumboro ti barasu ni

²⁰ Na Yesu anie i susufom, na wo se bu ka,
 “Amberε bo am ti yaarifom ni,
 terefie wo am do,
 dama Nyeme femeya n ti am dee wo.

²¹ Amberε bo ahoe ati am kisa ni,
 terefie wo am do,
 dama Nyeme ba ma am akunnuyi.
 Amberε bo am ahore asaaki kisa ni,
 terefie wo am do,
 dama Nyeme ba ma am ahoreda.

²² Amberε bo minem ba kpo am, na bu ke te am, na bu kpie am nzuko, na bu saaki am duma ka am ti satieyofom ni, nzen i kere fite ka mini Adamande Wa n dee ti, terefie wo am do. ²³ Bu ba yoori am so, am ma am ahore jo, na am tutu am kom. Dama am ba nya nkato bambaka Nyeme do. Kabo bu nam yo yoori dawa dee Nyeme noanie kanfom n lee.

²⁴ Ama, amberε bo am la ajekε beberebe kisa ni,
 am ba nu anyumboro bambaka,
 dama am adu mo ayo am koroowa n dee ti.

²⁵ Amberε bo am adi na am kunnu ayi kisa ni,
 am ba nu anyumboro bambaka,
 dama ahoe ba ti am.

Amberε bo am siri kisa ni,
 am ba nu anyumboro bambaka,
 dama am ba sun haari na am ba nya ma nyunvuin.

²⁶ Amberε bo sono kere kansu am ni, am ba nu anyumboro bambaka,
 dama so ye bu nam yo kansuiri korefom n bo bu yo bu nu ka bu ti Nyeme noanie kanfom n a.”

Kabo i ti ye ni ka ya koro ya kprofom barasu ni

²⁷ Na Yesu ase bu ka, “Ama, m se amberε bo am suso am sui na am ti n wo lee ka, am koro am kprofom, na am yo sakpa ma bo bu yo am satie ni. ²⁸ Minem bo bu jjo noanie tie go am nu ni, am yo bu kisi, na minem bo bu kere am wuwuruwa ni, am kaaki sere Nyeme ma bu. ²⁹ Nzen be fin u nyoonu, kaaki bue nyinga n gusu ma i na i fin i buka su, na nzen be de u tanlee bambaka, kaba fa u tanlee kaan n bo i wo i bu mmoo n buka i su.

³⁰ Sónò kéré bo i sere u deke be, má a kpié i, na sònò kéré bo i fa u deke be, má a bisa i busu kun. ³¹ Kabo am koro ka minem yo ma am ni, am yo i sò ma bu.”

³² Na wò kaaki ase bu ka, “Nzen am nya koroori minem bo bu koro am ni ngumi, i kansì la bònò ò, ye am ba nya i a? Dama haari satieyofòm mmòò yo sò ò. ³³ Na nzen am nya yoori sakpa maari minem bo bu yo sakpa ma am ni, i kansì la bònò ò? Dama haari satieyofòm mmòò yo sò ò. ³⁴ Na nzen am fa nenje fié minem bo am sunsun ka bu bá tò am kaari ni, i kansì la bònò ò, ye am bá nya i a? Dama haari satieyofòm mmòò fié bu benju satieyofòm wò, na bu bá de i ñusu sò. ³⁵ Ama, wò yo daka ka am koro am kpòfòm, na am yo sakpa ma bu, na má am fié be nenje be, na am sunsun ka i tó kaari. Dò ye am nyá i ñkatò bambaka a, na am yó Micera Nyeme Kpìri ni nbaam. Dama yiri yo sakpa ma satieyofòm, ni bo bu si má aye ni. ³⁶ Am si anjunfò kabo am Si Nyeme si anjunfò ni.”

Kabo Yesu ña má ya jòjò be jòre jaraki i ni

³⁷ Na Yesu ase bu ka, “Má am jòjò be jòre na am jaraki i, na Nyeme gusu dí má am jòre na i jaraki am. Má am ma bu di be jòre cin i sui, na Nyeme gusu dí má am jòre cin má am sui. Am fa minem satie ce bu, na Nyeme gusu fá am dèe ce am. ³⁸ Am ma minem deke bo bu koro, na Nyeme gusu má am. Kabo Nyeme má am n la ka, i fá gongò ònggu susu ma am a, na i yí kò butu. Nyini ti, gongò bo am fa susu ma minem ni, sò ye Nyeme gusu fá susu ma am a.”

³⁹ Na Yesu abo ahin anyunderè n akere bu, i ña, “Anyinsin koro bita má i benju anyinsin kpama, nzen i yoori sò, bu nnyò n kéré kó to kunma nu wò. ⁴⁰ Sónsónfò tara má i kerefò, ama, sanja bo wò ba asónsòn juma n awie, i ni i kerefò n kéré ase wò lèe.”

⁴¹ Na wò bisa bu ka, “Nzu ti ye a nié ñu má yeenzin n bo i wo u niwa nyumbaa nu, ye a nié ñu má yeenzin n bo i wo u dèe nyumbaa n nu a? ⁴² A yo se koro se u niwa ka, ‘Ma m yi wura mbaa n bo i wo u nyumbaa nu ni,’ ye a ñu má yeenzin n bo i wo u dèe nyumbaa n nu n a? Wòòò burukòonufò ni, du mò yi yeenzin n bo i wo u nyumbaa nu n ka, na a nyá ñu asi nyunyumi, na a yí wura mbaa n bo i wo u niwa n dèe nyumbaa nu ni.”

Kabo Yesu ña ya fa minem sayoowa fa si kabo bu ti ni

⁴³ Na Yesu ase ka, “Baka bo i ti kpa su má suuwa tié, na baka bo i ti má kpa gusu su má suuwa kpa. ⁴⁴ Baka kéré suuwa kere kabo baka ni ti barasu a. Sónò kéré si ka a koro titi má damba buwe baka su. A kaaki koro titi má cacabu kpanji baka su. ⁴⁵ Sónò kpa ni i deke kpa kéré bo i bita i ahore su, fa sakpa ba a. Na sònò tié gusu ni i deke tié bo i bita i ahore su, fa satie ba a. Dama dekem bo am sunsun bu am ahore su sanja kéré n ye am jòjò bu a.”

Miènu fa kò ataari tafò nnyò nbem jòre

⁴⁶ Na Yesu akaaki ase ka, “Nzu ti ye am fere m ka, ‘Ya Mibie, ya Mibie,’ ye am yo má deke bo m se ka am yo a? ⁴⁷ Sónò kéré bo i baari m dò, na i tiiri m nòaniem n na i deeri bu na i fa yoori juma, m kére am kabo i mi ti barasu. ⁴⁸ I mi ti ka sònò bo i ña i tá awuru na i fundu kunma ngongò na i kò kpura yabue, na i se sòò n jaa. Wòmbu koro wura na nzuetinm kéré koro yi sandi ba kpura awuru ni, i yó má i pui, dama ataari n ayo

fanja n ti. ⁴⁹ Ama, sɔnɔ kere bo i tiiri m noaniem n na wo de ma i, afa ayo ma juma, i mi ti ka sɔnɔ bo i taari i awuru na wo se ma i jaa yabue su n wo. Wɔmbu ba wurari na nzuetinm kere ba yi kpura nyini awuru ni, na i kaba to fanja su bo i busu nju ma n wo.”

7

Kabo soja kpɛn be yoori Yesu yarada agaya ni

¹ Sangba bo Yesu jɔɔori minem do ni nyini noaniem n kere wieeri ni, na wo ko Kapenam mie kpɛri n nu. ² Na Romafom soja kpɛn be wo do, i la i akoo bo i koro i agaya, wo da tukpaki sukoro ka i wu. ³ Soja kpɛn n tiiri Yesu nga ni, na wo sunma Yudafom nkpienkpienm nbem ka bu ko sere i ka i ba tuntun i akoo n na i nya laifie. ⁴ Na ba ko Yesu do akoo asere i jande ka, “I ti ye ni ka a ba buka ahin soja kpɛn ni. ⁵ Dama i koro ya minem n agaya haari wo ta tientienbunoo sooo ama ya.” ⁶ Do na Yesu asu bu su ako. Sangba bo bu ko dodoori awuru n kaan so ni, na soja kpɛn n asunma i danfom Yesu do, bu ko juuri ni, na ba se i ka, “Ya Mibie, soja kpɛn n na ma a fie u nju. I na i ti kaan ni bo a ba i dika. ⁷ Nyini ti ye i na wo bu ma ka i ti pui bo i ba u nyunu n a. Ama, haari a maari noanie n mmoo, i akoo ni nya laifie. ⁸ Dama yiri mmoo ni i tii wo sɔnɔ saa nu wo, na yiri gusu nya la i dee sojam bo i nie bu su. Na bo i nya se i ka, ‘Ko fen,’ na i ko, na i se nyinga gusu ka, ‘Bra fen,’ na i ba. Na i se i akoo n gusu ka, ‘Yo ahin,’ na i yo i.” ⁹ Sangba bo Yesu tiiri so ni, na wo yo i alekutura, na wo kaaki anie jama n bo bu su i su n na wo se ka, “M suse am wo lee, ka, ma nya anju ma sɔnɔ bo i la yarada agaya ka ahin sɔnɔ n nusu, haari fa sangba ni Yisarelifom mmoo.” ¹⁰ Na minem bo soja kpɛn n sunmaari bu n akpie bu nyi akoo i dika. Bu ko juuri, na ba nju ka i akoo n anya laifie.

Kabo Yesu tengeeri kunafo be wa i yiwee nu ni

¹¹ Nyini sin, wo ce ma, na Yesu akoo mie kpɛri be bo bu fere i ka Nayin n su, i ni i susufom, ni jama beberebe koori a. ¹² Sangba bo i ko na i wura mie n nu ni, kpenja i ni minem aye, sɔnɔ be awu mie n nu, bu susoo i fite na bu ko se i. Sɔnɔ n bo wo wu n ti bara kunafo be wa a, i wa kere la yiri ngumi kpein wo. Na jama beberebe afite mie n nu susu kunafo n su. ¹³ Mibie Yesu n njuuri kunafo n so ni, na anjuno ati i, na wo se i ka, “Ma a sun.” ¹⁴ Na Yesu akoo afa i saa akan dangu n bo fuin n da su ni, na minem bo bu so i n aka ajina. Na Yesu ase ka, “Gbefene, m suse u wo lee, yasu.” ¹⁵ Do na gbefene n ayasu atana na wo joo minem do, na Yesu akaaki afa i ama i ni. ¹⁶ Na sere ati sɔnɔ kere, na ba kansa Nyeme, na ba se bu nju nu ka, “Nyeme noanie kanfo bambaka be aba ya do. Nyeme aba anie i minem busu.” ¹⁷ Sa n bo Yesu yoori i n dee ti, na i labari n abara aye Yudiya awore n kere, ni aworem kere bo bu dodo bere ni.

Kabo Yohane Nyeme Nzue Biefo n sunmaari i susufom Yesu do ni

¹⁸ Sangba bo Yohane dee susufom ba kaanri nyini jorem kere kereeri i ni, na wo fere bu mine nnyoo, ¹⁹ na wo sunma bu Mibie Yesu n do ka bu ko bisa i ka, “Woro ye bu yo seeri ka a ba n a, nzen ya nminda sɔnɔ fofore be wo?” ²⁰ Bu ba juuri Yesu do n na ba se i ka, “Yohane Nyeme Nzue Biefo ni sunmaari ya u do a, na ya ba bisa u ka, ‘Woro ye bu yo seeri ka a ba n a, nzen ya nminda sɔnɔ fofore be wo?’ ” ²¹ Nyini sangba n nu, na Yesu atuntun mine beberebe bo bu la tukpaki barasu barasum, na wo fon ayi

ajinim afite minem ɲu, na wɔ ma anyinsinm beberebe aɲu asi. ²² Na Yesu ase minem bo Yohane sunmaari bu n ka, “Am kpɛ am nyi na am kɔ se Yohane fa kɔ sam bo am ati bu na am aɲu bu ni, ka anyinsinm aɲu asi, wɔbukam akoro anati, kokofɔm anya laifiɛ, asuturim ati asui, minem bo ba wu n atɛɲɛ, na yaarifɔm gusu akoro ati labari kpa ni. ²³ Terefiɛ wo minem bo bu yo m yaarada na bu la má sika be, ni mini n dɔ.”

²⁴ Saɲga bo minem bo Yohane sunmaari bu n kɔ wieeri ni, na Yesu aɲɔɲɔ jama n dɔ, fa kɔ Yohane ɲusu jɔɛ. I ɲa, “Saɲga bo am fite kɔɔri Yohane dɔ boro kpantain n nu ni, am kɔɔri ka am kɔ ɲu nzu wɔ? Am kɔɔri ka am kɔ ɲu sɔnɔ bo i ti ka barankpaati fofoe bo aɲuma n kankan i wɔ? ²⁵ Nzen má nyini, am fite kɔɔri ka am kɔ ɲu nzu wɔ? Am ɲa am kɔ ɲu sɔnɔ bo i wura sutura kpakpa a, nzen sɛ? Ai, am si ka minem bo bu wura nyini suturam na bu di fiɛfiɛ ni, bu wo nfemem dika a. ²⁶ Nzen má nyini, am kɔɔri ka am kɔ ɲu nzu wɔ? Am kɔɔri ka am kɔ ɲu Nyemɛ nɔanie kanfɔ ɔ, nzen sɛ? Eɛn, m suse am wɔ lɛɛ, ka, am aɲu sɔnɔ bo i tara Nyemɛ nɔanie kanfɔ. ²⁷ Dama Yohane ye bu yo kɛɛeri i ɲusu jɔɛ, Nyemɛ jɔɛ Kadasi n nu ka,

‘Nyemɛ ɲa o,

“M dú mɔ sunma m sunmafɔ n na i dú u mɔ,
yiri kɔ yo atin n dɔɲgu se u a.” ’ ’ ’

²⁸ Dɔ na Yesu ase bu ka, “M suse am wɔ lɛɛ, ka, sɔnɔ wo má durunya n nu fɛn bo i tara Yohane. Ama, sɔnɔ kɛɛ bo i ti kaan Nyemɛ fɛmɛya n nu n tara yiri Yohane.”

²⁹ Minem kɛɛ bo bu woori dɔ ni, haari fa saɲga ni lampodefɔm ni, tiiri kabo Yesu jɔɲɔri ni, na ba soro su ka Nyemɛ dɛɛ atin ni ti atin nahɔɛ a, dama bu ma Yohane adu mɔ abiɛ bu Nyemɛ nzue. ³⁰ Ama, na Farasifɔm ni Nyemɛ nɔanie kerefɔm n akete kabo Nyemɛ kereeri ka bu yo ni, dama ba kete ka má Yohane biɛ bu Nyemɛ nzue.

³¹ Na Yesu ase bekun ka, “Ye m fá nzu fa sunsun kabo nyumafɔ ti a? Bu ti ka nzu wɔ? ³² Bu ti ka nbaatuma kan kanm bo bu tana gɔɔsu wɔ, na bu sufere bu bengɔ, bu ɲa,

‘Ya kan tere ama am, ama, am abo má kereba.

Ya di sɛɛ jue ama am, ama, am asun má.’

³³ Deke bo i ti na m se sɔ n la ka, Yohane Nyemɛ Nzue Biɛfɔ n ba juuri ni, i ciciiri i nɔɔ ɔ, i di má diire, i nu má nzan yiri fieo, nyini ti, na am ase ka ajini wo i ɲu. ³⁴ Ama, mini Adamande Wa n ba juuri, na m ni mine asaɲga adi, na ya saɲga anu, na am ase ka, ‘Am niɛ, ahin sɔnɔ n yiri, i ti ayaakpirifɔ ɔ, na i nu nzan nahɔɛ su. Wɔ tara lampodefɔm, ni satieyofɔm danfoya.’ ³⁵ Tɔ, minem kɛɛ bo bu su Nyemɛ dɛɛ alecira n atin n su ni, bere kere ka i ti nahɔɛ a.”

Kabo Yesu kɔɔri Simon Farasifɔ n dika ni

³⁶ Farasifɔ be yo baandiiri Yesu a, ka i bra i dika ba di diire, na Yesu ako i dika, na wɔ kɔ awura ka i di diire ni. ³⁷ Bara be woori nyini miɛ n nu, i ti satieyofɔ ɔ. I tiiri ka Yesu wo Farasifɔ n dika n wo diire di su, na wɔ fa tulaalɛ nvanvani tuwa kun aba. ³⁸ Na wɔ ba ajina Yesu jaa dika, na i susun, na i nyunvuin sugɔ Yesu jaa su. Na wɔ kutu aso i jaa nu, na wɔ fa i tiɲmie tintiin anunuka i, na wɔ kaaki tulaalɛ n ago i jaa nnyɔ n kɛɛ su. ³⁹ Na Farasifɔ n bo i baandiiri Yesu n ase i kunnu ka, “Ahin sɔnɔ n ti má Nyemɛ nɔanie kanfɔ, nzen má i ti Nyemɛ nɔanie kanfɔ, má i si ahin bara n bo i sufa i saa kan i n kabo i woowa ti barasu, má i si ka i ti satieyofɔ.”

⁴⁰ Dɔ na Yesu ase i ka, “Simon, m koro ka m se u jɔre be.” Na wɔ se Yesu ka, “Ya Kerefo, se m.” ⁴¹ Na Yesu ase i ka, “MINE nnyɔ nbem wo bere a, na ba kɔ nɔwaafo be dɔ akɔ afe nɔwaa. Kun dɛɛ kaari n sunnu má, ama, kun n yiri dɛɛ sunnu, i kpaaki ciciri dɛɛ n nɔsu buru. ⁴² Bu mine nnyɔ n nu, bu be mmɔ akoro atɔ má nɔwaafo n kaari ni, nyini ti, na wɔ yaki nɔwaa n ace bu. Ye a sunsun ka bu mine nnyɔ n nu, nɔma koro nɔwaafo n agaya?” ⁴³ Na Simon abɔ Yesu nu ka, “Mini dɔ, m sunsun ka sɔnɔ n bo i kaari sunnuuri ni, yiri koro i agaya.” Na Yesu ase i ka, “A la nahɔre.” ⁴⁴ Dɔ na Yesu ace anie bara ni, na wɔ se Simon ka, “M nɔ a nɔ ahin bara ni e? M ba juuri u dika n nu ni, a ma má m nzue ka m nɔmisi m jaa, ama, yiri afa i nyunvun anɔmisi m jaa, ye wɔ fa i tiɔnɔm n anunuka m jaa n na i wu. ⁴⁵ Bekun, a biti má m na a yo m anse ni ba mmɔ, ama, kabo m ba juuri, yiri akere kabo i koro m, wɔ yaki má m jaa so nu. ⁴⁶ A fa má nɔguin ka a kpakpa má m tii, ama, yiri afa tulaaleɛ akaaki agɔ m jaa su. ⁴⁷ Nyini ti, m suse u wɔ lɛɛ ka, i satie sunnu ye Nyeme afa i kere ace i a, nyini dɛɛ ti, wɔ kere m i koro agaya. Ama, sɔnɔ bo i satie sunnu má na Nyeme afa ace i a, i mi koro mmɔ sunnu má.” ⁴⁸ Dɔ na Yesu ase bara n ka, “Ma fa u satie kere ace u.” ⁴⁹ Mine nyɔngam n bo bere gusu tana wo diire n di su n tiiri sɔ ni, na ba bisa bu nɔnɔ nu ka, “Nɔma la ahin sɔnɔmbiri n bo i koro fa minem satie ce bu a?” ⁵⁰ Na Yesu akaaki ase bara n ka, “Yarada n bo a yo m ni, nyini ma a nɔ u tii a. Kɔ awuru ni ahoreda.”

8

Kabo nbara nbem bukaari Yesu barasu ni

¹ Nyini sin na Yesu ajɛngbe mie kpirim, ni aheme aheme miem su, na i sukan labari kpa n fa kɔ Nyeme femeya n su. I ni i susufɔ buru ni nnyɔm ni kɔori a. ² Na nbara beberebe nbem gusu asu i su. Bu nbem ye i tuntuunri bu tukpaki barasu barasu n a. Bu kun ye i fɔn yiiri ajinim nso fiteeri i nɔ n a, bu fere i ka Mariya Magadalafo ni, ³ ni kun bo bu fere i ka Yowana, na i hun la sɔnɔ be bo bu fere i ka Cusa na i nie Feme Herode dika n kere su ni, ni bara bo bu fere i ka Susanna ni. Nyini nbaram kere fa bu tienɔgu deke bo bu la i wɔ, na ba fa abuka Yesu ni i susufom ni.

Miɛnu fa kɔ kabo dɔdɔrifɔ be sandiiri alembaa ni

⁴ Na jama beberebe atien bu nɔ Yesu dɔ, bu fiteeri mie su mie su baari a. Na wɔ bo bu ahin miɛnu ni, i nɔ, ⁵ “Dɔdɔrifɔ be fiteeri sɔ ɔ, ka i kɔ sandi alembaa. Saɔga bo i wo sandi su ni, na nbem atɔtɔ atin n nɔɔ, na minem atientien su asin, na anumam aba atambu bu ami. ⁶ Na nbem atɔtɔ tieka su, na wɔ fi, wɔ ce má na wɔ waandi, dama niniki awo má asien n bu n dɛɛ ti. ⁷ Na alembaa ni nbem atɔtɔ lɔlɔɛ nu, na lɔlɔɛ n anyi akata i nɔ. ⁸ Ama, na nbem atɔtɔ asien kpa su, na wɔ nyi awura mbaa zɔi zɔi.” Yesu seeri sɔ wieri ni, na wɔ nya atien kpa ase ka, “Bo i koro ka i ti ahin jɔre n bu, i ti ye ni ka i so i sui na i ti.”

Deke bo i ti na Yesu boori bu miɛnu n ni

⁹ Dɔ na Yesu susufom n abisa i nyini miɛnu n bu, ¹⁰ na wɔ bo bu nu ka, “Amberɛ ye Nyeme ama am asi i femeya n nu asiri jɔre kere a, ama, bo ba ka ni, m bobo i miɛnu kere bu a. Adena i yɔ kabo ba kere i Nyeme Jɔre Kadasi n nu ni, ka, ‘Bu nie wɔ, ama, bu nɔ má pui.

Bu só bu sui wɔ,
ama, bu tí má deke n bo bu so bu sui ka bu ti i n bu.' "

Kabo Yesu kereeri miɛenu n bu ni

¹¹ Na Yesu asa su ase bu ka, "Tɔ, miɛenu n bo m boori i n bu yaa. Alembaa n ti Nyeme nɔanie n wɔ lɛɛ. ¹² Alembaa n bo bu tɔtɔɔri atin nɔɔ n la minem bo bu ti Nyeme nɔanie ni, i ce má, na Sitana bá yi i fite bu ahore su, adena má bu yó yarada na bu nyá tiide. ¹³ Alembaa n bo bu tɔtɔɔri tieka su n la minem bo bu ti Nyeme nɔanie n na bu de i ni ahorejɔ, ama, i da má bu ahore su. Bu kaaki ti ka alembaa n bo i bunlui akpama abi má n wɔ. I woori bu dɔ kaan sɔ, na sanja bo kekereke be ba tuuri bu, a ŋu ka ba fa ati. ¹⁴ Alembaa n bo bu tɔtɔɔri lolɔɛ nu n la minem bo bu nya tiiri Nyeme nɔanie ni na bu su i atin su, a ŋu ka bu sunsuni kere wɔ kabo bu yó na bu asiri káta su, na bu nyá durunya n nu ajekem, na bu yó bu koroowa, a ŋu ka Nyeme nɔanie n koro da má bu ahore su na i yo juma. Bu ti ka alembaa bo i bi má n wɔ. ¹⁵ Ama, alembaa n bo bu tɔtɔɔri asien kpa su n la minem bo bu ti Nyeme nɔanie n na bu de i ni bu ahore fofoe nahore su, na bu de i ni bu saa nnyɔ, na bu mindi bita i, na bu fa i yo juma ni."

Kabo sɔnɔ koro so má sin su na i fa fie ni

¹⁶ Na Yesu ase ka, "Sɔnɔ be nya so má fitana su na i fa ganja butu su, wara i fa se gado bu, ama, i fa taka deke su angoro wɔ, adena minem bo bu ba wura awuru n nu n koro ŋu asi. ¹⁷ Deke be wo má bere bo i wo fieɛwa nu na bu bá ŋu má i, deke be gusu wo má bere bo i wo asiri nu na bu bá si má i. ¹⁸ Nyini dɛɛ ti, am si am ŋu sa ni kabo am ti nɔanie n barasu ni. Dama sɔnɔ kere bo wɔ nya deke be Nyeme dɔ na i mi si i bita, Nyeme búka i su wɔ, ama, bo i si má i bita, haari ni nyini kaan n bo i sunsun ka wɔ nya i ni, Nyeme dé i dɔ ɔ."

Minem bo bu ti Yesu ni, ni i ninbaam nahore su n jɔɛ

¹⁹ Na Yesu ni, ni i niemam aba i dɔ, ama, jama sunnuuri i dɔ n dɛɛ ti, ba koro aju má i bi. ²⁰ Na be ase i ka, "M Mibie, u ni, ni u niemam jina dasin koro u." ²¹ Na Yesu ase bu ka, "M ni, ni m niemam la minem bo bu ti Nyeme nɔanie n na bu de i na bu fa yo juma n wɔ."

Kabo Yesu kereeri ka i la yiko tara anjuma ni nzue ni

²² Cɛɛn n be sɔ ɔ, na Yesu ni i susufɔm n awura lee nu, na wɔ se bu ka, "Am ma ya kpɛ kɔ kunma kpiri n buekun dɔ." Nyini ti, na ba yasu na bu kɔ. ²³ Bu wo kɔ su ni, na Yesu adaafi, na anjuma bambaka be ayasu na i subo nzue gɔ lee n nu. Má lee ni suyi ni nzue wɔ, na anyumboro atu bu. ²⁴ Na Yesu susufɔm n ako atenge i, na ba se i ka, "Ya Mɔfo, ya Mɔfo e, ya wu awie." Na Yesu ayasu, na wɔ tien nzue n ni anjuma n bo i subo n ŋu, na ba tara, na dika n atara jum. ²⁵ Dɔ na Yesu ase i susufɔm ni ka, "Nzu ti ye am yo má m yarada a?" Na ba yo alekutura na sere akaaki ati bu agaya, na ba bisa bu ŋuŋu nu ka, "Nzu sɔnɔmbiri barasu la ahin bo i ma anjuma ni nzue mmɔɔ nɔɔ na bu de i a?"

Kabo Yesu fɔn yiiri ajinim fiteeri sɔnɔ be ŋu ni

²⁶ Na Yesu ni i susufɔm n akpɛ kunma kpiri n ako aju Gerasafɔm dɛɛ awɔɛ n nu, na kunma kpiri n wo i ni Galili dɛɛ awɔɛ n afien ni. ²⁷ Yesu fiteeri lee n nu ni, na miɛ n nu sɔnɔ be aba akpa i atin, ajinim wo i ŋu, wɔ ce, i nati i bu ŋgbɛen wɔ sanga kere, i da má awuru, má ka fanjunma nu.

28 I n̄uuri Yesu ni, na wɔ bo awie kpa, na wɔ kutu haari Yesu jaa bu, na wɔ ciindi ase ka, “Yesu, Micera Nyeme Kpiri n Wa, a koro nzu ya nu fen a? M sere u wɔ ka, má a ma m n̄u anyumboro.” 29 Deke bo i ti na i seeri sɔ n la ka, Yesu ama ajinim n nɔɔ ka bu fite yaki i. Sangga kere sangga ajinim n fun i n̄u wɔ, haari ni bo bu nie i dika, na bu bo i tobari, na bu wura i jɔrɔko buka su ni, i sandi i kere wɔ, na ajinim n fa i kɔ boro kpantain n nu.

30 Na Yesu abisa i ka, “Bu fere u se?” Na wɔ bo i nu ka, “Bu fere m ka Jama Beberebefɔ.” Deke bo i ti na i seeri sɔ n la ka, ajinim beberebe wo i n̄u wɔ. 31 Na ba sere Yesu jande ka má i fɔn bu kɔ wura kunma n bo i kɔ ngɔngɔ na i la má awieeri n nu.

32 Nyini sangga afam beberebe wo dodo bere, bu wo buka be su sudi, na ajinim n asere Yesu ka i ma bu kɔ fun afam n n̄u, na wɔ ma bu atin. 33 Na ba fite ayaki sɔnɔ ni, na ba kɔ afun afam n n̄u. Dika n nu bere, na bu kere an̄mati accɔndi akɔ ato kunma kpiri nzue n nu, na nzue n adi bu.

34 Afa sasafɔm n n̄uuri nyini n sɔ ni, na ba n̄mati akɔ abo ndoori mie kunn̄u, ni aheme aheme kere su. 35 Na minem aba na bu ba nie sa n bo wɔ yo ni, na ba ba Yesu dɔ, an̄u sɔnɔ n bo ajinim n yo woori i n̄u n ka i tana Yesu bi wura tanlee, ni i nyunu koroya su. Dɔ na sere ati bu. 36 Na minem n bo bu n̄uuri sa n yoobiri ni, akan jɔre n kere akere jama n kabo i ba yoori na sɔnɔ n bo ajinim yo woori i n̄u n anya laifie ni. 37 Na minem kere bo bu fite nyini awɔre n nu n asere Yesu jande ka, i yasu bu awɔre n nu bere, dama sere ati bu agaya. Na Yesu ayasu awura lee nu ka i kɔ.

38 Dɔ na sɔnɔ n bo ajinim afite ayaki i n asere Yesu ka, i ma i su i su. Ama, Yesu asoro má i su, na wɔ se i ka, 39 “Kpie u nyi kɔ awuru, na a kɔ kan kere minem fa kɔ sakpa n bo Nyeme ayo ama u n su.” Na sɔnɔ n akpie i nyi akɔ akan akere mie n nufɔm kere fa kɔ sakpa n kere bo Yesu ayo ama i ni.

Bara tukpakifo be, ni baabara be yiwee jɔre

40 Sangga bo Yesu kpieeri i nyi kɔ juuri kunma kpiri n buekun dɔ ni, i kɔ n̄u ka jama n atien bu nɔɔ sun̄minda i wɔ, na ba yo i anse ni ba. 41 Dɔ na sɔnɔ be aba Yesu dɔ, yiri ti kp̄ien bo i nie bu tientienbunɔɔ sɔ n su a, bu fere i ka Yarusi. Na wo ba akutu asienḡu Yesu jaa bu asere i ka, jande i bra i dika, 42 dama i wa baabara kun n kpein bo i la i n suwu, i la afɔ buru ni nnyɔ ɔ.

Yesu wo kɔ su n na jama n amie i n̄u agaya. 43 Bara be woori jama n nu, i bita abieeri i afɔ buru ni nnyɔ lee, bo i kpu na i kpie má, ama, be akoro atuntun má i na i nya laifie. 44 Na wɔ sakati awura jama n nu Yesu sin, afa i saa akan Yesu tanlee n jaa bu ni, kp̄enga na abieeri n ajina. 45 Na Yesu abisa ka, “Nma fa i saa kaanri m a?” Na sɔnɔ kere ase ka ba si má, na Petoro ase i ka, “Ya Mɔfɔ, wɔrɔ mmɔɔ n̄u kabo jama n abara aye na bu mie u n̄u barasu.” 46 Ama, na Yesu ase ka, “Sɔnɔ be afa i saa akan m, dama ma fa nu ka m yiko n be afite m n̄unie nu akɔ ayo juma.” 47 Na bara n an̄u ka i koro fie má i n̄u, na wɔ ba ajina Yesu nyunu, i n̄unie kere subobo i. Na wɔ kutu haari Yesu jaa bu akan jɔre n akere i, jama n kere nyunu, kabo i ba yoori na i kaba nyaari laifie ni. 48 Na Yesu ase i ka, “M wa, yarada n bo ayo m ni, yiri ma a nya laifie a. Kɔ awuru ni ahoreda.”

49 Sangga n bo Yesu toko wo jɔɔ su ni, na sɔnɔ be afite tientienbunɔɔ sɔ n kp̄ien n dika aba ase i ka, “U wa n wo má bere. Nyini ti, má a dama ya

Kerefo n kun.” ⁵⁰ Ama, na Yesu ati jore n na wo se baa n si n ka, “Ma ma sere ti u, woro yo m yarada, i nya laifie.” ⁵¹ Bu ko juuri kpian n dika n nu ni, wo soro ma su, na be wura buka i su, ma ka Petoro, ni Yakobo, ni i niema Yohane, ni baa n si, ni i ni. ⁵² Minem kere bo bu woori do n wo awie bo su wo, na bu sukoko. Nyini dee ti, na Yesu ase ka, “Ma am sun, wo wu ma, wo daafi wo.” ⁵³ Na ba siri i, dama bu si ka wo wu wo. ⁵⁴ Ama, na Yesu ako atara i saa, na wo tien kpa ase i ka, “M wa, yasu jina.” ⁵⁵ Na wo nya ngoo bekun, na wo kaba ayasu ajina, na Yesu ase ka bu ma baa n deke be na i di. ⁵⁶ Na baa n si, ni i ni ayo alekutura ako asin su, ama, na Yesu abobo bu ni nahore su ka, ma bu ma be si sa n bo wo yo ni.

9

Kabo Yesu sunmaari i susufo buru ni nnyom ni

¹ Na Yesu afere i susufo buru ni nnyom ni, na wo tien bu noo, na wo ma bu yiko ka bu ko sufon yi ajini barasu barasum kere fite minem nu, na bu ma tukpakifom nya laifie. ² Do na wo sunma bu ka bu ko kan Nyeme jore fa ko kabo Nyeme ba nie i minem su ni, na bu tuntun tukpakifom na bu nya laifie, ³ na wo se bu ka, “Ma am fa puitiripui ko ahin atin n bo m susunma am ni, kpama o, kuruku o, diire o, njwaa o. Ma am fa tanlee be mmoo buka bo am wura i n su. ⁴ Am ko juuri mie be su, na awuru kere bo am ko wuraari nu, am ka nyini awuru n nu haari am ba fite mie n nu. ⁵ Sasu bekun, mie bo am ko wuraari nu, na ba de ma am wofa, am fite yaki nyini mie ni, na am kponkpon yi am jaa tuturi kere. Nyini di daani kere bu ka bu woowa ti ma kpa.” ⁶ Na i jaramasam n ako ajengbe abara aye mie miem su akan labari kpa n jore akere minem deke n kere bo bu koori ni, na ba tuntun tukpakifom na ba nya laifie.

Kabo Feme Herode birisi fa koori Yesu sayoowam su ni

⁷ Na Feme Herode ati sa n kere bo Yesu ayo i ni, na wo birisi, dama mine nbem na Yohane Nyeme Nzue Biefo n ye wo tenge i yiwee n nu a, ⁸ ye nbem na Nyeme noanie kanfo Eliya ye wo yi i nu afite fofoe nu, na nbem gusu ase ka dawa dee Nyeme noanie kanfo nyinga n be ye wo kaaki atenge aba a. ⁹ Na Feme Herode ase ka, “M ma ba kpie Yohane tii e, ye jma la ahin sono n bo m ti i sayoowam nga so n a?” Na wo boro i nyi ka i nu Yesu.

Kabo Yesu maari nbiesom akpii nnu ni bu minem diire ni

¹⁰ Sangga bo Yesu jaramasam n kpieeri bu nyi baari i do ni, na ba kan sam kere bo ba yo i n akere i. Na wo fa bu na ba ko awo mie be su awore be nu bere ngumi. Bu fere mie n ka Besayida. ¹¹ Jama n tiiri Yesu nga so ni, na ba sa i su ako do. Na wo de bu, na wo kan Nyeme jore fa ko kabo Nyeme ba nie i minem su barasu. Na wo tuntun tukpakifom, na ba nya laifie.

¹² Sangga bo wie ba suko to ni, na i jaramasam n aba i do aba ase i ka, “Ma minem n atin na bu ko mie kunnu ni aheme aheme miem su na bu ko niemie diire di na bu nya daabiri da, dama deke bo ya wo ni, ya wo boro wo lee.” ¹³ Ama, na Yesu ase bu ka, “Ambera mmoo ni am tii nya deke be ma bu na bu di.” Na ba se i ka, “Deke bo ya la i kere la kpono nnu wo, ni jombaa nnyo, i ju ma. A koro ka ya ko to diire ba ma ahin jama n kere wo, nzen se a?” ¹⁴ Deke bo i ti na bu seeri so n la ka, nbiesom ko yasuuri mine akpii nnu wo. Na Yesu ase i susufom n ka, “Am ma bu tana

asese asese aburunu nnu na bu di.” ¹⁵ I susufom ni maari bu kere tanaari so wieeri ni, ¹⁶ na Yesu afa kpono nnu ni, ni jombaa nnyo ni, na wo ye i tii su angoro, na wo da Nyeme asi, na wo kpiekpie i kere n nu, na wo fa ama i susufom ni ka bu fa ma minem ni. ¹⁷ Na bu kere adi, na bu kunnu ayi. Na ba tambu kpono, ni jombaa sinsin bo bu diiri na i kaari ni, na ba nya kandie buru ni nnyo.

Kabo Peto ro kereeri ka Yesu ti barasu ni

¹⁸ Ceen n be so o, Yesu wo nyemesere su i ngumi, i susufom ni wo i bi. I sereeri Nyeme wieeri n na wo bisa bu ka, “Minem fa m bu nma a?” ¹⁹ Na ba bo i nu ka, “Bu na woro ti Yohane Nyeme Nzue Biefo n a, nbem na woro ti Nyeme noanie kanfo Eliya, ye nbem gusu na woro ti dawa dee Nyeme noanie kanfo nyinga n be ye wo tenje aba a.” ²⁰ Na wo nya abisa bu bekun ka, “Ye ambere fa m bu nma a?” Na Peto ro abo i nu ka, “Woro ti Kristo n a, Tiidefo n bo Nyeme ase ka i sunma i ni.”

Kabo Yesu jajo fa koori i yiwee n su ni

²¹ Na Yesu abobo bu ka, ma bu se ka bu se be jore n bo Peto ro ajajo i ni, ²² i na, “Wo yo daka ka mini Adamande Wa n di wahara donju, na Yudafom nkpienkpienm, ni Nyeme sayoowa donjuyoyo nkpienkpienm, ni Nyeme noanie kerefom kere ba kete m nu, na bu kun m. Ama, na i lesan ceen, na Nyeme ma m tenje m yiwee n nu.”

Kabo Yesu jajo fa koori kabo minem su i su ni

²³ Na wo se bere kere pepere ka, “Sono kere bo i koro ka i su m su, wo yo daka ka i mi wara fi i tienju sa koroowa sa, na i fa i yiwee baka jaanu n so, na i su m su ceen kere ceen. ²⁴ Dama sono kere bo i koro ka i fa i ngoo fie, i mi ba fun i. Ama, sono kere bo i toori i ngoo mini dee ti, i mi nya ngoo. ²⁵ Nzen sono nyaari durunya n nu deke n kere na i fuunri i ngoo na i kaari ngbeen, i kperere la bono? ²⁶ Sono kere bo nyinse ti fa ko mini ni m noanie n su, so ye nyinse ti mini Adamande Wa n gusu fa ko bu su a, sanja bo m ba ba ni m jirima woowa n nu, ni m Si Nyeme dee jirima woowa ni, ni i mereke casim ni. ²⁷ Nahore ye m suse am n a, am nbem wo nu fen bo am wu ma, ma ka am aba anu ka Nyeme femeya n aba.”

Kabo Yesu njunie kaakiiri wo barasu ni

²⁸ Yesu jajoori nyinim kere wieeri so ni, fa ko i lemocue ceen, na wo fa Peto ro ni Yohane ni Yakobo na ba fun ako buka be su ka bu ko sere Nyeme. ²⁹ I wo nyemesere n su ni, na i nyunuawa akaaki wo, na i tanlee n akaaki fofoe papasi. ³⁰ Do na minem nnyo nbem atie bu nu, bu ni Yesu subo anzama. Bere la Moyisi ni Eliya, dawa dee Nyeme noanie kanfom ni. ³¹ Na bere gusu ata fofoe papasi, na bu sujajo i do fa ko kabo i sanja ba ju bo i ko Yerusalem mie kpiri n nu ni, na i yoori so na Nyeme koroowa n yo yiiwa. ³² Nyini sanja, Peto ro ni i bengum wo daafiri su, bu ba tengeeri n na ba nu kabo Yesu woowa n akaaki barasu, i ni mine nnyom ni jina. ³³ Sanja bo minem n ba suko yaki Yesu ni, na Peto ro ase i ka, “Ya Mfo, i ti kpa ka ya wo fen. Ma ya bo nambue nsan, u dee kun, Moyisi dee kun, na Eliya gusu dee kun.” I jajo o, wo si ma kabo i seeri ni. ³⁴ I toko wo jajoori su n na yinyingu akata bu nu liim, na sere ati i susufom ni, sanja bo yinyingu n sukata bu nu ni. ³⁵ Na ba ti akonvi be nga yinyingu n nu, i na, “M wa lee, yiri ye ma yi i a. Am de i noanie.” ³⁶ Bu tiiri jajoowa n

sɔ ni, bu ɲu ka Yesu ɲgumi jina a. Nyini saɲga ni, i susufɔm n abo má su akan akere má be fa kɔ sam n bo bu ɲuuri i n su.

Kabo Yesu fɔn yiiri ajini fiteeri baa be ɲu ni

³⁷ Na i alecin, na Yesu ni i susufɔ nsanm ni sujura buka n su ni, na jama beberebe akpa i atin. ³⁸ Dɔ na sɔnɔ be awo jama n nu atien ase ka, “Ya Kerefɔ, m sere u wɔ, si m wa baabiesɔ n anjurfɔ, m wa kere lɛɛ. ³⁹ Nie, ajini wo i ɲu, saɲga kere bo i ba ɲa i yasu i ɲu, i kaba bo awie kungerekun wɔ, na i fa i bo asienɲu, na i nanzue sufite fufuku, i bita i kere i wahara sɔ sɔ saɲga kere, i koro má ka i fite yaki i. ⁴⁰ Ma sere u susufɔm ni lɛɛ ka bu fɔn yi ajini ni, ama, ba kura má nu.” ⁴¹ Na Yesu ase ka, “Amaa. Ambere nyumafɔ satieyofɔm, am la má yarada fieo. Nyuma sa ye m wo am dɔ fen a? Ye m yó sawɔre ni ambere kɔ ju sɛ wɔ?” Dɔ na wɔ se baa n si ka, “Fa baa n bra fen.” ⁴² Saɲga bo baa ni suba Yesu dɔ ni, na ajini n abo i aji asienɲu, na wɔ da sukpsi. Na Yesu atien ajini n ɲu na baa n anya laifie, na wɔ kaaki afa i ama i si. ⁴³ Na minem kere amie fa kɔ yiko bambaka bo Nyeme la i ni.

Kabo Yesu jɔjɔ fa kɔɔri i yiwee n su bekun ni

Sam n kere bo Yesu woori bu yo su n dɛɛ ti, nyini ma mine kere yoori alekutura n a. Dɔ na wɔ se i susufɔm ka, ⁴⁴ “Ambere, am so am sui na am ti deke bo m koro ka m se am ni. Bu bá tɔ mini Adamande Wa n ma mine nbem.” ⁴⁵ Ama, i jɔjɔri sɔ ni, i susufɔm n ati má i bu. Nyeme ayi má i nyi akere má bu, nyini ti ye ba koro ati má i bu. Ama, sere dɛɛ ti, ba koro abisa má i fa kɔ nyini jɔre n su.

Kabo Yesu kereeri sɔnɔ bo i tara bu kere ni

⁴⁶ Na i susufɔm n ase akuruwa bu ɲuɲu nu fa kɔ sɔnɔ bo i tara bu kere ni. ⁴⁷ Yesu siiri bu sunsunni bo bu bita i n dɛɛ ti, na wɔ fa baa kaan be ajina bu afien i bi, ⁴⁸ na wɔ se bu ka, “Wɔrɔ kere bo a deeri ahin baakan n ɲusu m dɛɛ ti, a deeri mini wɔ lɛɛ. Bekun, wɔrɔ kere gusu bo a nya deeri mini, a deeri m si bo wɔ sunma m wɔ lɛɛ. Dama bo am sunsun ka i ti kaan am kere nu ni, yiri ti kpiri tara am kere a.”

⁴⁹ Dɔ na Yohane ase i ka, “Ya Mɔfɔ, ya ɲuuri ka sɔnɔ be afa u duma sufa fɔn yi ajinim fite minem ɲu, ye ya ɲa ya yáki má i, dama i wo má ya nu n dɛɛ ti.” ⁵⁰ Na Yesu ase ka, “Má am se ka am kanda i, dama sɔnɔ kere bo i fite má am sin, i mi jina am sin wɔ lɛɛ.”

Kabo Samariyaɔm keteeri ka bu de má Yesu ni

⁵¹ Saɲga n ba dodoori bo Nyeme má Yesu fun kɔ angoro ni, na wɔ bu i tii nu ka i ti ye ni ka i kɔ Yerusalem mie kpiri n nu. ⁵² Na wɔ sunma sunmafɔm Samariya aheme mie be su ka bu kɔ suyo deke kere siriya ɲminda i. ⁵³ Ama, na Samariyaɔm n akete ka bu de má i, dama ka i susin kɔ Yerusalem n dɛɛ ti. ⁵⁴ Yakobo ni Yohane ɲuuri nyini n sɔ ni, na ba se ka, “Ya Mibie, a koro ka ya ma sin fite angoro ba di bu, nzen sɛ a?” ⁵⁵ Na Yesu aɛɛ anie, na wɔ jaraki bu. ⁵⁶ Dɔ na Yesu ni i susufɔm n asin akɔ mie nyinga be su.

Minem bo bu koro ka bu su Yesu su n jɔre

⁵⁷ Saɲga bo Yesu ni i susufɔm n wo kɔ su ni, na sɔnɔ be aba ase Yesu ka, “Deke kere bo a kɔ, m sú u su wɔ.” ⁵⁸ Na Yesu ase i ka, “Njaakum la kunmam, na anumam gusu la tieerim, ama, mini Adamande Wa n yiri, m la má m tii daabiri.”

⁵⁹ Na wɔ se sɔnɔ nyinga be ka, “Su m su.” Ama, na sɔnɔ n ase i ka, “M Mibie, ma m du mɔ kɔ yo m si sutura ka, na m nyá ba su u su.” ⁶⁰ Na Yesu ase i ka, “Yaki bo ba wu ni, na bu se bu beɔgu, wɔrɔ kɔ na a kɔ kan Nyeme jɔre fa kɔ kabo Nyeme Feme bá nie i minem su ni.”

⁶¹ Na sɔnɔ nyinga be bekun ase Yesu ka, “M Mibie, m bá su u su, ama, ma m kɔ kaari m dikafɔm ka, na m bá.” ⁶² Na Yesu ase i ka, “Sɔnɔ kere bo i ti ka toora dɔdɔɔrifɔ na i wo dɔ su, na i kaaki nie i sin, i ti má ye ni ka Nyeme yo i mi feme.”

10

Kabo Yesu sunmaari i susufɔ aburaso ni nnyɔm ni

¹ Nyini sin na Mibie Yesu n ayi i susufɔ aburaso ni nnyɔ nyinga nbem, na wɔ sunma bu nnyɔ nnyɔ ka bu du mɔ kɔ mie miem kere bo yiri ni i ti ase ka i bá kɔ su ni. ² Na wɔ se bu ka, “Fiesu diire n sunnu, ama, bo bu kɔ i tambu n sunnu má. Nyini ti, am sere Mibie n bo i dɛɛ la fie n ka i sunma jumayofɔm na bu kɔ i tambu. ³ Ama, am ti fen. Am kɔ. M susunma am wɔ lɛɛ, kabo nbɔmbaam kɔ sangga bedim nu barasu ni. ⁴ Má am se ka am fa njwaa, wara kuruku, wara gbagbaa, má am se ka am jina atin nu yo be mmɔɔ anse. ⁵ Awuru kere bo am kɔ wurari nu, am du mɔ se ka, ‘Nyeme ma am tanalaifie.’ ⁶ Nzen tanalaiefɔ wo nyini awuru n nu, am ma am tanalaifie n ka i mi n dɔ, ama, nzen wɔ ti má sɔ, Nyeme dé tanalaifie ni i mi n dɔ. ⁷ Awuru bo am kɔ wurari nu na bu deeri am wɔfɔ, am ka nyini awuru n nu, na am di na am nu deke kere bo bu fa ma am, dama i ti ye ni ka jumayofɔ nya i juma ni nkato. Má am nati awuru kere nu. ⁸ Am kɔ juuri mie be su na bu deeri am wɔfɔ, am di deke kere bo bu fa ma am. ⁹ Am tuntun tukpakifɔm bo bu wo dɔ n na bu nya laifie, na am se bu ka, ‘Sangga bo Nyeme Feme bá nie i minem su n adodo am lɛɛ.’ ¹⁰ Ama, nzen am kɔ juuri mie be su na ba de má am wɔfɔ, am fite kɔ atingbere n su, na am se bu ka, ¹¹ ‘Haari am mie n tuturi mmɔɔ mata má ya jaa, ya kɔnkɔn yi i wɔ, nyini di daani kere ka am woowa ti má kpa. Ama, i ti ye ni ka am si ka sangga bo Nyeme Feme bá nie i minem su n adodo lɛɛ.’ ¹² Nyini ti, m suse am wɔ lɛɛ, ka, jina cɛɛn, nyini mie n nufɔm, Nyeme cín bu sui tara Sodom mie kpiri n nu satieyofɔm.”

¹³ Na Yesu akaaki ase ka, “Tɔ, ambere Korazinfɔm, am bá ɔu anyumboro. Ambere Besayidafɔm gusu, am bá ɔu anyumboro. Alekutura sam bo m yo maari am ni, má nzen m yoori bu Tiro, ni Sidon mie kpirim n nu, má minem n akaaki bu wo dada kere na bu fa pirim bɔtɔ, ni nzuin yo bu yoowa n bo i kere ka bu ahore asaaki, bu satie yoowa n dɛɛ ti ni. ¹⁴ Ama, ambere, Nyeme bá cin am sui tara Tiro ni Sidon dɛɛ satieyofɔm. ¹⁵ Ambere Kapenamfɔm gusu, am sunsun ka Nyeme bá ye am su kɔ angoro wɔ, nzen se? Ai. I bá yo am kaan wɔ, na i fá am cɔndi kɔ Yiweefɔm Woobiri.”

¹⁶ Na Yesu ase i susufɔm ka, “Sɔnɔ kere bo i de am nɔanie, i mi de m dɛɛ nɔanie wɔ lɛɛ, na sɔnɔ kere bo i kete am nɔanie, i mi kete m dɛɛ nɔanie wɔ lɛɛ, na sɔnɔ kere bo i kete m dɛɛ nɔanie, i mi kete yiri n bo i sunmaari m wɔ lɛɛ.” I jɔjɔ wieeri, na ba kɔ.

¹⁷ Sangga bo i susufɔ aburaso ni nnyɔm ni kpieeri bu nyi baari Yesu dɔ ni, na bu ahore aɔ agaya, na ba se i ka, “Ya Mibie, haari ajinim mmɔɔ de ya nɔanie wɔ, nzen ya nya atien bu ɔu u dɛɛ duma n nu.” ¹⁸ Na Yesu ase bu ka, “M ɔuuri Sitana ka wɔ fite angoro atɔ, kabo nzue kpɛɛ na i ti barasu

n wɔ.” ¹⁹ Na Yesu ase ka, “Am ti fɛn. Ma ma am yiko adena am tientien woom ni bundaanim ŋu, na am kunma yiri kpɔfo n faŋga kere na pui yɔ má am. ²⁰ Haari ni nyini kere ni, má am ma am ahore jo ka ajinim de am noanie ngumi n deɛ ti, ama, am ma am ahore jo ka ba kere am duma ase Nyeme dika.”

²¹ Nyini saŋga n na Awiewie Casi n ama Yesu ahorejo ako sin su, na wɔ sere Nyeme ase ka, “M Si Nyeme, wɔɔ ti aŋgoro ni asienɔgu kere Mibie a. M da u asi ka a fa nyini dekem bo alecirafom ni sifom si má i ni, ayi akere bo bu ti ka nbaatam ni. M Si, i ti nahore wɔ, kabo a koroori ka i yo lɛɛ.”

²² Yesu sereeri Nyeme n wieri ni, na wɔ se ka, “M Si afa deke kere awura m saa nu. Be si má Nyeme Wa ni, má ka i Si Nyeme ni si i a, na be gusu si má i Si ni, má ka Baa ni si i a, ni minem bo Baa n koro ka i yi i kere bu ni, bere si i a.”

²³ Do na Yesu ace anie i susufom ni, na wɔ jojo bere ngumi do, i ŋa, “Amberɛ la terefie ka am aɲu dekem bo am ŋu bu ni. ²⁴ M suse am wɔ lɛɛ, ka, Nyeme noanie kanfom ni nfemem beberebe koroori ka bu ŋu deke n bo am ŋu i ni, ama, ba ŋu má i, na ba koro ka bu ti deke n bo am ti i ni, ama, ba ti má i.”

Miɛnu fa kɔ Samariya sɔnɔ aɲunfo sifo be

²⁵ Na Nyeme noanie kerefɔ be aba Yesu do ka i ba so i nɔɔɛ. Na wɔ bisa Yesu ka, “Ya Kerefɔ, ye m yo se wɔ, ye m nyá nɔɔɔ n bo i la má awieeri n a?” ²⁶ Na Yesu abo i nu ka, “Ba kere i se wɔ, Nyeme Jɔɔ Kadasi n nu a? A ti i bu se wɔ?” ²⁷ Na sɔnɔ n abo Yesu nu ka, “Ba kere ka, ‘Koro Miceɔa u Nyeme ni, ni u ahorembaa kun, ni u awiewie, ni u faŋga, ni u sunsunni kere, na a koro u beɲgu kabo a koro u ŋu ni.’ ” ²⁸ Na Yesu ase i ka, “A kan nahore wɔ, yo so na a nyá nɔɔɔ.”

²⁹ Ama, na Nyeme noanie kerefɔ n akoro ka i yo i ŋu ka i ti sɔnɔ bo i yo sa bo i kɔ atin su Nyeme do ɔ, nyini ti, na wɔ bisa Yesu ka, “M beɲgu la ŋma a?” ³⁰ Na Yesu abo i nu ka, “Sɔnɔ be yo woori bere a, na wɔ yasu Yerusalem ka i kɔ mie kpiri be su, bu fere do ka Yeriko, na atin bujaanufom ako atara i ade i nenɔe kere, na ba bo i ako ayaki i nɔɔɔ n kaan sɔ ɔ. ³¹ I ba yoori ka Nyeme sayoowa doɲguyofɔ kpɛn be su nyini atin n su, ama, saŋga bo i kɔ ŋuuri sɔnɔ n bo atin bujaanufom abo i ni, na wɔ san asin ayaki i. ³² I tiiri sɔ bekun, na Levi busu nufɔ be susin bere, na wɔ ŋu i, na i gusu asan asin. ³³ Ama, na Samariyafo be gusu ba bita nyini atin ni, na wɔ ba aɲu sɔnɔ ni, i ŋuuri i sɔ ni, na aɲunfo ati i. ³⁴ Na wɔ kɔ sɔnɔ n bi, na wɔ fa ŋguin ni nzan afa aɲmisi kambuem ni, na wɔ cici i, na wɔ fa sɔnɔ n na wɔ ma wɔ tana i kaako su, na wɔ fa i ako wɔfom deebiri, na wɔ kɔ anie i dika. ³⁵ Alecin na wɔ yi ŋwaa be ama sɔnɔ bo i nie awuru n su ni. Na wɔ se i ka, ‘De na a nie i dika ma m, na m ba kpieeri m nyi baari, m tɔ deke kere bo a saaki i afa anie i dika ni.’ ³⁶ Tɔ, u sunsunni nu, nyini mine nsanm n nu, boɔo kere ka i ti sɔnɔ n beɲgu a?” ³⁷ Na Nyeme noanie kerefɔ n abo i nu ka, “Sɔnɔ n bo i siiri i aɲunfo ni.” Na Yesu ase i ka, “Kɔ na a kɔ yo so.”

Yesu ni Marata ni Mariya jɔɔɛ

³⁸ Saŋga bo Yesu ni i susufom n wo kɔ su ni, na ba kɔ aju mie be su, bara be woori do, bu fere i ka Marata, na wɔ de Yesu wɔfo i dika. ³⁹ Marata la i niema be, bu fere i ka Mariya, na wɔ tana Yesu bi, na i suti kabo Yesu kere barasu ni. ⁴⁰ Ama, na wɔ yo Marata ahoresaaki kabo yiri ngumi wo juma

yo su ni, nyini ti, na wɔ ba ase Yesu ka, “M Mibiɛ, u cɛɛ wo má nu ka m niɛma n ayaki juma n kɛrɛ aji mini ngumi saa su, nɛn sɛ? Se i ka i ba buka m.” ⁴¹ Na Mibiɛ n abɔ i nu ka, “M danfo Marata, a fa juma beberebe ata u ɲu nyi, ye a suwaraki a, ⁴² ama, deke kun n kpein be akpiɛ u su a. Mariya yiri, deke bo i ti kpa tara i kɛrɛ ye wɔ yi i n a, na be wo má bɛrɛ bo i koro de i do.”

11

Kabo Yesu kereeri ya nyɛmɛsere atin barasu ni

¹ Cɛɛn n be sɔ ɔ, na Yesu wo nyɛmɛsere su awɔrɛ be nu. I ba sere wieeri ni, na i susufɔm ni kun ase i ka, “Ya Mibiɛ, kere ya nyɛmɛsere atin, kabo Yohane kereeri i dɛɛ susufɔm ni.” ² Na Yesu ase bu ka, “Sanja bo am ba susere Nyɛmɛ, am se ka o,

‘Ya Si Nyɛmɛ,

ma minɛm bu u duma casi ni.

Ma u fɛmɛya n bra.

³ Ma ya nɔɔ nu diire cɛɛn n kɛrɛ cɛɛn.

⁴ Fa ya satɛ ce ya,

dama yɛrɛ gusu fa ce bo bu do ya ɲgasi n wɔ.

Má a ma deke be yo ya na ya wura satɛ nu.’ ”

⁵ Na Yesu ase ka, “Ma m fa i ka, nɛn am nu kun kɔɔri i danfo dika kɔɲgɛ jinanjin, na i kɔ se i ka, ‘M danfo, fie m kɔɔnɔ nсан. ⁶ M danfo atin natiirifɔ be aba m dika jina n nu bɛrɛ lɛɛ, m gusu la má diire bo m fá ma i.’ ⁷ Na yiri n bo i wo sɔɔ n ase ka, ‘Má a miɛ m. Ma tu anɔ awie, na m nbaam da a. M koro yasu má na m má u pui.’ ⁸ Tɔ, m suse am wɔ lɛɛ, ka, má ka am ti danfoya n dɛɛ ti ye i yásu na i ma u kɔɔnɔ n a, ama, i bá yasu na i ma u deke kɛrɛ bo a koro, dama ka a fie ni sere n dɛɛ ti.

⁹ Nyini ti, m suse am wɔ lɛɛ, ka, am sere deke bo am koro i Nyɛmɛ do, na i má am. Am nienɛ deke bo am koro i do, na am ɲú i. Am bobo anɔ ni, na i téke i ma a. ¹⁰ Dama sɔɔnɔ kɛrɛ bo i sere deke be Nyɛmɛ do, i má i, na sɔɔnɔ kɛrɛ bo i nienɛ deke be, i ɲú i wɔ, na sɔɔnɔ kɛrɛ bo i bobo anɔ ni, i téke i ma i. ¹¹ Amɛrɛ bo am ti nbaasim ni, ɲma ye i wa sere i jombaa ye i mi kéte na i fá woo ma i wa n a? Ai, be yo má sɔ. ¹² Wara, amɛrɛ nu ɲma ye i wa sere i karafɔ ye i kéte na i fá bundaani ma i wa n a? Ai, be yo má sɔ. ¹³ Tɔ, amɛrɛ, haari ni bo am ti satɛyɔfɔm ni, am si aceeri kpam bo am fa ce am nbaam, nzu ti ye nɛn am sereeri am Si Nyɛmɛ bo i wo angoro ni, i koro ma má am Awiewie Casi n a?”

Kabo minɛm ɲa Yesu ni Sitana dɛɛ ti kun ni

¹⁴ Sanja be na Yesu afɔn ayi ajini afite sɔɔnɔ be ɲu, wɔ yo i bobo. Ajini n fite yaikiiri sɔɔnɔ n sɔ ni, na wɔ koro ajɔɔ. Na jama n ayo alekutura. ¹⁵ Ama, na mine nbem ase ka, “Belazebuli bo i ti ajinim kere dɛɛ femɛ n na bu kaaki fere i ka Sitana ni, yiri ma ahin sɔɔnɔ n yiko ye i koro fɔn yi ajinim a.” ¹⁶ Na nbem gusu akoro ka bu sɔ i ɲgɛɛ. Nyini ti, na ba se i ka i yo alekutura sa be bo i kere ka i yiko n fite Nyɛmɛ do ɔ. ¹⁷ Ama, Yesu siiri bu sunsuni n sɔ ni, na wɔ se bu ka, “Fɛmɛya kere bo i nya kpakpaakiiri nu wieeri, nyini fɛmɛya ni ká ɲgbɛɛn wɔ. Awuru gusu kere bo i kpakpaakiiri nu wieeri, nyini awuru ni sándi wɔ. ¹⁸ Na nɛn Sitana dɛɛ fɛmɛya n nya kpaakiiri nu wieeri, i kóro jina a? Ai, i kóro jina má. Deke bo i ti na m se sɔ n la ka, am ɲa Belazebuli ma m yiko ye m koro fa

fɔn yi ajinim a. ¹⁹ Tɔ, ye nzen am ŋa Belazebuli maari m yiko, ye m fa fɔn yi ajinim a, ye ŋma maari am dɛɛ minɛm ni yiko ye bu bita fɔn yi bu n a? Nyini ti, kabo am minɛm yoori ni, nyini kere ka am la má nahɔɛ. ²⁰ Ama, Nyɛmɛ dɛɛ yiko nu ye mini fɔn yi ajinim a. Nyini n kere ka, Nyɛmɛ wo am nu suniɛ i minɛm su lɛɛ.

²¹ Nzen sɔnɔ faŋgafo nya faari i biesɔya nenɛge kere jina ŋmindaari i dika, pui koro yo má i awuru n nu nenɛge be. ²² Ama, nzen sɔnɔ nyinga nya taraari i faŋga, i koro tu ŋgoni ni yiri na i kunma i faŋga, na i de i biesɔya nenɛge n bo i daafi i ŋu ni, na i fin i nenɛge kere kɔ na i ni i bengum kɔ kpaaki nu.

²³ Sɔnɔ kere bo i jina má m sin, i mi ti m kpɔfo ɔ. Na sɔnɔ kere gusu bo i buka má m na ya tien minɛm nɔɔ, i mi sandi minɛm wɔ.

²⁴ Nzen ajini nya fite yakiiri sɔnɔ, i kɔ jengbe bara ye boro kpantain nu wɔ, deke bo nzue wo má, na i kɔ nienie woobiri bo i tana yi i ŋumi. Nzen wɔ nya má woobiri, nyini saŋga, a ti ka i ŋa, ‘Ma m kpie m nyi kɔ m woobiri dawa ni.’ ²⁵ Na i kaaki kɔ, i kɔ ŋu ka ba kpára dika n nyunyumi, asese deke kere su. ²⁶ Na i nyá kɔ fa ajinim nso, bo bu ti tie tara yiri ni i tii, na bu kere bá wura woobiri dawa n nu. Nyini saŋga, a ŋu ka sɔnɔ n woowa ayo tie atara kabo i yo ti dawa ni.”

²⁷ Saŋga bo Yesu seeri sɔ wieeri ni, bara be wo jama n nu, na wɔ se Yesu ka, “Terefie wo bara n bo i wuuri u na i maari u nyufini n dɔ.” ²⁸ Ama, na Yesu ase i ka, “Terefie wo minɛm bo bu ti Nyɛmɛ nɔɔnɛ n na bu de i ni dɔ a.”

Kabo Yesu keteeri ka i yo má alekutura sa bo bu koro i ni

²⁹ Saŋga bo minɛm sutien bu nɔɔ bara ye Yesu sɔ ni, na wɔ se bu ka, “Amberɛ nyumafɔm ti satieyofɔm wɔ. Am koro ka m yo alekutura sa na am ŋu i wɔ, ama, m yó má i, má ka alekutura sa n bo Nyɛmɛ yo yoori i maari i nɔɔnɛ kanfo Jona ni ŋgumi. ³⁰ I ti sɔ lɛɛ, kabo sa n bo i yo tuuri Jona n kereeri Ninevafɔm ka Nyɛmɛ sunmaari i ni, sɔ ye sa n bo i bá tu mini Adamande Wa n gusu kére amberɛ nyumafɔm ka Nyɛmɛ asunma m a. ³¹ Fɛmɛ bara be yo fiteeri haari i bɔsu Seba wɔ, na i ba ti Fɛmɛ Solomon dɛɛ ŋɔnle jɔjɔwa nɔɔnɛ ni. Jina cɛɛn, yiri bá yasu jina na i járaaki amberɛ nyumafɔm nahɔɛ su, dama kisa, m suse am wɔ ka, mini tara Fɛmɛ Solomon, ama, am ade má m nɔɔnɛ ni. ³² Jona yo kaanri Nyɛmɛ jɔɛ kereeri Ninevafɔm na ba kaaki bu wo. Jina cɛɛn, berɛ bá yasu jina na bu járaaki amberɛ nyumafɔm, dama kisa, m suse am wɔ ka, mini tara Jona, ama, am akete ka am kaaki má am wo.”

Kabo Yesu kereeri anyumbaa kpa jɔɛ ni

³³ Na Yesu akaaki ase ka, “Sɔnɔ koro sɔ má fitana su na i fa se fieewa nu, wara i fa gaŋga butu su. Ama, i fa taka deke su angoro wɔ, adena minɛm bo bu ba wura awuru n nu n koro ŋu asi. ³⁴ Ya nyumbaa ni ti ka fitana ma ya ŋuniembaa n a. Nzen u nyumbaa nya ti kpa, u ŋuniembaa n kere ta wein n wɔ lɛɛ. Ama, nzen i nya ti má kpa, u ŋuniembaa n kere wo awosin nu wɔ lɛɛ. ³⁵ Nyini ti, si u ŋu sa na má a se ka wein wo u dɔ, ama, i ti awosin wɔ. ³⁶ Nzen u ŋuniembaa n kere woori wein nu, na awosin be awo má nu, i tá a papasi, kabo fitana sin ta wura u ni.”

Kabo Yesu ŋa Yudafɔm tereterefɔm nbem bá ŋu anyumboro ni

³⁷ Saŋga bo Yesu jojo wieeri so ni, na Farasifo be asere i ka i bra na bu di diire i dika, na Yesu ako awura ka i di diire ni. ³⁸ Na Farasifo n abirisi kabo Yesu arnisi ma i nu ka, ye i sudi diire ni. ³⁹ Na Mibie n ase i ka, "Ambere Farasifom, am nmisi am kopu ni am taale sin wo, ama, am kunnu ayi ni anyii sayoowam, ni sunsunni tiem wo. ⁴⁰ Ambere sinnzinm ni, sono kere si ka Nyeme yoori deke kere kunnu ni i sin a. ⁴¹ Ma nzen am fa deke bo i wo am kopu ni am taale kunnu ma yaarifom, ma deke kere bo am yo i, ma i yo casi ma am wo Nyeme do.

⁴² Ambere Farasifom ni, am ba nu anyumboro, dama am yi am jakam ma Nyeme wo, haari ni am maakunm, ni ngetem, ni nvannanm kere, ama, am yo ma nahore sam, na am kaaki koro ma Nyeme. Wo yo daka ka am yo nyini sam saŋga kere, na am fa jaka yiiwam buka su.

⁴³ Ambere Farasifom ni, am ba nu anyumboro. Am koro ka am tana kpirikoro tanaabirim wo, am tientienbunso som n nu, na am koro ka minem yo am anse gosu wo, na bu ma am jirima. ⁴⁴ Am ba nu anyumboro. Am ti ka fanjunmam bo bu la ma nyaari seewa be n wo, na minem nati su na bu si ma ka fanjunma lee."

⁴⁵ Na Nyeme noanie kerefom n kun ase Yesu ka, "Ya Kerefom, nzen a seeri so, a kpie nzuko asaŋga ya kere mmoo lee." ⁴⁶ Na Yesu ase i ka, "Ambere Nyeme noanie kerefom ni, ambere mmoo ba nu anyumboro. Am cici soori nonoori so minem wo, ama, ambere ni am tii soro ma su ka am fa am saa kan i.

⁴⁷ Ambere ba nu anyumboro. Am yo fanjunmam dongu fa ma Nyeme noanie kanfom wo, bere bo am nam yo kuunri bu ni. ⁴⁸ Nyini kere ka ambere ni am tii saa woori sa n bo am nam yo yoori i n nu lee. Bere kuunri Nyeme noanie kanfom n a, na ambere ata bu fanjunmam. ⁴⁹ Nyini ti, ye Nyeme Alecirafom n seeri ka, 'M sunma m noanie kanfom, ni m jaramasam bu do, na bu kun nbem, na bu kere nbem wuwuruwa.' ⁵⁰ Nyini ti, Nyeme cin ambere nyumafom sui fa ko kabo am nam yo kuunri Nyeme noanie kanfom, fiteeri durunya n bumboori fa ba ju haari ni kisa ni. ⁵¹ Bu yo yoori so o, fite saŋga n bo bu kuunri sono be bo bu fere i ka Abeli n fa ba juuri saŋga n bo bu kuunri sono be bo bu fere i ka Zakariya ni. Yiri ye bu kuunri i Nyeme Sereebiri Awuru n nu, Casi Kere Casi So n ni Mikun yoowa yoobiri n afien n a. Nahore ye m suse am n a, nyini sam kere dee ti ye Nyeme ba cin ambere nyumafom sui n a.

⁵² Ambere Nyeme noanie kerefom ni, am ba nu anyumboro. Am akere ma minem Nyeme atin, kabo i ti ye ni ka am kere bu ni, na ambere ni am tii akete ka am su ma i atin n su, ye am akanda bo bu koro ka bu su i su ni."

⁵³ Saŋga bo Yesu yasuri nyini dika n nu ni, na Nyeme noanie kerefom, ni Farasifom n afa i kpo agaya, na ba bisa i bisaawam beberebe, ⁵⁴ na ba boro bu nyi na bu so i ngee, adena i jojo wura Nyeme ngasi nu.

12

Kabo wo yo daka ka ya soro Nyeme ngumi ni

¹ Saŋga n bo nyini n kere sukso su ni, na jama beberebe aba atien bu nso haari bu ko sutientien bu benggu nu. Na Yesu abo i bu ka i jojo, na wo du mo ase i susufom n ka, "Am si am nu sa ni Farasifom dee kpono ayiri n bo bu fa go kpono nu na i yasu ni. M suni bu dee burukoonu sayoowam wo.

² Deke be wo má fiɛwa nu bo bu bá ɲu má i, deke be gusu wo má asiri nu bo bu bá si má i. ³ Nyini ti, deke kere bo am jɔjɔri i kɔŋgue, bu bá jɔjɔ i wiɛsu wɔ. Na deke kere bo am tuuri i asuturi sɔɔ, bu bá bo i ndoori wɔ, na sɔɔ kere tí i.”

⁴ Na Yesu akaaki ase ka, “M danfom, m suse am wɔ lɛɛ, ka, má am soro minem bo bu koro kun aɲuniembaa ni, na nyini sin, bu koro yo má pui kun ni. ⁵ Ama, m kéré am sɔɔ bo i ti ye ni ka am soro i. Am soro Nyeme, yiri koro kun aɲuniembaa n a, na i kaaki la yiko bo i koro fa i ji cɛema sin nu. M suse am wɔ lɛɛ, ka, yiri ti sɔɔ bo am soro i a. ⁶ Am si ka njɔrem nnu ɲwaa ti kaan sɔɔ, má sɔ? Ama, bu kun n kpein mmɔɔ wo má bere bo Nyeme nie má i dika. ⁷ Haari am tiɲmie mmɔɔ bo i wo am tii su ni, Nyeme si i kere nɔ. Nyini ti, má am soro sere. Am la anyunuyi Nyeme do tara njɔrem beberebe.”

⁸ Na Yesu akaaki ase bu ka, “M suse am wɔ lɛɛ, ka, sɔɔ kere bo i kan kereeri minem ka i ti m susufɔ, mini Adamande Wa n gusu bá kan kere Nyeme merɛkem n ka i mi ti m dɛɛ wɔ. ⁹ Ama, sɔɔ kere gusu bo i keteeri minem nyunu ka i ti má m susufɔ, mini Adamande Wa n gusu bá kete Nyeme merɛkem nyunu ka i mi ti má m dɛɛ. ¹⁰ Sɔɔ kere bo i jɔjɔ wuraari mini Adamande Wa ni ɲgasi nu, Nyeme fá i mi ɲgasi ce i, ama, sɔɔ kere bo i jɔjɔ wuraari Awiewie Casi ni ɲgasi nu, Nyeme fá má i mi ɲgasi ce má i. ¹¹ Saɲga bo bu ba faari am baari bu tientienbunɔɔ sɔɔm nu, wara nfemem ni nfaɲgafɔm nyunu ka bu di am jɔre, má am ma am ahore saaki fa kɔ kabo am jɔjɔ barasu. ¹² Dama nyini saɲga n ba juuri, Awiewie Casi ni kéré am noanie kere bo wɔ yo daka ka am jɔjɔ i a.”

Miɛnu fa kɔ sɔɔ nenɲefɔ sinnzin be su

¹³ Sɔɔ be woori jama n nu, na wɔ se Yesu ka, “M Kerefɔ, se m gɔɔ ka i kpaaki aja bo ya si ayaki i ama ya n nu, na i fa m dɛɛ ma m.” ¹⁴ Na Yesu ase i ka, “Wɔɔ, ɲma ayi m, ka m di am jɔre na n kpaaki am aja nu ma am a?” ¹⁵ Na Yesu ase jama n kere ka, “Am nie am tii su dɔŋgu na am si am ɲu sa fa kɔ anyii barasu kere sa, dama sɔɔmbiri nenɲe ti má i ɲɔɔ, haari i mi n koro i la i ka se.” ¹⁶ Do na Yesu abo bu ahin miɛnu ni, i ɲa, “Sɔɔ nenɲefɔ be yo woori bere a, na wɔ do i fie, na wɔ nya diire beberebe. ¹⁷ Na wɔ sunsun i tii nu na wɔ se ka, ‘M la má deke bo m fa ahin diire n kere se. Ye m yó se wɔ?’ ¹⁸ Na wɔ se ka, ‘Kabo m yó yaa, m sún m bondom kere ji wɔ, na m tá ɲgbɲgbirim, na m fá m diire n ni nenɲe kere bo m la bu n wura nu. ¹⁹ Na m nyá se ka ma di terefie, puitiripui kpíe má m su kun, m tána a, ahin afɔ nye nye n kere, na m dí na m nú na m ahore jɔ.’ ²⁰ Ama, na Nyeme ase i ka, ‘Wɔɔ sinnzin ɲgbeen ni. Ahin kɔŋgue n nu bere, m yí u ɲɔɔ n fite u do. Na m nie ka nyini nenɲe n kere bo a tien i nɔɔ ni ká ɲma dɛɛ wɔ?’ ” ²¹ Na Yesu akaaki ase bekun ka, “I ti sɔɔ lɛɛ, fa kɔ minem bo bu kpini nenɲe beberebe fa se durunya n nu fen ni, ama, Nyeme do, bu la má pui.”

Kabo Yesu ɲa má ya tana koko ni

²² Na Yesu ase i susufɔm n ka, “Nyini ti, m suse am wɔ lɛɛ, ka, má am tana sukoko fa kɔ am ɲɔɔ su, kabo am dí, na má am kaaki sukoko fa kɔ am ɲunie su, kabo am nyá suturam bo am fá wura na am kára. ²³ Dama ɲɔɔ tara diire, na aɲuniembaa n gusu tara suturam. ²⁴ Am nie anumam, haari ni bo bu do má ni, na bu kaaki kpíe má ni, bu la má bondo gusu, bo

bu fa diire wura nu, se Nyeme ma bu diire ye bu di a. Amberε la anyunuyi tara anumam ε. ²⁵ Am nu, ηma tana koko fa kɔ i koroowam su ye i mi koro buka i ηgɔɔ tintiin su haari kaan sɔ a? Ai, be wo má bere. ²⁶ Nzen am koro yo má nyini deke n kaan n be sɔ, nzu ti ye dekem bo bu kaari n kere mie am a? ²⁷ Am nie kabo wuram bo pum barasu barasu a. Bu yo má juma be, bu kaaki tu má gise. Ama, m suse am wɔ lee, ka, haari Feme Solomon ni i nenje n kere bo i yo la i ni, wɔ la má sutura bo i yo nyumi juuri nyini wura pum ni be. ²⁸ Nzen wuram bo bu wo bere nyuma, na ahunma a ηú ka ba kpie bu na bu yara bu, ye Nyeme nie bu dika, nzu ti ye i nie má amberε bo am tara wuram co n a? Amberε, am la má yarada fieo. ²⁹ Nyini ti, sanɔa kere, má am ma am sunsunni wo deke bo am dí, ni deke bo am nú su. Má am tana koko fieo. ³⁰ Dama durunya n nufɔm bo bu su má Nyeme ni, bere sunsun sɔ sɔ sanɔa kere. Am Si Nyeme si ka am koro nyini dekem ni. ³¹ Má am yo sɔ, ama, am kpini Nyeme femeya n busu ka, na i nyá ba fa nyini dekem n buka am su.”

³² Na Yesu akaaki ase ka, “Má am soro sere, haari ni bo am ti ka nbɔem bo bu sunnu má ni, dama am Si Nyeme ayi am ka am ni yiri sanɔa di i femeya n a. ³³ Am tɔ am deke bo am la i, na am fa ηwaa n ma yaarifɔm. Am kpini ajeke seebiri bo i saaki má n busu. Am fa ajeke bo i kpie má su n fa se Nyeme dika n nu, dɔ ye awiefɔ koro wura wɔ má i a, na watarawam gusu koro muka má i. ³⁴ Dama deke bo am ajeke wo ni, am ahorembaa kere gusu wó dɔ sɔ.”

Kabo Yesu ηa i susufɔm ni kpa bu ηu ηminda i sanɔa kere ni

³⁵ Na Yesu ase ka, “Am kpa am ηu wɔ, na am so am fitana sunminda. ³⁶ Am yo sɔ sɔ, ka minem bo bu tana ηminda bu mibie bo wɔ kɔ konyaya, na i bá n wɔ, na sanɔa bo i ba boboori anɔ n kpenɔa ni, bu kába teke i wɔ na i wúra. ³⁷ Terefie wo nyini akɔɔm n dɔ, nzen bu mibie n ba ηu ka bu toko tana ηminda i. Nahɔre ye m suse am n a, i má bere tana a, na yiri ni i tii fá diire ba ma bu na bu di. ³⁸ Nzen haari i kpieeri i nyi ba juuri kɔngue jinanjɔn, wara akɔnyuma bo sanɔa, na i ba ηu ka bu toko tana ηminda i, terefie wo bu dɔ. ³⁹ Am si tenle ka nzen má awurufɔbie n si sanɔa bo awiefɔ ni bá i dika na i ba wɔ i, má i tana ηminda a, na awiefɔ n koro ba wura má. ⁴⁰ Amberε gusu kpa am ηu sanɔa kere, dama mini Adamande Wa ni bá sanɔa bo am sunsun má ka m bá n wɔ.”

⁴¹ I jɔɔori sɔ n na Petoro abisa i ka, “Ya Mibie, a bo ahin mieenu n ni yere wɔ, nzen a ni sɔnɔ kere wɔ?” ⁴² Na Yesu abisa i ka, “Amusuisufɔ kpien n bo i la dabunɔa ni i kaaki la alecira n la ηma a? Yiri la bo i mibie n afa amusuisufɔ nyinɔam awura i saa nu ka i kpaaki diire nu ma bu, sanɔa bo i ti ye ni ka i ma bu ni. ⁴³ Nzen i mibie n ba ηuuri ka i suyo juma n kabo i seeri i ka i yo i ni, terefie wo nyini amusuisufɔ n dɔ. ⁴⁴ Nahɔre ye m suse am n a, nyini amusuisufɔ n mibie ni fá i aja kere wura i saa nu wɔ, na i nie i dika. ⁴⁵ Ama, nzen i ti amusuisufɔ tiefɔ, i sunsun ka i mibie ni kpie má i nyi ba má nde. A ηu ka i subo amusuisufɔ nyinɔam ni, bu nbiesɔm ni nbaram kere, na i sudi na i sunu nzan bo, ⁴⁶ dɔ na i mibie n bá kpie i nyi ba cɛen bo i sunsun má ka i bá, na i kaaki si má ba n sanɔa ni. Nyini sanɔa n na i mibie n cín i sui agaya, na i fá i bo minem bo bu yo má i yarada n su.

⁴⁷ Na nzen amususufo n si deke bo i mibiε n koro ka i yo i, na wo yo má siriya na i yo deke bo i mibiε n koro ka i yo ni, i bó i wo nyunyumi. ⁴⁸ Ama, nzen amususufo bo i si má deke bo i mibiε n koro ka i yo i, na i yoori deke be bo i ti ye ni ka i cin i sui, i dεε suicin n ti kaan so o. Sono kere bo bu ce i aceeri beberebe, i ti ye ni ka i mi fa yo deke bo wo yo daka ka i yo i, na sono kere bo Nyeme ce i aceeri beberebe agaya, i ti ye ni ka i mi su i ko tara so.”

Kabo Yesu ŋa wo fa kpakpaakinu aba ni

⁴⁹ Na Yesu akaaki ase bu ka, “Ma fa Nyeme jore n aba ka i yara durunya n nufom ka sin dεε su wo. Má nyini sin n jeeri kisa, má m koro. ⁵⁰ Ama, m la wahara be bo i ti ye ni ka m di i, má ka ma di i awie, m ahore dá má. ⁵¹ Am sunsun ka ma fa tanalaifε aba durunya n nu a? Ai, m suse am wo lεε, ka, ma fa má tanalaifε baari a, ama, ma fa kpakpaakinu aba a. ⁵² Fite kisa fa ko, awuru kun nufom mine nnu kpákpaaki nu. Mine nsan tí bu busu bu ŋgumi wo, na mine nnyo tí bu busu bu ŋgumi. ⁵³ Baabieso ni i si koro má bu benju jore, na baabara ni i ni koro má bu benju jore, na baa n ni, ni i wa yi koro má bu benju jore.”

Kabo Yesu jarakiiri minem ka bu si má sam bo bu suyo n bu ni

⁵⁴ Na Yesu ase jama n ka, “Sanja bo am ŋu ka nzue yinyinggu atien i nco wie afiiri, a ti ka am ŋa, nzue bá nyuma, a ŋu ka i bá a gusu. ⁵⁵ Na sanja bo am ŋu ka anjuma sukpie fite nyunu ndiema bie su, a ti ka am ŋa, nyuma wie fite agaya, a ŋu ka i fite wo. ⁵⁶ Amberε burukoonufom ni, nzu dεε ti ye am koro nie angoro ni asienju na am si sam bo bu bá yo n a, ye am nie ye am koro si má sam bo bu suyo ahin sanja n bu a?”

⁵⁷ Na Yesu akaaki ase bu ka, “Nzu ti ye amberε ni am tii sunsun má na am si sa bo i ko atin su a? ⁵⁸ Nzen u ni be la jore, na nzen i koro ka i fa u ko joredifo do, jokoti tara i mi n jaa, na má jore n ju joredifo n do, má nyini, i mi ni cin u ko joredifo n do, na yiri gusu fá u ma dansaraka niefo ni, na yiri gusu nyá nyi u. ⁵⁹ M suse am wo lεε, ka, nzen a woori do, na a to má kaari n kere awie má, a nyá má atin fite má dansaraka n nu.”

13

Kabo i ti ye ni ka ya kaaki ya wo barasu ni

¹ Nyini sanja n na mine nbem wo do, na ba se Yesu kabo Galilifo nbem yo koori ka bu ko yo yoowa ma Nyeme, na bu wo yo su ni, na Gomina Pilato gusu ama minem aba akun bu. ² Na wo se bu ka, “Ye kabo bu kuunri nyini Galilifom ni, am sunsun ka nyini kere ka bu dεε satie yoowa tara Galilifom kere dεε wo, nzen se? ³ Ai, i ti má so fieo. M suse am wo lεε, ka, nzen am akaaki má am wo, amberε mmoo bá ka ŋgbeen so o lεε. ⁴ Ye mine buru ni mocuem bo Silowam dεε awore n nu kobe bambaka n to goori bu ŋu n di? Am sunsun ka i kere ka bu dεε satie yoowa tara Yerusalemfom kere dεε wo, nzen se? ⁵ Ai, i ti má so fieo. M suse am wo lεε, ka, nzen am akaaki má am wo, amberε mmoo bá ka ŋgbeen so o lεε.”

Mienu fa ko damba baka n bo wo su má n su

⁶ Do na Yesu abo bu ahin mienu ni, i ŋa, “Sono be yo woori bere a, ye damba baka jina i baka suuwa barasu barasum fie nu. Na wo ko anienie ka i nie, beni i ŋu suuwa su, ama, wo ŋu má puitiripui su. ⁷ Nyini ti, na wo ko ase fie n niefo n ka, ‘Nie, afo kun kun so nsan lεε, bo m ba nie ahin

damba baka n su ka, beni m n̄ú suuwa a, ama, m n̄u má pui su. Nyini ti, kp̄ie i ji. Nzu ti ye i jina bere susaaki asien n a?' ⁸ Ama, na fie n niefo n abo i nu ka, 'M mibie, yaki i benle, na ya nie i ko ju afo kun bekun na ya nie. M f̄undu kunma bara ye i bu wo, na m go i nanyeti. ⁹ Do na nzen baka n suuri suuwa, i ti kpa, nzen wo su má, na a koro ma m kp̄ie i ji.' "

Kabo Yesu tuntuunri bara be N̄umiya c̄een n ni

¹⁰ N̄umiya c̄een n be so o, na Yesu wo minem kere su, tientienbunoo soom kun nu. ¹¹ Bara be woori do, ajini wo i n̄u, wo bu i wi, i afo buru ni mocue lee, i koro yasu jina má. ¹² Sangga bo Yesu n̄uuri i n na wo bo afere i, na wo se i ka, "Bara, a nya u tii afite u tukpaki n nu." ¹³ Sangga bo Yesu suse so n na wo fa i saa anana i n̄u, kpen̄ga na wo ten̄ge i n̄u ajina, na wo kansi Nyeme.

¹⁴ Ama, na yaa ati tientienbunoo soo n kp̄ien ni, ka Yesu atuntun sono N̄umiya c̄een ni. Na wo se minem ni ka, "Ya la lesen bo wo yo daka ka ya fa yo juma, nyini ti, am bra nyini c̄eenm ni, na bu bá tuntun am, ama, má N̄umiya c̄een n yiri." ¹⁵ Na Yesu ase i ka, "Ambere burukoonufom ni. N̄umiya c̄een ni, am n̄ma nu ye i nyan̄gi má i naani, wara i kaako, na i ko ma i nzue a? ¹⁶ Ye ahin bara ni mmoo ti Abraham busu nufoo, ye Sitana afa i ayo i dee, afo buru ni mocue lee, wo yo má daka ka m tuntun i N̄umiya c̄een n na i nya laifie, nzen se?" ¹⁷ I seeri so n na wo wura i kp̄ofom ni nyinse, ama, na minem n bere ahore ajo fa ko alekutura sam bo wo yo bu n su.

Mienu fa ko alembaa kaan be jore su

¹⁸ Na Yesu akaaki ase bu ka, "Nyeme femeya n ti ka nzu wo? Ye m fá nzu deke fa sunsun kabo i ti a? ¹⁹ I ti ka alembaa kaan kabo nyem mbaa ti n wo, bo sono be doori i fiesu ni, na wo fi, na wo nyi atetereki asambaa asambaa, na anumam akoro ayo bu tieerim su."

Mienu fa ko kpono ayiri n su

²⁰ Na Yesu akaaki ase bu bekun ka, "Ye m fá nzu deke fa sunsun kabo Nyeme femeya n ti a? ²¹ I ti ka ayiri bo bu fa go kpono samene nu na i yasu ni, na bara be fa goori samene beberebe nu, na i kere yasuuri n wo."

Kabo Yesu jajo fa koori ano n bo i ti fii n su ni

²² Yesu sukoo Yerusalem mie kp̄iri n su ni, na wo nati asin mie ngbingbirim ni kan kanm su, sukere minem. ²³ Na sono be abisa i ka, "Ya Mibie, minem bo Nyeme de bu tii ji ni, bu sunnu, nzen bu sunnu má?" Na Yesu ase bu ka, ²⁴ "Am boro am nyi na am fa ano n bo i ti fii n na am wura, dama m suse am wo lee, ka, mine beberebe bá koro ka bu wura, ama, bu bá koro wura má. ²⁵ Sangga n ba juuri, awurufobie ni yasu nyi ano n wo, nyini sangga n na am jina ano n su, subobo, na am sére i jande ka, 'Ya Mibie, teke ano n ma ya.' Na i gusu nyá se am ka, 'Ai, m si má am sa.' ²⁶ Do na am sé i ka, 'Ya ni woroo yo diiri a, na ya nu, na a kere minem ni yere kere, ya bosu do.' ²⁷ Ama, na i káaki se am bekun ka, 'Ambere satieyofom ni, m si má am sa fieo, am cinsi m bi bere.' ²⁸ Na am n̄u ka Abraham, ni Izaki, ni Jakobo, ni Nyeme noanie kanfom ni, ka bu wo Nyeme femeya n nu, na kabo ba fa ambere atu dasin ni, do na am sun, na am kán am saa. ²⁹ Na minem fite durunya n awore nna n kere nu, na bu bá tana Nyeme

femeya n nu, na bu dí na bu nú. ³⁰ Am ti fen. Minem bo bu wo mɔ kisa ni, bá ka sin, na bo bu ka sin kisa n bá du mɔ.”

Kabo Yesu ahore saaki maari Yerusalemfɔm barasu ni

³¹ Nyini sanɔa n na Farasifɔ nbem aba Yesu dɔ aba ase i ka, “I ti ye ni ka a nmati fite fen, na a kɔ deke be, dama Feme Herode koro ka i kun u wɔ.”

³² Na Yesu ase bu ka, “Am kɔ na am kɔ se nyini nɔaku sɔnɔmbiri ka o, ‘Ti fen. M sufɔn ajinim fite minem nɔ wɔ, na m ma tukpakifɔm nya laifie, nyuma ni ahunma ngumi wɔ, na ahieni na m wíe m juma.’ ³³ Haari ni nyini mmɔɔ, wɔ yo daka ka m sukɔ ɔ, nyuma, ni ahunma, ni ahieni, dama Nyeme nɔanie kanfɔ kere ti ye ni ka bu kun i Yerusalem mie kpiri n nu wɔ.”

³⁴ Na Yesu abo awie ase ka, “Oí, ambere Yerusalemfɔm. Ambere kuunri Nyeme nɔanie kanfɔm n a, na minem bo Nyeme sunmaari bu am dɔ ni, am atu bu yabue. Sanɔa kere m koro ka m tien am nɔɔ, na m fa m saa bara ye am, kabo ako tien i nbaam nɔɔ, i lanɔkpete nu ni, ama, am soro má m su. ³⁵ Am nie fen, Nyeme yáki am nu ji. M suse am wɔ lee, ka, fite kisa fa kɔ, am nɔ́ má m kun, má ka sanɔa bo am bá se ka, ‘Terefie wo yiri n bo i suba Mícera n dɛɛ duma n nu n dɔ.’”

14

Kabo Yesu tuntunri sɔnɔ be Njumiyi cɛɛn ni

¹ Njumiyi cɛɛn n be sɔ ɔ, na Farasifɔm kpíen be afere Yesu ka i bra i dika na bu di diire, na Yesu akɔ. Sanɔa bo i wo diire n di su ni, na mine aba atana suyi i kɔresi. ² Kpenɔa na sɔnɔ be ayasu ajina Yesu nyunu, i saam ni i jaam kere awura, ³ Yesu nɔuri sɔnɔ n sɔ ni, na wɔ bisa Nyeme nɔanie kerefɔm ni, ni Farasifɔm n ka, “Ya dɛɛ atin n su, atin wo nu ka ya tuntun tukpakifɔ Njumiyi cɛɛn ni, nzen atin wo má nu?” ⁴ Ama, ba bɔ má i nu, na Yesu ama sɔnɔ n anya laifie, na wɔ ma i atin na wo kɔ. ⁵ Dɔ na wo nya abisa bu ka, “Am nu nɔa ye nzen i wa baabiesɔ, wara i naani, toori bura nu, Njumiyi cɛɛn ni, ye i mí kába yi má i fite má?” ⁶ Ama, ba koro abɔ má i ahin bisaawa n nu.

Kabo Yesu tuuri bu fɔ fa kɔ kpirikoro sam su ni

⁷ Na Yesu anɔ kabo wɔfɔm nbem sunienie kpirikoro tanaabiri na bu tana ni, dɔ na wɔ bo ahin mieɛnu ni, akere bu kere. ⁸ I nɔa, “Sanɔa kere bo sɔnɔ be ba fere u ka a bra ba di konyaya diire i dika, a kɔ, má a tana jirima tanaabiri ni, a yoori sɔ, a kɔ nɔ ka wɔ fere sɔnɔ be bo i tara u, ⁹ nyini sanɔa n na sɔnɔ n bo wɔ fere am kere ni, yiri nyá ba u dɔ na i bá se u ka, ‘M dɔn, yasu ma ahin sɔnɔ n tanaabiri.’ Nyini sanɔa, a nɔ ka wɔ wura u nyinse lee, na a kɔ kaan kɔɔbiri. ¹⁰ Ama, sɔnɔ fereeri u ka a bra i dika bo di diire, a kɔ juuri, du mɔ kɔ tana kaan tanaabiri ka. Dɔ na sɔnɔ n bo wɔ fere u ni, yiri nyá ba u dɔ na i bá se u ka, ‘M dɔn, yasu bra na a ba tana ahin tanaabiri nyunyumi ni.’ Nyini n sɔ koro wura u kpiri, u benggu wɔfɔm kere n nyunu a. ¹¹ Dama sɔnɔ kere bo i wura i nɔ kpiri, Nyeme yó i mí kaan wɔ, na sɔnɔ bo i yo i nɔ kaan, Nyeme wúra i mí kpiri.”

¹² Dɔ na Yesu anya ase sɔnɔ n bo i baandiiri i n ka, “Sanɔa bo a nɔ a fere minem na bu ba di diire u dika, má a fere u danfom, wara u ninbaam, wara u lamɔyam, wara u bengum bo bu la ajeke, nzen a yoori sɔ, bere gusu bá fere u cɛɛn n be sɔ ɔ, nyini sanɔa ni, ba tɔ u kaari awie lee. ¹³ Ama, sanɔa kere bo a nɔ a baandi mine na bu ba di diire u dika, baandi yaarifɔm, ni wɔbukam, ni bo bu saam ni bu jaam awu ni, ni anyinsinm. ¹⁴ A nya yoori

sɔ, terefie wo u dɔ. Bere koro tɔ má u kaari, ama, Nyeme bá tɔ u kaari a, cɛen bo minem bo bu yo sa bo i kɔ atin su Nyeme dɔ n bá tenge bu yiwee n nu ni.”

Miɛnu fa kɔ di ni nu bambaka n su

15 Yesu seeri sɔ n na wɔfɔm nu kun ase i ka, “Nka terefie wo minem bo bu bá tana Nyeme femeya n nu di diire n dɔ.” 16 Na Yesu ase i ka, “Sɔnɔ be yo woori bere a, na wɔ yo diire beberebe, na wɔ baandi jama beberebe ka bu ba di diire ni. 17 Na sangɔ n bo diire n ba yoori siriya ni, na wɔ sunma i akɔɔ ka i kɔ se minem n bo wɔ du mɔ abaandi bu n ka, ‘Am bra, deke kere ayo siriya.’ 18 Na bu kun kere asere atin ka bu koro ba má diire n di. Na ciciri su dɛɛ sɔnɔ n ase akɔɔ n ka, ‘Jande, m sere u wɔ, ma to asien, i ti ye ni ka m kɔ nie kabo i ti wɔ, m koro ba má.’ 19 Na nyinga n ase ka, ‘Ma to m tooram asese busu nnu, m koro ka m kɔ fa bu yo juma kisa kisa na m nie, m sere u wɔ jande, m koro ba má.’ 20 Na nyinga n gusu ase ka, ‘Ma ja bara kisa lɛɛ, nyini dɛɛ ti, m koro ba má.’ 21 Na akɔɔ n akpie i nyi akɔ ase i mibie n kabo minem kere ase i ni. Dɔ na yaa ati awurufɔbie n agaya, na wɔ se yiri akɔɔ n ka, ‘Yo ndende na a kɔ mie kunnu atingberem kere su, na a kɔ fere yaarifɔm, ni wɔbukam, ni anyinsinm, ni minem bo bu saam ni bu jaam awu ni, na a fa bu bra.’ 22 Wɔ cɛ má na akɔɔ n akɔ aba, na wɔ se ka, ‘M mibie, ma yo kabo a seeri ka m yo ni, ama, fofoe toko ka.’ 23 Na awurufɔbie n ase i ka, ‘Fite kɔ mie n aheme aheme, ni i korɔkam kere nu, na a kɔ fere minem ka bu bra, adena m awuru n yi ni jama. 24 M suse am wɔ lɛɛ, ka, nyini minem kere bo m baandiiri bu na ba ba má ni, bere kun n kpein mmɔɔ nɔɔ kán má m diire n kun.’ ”

Kabo ya yaki deke kere na ya su Yesu su ni

25 Sangɔ bo Yesu wo kɔ su ni, na jama beberebe asu i su, na wɔ cɛ anie bu, na wɔ se bu ka, 26 “Sɔnɔ kere bo i koro ka i ba m dɔ, i koro yo má m susufɔ, má ka i mi akoro m atara i si, ni i ni, ni i yi, ni i nbaam, ni i ninbaam, ni i sinbaam, ni haari yiri mmɔɔ ni i tii. 27 Sɔnɔ kere bo i koro sɔ má i yiwee baka jaanu n na i su m su, i mi koro yo má m susufɔ. 28 Ma m fa i ka sɔnɔ ŋa i ta awuru, i du mɔ tana wɔ, na i bu akunta ka, na i nie ka i la ŋwaa bo i koro ju awuru n ta. 29 Nzen i ŋwaa ju má bo i ta awuru n wie, na i boori i bu na wɔ wie má i, sɔnɔ kere bo i sin ŋuuri sa n bo wɔ yo i ni, i mi síri wɔ, 30 na bu sé ka, ‘Ahin sɔnɔ n boori i awuru n bu wɔ, ama, wɔ koro awie má i.’ 31 Ma m kaaki fa i ka nzen femɛ bo i la i sojam akpii buru ye i koro ka i kɔ lue ni i benɔgu femɛ be bo yiri la sojam akpii aburanyɔ, i tána sunsun wɔ ka, na i nie ka i koro kun lue ni i benɔgu ni. 32 Nzen i ŋuuri ka i koro korɔ má nu, i dú mɔ sunma sɔnɔ ɔ, na i kpá i benɔgu femɛ n atin na i kó sere i ka, i má bu yo jɔre n donɔgu.” 33 Na Yesu ase ka, “I ti sɔ ɔ lɛɛ, ni amberɛ gusu dɔ, sɔnɔ kere bo i wara afi má i tienɔgu deke, i mi koro yo má m susufɔ.”

Njin bo i la má kperɛ n dɛɛ jɔre

34 Na Yesu akaaki ase ka, “Njin yo fie, ama, nzen i fiefie nya ba saari wieeri, i koro yo má fiefie kun. 35 I koro buka má asien ni mmɔɔ na i kaaki koro buka má nanyeti na i yo diire, ŋka bu fa butu wɔ. Bo i koro ka i ti ahin jɔre n bu, i ti ye ni ka i mi so i sui na i ti.”

15

Miɛnu fa kɔ bɔɛ n bo i miniiri n jɔrɛ

¹ Cɛɛn n be sɔ ɔ, na lampodefɔm ni satieyofɔm beberebe aba Yesu dɔ na bu ba ti i kereewam ni. ² Na Farasifɔm ni Yudafɔm Nyemɛ noaniɛ kerefɔm n anɔnɔti, bu ɲa, “Ahin sɔnɔ n de satieyofɔm wɔ, haari na i ni bere sangɔ di diire wɔ mmɔɔ.” ³ Dɔ na wɔ bo bu ahin miɛnu ni, i ɲa, ⁴ “Nzen ambere be nu la i nbɔɛm yaa, na kun miniiri, i mi yɔ se wɔ? I yáki nbɔɛ aburɔnɔna ni ɲɔnam ni boro n nu wɔ, na i kɔ niɛniɛ kun n bo wɔ mini ni haari i bá ɲu i. ⁵ Sangɔ bo i ba ɲuuri wieeri ni, na i ahore jó na i fá i fa bo i betɛ, ⁶ na i fá i fa ba awuru. Dɔ na i fére i danfom ni i tanafom kere na bu tien bu nɔɔ, na i sé bu ka, ‘M ahore ajo ka ma ɲu m bɔɛ n bo i miniiri ni. Nyini ti, am ma m ni ambere kere kunnu jo.’ ⁷ M suse am wɔ lɛɛ, ka, i tí sɔ ɔ lɛɛ, nzen sɔnɔ kun kaakiiri i wo, ahorejo wó Nyemɛ dika n nu tara mine aburɔnɔna ni ɲɔna bo bu ɲa bu yo sa bo i kɔ atin su Nyemɛ dɔ na wo yo má daka ka bu kaakiiri bu wo ni.”

Miɛnu fa kɔ ɲwaa n bo i miniiri n jɔrɛ

⁸ Na Yesu abo bu miɛnu bekun, i ɲa, “Nzen bara be la i jete ɲwaa buru, na kun miniiri, i mi yɔ se? I só sin su wɔ, na i kpára bara ye awuru n nu, na i níeniɛ deke n kere, haari i bá ɲu i. ⁹ Na sangɔ bo i ba ɲuuri ni, i fére i danfom ni i tanafom kere, na bu tien bu nɔɔ, na i sé bu ka, ‘M ahore ajo ka ma ɲu m ɲwaa n bo i miniiri ni. Nyini ti, am ma m ni ambere kere kunnu jo.’ ¹⁰ M suse am wɔ lɛɛ, ka, i ti sɔ ɔ lɛɛ, nzen satieyofɔ kun kaakiiri i wo, ahorejo wó Nyemɛ merɛkem n dɔ.”

Miɛnu fa kɔ biɛ be bo i wa miniiri n jɔrɛ

¹¹ Na Yesu akaaki abo bu miɛnu be bekun, i ɲa, “Sɔnɔ be yo woori bere a, i la nbaabiesɔm nnyɔ. ¹² Cɛɛn n be sɔ ɔ, na kaan n ase i si n ka, ‘M si, kpaaki u aja kere nu na a fa m dɛɛ ma m kisa.’ Na i si n akpaaki aja n nu, na wɔ fa bu nnyɔ n kere dɛɛ ama bu. ¹³ Wɔ cɛ má, na kaan n ato i dɛɛ nenɛge n kere bo i si n fa maari i ni. I nyaari ɲwaa n wieeri sɔ ni, na wɔ yasu ako asien dede be su. Dɔ na wɔ kɔ adi ɲwaa ni ɲgbɛɛnɲgbɛɛn haari na i kere aba awie. ¹⁴ Sangɔ bo i ba diiri ɲwaa n kere wieeri n na ahɔɛ bambaka be ato nyini asien n su. Dɔ, wɔ la má pui bo i di kun. ¹⁵ Nyini ti, na wɔ fa i ɲu ako awura nyini asien n su miebaa be saa nu, ka i yo juma ma i mi ni, adena i nya diire di. Dɔ na miebaa n afa i ako i fiesu ka i kɔ sunie i afam dika. ¹⁶ Na ahɔɛ aba ati i agaya, haari i ba koro ka i di afam dɛɛ diire n be mmɔɔ ɔ, ama, be ama má i deke be na i di. ¹⁷ Kasin, na wɔ ba anɔ i ɲu ɲgbɛɛn fa kɔ sa n bo wɔ yo i n su, na wɔ bu i tii nu, na wɔ se i ɲu ka, ‘M si npadifom kere di diire wɔ na i ka, ama, mini ba wo fɛn suwu ni ahɔɛ n a. ¹⁸ M kpíe m nyi kɔ m si dɔ ɔ, na m kó se i ka, “M si, ma do Nyemɛ ni wɔrɔ kere ɲgasi. ¹⁹ I ti má ye ni ka a fere m ka u wa kun, fa m yo u npadifom ni kun.”’ ²⁰ Dɔ na wɔ yasu na i kpíe i nyi kɔ i si dɔ.

Sangɔ bo i toko wo dede suba ni, na i si n anɔ i, na wɔ sí i anɔnɔ agaya. Na wɔ ɲmati akpa i atin, na wɔ fa i saa abara aye i, na wɔ biti i. ²¹ Na baa n ase i si n ka, ‘M si, ma do Nyemɛ ni wɔrɔ kere ɲgasi. I ti má ye ni ka a fere m ka u wa kun.’ ²² Ama, na i si n afere i akɔɔm, na wɔ se bu ka, ‘Am kɔ ndende na am kɔ nie suturam kere nu bo i ti kpa, na am fa ba wura i, na am fa ɲgaa ba wura i saa maraka, na am fa gbagbaa ba wura i jaa. ²³ Na am nya kɔ nie naanim n nu, na am tara bo i la anyunuyi bra, na

am ba kpiε i kōm yo i dōnggu, na am ma ya di na ya nu. ²⁴ Dama m ahin wa ni, i wuuri wō, ye wō tenje a, i miniiri wō, ye ma ŋu i a.' Dō na ba bo i bu ni di ni nu.

²⁵ Nyini sanja n kere baakpien n toko wo fiesu. I ba suba awuru, na sanja bo i ba dooori awuru n na wō ti ka bu wo agōre gō su ni jue. ²⁶ Dō na wo fere i si akōm kun, na wō bisa i ka, 'Nzu sa yoori awuru a?' ²⁷ Na akō n abō i nu ka, 'U niema ye wō ba awuru a, ye u si ama nōo ye ya kpiε naani bo i la anyunuyi n kōm, dama u niema n aba awuru ni laifε n ti.'
²⁸ Na yaa ati baakpien ni agaya, haari na wō kete ka i wura má awuru n nu. Nyini ti, na i si n afite aba asere i jande ka i wura. ²⁹ Ama, na wō se i si n ka, 'Ti fεn, afō nye nye lεε bo m wo u dō yo juma ma u, ka m ti akōo, ma kete má u nōaniε be. A koro ama má m puitiripui, haari sirimbaa mmōo ka m gusu fa na m ni m danfom fa di na ya nu. ³⁰ Ama, u ahin wa n yiri, wō fa u aja bo a fa ama i n akō boro, na wō kō ayo i koroowa ni nbarasakaram. Haari ni nyini n kere ni, i kpieeri i nyi ba juuri awuru ni, a ma nōo ka bu kpiε naani bo i la anyunuyi n kōm ma i.' ³¹ Na i si n ase i ka, 'M wa, sanja kere mini ni wōro wo bere a, deke kere bo i ti m dεε ti u dεε wō. ³² Ama, wō yo daka ka ya di na ya nu na ya gō agōre, dama u niema ni, i wuuri wō, ye wō tenje a, i miniiri wō, ye ma ŋu i a.'"

16

Miεenu fa kō amuisufō kpien n bo wō la má dabuŋu ni

¹ Na Yesu ase i susufōm n ka, "Biε nenjefō be woori bere a, i la i amuisufō kpien bo yiri niε i nenje n kere su a. Na minem aba nenjefō n dō aba se i ka i amuisufō kpien ni susaaki i nenjem ni. ² Nyini ti, na wo fere i, na wo se i ka, 'M suti jōre nbem fa kō u dō. Nyini ti, ba bu akunta kere m na m si kabo a bita m nenjem barasu, dama a koro niε má bu dika kun.' ³ Na amuisufō kpien n ase i tii nu ka, 'Ye kisa na m mibie ni sufōm m fite m juma n nu ni, m yō se wō? M la má fanja bo m koro dō, m gusu nyunu asin ni bo m nati susere. ⁴ Eεnhεen, kisa m si kabo m yo, na haari nzen m ba fuunri m juma ni, m fūn má m danfom bo m kō wo bu dō.' ⁵ Nyini ti, na wo fere minem kere bo bu bita i mibie n kaari n kun kun. Na wo bisa ciciri su dεε sōnō n ka, 'A bita m mibie n kaari nye wō?' ⁶ Na wo bō i nu ka, 'M bita i ŋguin nzue sō ganja yaa kun wō.' Na amuisufō kpien n ase i ka, 'De u kaari kadasi ni, na a tana, na a kere ka a bita ganja aburunu wō.' ⁷ Na wo nya abisa nyinga gusu ka, 'Ye wōro di, a bita kaari nye wō?' Na wo bō i nu ka, 'M bita i alembaa pirim bōto yaa kun wō.' Na amuisufō kpien n ase i gusu ka, 'De u kaari kadasi na a kere ka a bita pirim bōto aburamōue wō.' ⁸ I mibie ŋuuri sō ni, na wo kansi i fa kō nyini ŋgonle bo i la i n su, haari ni bo i la má dabuŋu ni. Kabo i ti lεε, durunya n nufōm la ŋgonle fa kō durunya n nu dεε sayoowam n su tara minem bo Nyeme ma bu wo wein n nu ni."

⁹ Na Yesu ase bu bekun ka, "M suse am wō lεε, ka, am fa durunya n nu dεε fin ajeke bo am la i n fa tara danfoya, adena ajeke n ba ŋmati yakiiri am, na minem bá de am wura woobiri kpa bo i la má awieeri n nu.

¹⁰ Sōnō kere bo minem koro daafi i ŋu ka i bita deke kaan ni nahōre atin, yiri ye bu koro daafi i ŋu ka i bita deke bambaka mmōo ni nahōre atin a. Ama, sōnō kere bo bu koro daafi má i ŋu ka i bita deke kaan ni nahōre atin, bu koro daafi má i mi ŋu ka i bita deke bambaka mmōo. ¹¹ Tō, nzen

ambere la má dabunju bo am koro bita durunya n nu deɛ fin ajekem ni nahore atin, nma fá Nyeme deɛ ajekem wura am saa nu? ¹² Na nzen am la má dabunju bo am koro bita be deɛ ajekem ni nahore atin, nma fá deke bo i bá yo am tienju deɛ ma am a?

¹³ Sɔno kun koro sanja su má mibiɛm nnyɔ. Nzen i nja i yó sɔ, i kpó kun n wɔ, na i kóro nyinga ni, wara, i bóro i nyi su kun wɔ, na i bú nyinga ni ngbɛɛn. Am koro sanja su má Nyeme ni ajekɛ.”

Kabo Yesu tuuri Farasifom fo barasu ni

¹⁴ Sanja bo Farasifom n tiiri ahin n kere n sɔ ni, na ba siri i, dama bu ti nɔwaa korofom wɔ. ¹⁵ Na Yesu ase bu ka, “Ambere nja am ti minem bo bu yo sa bo i kɔ atin su Nyeme dɔ na minem nju am n a, ama, Nyeme yiri si am ahore su kere. Dama deke bo adamande sunsun ka i njusu nya má ni, nyini ye Nyeme kpɔ i a.

¹⁶ Nyeme Jɔre Kadasi n bo Moyisi ni Nyeme noanie kanfom kerɛeri i n wo bere ka, ye Yohane nya baari a, nyini n sin, na ba kan labari kpa n akere minem fa kɔ Nyeme femeya n su, na sɔno kere suboro i nyi ka i kpini atin na i wura nu. ¹⁷ I ti má kekereke na angoro ni asienju kere bá mini, ama, Nyeme deɛ noanie kpamaawa n kampiti sɔ mmɔɔ ká má ngbɛɛn.

¹⁸ Sɔno kere bo i faari i yi jiiri na i jaari bara fɔfɔre, i mi n asaaki ajaa ciire lɛɛ. Na sɔno kere bo i jaari bara bo wɔ fite i hun ajaa bu, i mi n asaaki ajaa ciire lɛɛ.”

Miɛnu fa kɔ nengefɔ be ni Lazarosi jɔre

¹⁹ Na Yesu ase bu ka, “Nengefɔ be yo woori bere a, sanja kere sanja, i wura sutura kpa kpa bo i la gɔɔ, na i sudi i koroowa cɛɛn n kere cɛɛn. ²⁰ Na jaarifo be gusu wo bere, bu fere i ka Lazarosi, kambue abara aye i deke kere. Na bu sufa i ba tana nengefɔ n anɔ nu, ²¹ adena nengefɔ n ba sudi diire, na nzen be tɔtɔ asienju, na i gusu fa di. Haari na caam ba sutafi i kambue n nu. ²² Na sɔno jaarifo n aba awu, na Nyeme meretekem aba afa i akɔ angoro Abraham bi. Na nengefɔ n gusu aba awu na ba se i, ²³ na yiri akɔ Yiweefom Woobiri. I wo wahara di su dɔ sɔ ni, na wɔ ye i tii su anju Abraham dede dɔ, Lazarosi wo i bi. ²⁴ Dɔ na wɔ bo afere Abraham ase i ka, ‘Ya si Abraham, si m anjunfo. Na a sunma Lazarosi na i fa i saa maraka dɔ nzue nu na i fa ba dɔ m taferema, dama m wo wahara bambaka nu wɔ, sin nu fen.’

²⁵ Ama, na Abraham ase i ka, ‘Tenge su ka sanja bo a la ngɔɔ wo durunya n nu ni, a yoori u koroowa a, na Lazarosi yiri adi durunya n nu wahara n kere. Ama, kisa yiri wo fie di su, ye wɔwɔ wo wahara di su n a. ²⁶ Bekun, kunma ngonjo wo u ni yere afien, bo be koro fite má fen na i kɔ u bi. Be gusu koro fite má u bi dɔ na i ba ya dɔ fen.’ ²⁷ Na nengefɔ n ase ka, ‘Ya si Abraham, m sere u wɔ, ka a sunma Lazarosi na i kɔ m si awuru n nu, ²⁸ m ninbaam nnu wo dɔ, na i kɔ bobɔ bu ka bu si bu nju sa na má bu bá wo ahin wahara bambaka woobiri n bo m wo ni.’ ²⁹ Na Abraham ase i ka, ‘Nyeme Jɔre Kadasi n bo Moyisi ni Nyeme noanie kanfom kere maari bu ni, i wo bu dɔ. Wɔ yo daka ka bu so bu sui na bu ti i bu, na bu si bu nju sa.’ ³⁰ Na nengefɔ n ase i ka, ‘Ya si Abraham, bu dé má i. Ama, nzen sɔno fiteeri minem bo ba wu n dɔ kɔori bu dɔ, bu káaki bu wo.’ ³¹ Ama, na Abraham ase i ka, ‘Nzen ba so má bu sui na bu

ti Nyeme Jore Kadasi n bo Moyisi ni Nyeme nɔaniɛ kanfɔm kere maari bu ni, haari nzen sɔnɔ tengeeri i yiwee n nu mmɔɔ baari, bu dé má i. ”

17

Kabo Yesu kereeri minem fa kɔ nyemesu barasu ni

¹ Na Yesu ase i susufɔm n ka, “Sam nbem bo bu yo na bu fa mine wura satie nu ni, nyini sam ni bá yo sanɔa kere, ama, anyumboro wo sɔnɔ kere bo i ma nyini sam yoori n dɔ. ² Nzen má bu faari ngani san yabue ciciiri i mi kɔm na bu fa i kɔ tuuri tieku nu mmɔɔ, má i ti ye tara bo i mi ma ahin yaradayɔfɔm n be wura satie nu.

³ Nyini ti, am si am ɲu sa. Nzen wɔɔ kere bo u niwa yoori u satie be, jaraki i, na nzen i kaakiri i wo, na a fa i satie n ce i. ⁴ Nzen i yoori u satie kɔ jinaari haari kpe nso mmɔɔ wie kun nu, na i baari u dɔ ba seeri u ka, ‘Ma yo u satie,’ fa i satie n ce i.”

⁵ Na Yesu jaramasam n ase i ka, “Buka ya na ya yarada yo biiwa.” ⁶ Na Mibie n ase bu ka, “Nzen má am la yarada bo i kɔ ju kabo nyem mbaa ti ni mmɔɔ, má am koro se ahin koto baka n ka, ‘Kpekiti ni u bunlui n kere na a kɔ jina tieku n nu,’ má i de am nɔaniɛ n wɔ.

⁷ Ma m fa i ka, am nu, nzen be la akɔɔ na i wo fiesu wara i sasa nbɔem wɔ, na i ba baari awuru, am nu ɲma ye i kaba se akɔɔ n ka, ‘Ba tana na a di diire’ a? ⁸ Am be se má i sɔ da. Ama, kabo a se i n la ka, ‘Yo m diire siriya, na a jina ɲminda na m di na m nu ka, na a nya kɔ yo u deɛ di.’ ⁹ Nzen u akɔɔ n deeri u nɔaniɛ na i yoori juma bo a se i ka i yo i ni, a se má i ka, ‘M da u asi.’ ¹⁰ I ti sɔ ɔ lɛɛ, amɛre gusu dɔ, sanɔa bo am ayo juma n kere bo am mibie n ase ka am yo i ni, am se ka, ‘Yere ti akɔɔm wɔ, ya ti má ye ni ka bu kansia ya, dama ya juma lɛɛ, ye ya yo i n a.’ ”

Kabo Yesu tuntuunri kokofɔ buru nbem na bu nyaari laifie ni

¹¹ Sanɔa bo Yesu suko Yerusalem mie kpiri n nu ni, na wɔ sin Samariya ni Galili awɔrem n afien. ¹² I kɔ ɲa i wura mie kaan be nu, na i ni kokofɔ buru nbem aye. Na ba jina dede ¹³ atien kpa ka, “Ya Mɔfɔ Yesu, si ya aɲunfo.” ¹⁴ I ɲuuri bu sɔ n na wɔ se bu ka, “Am kɔ na am kɔ fa am ɲu kere Nyeme sayoowa dɔnguyɔfɔm ni, na bu fiiti am na bu nie.” Na ba de atin suko, bu wo kɔ su n na bu kere aɲu ka ba nya laifie. ¹⁵ Dɔ na bu nu kun ɲuuri ka wɔ nya laifie sɔ ni, na wɔ kpie i nyi aba Yesu dɔ sutien kpa sukansi Nyeme. ¹⁶ Na wɔ ba akutu haari Yesu jaa bu asiɲgu, na wɔ da i asi. Nyini sɔnɔ n ti Samariyafo ɔ. ¹⁷ Dɔ na Yesu abisa ka, “Má mine buru nyaari laifie a, ye ɲɔna nyingam n wo ni? ¹⁸ Nzu ti ye ahin sɔnɔ n bo i ti má Yudafɔ ni ɲgumi aba ka i ba da Nyeme asi a?” ¹⁹ Dɔ na wɔ se sɔnɔ n ka, “Yarada n bo a yo m ni, yiri ma a nya laifie a. Yasu na a kɔ awuru.”

Kabo Nyeme Feme bá nie i minem su barasu ni

²⁰ Na Farasifo nbem abisa Yesu ka, “Ye sanɔa bɔnɔ ye Nyeme Feme bá nie i minem su a?” Na wɔ bɔ bu nu ka, “Sa be wo má bere bo i koro kere am sanɔa bo Nyeme Feme bá nie i minem su. ²¹ Be se má ka, ‘Am nie, yiri yaa fen,’ wara, ‘Yiri lɛɛ dɔ.’ Dama m se am nahɔre wɔ lɛɛ ka, Nyeme wo am nu fen jina n nu, sunie i minem su.”

²² Na wɔ se i susufɔm ni ka, “Sanɔa suba bo am bá koro ka am ɲu mini Adamande Wa n ba sanɔa ni, haari cɛen kun mmɔɔ, ama, am ɲú má i. ²³ Nbem bá ba na bu sé am ka, ‘Am nie, yiri lɛɛ dɔ,’ wara, ‘Yiri yaa fen.’

Ama, má am fite kò su bu su. ²⁴ Dama mini Adamande Wa n ba cɛɛn ni, i ti kabo nzue kpɛsɛ na i ta papasi bara yɛ deke kɛrɛ n wɔ. ²⁵ Ama, kana ahin kɛrɛ bá yo, wɔ yo daka ka m du mɔ di wahara beberebe, na ambɛrɛ nyumafɔm bá kete m.

²⁶ Mini Adamande Wa n ba sanɔa ni yó kabo ya na Nowa sanɔa ni i yoori n wɔ. ²⁷ Nyini sanɔa ni, sɔnɔ kɛrɛ woori di ni nu su wɔ, na nbaram ni nbiesɔm suja bu benɔgum, fa kò juuri haari cɛɛn n bo Nowa wuraari lee bambaka n nu, na wɔmbu n ba diiri deke kɛrɛ n wɔ. ²⁸ I yo sɔ ɔ lɛɛ bekun, ka Loti dɛɛ sanɔa ni. Nyini sanɔa ni, sɔnɔ kɛrɛ woori di ni nu su wɔ, na nbem suto, na nbem suto, na nbem sudo dɔdɔɔri, na nbem suta fa. ²⁹ Cɛɛn n bo Loti fa yasuri Sodom mie kpiri n nu ni, nyini cɛɛn n ye sin ni ferewita sin fiteeri anɔoro a, na wɔ ba atɔ mie n nu adi deke n kɛrɛ. ³⁰ Kabo cɛɛn n bo mini Adamande Wa ni bá yi m ɔ nyu kere lɛɛ.”

³¹ Na Yesu akaaki ase ka, “Nyini cɛɛn ni, wɔrɔ kɛrɛ bo a wo kpata nu, na u nenɔge wo awuru n nu, má a wura gisan nu fa pui. I ti sɔ ɔ lɛɛ, wɔrɔ kɛrɛ gusu bo a wo fiesu, má a kpie u nyi kò awuru. ³² Am tenɔge su fa kò sa bo i yoori Loti yi ni. ³³ Dama sɔnɔ kɛrɛ bo i ɔa i kpini i ɔgɔɔ busu, i mi bá fun i, ama, na sɔnɔ kɛrɛ bo i tɔɔri i ɔgɔɔ maari m, i mi nyá ɔgɔɔ. ³⁴ M suse am wɔ lɛɛ, ka, nyini cɛɛn n kɔɔngue, mine nnyɔ ɔ dá dasu kun su wo daafiri su a, na Nyeme má bu bá fa kun n kò yaki kun ni. ³⁵ Na nbaram nnyɔ kási wo ɔngani san su, na Nyeme má bu bá fa kun n kò yaki kun ni. [³⁶ Na biesɔm nnyɔ bú wɔ juma yo su fiesu, na Nyeme má bu bá fa kun yaki kun ni.]” ³⁷ I susufɔm tiiri sɔ ni, na ba bisa i ka, “Ya Mibie, nifansu ye ahin sam kɛrɛ bá yo a?” Na wɔ bo bu nu ka, “Deke kɛrɛ bo deke fuin nya wo, petem bara ye dɔ ɔ.”

18

Miɛnu fa kò bara kunafɔ n ni jɔredifɔ be jɔre

¹ Dɔ na Yesu abo miɛnu akere i susufɔm n ka wɔ yo daka ka bu sere Nyeme sanɔa kɛrɛ, na má bu yaki i sere. ² I ɔa, “Jɔredifɔ be woori mie be su a, i soro má Nyeme, na i kaaki bu má be. ³ Na bara kunafɔ be awo nyini mie n su, sanɔa kɛrɛ i ba jɔredifɔ n dɔ ɔ, na i ba sere i ka, ‘Jɔre bo mini ni m kpofɔ n bita i ni, buka m na m nya nahɔre.’ ⁴ Na wɔ ce bo jɔredifɔ n bo má i n nu. Ama, na kasin, na wɔ ba asunsun i tii nu, na wɔ se ka, ‘Haari ni bo m soro má Nyeme na m bu má be ni, ⁵ ama, kabo sanɔa kɛrɛ na ahin kunafɔ n bita kpie m daafiri n dɛɛ ti, m má i nya nahɔre wɔ. Nzen ma yo má sɔ, i suba m dɔ sɔ ɔ, haari i bá ma m wara yi m nyu.’ ”

⁶ Na Yesu akaaki ase bu ka, “Ye m ɔa am ati kabo nyini jɔredifɔ findifɔ n seeri ni. ⁷ Ye nzu ti ye Nyeme búka má i dɛɛ minem bo bu sun fere i kɔɔngue ni wiesu kɛrɛ a, na bu nyá nahɔre a? I cé má ni bu buka. ⁸ M suse am wɔ lɛɛ, ka, i búka bu wɔ na bu nya nahɔre ndende. Ama, haari ni nyini mmɔɔ, sanɔa bo mini Adamande Wa n ba baari, m bá nyu minem bo bu toko yo m yarada, nzen se a? Ai, m nyu má be.”

Miɛnu fa kò Farasifɔ n ni lampodefɔ n jɔre

⁹ Na Yesu akaaki abo ahin miɛnu n akere minem bo bu sunsun ka bere yo sa bo i kò atin su Nyeme dɔ na bu má be ni. ¹⁰ I ɔa, “Cɛɛn n be sɔ ɔ, na mine nnyɔ nbem akɔ ka bu kò sere Nyeme, Nyeme Sereebiri Awuru n nu. Kun n ti Farasifɔ ɔ, na nyiɔɔ n ti lampodefɔ. ¹¹ Na Farasifɔ n ajina i ɔgumi abo i hoe asere Nyeme ka, ‘Micera Nyeme, m da u asi ka m ti má

kabo mine nyingam ti barasu ni. M ti má anyiifo, m ti má findifo, m saaki má ajaa ciire, haari m ti má ka nyini lampodefo n bo i jina do ni. ¹² Leso kun kun kere nu, m cici m nwo kpe nnyo nnyo o, na deke buru kere bo m la i, m yi i kun kun ma u wo.' ¹³ Ama, na lampodefo n ajina dede, haari wo koro má ka i ye i tii su nie angoro mmoo, na wo fa i saa ataka i bengju nu, na wo se ka, 'Micera Nyeme, m ti satieyofe o, si m ajufo.' " ¹⁴ Na Yesu ase ka, "M suse am wo lee, ka, nyini mine nnyom ni sereeri Nyeme wieweri, na bu ko juuri awuru ni, Nyeme deer lampodefo ni ka i ti sono bo i yo sa bo i ko atin su i do a, má Farasifo ni. Dama sono kere bo i wura i ju kpiri, Nyeme yo i kaan wo, ama, na sono bo i yo i ju kaan, Nyeme wura i mi kpiri wo."

Kabo Yesu yoori nbaatumam kisi ni

¹⁵ Een be na mine nbem sufa bu nbaam ba Yesu do ka i fa i saa nana bu ju na i yo bu kisi. I susufom n juuri i so ni, na ba tien minem n ju. ¹⁶ Ama, na Yesu afere nbaatumam ni, na wo se ka, "Am ma nbaatumam n bra m do, má am fon bu. Dama bere nusu so ye Nyeme femeya n ti bu dee a. ¹⁷ Nahore ye m suse am n a, woro kere bo a de má Nyeme femeya n nu jore kabo baatuma de deke i saa nnyo ni, a wura má Nyeme femeya n nu fieo."

Nejefo n ni nyemesu jore

¹⁸ Na Yudafo nkpienkpienm be abisa Yesu ka, "Ya Kerefo sono kpa, m yo se ye m bá nya ngoo n bo i la má awieweri n a?" ¹⁹ Na wo bo i nu ka, "Nzu ti ye a fere m ka sono kpa a? Be ti má kpa sin Nyeme ju. ²⁰ Ye m ja a si Nyeme noanie maawam ni e, bu ja, 'Má a saaki ajaa ciire. Má a kun sono. Má a wo. Má a di kore daani. Bu u si ni u ni.' " ²¹ Na sono n ase i ka, "Ma su nyini noanie maawam n kere su haari m kaan nu." ²² Yesu tiiri so n na wo se i ka, "Deke kun be ye wo kpie u su a. Ko na a ko to u aja n kere, na a fa nwaa n ma yaarifom, na a bá nya ajeko Nyeme do, na a bra ba su m su." ²³ Ama, sono n tiiri so n na i ahore asaaki, dama i la nejge agaya n dee ti. ²⁴ Na Yesu anie sono n nyunu, na wo se i ka, "I ti kekereke bo nejefo wura Nyeme femeya n nu. ²⁵ Kabo nyooma sin misini bue nu ni, i ti má kekereke tara má kabo nejefo yo na i wura Nyeme femeya n nu." ²⁶ Minem ni tiiri so ni, na ba bisa ka, "Ye nzen i ti so e, njma koro fite nu a?" ²⁷ Na wo bo nu ka, "Deke bo adamande koro yo má i, Nyeme koro yo i."

²⁸ Na Petoro ase i ka, "To, ye yere ayaki ya dekem kere susu u su e." ²⁹ Na wo se bu ka, "Nahore ye m suse am n a, sono kere bo i yakiiri i awuru, wara i yi, wara i ninbaam, wara i wufom, wara i nbaam, Nyeme femeya n dee ti, ³⁰ i mi nya nyanim nusu so yaa i ngoo su, na fa ko fa ba, i nya ngoo n bo i la má awieweri ni."

Kabo Yesu jjo fa koori i yiwee n su kpe nsan su ni

³¹ Na Yesu afere i susufo buru ni nnyom n ako aheme, na wo se bu ka, "Am ti fen. Ya sukó Yerusalem lee, do ye bu kó yo mini Adamande Wa n kabo Nyeme noanie kanfom akere ka bu yó m n a. ³² Na bu fá m wura minem bo bu ti má Yudafofom saa nu, na bu yó m anzasi, na bu kpie m nzuko, na bu yi nanzue go m ju, ³³ na bu fin m ngbere, na bu nya kun m, na i lesan een, na m tenje m yiwee n nu." ³⁴ Ama, i susufom n ati má i

jɔjɔwɔ na be bu. Nyeme ayi má i nyi akere má bu, nyini ti, ba koro ati má i bu.

Kabo Yesu tuntuunri anyinsin be na i nyuri asi ni

³⁵ Saɗga bo Yesu kɔ sudodo miɛ kpiri be bo bu fere i ka Yeriko ni, na anyinsin be tana atin n nɔɔ su wo sere su. ³⁶ I tiiri ka jama n wo sin su ni, na wo bisa ka, “Nzu suyo a?” ³⁷ Na ba se i ka, “Yesu Nazaretifo ni susin a.” ³⁸ Do na wo tien afere i, i ɗa, “Yesu, Feme Davidi anuma, si m aɗunfo.” ³⁹ Na minem n atien i nyu ka i yaki nanmie. Ama, haari ni nyini mmɔɔ, na wo kaaki atien kpa abuka su ka, “Feme Davidi anuma, si m aɗunfo.” ⁴⁰ Yesu tiiri so n na wo ka ajina, na wo se ka bu fa i bra i do. Na ba fere i ama i. I ba dodoori ni, na Yesu abisa i ka, ⁴¹ “A koro ka m yo nzu ma u a?” Na wo bo i nu ka, “M Mibie, m koro ka a ma m nyu asi wo.” ⁴² Na Yesu ase i ka, “Ny asi bekun. Yarada n bo a yo m ni, nyini ma a nya laifie a.” ⁴³ Kpenɗa na wo kaba aɗu asi, na wo su i su, sukansi Nyeme. Jama n nyuri i so n na bu kere gusu akansi Nyeme.

19

Yesu ni Zakayosi deɛ jɔre

¹ Yesu kɔ wuraari Yeriko miɛ kpiri n nu na wo koro ka i sin. ² Bie be woori do, bu fere i ka Zakayosi, i ti lampodefom kere kpien wo, na i la ajeke agaya. ³ Na wo boro i nyi ka i nyu Yesu na i si i. Ama, jama asunnu agaya n deɛ ti, wo koro aɗu má i, dama i ti soɗo tika a. ⁴ Nyini ti, na wo nyati adu jama n mo ako afun baka na i nyu i, dama wo nyu ka Yesu fá nyini baka n bu sin a. ⁵ Saɗga bo Yesu ba juuri nyini awɔre n nu n na wo nie aɗgoro, na wo se i ka, “Zakayosi, jura bra ndende, dama wo yo daka ka m yo u wɔfo ɔ nyuma.” ⁶ Na wo jura ndende, na wo kɔ ade i wɔfo ni ahorejo bambaka. ⁷ Na bo bu nyuri i n kere aɗuɗuti. Bu ɗa, “Ahin soɗo n ako na i kɔ da satieyofɔ dika.” ⁸ Na Zakayosi ayasu ajina, na wo se Mibie n ka, “M Mibie, ti fen. M kpáaki m ajeke kere nu busu nnyo, na m fá buekun n ma yaarifom. Na nzen ma sisi be, m tó i so nyusu nna, na m fá ma i mi.” ⁹ Na Yesu ase i ka, “Nyuma deɛ cɛen n nu, Nyeme ade ahin awuru n nufom tii aji, dama ahin soɗo ni mmɔɔ ti Abraham busu nufɔɔ. ¹⁰ Nahore, mini Adamande Wa n baari ka m bá nienie minem bo ba mini n wo na m dé bu tii ji.”

Mieɛnu fa kɔ akɔɔ buru nbem dabuɗu n jɔre

¹¹ Saɗga bo minem ni toko so bu sui ti ahin jɔrem bo Yesu sujɔɔ bu ni, na Yesu akaaki abo bu mieɛnu be, dama nyini saɗga ni wo ka kaan so na i wúra Yerusalem miɛ kpiri n nu, na minem asunsun ka saɗga n akaba aju bo Nyeme bá nie i minem su leɛ. ¹² Nyini ti, na wo se bu ka, “Feme baa be yo woori bere a, cɛen be so ɔ, na wo yasu ka i kɔ asien dede be su ka i kɔ di femeya na i kpie i nyi ba. ¹³ Kana i ba kɔ ni, na wo fere i akɔɔm buru, na wo fa nyaa akpaaki bu kere nu, na wo se bu ka, ‘M kɔ wieweri, ambere si kabo am yo ahin nyaa n a, haari m bá kpie m nyi ba.’ ¹⁴ Nyini soɗo n gusu, i minem akoro má ka i yo bu feme, bu kpo i wo, nyini ti, na ba sunma minem ka bu kɔ se ka, ‘Ya koro má ka ahin soɗo n bá yo ya feme.’ ¹⁵ Na soɗo n ako adi femeya ni, na wo kpie i nyi aba. I ba juuri kpenɗa i kaba tieɛnri i akɔɔm ni nɔɔ ɔ, adena i si kperɛ bo ba nya i fite i nyaa bo i fa maari bu n nu. ¹⁶ Na akɔɔ n bo i du mo baari n ase i ka, ‘M mibie, u

ɲwaa n bo a fa maari m ni, ma nya i ɲusu buru abuka su.' ¹⁷ Na i mibie n ase i ka, 'Nfan. Wɔrɔ akɔɔ kpa, kabo a kere ka a la dabuɲu nie deke kaan su ni, m má a nie miem buru su.' ¹⁸ Na akɔɔ n bo i tɔ su nnyɔ su n aba, na wɔ se ka, 'M mibie, u ɲwaa n bo a fa maari m ni, ma nya i ɲusu nnu abuka su.' ¹⁹ Na wɔ se nyini n gusu ka, 'M má a nie miem nnu su.' ²⁰ Na akɔm n kun be aba ase ka, 'M mibie, u ɲwaa n bo a fa maari m yaa, m fa pɔɔndiiri sanvuin nu fa seeri wɔ. ²¹ M soroori sere wɔ, dama a ti u sɔnɔ fangafɔ ɔ. A de deke bo i ti má u dɛɛ, na a kaaki kpɛ deke bo a dɔ má i.' ²² Na wɔ se akɔɔ n ka, 'Wɔrɔ akɔɔ tiefɔ ni, u noanie n bo a jɔjɔ i n ye m fá yo u ɲgbɛɛn a. A ɲa a si tenle ka m ti m sɔnɔ fangafɔ ɔ, na m de deke bo i ti má m dɛɛ, na m kaaki kpɛ deke bo ma dɔ má i, má sɔ? ²³ Tɔ, ye nzu ti ye a fa má m ɲwaa n akɔ ase má banɲifom dɔ a? Na má m ba kpɛeri m nyi baari, má m nya kpɛre buka su.' ²⁴ Dɔ na wɔ se bo bu jina dɔ n kere ka, 'Am de ɲwaa n fite i dɔ, na am fa ma akɔɔ n bo wɔ nya m ɲwaa n ɲusu buru abuka su ni.' ²⁵ Ama, na ba se i ka, 'Ya mibie, ye yiri du mɔ la u ɲwaa n ɲusu buru e.' ²⁶ Na wɔ se bu ka, 'M suse am wɔ lɛɛ, ka, sɔnɔ kere bo i la deke be, bu má i be buka su wɔ. Ama, sɔnɔ kere bo i la má pui, haari ni nyini kaan n bo i la i ni, bu cín de i dɔ ɔ. ²⁷ Ama, m ahin kpɔfom bere yiri, má ba koro má ka m yo bu fɛmɛ, am fa bu ba jina m nyunu fɛn na am kun bu kere.' "

Kabo Yesu wuraari Yerusalem ka fɛmɛ dɛɛ su ni

²⁸ Yesu seeri sɔ wieeri ni, na wɔ du bu nyunu na bu kɔ Yerusalem mie kpɛri n nu. ²⁹ I ba dodoori miem bo bu fere bu ka Befage ni Betani, nyini miem ni dodo buka n bo bu fere i ka Oliva Buka n wɔ, dama oliva bakam gɔ su wɔ. Dɔ na wɔ sunma i susufom n nu nnyɔ, ³⁰ na wɔ se bu ka, "Am kɔ mie kaan n bo i wo am nyunu dɔ ni, am kɔ ɲa am wura mie n nu, am ɲú ka kaakobaa be minda, be nya fun má i. Am nyangi i bra fɛn. ³¹ Nzen be bisaari am ka nzu ti ye am sunyangi i a, am se i ka Mibie ni koro i a." ³² Na bere n bo i sunmaari bu n akɔ, akɔ ɲu kaakobaa n ka i minda kabo i seeri bu ni. ³³ Sangga bo bu sunyangi i ni, na i fom n abisa bu ka, "Nzu ti ye am sunyangi kaakobaa n a?" ³⁴ Na ba bɔ bu nu ka, "Mibie ni koro i a." ³⁵ Na ba fa i aba Yesu dɔ, na minem n atereki bu suturam anana kaakobaa n ɲu, na ba buka Yesu na wɔ fun. ³⁶ I fun tanaari su wieeri n na i wo kɔ su ni, na minem n afa bu suturam atereki ase atin n nu. ³⁷ Sangga bo i ba dodoori Yerusalem mie kpɛri n nu, fa kɔ awɔre n bo i atin kaba cɔɔndi Oliva Buka n su ni, na i susufom beberebe sukansi Nyemɛ ni ahorejɔ, na bu subo kuyigindi, dama ba ɲu alekutura sakpakpam bo wɔ yo i n dɛɛ ti. ³⁸ Bu ɲa,

"Terefie wo fɛmɛ n dɔ,
Yiri n bo i suba Mícera n dɛɛ duma n nu ni.
Ahoreda wo angoro,
na kansi wo Nyemɛ bo i wo angoro n dɔ."

³⁹ Dɔ na Farasifom nbem bo bu wo jama n nu n ase Yesu ka, "Ya Kerefɔ, tien u susufom n ɲu ka bu yaki naɲmie." ⁴⁰ Na wɔ se bu ka, "M suse am wɔ lɛɛ, ka, nzen má bere yakiiri naɲmie, má am ɲu ka yabuem bo bu da bere n ayasu suyo naɲmie."

Kabo Yesu suunri Yerusalemfom n dɛɛ ti ni

⁴¹ Sangga bo Yesu ba dodoori Yerusalem mie kpɛri n na i ɲuuri i sɔ ni, na wɔ sun mie n dɛɛ ti, ⁴² na wɔ se ka, "Nzen má nyuma dɛɛ cɛɛn n nu am

si sam bo bu fa ahoreda ba ni, má i ti má so. Ama, kabo i ti ni, am koro ŋu má nyini sam ni. ⁴³ Sanga ni suba bo am kpɔfɔm bá ta kanda bara ye am deke kere na am koro fite má nu. ⁴⁴ Bu kún am ni am nbaam, na bu fúfu am ahin miɛ n kere pepere, haari yabuɛ kun n kpein mmɔɔ bá nana má i beŋgu su. Ahin n kere bá yo so, dama am asi má sanga n bo Nyeme baari ka i ba de am tii ji ni.”

Kabo Yesu fɔɔnri watafɔm fiteeri Nyeme Sereebiri Awuru n nu ni

⁴⁵ Dɔ na Yesu akɔ awura Nyeme Sereebiri Awuru n nu, na wɔ bo i bu sufɔn yi watafɔm, ⁴⁶ na wɔ se bu ka, “Ba kere i Nyeme Jɔre Kadasi n nu ka, Nyeme ŋa o, ‘M awuru ni, bu bá fere i ka awuru bo bu bá sere Nyeme nu.’ Ama, amberɛ afa i ayo awiefɔm fiɛɛbiri.”

⁴⁷ Cɛɛn n kere cɛɛn, Yesu kere minem wɔ Nyeme Sereebiri Awuru n nu. Na Nyeme sayoowa dɔŋguyofɔ nkpienkpiɛnm, ni Nyeme noaniɛ kerefɔm, ni Yudaɔfɔm teretereɔfɔm n akoro ka bu kun i, ⁴⁸ ama, ba koro anya má atin, dama minem n kere koroori ka bu so bu sui wɔ, na bu ti i kereewam ni.

20

Kabo bu bisaari Yesu deke bo i yiko n fite ni

¹ Cɛɛn be so ɔ, Yesu wo Nyeme Sereebiri Awuru n nu sukere minem, na i sukan labari kpa n kere bu. I wo kere su n na Nyeme sayoowa dɔŋguyofɔ nkpienkpiɛnm, ni Nyeme noaniɛ kerefɔm, ni Yudaɔfɔm nkpienkpiɛnm aba i dɔ ² aba ase i ka, “Ŋma dɛɛ yiko nu ye a yo nyini sam kere a? Kan na ya ti. Ŋma ma u nyini yiko ni, ye a yo nyini sam n a?” ³ Na wɔ bo bu nu ka, “Am ma m du mɔ bisa am bisaawa kun be ka. Kisa, amberɛ kan na m ti, ⁴ ŋma maari Yohane atin ye i ba biɛeri minem Nyeme nzue n a? Nyeme nzen adamande?” ⁵ Na ba bisa bu ŋuɔ nu kabo bu bo i nu barasu, bu ŋa, “Nzen ya seeri i ka Nyeme maari i atin a, i bisa ya ka, ye nzu ti ye ya da má Yohane ŋu a? ⁶ Ama, nzen ya seeri i ka adamande dɔ, minem kere tú ya yabuɛ wɔ, dama bu kere soroori su ka Yohane yo tiiri Nyeme noaniɛ kanfɔ ɔ nahɔre su.” ⁷ Nyini ti, na ba bo i nu ka, “Ya si má soɔ bo i maari i atin.” ⁸ Na yiri gusu ase bu ka, “Mini mmɔɔ sé má am soɔ bo i dɛɛ yiko nu na m yo ahin sam n kere ni.”

Kabo Yesu boori miɛɛnu niiri Yudaɔfɔm nkpienkpiɛnm ni

⁹ Dɔ na Yesu abo minem ahin miɛɛnu ni, i ŋa, “Soɔ be yo woori bere a, na wɔ dɔ i baka suuwa barasu be fie. Na wɔ nya afa awura i npadifɔm saa nu, na wɔ kɔ atin akɔ aɛɛ. ¹⁰ Sanga ba juuri bo i si ka baka suuwam n abi ni, na wɔ sunma i akɔɔm kun i npadifɔm n dɔ, ka i kɔ de i dɛɛ bo ba nya i n bra. Akɔɔ n kɔ juuri ni, na ba tara i abo i, na ba fon i akpie i nyi i saa ŋgbɛɛn. ¹¹ Na fie n fɔ n asunma i akɔɔ n kun bekun, na ba tara i abo i, na ba kpa i nyinyɛ, na ba ma wɔ kpie i nyi i saa ŋgbɛɛn. ¹² Kpe nsan su ni, na wɔ sunma akɔɔ nyiŋga, na ba tara i abo i, na ba ma i mandim, na ba fa i atu baka suuwam fie n ahemeɛ. ¹³ Dɔ na fie n fɔ n ase ka, ‘Ye m yó se wɔ lɛɛ kisa? M súnma m tiɛngu wa koroowa n wɔ, beni, bu má yiri jirima.’ ¹⁴ Ama, sanga bo npadifɔm n juuri ka baa ni suba ni, na ba se bu ŋuɔ nu ka, ‘I wa n bo i dí i aja n lɛɛ suba n a. Am bra na ya kun i, adena aja n kere ká ya dɛɛ.’ ¹⁵ Dɔ na ba cin i atu baka suuwam fie n ahemeɛ, na ba kun i.” Na Yesu anya abisa bu ka, “Am sunsun ka fie n fɔ ni yó bu se wɔ?”

16 I bá kun nyini npadifom n kere wɔ, na i fá fie n wura mine fɔfɔrem saa nu.”

Saŋga bo minem ni tiiri sɔ n na ba se ka, “Nyeme yo ya kisi ni nyini.”

17 Na Yesu ace anie bu do na wɔ se bu ka, “Kabo ba kere i Nyeme Jɔre Kadasi n nu ni, am tiiri i bu se wɔ? Bu ŋa,

‘Yabue n bo bondo tafom n faari i tuuri ni,

yiri ye wɔ kaaki bondo n jaa yabuem kere tii a.’

18 Sono kere bo i kpaasiiri nyini yabue n su, i mi búbu nu wɔ mumuku, na sono kere gusu bo nyini yabue n tɔɔri i ŋu, i sán i mi samene wɔ.”

19 I seeri sɔ ni, na Nyeme noanie kerefom ni, ni Nyeme sayoowa doŋgu-yofo nkpienkpienm n akaba akpini atin kabo bu yo na bu tara i, dama bu faari nu ka mieenu n bo i boori i ni, i bo niiri bere wɔ, ama, bu soroori minem dee ti, na ba yaki i.

Kabo bu sɔɔri Yesu ŋee lampo to busu ni

20 Nyini ti, na Nyeme noanie kerefom ni, ni Nyeme sayoowa doŋgu-yofo nkpienkpienm n akpini atin kabo bu yo na bu nya Yesu taraabiri. Na ba bo mine nbem ajaakpien ka bu yo bu ŋu ka bu ti mine kɔm wɔ, na bu ba sɔ i ŋee na bu bisa i noanie nbem, adena bu koro fa i wura gomina yikofo n saa nu. 21 Na nyini minem n ase Yesu ka, “Ya Kerefo, ya si ka u noanie joɔɔwa ni u kereewa kere ti nahore wɔ, na a tantambu má nu, ama, a kere minem wɔ nahore su kabo Nyeme atin ti barasu. 22 To, ya dee atin n su, atin wo nu ka ya to lampo ma Romafom Feme Kpiri Siza, nzen atin wo má nu?” 23 Ama, na wɔ fa nu ka bu koro ka bu kpie i mbenle wɔ, na wɔ se bu ka, 24 “Am fa ŋwaa bra na m nie.” Bu fa baari ni, na wɔ bisa bu ka, “Am nie ahin ŋwaa ni. Nma dee tii ni i duma wo su a?” Na ba bo i nu ka, “Feme Siza dee a.” 25 Na wɔ se bu ka, “To, deke bo i ti Feme Siza dee, am fa ma Feme Siza, na deke bo i ti Nyeme dee, am fa ma Nyeme.”

26 Do na ba ŋu ka bu koro nya má i taraabiri minem nyunu bere, ama, kabo i boori bu nu n dee ti, na ba mie, na ba to amuna.

Kabo bu bisaari Yesu fa kɔɔri yiwee tenje jɔre su ni

27 Na Yudafo ase se barasu nbem bo bu fere bu ka Sadusifom ni, aba Yesu do. Bu dee kereewa la ka Nyeme tenje má minem bu yiwee nu n a. Na ba ba abisa i jɔre be, bu ŋa, 28 “Ya Kerefo, Moyisi yo kereeri noanie be maari ya, ka nzen sono wu yakiiri i yi na i ni bara n anya má baa, wɔ yo daka ka i niema n fa kunofo n na bu wu nbaam ma goɔ n bo wɔ wu ni. 29 To, sono be yo laari nbaabiesom nso a, na baakpien n aja bara, na wɔ wu ayaki bara ni, ba nya má baa. 30 So ye bo i to i su nnyɔ su, 31 ni nsan su n yoori a, haari fa ko kpuraari nso su ni, bu be mmɔɔ anya má baa ye bu wuuri a. 32 Kasin na bara n gusu aba awu. 33 To, kabo bu mine nso n kere aja bara n na ba wu sɔ ni, cɛn n bo Nyeme bá tenje minem bu yiwee n nu ni, bara ni ká ŋma dee wɔ?” 34 Na Yesu abo bu nu ka, “Nbaram ni nbiesom bo bu wo bere kisa ni ja ajaa, 35 ama, nbaram ni nbiesom bo Nyeme anu ka bere ti ye ni ka bu bá tenje bu yiwee n nu fa ko fa ba ni, bere ja má ajaa kun, 36 dama bu wu má kun. Bu wo bere ka Nyeme merɛkem wɔ. Bu ti Nyeme nbaam wɔ, dama ka ba tenje bu yiwee n nu. 37 Na fa ko kabo Nyeme bá tenje minem bu yiwee n nu ni, Moyisi mmɔɔ yo kereeri ka i ti sɔ o. Wɔ kere i Nyeme Jɔre Kadasi n nu, fa ko saŋga bo sin n jeeri buwe baka n su ni, ka, Micera ni ti Abraham, ni Izaki, ni Jakɔbu dee Nyeme a.”

38 Na Yesu asa su ase bu ka, “To, kabo Micera n ti nyini minem dee Nyeme

ni, nyini kere ka bu toko la ηγωω λεε. Nyeme ti má bo ba wu n dεε Nyeme, i ti bo bu la ηγωω ni dεε Nyeme a, dama sɔnɔ kere ηγωω fite yiri dɔ a.”

³⁹ Dɔ na Nyeme nɔaniε kerefo nbem ayasu ase i ka, “Nfan. Ya Kerefo, u bɔ nu n ti kpa.” ⁴⁰ Nyini sin, be abo má su ka i bisa i jɔre bekun.

Kristo Tiidefo n bo i ti Feme Davidi anuma n jɔre

⁴¹ Na Yesu ajojo minem dɔ fa kɔ Kristo Tiidefo n su, na wɔ bisa bu ka, “Ye nzu ti ye bu bita jojo ka Kristo n ti Feme Davidi anuma a? ⁴² Dama kabo ba kere i Kansi Jue kereεwam n nu ni, Feme Davidi ni i tii ase ka, ‘Na Micera n ase m Mibiε n ka, ‘Ba tana m saa fɔmbɔrɔ su fen,

⁴³ haari m bá ma u kpɔfɔm kere ba kutu u jaa bu.” ’

⁴⁴ Tɔ, Feme Davidi mmɔɔ fereeri Kristo n ka i Mibiε wɔ, ye Kristo n yo se kaaki yo Feme Davidi anuma a?”

Kabo Yesu ηa mine si bu ηu sa ni Nyeme nɔaniε kerefo n ni

⁴⁵ Saŋga bo minem n kere jina wo i nɔaniε n ti su sɔ ni, na Yesu ase i susufɔm n ka, ⁴⁶ “Am si am ηu sa ni Nyeme nɔaniε kerefo n ni, deke bo bu koro i n la ka, bu wura sutura ngbingbirim wɔ, na bu nati sujengbe, na sɔnɔ kere suyo bu anse gɔɔsu. Nyini minem n anya awura bu tientienbunɔɔ sɔɔm n nu ni, wara ba nya afere bu tientienbunɔɔ bambaka diire diibirim ni, bu koro ka bu tana kpirikoro tanaabirim wɔ. ⁴⁷ Nyini minem n sɔ fin nkunafɔm nenɔgem wɔ, na bu jina sere Nyeme ce, adena minem ηu ka bu ti mine kpam wɔ. Jina ceen, bere bá nya suicin tara minem kere.”

21

Kabo kunafɔ be yiiri saraka ni

¹ Tɔ, na Yesu anie aju kabo nenɔgem suyi bu ηwaa wura alaka bo minem yi saraka wura nu ni. ² Kunafɔ yaarifɔ be gusu woori dɔ, na wɔ ba ayi ηwaa kaan be bo i koro to má pui awura saraka n nu, na Yesu aju i. ³ Dɔ na wɔ se ka, “Nahɔre ye m suse am n a, nyini kunafɔ n ayi ηwaa atara minem kere. ⁴ Dama nenɔgem la ηwaa beberebe n dεε ti, ye ba yi be a. Ama, nyini kunafɔ n ni i yaari n kere, i deke kere bo i la i λεε ye wɔ yi i n a.”

Kabo Yesu seeri ka Nyeme Sereebiri Awuru ni bá bereki ni

⁵ Na Yesu susufɔ nbem ajojo fa kɔ Nyeme Sereebiri Awuru n su, kabo ba ta i ni yabue ngbingbirim ni aceerim bo bu fa ba ce Nyeme na i yo nyumi barasu ni. Bu wo jojo n su sɔ ni, na Yesu ase ka, ⁶ “Nyini dekem bo am ηu bu ni, saŋga suba bo yabue kun n kpein n mmɔɔ bá nana má i benɔgu su. Bu bá bereki i kere gɔ ɔ λεε.”

Kabo Yesu kereeri fa kɔ durunya n awieeri su dεε jɔre ni

⁷ Na Yesu susufɔm n abisa i ka, “Ya Kerefo, saŋga bɔnɔ ye ahin sam kere bá yo a? Ye nzu deke bá kere ya ka saŋga n adodo bo ahin sam n kere bá yo a?” ⁸ Na wɔ se bu ka, “Am si am ηu sa, na má am ma be dadaka am. Dama mine dɔŋgu bá fa m duma ba, na bu sé ka, ‘Yiri la mini a.’ Na bu káaki se am ka, ‘Saŋga n aju λεε.’ Ama, má am su bu su. ⁹ Saŋga bo am bá ti aluwa ηga fen, wara bu sukun lue dɔ, má am ma sere ti am. Dama wɔ yo daka ka nyini sam n kere bá yo sin ka, ama, i kere má ka durunya n awieeri λεε.”

¹⁰ Na wɔ kaaki ase bu ka, “Daanfɛ daanfɛ bá kun lue ni bu beɔgum, na nfemem kún lue ni bu beɔgu nfemem. ¹¹ Na asien bá kpisi agaya, na ahɔe tó, na alɔɔba tó awɔre awɔrem nu, na ya bá ɔɔ anyumbaa ciire sa nbem ka bu sutie fite aɔgoro n nu.

¹² Ama, kana ahin sam kere bá yo ni, bu tára am, na bu kére am wuwuruwa, na bu fá am wura yikofom saa nu, na bu dí am jore bu tientienbunɔ sɔɔm nu, na bu nyí am dansaraka, na bu fá am wura nfemem ni gominam saa nu, na bu fá am jina bu nyunu, mini deɛ ti. ¹³ Ahin má am atin a, na am kóro kan labari kpa n kere bu. ¹⁴ Ama, am du mɔ yo am sunsunni nu na má am ma i mie am, kabo bu kɔ bisa am na am jɔɔ barasu. ¹⁵ Dama mini má am alecira nɔanie bo am jɔɔ a, na am kɔfom be mmɔ kóro la má nɔanie be bo bu kóro jɔɔ bo am asi, wara bu fá ta am nyi. ¹⁶ Haari am wufom, ni am ninbaam, ni am lamɔsim, ni am danfom mmɔ bá tɔ am ma nfangafom, na bu kún am nbem. ¹⁷ Mini deɛ ti, sɔɔ kere kpó am. ¹⁸ Ama, am tiɔɔmie kun n kpein mmɔ ká má ɔɔben. ¹⁹ Nzen am mindi deerɔ nyini n kere, am nyá ɔɔ.”

Kabo Yesu jɔɔɔri ka Yerusalem mie ni bá saaki barasu ni

²⁰ Na Yesu akaaki ase i susufom n ka, “Sanɔa bo am bá ɔɔ ka sojam abara aye Yerusalem mie kpɔri n ni, am si tenle su ka i cé má, bu sáaki mie n kere lee. ²¹ Nyini sanɔa ni, wɔre kere bo a tiiri i ɔɔa na a wo Yudiya asien n su, ɔmati kɔ bukam n su. Wɔre kere bo a wo mie n nu, ɔmati fite nu. Na wɔre kere gusu bo a wo mie n aheme, má a kpɔe u nyi kɔ mie n nu kun. ²² Dama ahin suicin kekereke sanɔa ni yó yiwa, kabo ba kere i Nyeme Jɔre Kadasi n nu n kere. ²³ Nyini sanɔa ni yó kekereke agaya ma nyinsefom, ni nbaram bo bu nbaam toko nu ni. Dama minem n bo bu wo ahin asien n su ni dí yaari agaya, na Nyeme cín bu sui. ²⁴ Na bu kún nbem lue nu, na bu tára nyɔngam domue, na bu fá bu kɔ asien asienm n kere su, na minem bo bu ti má Yudafoɔm ni sáaki mie n kere haari fa kɔ ju sanɔa bo bu yiko bá wie.”

Kabo Adamande Wa ni bá kaaki ba barasu ni

²⁵ Na Yesu ase bu ka, “Na alekutura sam nyá ba tie fite wie n ni sara n, ni asarambaam kere nu. Na durunya n nu fen, asien asienm n sufom kere ahore tánda, na sere tí bu, fa kɔ kabo tieku nzue n bo barasu, na i yo nanmie agaya ni. ²⁶ Sam bo bu bá yo durunya n nu n deɛ ti, nyini má sere ti minem na bu tó cin, dama aɔgoro n kere kpisi wɔ. ²⁷ Na minem nyá ɔɔ ka mini Adamande Wa ni sufite aɔgoro yinyingu n nu suje piepieu suba ni yiko bambaka. ²⁸ Sanɔa bo nyini sam n kere bá suyo ni, am yasu na am ye am tii su ni ahoresi, dama sanɔa n adodo bo Nyeme bá de am tii lee.”

Kabo Yesu ɔa ya fa damba baka fa se nyaari barasu ni

²⁹ Dɔ na Yesu abo ahin mieenu n akere bu. I ɔa, “Am nie damba baka ni baka nyɔngam kere. ³⁰ Sanɔa bo am nya ba ɔɔ ka bu sufieɛ nyawa fɔfɔre ni, ambere ni am tii si ka dɔdɔɔri sanɔa adodo lee. ³¹ Kabo Nyeme Feme bá nie i minem su ni, i yó sɔ sɔ. Sanɔa bo ambere gusu bá ɔɔ ka nyini sam kere suyo ni, am si tenle ka i cé má, Nyeme Feme bá nie i minem su lee.

³² Nahore ye m suse am n a, bo bu la ɔɔ kisa ni wú wie má ka, ye ahin sam kere bá yo a. ³³ Aɔgoro n ni asienɔu n kere bá la awieeri, ama, m deɛ nɔanie n yiri, i la má awieeri cɛn be.”

Kabo Yesu seeri ka ya si ya ŋu sa fa kɔ i ba n su ni

³⁴ Na Yesu ase i susufɔm n ka, “Am si am ŋu sa, na má am susaaki am sanja sutien am nɔɔ sunu nzan subo, na má am ma durunya n nu sa koroowa miɛ am, na má m ba ni fúra am nu ³⁵ kabo toroku tara deke ni. Dama nyini cɛɛn bá fura minem bo bu wo durunya n nu wɔ. ³⁶ Má am fa am ŋu ji, am sere Nyemɛ sanja kere ka i ma am fanga na am koro fite nyini kekereke n kere bo bu suba n nu, na am bá koro jina mini Adamande Wa n nyunu.”

³⁷ Ale kere bo i cin, Yesu kɔ Nyemɛ Sereebiri Awuru n nu wɔ, na i kɔ sukere minem, ale nya ba san, na i kɔ Oliva Buka n su. ³⁸ Ale kere bo i cin ŋgarama fuun, minem ni ba i dɔ Nyemɛ Sereebiri Awuru n nu wɔ, na bu ti i kereewam ni.

22

Kabo bu sɛsɛri su ka bu kun Yesu ni

¹ Sanja n ba dodoori bo bu di bu cɛɛnkpiri n bo bu di i ni kpɔɔ bo bu gɔ má ayiri nu na i yasu ni. Yiri ye bu kaaki fere i ka Butara cɛɛnkpiri n a. ² Na Nyemɛ sayoowa dɔnguyofɔ nkpienkpienm ni, ni Nyemɛ nɔanie kerefɔm ni, anienie atin kabo bu yo barasu na bu kun Yesu, dama bu soroori minem ni ahore wɔ.

³ Na Sitana awura Yudasi Isikariyoti ni, yiri ti Yesu susufɔ buru ni nnyɔm ni kun be a. ⁴ Nyini ti, na wɔ kɔ asese su ni Nyemɛ sayoowa dɔnguyofɔ nkpienkpienm ni, ni Nyemɛ Sereebiri Awuru n tintinijinafɔ nkpienkpienm ni, kabo i tɔ Yesu ma bu ni. ⁵ Bu tiiri nyini n sɔ ni, na bu ahore ajo, na ba se ka bu má i ŋwaa. ⁶ Na Yudasi asoro su, na wɔ kpini atin na i tɔ Yesu ma bu, sanja bo jama wo má i dɔ ni.

Kabo Yesu ni i susufɔm sɛsɛri su ka bu di cɛɛnkpiri diire ni

⁷ Na cɛɛnkpiri cɛɛn n aju, cɛɛn n bo bu di kpɔɔ bo bu gɔ má ayiri nu na i yasu ni. Nyini cɛɛn n ye wɔ yo daka ka bu kpɛ nbɔmbaam kɔm n a, na bu fa tenje Butara cɛɛnkpiri n su. ⁸ Na Yesu asunma Petoro ni Yohane, i ŋa, “Am kɔ sɛsɛ Butara cɛɛnkpiri n diire n su na ya ba di.” ⁹ Na ba bisa i ka, “A koro ka ya kɔ ni kɔ sɛsɛ diire n su a?” ¹⁰ Na wɔ bo bu nu ka, “Am ti fɛn, am kɔ ŋa am wura miɛ n nu, am ni sɔɔ be kába ye, i sɔ dundu ni nzue. Am su i su kɔ wura awuru n bo i kɔ wura nu ni. ¹¹ Na am bisa awurufɔbie n ka, ‘Ya Kerefɔ n ŋa, sɔɔ bɔɔ nu ye i ni i susufɔm ni dí Butara cɛɛnkpiri diire n a?’ ¹² Na i kére am angoro sɔɔ bambaka n bo ba yo i kere dɔngu ni, do ye am sɛsɛ diire n su se ya.” ¹³ I jɔɔ wieeri ni, na ba kɔ anu deke n kere sɔ kabo Yesu seeri bu ni, na ba sɛsɛ Butara cɛɛnkpiri diire n su.

Kabo Yesu ni i susufɔm ni diiri Butara cɛɛnkpiri diire ni

¹⁴ Sanja n ba juuri, na Yesu ni i jaramasam n aba atana ka bu di diire ni. ¹⁵ Na wɔ se bu ka, “Kabo m koroori lɛɛ, m boroori m nyi wɔ ka m ni ambere sanja di ahin Butara cɛɛnkpiri diire n ka, na m nyá di m wahara ni. ¹⁶ Dama m suse am wɔ lɛɛ, ka, m dí má ahin diire n kun, má ka i ba yo yiiwa Nyemɛ femeya n nu.”

¹⁷ Dɔ na wɔ fa awa ni nzan, na wɔ da Nyemɛ asi, na wɔ se bu ka, “Am de na am nu, na am fa ma am benju. ¹⁸ M suse am wɔ lɛɛ, ka, m nú má ahin nzan n kun, má ka cɛɛn n bo Nyemɛ Fɛmɛ bá nie i minem su.”

¹⁹ Na Yesu akaaki afa kpɔɔ, na wɔ da Nyemɛ asi, na wɔ bubu i nu, na wɔ fa ama bu, na wɔ se bu ka, “Ahin kpɔɔ n ti m ɔnɛmbaa lɛɛ, ye m sufa ma am n a. Am yo ahin sɔ adena am fa tenge m su.” ²⁰ Bu diiri diire n wieeri ni, na wɔ kaaki afa awa ni nzan ni, na wɔ yo sɔ, na wɔ se bu ka, “Ahin nzan n ti sɛsɛsu fɔfɔrɛ n bo Nyemɛ sufa m mbunja n sudi i di n a. Ambere dɛɛ ti ye m mbunja ni sonji gɔ a.

²¹ Ama, am niɛ. Sɔnɔ n bo i tɔ m ni wo diire n diibiri fɛn, m ni yiri susanɔa di diire n a. ²² Mini Adamande Wa ni wú kabo Nyemɛ adu mɔ acici ka m wú n wɔ, ama, sɔnɔ n bo i tɔ m ni, i mi bá ɔn anyumboro.” ²³ Dɔ na ba bisa bu ɔnɔnɔ nu ka, “Ye ya nu ɔnɔnɔ koro yo ahin sa n a?”

Kabo Yesu kereeri ka mɔfɔ yo i ɔn kaan ni

²⁴ Na Yesu jaramasam n ase akuruwa bu ɔnɔnɔ nu fa kɔ sɔnɔ bo i tara bu kɛrɛ bu nu. ²⁵ Na Yesu ase bu ka, “Minɛm bo bu su má Nyemɛ n dɛɛ n fɛmɛm, bɛrɛ miɛ bu minɛm a, na bɛrɛ bo bu la yiko minɛm ɔn ni, bu fere bu ka bukafɔm. ²⁶ Ama, má ambere yo sɔ. Sɔnɔ bo i tara am kɛrɛ am nu ni, i ti ye ni ka i mi yo i ɔn kaan, na bo i ti am mɔfɔ n gusu, i ti ye ni ka i mi yo i ɔn kaan na i su am. ²⁷ Sɔnɔ bo i tana di diire ni, ni bo i su amusui ni, ɔnɔnɔ tara i bɛnɔnɔ a? Yiri la bo i tana di ni, má sɔ ɔ? Ama, mini wo am nu ka sɔnɔ bo i su amusui wɔ.

²⁸ Sanɔa kɛrɛ bo m woori kekereke nu, ambere jinaari m sin a. ²⁹ Kabo m Si Nyemɛ ama m atin ka m di fɛmɛya ni, sɔ ye mini gusu fá ma am a, ³⁰ na am dí na am nú m fɛmɛya n nu, na am tána fɛmɛya biɛm su, na am niɛ Yisarelifɔm anɔ buru ni nnyɔm n su.”

Kabo Yesu seeri ka Simon Peto bá kete i ni

³¹ Na Yesu ase Simon ka, “Simon, ti fɛn. Sitana asere atin ka i kpaja am kabo bu kpaja ɔnɔnɔ n wɔ. ³² Ama, ma sere Nyemɛ ama u na má a yaki m yaradayo. Na sanɔa bo a ba kaaki ba suuri m su bekun ni, buka u ninbaam ni, na bu nya ahoresi.” ³³ Na wɔ se i ka, “M Mibiɛ, m ɔnɔnɔnɔ yaki má u da, ɔnɔnɔ bu sánɔa nyi wɔrɔ ni mini kere wɔ, na ya sánɔa wu.” ³⁴ Na Yesu ase i ka, “Peto, m suse u wɔ lɛɛ ka, nyuma, kana akɔnyuma bá bo, a kete kpe nsan su ka a si má m.”

Kabo Yesu seeri ka susufɔm fa kɔ sa kekerekem bo bu bá yo ni

³⁵ Na Yesu abisa i susufɔm n ka, “Sanɔa bo m sunmaari am na am abita má ɔnɔnɔnɔ kuruku, wara kuruku, wara gbagbaa ni, nzu kpɛɛri am su a?” Na ba bo i nu ka, “Pui akpɛ má ya su.” ³⁶ Na wɔ se bu ka, “Ama, kisa, wɔrɔ kere bo a la ɔnɔnɔnɔ kuruku, wara kuruku, fa i, na wɔrɔ kere bo a la má takobe, tɔ u tanlɛɛ na a fa ɔnɔnɔnɔ n to be. ³⁷ Dama ba kere i Nyemɛ Jɔrɛ Kadasi n nu ka, ‘Bu faari m buuri satieyofɔm kun wɔ.’ M suse am wɔ lɛɛ, ka, wɔ yo daka ka, mini dɛɛ ti, na i yo yiiwa. Nahɔrɛ, deke n bo bu kere niiri mini ni, i suyo yiiwa.” ³⁸ Na ba se i ka, “Ya Mibiɛ, niɛ. Takobe nnyo yaa fɛn.” Na wɔ se bu ka, “Wɔ se su.”

Kabo Yesu jeke tiiri n na i kɔ sereeri Nyemɛ ni

³⁹ Na Yesu afite miɛ n nu, na wɔ kɔ Oliva Buka n su, kabo i nati yo ni, na i susufɔm n asu i su. ⁴⁰ Sanɔa bo i kɔ juuri dɔ ni, na wɔ se i susufɔm n ka, “Am sere Nyemɛ, adena má deke be yo am na am wura satie nu.” ⁴¹ Dɔ na wɔ yaki bu, na wɔ kɔ mɔ kaan, na wɔ kutu asere Nyemɛ. ⁴² I ɔn, “M Si Nyemɛ, nzen i ti u koroyanu, yi m fite ahin anyumboro n bo i suba m dɔ n

nu. Haari ni nyini mmɔɔ, má a yo kabo m koro ni, ama, se kabo a koro ni.”
⁴³ Na Nyeme mereke be atie afite angoro aba asi i ahore. ⁴⁴ Ahoretanda n bo i tuuri i n dɛɛ ti, na wɔ sere Nyeme ni anyumboro abuka su, na i anjuye sukpinkpin asienju ka mbonja dɛɛ su.

⁴⁵ I sereeri Nyeme n wieeri ni, na wɔ yasu akpie i nyi ako i susufɔm n dɔ, i kɔ ŋuuri ka bu wo daafiri su, dama bu ahore asaaki agaya n dɛɛ ti.
⁴⁶ Na wɔ se bu ka, “Nzu ti ye am da daafi a? Am yasu jina na am sere Nyeme, adena má deke be yo am na am wura satie nu.”

Kabo bu taraari Yesu ni

⁴⁷ Na sanga bo i toko wo jɔjɔri n su ni, na jama be aba aju. Yudasi bo i ti i susufɔ buru ni nnyɔm nu kun ni, duuri bu mɔ a, na wɔ kɔ Yesu dɔ ka i kɔ biti i, ⁴⁸ ama, na Yesu abisa i ka, “Yudasi, a biti m ye a ma bu nya mini Adamande Wa n taraabiri a?”

⁴⁹ Sanga bo i susufɔm bo bu wo i dɔ n ŋuuri sa n bo i suba ni, na ba bisa i ka, “Ya Mibie, ya kpie bu takobe, nzen se?” ⁵⁰ Na bu nu kun akpie ayi sɔnɔ be sui, i saa fɔmbɔrɔ dɛɛ ni, nyini sɔnɔ n ti Nyeme sayoowa dɔnguyofɔ n kere kpien n akɔɔ ɔ. ⁵¹ Ama, na Yesu atien i susufɔm n ŋu ka, “Má am yo sɔ kun.” Na wɔ fa i saa akan sɔnɔ n sui ni, na wɔ nya laifie. ⁵² Dɔ na Yesu ase Nyeme sayoowa dɔnguyofɔ nkpienkpienm ni, ni tintinijinafɔ nkpienkpienm ni, ni Yudafoɔm nkpienkpienm kere bo bu baari ka bu ba tara i n ka, “M ti awiefɔ ɔ, ye am fa takobem ni kɔrɔmam na am ba tara m a? ⁵³ Cɛɛn n kere cɛɛn m ni ambere wo Nyeme Sereebiri Awuru n nu a, am atara má m. Ama, kisa ti sanga bo Nyeme ama atin, na am ni Sitana bo i wo awosin nu n kere am yiko a.”

Kabo Petoro keteeri ka i si má Yesu ni

⁵⁴ Na ba tara Yesu afa i ako awura Nyeme sayoowa dɔnguyofɔm n kere kpien n dika, na Petoro asu bu su, ama, i woori dede kaan ni bere wɔ.
⁵⁵ Mine nbem atɔrɔ sin gisan n afien, atana abara aye i, na Petoro ako abuka bu su. ⁵⁶ I tanaari na sin wein n gɔɔri i ŋu ni, na afani be anu i. Na wɔ nie i nyunu dika gbirim, na wɔ se bu ka, “Ahin sɔnɔ ni mmɔɔ ti i susufɔ ɔ.” ⁵⁷ Ama, na wɔ kete, i ŋa, “Bara, m si má i.” ⁵⁸ Nyini sin, wɔ ce má, na sɔnɔ be gusu aba anu i, na wɔ se i ka, “Wɔrɔ mmɔɔ ti bu kun wɔ.” Ama, na wɔ se i ka, “Wɔrɔ, m ti má bu kun.” ⁵⁹ Na fa kɔ sanga su bekun, na sɔnɔ kun be ajina su kekereke ase ka, “Nahore, ahin sɔnɔ n ti bu kun wɔ, dama yiri gusu ti Galilifo ɔ.” ⁶⁰ Ama, na wɔ se i ka, “Wɔrɔ, m si má ahin jɔre n bo a sujɔɔ i ni mmɔɔ.” Sanga bo i toko wo jɔjɔri n su ni, na akonyuma akaba abo. ⁶¹ Na Mibie Yesu n ace anie Petoro nyunu, na wɔ tenge su kabo Mibie n seeri i ni, i ŋa, “Nyuma, kana akonyuma bá bo, a kéte kpe nsan su ka a si má m.” ⁶² Na wɔ fite ako asun agaya.

Kabo bu yoori Yesu anzasi na bu boori i barasu ni

⁶³ Na minem bo bu bita Yesu ni, ayo i anzasi, na ba bo i. ⁶⁴ Na ba fa sanvuin acin akata i nyumbaa, na ba bisa i ka, “Wɔrɔ Nyeme noanie kanfo ni, ŋma bo u a? Kan kere ya.” ⁶⁵ Na ba kpie i nzuko barasu barasu n kere.

Kabo Yudafo tereterefoɔm diiri Yesu jɔre barasu ni

⁶⁶ Na ale acin, na Yudafoɔm tereterefoɔm atien bu nɔɔ, Nyeme sayoowa dɔnguyofɔ nkpienkpienm ni, ni Nyeme noanie kerefoɔm n gusu buka su, na ba fa Yesu aba bu tientienbunɔɔ n nu. ⁶⁷ Na ba se i ka, “Nzen a ti Kristo Tiidefo n a, se ya.” Na wɔ se bu ka, “Nzen m seeri am ka yiri la mini, am

dé má, ⁶⁸ na nzen m bisaari am bisaawa, am bó má m nu. ⁶⁹ Ama, fite kisa fa kó, mini Adamande Wa ni bá tana Nyeme Yikofó n saa fomboro su wó.” ⁷⁰ Dó na bu kere abisa i ka, “Nka woro ti Nyeme Wa na a?” Na wó bó bu nu ka, “Kabo am jójóri ni, i ti sò ó.” ⁷¹ Na ba se ka, “Ya koro má daanifo be kun. Yere mmóó ni ya tii ati kabo wó se ni.”

23

Kabo bu faari Yesu kó jinaari Gomina Pilato nyunu ni

¹ Na bu tereterefóm n kere bo ba tien bu nòó n ayasu, na ba fa Yesu ako ama Gomina Pilato. ² Na ba bó i bu sujaraki i, bu ña, “Ya kó anju ka ahin sòó ni sudaka ya minem ka bu kete gomina ni, na má bu tó lampo kaari ma Feme Kpíri Siza, i ña ka yiri ni i tii ti Kristo Tiidefó n a, nyini la ka i ti feme wó lé.” ³ Na Gomina Pilato abisa i ka, “Woro ti Yudafofó feme n a?” Na wó bó i nu ka, “Kabo a jójó ni, i ti sò ó.” ⁴ Dó na Gomina Pilato ase Nyeme sayoowa donguyofó nkpienkpienm ni, ni jama n kere ka, “Ma ñu má ngasi bo ahin sòó n ado i.” ⁵ Ama, na ba jina kun su, na ba jaraki i, bu ña, “I kereewa n ama Yudiya awóre n nu minem kere ahore ayasu. I boori i bu Galili awóre n nu wó, ye kisa wó fa aba fén n a.”

Kabo bu faari Yesu kó jinaari Feme Herode nyunu ni

⁶ Gomina Pilato tiiri sò ni, na wó bisa ka, “Sòó n ti Galilifó ó?” ⁷ I tiiri ka i fite dó ni, na wó ma ba fa i ako Feme Herode dó, dama yiri yo nie nyini awóre n su a. Nyini sangá ni, Feme Herode gusu woori Yerusalem mie kpíri n nu. ⁸ Feme Herode ñuuri Yesu ni, na wó yo i fie ako asin su, dama wó ti i ñga ace, na wó koro ka i ñu i na i yo alekutura sa nbem na i nie. ⁹ Nyini ti, na wó bisa Yesu bisaawam beberebe, ama, wó bó má i nu. ¹⁰ Na Nyeme sayoowa donguyofó nkpienkpienm ni, ni Nyeme noanie kerefóm n afite ajina sujaraki i ni anyumboro su. ¹¹ Na Feme Herode ni i sojam n ayo Yesu anzasi, na ba bu i ñgbéen, na ba fa tanlé nyunyumi awura i, na ba fa i akpie i nyi ako Gomina Pilato dó. ¹² Nyini sangá ni, Feme Herode ni Gomina Pilato yo kpo bu benju wó, ama, nyini céen n gbíngbín na ba kaaki danfom.

Kabo Gomina Pilato maari nòó ka bu kun Yesu ni

¹³ Na Gomina Pilato afere Nyeme sayoowa donguyofó nkpienkpienm ni, ni Yudafofó tereterefóm ni, ni minem ni, ¹⁴ na wó se bu ka, “Am faari ahin sòó n baari m dó, na am ase ka i sukere minem na bu kete gomina n wó. Mini ni m tii anie jore n nu am nyunu fén, ama, ma ñu má ngasi bo wó do i. ¹⁵ Feme Herode mmóó ni i tii anju má i ngasi be, nyini dee ti ye wó kaaki i aba ama ya n a. Nahore, ahin sòó n ado má ngasi be bo bu kun i. ¹⁶ Nyini ti, m má bu fin i ñgbere na m yáki i na i kó.” [¹⁷ Afo kere afo, Butara ceenkpíri n nya ba juuri ni, wó yo daka ka Gomina Pilato yi dansaraka n kun ji.] ¹⁸ Ama, na jama n kere atien kungerekun ase ka, “Yi ahin sòó ni ñgóó, na a yi Barabasi ma ya.” ¹⁹ Yiri Barabasi ni i benju ketemafó nbem yo kpiere jore, Yerusalem mie kpíri n nu, na ba di aluwa na ba kun mine. Nyini ti ye bu taraari i dansaraka n a.

²⁰ Gomina Pilato koroori ka i yaki Yesu nu ji n dee ti, na wó kaaki ajojo jama n dó bekun. ²¹ Ama, na bu sutientien su ka, “Kpama i baka jaanu n su na i wu. Kpama i.” ²² Na wó kaaki ase bu kpe nsan su ka, “Ye nzu satie ye wó yo i a? Mini anju má satie be bo wó yo i na bu kun i. M má bu fin i ñgbere wó, na m yáki i na i kó.” ²³ Ama, na ba kaaki atien kpa amie

i ka i kpama Yesu baka jaanu n su. Na bu nanmie yoowa agaya n akunma Gomina Pilato. ²⁴ Na wo ma nɔɔ ka bu yo Yesu kabo minem koro ni. ²⁵ Na wo yi sɔnɔ n bo minem n koroori i n aji, yiri bo i kpiniiri jɔre na i kuunri minem na bu nyiiri i dansaraka ni. Ama, Yesu yiri, na wo ma bu nɔɔ ka bu kun i, kabo Yudafoɔm koro ni.

Kabo bu kpamaari Yesu baka jaanu n su ni

²⁶ Na sojam n afa Yesu afite, na sangha bo bu wo ko su ni, na bu ni bie be aye, bu fere i ka Simon, i ti Sirenefo ɔ. I fite aheme suba mie kunnu, na sojam n amie i ka i so baka jaanu n su Yesu su. ²⁷ Na jama beberebe asu i su, bu nbem ti nbaram wo, na bu susun, na bu sukoko, i dee ti. ²⁸ Na Yesu ace anie bu, na wo se bu ka, "Yerusalem nbaram, ma am sun mini dee ti, ama, am sun ambere ni am nbaam dee ti. ²⁹ Am ti fen, sangha ni suba bo minem ba se ka, "Terefie wo nɔɔkam n do, ni bo bu nya wu ma nbaam ni, ni bo nbaam nya nu ma bu nyufini ni." ³⁰ Nyini sangha n ye minem se ka,

'Nzen ma bukam bereki go ya nu,
na kperem kata ya nu,

ma i ti ye.'

³¹ Nzen bu faari baka mone wuraari sin nu na i jeeri, ye baka wuruuwa yiri yo se wo lee?"

³² Na ba fa satieyofɔ nnyɔ nbem gusu ako ka bu ko kun bu ni Yesu kere.

³³ Sangha bo bu ko juuri dika be bo bu fere i ka Tereawa woobiri ni, na ba kpama Yesu baka jaanu n su, na ba ye i su ajina. Na ba kpama satieyofɔ nnyɔ nbem baka jaanu n su adodo i, bu kpamaari kun i saa fombɔɔ su wo, na ba kpama kun n gusu i saa bie su. ³⁴ Na Yesu ase ka, "M Si Nyeme, fa bu satie ce bu, dama bu si ma sa n bo bu suyo i ni." Na ba tu mbaa na bu si kabo bu kpaaki i suturam nu. ³⁵ Na minem n ajina do sunie i, na Yudafoɔm tereterefoɔm mmɔɔ ayo i anzasi. Bu na, "I na i koro de minem tii ji. Nzen yiri ti Kristo Tiidefo n bo Nyeme ayi i ni, ma i de i nu tii ji." ³⁶ Na sojam n gusu ayo i anzasi, na ba fa nzan gagaraki be ama i ka i nu, ³⁷ na ba se ka, "Nzen wɔɔ ti Yudafoɔm Feme n a, de u tii ji." ³⁸ Na ba kere kereewa be abo akpama i baka jaanu n tii su, kereewa n la ka, "Yudafoɔm Feme n lee."

³⁹ Na satieyofɔ nnyom bo bu sangha kpamaari bu ni Yesu ni, bu nu kun ato i nu ni nzuko, i na, "Ma wɔɔ ti Kristo Tiidefo n a? De u tii ji na a de yere gusu ji." ⁴⁰ Ama, na nyinga n ajaraki i, i na, "A soro ma Nyeme wo? M na ya dee suicin ni i dee n kere ti kun wo. ⁴¹ Ya dee suicin n yiri, i ti deke bo ya de i wo, dama kabo i ti ye ni ka bu yo ya lee, ama, yiri ado ma ngasi be." ⁴² Na wo kaaki ase ka, "Yesu, a ba baari ni u femeya ni, tenge m su." ⁴³ Na Yesu ase i ka, "Nahore ye m suse u n a, nyuma dee ceen n nu, a ba wo m do alezanda nu."

Kabo Yesu wuuri ni

⁴⁴⁻⁴⁵ Na fa ko wiesu kerefi buru ni nnyɔ sangha, wie n afite ma na awosin akata asien n kere su haari naaso kerefi nsan, na tani bambaka n bo bu fa kanda kpaakiiri Soɔ Casi n bo i wo Nyeme Sereebiri Awuru n nu n ati nu nnyɔ, i afien. ⁴⁶ Na Yesu abo awie kpa, i na, "M Si Nyeme, ma fa m nu awura u saa nu." I seeri so wieeri n na wo yo Nyeme dee. ⁴⁷ Sangha bo soja kpien nuuri sa n bo wo yo so ni, na wo kansani Nyeme, na wo se ka, "Nahore su, ahin sɔnɔ n tiiri sɔnɔ fofoe wo." ⁴⁸ Na minem kere bo ba tien bu nɔɔ jina wo i nie su ni, sangha bo bu nuuri sa n bo wo yo n so ni, na

bu kere afa bu saa ataka i benju nu, na ba kpie bu nyi ako awuru. ⁴⁹ Na Yesu danfom n kere, ni nbaram bo bu suuri i su fiteeri Galili awore n nu ni, ajina dede kaan sunie sam n kere bo bu yoori ni.

Kabo bu yoori Yesu sutura barasu ni

⁵⁰ Sono be woori bere, bu fere i ka Yosefu, i ti Yudafoim tereterefoim nu kun wo, na i ti sono kpa, na i yo sa bo i ko atin su Nyeme do. ⁵¹ Wo soro ma su ni sunsunnyi n bo i benjumu faari i na bu yoori Yesu barasu ni. I fite mie kpiri n bo bu fere i ka Aramatiya na i wo Yudiya awore nu n wo, na i dee la ka, i nminda wo, fa ko sanja bo Nyeme Feme ba nie i minem su. ⁵² Na wo ko Gomina Pilato do, na wo ko asere i ka i fa Yesu njunie n ma i. ⁵³ Na wo ko ayi fuin ni baka jaanu n su, na wo fa nzee n apooni i. Na wo ko afa i awura yabue bue bo ba lokoti i ayo i fanjunma n nu na ba nya ase ma sono be nu ni, na wo fa i ase nu. ⁵⁴ Nyini een n tiiri Njumiye een n kokpo een wo, i naaso, wo ka kaan na bu di Njumiye een ni.

⁵⁵ Nbaram bo bu suuri Yesu su fiteeri Galili awore n nu ni, bere suuri Yosefu su, na ba ko anu yabue bue fanjunma ni, ni kabo bu seeri fuin n barasu.

⁵⁶ Na ba kpie bu nyi ako awuru ka bu ko kpa bu nu ni nguin nvanvanim ni tulaalem. Na alecin Njumiye een ni, na ba yi bu njumi kabo Nyeme maari Moyisi noo ka bu yo ni.

24

Kabo Yesu tengeeri i yiwee n nu ni

¹ Na alecin, Yudafoim bakue n bumboori, mone een ngarama fuun, na nbaram n afa tulaalee nvanvani bo ba kpini ase ni, na ba fa ako yabue bue fanjunma n su. ² Bu ko juuri do n na ba nu ka yabue bambaka n akundu ayaki fanjunma n ano ni. ³ Ama, bu wuraari fanjunma n nu ni, ba nu ma Mibie Yesu njunie ni, ⁴ na ba mie aka ajina gbirim, kpenja na ba nu ka nbiesom nnyo jina, bu wura sutura fofoe papasi. ⁵ Na sere ati nbaram n agaya, na ba biri bu tii haari asienju, na minem n abisa bu ka, "Nzu ti ye am sunienie fuinm nu na am nu sono bo i la ngoo a?" ⁶ I wo ma fen. Wo tenge i yiwee n nu. Am tenge su kabo i yo seeri am ni, sanja bo i yo wo Galili awore n nu ni, ⁷ i na, "Wo yo daka ka bu ba fa mini Adamande Wa n wura satieyofom saa nu, na bu kpama m baka jaanu n su, ama, na lesan een na m tenge m yiwee n nu." ⁸ Do na ba tenge Yesu noanie bo i yo seeri bu n su, ⁹ na ba fite fanjunma n nu, na ba kpie bu nyi ako akan sam n kere bo ba nu i ni, akere i susufo buru ni kunm ni, ni nyingam kere. ¹⁰ Nbaram ni la Mariya bo i fite Magadala mie n nu ni, ni Yowana, ni Yakobo dee ni Mariya, ni bu benju nbara nbem, bere kaanri nyini sam n kere kereeri i jaramasam n a. ¹¹ Ama, bu tiiri jore n bo nbaram kan kereeri bu ni, bu sunsuunri ka i ti jore ngbeen wo, ba yo ma yarada. ¹² Ama, na Petoro ayasu anmati ako fanjunma n nu, i ko juuri n na wo kasi anie fanjunma n nu, wo nu ma pui, ma ka nzee n ngumi da. Na wo kpie i nyi aba awuru, na wo birisi fa ko sa n bo wo yo n su.

Kabo Yesu faari i nu kereeri i susufo nnyom barasu ni

¹³ Nyini een ni, na Yesu susufo nnyo nbem sukoo mie kaan be bo bu fere i ka Emosi n su, i ni Yerusalem mie kpiri n waari ma agaya. ¹⁴ Bu wo ko su ni, na bu subo anzama fa ko sa n kere bo wo yo n su. ¹⁵ Bu nati wo

nyini anzama n bo su ni akuruwa ni, na Yesu ni i tii aba atu bu atin nu, ¹⁶ na ba ɲu i, ama, ba koro asi má ka yiri lɛɛ. ¹⁷ Na wɔ bisa bu ka, “Am wo natiiri n su atin n nu ni, am boori nzu anzama n a?” Na ba ka ajina gbirim ni ahoresaaki. ¹⁸ Na bu nu kun be bo bu fere i ka Kelɔpasi n abɔ i nu ka, “I yo sɛ ye wɔfɔm kɛrɛ bo bu wo Yerusalem miɛ kpiri n nu n si sam bo ba yo nyini lennyɔ n nu bɛrɛ, ye wɔrɔ ɲgumi si má?” ¹⁹ Na wɔ bisa bu ka, “Nzu sam?” Na ba bɔ i nu ka, “Yesu Nazaretifo n jɔrɛ. I yo tiiri Nyemɛ nɔanɛ kanfɔ bo i la yiko wɔ, fa kɔ i alekutura sam ni i kereewam su, na i sayoowam sun Nyemɛ ni minɛm n kɛrɛ nu. ²⁰ Na Nyemɛ sayoowa dɔɲguyofɔ nkpienkpienm ni tereterefɔm n ama ba di i jɔrɛ ka bu kun i, na ba kpama i baka jaanu n su. ²¹ Ama, yɛrɛ yo laari tama ka yiri ye wɔ ba ka i bá de Yisarelifɔm tii ji a. Deke bo i buka nyinim kɛrɛ su n la ka, nyini sam kɛrɛ yoori, i nyuma lesan lɛɛ. ²² Haari ni nyini n mɔmɔ, ya nbaram nbem ba kaanri alekutura jɔrɛ be kereeri ya. Bu kɔori yabue buɛ fanjunma n nu wɔ ɲgarama fuun, ²³ ama, ba ɲu má fuin n dɔ. Bu kpieri bu nyi ba juuri ni, na ba se ya ka, bu kɔ ɲuuri Nyemɛ mɛrɛkɛm ka alele nu wɔ, fanjunma n nu, na ba se bu ka i la ɲgɔɔ. ²⁴ Na ya nu nbem gusu akɔ fanjunma n nu, bu kɔ ɲuuri deke n kɛrɛ sɔ ɔ, kabo nbaram seeri ni, ama, ba ɲu má yiri.”

²⁵ Na Yesu ase bu ka, “Ambɛrɛ, ɲgɔnlɛ akpie am su wɔ, nzen sɛ, ye dada kɛrɛ am nya yo má yarada, fa kɔ jɔrɛ n kɛrɛ bo Nyemɛ nɔanɛ kanfɔm jɔjɔori n su? ²⁶ Am si má ka wɔ yo daka ka Kristo Tiidefɔ n di nyini wahara n kɛrɛ ka, na Nyemɛ wura i kpiri?” ²⁷ I seeri sɔ n na wɔ kan i ɲusu jɔrɛ akere bu, kabo ba kɛrɛ i Nyemɛ Jɔrɛ Kadasi n kɛrɛ nu ni, i boori i bu ni Moyisi dɛɛ kereewam wɔ, na wɔ nya akan kabo Nyemɛ nɔanɛ kanfɔm kɛrɛ kereeri ni.

²⁸ Bu ba kɔ suju miɛ n bo bu sukɔ su ni, na Yesu ayo ka yiri susin kɔ mɔ, ²⁹ ama, na ba sere i ni anyumboro, na ba se i ka, “Ba yo ya wɔfɔ. Wɛ atɔ, ale susan lɛɛ.” Nyini ti, na wɔ wura awuru n nu ka i da bu dɔ. ³⁰ Sangɔ bo i tanaari na bu kɛrɛ di diire n ni, na wɔ fa kpɔnɔ, na wɔ da Nyemɛ asi, na wɔ bubu i nu afa ama bu. ³¹ Dɔ na bu nyunu ateke i ɲu, na ba si i, kpeɲga na wɔ mini ayaki bu. ³² Na ba se bu beɲgu ka, “Sangɔ bo i jɔjɔori ya dɔ atin n nu na i kaanri Nyemɛ Jɔrɛ Kadasi n bu kereeri ya ni, i maari ya ahorejɔ kɔ sin su wɔ, má sɔ?”

³³ Na ba kaba ayasu bɛrɛ akpie bu nyi akɔ Yerusalem miɛ kpiri n nu, na ba kɔ anu ka i susufɔ buru ni kunm ni, ni nyingam n atien bu nɔɔ, ³⁴ bu suse ka, “Ya Mibiɛ n atɛɲɛ nahɔrɛ su. Wɔ yi i ɲu akere Simon.” ³⁵ Na susufɔ nnyɔm n akan sa n bo i yoori atin n nu dɔ ni, ni kabo bu siiri ka yiri ni, sanɲa bo i bubuuri kpɔnɔ n nu maari bu ni.

Kabo Yesu yiiri i ɲu kereeri i susufɔm ni

³⁶ Sangɔ bo susufɔ nnyɔm n wo jɔrɛ n kan su sɔ ni, na Yesu ni i tii akaba aba ajina bu afien, na wɔ se bu ka, “Nyemɛ ma am ahoreda.” ³⁷ Na sere ati bu agaya, dama bu sunsun ka ɲumi ye ba ɲu i a. ³⁸ Na wɔ bisa bu ka, “Nzu deke miɛ am a? Nzu ti ye am yo sika? ³⁹ Am niɛ m saam ni m jaam, mini ni m tii lɛɛ. Am fa am saa kan m na am niɛ, ɲumi la má anjuniembaa ni buwem kabo am ɲu ka m la i ni.” ⁴⁰ I seeri sɔ wɛɛri n na wɔ fa i saam ni i jaam deke bo bu boori i bulaari n afa akere bu. ⁴¹ I yoori bu alekutura na bu ahore jɔ kɔ siinri su ni, haari ni nyini n kɛrɛ, ba koro ayo má yarada.

Dɔ na wɔ bisa bu ka, “Am la diire be fɛn bo am di?” ⁴² Na ba fa jombaa n bo ba tun i n be ama i, ⁴³ na wɔ de akpɛsɛ bu nyumbaa nu bɛrɛ.

⁴⁴ Na wɔ se bu ka, “Ahin nɔaniɛm bo m yo jɔjɔri bu sanɔa bo m toko wo am dɔ n lɛɛ, ka, wɔ yo daka ka m nɔusu jɔrɛ kɛrɛ yo yiiwa, kabo ba kɛrɛ i Nyɛmɛ nɔaniɛ kpamaawa n bo i fa maari Moyisi dɛɛ kadasi n nu, ni Nyɛmɛ nɔaniɛ kanfɔm dɛɛ n nu, ni kansi jue kɛrɛɛwam n nu ni.” ⁴⁵ Na wɔ teke bu nyi na bu si Nyɛmɛ Jɔrɛ Kadasi n bu, ⁴⁶ na wɔ se bu ka, “Kabo ba kɛrɛ i Nyɛmɛ Jɔrɛ Kadasi n nu n lɛɛ, ka, Kristo Tiidefɔ ni bá di wahara, na bu kún i, na lesan cɛɛn na i tɛnɔge i yiwee n nu. ⁴⁷ Bu bó i bu Yerusalem miɛ kpiri n nu wɔ, na bu kán labari kpa n jɔrɛ i duma nu kere daanfɛ kɛrɛ, ka, bu kaaki bu wo na Nyɛmɛ fá bu satie ce bu. ⁴⁸ Ambɛrɛ dí nyini sam daani a. ⁴⁹ Am ti fɛn, mini bá sunma aceeri n bo m Si Nyɛmɛ seeri ka i fá ma am, na i bá wura am nɔu n a. Ama, ambɛrɛ nɔmínda miɛ n kunnu fɛn, haari sanɔa bo yiko ni bá fite anɔgoro ba wura am nɔu.”

Kabo Nyɛmɛ ma Yesu fun kɔɔri anɔgoro barasu ni

⁵⁰ Na wɔ fa bu afite miɛ n kunnu akɔ aju Betani miɛ n ahɛmɛ, dɔ na wɔ yɛ i saa su na wɔ yo kisi aɔɔ bu nɔu. ⁵¹ I wo bu kisi n yo su sɔ ni, na wɔ yaki bu, na Nyɛmɛ ama wɔ fun akɔ anɔgoro. ⁵² Na ba kutu asu i, na ba kpɛ bu nyi akɔ Yerusalem miɛ kpiri n nu ni ahorejo bambaka. ⁵³ Na ba kɔ awo Nyɛmɛ Serebiri Awuru n nu sukansi Nyɛmɛ sanɔa kɛrɛ.

Labari kpa n bo YOHANE akere i ni

Yesu ti Nɔ́anie n bo i ma ngɔɔ n a

¹ Kana Nyeme ba yi durunya ni, be woori bere bo bu fere i ka Nɔ́anie. I ni Nyeme woori bere a. Yiri Nɔ́anie ni ti Nyeme a. ² Fite i bumboori n kere, yiri ni Nyeme wo bere a. ³ Na Nyeme ama Nɔ́anie n ayi deke n kere. Deke be wo má bere bo wo yi má i. ⁴ Ngɔɔ fite yiri Nɔ́anie ni dɔ a. Nyini ngɔɔ ni fa wein ba tekeeri adamande nyi a. ⁵ Na wein n aje awosin nu, na awosin n akoro akunma má wein ni.

⁶ Nyeme yo sunmaari sɔ́ɔ be, bu fere i ka Yohane. ⁷ I baari ka i ba di nyini wein n daani wɔ, na i kan i jɔre kere minem, adena sɔ́ɔ kere bo i tiiri kabo i kan ni, na bu daari nyini wein n ɲu. ⁸ Yohane n mmɔɔ ni i tii yo ti má wein ni, ama, i baari ka i ba di wein n daani wɔ. ⁹ Nyini wein ni ti wein nahɔre su n a, bo wo ba durunya n nu, na i teke adamande kere nyi.

¹⁰ Yiri n bo bu fere i ka Nɔ́anie n yo woori durunya n nu wɔ, Nyeme faari yiri yiiri durunya n a, haari ni nyini n kere mmɔɔ, durunya n nufɔm asi má i. ¹¹ Na wɔ ba i tienɲu deɛ asien n su minem dɔ, na ba kete ka bu de má i. ¹² Ama, na minem kere bo bu deeri i, na bu daari i ɲu ni, na wɔ ma bu atin ka bu kaaki Nyeme nbaam. ¹³ Bu Nyeme nbaa kaakiwam n ti má ka bu wu bu ni adamande mbunja a, nzen má nyini, i ti má ka biesɔ ni bara sangá a ye bu wu bu a, ama, Nyeme ni i tii, ti bu Si a.

¹⁴ Na yiri Nɔ́anie n akaaki adamande aba awo ya dɔ. Ahɔ́roma ni nahɔre wo i dɔ beberebe. Ya ɲu i jirima woowa ni, nyini jirima woowa n ye Nyeme afa ama i Wa kun n kpein n a.

¹⁵ Yohane diiri i daani kereeri minem, na wɔ tien ase ka, “Nyini sɔ́ɔ n bo m yo seeri am ka i wo m sin suba na i tara m fieo n lee, dama kana bu ba wuuri m ni, yiri wo bere wɔ.”

¹⁶ I ahɔ́roma beberebe n deɛ ti, ye ya di i ahɔ́roma, na ya toko di i buka su. ¹⁷ Nyeme yo faari i nɔ́anie kpamaawa ni maari Moyisi ka i fa kere Yisarelifɔm, ama, Yesu Kristo aba ka i ba kere ya kabo Nyeme ahɔ́roma n ni i nahɔre n ti barasu wɔ. ¹⁸ Be nya ɲu má Nyeme, má ka i Wa kun n kpein n bo i ni i Si Nyeme n ti kun ni, na i wo Nyeme dɔ ni, yiri ye wɔ kere ya kabo Nyeme ti a.

Yohane Nyeme Nzue Biefɔ n daani diiwa ni

¹⁹ Ahin ti daani diiwa n bo Yohane yo diiri i, sangá bo Yudaɔm nkpien-kpienm n bo bu wo Yerusalem mie kpiri n nu n sunmaari Nyeme sayoowa dɔnguyofɔm ni bu bukafɔm ka bu kɔ bisa Yohane ka, “Wɔ́ɔ la ɲma a?”

²⁰ Yohane afie má bu jɔre be su, na wɔ kan i kere kpain akere bu. I ɲa, “Má mini ti Kristo ni, Tiideɔ n bo Nyeme ɲa i súnma i n a.” ²¹ Na ba bisa i bekun ka, “Ye wɔ́ɔ la ɲma a? Wɔ́ɔ ti Nyeme nɔ́anie kanfɔ Eliya n a?” Na wɔ se bu ka, “Má yiri la mini.” Na ba kaaki abisa i ka, “Wɔ́ɔ ti Nyeme nɔ́anie kanfɔ n a?” I ɲa, “Ai.” ²² Na ba sa su abisa i ka, “Ye wɔ́ɔ la ɲma a? Ma ya nɔ́anie na ya kɔ se bo bu sunmaari ya ni. Wɔ́ɔ ɲa, wɔ́ɔ la ɲma

tenle su a?" ²³ Na wɔ se bu ka, "Sɔnɔ n bo Nyeme nɔanie kanfɔ Esaya yo kerɛeri i jɔrɛ ka i bɔ subo ndoori boro kpantain nu n ka, 'Am yo Mibie n atin n dɔŋgu.' Yiri la mini."

²⁴ Minem bo bu bisaari Yohane bisaawa ni, Farasifom bo bu ti Yudafom asese be ni sunmaari bu a. ²⁵ Na ba kaaki abisa i ka, "A ŋa a ti má Kristo Tiidefɔ ni, a kaaki ti má Eliya, na a kaaki ti má Nyeme nɔanie kanfɔ n ni, ye nzu ti ye a bie minem Nyeme nzue a?" ²⁶ Na wɔ bɔ bu nu ka, "Mini bie minem Nyeme nzue wɔ. Ama, sɔnɔ be wo am nu fen bo ambere si má i. ²⁷ I wo m sin suba, m ti kaan ni bo m dodo i mmɔɔ." ²⁸ Ahin sa n kere yo yoori mie n bo bu fere i ka Betani n nu wɔ, i wo Yodan kunma n wie afiiri, deke bo Yohane yo bieeri minem Nyeme nzue n wɔ.

Kabo Yohane ŋa Yesu ti Nyeme bɔmbaa ni

²⁹ Alecin fɔfɔre na Yohane aŋu ka Yesu suba i dɔ, na wɔ se ka, "Am nie, Nyeme bɔmbaa n bo wɔ ba ka i ba yi durunya n nufom satie n lee. ³⁰ Yiri, ye m yo seeri am ka sɔnɔ n bo i wo m sin suba na i tara m fieo n lee, dama i yo woori bere wɔ ka, ye bu wuuri m a, yiri lee. ³¹ Mini mmɔɔ ni m tii yo si má i, m dee la ka m bie minem Nyeme nzue wɔ, adena ambere Yisarelifom si i." ³² Na Yohane adi daani ase minem ka, "Ma ŋu ka Nyeme Awiewie Casi n afite angoro ajura ka tiiwa dee su aba atana i ŋu, na wo wo i dɔ. ³³ Mini mmɔɔ ni m tii yo si má i, ama, Nyeme bo i sunmaari m ka m ba bie mine Nyeme nzue ni, yiri seeri m ka, 'A bá ŋu ka m Awiewie ni júra ba tana sɔnɔ be ŋu, na i wó i dɔ, yiri má m Awiewie Casi n ba wura minem ŋu a.' ³⁴ Ma ŋu i sɔ ye m sudi daani kere mine a, ka yiri ti Nyeme Wa n nahore su a."

Mine n bo bu du mɔ yoori Yesu susufom ni

³⁵ Na alecin fɔfɔre bekun na Yohane ni i susufom ni nnyo jina. ³⁶ Na wo nie aŋu ka Yesu wo natiiri su susin, na wɔ se ka, "Am nie, Nyeme Bɔmbaa n lee." ³⁷ I susufo nnyom ni tiiri sɔ n na ba kɔ asu Yesu su. ³⁸ Na Yesu akaaki anie aŋu ka bu susu i su, na wo bisa bu ka, "Am koro nzu wɔ?" Na ba bisa i ka, "Rabi, a da ni wɔ?" Rabi bu la ka, ya Kerefɔ. ³⁹ Na wɔ se bu ka, "Am bra na am ba nie." Nyini sangɔ ni, naaso kerefi nna abo, na ba su i su, na ba kɔ aŋu deke bo i wo ni. Na ba ka i dɔ nyini cɛen ni. ⁴⁰ Nyini mine n nnyom n bo bu yo tiiri kabo Yohane seeri n na bu suuri Yesu su ni, bu nu kun ye bu fere i ka Andere n a, bo i gɔrɔ la Simon Petoro ni. ⁴¹ Nyini sin na Andere ako aŋu i gɔrɔ Simon, na wɔ se i ka, "Ya ŋu Mesaya ni." Mesaya bu la ka Kristo, Tiidefɔ n bo Nyeme ase ka i súnma i ni. ⁴² Na wɔ fa i aba Yesu dɔ. Na Yesu anie i nyunu, na wɔ se i ka, "Bu fere u ka Simon wɔ, wɔrɔ ti Yohane wa n a, ama, bu bá fere u ka Kefasi." I bu la ka yabue, i ni Petoro kere ti duma kun wɔ.

Kabo Yesu fereeri Filipu ni Natanieli ka bu su i su ni

⁴³ Alecin fɔfɔre na Yesu ayasu ka i kɔ Galili dee awɔre n nu. Na wo kɔ aŋu sɔnɔ be bo bu fere i ka Filipu ni, na wɔ se i ka, "Ba su m su." ⁴⁴ Filipu bɔsu la mie be bo bu fere i ka Besayida n wɔ. I ni Andere ni Petoro kere fite mie kun su wɔ. ⁴⁵ Na Filipu gusu ako aŋu sɔnɔ be bo bu fere i ka Natanieli, na wɔ se i ka, "Ya ŋu sɔnɔ n bo Moyisi yo kerɛeri i jɔrɛ Nyeme nɔanie kpamaawa kadasi n nu ni, na Nyeme nɔanie kanfom gusu yo kerɛeri i jɔrɛ bu dee kadasi n nu ni. Yiri la Yesu n bo i fite Nazareti

ni, na i si la sɔnɔ be bo bu fere i ka Yosefu ni.” ⁴⁶ Na Natanieli abisa i ka, “Deke kpa koro fite Nazareti dɛɛ miɛ n gusu nu?” Na Filipu ase i ka, “Bra na a ba nie.” ⁴⁷ Nyini sanga na Yesu aɲu ka Natanieli suba i dɔ, na wɔ se ka, “Ahin sɔnɔ n ti Yisarelifɔ baa a nahɔre su, bo sa be wo má i ɲu.” ⁴⁸ Na Natanieli abisa i ka, “A yo sɛ siiri m a?” Na Yesu abɔ i nu ka, “M ɲuuri u sanɓa bo a toko tana damba baka n bu n wɔ, nyini sin ye Filipu fereeri u n a.” ⁴⁹ Na Natanieli ase i ka, “Ya Kerefɔ, wɔrɔ ti Nyɛmɛ Wa n a, nahɔre su. Wɔrɔ ti Yisarelifɔm Fɛmɛ n a.” ⁵⁰ Na Yesu ase i ka, “Bo ma se u ka m ɲuuri u damba baka n bu n ti ye a yo m yarada, nzen sɛ? A bá ɲu alekutura sam bo bu tara sɔ. ⁵¹ Nahɔre ye m suse am a. Am bá ɲu kabo anɓoro bá teke na Nyɛmɛ merɛkem bá sufun kɔ anɓoro, na bu bá sujura ba mini Adamande Wa n dɔ.”

2

Kabo Yesu kɔɔri konyaya be Kana miɛ kpiri n nu ni

¹ Nyini sin, i lesan cɛɛn na konyaya be awo Kana, miɛ kpiri n bo i wo Galili awɔre n nu ni. Na Yesu ni gusu akɔ konyaya n nu. ² Na ba fere Yesu ni i susufɔm n ka bu gusu ba di konyaya n be. ³ Sanɓa bo konyayafɔm nzan n ba kpɛɛri bu su ni, na Yesu ni aba ase i ka, “Bu nzan n awie.” ⁴ Na Yesu abɔ i nu ka, “M ni, ye a ɲa m yo se wɔ? M sanɓa nya ju má.” ⁵ Na i ni ase awurunbaam n ka, “Am yo deke kere bo i se am.”

⁶ Nyini dika n nu, yabue cunɓu nsen jina bere, bo i kun kun kere koro de nzue ganɓa nnu wara nsen. Yudafɔm la bu yoowa be, bu fa nyini cunɓum n nu nzue ni, ye bu bita ɲmisi bu fin a. ⁷ Na Yesu ase awurunbaam n ka, “Am sa nzue gɔ cunɓum n nu na bu yi.” Na ba gɔ i kere nzue na ba yi. ⁸ Na Yesu akaaki ase bu ka, “Kisa am sa be kɔ ma konyafan danfo ni.” Na ba sa be akɔ ama i. ⁹ Bu sa kɔ maari i ni, na nzue n akaaki nzan. Na wɔ fa akan i nɔɔ. Wɔ si má deke bo nyini nzan n fite. Ama, awurunbaam bo bu saari nzue ni, bere si deke bo i fite. Na wɔ fere konyafan ni, ¹⁰ ase i ka, “Sɔnɔ kere nya ɲa bu ma nzan, bu du mɔ fa nzan fiefie n ma jama n a ka, na ba nya aba anu abo ni, na bu nya fa bo i yo má fie n ma bu, ama, wɔrɔ, a fa bo i yo fie n aka sin a.” ¹¹ Kabo Yesu maari nzue kaaki nzan ni, nyini tiiri i ciciri su dɛɛ alekutura sa. I yoori nyini sa n Kana, bo i wo Galili awɔre n nu n wɔ, na i kere kabo i la yiko n bo i fite Nyɛmɛ dɔ, na i susufɔm n ayo i yarada.

¹² Nyini sin, na i ni i ni, ni i niɛmam, ni i susufɔm n akɔ miɛ kpiri n bo bu fere i ka Kapɛnam, na ba kɔ ayo lennyɔ dɔ.

Kabo Yesu fɔɔnri watafɔm fiteeri Nyɛmɛ Sereebiri Awuru n nu ni

¹³ Wɔ ka kaan na Yudafɔm di bu cɛɛnkpiri n bo bu fere i ka Butara cɛɛnkpiri ni. Na Yesu akɔ Yerusalem miɛ kpiri n nu. ¹⁴ Na wɔ kɔ awura Nyɛmɛ Sereebiri Awuru n nu aɲu ka mine wo dɔ sutɔ naanim, ni nbɔɛm, ni bumbuku tiɛwam, na ɲwaa kaakifɔm gusu tana dɔ. ¹⁵ Na wɔ fa nyama anɔ i ka ɲgbere dɛɛ su, na wɔ fa afɔn ayi nbɔɛm n ni naanim n kere afite Nyɛmɛ Sereebiri Awuru n nu. Na wɔ sandi ɲwaa kaakifɔm ɲwaa n kere abutu, na wɔ nya akaaki bu teebirim kere alanlanɓa. ¹⁶ Na wɔ se minɛm bo bu tɔ bumbuku tiɛwam n ka, “Am fa am bumbukum n fite fɛn. Má am se ka am fa m Si Nyɛmɛ Sereebiri Awuru n yo gɔ kun.”

¹⁷ Na i susufɔm n aba atɛnɓe su ka ba kere i Nyɛmɛ Jɔre Kadasi n nu ka, “M Nyɛmɛ Fɛmɛ, m nyunu aboro u awuru n jɔre su, nyini kún m a.”

18 Na Yudafɔ nkpienm abisa i ka, “A yó nzu alekutura sa bo i kere ya ka a la atin bo a yo sɔ a?” 19 Na Yesu ase bu ka, “Am bo fufu ahin Nyeme Sereebiri Awuru ni, na lesan afien m káaki ta i bekun.” 20 Na ba se i ka, “AƔɔ aburana ni nsen ye bu fa taari ahin Nyeme Sereebiri Awuru n a. I yo se ye wɔɔ bo ba se ka a káaki ta i lesan afien a?” 21 I yo kaanri sɔ ni, i faari i ñuniembaa ni fa sunsun Nyeme Sereebiri Awuru n a. 22 Na sanja bo i ba wu tengeeri i yiwee n nu ni, na i susufɔm n atenje su ka i yo seeri sɔ, na ba de noanie n bo ba kere i Nyeme Jɔre Kadasi n nu ni, na ba yo Yesu jɔjɔwa n yarada.

Yesu si kabo adamande woowa ti barasu

23 Sanja bo i wo Yerusalem na bu sudi Butara cɛenkpiri ni, i yoori alekutura sam, na mine dongu anu i, na ba yo i yarada. 24 Ama, yiri afa má i ñu aƔɔ má bu ñu, dama i si kabo adamande woowa ti. 25 Má pui ti, yiri mmɔɔ ni i tii si kabo adamande ahore su ti barasu, má be se i a.

3

Kabo Yesu kaanri Nyeme jɔre kereeri Nikodemo ni

1-2 Cɛen be kɔngue sɔ ɔ, na Yudafɔm kpien be aba Yesu dɔ, bu fere i ka Nikodemo. I ti Farasifɔm ni kun be wɔ. Na wɔ se Yesu ka, “Ya Kerefo, ya si ka a ti kerefo n bo a fite Nyeme dɔ ɔ, dama be koro yo má alekutura sa bo a yo bu ni, má ka Nyeme wo i mi dɔ.” 3 Na Yesu ase i ka, “Nahore ye m suse u a. Sɔno koro fa má Nyeme yo má i femɛ, má ka ba wu i fɔfɔre.” 4 Na Nikodemo abisa i ka, “Sɔno nyunu ati, bu yo se koro kaaki wu i fɔfɔre a? I koro kaaki wura i ni kunnu na bu wu i bekun?” 5 Na Yesu ase i ka, “Nahore ye m suse u a, sɔno koro wura má Nyeme femɛya n nu, má ka ba wu i fɔfɔre fa kɔ nzue biɛɛwa ni Awiewie Casi n dɛɛ atin n su. 6 Deke bo adamande awu i, i ti adamande wɔ, na deke bo Awiewie Casi n awu i, i ti awiewie wɔ. 7 Má a ma i yo u alekutura fa kɔ kabo ma se u ka wɔ yo daka ka bu wu am fɔfɔre ni. 8 Sanja kere a ti ka anuma kpie kɔ ɔ, ye a ti i nanmie ñga a, ama, a si má deke bo i fite, na a kaaki si má deke bo i sukɔ, nyini ti, sɔno kere bo Awiewie Casi n awu i ti sɔ ɔ.”

9 Na Nikodemo abisa Yesu ka, “I yo se ye ahin koro yo a?” 10 Na Yesu akaaki abisa i ka, “Wɔɔ bo a kere Yisarelifɔm Nyeme noanie n na bu nyunu yi u ni, i yo se ye a si má ahin n a? 11 Nahore ye m suse u a, sa bo ya si i, ye ya jɔjɔ i jɔre a, na sa bo ya nyumbaa anu i, ye ya di i daani kere minem a, ama, am akete ya daani diiwa ni. 12 M suse am sam bo bu wo durunya n nu fen wɔ lɛɛ, ama, am sude má i, ye m ba seeri am sam bo bu wo Nyeme femɛya n nu, am yó se de i a? 13 Be nya fun má Nyeme dɔ, má ka mini Adamande Wa n bo m woori i dɔ na ma jura aba ni. 14 Kabo Moyisi yo faari jawii yoori i ka woo dɛɛ su n na i fa i bara yeeri baka n na i yeeri i su kpamaari boro kpantain n nu ni, wɔ yo daka ka sɔ ye minem bá ye mini Adamande Wa n su a. 15 Na sɔno kere bo i yoori m yarada, i nyá ñgɔɔ bo i la má awieeri ni.”

16 Nyeme akoro durunya n nufɔm agaya n dɛɛ ti, na wɔ fa i kunnu Wa kun n kpein n afa ama bu, adena sɔno kere bo i yo i yarada, i mi ká má ñgbɛɛn, ama, i nya ñgɔɔ bo i la má awieeri ni. 17 Nyeme asunma má i Wa n durunya n nu ka i ba di bu jɔre cin bu sui wɔ, ama, wɔ sunma i ka i ba de bu tii ji wɔ. 18 Sɔno kere bo i daafiiri Nyeme Wa n ñu, Nyeme dí má i mi n jɔre, ama, sɔno kere bo wɔ da má i ñu, Nyeme adu mɔ adi i jɔre ka,

dama ka wɔ da má Nyemɛ Wa kun n kpein n ɲu n dɛɛ ti. ¹⁹ Kabo Nyemɛ di bu jɔrɛ n la ka, wein n aba durunya n nufɔm dɔ, ama, bu satie yoowa n dɛɛ ti, ba koro awosin n atara wein ni. ²⁰ Sɔnɔ kɛrɛ bo i yo satie kpɔ wein n wɔ, i koro má ka i kɔ wein n nu, na i satiem fite fofoe nu. ²¹ Ama, sɔnɔ kɛrɛ bo i su nahɔrɛ atin su, i fite fofoe nu wɔ, na mine kɛrɛ ɲu ka i sayoowa n su Nyemɛ atin n su wɔ.

Kabo Yohane diiri Yesu ɲu daani barasu ni

²² Nyini sin na Yesu ni i susufɔm n akɔ Yudiya dɛɛ awɔrɛ n nu. Na ba kɔ adi lennyɔ dɔ, na i subie minem Nyemɛ nzue. ²³ Nyini sanɲa n na Yohane gusu subie minem Nyemɛ nzue. I wo Ayinon mie n nu fa dodo Salim awɔrɛ n nu, dama nzue sunnu dɔ n dɛɛ ti. Na minem suba i dɔ na i subie bu Nyemɛ nzue. ²⁴ Nyini sanɲa ni, ba nya anyi má Yohane dansaraka.

²⁵ Na Yohane susufɔm ni Yudaɔ be awura akuruwa fa kɔ bu fin kpara n dɛɛ yoowa atin su. ²⁶ Na ba kɔ Yohane dɔ akɔ ase i ka, “Ya Kerefɔ, nie. Sɔnɔ n bo i yo baari u dɔ Yodan kunma n wie afiiri n na a yo diiri i ɲu daani kereeri mine ni, yiri wo dɔ subie minem Nyemɛ nzue n a, bu kɛrɛ sukɔ i dɔ ɔ.” ²⁷ Na Yohane ase bu ka, “Sɔnɔ koro nya má deke be, má ka Nyemɛ afa nyini deke n ama i. ²⁸ Amberɛ ni am tii woori m daani ka m ɲa má mini ti Kristo Tiideɔ n a, ama, Nyemɛ sunmaari m ka m du i mɔ ɔ. ²⁹ Bu nya jaari konya, i ti konyafan n dɛɛ wɔ, ama, na konyafan n danfo jina suso i sui ti deke bo konyafan ni jɔjɔ se i, nyini sanɲa na i danfo n ahore jɔ. Nyini ahorejɔ kun ni, wo mini gusu dɔ a. ³⁰ Wɔ yo daka ka i dɛɛ duma n fun, na m dɛɛ n kpie su.”

Yiri bo i fite angoro n dɛɛ jɔrɛ

³¹ Yiri bo i fite angoro n tara sɔnɔ kɛrɛ. Na bo i fite durunya n nu fen ti durunya n nu fen fɔ ɔ, na i jɔjɔɔwa kɛrɛ ti durunya n nu fen jɔrɛ wɔ. Ama, yiri n bo i fite angoro n tara sɔnɔ kɛrɛ. ³² Deke bo wɔ ɲu i, ni bo wɔ ti i, ye i di i daani kere mine a, ama, be de má i daani diiwa ni. ³³ Ama, sɔnɔ kɛrɛ bo i deeri i daani diiwa n asoro su akere ka Nyemɛ ti nahɔrɛfɔ lɛɛ. ³⁴ Dama yiri n bo Nyemɛ asunma i ni, Nyemɛ nɔanie n ye i kan i a, dama Nyemɛ afa i Awiewie Casi n ama i bo i la má anusu. ³⁵ Nyemɛ koro i Wa ni, na wɔ fa deke n kɛrɛ awura i saa nu. ³⁶ Na sɔnɔ kɛrɛ bo i daari Nyemɛ Wa n ɲu, i la ɲgɔɔ bo i la má awieeri ni. Na sɔnɔ kɛrɛ bo i kete i nɔanie ni, i nyá má ɲgɔɔ n bo i la má awieeri ni, ama, Nyemɛ fá yaa cin i sui.

4

Kabo Yesu seeri Samariyaɔ bara be i tii su jɔrɛ ni

¹⁻² Tɔ. Na Farasifɔm n ati ka Yesu sunya minem donɲu bo bu susu i su na i bie bu Nyemɛ nzue tara Yohane. Ama, má Yesu ni i tii bie bu Nyemɛ nzue n a, i susufɔm ni bie bu a. Sanɲa bo Yesu faari nu sɔ ni, ³ na wɔ yasu Yudiya awɔrɛ n nu akaaki ka i kɔ Galili dɛɛ awɔrɛ n nu bekun. ⁴ I sukɔ ni, wɔ yo daka ka i fa Samariya dɛɛ awɔrɛ n nu sin a. ⁵ Na wɔ kɔ aju Samariya mie kpiri be bo bu fere i ka Suka n su, na i wo dodo asien n bo Jakɔbu yo fa maari i wa Yosefu dawa sanɲa ni. ⁶ Jakɔbu bura n wo nyini dika n nu wɔ. Natiiri fie n dɛɛ ti, na Yesu akɔ atana bura n su. Nyini sanɲa wie abi kenken.

7 Na Samariya bara be aba ka i ba sa nzue, na Yesu ase i ka, “Ma m nzue n be na m nu.” 8 Nyini san̄ga ni, i susufom̄ n akō miē kunnu ka bu kō to diire. 9 Na bara n ase i ka, “Ee, wɔɔ, a ti Yudafɔ e, ye m gusu ti m Samariyafō bara. Nzu ti ye a se m ka m ma u nzue a?” Dama Yudafom̄ ni Samariyafōm tō má pui. 10 Na Yesu ase i ka, “Nzen má a si Nyemē aceeri ni, na má a si sɔnō n bo i susere u nzue ni, má wɔɔ sere i a, na i má u nzue bo i ma ngɔɔ ni.” 11 Na bara n ase i ka, “Ya si, bura n wo ngɔ, u gusu la má goroka, ye a nya nyini nzue n bo i ma ngɔɔ n ni wo? 12 Wɔɔ, n̄ka a n̄a a tara ya na Jakɔbu n wo, nzen se? Yiri maari ya nyini bura n a. I ni i nbaam fa san̄ga ni i nen̄gendɔrem̄ kerē yo nuuri nyini bura n ni wo.” 13 Na Yesu ase i ka, “Sɔnō kerē bo i nu ahin nzue ni, nzuehɔē ti i mi bekun, 14 ama, sɔnō kerē bo i nu nzue n bo m má i ni, nzuehɔē ti má i mi kun fieo, dama nzue n bo m má i ni, i wó i kunnu tie kabo bura nzue tie n wo, na i má i ngɔɔ bo i la má awieeri ni.” 15 Na bara n ase i ka, “Ya si, ma m nyini nzue n be na m nu, adena má nzuehɔē ti m kun, na má m kaaki ba sa nzue fen kun.”

16 Na Yesu ase i ka, “Kō fere u hun na am bra.” 17 Na bara n ase Yesu ka, “M la má hun.” Na Yesu ase i ka, “Kabo a n̄a a la má hun ni, i ti nahɔrē wo. 18 Dama nbiesom̄ nnu ye a fite bu ajaa bu n a, na haari bo u ni yiri wo berē kisa mmɔɔ ni, i ti má u hun. A se nahɔrē wo.” 19 Na bara n ase i ka, “Ya si, ma n̄u ka a ti Nyemē nōaniē kanfō o. 20 Ya na Samariyafōm yo suuri Nyemē ahin buka n su wo. Ama, amberē Yudafom̄ n̄a wo yo daka ka sɔnō kerē su Nyemē Yerusalem̄ miē kpiri n nu wo.” 21 Na Yesu ase i ka, “Bara, de bo m suse u ni, san̄ga suba bo am sú má ya Si Nyemē ahin buka n su, wara Yerusalem̄ miē n nu. 22 Amberē Samariyafōm n̄a am su Nyemē wo, ama, am si má i. Ama, yērē Yudafom̄ si i, ye ya su i a. Dama tiide n fite Yudafom̄ dō o. 23 San̄ga suba bo wō ju awie, na bo bu su ya Si Nyemē ni, i Awiewiē Casi ni búka bu ye bu sú i ni nahɔrē su a. Dama nyini minem̄ n̄su ye ya Si Nyemē koro ka bu su i a. 24 Nyemē ti awiewiē wo, nyini dɛē ti, bo bu su i ni, wō yo daka ka i Awiewiē Casi n búka bu na bu sú i ni nahɔrē su.” 25 Na bara n ase i ka, “Tō, m si ka Kristo Tiidefō ni bá. I ba juuri, i kán ya deke kerē kerē ya.” 26 Na Yesu ase i ka, “Mini bo m sujojo u dō ni, mini lɛē.”

27 Nyini san̄ga n nu na Yesu susufom̄ n afite miē n kunnu aju, na jɔre n amiē bu kabo Yesu ni bara n wo jojo su ni. Ama, bu be abisa má bara n ka, “A koro nzu i dō a?” Be gusu abisa má Yesu ka, “Nzu ti ye a sujojo bara n dō a?”

28 Na bara n ayaki i dundu n berē, na wō kpie i nyi akō miē n kunnu akō ase minem̄ ka, 29 “Am ba niē sɔnō be bo wō se m m tii su sa kerē bo ma yo i. Beni, kisa, Kristo Tiidefō n lɛē fan?” 30 Na minem̄ n afite miē n nu, na bu kō Yesu dō.

31 Bara n kōori n dɛē sin, na Yesu susufom̄ n asere i ka, “Jande, ya Kerefō, di diire.” 32 Na wō se bu ka, “M la diire bo m di bo am si má i.” 33 Na i susufom̄ n abisa bu n̄ju nu ka, “Be afa diire aba ama i wō di wō, nzen se?” 34 Na wō se bu ka, “M diire n la ka, m yo yiri bo wō sunma m dɛē koroowa na m yó i juma n wie.” 35 Na wō bo bu anyunderɛ ase ka, “Am n̄a wō ka sara nna na am tambu fiesu nen̄gem. Ama, mini suse am wō lɛē, am tu am tii na am niē, fiesu diire n abi ni kpie. 36 Sɔnō bo i kpie diire ni, i nya i n̄katɔ, i ti ka sɔnō bo i tien minē nɔɔ, na bu nya ngɔɔ bo i la má awieeri ni, dofō ni kpiefɔ n kerē nya ahorejo. 37 Be bu n̄a ‘Be dō, na be kpie

ni,' i ti nahore wo. ³⁸ Amberɛ yiri, mini asunma am a, ka am ko kpɛ diire n bo am ado má i ni. I ti ka nbem adu mo akan Nyeme noanie n akere minem, ye am deɛ la ka am ma bu yo m yarada. Nbem deɛ jumayoowa ye am sudi i kperɛ n a."

³⁹ Bara n seeri minem bo bu fite mie n nu n kabo Yesu ase i tii su sa kere n deɛ ti, na Samariyafom donɔɔ bo bu fite mie n nu n ada Yesu nu. ⁴⁰ Nyini ti, bu ba juuri Yesu do ni, na ba sere i ka i ka bu do, na wo ko awo bu do ceɛn nnyo. ⁴¹ Na mine donɔɔ ada i nu abuka su fa ko i noanie jɔɔowa n ti. ⁴² Na ba se bara n ka, "Kisa, má u deɛ jɔɔowa n ngumi ti ye ya da i nu a, ama, yere mmoo ni ya tii ati i noanie jɔɔowa, na ya si nu ka ahin sɔno n ti bo i baari ka i ba de durunya n nufom tii wo, nahore su."

Kabo Yesu maari femɛ n kpɛn be wa nyaari laifɛ ni

⁴³ Yesu woori bu do ceɛn nnyo n sin, na wo yasu bere ako Galili deɛ awore n nu. ⁴⁴ Dama yiri mmoo ni i tii adu mo akan ka Nyeme noanie kanfo la má jirima i tienɔɔ bɔsu. ⁴⁵ Saɔga bo i ko juuri Galili ni, na ba de i ni bu sa nnyo, dama bu yo nuuri kabo i yoori alekutura sam ceɛnkpɛri n saɔga, Yerusalem mie kpɛri n nu ni, dama bere mmoo yo koori nyini ceɛnkpɛri n di ti.

⁴⁶ Na Yesu akaaki ako Kana, mie kpɛri n bo i wo Galili awore n nu ni, deke bo i yo maari nzue kaakiiri nzan ni. Femɛ n kpɛn be woori do. I wa be la má laifɛ, i wo Kapenam mie kpɛri n nu. ⁴⁷ Na saɔga bo kpɛn n tiiri ka Yesu afite Yudiya deɛ awore n nu ako aju Galili ni, na wo ko Yesu do ako asere i ka i wa suwu, i ma bu ko na i ko tuntun i, na i nya laifɛ. ⁴⁸ Na Yesu ase i ka, "Ma nu ka nzen am anu má alekutura sam, am yo má m yarada." ⁴⁹ Na kpɛn n ase i ka, "M Mibie, bra ndende, má nyini, a ceɛri, a bá nu ka m wa n awu." ⁵⁰ Na Yesu ase i ka, "Ko. U wa n anya laifɛ." Na wo de Yesu noanie ni, na wo kaaki ako. ⁵¹ Na saɔga bo i sukɔ awuru ni, na i akoom akpa i atin aba ase i ka, "U wa n anya laifɛ." ⁵² Na wo bisa bu ka, "Saɔga bɔno ye i nunie n jɔri a?" Na ba se i ka, "Anuma wiesu kerefi kun saɔga ye i nunie n jɔri a." ⁵³ Do na baa n si n atenje su ka, nyini saɔga n nu lee, ye Yesu seeri i ka i wa n anya laifɛ n a. Na i ni i dikafom kere ada Yesu nu. ⁵⁴ Kabo Yesu ma baa n nyaari laifɛ ni, nyini tiiri i alekutura sa nnyo su bo i yoori saɔga bo i fite Yudiya deɛ awore n nu koori Galili n a, na i kere kabo i la yiko n bo i fite Nyeme do.

5

Kabo Yesu tuntuunri sɔno be kunma n noɔ su ni

¹ Nyini sin na Yesu ako Yerusalem mie kpɛri n nu na i ko di Yudafoɔm ceɛnkpɛri be. ² Kunma be da dooori ano n bo bu fa nbɔem fa sin wura mie n nu ni. Hiburu anie nu bu fere nyini kunma n ka Besata, i la kpatam nnu wu. ³ Landurifom beberebe dada kpatam n nu, bu nu nbem ti anyinsinm, nbem ti kujandafom, na bu nbem gusu nunie bukun awu bo bu koro yasu má. [⁴ Bu da nminda do, dama saɔga saɔga Nyeme mereke jura ba kunma n nu wo, na i ba kankan nzue n nu. Nzue kankanwa n deɛ sin, na landurifo n bo i du mo juraan nzue n nu, i tukpaki n koro i ti ka se, i yaki wo, na i nya laifɛ.] ⁵ Sɔno be woori bu nu bo wo da tukpaki i afo aburasan ni mocue lee. ⁶ Yesu nuuri i so ni, na wo fa nu ka sɔno n tukpaki n ace i nu, na wo bisa i ka, "A koro ka a nya laifɛ wo?" ⁷ Na tukpakifo n ase Yesu ka, "M Mibie, m la má bukafɔ be bo nzue n nya ba kankan, na i kuku m wura

nu. Saŋga kere bo nzue n nya ba kankan, na m ba ŋa m wura nu, a ŋu ka be adu m mɔ." ⁸ Na Yesu ase i ka, "Yasu, fa u dasu n na a nati." ⁹ Jinaabiri n nu bere na sɔnɔ n anya laifie, na wɔ yasu afa i dasu n sunati.

Nyini cɛen n bo Yesu tuntuunri sɔnɔ n ti Numiya cɛen wɔ. ¹⁰ Nyini ti na Yudafɔm nkpienkpienm n ase sɔnɔ n bo wɔ nya laifie n ka, "Nyuma ti Numiya cɛen wɔ. Ya dɛɛ atin n su, atin wo má nu bo a sɔ u dasu ni." ¹¹ Na wɔ se bu ka, "Sɔnɔ n bo i tuntuunri m ni, yiri seeri m ka m fa m dasu na m nati a." ¹² Na ba bisa i ka, "Nyini sɔnɔ n la ŋma a, ye i seeri u ka a fa u dasu nati a?" ¹³ Ama, na sɔnɔ n bo wɔ nya laifie n akoro asi má i mi n bo i tuntuunri i ni, dama Yesu awura jama n nu akɔ. ¹⁴ Nyini sin na Yesu aba anu i, Nyeme Sereebiri Awuru n nu, na wɔ se i ka, "Ti fen. Kisa a nya laifie, má a yo satie kun. Má nyini, a dí wahara bo i tára nyini n ŋusu." ¹⁵ Na sɔnɔ n akɔ ase Yudafɔm nkpienkpienm ni ka Yesu tuntuunri i a. ¹⁶ Nyini ti, na ba kere Yesu wuwuruwa, dama wɔ tuntuunri sɔnɔ Numiya cɛen n dɛɛ ti. ¹⁷ Na wɔ se bu ka, "M Si toko yo juma haari ba ju ni nyuma, nyini ti ye m gusu yo a." ¹⁸ Yesu jɔjɔri sɔ n dɛɛ ti, na Yudafɔm nkpienkpienm n aboro bu nyi abuka su ka bu kun i. Má ka bo wɔ saaki Numiya cɛen n ciire n ŋgumi dɛɛ ti, ye bu kpi ka bu kun i a, ama, bo wɔ kaaki ase ka Nyeme ti i Si n dɛɛ ti. Nyini kere ka wɔ fa i ŋu abu Nyeme wɔ lɛɛ.

Kabo Yesu yiko ti barasu ni

¹⁹ Na Yesu ase bu ka, "Nahore ye m suse am a, mini Nyeme Wa n ni m tii, m koro bo má m tiɛenu yo má pui, má ka deke bo m ŋu ka m Si yo i ni, ye mini gusu yo i a. ²⁰ Dama m Si Nyeme koro mini i Wa ni, na i sukere m deke kere bo i yo i ni, na i bá kere m sakpakpam bo m yó bu tara sɔ, na i yó am alekutura. ²¹ Kabo m Si Nyeme ye minem bo ba wu n su n na i ma bu ŋɔɔ ni, sɔ ye mini gusu ma minem bo ma yi bu ni ŋɔɔ a. ²² Dama m Si Nyeme ni i tii di má be jɔre, ama, wɔ fa jɔredi atin kere ama mini i Wa n wɔ, ²³ adena sɔnɔ kere bu m kabo bu bu m Si ni. Sɔnɔ kere bo i bu má m, i mi abu má m Si bo wɔ sunma m n lɛɛ.

²⁴ Nahore ye m suse am a, sɔnɔ kere bo i ti m noanie n na i de i, na i da Nyeme bo wɔ sunma m n ŋu, i mi la ŋɔɔ bo i la má awieeri, na m dí má i mi jɔre. I mi afite yiwee nu anya ŋɔɔ lɛɛ. ²⁵ Nahore ye m kaaki suse am a, ka saŋga suba bo wɔ ju awie, na mine bo ba wu ni tí mini Nyeme Wa n noanie ni, na bo bu tiiri i na bu deer i, bu nyá ŋɔɔ. ²⁶ Dama kabo ŋɔɔ fite yiri m Si Nyeme dɔ ni, sɔ ye wɔ ma mini i Wa n gusu yiko ka m ma minem ŋɔɔ a, ²⁷ na wɔ kaaki ama m atin ka m di mine jɔre, dama m ti Adamande Wa a. ²⁸ Má am ma ahin jɔjɔwam n yo am alekutura. Saŋga suba bo mine bo ba wu n kere tí m noanie ni, ²⁹ na bu tɛnge bu yiwee n nu. Minem bo bu yo yoori sakpa ni, bu tɛnge na bu nya ŋɔɔ bo i la má awieeri, na minem bo bu gusu yo yoori satie ni, bu tɛnge na bu nya suicin."

Sam bo bu di Yesu ŋu daani ni

³⁰ Na Yesu asa su ase ka, "M koro bo má m tiɛenu yo má pui. Kabo Nyeme se m ni, sɔ ye m di minem jɔre a. Nyini ti, m jɔre diiwa n ti nahore wɔ, dama m yo má m dɛɛ koroowa, ama, m yo yiri n bo wɔ sunma m n dɛɛ koroowa a.

³¹ Nzen m di m ŋu daani kere am, am de má ka i ti nahore, ³² ama, be wo bere bo i di m ŋu daani. Yiri la m Si Nyeme. Na m si ka i daani diiwa n

ti nahore wɔ. ³³ Am yo sunmaari minem Yohane dɔ, na wɔ se am nahore, kabo m ti barasu. ³⁴ M de má adamande daani diiwa, ama, m kan kabo Yohane seeri am ni, adena am nya am tii. ³⁵ Yohane yo ti ka fitana bo i je na i ta a, na ambere ayo asoro su ka am wo i wein nu ni ahorejo fa ko sanɔa su. ³⁶ Ama, m la deke bo i di m ɲu daani bo i tara Yohane deɛ ni, yiri la sam bo m Si Nyeme akere m ka m yo bu wie ni. Nyini sam ni di m ɲu daani ka m Si asunma m a. ³⁷ Na m Si bo wɔ sunma m ni, yiri gusu adi m ɲu daani a. Am nya ti má i konvi, am kaaki nya ɲu má i kabo i ti barasu, ³⁸ na i noaniɛ wo má am ahore su, dama wɔ sunma m am dɔ, na am ada má m ɲu. ³⁹ Am kan Nyeme Jɔre Kadasi n wɔ, na am fiiti i nu, dama am sunsun ka nyini kere am atin bo am fa na am nya ɲɔɔ bo i la má awieeri a, ama, nyini kereɛwam nu di m ɲu daani a. ⁴⁰ Haari ni nyini n mmɔɔ am akete ka am ba má m dɔ na am ba nya ɲɔɔ.

⁴¹ M koro má kansii adamande dɔ. ⁴² M si am sa, na m si ka, Nyeme deɛ koro n wo má am ahore su. ⁴³ Mini ade m Si jinaabiri aba, ye am ade má m, ama, nzen be baari ni i tienɔu ba, am dé yiri wɔ. ⁴⁴ Ambere, am koro am ɲuɲu nu kansii wɔ, na bu susu am, ama, am koro má kansii yiri n ɲgumi bo i ti Nyeme n dɔ, nyini ti, i yo se ye am koro da m ɲu a? ⁴⁵ Má am sunsun ka mini kó jaraki am m Si Nyeme dɔ a. Am jarakifo la Moyisi, bo am la tama ka yiri búka am ni. ⁴⁶ Moyisi yo kereeri m ɲusu jɔre wɔ. Nyini ti, nzen má am de i noaniɛ ni, má am de m gusu deɛ ni. ⁴⁷ Ama, am ade má kabo i yo kereeri i ni, i yó se ye am koro de bo m suse am n a?"

6

Kabo Yesu maari nbiesɔm akpii nnu ni bu minem diire ni

¹ Nyini sin, na Yesu akpie ako Galili kunma kpiri n bo bu kaaki fere i ka Tiberiya n buekun dɔ. ²⁻⁴ Nyini sanɔa, wɔ ka kaan, na Yudafoɔm di bu Butara ceɛnkpiri ni. Na jama beberebe asu i su, dama ba ɲu kabo wo yo alekutura sam atuntun tukpakifoɔm na ba nya laifie ni. Na Yesu ni i susufɔm n afun ako atana buka be su. ⁵ Na Yesu atu i tii anie aɲu ka jama beberebe suba i dɔ, na wɔ bisa Filipu ka, "Ya nya diire nifansu wɔ, na ya to ma ahin minem kere a?" ⁶ Yiri mmɔɔ ni i tii si kabo i yó barasu, ama, i subo Filipu kunnu na i nie wɔ. ⁷ Na Filipu ase i ka, "Haari nzen ya faari ɲwaa beberebe toori diire maari bu, i jú má bo bu kere koro nya kan kan di." ⁸ Na i susufɔm kuu bo bu fere i ka Andere, na i goro la Simon Petoro n ase Yesu ka, ⁹ "Gbefene kaan be wo ya nu fen, i bita kponɔ nnu ni jombaa nnyɔ, ama, i koro ju má ahin minem kere." ¹⁰ Wura mone sunnu bere, na Yesu ase i susufɔm ka, "Am ma minem kere tantana wura n su." Na ba ma minem kere atantana. Nbiesɔm ɲgumi ko yasuri mine akpii nnu wɔ. ¹¹ Na Yesu afa kponɔ n na wɔ da Nyeme asi, na wɔ kpakpaaki i nu ama minem bo bu tantana ni, na wɔ kaaki afa jombaa n ayo i so, na bu kere anya kabo bu koro. ¹² Bu kere diiri na bu kunnu yiiri ni, na wɔ se i susufɔm n ka, "Am tientien sinsin n bo ba di i na wɔ ka n ɔɔ. Má am ma be ka ɲgbɛɛn." ¹³ Na ba tientien kponɔ sinsin n bo ba di i na wɔ ka n ɔɔ, na wɔ yi kandie buru ni nnyɔ. ¹⁴ Minem n ɲuuri nyini alekutura sa n bo Yesu yoori ni, na ba se ka, "Nahore, ahin sɔɔ n ti Nyeme noaniɛ kanfo n bo bu seeri ka i bá durunya n nu n a." ¹⁵ Yesu faari nu ka bu koro ka bu tara i fanɔa, na bu fa i yo bu femɛ n deɛ ti, na wɔ yasu afite bu nu yiri ɲgumi, ako buka n su.

Kabo Yesu natiiri nzue su ni

¹⁶ I naaso sanja, na Yesu susufom n ajura ako kunma kpiri n nu, ¹⁷ na ba ko awura lee nu ka bu kaaki kpie ko Kapenam mie kpiri n nu. Ale aba asan kere, na Yesu nya ba ma bu do, ¹⁸ na anjuma sukpie fanga su, na nzue nyama gusu suyasu. ¹⁹ Nyini sanja ni, i susufom n wo nzue n su ako aju kunma kpiri n afien, na ba nu Yesu ka i nati nzue n su suba dodo lee ni, na sere ati bu. ²⁰ Na Yesu ase bu ka, "Mini a, ma am ma sere ti am." ²¹ Na ba ma wo wura lee n nu. Jinaabiri n nu bere, na ba ju deke bo bu sukoni.

Kabo jama n sunienie Yesu busu ni

²² Alecin na jama n bo bu kaari kunma kpiri n buekun do n afa nu ka lee kun n kpein woori kunma n su anuma n a. Na ba si nu ka Yesu susufom n ngumi wurari lee n nu koori a, ama, yiri mmoo ni i tii awura ma nu. ²³ Na lee nbem afite mie n bo bu fere i ka Tiberiya n aba aju kunma n noo su, fa dodo deke bo Yesu sereeri Nyeme goori kpoo n su maari minem na bu diiri ni. ²⁴ Na jama n anie, ba nu ma Yesu ni i susufom n bere, nyini ti, na ba wura leem n nu ako Kapenam ko sunienie Yesu busu.

Kabo Yesu na yiri ti diire n bo i ma ngoo n a

²⁵ Minem n ko nuuri Yesu kunma kpiri n buekun do ni, na ba bisa i ka, "Ya Kerefo, sanja bono ye a baari fen a?" ²⁶ Na wo se bu ka, "Nahore ye m suse am n a, ma alekutura sam bo m yoori bu n ti ye am sunienie m busu a, ama, kabo m maari am diire na am kunnu ayi n dee ti a. ²⁷ Ma am ma am nyunu boro diire bo i saaki n busu, ama, am ma am nyunu boro diire bo i wie ma, na i ma ngoo bo i la ma awieeri n busu. Mini Adamande Wa ni ma am nyini diire n a, dama mini ngumi, ye m Si Nyeme ase m nyaari akere ka m ti i dee a." ²⁸ Na ba bisa i ka, "Ya yo se koro yo juma n bo Nyeme koro ka ya yo i n a?" ²⁹ Na Yesu abo bu nu ka, "Juma n bo Nyeme koro ka am yo i n la ka, am yo mini bo wo sunma m yarada." ³⁰ Na ba bisa i ka, "Ye a yo nzu alekutura sa kere ya, na ya nu i na ya yo u yarada? A yo sa bono o?" ³¹ Dama sanja bo ya nam yo woori boro kpantain nu ni, bu diiri diire be bo bu fere i ka *mana* n wo. Kabo ba kere i Nyeme Jore Kadasi n nu lee, ka yiri maari bu diire n bo i fite angoro ye bu diiri a." ³² Na Yesu ase bu ka, "Nahore ye m suse am n a, ma Moyisi yo maari nyini diire n bo i fite angoro n a, ama, m Si Nyeme maari am diire n bo i fite angoro nahore su a. ³³ Dama diire n bo Nyeme ma n la bo i fite angoro, na i ba ma durunya n nufom ngoo ni." ³⁴ Na ba se i ka, "Ya Mibie, nka a ma ya nyini diire n sanja kere."

³⁵ Na Yesu ase bu ka, "Mini ti diire n bo i ma ngoo n a. Sono kere bo i ba m do, ahoe ti ma i mi, na sono kere bo i yo m yarada, nzuehoe ti ma i mi kun. ³⁶ Ama, ma se am, haari ni bo am anu m n kere, am suyo ma m yarada. ³⁷ Sono kere bo m Si fa i maari m, i ba m do, na woro kere bo a ba m do, m kete ma u fieo. ³⁸ Dama ma fite ma angoro aba ma ka m ba yo m dee koroowa, ama, m baari ka m ba yo Nyeme bo wo sunma m dee koroowa a. ³⁹ Yiri n bo wo sunma m dee koroowa la ka, minem kere bo wo fa ama n ni, ma m ba bu be mmoo mini, ama, i koro ka m tenge bu kere jina cee n na bu nya ngoo. ⁴⁰ Dama m Si koroowa la ka, sono kere bo i nu mini i Wa n na i yo m yarada, i mi nya ngoo bo i la ma awieeri, na m tenge i jina cee n."

41 I seeri ka yiri ti diire n bo wɔ fite aŋgoro aba n dɛɛ ti, na minɛm ni suɲuɲuti i. 42 Na ba se ka, “Má Yosefu wa Yesu n lɛɛ? Ya si i si ni i ni kɛrɛ e. Ye i baari sɛ, ye i ŋa i fiteeri aŋgoro baari a?” 43 Na Yesu ase bu ka, “Má am ŋuɲuti am ŋuɲu nu. 44 Be koro ba má m dɔ, má ka m Si Nyɛmɛ bo wɔ sunma m ni, acin i mi adodo m, na m tɛŋge i mi jina cɛɛn. 45 Kabo Nyɛmɛ nɔanie kanfɔm yo kɛrɛeri lɛɛ, ka, ‘Nyɛmɛ kɛrɛ sɔnɔ kɛrɛ nyaari a.’ Na sɔnɔ kɛrɛ bo i ti Nyɛmɛ kereewa n na i siiri nu, i mi bá m dɔ. 46 Nyini kere má ka be adu mɔ aɲu Nyɛmɛ wɔ lɛɛ, má ka mini ŋgumi bo m fite m Si Nyɛmɛ dɔ n aɲu i a. 47 Nahɔrɛ ye m suse am n a, ka sɔnɔ kɛrɛ bo i yo m yarada, i la ŋɔɔ bo i la má awieeri. 48 Mini ti diire n bo i ma ŋɔɔ n a. 49 Am nam yo diiri diire n bo bu fere i ka *mana* n boro kpantain nu, ama, na ba wɛ. 50 Ama, ahin diire n ti diire barasu be bo i fite aŋgoro wɔ, na sɔnɔ kɛrɛ bo i diiri i, i wú má. 51 Mini ti diire n bo wɔ fite aŋgoro aba, na i ma ŋɔɔ n a. Sɔnɔ kɛrɛ bo i di ahin diire ni, i nyá ŋɔɔ bo i la má awieeri. Diire n bo m má n la m ŋuniɛmbaa ni, bo m fá ma durunya n nufɔm, na bu nyá ŋɔɔ ni.”

52 Yesu seeri sɔ ni, na yaa ati bu, na bu suse akuruwa bu ŋuɲu nu ka, “Ahin sɔnɔ ni yo sɛ koro fa i ŋunɛ ma ya na ya di a?” 53 Na Yesu ase bu ka, “Nahɔrɛ ye m suse am n a, má ka am di mini Adamande Wa n ŋuniɛmbaa ni, na am nu m dɛɛ mbunja ni, ambɛrɛ ni am ti la má ŋɔɔ n bo i la má awieeri ni. 54 Sɔnɔ kɛrɛ bo i di m dɛɛ ŋuniɛmbaa ni, na i nu m mbunja ni, i mi la ŋɔɔ n bo i la má awieeri ni, na m tɛŋge i mi jina cɛɛn. 55 Dama m dɛɛ ŋuniɛmbaa ni, ti deke bo i ti diire nahɔrɛ su a, na m mbunja n ti deke bo i ti nuuwa nahɔrɛ su a. 56 Sɔnɔ kɛrɛ bo i di m dɛɛ ŋuniɛmbaa ni, na i nu m mbunja ni, i mi wo ni mini, na mini gusu wo ni yiri lɛɛ. 57 Yiri m Si bo i ma ŋɔɔ ni sunmaari m a, i dɛɛ ti, ye m la ŋɔɔ a, sɔ ye sɔnɔ kɛrɛ bo i di m ŋuniɛmbaa ni, mini dɛɛ ti, ye i nyá ŋɔɔ a. 58 Ahin ni ti diire n bo wɔ fite aŋgoro aba n a, i ti má ka diire n bo am nam yo diiri na i sin na bu wuuri ni. Sɔnɔ kɛrɛ bo i di ahin diire ni, i nyá ŋɔɔ n bo i la má awieeri.”

59 Yesu kereeri nyini kereewa n kɛrɛ saɲga bo i wo Kapenam bu tientien-bunɔɔ sɔɔ nu n wɔ.

Kabo Peto seeri ka Yesu ti sɔnɔ bo i ma ŋɔɔ n bo i la má awieeri n a

60 Yesu susufɔm dɔɲgu tiiri i jɔɔɔwa n sɔ ni, na ba se ka, “Ahin kereewa n ti kekereke. Ŋma koro de i a?” 61 Na Yesu afa nu ka bu suɲuɲuti fa kɔ i kereewa n su, na wɔ se bu ka, “Ahin jɔɔɔwa n dɛɛ ti ye am koro ka am kaaki am sin n a? 62 Ye nzen má am ŋu ka mini Adamande Wa n sukaaki sufun kɔ aŋgoro, deke bo m fite baari ni, má am se sɛ wɔ lɛɛ? 63 Awiewie Casi ni ma mine ŋɔɔ a. Adamande yiko be koro ma má ŋɔɔ. Nɔanie n bo ma jɔɔ akere am ni, yiri ma am nya Awiewie Casi n bo i ma ŋɔɔ n a. 64 Ama, am be n mmɔɔ ada má m ŋu.” Má pui ti, fite saɲga bo Yesu boori i juma n bu ni, ye i si bo bu yo má i yarada n a, ni sɔnɔ n bo i bá tɔ i ni. 65 Na wɔ se bu ka, “Nyini dɛɛ ti ye ma se am ka be wo má bɛrɛ bo i koro ba m dɔ, má ka m Si ama atin ka i mi yo m susufɔ.”

66 I seeri sɔ n sin, na i susufɔm dɔɲgu akaaki ayaki i ka bu su má i su kun. 67 Na wɔ bisa i susufɔ buru ni nnyom ni ka, “Ambere gusu koro ka am kaaki yaki m wɔ fan?” 68 Na Simon Peto abo i nu ka, “M Mibie, ya kó ŋma dɔ a? Wɔrɔ ti sɔnɔ n bo i la nɔanie n bo i ma ŋɔɔ n bo i la má awieeri n a. 69 Ye ya yo u yarada, na ya si ka wɔrɔ ti sɔnɔ casi n bo a fite

Nyeme do n a." 70 Na Yesu abo nu ka, "M nja am buru ni nnyo ye m yiiri am e, ma so? Ama, am nu kun ti Sitana sono o." 71 I jjo niiri Yudasi wo, Simon Isikariyoti wa ni. Yiri Yudasi tiiri buru ni nnyom ni kun wo, ama, yiri ba to Yesu n a.

7

Kabo Yesu ni i niemam boori anzama barasu ni

1 Nyini sin na Yesu afa Galili awore n nu subara ye, wo koro ma ka i ko Yudiya dee awore n nu, dama Yudafo m nkpienkpienm koro ka bu kun i wo. 2 Nyini sangha, wo ka kaan na Yudafo m di bu ceenkpiri be bo bu fere i ka Nambue Bo ceenkpiri ni. 3 Na Yesu niemam ase i ka, "Fite ahin awore n nu na a ko Yudiya, adena u susufom gusu ko nju sam bo a yo bu ni. 4 Dama sono kere bo i koro ka mine si kabo i ti barasu, i fa ma i sayoowa fie ma minem sin, nzen a yo alekutura sam wo, ma durunya n nufom kere si u sa." 5 I niemam n mmoo ayo ma i yarada, nyini ti ye bu seeri so n a. 6 Na Yesu ase bu ka, "M sangha nya ju ma, ama, ambere yiri, sangha kere bo am koro, am ko o. 7 Ambere ye durunya n nufom koro kpo ma am a, ama, bu kpo mini wo, dama m se bu wo, ka bu sayoowam ti ma kpa. 8 Am ko ceenkpiri n di, m ko ma, dama m sangha nya ju ma." 9 I seeri bu so ni, na wo ka Galili do lee nnyo.

Kabo Yesu ko diiri Nambue Bo ceenkpiri ni

10 I niemam koori ka bu ko di ceenkpiri ni, na Yesu gusu aba asa bu su, ama, wo yi ma i nju fofoe nu, i fie koori a. 11 Na Yudafo m nkpienkpienm ni sunienie i, na ba bisa ka, "Ye i wo ni wo?" 12 Na jama n sutu asuturi bu bejgu do i busu. Nbem nja, "I ti sono kpa a." Ye nbem gusu nja, "Ai, i dadaka minem wo." 13 Ama, be akoro akan ma i jore fofoe nu, dama bu kere soro Yudafo m nkpienkpienm n wo.

14 Sangha bo ba di ceenkpiri n ako aju afien ni, na Yesu ako awura Nyeme Sereebiri Awuru n nu, sukere minem. 15 Na Yudafo m nkpienkpienm n ayo alekutura, na ba bisa ka, "I yo se ye ahin sono n la nyini si n nusu so a, bo be akere ma i a?" 16 Na Yesu ase bu ka, "Deke bo m fa kere am ni, i ti ma m tienju kereewa, ama, m Si Nyeme bo wo sunma m ni, yiri kere m kabo m kere a. 17 Sono kere bo i nja i yo Nyeme koroowa ni, ye i si kabo m kereewa n ti a, nzen m kereewa n fite Nyeme do, wara m tienju kereewa. 18 Sono kere bo i jjo i koroyanu, i mi koro ka bu kansi i wo, ama, bo i koro ka bu kansi sono bo i sunma i ni, nyini sono ni jjo nahore a, na kore be wo ma i nju. 19 M nja Moyisi yo maari am Nyeme noanie kpamaawa n a, ma so? Ama, am be n mmoo su ma i atin su. Ye nzu ti ye am koro ka am kun m a?" 20 Na jama n ase i ka, "Ajini wo u nju. Njma koro ka i kun u a?" 21 Na Yesu ase bu ka, "Sa kun be lee, ye ma yo i n a, ye wo yo am kere alekutura n a. 22 Moyisi yo maari am njo ka am wura am nbaabiesom kenkenne lemocue ceen, nzen haari i to Njumiye ceen n mmoo, am yo i, ama, ma Moyisi yo boori i bu ka bu wura kenkenne n a, am nam yo boori i bu a. 23 Am wura nbaabiesom kenkenne Njumiye ceen wo, adena ma am bu noanie kpamaawa n bo Nyeme fa maari Moyisi ni ngbeen, ye nzen ma tuntun sono mmo kun Njumiye ceen n na wo nya laifie, nzu ti ye am afa yaa m nju a? 24 Ma am nie sono nyunu dika na am di i jore, ama, am si i wo nahore su, na am nya di i jore."

Kabo minem bisaari ka Yesu ti Kristo Tiidefo n a

²⁵ Yesu seeri so ni, na Yerusalemfo n bɛm abisa bu nju nu ka, "Má ahin sɔnɔ n ye Yudafo nkpɛnkɛnɛm koro ka bu kun i n a? ²⁶ Am ni e. Wɔ yi i nju fofoe nu ye i jojo a. Be suse má i pui mmɔɔ. Beni, Yudafo nkpɛnkɛnɛm asi ka yiri ti Kristo Tiidefo n nahore su n a. ²⁷ Ama, sangba bo Kristo Tiidefo n ba baari, be sí má deke bo i fite. Ahin sɔnɔ n yiri, ya si deke bo i fite." ²⁸ Na sangba bo Yesu sukere Nyeme Serebiri Awuru n nu ni, na wɔ tien fanja su ase ka, "Am sunsun ka am si m nahore su, nzen se? Ye am si deke bo m fite? Ma ba má ni m de e yiko nu wɔ. Yiri n bo wɔ sunma m ni ti nahorefo a, ama, am si má i. ²⁹ Mini si i a, dama m fite i do ɔ, yiri sunmaari m a." ³⁰ Nyini ti, na ba kpi ka bu tara i, ama, be afa má i saa akan má i, dama i sangba nya ju má. ³¹ Na jama n dongu ayo i yarada, na ba se ka, "Sangba bo Kristo Tiidefo n ba baari, i yó alekutura sam tara ahin sɔnɔ n wɔ, nzen se?"

Kabo bu sunmaari tintinijinafo m ka bu ko tara Yesu ni

³² Na Farasifo m n ati kabo jama n sutu asuturi sukan Yesu jore, na bu ni Nyeme sayoowa donguyofɔ nkpɛnkɛnɛm n asunma tintinijinafo m ka bu ko tara i. ³³ Na wɔ se ka, "M wó am do sangba kaan, na m nya bá ko yiri n bo i sunmaari m n do. ³⁴ Am bá nienie m busu, na am nju má m. Deke bo m bá wo ni, am koro ko má do." ³⁵ Na Yudafo nkpɛnkɛnɛm n abisa bu nju nu ka, "Yiri koro ka i ko ni wɔ, ye yere koro nju má i a? I kó ya minem do ɔ, bo ba sandi awura Girikifo m asien su ni, na i kó kere Girikifo m ni Nyeme jore ni, nzen se a? ³⁶ I na se wo lee? Bo i na ya bá nienie i busu na ya nju má i ni, na bekun, deke bo i sukɔ ni, ya koro ko má do."

Kabo sɔnɔ bo i yo Yesu yarada nya nzue n bo i ma ngɔɔ ni

³⁷ Cɛenkɛpɛri n awieeri cɛen n ti cɛenkɛpɛri n tii a. Nyini cɛen n na Yesu ayasu ajina, na wɔ tien fanja su ase ka, "Sɔnɔ kere bo nzuehɔe ati i, i mi bra m do na i ba nu. ³⁸ Dama ba kere i Nyeme Jore Kadasi n nu ka, sɔnɔ kere bo i yo m yarada, 'Nzuetin bo i ma ngɔɔ ni, i songi fite i mi ahorembaa su a.' " ³⁹ Yesu jojo niiri Awiewie Casi n wɔ, ka sɔnɔ kere bo i yo yiri Yesu yarada nya Awiewie Casi ni. Nyini sangba ni, Nyeme nya fa má i Awiewie Casi n ma má, dama wɔ nya wura má Yesu kɛpɛri.

Kabo Yesu de e ti, na jama n nɔɔ woori bu ngungumi ni

⁴⁰ Na jama n nu mine nbem tiiri kabo i seeri so ni, na ba se ka, "Ahin sɔnɔ n ti Nyeme nɔanie kanfo n wɔ nahore su." ⁴¹ Na nbem ase ka, "Yiri ti Kristo Tiidefo n a." Ama, na nbem gusu ase ka, "Kristo Tiidefo ni fite má Galili da. ⁴² Ba kere i Nyeme Jore Kadasi n nu ka Kristo Tiidefo ni yó Feme Davidi anuma a, na bu wú i Betilehem, Feme Davidi bosu wɔ." ⁴³ Yesu de e ti, na jama n nɔɔ awo bu ngungumi, ⁴⁴ na nbem akoro ka bu tara i, ama, be afa má i saa akan má i.

Kabo Yudafo nkpɛnkɛnɛm ayo má Yesu yarada ni

⁴⁵ Na tintinijinafo m n akɛpɛ bu nyi ako Nyeme sayoowa donguyofɔ m ni, ni Farasifo m n do, na ba bisa bu ka, "Nzu ti ye am afa má i aba má?" ⁴⁶ Na tintinijinafo m n abo bu nu ka, "Be nya koro jojo má kabo nyini sɔnɔ n jojo ni." ⁴⁷ Na Farasifo m n abisa bu ka, "Wɔ daka ambere gusu wɔ fan? ⁴⁸ Am nya ti ka Yudafo nkpɛnkɛnɛm wara Farasifo m n be ayo i yarada a?"

49 Ama, ahin jama n si má Nyeme noanie kpamaawa ni, nyini ti, Nyeme ayo bu ngbeen.” 50 Na Nikodemo bo i ti Farasifom kun n na i yo ko nyuri Yesu ni, ase bu ka, 51 “Ya dee atin n su, kana ya ba di sono jore jaraki i, má ka ya bisa i na ya ti sa bo wo yo i n ka.” 52 Na ba bisa i ka, “Woro n mmoo fite Galili wo? Kan Nyeme Jore Kadasi n na a nie. A nyu má ka Nyeme noanie kanfo n be mmoo fite Galili.”

[53 Bu se so wieeri ni, na bu kere sandi ako awuru.

8

1 Na Yesu ako buka n bo bu fere i ka Oliva Buka n su, dama oliva bakam go su wo.

Bara ajaafɔ n bo i saakiiri ajaa ciire n jore

2 Alecin ngarama fuun na Yesu akaaki ako Nyeme Sereebiri Awuru n nu. Na jama n kere aba atien bu noo i do. Na wo tana sukere bu Nyeme noanie. 3 Na Nyeme noanie kerefom, ni Farasifom nbem afa bara ajaafɔ be bo bu ko taraari i ka i ni bieso da, na ba fa i ajina bu afien. 4 Na ba se Yesu ka, “Ya Kerefɔ, ya ko atara ahin bara n ka i susaaki ajaa ciire wo. 5 Noanie kpamaawa n bo Nyeme fa maari Moyisi n kere ka, nyini nbaram nyusu so, ya tu bu yabue bo kun bu. Nyini ti, ye woro na se?” 6 Bu seeri so n na bu so i ngeɛ, na bu jaraki i wo. Na Yesu abiri i tii asienngu sufa i saa maraka sukere asienngu. 7 Bu wo i bisa n su ni, na wo ye i tii su ase bu ka, “Bo i na wo nya yo má satie am nu, ma i mi du mo tu i yabue.” 8 Na wo kaaki abiri i tii sukere asienngu. 9 Bu tiiri so ni, na bu kere aloroki kun kun ako. Nkpienm ni du mo a. Na wo ka Yesu ni bara ni ngumi. 10 Na Yesu aye i tii su, na wo bisa bara n ka, “Bara, bu wo ni? Be ase má ka i ti ye ni ka bu kun u, nzen se?” 11 Na bara n abo i nu ka, “Ai, m Mibie, be ase má ka i kún m.” Na Yesu ase i ka, “Mini mmoo se má ka be kún u. Ko, ama, má a yo satie kun.”]

Kabo Yesu na yiri ti durunya n nufom wein n ni

12 Na Yesu akaaki ase jama n ka, “Mini ti durunya n nufom wein a. Bo i su m su kere wo má awosin nu kun, ama, i nya wein bo i ma ngoo ni.” 13 Na Farasifom n ase i ka, “Woro, a sudi u nyu daani wo, be de má u daani n ka i ti nahore.” 14 Na Yesu ase bu ka, “Haari nzen m di m nyu daani n mmoo, m daani diiwa n ti nahore wo, dama m si deke n bo m fite baari, na m kaaki si deke bo m sukoo ni. Ama, amberɛ, am si má deke bo m fite, na am kaaki si má deke bo m sukoo n gusu. 15 Amberɛ, am di jore kabo durunya n nufom di bu bengum jore n wo, ama, mini ni m tii, m di má be jore. 16 Ama, haari nzen m di mine jore n mmoo, m jore diiwa n ti nahore wo, dama má mini ngumi di minem jore a, ama, mini ni m Si bo i sunmaari m ni di a. 17 Ba kere am Nyeme noanie kpamaawa n nu ka, nzen mine nnyoo daani diiwa yo kun, nyini la ka i ti nahore wo lee. 18 Mini ni m tii di m nyu daani a, na m Si bo wo sunma m gusu di m daani.” 19 Na ba bisa i ka, “U si wo ni?” Na wo bo bu nu ka, “Am si má m ni m Si n be n mmoo. Nzen má am si mini, má am si m Si n mmoo.”

20 Sangá bo Yesu seeri so ni, i wo minem kere su Nyeme Sereebiri Awuru n nu, fa dodo deke bo bu yi bu saraka njwaa fa ma Nyeme n wo. Ama, be akoro atara má i, dama i sangá nya ju má.

Kabo Yesu seeri ka i fite má durunya n nu fen ni

²¹ Na Yesu akaaki ase bu ka, “M bá kó yaki am, na am bá nienie m busu, ama, am n̄jú má m, na am bá wu ni am satie ni. Deke bo m sukó ni, am koro kó má dɔ.” ²² Na Yudafōm n abisa ka, “I n̄a deke bo i sukó ni, ya koro kó má dɔ. Nyini la ka, i kún i n̄u wɔ lɛɛ, nzen se a?” ²³ Na wɔ se bu ka, “Ambere fite durunya n nu fen wɔ, ama, mini fite angoro wɔ. Ambere ti durunya n nu fen fɔm wɔ, ama, mini fite má durunya n nu fen.” ²⁴ Nyini ti ye ma se am ka, am wú ni am satie n a, dama nzen am yo má m yarada ka mini la sɔnɔhɔre n bo m se am ka m ti ni, am wú ni am satie n wɔ.” ²⁵ Na ba bisa i ka, “Ye wɔrɔ la n̄ma a?” Na Yesu ase bu ka, “Kabo m se am sangá kere ni, m ti sɔ ɔ.” ²⁶ M la sa dɔngɔ bo m jɔjɔ fa kó am dɔ, na m la sa dɔngɔ bo m fa di am jɔre jaraki am, ama, yiri bo i sunmaari m ti nahɔrefɔ ɔ, na deke bo i se m ni, nyini ye m kan kere durunya n nufom a.” ²⁷ Yesu seeri sɔ ni, ba si má ka i jɔjɔ niiri i Si Nyeme wɔ. ²⁸ Na wɔ se bu ka, “Am bá yeeri mini Adamande Wa n su baka jaanu n su, ye am sí ka mini la sɔnɔhɔre n bo m se am kabo m ti n a, na m yo má deke be m dɛɛ yiko nu, ama, m se kabo m Si akere m wɔ. ²⁹ Yiri bo i sunmaari m n wo m dɔ, wɔ nya yaki má m cɛen be, dama sangá kere m yo deke bo i sun i nu wɔ.” ³⁰ I jɔjɔri sɔ ni, na jama n dɔngɔ ayo i yarada.

Kabo Yesu seeri Yudafōm ka bu satie dɛɛ ti ma ba yo akɔɔm n a

³¹ Na Yesu ase Yudafōm bo bu yo i yarada n ka, “Nzen am de m nɔanie ni, am ti m susufom wɔ nahɔre su. ³² Na am sí deke bo i ti nahɔre ni, na nahɔre ni má am nya am tii a.” ³³ Na ba se i ka, “Ya ti Abraham anumam wɔ, be nya fa má ya yo má i akɔɔm. Ye nzu ti ye a n̄a ya nyá ya tii a?”

³⁴ Na Yesu ase bu ka, “Nahɔre ye m suse am a, ka, sɔnɔ kere bo i yo satie, i mi ti satie akɔɔ. ³⁵ Akɔɔbaa koro ka má awuru n nu sangá kere, ama, awurubaa yiri wo awuru n nu wɔ sangá kere. ³⁶ Nyini ti, nzen mini awurubaa n nya deeri am tii jiiri, am nyá am tii nahɔre su. ³⁷ M si ka am ti Abraham anumam wɔ, ama, am koro ka am kun m wɔ, dama am ade má m nɔanie ni. ³⁸ Deke bo mini aju i m Si dɔ n ye m suse am a, ama, ambere, deke bo am ti i am si dɔ, ye am yo a.” ³⁹ Na ba se i ka, “Ya si la Abraham.” Na wɔ se bu ka, “Nzen má am ti Abraham nbaam, má am yo i sayoowa a. ⁴⁰ Kabo i ti ni, ma se am nahɔre sam bo m tiiri i Nyeme dɔ n wɔ, ama, am koro ka am kun m wɔ. Abraham ayo má nyini be sɔ. ⁴¹ Ambere, am yo am si sayoowa a.” Na ba se i ka, “Yere, ya ti má soma nbaam. Ya si la Nyeme ngumi wɔ.” ⁴² Na Yesu ase bu ka, “Nzen má Nyeme ti am Si, má am koro m, dama m fiteeri Nyeme dɔ ɔ, ye m baari fen n a. Ma ba má ni m dɛɛ yiko nu, ama, yiri sunmaari m a. ⁴³ Nzu ti ye am ti má m jɔjɔowa n bu a? Dama am koro de má m nɔanie n dɛɛ ti. ⁴⁴ Sitana ti am si wɔ, na am koro ka am yo kabo am si koro n wɔ, i fite ka i bumboori kere, i ti sɔnɔ kunfɔ ɔ, na i su má nahɔre su, dama nahɔre haari kun mmɔɔ wo má i dɔ, i dɛɛ la ka i bu kɔre wɔ, dama yiri ti kɔrefɔ a, na yiri kaaki ti kɔrefom kere si a. ⁴⁵ Ama, mini se nahɔre n ti, am de má m nɔanie ni. ⁴⁶ Am n̄ma koro kere m satie bo ma yo i a? Nzu ti ye m se am nahɔre, ye am de má m nɔanie n a? ⁴⁷ Sɔnɔ kere bo i ti Nyeme dɛɛ, i mi ti Nyeme nɔanie wɔ. Deke bo i ti na am ti má Nyeme nɔanie n la ka, am ti má i dɛem wɔ.”

Kabo Yesu ti kpiri tara Abraham ni Nyeme nɔanie kanfom ni

⁴⁸ Na Yudafōm n ase i ka, “Bo ya n̄a a ti Samariyafɔ ɔ, na ajini wo u n̄u ni, i ti má nahɔre wɔ, nzen se a?” ⁴⁹ Na Yesu ase bu ka, “Ajini wo má m n̄u,

ama, m bu m Si n wɔ, ye amberɛ bu má m. ⁵⁰ M sukoro má ka mine wura m ɲu kpiri wɔ, be wo bere bo i koro ka i wura m kpiri, yiri ti jɔredifo a. ⁵¹ Nahɔre ye m suse am a, ka, sɔnɔ kere bo i bita m nɔaniɛ ni, i mi wú má fieo."

⁵² Na ba se i ka, "Kisa, ye ya si ka ajini wo u ɲu a. Abraham ni Nyeme nɔaniɛ kanfɔm ni kere awu, ama, wɔɔ ɲa sɔnɔ kere bo i bita u nɔaniɛ ni, i mi wú má fieo. ⁵³ A tara ya si Abraham bo wɔ wu n wɔ? I ni Nyeme nɔaniɛ kanfɔm kere awu. A bu u ɲu sɛ wɔ?"

⁵⁴ Na Yesu ase bu ka, "Nzen m wura m ɲu kpiri, i ti ɲgbɛɛn wɔ. M Si wura m kpiri a, yiri bo am ɲa i ti am Nyeme ni, ⁵⁵ ama, am si má i. Mini si i a. Haari nzen m ɲa m si má i, m yó kɔrefɔ ka amberɛ wɔ. Ama, m si i, na m bita i nɔaniɛ ni. ⁵⁶ I yoori am si Abraham fie ka i ɲu m ba n nu, i ɲuuri i, na i ahore ajo." ⁵⁷ Na ba se i ka, "A nya ju má afo aburunu, ye i yo sɛ ye a ɲa a ɲuuri Abraham a?" ⁵⁸ Na Yesu ase bu ka, "Nahɔre ye m suse am a, kana bu ba wuuri Abraham ni, mini wo bere wɔ." ⁵⁹ I seeri sɔ ni, na ba fa yabue ka bu bo kun i, ama, na wɔ lɔrɔki afite Nyeme Sereebiri Awuru n nu.

9

Kabo Yesu tekeeri anyinsin be nyumbaa ni

¹ Na sanɲa bo Yesu wo natiiri su ni, na wɔ ɲu sɔnɔ be, bu wuuri i ni, i ti anyinsin wɔ. ² Na i susufɔm n abisa i ka, "Ya Kerefɔ, nzu ti ye bu wuuri ahin sɔnɔ ni anyinsin a? I wufɔm yoori satie, nzen i dɛɛ satie a?" ³ Na Yesu ase bu ka, "I ti má i ni i wufɔm be mmɔɔ satie dɛɛ ti, ama, Nyeme koro ka minem ɲu kabo i yo alekutura sa fa ma i a. ⁴ Kabo wie toko wo bere ni, am ma ya yo yiri n bo wɔ sunma m juma ni. Ale bá san bo be koro yo má juma be. ⁵ Kabo m toko wo durunya n nu ni, mini ti durunya n nufɔm wein a."

⁶ Yesu seeri sɔ ni, na wɔ yi nanzue ago asienɲu, na wɔ fa akpita naatie afa abɔrɔki anyinsin nyumbaa nnyɔ n kere. ⁷ Na wɔ se i ka, "Kɔ na a kɔ ɲmisi u nyunu Silowam bura n nu." Silowam n bu la ka, ba sunma i wɔ. Na wɔ kɔ aɲmisi i nyunu n na wɔ ɲu asi, na wɔ kaaki aba awuru.

⁸ Na i lamɔkɔm ni minem bo bu yo ɲuuri i sanɲa kere ka i sere ni, abisa ka, "Má ahin sɔnɔ ni yo tana fen sere n a?" ⁹ Nbem ɲa, "Yiri a." Nbem gusu ɲa, "Má yiri a. I feremafo a." Na yiri n mmɔɔ ni i tii suse bu ka, "Mini a." ¹⁰ Na ba bisa i ka, "Ye i yoori sɛ ye u nyumbaa n ateke a?" ¹¹ Na wɔ se bu ka, "Sɔnɔ n bo bu fere i ka Yesu ni, yiri kpitaari naatie bɔrɔkiiri m nyumbaa n a. Na wɔ se m ka m kɔ Silowam bura n nu, na m kɔ ɲmisi m nyunu. Na ma kɔ aɲmisi, kpenɲa na ma ɲu asi." ¹² Na ba bisa i ka, "Ye yiri n wo ni?" Na wɔ se bu ka, "M si má."

Kabo Farasifɔm bisaari sɔnɔ n fa kɔ i nyumbaa tekeewa n su ni

¹³ Na ba fa sɔnɔ n bo i yo tiiri anyinsin n akɔ Farasifɔm dɔ. ¹⁴ Nyini cɛɛn n bo Yesu kpitaari naatie na i fa tekeeri anyinsin nyumbaa n tiiri Njumiyi cɛɛn wɔ. ¹⁵ Nyini ti, na Farasifɔm gusu akaaki abisa i ka, "I yoori sɛ ye a ɲuuri asi a?" Na wɔ se bu ka, "I faari naatie bɔrɔkiiri m nyumbaa n a, na ma ɲmisi i, na ma ɲu asi." ¹⁶ Na Farasifɔm nbem ase ka, "Ahin sɔnɔ n fite má Nyeme dɔ, dama i bita má Njumiyi cɛɛn ciire ni." Ama, na nbem gusu ase ka, "I yo sɛ ye satieyofɔ koro yo alekutura sam ka ahin ɲusu sɔ a?" Na bu kere nɔɔ awo i ɲgunɲumi. ¹⁷ Na ba kaaki abisa sɔnɔ n bo i yo tiiri

anyinsin bekun ka, “Ye wɔɔ bo wɔ teke u nyumbaa ni, a bu i se wɔ?” Na wɔ se ka, “I ti Nyeme nɔani kanfɔ ɔ.”

¹⁸ Yudafo nkpienkpienn n ade má ka i yo tiiri anyinsin wɔ, ye i ɲu asi kisa, má ka bu ba fereeri i si, ni i ni, ¹⁹ na ba bisa bu ka, “Am wa n bo am ɲa am wuuri i na i ti anyinsin ni, yiri la ahin? Ye i yoori se ye i ɲu asi kisa a?” ²⁰ Na i si, ni i ni abɔ bu nu ka, “Ya si i ka i ti ya wa a, ya wuuri i anyinsin wɔ. ²¹ Ama, ya si má kabo i yoori barasu na i koro ɲu asi kisa ni, yere gusu kaaki si má sɔnɔ bo i tekeeri i nyumbaa ni. Wɔ ju i tienɲu sɔnɔ, am bisa i, yiri mmɔɔ ni i tii sé am.” ²² Deke bo i ti na i si, ni i ni seeri sɔ ni, bu soroori Yudafo nkpienkpienn n ahore wɔ, dama Yudafo nkpienkpienn n adu mɔ ase ka sɔnɔ kere bo i seeri ka Yesu ti Kristo Tiidefo ni, bu fɔn i mi fite bu tientienbunɔɔ sɔn n nu wɔ. ²³ Nyini deɛ ti ye i si, ni i ni seeri ka, “Wɔ ju i tienɲu sɔnɔ, am bisa yiri mmɔɔ ni i tii n a.”

²⁴ Na ba kaaki afere sɔnɔ n bo i yo tiiri anyinsin n bekun, na ba se i ka, “Niɛ Nyeme ti, na a joɔ nahɔre. Yere si ka ahin sɔnɔ n ti satieyofɔ ɔ.”

²⁵ Na wɔ se bu ka, “Nzen i ti satieyofɔ ɔ, i ti má satieyofɔ ɔ, mini si má. Deke bo m si i n la ka, m yo tiiri anyinsin wɔ, ama, kisa m ɲu asi.” ²⁶ Na ba bisa i ka, “I yoori u se wɔ, ye i tekeeri u nyumbaa n se wɔ?” ²⁷ Na wɔ bo bu nu ka, “Ma du mɔ ase am kabo i tekeeri m nyumbaa ni, ye am ade má. Ye nzu ti ye am koro ka m kan kere am bekun a? Ambeɛ gusu, am koro ka am yo i susufɔm wɔ, nzen se?” ²⁸ Na ba tɔ i ɲu ni nzukɔ kpɛ ase i ka, “Wɔɔ ti nyini sɔnɔ n susufɔ a, yere yiri, ya ti Moyisi deɛ susufɔm wɔ. ²⁹ Ya si ka Nyeme yo joɔɔri Moyisi dɔ a, ama, nyini sɔnɔ n yiri, ya si má i fitebiri n mmɔɔ.”

³⁰ Na wɔ se bu ka, “Ahin ti alekutura wanla, am si má i fitebiri, ama, wɔ teke m nyumbaa. ³¹ Ya si ka Nyeme de má satieyofɔ nyemesere, ama, sɔnɔ kere bo i su Nyeme atin su, na i yo i sa koroowa, Nyeme de i sere wɔ. ³² Fite durunya n bumboori, sɔnɔ be nya ti má ka be ateke sɔnɔ bo bu wuuri i na i ti anyinsin nyumbaa. ³³ Nzen má ahin sɔnɔ n afite má Nyeme dɔ, má i koro yo má pui.” ³⁴ Na ba se i ka, “Wɔɔ yiri, bu wuuri u satieyofɔ ɔ, ye wɔɔ koro ka a kere yere a?” Na ba fɔn i afite.

Kabo Yesu ɲa bo bu de má Adamande Wa n ti anyinsinm ni

³⁵ Yesu tiiri ka ba fɔn ayi sɔnɔ n ni, na wɔ ko aɲu i, na wɔ bisa i ka, “A yo Adamande Wa n yarada a?” ³⁶ Na sɔnɔ n abisa i ka, “M Mibiɛ, yiri la ɲma a? Se m na m yo i yarada.” ³⁷ Na Yesu ase i ka, “A ɲu i e, yiri la mini n bo m sujɔɔ u dɔ ni.” ³⁸ Na sɔnɔ n ase i ka, “M Mibiɛ, ma yo u yarada.” Na wɔ kutu Yesu nyunu akansi i.

³⁹ Na Yesu ase ka, “M baari durunya n nu ka m ba di minem jɔre wɔ, na bo bu ɲu má asi n ɲú asi, na bo bu ɲu asi n yó anyinsinm.” ⁴⁰ Farasifɔm nbem bo bu woori i bi dɔ n tiiri sɔ ni, na ba se i ka, “Nka a ɲa a se ka yere gusu ti anyinsinm wɔ lɛɛ fan?” ⁴¹ Na Yesu ase bu ka, “Nzen má am ti anyinsinm, má am la má ɲgasi, ama, kabo am nya ɲa am ɲu asi ni, am toko la ɲgasi lɛɛ.”

10

Kabo Yesu boori miɛenu niiri bɛsasafɔ ni

¹ Na Yesu ase ka, “Nahɔre ye m suse am a, sɔnɔ bo i lɔrɔki wura nbɔem sɔɔ n nu, na wɔ fa má anɔ n nu awura má, i mi ti awiefo ɔ, na i kaaki ti sɔnɔ bo i nati fin minem di wɔ. ² Sɔnɔ bo i fa anɔ n wura nbɔem sɔɔ n nu,

yiri ti nbœem sasafɔ n a. ³ Anɔ niɛfɔ ni teke anɔ n ma i a, na i fere i dɛɛ nbœem n duma, na i nbœem ni ti i konvi, na i fa bu fite. ⁴ Nzen i nya faari i nbœem kɛɛ fiteeri, i du bu mɔ ɔ, na i dɛɛ nbœem n su i su, dama bu si i konvi. ⁵ Sɔnɔ bo bu si má i, bu sù má i su fieo, bu n̄máti yaki i wɔ, dama bu si má i konvi.”

⁶ Na Yesu abo ahin miɛɛnu n akere bu, ama, ba ti má i bu.

Kabo Yesu n̄a yiri ti bœesasafɔ kpa n ni

⁷ Ba ti má miɛɛnu n bu n ti, na Yesu akaaki ase bu bekun ka, “Nahɔɛ ye m suse am a, mini ti nbœem anɔ n bo bu fa wura sɔɔ n nu n a. ⁸ Bere kɛɛ bo bu duuri m mɔ baari, na bu yo bu n̄u ka bu niɛ nbœem su ni, bu ti awiefom wɔ, ni minem bo bu nati fin minem di wɔ, ama, nbœem n ade má bu jɔjɔwa ni. ⁹ Mini ti anɔ n a, na sɔnɔ kɛɛ bo i fa m dɛɛ anɔ n wuraari, i nyá tiide, na i wúra na i fite, na i nyá i diire di. ¹⁰ Awiefɔ dɛɛ la ka i ba wɔ ɔ, na i kun, na i saaki. Mini aba ka bu nyá n̄gɔɔ bo i la má an̄usu.

¹¹ Mini ti bœesasafɔ kpa n a. Bœesasafɔ kpa n tɔ i n̄gɔɔ ɔ, na i wu ma i nbœem ni. ¹² Padifɔ n bo ba fa i ka i sasa nbœem n ti má bœesasafɔ nahɔɛ su, na nbœem n ti má i dɛɛm. Nyini ti, nzen i ba n̄uuri ka bedi suba, i n̄mati yaki nbœem wɔ. Na bedi n wura bu nu tara nbem, na bo ba ka n sandi. ¹³ I ti padifɔ n dɛɛ ti, na i cɛɛ wo má nbœem n nu, nyini ti ye i n̄mati yaki bu n a. ¹⁴⁻¹⁵ Mini ti bœesasafɔ kpa n a. Kabo m Si Nyemɛ si m na m si i ni, sɔ ye mini gusu si m dɛɛ nbœem a, na bu gusu si m. Na m tɔ m dɛɛ n̄gɔɔ na m wu ma bu. ¹⁶ M la nbœe n̄yɛn̄ga nbem bo bu ti m dɛɛm, bo bu wo má ahin nbœem n nu. Wɔ yo daka ka m fa bu gusu ba wura ahinm n nu. Bere gusu tí m konvi na bu dé i, na bu yó kun na bu sasafɔ yó kun. ¹⁷ M tɔ m dɛɛ n̄gɔɔ fa ma m minem, na m káaki de i bekun, nyini dɛɛ ti ye m Si koro m n a. ¹⁸ Be sude má m dɛɛ n̄gɔɔ ni m dɔ, ama, mini ni m tí suto i m koroyanu a. M la atin bo m tɔ m dɛɛ n̄gɔɔ ni, na m kaaki la atin bo m de i bekun. M Si maari m nɔɔ ka m yo sɔ a.”

¹⁹ Yesu seeri sɔ n dɛɛ ti, na Yudaɔ n̄kpiɛn̄kpiɛnm n nɔɔ awo i n̄gun̄gumi bekun. ²⁰ Na bu dɔn̄gu n ase ka, “Ajini wo i n̄u, nyini dɛɛ ti, wɔ bo fie a. Nzu ti ye am so am sui i dɔ a?” ²¹ Ama, nbem n̄a, “Má sɔnɔ bo ajini wo i n̄u jɔjɔwa la ahin. Ajini yo se koro teke anyinsin nyumbaa?”

Kabo Yudaɔm keteeri Yesu ni

²² Fufuku san̄ga na Yudaɔm ba sudi bu cɛɛn̄kpiri n Yerusalem miɛ kpiri n nu, na bu ten̄ge su kabo bu yo tekeeri Nyemɛ Sereebiri Awuru n ni, na bu yoori i dɔn̄gu ni. ²³ Na Yesu sunati bara ye Solomon Lele n bo i wo Nyemɛ Sereebiri Awuru n nu ni. ²⁴ Na Yudaɔ n̄bem atien bu nɔɔ abara aye i, na ba bisa i ka, “San̄ga bɔnɔ ye a bá kan teke ya nyi a? Nzen wɔɔ ti Kristo Tiidefɔ n a, se ya nahɔɛ kpain.” ²⁵ Na Yesu ase bu ka, “Ma se am, ye am ade má a. Alekutura sam bo m yo bu m Si duma n nu ni, di m n̄u daani a. ²⁶ Ama, am yo má m yarada, dama am ti má m dɛɛ nbœem. ²⁷ M dɛɛ nbœem ti m konvi. M si bu, na bu su m su. ²⁸ M ma bu n̄gɔɔ bo i la má awieeri, na bu ká má n̄gbɛɛn̄ cɛɛn̄ be fieo. Be gusu koro fin má bu fite má m saa nu. ²⁹ M Si bo i faari bu maari m ni, tara deke kɛɛ fanga, na be wo má bere bo i koro fin bu fite m Si saa nu. ³⁰ Mini ni m Si ti deke kun wɔ.”

³¹ Na Yudaɔm afa yabue bekun ka bu bo kun i. ³² Na Yesu ase bu ka, “Ma yo alekutura sakpam dɔn̄gu, bo m Si kereeri m na am an̄u i, ye sa bɔnɔ ti ye am n̄a am kun m n a?” ³³ Na Yudaɔm n ase i ka, “Má sakpam bo a yo bu n be dɛɛ ti ye ya n̄a ya kún u a, ama, bo a jɔjɔ wura Nyemɛ

ngasi nu n ti, dama a ti adamande wɔ, ama, na a se ka a ti Nyɛmɛ wɔ.”
³⁴ Na wɔ se bu ka, “Ba kɛrɛ i am Nyɛmɛ Jɔrɛ Kadasi n nu ka, Nyɛmɛ ɲa, ‘Am ti ka Nyɛmɛ wɔ.’”
³⁵ Be koro bu má Nyɛmɛ Jɔrɛ Kadasi ni ngbɛɛn. Nyɛmɛ yo seeri bu ka bu ti ka Nyɛmɛ wɔ, bɛrɛ bo bu deerɛ Nyɛmɛ nɔɔɔni ni,
³⁶ ama, mini yiri, m Si Nyɛmɛ ayi m, ye wɔ sunma m durunya n nu a. Ye nzu ti ye amberɛ ɲa ma kan ciire jɔrɛ, dama m ɲa mini ti Nyɛmɛ Wa a?
³⁷ Nzen m yo má m Si juma ni, má am yo m yarada. ³⁸ Ama, nzen m yo bu na haari am yo má m yarada mmɔɔ a, am yo m juma n yarada, adena am si nahɔrɛ su ka mini ni m Si n ti deke kun wɔ.”
³⁹ I seeri sɔ ni, na ba kpi ka bu tara i bekun, na wɔ lɔrɔki afite bu nu.

⁴⁰ Na Yesu akaaki akpɛ akɔ Yodan kunma n buekun dɔ akɔ aju deke bo Yohane yo biɛeri minɛm Nyɛmɛ nzue ni, na wɔ wo dɔ. ⁴¹ Na jama beberebe aba i dɔ, na ba se ka, “Yohane ayo má alekutura sa be, ama, jɔjɔwɔa kɛrɛ bo i yo jɔjɔ fa kɔɔri ahin sɔnɔ n ɲusu n ti nahɔrɛ wɔ.”
⁴² Na mine dɔngɔ ayo i yarada dɔ.

11

Kabo Lazarosi wuuri ni

¹ Na sɔnɔ be bo bu fere i ka Lazarosi n ada tukpaki. I ninbaam la Mariya ni Marata. Bu bɔsu la Betani. ² Nyini Mariya n bo i niwa Lazarosi daari tukpaki ni, yiri ba faari tulaalɛ nvanvanifo gɔɔri Yesu jaa su ye i faari i tiɲmɛ tintiin nunukaari i n a. ³ Na i ninbaa nbaabaram n asunma ka bu kɔ se Yesu ka, “Ya Mibiɛ, u danfo n bo a koro i agaya n ada tukpaki.”
⁴ Yesu tiiri sɔ ni, na wɔ se ka, “Ahin tukpaki n ti má yiwee tukpaki, ama, i yo sɔ, na minɛm ɲu Nyɛmɛ jirima woowa kabo i ti, na Nyɛmɛ ma minɛm ɲu mini bo m ti i Wa n gusu jirima woowa.”
⁵ Tɔ, Yesu koroori Marata ni Mariya ni bu niwa Lazarosi. ⁶ Ama, i tiiri ka Lazarosi ada tukpaki ni, na wɔ ka deke bo i woori n cɛɛn nnyɔ abuka su.

⁷ Nyini sin na Yesu ase i susufɔm ka, “Am ma ya kaaki kɔ Yudiya dɛɛ awɔrɛ n nu.”
⁸ Na i susufɔm n ase i ka, “Ya Kerefɔ, má anzɔni fɛn ye Yudafɔm ɲa bu tu yabɛ bo kun u n a? Ye a sukoro ka ya kpɛ ye nyi kɔ dɔ bekun n a?”
⁹ Na Yesu ase bu ka, “Fa ngarama kɔ ju naasɔ, m ɲa i ti wiɛ kun wɔ e. Sɔnɔ bo i nati wiesu bo má i jaa, dama durunya n nu wein ni ma i ɲu asi a. ¹⁰ Ama, sɔnɔ bo i nati kɔngue bo i jaa, dama wein wo má i dɔ.”
¹¹ Yesu jɔjɔri sɔ n sin, na wɔ kaaki ase bu ka, “Ya danfo Lazarosi adaafi, ama, m suko na m kɔ tenjege i lɛɛ.”
¹² Na i susufɔm n ase i ka, “Ya Mibiɛ, nzen wɔ daafi wɔ, i nyá laifɛ.”
¹³ Kabo Yesu seeri n la ka, Lazarosi awu wɔ, ama, i susufɔm bɛrɛ sunsun ka i ɲa wɔ daafi nahɔrɛ su wɔ. ¹⁴ Nyini ti, na Yesu ase bu kpain ka, “Lazarosi awu. ¹⁵ Ama, amberɛ dɛɛ ti, wɔ yo m fiɛ ka ma wo má dɔ, adena am yo yarada. Am ma ya kɔ i dɔ.”
¹⁶ Na Tomasi bo bu fere i ka Ndaa n ase i lamɔko susufɔm n ka, “Am ma yerɛ gusu kɔ, nzen bu kɔ kuunri i a, na ya ni yiri kɛrɛ awu.”

Kabo Yesu ɲa yiri tenje minɛm yiwee nu ni

¹⁷ Sangɔ bo Yesu kɔ juuri ni, i ɲuuri ka ba se Lazarosi i lenna lɛɛ. ¹⁸ Betani ni Yerusalem miɛm waari má ni i bengɔ. ¹⁹ Na Yudafɔm dɔngɔ aba Marata, ni Mariya dɔ ka bu ba dada bu ahore, bu niwa n bo wo wu n dɛɛ ti. ²⁰ Marata tiiri ka Yesu suba ni, na wɔ kpa i atin, ama, na Mariya aka awuru. ²¹ Na Marata ase Yesu ka, “M Mibiɛ, nzen má a woori fɛn, má m niwa n awu má. ²² Ama, haari ni nyini mmɔɔ, m si ka deke kɛrɛ bo a

sere Nyeme, i yó i ma u.” ²³ Na Yesu ase i ka, “U niwa ni ténge i yiwee n nu bekun.” ²⁴ Na Marata ase i ka, “M si ka i bá tenge i yiwee nu jina cɛɛn, sanga bo Nyeme bá tenge minem bu yiwee nu ni.” ²⁵ Na Yesu ase i ka, “Mini ti sɔnɔ bo i tenge minem bu yiwee nu, na i má bu ngɔɔ n a. Sɔnɔ kɛɛ bo i yo m yarada, haari nzen i wuuri, i nyá ngɔɔ. ²⁶ Na sɔnɔ kɛɛ bo i la ngɔɔ na i yo m yarada, i mi wu má fieo. A yo ahin jɔjɔwa n yarada a?” ²⁷ Na Marata ase i ka, “M Mibie, ma yo yarada ka wɔɔ ti Nyeme Wa, Kristo Tiidefo n a, bo i ɲa i súnma i durunya n nu ni.”

Kabo Yesu suunri ni

²⁸ Marata seeri sɔ n sin, na wɔ kaaki ako afere i niwa Mariya benle, na wɔ se i ka, “Ya Mibie n aba, i ɲa a bra.” ²⁹ Mariya tiiri sɔ ni, i kaba bereki yasuuri wɔ, na wɔ kɔ i dɔ. ³⁰ Nyini sanga, na Yesu nya ju má mie n nu, i toko wo deke bo Marata kɔ tuuri i n wɔ. ³¹ Na Yudafɔm bo bu woori awuru n nu Mariya bi, na bu sudada i ahore ni, bu ɲuuri kabo i bereki yasu fiteeri ni, na ba su i su. Bu sunsuunri ka i suko deke bo bu seeri Lazarosi n wɔ, na i kɔ sun. ³² Sanga bo Mariya kɔ juuri deke bo Yesu wo n na i ɲuuri i ni, na wɔ kutu i nyunu, na wɔ se i ka, “M Mibie, nzen má a woori fen, má m niwa n awu má.” ³³ Yesu ɲuuri ka i susun ni, ni kabo Yudafɔm n bo bu suuri i su baari n gusu wo sun su ni, na i ahore asaaki, na wɔ mi i ɲumi. ³⁴ Na wɔ bisa bu ka, “Am seeri i ni wɔ?” Na ba se i ka, “Ya Mibie, bra na a ba nie.” ³⁵ Na Yesu asun. ³⁶ Nyini ti na Yudafɔm n ase ka, “Am nie kabo i koro i agaya barasu a.” ³⁷ Ama, na bu nbem ase ka, “Yiri n bo i teke anyinsin n nyumbaa ni, má i koro tuntun má sɔnɔ ni, na i wu má, nzen se?”

Kabo Yesu tengeeri Lazarosi i yiwee nu ni

³⁸ Na Yesu ahore asaaki bekun, na wɔ kɔ deke bo bu seeri Lazarosi ni. I ti yabuɛ buɛ faɲkunma wɔ, ye bu faari i seeri nu a, na ba fa yabuɛ nyinga atɔ anɔ ni. ³⁹ Na Yesu ase bu ka, “Am ba yi yabuɛ ni.” Na sɔnɔ n bo wɔ wu n niwa Marata ase i ka, “M Mibie, kisa wɔ bun, dama bu seeri i nyuma lenna leɛ.” ⁴⁰ Na Yesu ase i ka, “Ma se má u ka, nzen a yoori m yarada, a ɲú Nyeme jirima woowa kabo i ti barasu?” ⁴¹ I seeri sɔ ni, na ba lakati yabuɛ ni. Na wɔ ye i tii su aɲgoro, na wɔ se ka, “M Si, m da u asi ka a de m sere. ⁴² M si ka sanga kɛɛ a de m sere wɔ, ama, ahin minem bo bu jina fen n deɛ ti, ye m seeri sɔ a, adena bu yo m yarada ka wɔɔ sunmaari m a.” ⁴³ I sereeri Nyeme n wierei ni, na wɔ tien ase ka, “Lazarosi, fite.” ⁴⁴ Na sɔnɔ n bo wɔ wu n afite faɲkunma n nu. Tani pɔɔndiiri i saa, ni i jaa, na tani kun pɔɔndiiri i tii. Na Yesu ase bu ka, “Am nyanɲi yi tani n na am ma i kɔ.”

Kabo bu sɛsɛri su ka bu kun Yesu ni

⁴⁵ Yudafɔm dɔngɔ bo bu baari Mariya dɔ ɲuuri sa n bo Yesu yoori i ni, na ba yo i yarada. ⁴⁶ Na bu nbem ako Farasifɔm n dɔ ako ase bu kabo Yesu ayo ni. ⁴⁷ Na Farasifɔm ni Nyeme sayoowa dɔnguyofɔ nkpienkpienm n afere Yudafɔm tereterefo ni, na ba tien bu nɔɔ. Na ba se ka, “Ye ya yo se wɔ? Am nie e, ahin sɔnɔ ni suyo alekutura sayoowam dɔngɔ. ⁴⁸ Nzen ya yaki i na i suyo sɔ, minem kɛɛ yó i yarada a, na Roma yikofɔm bá saaki ya Nyeme Sereebiri Awuru ni, na bu kún ya minem ni.” ⁴⁹ Na bu nu sɔnɔ be bo bu fere i ka Kayafasi ni, bo i ti Nyeme sayoowa dɔnguyofɔm kɛɛ kpien nyini afo n ase ka, “Amberɛ, am si má pui. ⁵⁰ Am si má kabo i

ti n wɔ, nzen se? Ka nzen am ma sɔnɔ kun wu maari minem kere, i ti ye ni bo ya minem kere bá wu ni.” ⁵¹ Má i koroyanu ye i seeri sɔ a, ama, yiri ti Nyeme sayoowa dɔnguyofɔm kere kpien nyini afɔ n ti, ye Nyeme ma i seeri ka Yesu wú ma Yudafɔm n a. ⁵² Na má bere ngumi dɛɛ ti ye i wú a, ama, adena i tien Nyeme nbaam nɔɔ, na bu yo kun, bere bo ba sandi ako asien nbem n su. ⁵³ Nyini dɛɛ ti, fite nyini cɛɛn n fa kɔ, na ba sese su ka bu kun Yesu.

⁵⁴ Nyini dɛɛ ti, wɔ yi má i ɲu fofoe nu anati má Yudafɔm nu kun. Ama, i fiteeri bere ni, na wɔ kɔ awɔre be bo i wo dodo boro kpantain dɛɛ bue ni, na i ni i susufɔm n ako awo mie n bo bu fere i ka Efirayim n su.

⁵⁵ Nyini sangɔ, wɔ ka kaan, na Yudafɔm di bu Butara cɛɛnkpiri ni, na mine dɔɲɲu afite ahemem aba Yerusalem mie kpiri n nu, na bu ba kpakpara bu ɲu fin ka, na cɛɛnkpiri n nya ju. ⁵⁶ Na ba nienie Yesu busu, na sangɔ bo bu wo Nyeme Sereebiri Awuru n nu ni, na ba bisa bu ɲɲu nu ka, “Am sunsun se wɔ? I bá cɛɛnkpiri ni? Ya de má ka i bá.” ⁵⁷ Ama, Nyeme sayoowa dɔnguyofɔ nkpienkpienm ni, ni Farasifɔm n ama nɔɔ ka sɔnɔ kere bo i si deke bo Yesu wo, i se bu na bu kɔ tara i.

12

Kabo Mariya faari tulaaleɛ nvanvaniɔ gɔɔri Yesu jaam su ni

¹ Na sangɔ bo i ba kaari lesen, na bu di Butara cɛɛnkpiri ni, na Yesu ako Betani, Lazarosi bosu, yiri bo Yesu tengeeri i yiwee n nu ni. ² Na ba su Yesu wɔfɔ dɔ. Marata faari diire n ba maari bu a, Lazarosi gusu woori minem bo bu ni Yesu diiri diire n nu. ³ Na Mariya afa tulaaleɛ nvanvani bo i la gɔ agaya tuwa bambaka kun, na wɔ fa ago Yesu jaa su, na wɔ fa i tiɲmie tintiin anunuka i jaam kere su, na tulaaleɛ ni nvani ade awuru n kere. ⁴ Na Yesu susufɔm kun bo bu fere i ka Yudasí Isikariyoti bo i bá tɔ Yesu n abisa ka, ⁵ “Nzu ti ye bara n atɔ má tulaaleɛ n na i nya ɲwaa beberebe, na ya fa ma jaarifɔm a?” ⁶ I ti awiefo n dɛɛ ti ye i seeri sɔ a, má ka i cɛɛ wo jaarifɔm nu wɔ. Yiri ti bu ɲwaa bitafɔ a, na i suwɔ ɲwaa n be sangɔ sangɔ. ⁷ Na Yesu ase ka, “Yaki Mariya benle, i dɛɛ nzee bo i sufa yo m fa kɔ m yiwee cɛɛn leɛ. ⁸ Dama am ni jaarifɔm ni wo bere sangɔ kere a, ama, am ni mini koro wo má bere sangɔ kere.”

⁹ Yudafɔm beberebe tiiri ka Yesu woori dɔ ni, na ba ba i dɔ, má ka Yesu ngumi ti ye bu baari a, ama, bu baari ka bu ba ɲu Lazarosi n bo Yesu tengeeri i yiwee n nu n wɔ. ¹⁰ Nyini dɛɛ ti, na Nyeme sayoowa dɔnguyofɔ nkpienkpienm n asese su ka bu kun Lazarosi gusu. ¹¹ Dama i dɛɛ ti ye Yudafɔm dɔɲɲu akaaki bu sin abo bu a, ye ba yo Yesu yarada n a.

Kabo Yesu wuraari Yerusalem ka femɛ dɛɛ su ni

¹² Na alecin na jama n bo bu baari ka bu ba di Butara cɛɛnkpiri n ati ka Yesu suba Yerusalem mie kpiri n nu. ¹³ Na ba kpiekpie kpakpa nyawa ako akpa i atin, na bu subo kuyigindi, bu ɲa, “*Hosana*. Ya kansí Nyeme.

Terefie wo yiri n bo i suba Micera n dɛɛ duma n nu n dɔ.

Terefie wo Yisarelifɔm femɛ n dɔ.”

¹⁴ Na Yesu aɲu kaakobaa be, na wɔ fun atana su, kabo ba kere i Nyeme Jɔre Kadasi n nu ni,

¹⁵ “Amberɛ Siyonfɔm, má am soro sere.

Am nie, am femɛ ni suba n a,

i fun kaakobaa wɔ.”

¹⁶ Nyini sanɔa, i susufɔm nya si má nyini sam n bo ba yo n kere bu. Má ka sanɔa bo Yesu ba tengeeri i yiwee n nu, na bu njuuri i jirima woowa n sin, na ba nya atenje su, ka ba kere i Nyeme Jɔre Kadasi n nu ka bu yó i sɔɔ, na ba kaaki atenje su, ka ba yo i sɔ nahɔre su. ¹⁷ Na jama n bo bu yo woori Yesu dɔ, sanɔa n bo i fereeri Lazarosi fiteeri fanɔunma n nu, na i tengeeri i yiwee n nu ni, na bu sukan labari ni. ¹⁸ Nyini alekutura sa n bo i yoori i na minem tiiri n dɛɛ ti, na ba kpa i atin. ¹⁹ Na Farasifɔm n ase bu njuju nu ka, “Am aju má i? Ya koro yo má pui kun. Yiri ye durunya n nufɔm kere susu i su n a.”

Kabo Girikifɔ nbem ba bisaari Yesu busu ni

²⁰ Minem bo bu baari Yerusalem mie kpiri n nu Butara cɛɛnkpiri n sanɔa n ka bu ba su Nyeme ni, bu nbem ti Girikifɔm wɔ. ²¹ Na ba ba Filipu dɔ, i fite mie n bo bu fere i ka Besayida na i wo Galili awɔre n nu n wɔ. Na ba se i ka, “Njapie, ya koro ka ya nju Yesu wɔ.” ²² Na Filipu akɔ ase Andere, na bu nnyɔ n kere akɔ ase Yesu. ²³ Na Yesu ase ka, “Sanɔa n aju bo Nyeme wúra mini Adamande Wa n kpiri. ²⁴ Nahɔre ye m suse am n a, má ka alembaa awura fa nu, na wo kpɔɔ, i ti i tii wɔ. Ama, nzen i wurari fa nu na i kpɔɔɔri, ye i wúra mbaa beberebe a. ²⁵ Sɔnɔ kere bo i koro i nɔɔɔ, i mi bá fun i, ama, sɔnɔ kere bo i koro má i nɔɔɔ durunya n nu fen, i mi bá nya nɔɔɔ bo i la má awieeri. ²⁶ Sɔnɔ kere bo i su m, wɔ yo daka ka i mi su m su, na deke bo m wo ni, m amusuifɔ gusu wó dɔɔ. Na sɔnɔ kere bo i suuri m, m Si Nyeme wúra i mi kpiri.”

Kabo Yesu jɔɔ fa kɔɔri i yiwee n jɔre su ni

²⁷ Na Yesu ase ka, “Kisa, m ahore asaaki, ye m se se wɔ? M koro se ka, m Si Nyeme, yi m fite ahin anyumboro bo i suba m dɔ n nu, nzen se? Ai, m koro se má sɔ, dama nyini dɛɛ ti ye m baari a. ²⁸ M dɛɛ bo m se la ka, m Si, kere kabo u jirima woowa ti.” Na akonvi be atien afite angoro ase ka, “Ma du mɔ akere kabo m jirima woowa ti, na m káaki kere i bekun.” ²⁹ Jama n bo bu jina Yesu bi n tiiri akonvi ni nɔa ni, na bu nbem ase ka, “Nzue akpura.” Na nbem gusu ase ka, “Nyeme mereke ajojo i dɔ a.” ³⁰ Na Yesu ase bu ka, “Amberɛ dɛɛ ti ye akonvi n jɔɔɔri a, má mini dɛɛ ti a. ³¹ Sanɔa n aju bo Nyeme dí durunya n nufɔm jɔre, na i fón yi Sitana bo i ti bu femɛ ni. ³² Ama, mini, bu ba yeeri m su jinaari angoro baka jaanu n su, m cín sɔnɔ kere ba m dɔ.” ³³ Kabo i yo seeri sɔ n kere yiwee n bo i bá wu i n wɔ.

³⁴ Na jama n ase i ka, “Ya ti i Nyeme Jɔre Kadasi n nu ka, Kristo Tiidefɔ ni wo bere sanɔa kere. I wú má. Ye i yoori se ye wɔɔ nɔa, wɔ yo daka ka bu bá yeeri Adamande Wa n su jinaari angoro baka jaanu n su a? Ye Adamande Wa n la nɔa a?” ³⁵ Na Yesu ase bu ka, “Mini bo m ti wein ni, m wo am nu kisa, ama, m cé má. Nyini dɛɛ ti, am nya wo ni wein ni, am sunati wein nu wɔ, na má awosin tu am. Sɔnɔ kere bo i wo awosin nu, i mi si má deke bo i sukɔ ni. ³⁶ Am nya wo ni wein ni, am yo i yarada, na m má am yo wein dɛɛ nbaam.” Yesu seeri sɔ ni, na wo fite bu nu akɔ afie deke be, na má be nju i.

Kabo Yudaɔm ayo má Yesu yarada ni

³⁷ Yesu yo yoori alekutura sam dɔŋgu na ba ɲu i, haari ni nyini mmɔɔ, ba yo má i yarada. ³⁸ Nyini ma Nyeme noanie kanfo Esaya jore n bo i yo kereeri n yo yiwa. I ɲa,

“M Nyeme Feme, ɲma ade jore n bo ya kan i n a?”

Ye ɲma ye a yi u yiko akere i a?”

³⁹ Nyini dee ti, ye ba koro ayo má Yesu yarada n a. Kabo Esaya akaaki ase ka,

⁴⁰ “Nyeme ama ba yo anyinsinm

na má bu ɲu asi,

na wo ma bu ahore ayo kekereke

na má bu ti i noanie n bu,

adena má bu kaaki ba i do

na bu nya laifie.”

⁴¹ Esaya yo ɲuuri Yesu jirima woowa n dee ti, ye i kaanri i ɲu jore n a.

⁴² Yudafɔ nkpienkpienm dɔŋgu mmɔɔ yoori Yesu yarada, ama, bu soroori Farasifom n ahore n dee ti, ba koro ayi má bu ɲu fofoe nu. Nzen bu yiiri bu ɲu ka ba yo i yarada, Farasifom ni fon bu fite bu tientienbunoo soo n nu wo. ⁴³ Dama Yudafɔ nkpienkpienm n yo koroori adamande kansi taraari Nyeme dee.

Kabo Yesu seeri ka i noanie ni di minem jore ni

⁴⁴ Na Yesu atien ase ka, “Sɔno kere bo i yo m yarada, má mini ngumi ye i yo m yarada, ama, i yo bo wo sunma m n gusu yarada a. ⁴⁵ Na sɔno kere bo i nie na i ɲuuri m, ti ka wo ɲu m Si Nyeme bo i sunmaari m n lee. ⁴⁶ Mini bo m ti wein n aba durunya n nu, adena sɔno kere bo i yo m yarada, i wó má awosin nu. ⁴⁷ Sɔno kere bo i ti m noanie n na i de má i, m di má i mi jore, dama ma ba má ka m ba di durunya n nufom jore wo, ama, m baari ka m ba de bu tii ji wo. ⁴⁸ Sɔno kere bo i kete m, na i de má m noanie ni, i joredifo wo bere wo. Noanie n bo ma jojo i ni, yiri di i mi jore jina ceen n a. ⁴⁹ Dama má m koroyanu ye m kan so a, ama, m Si n bo wo sunma m ni, yiri maari m noo, kereeri m noanie kun kun kere bo m jojo i n a. ⁵⁰ M si ka i noanie maawa n ti deke bo i ma ngoo bo i la má awieeri n wo. Nyini dee ti, kabo m Si seeri m ni, so ye m jojo a.”

13

Kabo Yesu ɲmisiiri i susufom n jaa ni

¹ Alecin bo má bu di Butara ceenkpiri n ni, na Yesu asi nu ka sanja n aju bo i fite durunya n nu kaaki ko i Si Nyeme do. Na i dee tienngu minem bo bu wo durunya n nu na i koro bu ni, i koro bu so o haari i ko ju i fanga nyaari. ² Na kɔngue sanja bo bu wo diire n di su ni, na Sitana awura Yudasi, Simon Isikariyoti wa n tii nu ka i to Yesu ma i kpofom. ³ Na Yesu asi nu ka i Si Nyeme afa deke n kere awura i saa nu, na i kaaki si ka i fiteeri Nyeme do baari a, na i kaaki ko i do o. ⁴ Na wo nya yasu ajina, na wo yi i tanlee n ase, na wo fa papawo abo i wi nu. ⁵ Na wo sa nzue ago nyaŋa nu, na wo bo i bu suɲmisi i susufom n jaa, na wo fa papawo n bo i bo i wi nu ni sunuka bu jaam. ⁶ I ba kpuraari Simon Petoro, na wo bisa Yesu ka, “M Mibie, na woro ba ɲmisi m dee jaa?” ⁷ Na Yesu ase i ka, “Sa bo m suyo i ni, a koro ti má i bu kisa, ama, fa ko fa ba, a bá ti i bu.” ⁸ Na Petoro ase i ka, “Ai, a ɲmisi má m jaa haari durunya n ba yasu.” Na Yesu ase i ka, “Nzen ma ɲmisi má u jaa, m ni woro akpaaki lee.” ⁹ Do na Simon

Petoro anya ase i ka, “M Mibie, nzen i ti so a, ma a nmisi m jaa ngumi, ama, nmisi m saam ni m tii kere.” ¹⁰ Na Yesu ase i ka, “Sono anya abie nzue, nka i nmisi i jaa a, i bie ma nzue kun, dama i njunie kere ti casi wo. Ambere, am ti casi wo, ama, ma am kere.” ¹¹ Yesu siiri bo i ba to i ma i kpofom ni, nyini ti ye i na ma bu kere ti casi n a.

¹² I nmisi bu jaam wieeri ni, na wo fa i tanlee n awura, na wo ko atana i tanaabiri ni. Na wo bisa bu ka, “Kabo ma yo am ni, am ati i bu? ¹³ Am fere m ka am Kerefɔ ɔ, na am kaaki fere m ka am Mibie. Am jɔɔ nahore wo, dama m ti so ɔ. ¹⁴ To. Kisa na mini bo m ti am Mibie, ni am Kerefɔ, na ma nmisi am jaam ni, wo yo daka ka ambere gusu nmisi am bengum jaam so. ¹⁵ Dama ma yo akere am lee, na am gusu yo am bengum kabo ma yo am ni.” ¹⁶ Na wo se bu ka, “Nahore ye m suse am a, akoo koro tara ma i mibie, na bekun sunmafo gusu koro tara ma bo i sunmaari i ni. ¹⁷ Nzen am sin ahin n kere, na am yoori so, terefie wo am do.

¹⁸ M sujɔɔ ni ma am kere wo, dama m si bo ma du mo ayi bu ni. Ama, kabo ba kere i Nyeme Jore Kadasi n nu ni, i ti ye ni ka i yo yuiwa, ka, ‘Sono n bo m ni yiri sangɔ di diire taale kun nu, yiri akaaki m jaa tufɔ n a.’ ¹⁹ M suse am sa bo i ba yo wo lee, na i ba yoori, na am yo m yarada ka mini la sonohore n bo ma se am kabo m ti n a. ²⁰ Nahore ye m suse am a, sono kere bo i de sono bo m sunma i ni, i mi ade mini wo lee, na sono kere bo i de mini, i mi ade yiri bo i sunmaari m wo lee.”

Kabo Yesu seeri ka Yudasi to i ma i kpofom ni

²¹ Yesu seeri bu so wieeri ni, na i ahore asaaki ako asin su, na wo se bu kpain ka, “Nahore ye m suse am a, am nu kun ba to m ma m kpofom a.” ²² Na i susufom n abirisi, sunie bu njuju nu, ama, ba si ma bo i yo nyini sa n ni. ²³ Bu nu kun be bo Yesu koro i agaya n tana mata Yesu. ²⁴ Na Simon Petoro abo i nyumbaa i do ka i bisa Yesu ka, i ni nma a? ²⁵ Na yiri n acin adodo Yesu, na wo bisa i ka, “Ya Mibie, a ni nma a?” ²⁶ Na Yesu ase i ka, “Sono n bo m kpie too n bo toro n nu na m fa ma i ni, yiri lee.” Na wo fa too n abo toro n nu, na wo fa ama Yudasi, Simon Isikariyoti wa ni. ²⁷ Yesu faari too n maari Yudasi wieeri ni, na Sitana awura i tii nu, na Yesu ase i ka, “Sa n bo a na a yo i ni, ko yo i ndende.” ²⁸ Ama, bu kere bo bu woori diire n di su ni, bu be mmoo asi ma deke n bo i ti na Yesu seeri i so ni. ²⁹ Yudasi tiiri bu nwaa bitafo n dee ti, bu nbem sunsun ka Yesu na i ko to deke be na bu fa di eenkpiri n wo, wara i ko yi nwaa n be fa ma yaarifom wo. ³⁰ Yudasi diiri too n wieeri ni, na wo yasu afite ako. Nyini sangɔ ni, i ti kɔngue wo.

Kabo Yesu maari bu nɔanie maawa fɔfɔre ni

³¹ Yudasi fite ko wieeri ni, na Yesu ase ka, “Kisa ye Nyeme wura mini Adamande Wa n kpiri a, na m dee ti ye mine wura m Si Nyeme kpiri a. ³² Na nzen bu wuraaari Nyeme kpiri m dee ti, Nyeme gusu wura m kpiri, na Nyeme ma i yo kisa bere.” ³³ Na wo se bu ka, “M nbaam, m ce ma am nu fen. Am ba nienie m busu fie wo, na kabo m yo seeri Yudafo ni, so ye m suse am kisa, ka am koro ko ma deke bo m sukɔ ni. ³⁴ Nɔanie maawa fɔfɔre ye m sufa ma am n a, yiri la ka, am koro am bengum. Kabo ma koro am ni, am koro am bengu so. ³⁵ Nzen am koro am bengu, nyini ye sono kere si ka am ti m susufom a.”

Kabo Yesu seeri ka Petoro kete kpe nsan ka i si ma i ni

³⁶ Na Simon Petoro abisa i ka, “Ya Mibie, a kó ni wɔ?” Na Yesu abɔ i nu ka, “Deke bo m sukɔ ni, a koro su má m su kisa, ama, sangá suba bo a bá su m su.” ³⁷ Na Petoro akaaki abisa i ka, “Ya Mibie, nzu ti ye m koro su má u su kisa? Nzen i yo yiwee mmɔɔ a, m wú u deɛ ti.” ³⁸ Na Yesu abisa i ka, “A koro wu m deɛ ti? Nahɔɛ ye m suse u a, kana akonyuma bá bo, a kété kpe nsan su ka a si má m.”

14

Kabo Yesu ɛa yiri ti atin n bo sɔnɔ koro fa i sukɔ Nyeme dɔ ni

¹ Na Yesu ase i susufɔm n ka, “Má am ma am ahore saaki. Am yo Nyeme yarada, na am yo m gusu yarada. ² M Si Nyeme dika n nu, sɔɔm sunnu dɔ, nzen má i ti má sɔ, má m se má am. M kó na m kɔ sese woobiri su se am. ³ Na nzen m kɔ sese woobiri n su seeri am, m káaki ba fa am kɔ deke bo m kɔ wo ni, na deke bo m wó ni, am gusu wó dɔ. ⁴ Na deke bo m sukɔ ni, am si atin ni.” ⁵ Na Tomasi ase i ka, “Ya Mibie, ya si má deke bo a sukɔ ni, ye ya yo se si atin n a?” ⁶ Na Yesu ase i ka, “Mini ti atin n a, ni nahɔɛ, ni ɛɔɔ n a. Mini ɛgumi ti atin n bo sɔnɔ koro fa i na i kɔ m Si Nyeme dɔ a. ⁷ Nzen má am siiri m, má am si m Si mmɔɔ, ama, fa nyuma fa kɔ, am asi i, na am anju i.”

⁸ Na Filipu ase i ka, “Ya Mibie, kere ya u Si ni, deke bo ya koro i kere lɛɛ.” ⁹ Na Yesu abisa i ka, “Filipu, bo m ni amberɛ awo bere ace sɔ n na a si má m? Sɔnɔ kere bo wɔ ɛu mini anju m Si lɛɛ, ye nzu ti ye am ɛa m kere am m Si n a? ¹⁰ A yo má yarada ka m ni m Si n ti deke kun wɔ, nzen se? Jɔɛ n bo ma jɔɔ ama am ni, má m tieɛgu jɔɔɔwa, ama, m Si bo m ni yiri ti kun ni, yo i juma. ¹¹ Bo m ɛa, m ni m Si n ti deke kun ni, am yo m yarada. Nzen má nyini, am yo m yarada sam bo m yo bu n deɛ ti. ¹² Nahɔɛ ye m suse am n a. Sɔnɔ kere bo i yo m yarada, yiri mmɔɔ yó ahin sam bo m yo bu ni, na i yó bo bu tara ahin mmɔɔ, dama m sukɔ m Si dɔ. ¹³ Na deke kere bo am fa m duma fa sereeri i, m yó i ma am, adena mini Baa ni má minem wura m Si kpiri. ¹⁴ Na nzen am ba faari m duma fa sereeri m deke be, m yó i ma am.”

Kabo Yesu jɔɔ fa kɔɔri Awiewie Casi n su ni

¹⁵ Na Yesu ase bu ka, “Nzen am koro m, am dé m noanie maawam ni. ¹⁶ M sére m Si Nyeme, na i má am Bukafɔ fɔfɔre bo i bá wo am dɔ sangá kere. ¹⁷ Yiri la Awiewie Casi n bo i se nahɔɛ ni. Durunya n nufɔm koro de má i, dama bu ɛu má i, na bekun bu kaaki si má i, ama, amberɛ si i, dama i wo am dɔ, na i bá wo am nu. ¹⁸ M kɔɔri, m yaki má am na am ka ayikam, m káaki ba am dɔ. ¹⁹ Wɔ ka kaan na durunya n nufɔm ɛu má m kun, ama, amberɛ ɛu m. M la ɛɔɔ n deɛ ti, am gusu nyá ɛɔɔ. ²⁰ Nyini cɛɛn n ye am sí ka mini ni m Si n ti deke kun a, na mini ni amberɛ gusu ti deke kun wɔ. ²¹ Sɔnɔ kere bo i de m noanie maawam, na i su i su, i mi ti bo i koro m a, na bo i koro m ni, m Si gusu koro yiri wɔ, na mini mmɔɔ kóro i mi, na m yí m ɛu kere i.”

²² Na Yudasí, má Yudasí Isikariyoti ni, ase ka, “Ya Mibie, nzu ti ye a yí u ɛu kere yere a, ye a yí má u ɛu kere má durunya n nufɔm a?” ²³ Na Yesu ase i ka, “Sɔnɔ kere bo i koro m, i dé m noanie ni, na m Si mmɔɔ kóro i mi, na ya bá, na ya bá wo i dɔ. ²⁴ Sɔnɔ kere bo i koro má m, i dé má m noanie ni. Noanie n bo ma jɔɔ i ni, i ti má m deɛ noanie, i ti m Si n bo i sunmaari m deɛ wɔ.”

²⁵ M toko wo am dɔ, ye m suse am ahin kere a, ²⁶ ama, m Si Nyeme súnma Bukafɔ ni, m duma n nu, yiri la Awiewie Casi ni, yiri kere am deke kere a, na i káaki tenge am su fa kɔ deke kere bo ma kere am ni.”

²⁷ Na wɔ se bu ka, “Ahoreda n ye m sufa ma am n a. M dɛɛ ahoreda n ye m sufa ma am a. Má kabo durunya n nufɔm ma am ahoreda ye m suma am n a. Má am ma am ahore saaki, má am soro sere. ²⁸ Am ati ka ma se ka, ‘M kó na m káaki ba am dɔ bekun.’ Nzen má am koro m, má am ahore jɔ ka m sukɔ m Si n dɔ, dama m Si tara m. ²⁹ Sa bo wɔ nya yo má lɛɛ, ye ma se am n a, adena i bá yoori, na am yo m yarada. ³⁰ M jójɔ má am dɔ jɔɛ beberebe kun, dama Sitana bo i ti durunya n nufɔm tii ni suba. Ama, i koro yo má m pui. ³¹ M koro ka durunya n nufɔm si ka, m koro m Si ni, nyini dɛɛ ti ye m yo deke kere bo i se m ka m yo i n a.”

Na wɔ se bu ka, “Am yasu na ya kɔ.”

15

Kabo Yesu ɲa yiri ti baka n ni i tii nahɔɛ su n a

¹ Na Yesu ase bu ka, “Mini ti baka n bo i su suuwa nahɔɛ su a, ye m Si Nyeme ti nyini baka n fie niefɔ. ² Asambaa kere bo i wo m su na i su má, m Si kpɛ i ji wɔ, na asambaa kere bo i wo m su na i su, i kpiekpɛ i nyawa n yo i dɔŋgu wɔ, na i su nyunyumi. ³ Jɔɛ n bo m jójɔ maari am ni, yiri adu mɔ ayo am casi a. ⁴ Am wo ni mini na m gusu wo ni ambere. Kabo baka asambaa be wo má bere bo i koro su i ŋgumi, má ka i wo baka n su. So ye am gusu koro su má, má ka am wo m dɔ.

⁵ Mini ti baka n a, ye ambere ti asambaam ni, sɔnɔ kere bo i wo m dɔ, na mini mmɔ wɔ i dɔ, i mi su suuwa nyunyumi wɔ, dama am koro yo má pui, má ka am awo m dɔ. ⁶ Sɔnɔ kere bo i wo má m dɔ, bu kpɛ i ji wɔ, kabo bu kpɛ baka asambaa na i wu n wɔ, na bu tien bu nɔɔ wura sin nu na bu je ni. ⁷ Nzen am wo m dɔ, na m nɔanie n wo am ahore su, deke kere bo am koroori i, na am sereeri Nyeme, am nyá i. ⁸ Nzen am su suuwa nyunyumi, nyini kere ka am ti m susufɔm a, na i wura m Si kpɛri. ⁹ Kabo m Si koro m ni, sɔ ye mini mmɔ koro am a, am wo ni m koro ni. ¹⁰ Ma de m Si nɔanie maawam n dɛɛ ti ye i koro m a. Nzen am gusu de m nɔanie maawam ni, m gusu kóro am sɔ ɔ. ¹¹ Ma se am ahin sam na am ahore jɔ kabo m ahore ajɔ n wɔ, na am ahore jɔ n kɔ sin su. ¹² M nɔanie maawa n la ka o, am koro am bengum kabo m koro am ni. ¹³ Koro be wo má ahin koro n sin, ka sɔnɔ wu i danfom ti. ¹⁴ Nzen am su m nɔanie maawa n su, am ti m danfom wɔ lɛɛ. ¹⁵ M fere am m danfom wɔ, m fere má am ka m akɔɔm kun, dama sɔnɔ akɔɔ si má i mibie sayoowa kere, ama, deke kere bo ma ti i m Si dɔ ni, ma fa akere am. ¹⁶ Má ambere yiiri m a, ama, mini ayi am ase ka am kɔ su suuwa bo i wó bere sangá kere, na deke kere bo am bá fa m duma n sereeri m Si, i yó i ma am. ¹⁷ Nɔanie maawam n bo m sufa ma am la ka, am koro am bengum.”

Kabo Yesu ɲa durunya n nufɔm kpɔ i susufɔm ni

¹⁸ Na Yesu asa su ase bu ka, “Nzen durunya n nufɔm kpɔ am, am si nu ka o, ba du mɔ akpɔ mini wɔ, ye bu nya ba sukpɔ am n a. ¹⁹ Nzen má am ti durunya n nufɔm dɛɛ minem, má bu koro am kabo bu koro bu bengum n wɔ. Ama, bo ma yi am afite durunya n nufɔm nu, na am ti má durunya n nufɔm dɛɛ minem n ti, ye bu kpɔ am n a. ²⁰ Má am ma am wara fi ka ma se am ka, akɔɔ tara má i mibie. Nzen bu yo kereeri m wuwuruwa, sɔ

ye bu kére am gusu wuwuruwa a. Na nzen bu yo deeri m noanié, bu dé am gusu déé ni. ²¹ Bu yó am nyini n kére, m déé ti, dama bu si má m Si bo i sunmaari m ni. ²² Nzen má ma ba akan má m nju jore akere má bu, má bu si má ka ba yo satie, ama, kisa na ma kan akere bu ni, bu koro kan fite má nu ka ba yo má satie. ²³ Sono kére bo i kpo m, i kpo mini ni m Si n kére wo léé. ²⁴ Ma yo alekutura sam bo ba nju i. Be wo má bere bo i koro yo nyini alekutura sam so. Nzen má ma yo má nyini alekutura sam na ba nju má i, má be fa má bu ngasi ka bu ti satieyofom. Ama, kisa, ba nju nyini n kére, na bu toko kpo m ni m Si ni. ²⁵ Nyini ma kabo ba kére i Nyeme Jore Kadasi n nu n ayo yiiwa n a, ka, 'Bu kpo m kpo ngbeen wo.'

²⁶ Na Bukafó n bo m sunma i fite m Si do na i bá am do ni, yiri ti Awiewie Casi n bo i kere kabo Nyeme ti nahore su n a, yiri dí m nusu daani kere am a. ²⁷ Na am gusu di m daani, dama m ni amberé wo bere a, fite m juma n bumboori ba ju ni kisa.

16

¹ M suse am ahin sam kére bo bu bá yo n wo, na bu ba yoori, na má am kaaki am sin bo m. ² Bu bá fon yi am fite bu tientienbunoo soom n nu, ama, sanja suba bo bu bá kun am, na bu sunsun ka bu susu Nyeme wo. ³ Bu si má m ni m Si n déé ti, ye bu yó nyini sam kére n a. ⁴ Ma se am sam bo bu bá yo léé, na i sanja ba juuri, na am ténge su ka m yo seeri am."

Kabo Awiewie Casi n juma ti barasu ni

Na Yesu asa su ase bu ka, "M ni amberé yo woori bumboori n déé ti, ye ma yo ase má am ahin kére a. ⁵ Ama, kisa m sukaaki ko yiri bo i sunmaari m n do o, ye am be akoro abisa má m ka, 'Ye a sukó ni wo?' ⁶ Bo ma se ka m kó yaki am déé ti, am ahore asaaki agaya. ⁷ Ama, nahore ye m suse am n a, i ti am buka su wo ka m ko, dama nzen má m ko má, má Bukafó ni bá má, ama, nzen m koori, m sunma i am do. ⁸ I baari, i kére durunya n nufom deke bo i ti satie, na i kére bu deke bo i ti sakpa na i ko atin su Nyeme do, na i káaki kere bu kabo Nyeme bá di sono kére jore barasu. ⁹ I kére bu deke bo i ti satie, dama bu yo má m yarada. ¹⁰ Na i kére bu deke bo i ti kpa na i ko atin su Nyeme do, dama m sukó m Si n do o, na am nú má m kun. ¹¹ Na i káaki kere bu kabo Nyeme bá di sono kére jore, dama Nyeme adi Sitana bo i ti durunya n nufom kere tii n jore ayo i ngbeen.

¹² M toko la jore dongu bo má m se am, ama, am koro de má i kére kisa. ¹³ Ama, Awiewie Casi n bo i se nahore n ba baari, yiri kére am nahore atin kere a, dama jore kére bo i kán kere am ni, má i déé yiko nu ye i fá kan, ama, kabo Nyeme kére i ni, so ye i kán, na i kére am sam bo bu bá yo ni. ¹⁴ Yiri wúra m kpiri a, dama i kán m nju jore kere am. ¹⁵ Deke kére bo i ti m Si déé, i ti m déé wo, nyini déé ti ye ma se am ka, i kán m nju jore kere am n a."

Kabo Yesu kaanri ahoresaaki ni ahorejo jore ni

¹⁶ Na Yesu ase bu ka, "Wo ka kaan na am nú má m, ama, i ba yoori kaan buka su na am nú m bekun." ¹⁷ Na i susufom n nbem abisa bu nju nu ka, "Nzu jore ye i jooori i so n a? I na, wo ka kaan na ya nú má i, ama, i ba yoori kaan buka su, ya nú i bekun. Ye wo kaaki ase bekun ka, i sukó i Si do o."

¹⁸ Na ba kaaki abisa bu nju nu ka, "Ye ahin déé, i ba yoori kaan n bu la ka se wo léé? Ya si má i jooowa n bu."

¹⁹ Na Yesu afa nu ka bu koro ka bu bisa i nyini jòjòwá n bu wò. Na wò bisa bu ka, “Bo m seeri ka wò ka kaan na am nǔ má m, ama, i ba yoori kaan buka su, am nǔ m bekun n ye am subisa am nǔnu nu, na am si i bu, nzen se?” ²⁰ Nahòre ye m suse am a, ambere bá sun na am kóko, ama, na durunya n nufóm bere ahore jó. Ambere ahore bá saaki, ama, am ahoresaaki ni bá kaaki ahorejó. ²¹ Nzen bara anya akutu ka i wu baa, i la ahoresaaki, dama i wahara sanja ye wò ju a, ama, i ba wuuri baa n wieeri, i ténge má i wahara n bo wò sin n su kun, dama baa n bo wò wu i durunya n nu n ti, i ahore ajó. ²² I ti sò ó, am gusu dó, kisa, am la ahoresaaki, ama, m bá nǔ am bekun, na am ahore jó bo sòno koro dé má am ahorejó n am dó. ²³ Nyini céen ni, am bisa má deke be busu m dó. Nahòre ye m suse am a, deke kere bo am sereeri m Si ni, m dama n nu, i yó i ma am. ²⁴ Am nya sere má m Si deke be m dama n nu haari ni nyuma. Kisa am sere i, na am nyá i, na am ahore jó kò sin su.”

Kabo Yesu akunma durunya n ni

²⁵ Na Yesu ase bu ka, “Ma se am ahin n kere anyundere nu wò lee, sanja suba bo m bó má am anyundere kun, ama, m kán m Si nǔ jore kere kpain kere am a. ²⁶ Nyini céen ni, am fá m dama n fa sere Nyeme, má mini sere Nyeme ma am a. ²⁷ Yiri m Si ni i tii koro am a, dama am koro m na am ayo yarada ka m fite i dó ó. ²⁸ M fiteeri m Si dó ó baari durunya n nu a, ye kisa m sufite durunya n nu kaaki kò i dó a.”

²⁹ Na Yesu susufóm n ase i ka, “Kisa a jójó ya dó weinwein wò, a bo má ya anyundere kun. ³⁰ Ama, kisa ya si ka a si deke kere, wò ti má ye ni ka be bisa u deke be, dama kana bu ba bisa u deke be, a si kabo bu koro ka bu bisa u ni, nyini ma ya si ka a fite Nyeme dó n a.”

³¹ Na wò bisa bu ka, “Am ayo yarada kisa? ³² Ama, sanja suba bo wò ju awie, bo am kere bá sandi yaki mini ngumi, na sòno kere kó i dika, ama, m wo má m ngumi, dama m Si Nyeme wo m dó. ³³ Ma se am ahin kere na am la ahoreda m dó. Am nǔ kekereke durunya n nu, ama, am fa ahoresi, dama ma kunma durunya ni.”

17

Kabo Yesu sereeri Nyeme maari i susufóm n ni

¹ Yesu seeri sò wieeri ni, na wò ye i tii su anie angoro na wò sere Nyeme. I nja, “M Si, sanja n aju. Wura mini u Wa n kpiri, adena m gusu wura u kpiri. ² Dama a ma m yiko ka m nie minem kere su, na bo a fa bu ama m ni, m má bu ngóó bo i la má awieeri. ³ Wòró ngumi ti Nyeme nahòre su a. Na mine bo bu si u, na bu si mini Yesu Kristo n bo a sunmaari m ni, bere la ngóó bo i la má awieeri n a. ⁴ Ma wura u kpiri durunya n nu, dama ma yo juma n bo a ma m ka m yo i n awie. ⁵ M Si, sanja bo durunya nya bo má i bu ni, m yo woori u dó ó, ye a wura m kpiri a. Kisa, kaaki wura m kpiri u dó bekun.

⁶ Minem n bo a yiiri bu fiteeri durunya n nu fen, ma kere bu kabo a ti barasu. Bu tiiri u dèem wò, ye a faari bu maari m a, ye ba de u nòanie n a. ⁷ Kisa bu si ka deke kere bo a fa ama m ni, fite u dó ó. ⁸ Dama nòanie n kere bo a jójó fa maari m ni, m gusu ajójó ama bu, ye ba de i, ye ba si ka i ti nahòre ka m fiteeri u dó ó, ye ba yo yarada ka wòró sunmaari m a. ⁹ M susere u ma bere wò, má bo bu wo durunya n nu ni, ama, minem bo a fa bu ama m ni, bere ye m sere u ma bu a, dama bu ti u dèe minem wò.

10 M minem kere ti u dæem wɔ, ye u dæem gusu kere ti m dæem, ye ba ma minem anju m jirima woowa ni. 11 Kisa, m suba u dɔ lɛɛ, m ká má durunya n nu fen kun, ama, bere ká fen wɔ. M Si, wɔrɔ bo a ti casi ni, yo bu kanda u duma n bo a fa maari m n yiko nu, na bu yo deke kun, kabo mini ni wɔrɔ ti kun ni. 12 Sangɔ bo m woori bu dɔ ni, m yoori bu kanda u duma n bo afa ama m yiko nu wɔ. M niɛeri bu su, na bu be aka má ngbɛɛn, má ka bo wɔ ka ngbɛɛn haari i ni kunnu ni, adena kabo ba kere i Nyeme Jɔre Kadasi n nu n yo yiiwa.

13 Kisa m suba u dɔ lɛɛ, ama, m toko wo durunya n nu ye m jɔjɔ ahin jɔjɔwa n na bu nya m dɛɛ ahorejɔ n kɔ sin su. 14 Ma fa u nɔaniɛ n afa ama bu, na kabo m ti má durunya n nu fen fɔ be ni, sɔ ye bu gusu ti má durunya n nu fen fɔm a, nyini dɛɛ ti, durunya n nufɔm koro má bu jɔre. 15 M susere má u ka a yi bu fite durunya n nu wɔ, ama, m susere u ka a kanda Sitana satieyofɔ ni, na i yaki bu. 16 Kabo m ti má durunya n nu fen fɔ ni, sɔ ye bu gusu ti má durunya n nu fen fɔm a. 17 U nɔaniɛ n ti nahɔre wɔ. Ma u nɔaniɛ n bo i ti nahɔre n yo bu casi. 18 Kabo a sunmaari m durunya n nu ni, sɔ ye m gusu asunma bu a. 19 Bere dɛɛ ti, ye ma fa m ŋu ama u a, adena bere gusu fa bu ŋu ma u nahɔre n dɛɛ ti.

20 M susere má u ma má bere ŋgumi wɔ, ama, m susere u ma minem bo bu bá yo m yarada ahinm dɛɛ nɔaniɛ kaanwa n ti wɔ. 21 M Si, m sere u ka a ma bu kere yo kun, kabo a wo m dɔ, na m gusu wo u dɔ ni, ma bere gusu wo ya dɔ, adena durunya n nufɔm yo yarada ka wɔrɔ sunmaari m a. 22 U jirima woowa n bo a maari m ni, ma fa ama bu, na bu yó kun kabo m ni wɔrɔ ti kun ni. 23 M wo bu dɔ, na u gusu wo m dɔ, nyini ma bu yo deke kun kabo a koro ka bu ti n a, na durunya n nufɔm si ka wɔrɔ sunmaari m a, na kabo a koro m ni, a koro u minem gusu sɔ ɔ.

24 M Si, m koro ka a ma minem bo a fa bu ama m n bá wo m dɔ, deke bo m wo ni, na bu ŋú m jirima woowa n bo a fa maari m ni, dama sangɔ bo a nya ayi má durunya n ye a koro m a. 25 M Si, wɔrɔ yo sa kere bo i kɔ atin su n a, durunya n nufɔm si má u, ama, mini si u, na ahinm gusu si ka wɔrɔ sunmaari m a. 26 Ma kere bu kabo a ti barasu, na m toko sukere bu wɔ, adena koro n bo a koro m n wó bu nu, na m ni bere yó kun."

18

Kabo bu kɔɔri ka bu kɔ tara Yesu ni

1 Yesu sereeri Nyeme wieeri ni, na i ni i susufɔm n ayasu akɔ akpɛ Kɛdɔrɔn nzuetin n buekun dɔ, deke bo baka fie be wo ni, na ba kɔ awura baka fie n nu. 2 Yudasí bo i suto Yesu ma i kpɔfɔm ni si dika n nu, dama Yesu ni i susufɔm nati tien bu nɔɔ dɔ ɔ sangɔ sangɔ. 3 Na Yudasí aba dɔ. Sojam su i su, ni tintinijinafɔm bo Nyeme sayoowa dɔnguyofɔm nkpien-kpienm n ni Farasifɔm asunma bu n buka su. Bu bita fitanam, ni wura sinm, ni biɛsɔya nɛngem. 4 Yesu si sa kere bo i bá tu i ni, na wɔ kpa bu atin abisa bu ka, "Am koro ŋma a?" 5 Na ba bo i nu ase i ka, "Ya koro Yesu Nazaretifo n wɔ." Na wɔ se bu ka, "Yiri la mini." Yudasí bo i tɔɔri i ni jina sojam n nu. 6 Yesu seeri ka, "Yiri la mini" ni, na bu kere akɔkɔ bu sin akpakpaasi asiɛngɔ. 7 Na wɔ kaaki abisa bu bekon ka, "Am koro ŋma a?" Na ba se i ka, "Ya koro Yesu Nazaretifo n wɔ." 8 Na wɔ se bu ka, "Ma se am ka yiri la mini. Nzen am koro mini wɔ, am ma ahin minem bere kɔ." 9 I seeri sɔ ni, na i nɔaniɛ bo i yo jɔjɔri i n ayo yiiwa, ka, "Minem bo a fa bu

ama m ni, m ma má bu be ka má ngbeen.” ¹⁰ Nyini sanja Simon Petoro jina bita takobe, na wɔ cin awɔrɔ i akpɛ sɔnɔ be sui, i saa fɔmbɔrɔ dɛɛ ni, nyini sɔnɔ n ti Nyemɛ sayoowa dɔnguyofɔm kpien n akɔɔ ɔ. Bu fere i ka Malikusi. ¹¹ Na Yesu ase Petoro ka, “Fa u takobe n wura i buɛ nu. A ɲa má m ɲu anyumboro n bo m Si afa ama m n wɔ?”

Kabo bu taraari Yesu kɔɔri bu kpien Anasi dɔ ni

¹² Na sojam, ni bu kpien, ni Yudafɔm nkpienkpienm n tintinijinafɔm n atara Yesu acici i nyama. ¹³ Bu du mɔ faari i kɔɔri sɔnɔ be bo bu fere i ka Anasi n dɔ ɔ ka. Anasi sibiɛ la Kayafasi. Kayafasi ti Nyemɛ sayoowa dɔnguyofɔm kpien n nyini afo n a. ¹⁴ Yiri Kayafasi ti bo i yo seeri Yudafɔm ka i ti ye ni ka sɔnɔ kun wu ma minem kere n a.

Kabo Petoro keteeri ka i si má Yesu ni

¹⁵ Bu taraari Yesu sukɔ ni, na Simon Petoro ni Yesu susufɔ n kun asu i su akɔ. Nyemɛ sayoowa dɔnguyofɔm kpien n si nyini Yesu susufɔ n dɛɛ ti, ye i suuri Yesu su wuraari yiri Nyemɛ sayoowa dɔnguyofɔm kpien n gisan nu a. ¹⁶ Ama, na Petoro yiri aka ajina dasin anɔ n nu, na yiri susufɔ n bo Nyemɛ sayoowa dɔnguyofɔm kpien n si i ni afite, na wɔ ba afani n bo i jina kanda anɔ n dɔ, na wɔ sere i atin na wɔ fa Petoro awura. ¹⁷ Na afani n bo i jina kanda anɔ n abisa Petoro ka, “Wɔrɔ mmɔɔ ti nyini sɔnɔ n susufɔm nu kun wɔ, má sɔ?” Na Petoro ase i ka, “Ai, m ti má bu kun.”

¹⁸ Ayere sanja lɛɛ, na Nyemɛ sayoowa dɔnguyofɔm kpien ni ngbefenem, ni tintinijinafɔm atɔrɔ sin wo tun su, na Petoro gusu ajina bu bi sutun sin n be.

Kabo Nyemɛ sayoowa dɔnguyofɔm n kpien n diiri Yesu jɔre ni

¹⁹ Na Nyemɛ sayoowa dɔnguyofɔm n kpien n abisa Yesu fa ka i susufɔm n jɔre, ni kabo i kereewa n ti barasu ni. ²⁰ Na Yesu ase i ka, “Sanja kere m jɔɔ sɔnɔ kere nyunu wɔ, na m kere bu Nyemɛ nɔanie ni bu tientienbunɔɔ sɔm n nu, ni Nyemɛ Sereebiri Awuru n nu, deke bo Yudafɔm kere tien bu nɔɔ ni, m kan má jɔre be fiewa nu. ²¹ Ye nzu ti ye a bisa m a? Bisa minem bo bu tiiri m kereewa n ka m seeri bu se wɔ. Bere si kabo m seeri bu n a.” ²² Yesu seeri sɔ ni, na tintinijinafɔ n bo i jina dodo i n abo i nyɔɔnu, na wɔ bisa Yesu ka, “Sɔ ye a bo Nyemɛ sayoowa dɔnguyofɔm kpien n nu a?” ²³ Na Yesu ase i ka, “Nzen ma jɔɔ jɔre bo wɔ kɔ má atin su, kan na m ti. Ye nzen bo ma se n ti nahɔre, nzu ti ye a bo m nyɔɔnu a?” ²⁴ Na Anasi ama ba fa i ni nyama ciciiwa n sɔ akɔ Kayafasi bo i ti Nyemɛ sayoowa dɔnguyofɔm n kpien n dɔ.

Kabo Petoro keteeri bekun ka i si má Yesu ni

²⁵ Simon Petoro jina woori sin n tun su ni, na ba bisa i ka, “Wɔrɔ mmɔɔ ti i susufɔm kun wɔ, má sɔ?” Na Petoro akete, i ɲa, “Ai, m ti má bu kun.” ²⁶ Na Nyemɛ sayoowa dɔnguyofɔm kpien n akɔɔ be, i dikafɔ la sɔnɔ n bo Petoro kpɛ yiiri i sui ni, na wɔ se Petoro ka, “Ma ɲu má u ka a wo i bi baka fie n nu dɔ?” ²⁷ Na Petoro akete bekun, kpɛnga akɔnyuma abo.

Kabo bu faari Yesu baari Gomina Pilato dɔ ni

²⁸ Na alecin ɲgarama fun na ba fa Yesu afite Kayafasi dika n nu, na ba fa i akɔ gomina n dika, bu fere gomina n ka Pilato. Yudafɔm awura má gisan nu, adena má bu yo bu ɲu fin, na bu koro di má Butara cɛenkpiri ni. ²⁹ Nyini ti, na Pilato afite aba bu dɔ dasin abisa bu ka, “Ahin sɔnɔ n bo

am afa i aba m do ni, i ngasi la bono?" ³⁰ Na ba se i ka, "Nzen má wo do má ngasi be, má ya fa má i ba má u do." ³¹ Na Pilato ase bu ka, "Ambere mmoo ni am tii fa i ko di i jore kabo am joredi atin kere ni." Na Yudafo m n ase i ka, "Ya la má atin bo ya kun sono." ³² Bu seeri so ni, adena Yesu noanie n bo i seeri kabo i ba wu barasu n yo yiiwa.

³³ Na Pilato akaaki awura gisan n nu, na wo fere Yesu abisa i ka, "Woro ti Yudafo m Feme n a?" ³⁴ Na Yesu abisa i ka, "U dee sunsunni nu lee, nzen be seeri u a?" ³⁵ Na Pilato abisa i ka, "M ti Yudafo o? U minem ni Nyeme sayoowa dongyufo m nkpienkpienm ni faari u baari m do a. A do nzu ngasi wo?" ³⁶ Na Yesu ase i ka, "M femeya n ti má durunya n nu fen femeya. Nzen má m femeya n ti durunya n nu fen femeya, má m susufom ba kun lue m busu, na má be koro tara má m wura má Yudafo m saa nu. Ama, m femeya n ti má durunya n nu fen dee." ³⁷ Na Pilato abisa i bekun ka, "Nka a ti femewe lee?" Na Yesu ase i ka, "Bo a na m ti femewe ni, i ti so o. Bu wuuri m durunya n nu ka m ba di nahore n daani wo. Na sono kere bo i su nahore n su, i de m noanie n wo." ³⁸ Na Pilato abisa i ka, "Nahore la nzu wo?"

Kabo bu maari noo ka bu kun Yesu ni

Pilato seeri i so, na wo kaaki afite ako Yudafo m do ako ase bu ka, "Ma nu má i ngasi be wo do i." ³⁹ Ama, am la am yoowa be bo i ma m atin ka m yi dansaraka kun ma am Butara ceenkpiri n di sanga. Am koro ka m yi ambere Yudafo m Feme ni ji ma am a, nzen se?" ⁴⁰ Na ba tien ase ka, "Má yiri. Ya koro Barabasi wo." Barabasi ti sono bo i nati fin minem di wo.

19

¹ Na Pilato ama ba fa Yesu ako afin i ngbere. ² Na sojam n awura i tanlee kokore yorom ka femeya dee su, na ba fa buwe ajo i ka kaba dee su, na ba fa aforo i tii. ³ Na bu suba i do suyo i anzasi se i ka, "Yudafo m Feme, ya yo u anse." Na ba bo i nyoonu. ⁴ Na Pilato akaaki afite aba Yudafo m do aba ase bu ka, "Am ti fen, m sufa i fite ba kere am wo, na am si ka ma nu má ngasi bo wo do i." ⁵ Yesu tie fiteeri ni tanlee kokore yorom ni, ni i tii buwe kaba n ni, na Pilato ase bu ka, "Am nie, sono n yaa." ⁶ Deke bo i tie fiteeri na Nyeme sayoowa dongyufo m nkpienkpienm ni tintinijinafo m juuri i so ni, kpenja na ba tien, bu na, "Am kpama i baka jaanu n su na i wu. Am kpama i." Na Pilato ase bu ka, "Ambere mmoo ni am tii fa i ko kpama i e. Mini, ma nu má ngasi bo wo do i." ⁷ Na ba se i ka, "Ya la noanie kpamaawa be, wo yo daka ka i wu, dama i na i ti Nyeme Wa a."

⁸ Pilato tiiri ka Yesu na i ti Nyeme wa ni, na sere ati i abuka su. ⁹ Na wo kaaki awura gisan n nu abisa Yesu ka, "A fite ni wo?" Ama, Yesu abo má i nu. ¹⁰ Na Pilato akaaki abisa i ka, "A bo má m nu? A si má ka m la yiko bo m koro ma bu fa u ji, na m kaaki la yiko bo m koro ma bu kpama u baka jaanu n su?" ¹¹ Na Yesu ase i ka, "Nzen má Nyeme ama má u atin, maala má yiko bo a koro yo m pui. Nyini ti, sono n bo i faari m wuraari u saa nu ni, i satie yoowa tara u dee." ¹² I seeri so ni, na Pilato akpi kabo i yo na i yaki Yesu nu ji. Ama, na Yudafo m sutientien suse ka, "Nzen a yakiiri i nu jiiri, u ni Feme Siza danfoya awie lee, dama sono kere bo i yo i nu ka i ti femewe, i mi ti Feme Siza kpoo o."

¹³ Pilato tiiri so ni, na wo fa Yesu afite, na wo tana jore diibiri n su bimbindi n su. Yudafo m anie nu bu fere i ka *Gabata*, i bu la ka, deke bo ba fa yabue asese su ayo i donju ni. ¹⁴ Nyini ceen n tiiri bu Butara

ceenkpiri n kpokpo ceen wɔ, wiesu kerefi buru ni nnyɔ sanɔa a. Na Pilato ase Yudafoɔm ka, “Am femɛ n yaa.” ¹⁵ Na ba kaaki atien ase ka, “Am fa i kɔ, am fa i kɔ kpama i baka jaanu n su.” Na Pilato abisa bu ka, “M fá am femɛ n kɔ kpama i baka jaanu n su?” Na Nyeme sayoowa donɔgyoyofom nkpienkpienm n ase ka, “Ya la má femɛ be sin Femɛ Siza ŋu.” ¹⁶ Bu seeri sɔ wieeri ni, na Pilato anya afa i ama bu ka bu kɔ kpama i baka jaanu n su.

Kabo bu kpamaari Yesu baka jaanu n su ni

Na ba de Yesu ako. ¹⁷ Na yiri ni i tii asɔ i baka jaanu n ako awɔrɛ n bo bu fere i ka Tereawa Woobiri ni, Yudafoɔm anie nu bu fere dɔ ka *Gologota*. ¹⁸ Na ba kpama i baka jaanu n su dɔ, na ba kaaki akpama mine nnyɔ nbem adodo i, bu kpamaari kun i saa fombɔrɔ su, na ba kpama kun i saa bie su, na Yesu awo bu afien. ¹⁹ Na Pilato akere kerɛɛwa be amata i tii su baka jaanu n su. Kerɛɛwa n la ka, “Yesu Nazaretifoɔ n bo i ti Yudafoɔm Femɛ n lɛɛ.” ²⁰ Bu kerɛeri nyini kerɛɛwa n Yudafoɔm, ni Romafom, ni Girikifom dɛɛ aniem kere nu wɔ, na Yudafoɔm donɔgyoyofom anu i, na ba kan i, dama deke bo bu kpamaari i n waari má ni mie kunnu. ²¹ Na Nyeme sayoowa donɔgyoyofom nkpienkpienm n akete ase Pilato ka, “Má a kere ka, ‘Yudafoɔm Femɛ n lɛɛ,’ ama, kere ka, ‘Ahin sɔnɔ ŋa, ‘Mini ti Yudafoɔm Femɛ n a.’” ²² Na Pilato ase bu ka, “Bo ma kere i ni, nyini lɛɛ wɔ.”

²³ Sojam n kpamaari i baka jaanu n su wieeri ni, na ba kpaaki i nenɔge wuraawam nu busu nna, na bu kere afa kun kun, na wɔ ka i tanlɛɛ yorom bo i wo i bu na i wura be go su ni, i la má gise kpaabiri, ama, ba wu i kere angoro kɔ jura asiɛnggu wɔ. ²⁴ Na ba se ka, “Má am ma ya sɔnsɔn i nu, ama, am ma ya tu mbaa na ya si bo i dí i.” Bu yoori sɔ adena Nyeme Jɔrɛ Kadasi n yo yiiwa, bo ba kere i ka, “Ba kpaaki m nenɔge wuraawam nu, na ba tu mbaa m tanlɛɛ n bo i wo m bu n busu ni.”

Nyini ti ye sojam yoori sɔ n a.

²⁵ Na Yesu ni, ni Yesu ni niemabara, ni Kolopasi yi Mariya, fa kɔ tuuri Mariya n bo i fite Magadala n jina dodo deke bo bu kpamaari Yesu ni. ²⁶ Yesu nie ŋuuri i ni ni, ni i susufɔ n bo i koro i agaya n ka bu jina dodo i ni, na wɔ se i ni n ka, “M ni, nie fen, u wa la ahin.” ²⁷ Na wɔ se i susufɔ n gusu ka, “Nie fen, u gusu ni lɛɛ.” Nyini ceen n kere na Yesu susufɔ n afa Yesu ni, na wɔ kɔ awo i dɔ.

Kabo Yesu wuuri ni

²⁸ Nyini sin na Yesu asi nu ka wɔ yo i juma kere awie, na wɔ se ka, “Nzuehɔɛ ti m wɔ.” I seeri sɔ ni, adena Nyeme noanie n yo yiiwa. ²⁹ Nyini sanɔa dundu be taka bere, wɔ yi ni nzan gagaraki, na ba fa mene afa awo baka su afa abo nu alaandi ato i nɔɔ. ³⁰ Yesu de nu wieeri ni, na wɔ se ka, “Wɔ wie.” Na wɔ biri i tii, na wɔ yo Nyeme dɛɛ.

Kabo bu wɔɔri Yesu kpie i nvin nu ni

³¹ Nyini ceen n ti Numiyi ceen n kpokpo ceen n ti, ba koro má ka minem bo ba kpama bu baka jaanu n su n ka sense su bu Numiyi ceen ni, dama Numiyi ceen n bo i suba n ti ceenkpiri bambaka bu dɔ o. Nyini dɛɛ ti, ye bu sereeri Pilato ka i ma bu kɔ bubu bo ba kpama bu baka jaanu n su jaam n a, na bu yi bu kɔ se bu. ³² Nyini ti, na sojam n ako abo abubu sɔnɔ n kun jaam, ni nyinga n gusu dɛɛ, bere n bo bu kpamaari bu dodoori Yesu ni. ³³ Ama, sanɔa bo bu ba kpuraari Yesu ni, bu ŋuuri ka yiri awu, nyini

dɛɛ ti, ba bubu má i jaam. ³⁴ Ama, na sojam kun afa kpɛ awɔ Yesu nvin nu, kpenɔa na nzue ni mbunja susonɔi fite. ³⁵ Sonɔ n bo i nyumbaa ŋuuri i ni, yiri di i daani a, adena am yo yarada. I jɔrɛ n ti nahɔrɛ wɔ, na kabo i di daani n gusu ti nahɔrɛ wɔ. ³⁶ Ahin n kɛrɛ yoori, adena kabo ba kɛrɛ i Nyɛmɛ Jɔrɛ Kadasi n nu n yo yiiwa. Ba kɛrɛ ka, “I buwe kun n kpein mmɔɔ bu má.” ³⁷ Ye ba kaaki akere ka, “Minem bá nie yiri n bo ba wɔ i kpɛ n wɔ.”

Kabo bu seeri Yesu ni

³⁸ Nyini dɛɛ sin, na sonɔ be bo bu fere i ka Yosefu n asere Pilato atin na i yi Yesu ŋuniɛ n kɔ se i. Na Pilato ama i atin, na wɔ kɔ ayi i ŋuniɛ n baka jaanu n su akɔ. Yiri Yosefu fite miɛ kpiri n bo bu fere i ka Aramatiya n su wɔ, i yo tiiri Yesu susufɔm kun wɔ, ama, i soroori Yudaɔm ahore ti, wɔ yi má i ŋu fofoe nu. ³⁹ Na Nikodemo bo i yo baari Yesu dɔ kɔngɛ be n gusu aba, i bita ŋguin nvanvani ni tulaalɛ sanɔaawa, i nɔnɔori ju pobu aburana. ⁴⁰ Na ba fa Yesu ŋuniɛ ni, na ba yo i kabo Yudaɔm yo bu fuin na bu se i ni, bu faari tulaalɛ n gɔori i ŋu wɔ, na ba nya afa nzee apɔondi i. ⁴¹ Deke bo bu kpamaari Yesu ni, baka fie be wo dɔ. Nyini baka fie n nu yabue buɛ bo ba lokoti i ayo i faŋkunma wo dɔ, bo bu nya se má fuin nu ni. ⁴² Nyini cɛɛn n ti Numiya cɛɛn n kpokpo n dɛɛ ti, na bekun, faŋkunma n waari má ni berɛ ni, ye bu faari i kɔ seeri nu n a.

20

Kabo Yesu tenɔgeeri i yiwee n nu ni

¹ Yudaɔm bakue n bumboori, mɔne cɛɛn ŋarama fuun, nyini sanɔa dika toko ti liim, na Mariya n bo i fite Magadala n akɔ yabue buɛ faŋkunma n su. I kɔ juuri ni, i ŋuuri ka ba yi yabue bambaka n bo bu fa tɔori faŋkunma n anɔ ni. ² Na wɔ ŋmati akɔ Simon Peto ni Yesu susufɔ n bo i koro i agaya n dɔ, na wo se bu ka, “Ba yi Mibiɛ n faŋkunma n nu, ya si má deke bo ba fa i akɔ ase.” ³ Na Peto ni i lamɔkɔ n ayasu ka bu kɔ faŋkunma n su. ⁴ Bu mine nnyɔ ni sunmati kɔ a, ama, na kun n armati asin Peto ŋu adu mɔ aju faŋkunma n su. ⁵ Na wɔ kasi anie faŋkunma n nu, anu ka nzee n da, ama, wɔ wura má faŋkunma n nu. ⁶ Ama, na Simon Peto yiri aka sin aba aju, na wɔ wura faŋkunma n nu, anu ka nzee n da, ⁷ na wɔ ŋu ka tani n bo bu fa ciinri Yesu tii ka kaba n gusu bubu nu da i ŋgumi. ⁸ Nyini sanɔa na yiri n bo i du mɔ juuri faŋkunma n su n awura nu, i ŋuuri i ni, na wo yo yarada kabo Yesu yo seeri bu ni. ⁹ Ama, ba nya asi má Nyɛmɛ Jɔrɛ Kadasi n bo i ŋa Yesu tenɔge i yiwee n nu n bu. ¹⁰ Na ba kaaki akɔ awuru.

Kabo Yesu yiiri i ŋu kereeri Mariya n bo i fite Magadala ni

¹¹ Ama, na Mariya aka ajina faŋkunma n su, na i susun. I wo sun su ni, na wɔ kasi anie faŋkunma n nu. ¹² Na wɔ ŋu merɛkem nnyɔ ka bu wura tanlɛ fofoe tana deke bo bu faari Yesu ŋuniɛ n daari ni, kun tana deke bo bu faari i tii wɔori ni, na nyinga gusu tana deke bo bu faari i jaa wɔori ni. ¹³ Na ba bisa i ka, “Bara, nzu ti ye a sun a?” Na wo se bu ka, “Ba yi m Mibiɛ n wɔ, ye m si má deke bo ba fa i ase.” ¹⁴ I seeri sɔ ni, na wo kaaki anie i sin. I ŋuuri ka Yesu jina, ama, wo si má ka Yesu lɛɛ. ¹⁵ Na Yesu abisa i ka, “Bara, nzu ti ye a sun a? A koro ŋma a?” Mariya ŋuuri i sɔ ni, i sunsun ka fie n niefo a. Na wo se i ka, “M jakpien, nzen wɔrɔ ayi i akɔ ase

deke be a, kere m na m kɔ fa i.” ¹⁶ Na Yesu afere i ka, “Mariya.” Na wo kaaki anie Yesu do, na wo se i ka, “Raboni.” Yudafoɔm dɛɛ anie n nu, i bu la ka, ya Kerefɔ. ¹⁷ Na Yesu ase i ka, “Má a fa u saa kan m, dama ma nya akɔ má m Si do, ama, kɔ na a kɔ se m ninbaam n ka, ‘M sukɔ m Si bo i ti am Si ni, ni m Nyeme bo i ti ambere mmɔɔ Nyeme n do.’” ¹⁸ Na Mariya n bo i fite Magadala n akɔ ase bu ka, “Ma ŋu Mibie ni.” Na wo se bu jɔre n kere bo Yesu akan akere i ni.

Kabo Yesu yiiri i ŋu kereeri i susufɔm ni

¹⁹ Na bakue n bumboori, mone cɛɛn n naaso sanɔa, na Yesu susufɔm woori soɔ be nu, na ba tu anɔ n ago bu ŋu, dama bu soroori Yudafoɔ nkpien-kpienm wo. Na Yesu aba ajina bu afien ase bu ka, “Am ma am ahore da.” ²⁰ I seeri so wieeri ni, na wo fa i saam deke bo bu boori i bulaari ni, ni i nvin deke bo bu wɔori i kpie n akere bu. I susufɔm ŋuuri i so ni, na bu ahore ajo. ²¹ Na wo kaaki ase bu ka, “Am ma am ahore da, kabo m Si sunmaari m ni, so ye mini gusu susunma am a.” ²² I seeri so wieeri ni, na wo yi i ŋumi ago bu ŋu, na wo se bu ka, “Am de Nyeme Awiewie Casi ni. ²³ Soɔ kere bo am faari i satie ceeri i, Nyeme fá i satie ce i. Ama, soɔ kere bo am fa má i satie ce má i, Nyeme fá má i satie ce má i.”

Kabo Yesu yiiri i ŋu kereeri Tomasi ni

²⁴ Sanɔa bo Yesu yiiri i ŋu kereeri i susufɔm buru ni nnyɔm ni, bu nu kun awo má bu nu. Yiri la Tomasi bo bu fere i ka Ndaa ni. ²⁵ I ba baari ni, na ba se i ka, “Ya ŋu Mibie ni.” Na wo se bu ka, “Má ka ma ŋu i saa kunma n bo bu kpamaari i ni, na m fa m saa maraka wura nu, na m fa m saa wura i nvin nu deke bo bu wɔori i kpie ni, m yó má yarada fieo.”

²⁶ Na i lemɔcɛ cɛɛn, na ba wo soɔ n nu bekun. Nyini cɛɛn ni, Tomasi gusu woori bu nu, na ba yandi atu anɔ ni. Na Yesu aba ajina bu nu, na wo se bu ka, “Am ma am ahore da.” ²⁷ Na wo se Tomasi ka, “Fa u saa maraka ba wura m saa kunma n nu, na a fa u saa ba wura m nvin kunma n nu. Na a yaki sika na a yo yarada.” ²⁸ Na Tomasi ase i ka, “Wɔɔ ti m Mibie, ni m Nyeme a.” ²⁹ Na Yesu ase i ka, “Bo a ŋu m ti ye a yo yarada? Terefie wo bu do, bo bu nya ŋu má m na bu yo yarada ni.”

Deke bo i ti na bu kɛɛɛri ahin kadasi n ni

³⁰ Yesu yo yoori alekutura sam beberebe na i susufɔm n anɔ i, ama, ba kere má i kere awura má ahin kadasi n nu. ³¹ Ama, ba kere ahinm ni, adena am yo yarada ka Yesu Nyeme Wa ni ti Kristo n a, Tiidefo n bo Nyeme ase ka i súnma i ni, na am yarada ni ma am nya ŋɔɔ i dɛɛ duma n nu.

21

Kabo Yesu yiiri i ŋu kereeri i susufɔm n bekun ni

¹ Nyini sin, na Yesu ayi i ŋu akere i susufɔm n bekun kunma kpiri n bo bu fere i ka Tiberiya n nɔɔ su. Kabo i faari i ŋu kereeri bu n la ka, ² i susufɔ nɛɛm atien bu nɔɔ, bere la Simon Petoro, ni Tomasi n bo bu fere i ka Ndaa ni, ni Natanieli n bo i fite Kana bo i wo Galili asien n su ni, ni Zebedi nbaa nnyɔm ni, ni i susufɔ nnyɔ nɛɛm. ³ Na Simon Petoro ase bu ka, “M sukɔ jombaa tara lee.” Na ba se i ka, “Yere mmɔɔ sú u su kɔɔ.” Na ba wura lee n nu akɔ, bu woori nzue n nu haari ale kɔ sucin, ba nya koro tara má pui.

⁴ Saɗga bo ale ba ciinri wein ni, na Yesu aba ajina kunma n nɔɔ su, ama, i susufɔm n asi má ka yiri lɛɛ. ⁵ Na wɔ bisa bu ka, “M nbaam, am anya má jombaa, má sɔ?” Na ba se i ka, “Ai, ya nya má be.” ⁶ Na wɔ se bu ka, “Am sandi am diendie n lee n fɔmbɔrɔ su dɛɛ bue ni, am nyá be.” Bu sandiiri ni, na ba tara jombaa beberebe, haari ba koro ama má diendie n su. ⁷ Na Yesu susufɔ n bo i koro i agaya n ase Petoro ka, “Ya Mibie lɛɛ.” Deke bo Petoro tiiri ka, bu Mibie lɛɛ ni, nyini saɗga i jina i nyunie ngbɛɛn wɔ. Na wɔ yo ndende afa i tanlɛɛ abo i wi nu, na wɔ ti ato nzue n nu. ⁸ Ama, na i bengu susufɔm n bo bu wo lee n nu ni, sucin diendie n bo wɔ yi ni jombaa ni, na bu fa ba kunma n nɔɔ su ni. Deke bo bu wo n ni kunma n nɔɔ su n waari má, i tiiri ajaari natiwa yaa kun wɔ.

⁹ Bu cin kɔ juuri kunma n nɔɔ su ni, na bu fiteeri lee n nu ni, bu nyuri ka sinmɔne da, jombaa nana su, kpɔnɔ da bere. ¹⁰ Na Yesu ase bu ka, “Am fa jombaa n bo am atara bu kisa n be bra.” ¹¹ Na Simon Petoro awura lee n nu, na wɔ cin diendie n bo wɔ yi ni jombaa ngbingbiri n aba aheme. Jombaa n kere kɔ yasuuri yaa ni aburunu ni nsan a, ama, haari ni nyini jombaa beberebe n kere, diendie n ati má. ¹² Na Yesu ase i susufɔm n ka, “Am ba yo daraka.” Bu be abo má su, na i bisa i ka, “Wɔrɔ nyama?” dama bu kere si ka bu Mibie n a. ¹³ Na Yesu aba afa kpɔnɔ n ama bu, na wɔ fa jombaa n gusu abuka bu su. ¹⁴ Ahin yoori kpe nsan su, bo i yiiri i nyu kereeri i susufɔm n a, saɗga bo i tengeeri i yiwee n nu ni.

Kabo Yesu ni Petoro boori anzama ni

¹⁵ Bu yoori daraka n wieeri ni, na Yesu abisa Simon Petoro ka, “Yohane wa Simon, a koro m tara kabo nyingam ni koro m ni?” Na wɔ se i ka, “Ɛɛn, m Mibie, wɔrɔ mmɔɔ si ka m koro u.” Na Yesu ase i ka, “Nie m nbɔmbaam dika.” ¹⁶ Na wɔ kaaki abisa i kpe nnyɔ su ka, “Yohane wa Simon, a koro m?” Na Petoro ase i ka, “Ɛɛn, m Mibie, wɔrɔ mmɔɔ si ka m koro u.” Na Yesu ase i ka, “Nie m nbɔɛm dika.” ¹⁷ Na wɔ kaaki abisa i kpe nsan su ka, “Yohane wa Simon, a koro m?” Na Petoro ahore asaaki kabo wɔ bisa i kpe nsan su kere ka, i koro i ni? Na Petoro ase i ka, “M Mibie, wɔrɔ si deke n kere a, a si ka m koro u.” Na Yesu ase i ka, “Nie m nbɔɛm dika. ¹⁸ Nahɔre ye m suse u n a, ka saɗga bo a yo ti gbefene ni, wɔrɔ mmɔɔ ni u ti bo u wi nu kujara kɔ deke kere bo a koro a, ama, a ba yoori kpieri, a yé u saa su angoro wɔ, na be bó u kujara na i fá u kɔ deke bo a koro má ni.” ¹⁹ I seeri sɔ n na i kere kabo Petoro bá wu barasu, na minem nyú kabo Nyeme jirima woowa n ti barasu. Nyini sin na wɔ se Petoro ka, “Su m su.”

Yesu ni i susufɔ n bo i koroori i agaya n jɔre

²⁰ Na Petoro akaaki anie anu ka bere susufɔm nu kun bo Yesu koro i agaya n su bu su. Yiri la bo bu yo sudi diire na i tana mataari Yesu na i bisaari i ka, “M Mibie, nyama tó u n a?” ²¹ Petoro nyuri ka i su bu su sɔ ni, na wɔ bisa Yesu ka, “M Mibie, ye ahin n gusu di?” ²² Na Yesu ase i ka, “Nzen m koro ka i wo bere haari saɗga bo m bá kaaki ba, i nya u se? Wɔrɔ su m su.” ²³ I seeri sɔ n na labari n abara aye i susufɔm dɔ, ka i nyini susufɔ ni wú má. Yesu ase má ka i wú má, ama, i nyá, “Nzen m koro ka i wo bere haari saɗga bo m bá kaaki ba, i nya u se?”

²⁴ Nyini Yesu susufɔ ni diiri ahin jɔrem kere daani a, yiri kaaki kereeri ahin jɔrem kere a, na ya si ka i daani diiwa n ti nahɔre n a. ²⁵ Yesu yo yoori sam dɔnggu, bo má bu nyá bu kere i kere, ma de má ka bu nyá fofoe durunya n nu, bo bu fá nyini kadasim n kere fa se.

Yesu Jaramasam SAYOOWAM

¹ Ya si Teyofilosi, m kadasi n bo m du mɔ kɛrɛ maari u ni, m yo seeri u fa kɔ sam bo Yesu yo yoori bu n kɛrɛ, ni kabo i kereeri minɛm, sanɓa bo i boori i juma n bu ni, ² haari fa kɔ ju sanɓa bo Nyemɛ faari i fun kɔɔri angoro ni. Kana i ba fun kɔ ni, Nyemɛ Awiewiɛ Casi n dɛɛ yiko nu ye i yo seeri i jaramasam bo wɔ yi bu n sam bo bu bá yo n a. ³ Yesu wu tengeeri n dɛɛ sin, na wɔ wo durunya n nu cɛɛn aburana, na i suyi i ɗu sukere bu sanɓa sanɓa su, bo i kere ka i la ɗɗɔɔ nahɔrɛ su. Na ba ɗu i, na wɔ ɗɔɗɔ bu dɔ fa kɔ Nyemɛ femeya n su. ⁴ Na sanɓa bo Yesu ni i jaramasam ba tiɛnri bu nɔɔ wo diire di su ni, na wɔ se bu ka, “Má am se ka am fite Yerusalem miɛ kpiri n nu, ama, am ɗminda kɔ ju sanɓa bo m Si Nyemɛ fá Awiewiɛ Casi n bá ma am, yiri ye i yo seeri ka i fá ma am n a. Yiri ye m yo kaanri i ɗɔrɛ kereeri am n a. ⁵ Yohane yo faari nzuɛ biɛeri am a, ama, i cɛ má, mini fá Awiewiɛ Casi n ba wura am ɗu a.”

Kabo Nyemɛ ma Yesu fun kɔɔri angoro barasu ni

⁶ Na sanɓa bo Yesu ni i jaramasam n ba tiɛnri bu nɔɔ ni, na ba bisa i ka, “Ya Mibiɛ, kisa ye a káaki fa femeya n ma yere Yisarelifɔm, nzen se?” ⁷ Na Yesu ase bu ka, “Deke bo m Si Nyemɛ koro ka i yo i, ye i yo a, ambɛrɛ koro si má nyini sanɓa wara cɛɛn ni.” ⁸ Ama, sanɓa bo Awiewiɛ Casi n ba wuraari am ɗu, i má am fanga na am dí m ɗusu daani Yerusalem miɛ kpiri n nu, ni Yudiya awɔrɛ n kɛrɛ nu, ni Samariya awɔrɛ n kɛrɛ nu, haari kɔ kpura durunya n kɛrɛ pepere su. ⁹ Sanɓa bo Yesu seeri sɔ wieri ni, na Nyemɛ ama wɔ fun akɔ angoro, bu toko jina wo nie su ni, na yinyingu akata i ɗu, ba ɗu má i kun. ¹⁰ Bu jina wo nie su kabo i sufun kɔ angoro n nu barasu ni, na mine nnyɔ nbem akaba aba ajina bu bi, bu wura sutura fofoe, ¹¹ na ba bisa bu ka, “Galilifɔm, nzu ti ye am jina nie angoro n nu sɔ a? Yiri Yesu ni, kabo am anɗu ka i sufun kɔ angoro n nu barasu ni, am bá kaaki ɗu i sɔ ɔ lɛɛ, sanɓa bo i bá sukpie i nyi ba ni.”

Sɔɔɔ bo i deeri Yudasi jinaabiri n ɗɔrɛ

¹² Nyini sanɓa ni, Yesu jaramasam yo woori buka n bo bu fere i ka Oliva Buka n su wɔ. Dɔ ni Yerusalem miɛ kpiri n nu waari má. Na ba kpie bu nyi akɔ Yerusalem. ¹³ Bu kɔ juuri n na ba fun akɔ angoro sɔɔ n bo bu da nu n ni. Bɛrɛ bo bu kɔɔri dɔ n la Petoro, ni Yohane, ni Yakobo, ni Andere, ni Filipu, ni Tomasi, ni Batolomeyo, ni Matio, Yakobo bo i si la Alafeyo ni, ni Simon bo i tu ɗgoni fa kɔ i asien su ni, ni Yudasi bo i si la Yakobo ni. ¹⁴ Bu tien bu nɔɔ sɔ ɔ sanɓa kɛrɛ, na bu susere Nyemɛ, bu ni nbaram nbem, ni Yesu ni Mariya, ni Yesu niemam ni.

¹⁵ Cɛɛn be sɔ ɔ, na yaradayofɔm n atien bu nɔɔ, bu kɛrɛ kɔ yasuumi mine yaa ni aburanyɔ ɔ. Dɔ na Petoro ayasu ajina bu afien ase bu ka, ¹⁶ “M ninbaam, wɔ yo daka ka nɔɔnie n bo Awiewiɛ Casi n yo maari Feme Davidi nɔɔ na i kɛrɛeri i Nyemɛ ɗɔrɛ Kadasi n nu n yo yiiwa, kabo i kɛrɛeri fa kɔ Yudasi ɗɔrɛ ni, ka yiri dú minɛm bo bu ba tara Yesu n mɔ a. ¹⁷ Yudasi yo tiiri ya nu kun wɔ, ya ni yiri sanɓa yoori juma n a.” ¹⁸ Ya si Teyofilosi, si nu ka Yudasi afa ɗwaa n bo i yoori satie na i nyaari i ni, na wɔ fa ato asien, dɔ na wɔ kpaasi, na wɔ wu, na i kunnu atie, na i ayaya kɛrɛ afite

ago. ¹⁹ Na Yerusalemfom kere ati nyini jore ni, nyini ti, na ba fere nyini asien ni, bu anie nu ka *Akelidama*, i bu la ka, Mbunja Asien. ²⁰ To, na Petoro akaaki ase bu ka, "Bu yo kereri i Kansi jue kerewam n nu, ka, 'Ma i dika n ka bonfo, na ma be wo nu.'

Na wo kaaki akere ka, 'Ma sono be de i jinaabiri ni.'

²¹⁻²² Nyini ti, wo yo daka ka i mi ti sono bo i woori ya nu, sangha bo ya Mibie Yesu woori bere na ya nati tien ya noo i do ni, fite sangha n bo Yohane bieeri Yesu Nyeme nzue ni, haari fa ko juuri ceen n bo Nyeme maari Yesu fun koori angoro yakiiri ya ni." ²³ Nyini ti, na ba yi mine nnyo ajina. Bu kun la Yosefu bo bu fere i ka Basabasi, na bu kaaki fere i ka Jusitosi ni, ye kun n la bo bu fere i ka Matiyasi ni. ²⁴ Do na ba sere Nyeme, bu na, "Ya Mibie, woro si kabo sono kere sunsunni ti barasu a. Ahin mine nnyom ni nu, kere ya bo a koro ka ya yi i, ²⁵ na i yo u jaramasa na i yo ahin juma ni, na i jina Yudasi jinaabiri, yiri bo wo yaki u ako i koroobiri ni." ²⁶ Na ba tu mbaa na bu yi mine nnyom nu kun, na ba yi Matiyasi abuka Yesu jaramasa buru ni kunn n su.

2

Kabo Awiewie Casi n wurari Yesu susufom n nu ni

¹ Yudafom ceenkpiri n bo bu fere i ka Pentekoti n di ceen, nyini sangha ni, na Yesu susufom kere atien bu noo dika hore kun. ² Kpenga na ba ti nahmie be nga angoro n nu ka anuma bo i sukpie fanga su, na wo de soo n bo bu tana nu n kere abara aye. ³ Do na ba nu deke be ka sin taferema dee su, na wo sandi atantana bu kun kun n kere tii su. ⁴ Na Awiewie Casi n awura bu kere nu, na bu sujoko anie barasu barasu bo Awiewie Casi n ma bu koro joko i.

⁵ To, nyini sangha, Yudafom bo bu soro Nyeme n atien bu noo Yerusalem mie kpiri n nu, bu fiteeri durunya n awore n kere baari a, ka bu ba su Nyeme. ⁶ Sangha bo bu tiiri nahmie ni nga so ni, na jama beberebe aba atien bu noo, na jore n amie bu, dama bu kere tiiri ka Yesu susufom ni sujoko bere kun kun n kere bo ba tien bu noo n dee anie nu. ⁷ Na ba birisi na ba yo alekutura, na ba se ka, "Ahin minem kere bo bu wo joko su n ti Galilifom wo, ⁸ ye i baari se, ye bu sujoko, ye ya kun kun n kere ti ka bu joko ya dee aniem n a? ⁹ Ya fite awore barasu barasu kere n nu wo, nbem fite Patiya, na nbem fite Mediya, na nbem fite Elam, na nbem fite Mesopotamiya, na nbem fite Yudiya, na nbem fite Kapadosiya, na nbem fite Pontusi ni Esiya, ¹⁰ na nbem fite Firigiya, na nbem fite Pamfiliya, na nbem fite Ijipiti asien n su, na nbem fite Libiya asien bo i wo dodo Sirene mie kpiri n ni. Ya nbem gusu fite Roma mie kpiri n su wo. ¹¹ Ya nbem ti Yudafom, ni minem bo bu ti ma Yudafom na ba kaaki bu wo ka bu ti Yudafom ni, ye ya nbem gusu fite Kereti asien n su, na nbem fite Arabiya asien n su, ama, ya kere ti ka bu joko ya dee aniem n nu wo, fa ko sakpakpam kere bo Nyeme ayo bu n su." ¹² Na ba yo alekutura, ba si ma kabo bu yo, na bu subisa bu nu nu nu ka, "Ahin sa n bu la ka se wo lee?" ¹³ Ama, na bu nbem ayo Yesu susufom n anzasi, na ba se ka, "Ai, ba nu nzan abo wo."

Kabo Petoro kaanri Nyeme nwanie barasu ni

14 Dɔ na Petoro ni i beɗgu buru ni kunm n ayasu ajina, na wɔ ye i konvi su ase jama n ka, “M lamɔko Yudafoɗ, ni ambeɗe kere bo am wo Yerusalem mie kpiri n nu ni, am so am sui nyunyumi na am ti deke n bo m sukan kere am ni. 15 Ahin minem bo am sunsun ka ba nu nzan abo ni, ba nu má nzan, kisa ngarama kerefi ngɔna ye ya wo nu n a. 16 Ama, nyini n bo am ti ka bu jojo anie barasu barasu ni, i ti kabo Nyeme noanie kanfo Joweli yo jɔjɔri n wɔ lee, i ɲa,

17 ‘Nyeme ɲa o, fa ko durunya n awieeri,
m fá m Awiewie n wura minem kere ɲu.

Na am nbaabiesom ni nbaabaram kán Nyeme noanie n kere minem, na am ngbefenem ɲú deke nbem nahore su ka alele nu,
na am nkpienkpienm dá cin alele.

18 Nahore, nzen cɛen n ba juuri,
m fá m Awiewie n wura m akɔom n ɲu,
i bara ni i bieso kere,
na bu kán m noanie n kere mine.

19 Na m yó alekutura sam barasu barasu beberebe
angoro ni asienɲu fen,
na am ɲú mbunja, ni sin, ni ɲmisini bambaka.

20 Na wie n sí biri,
na sara n káaki kɔkɔre ka mbunja.

Nyini sin, na Mibie n cɛen bambaka n bo i la jirima n nyá ju.

21 Nyini cɛen ni, sɔno kere bo i bo fereeri Mibie n duma, i mi nyá tiide.’ ”

22 Na Petoro ase bu ka, “Ambeɗe Yisarelifoɗ, am so am sui na am ti fen. Nyeme akere am ka yiri sunmaari Yesu bo i fite Nazareti mie n nu n a. Nyini ti, ye i ma i yoori alekutura sam, ni sa ngbingbirim am nu n a, kabo ambeɗe ni am tii si i ni. 23 Nyeme deɛ koroyanu, ye i du mɔ ciciiri ka i má am nya Yesu taraabiri a, ye am faari i wuraari mine tiem saa nu, ye bu kpamaari i baka jaanu n su kuunri i n a. 24 Ama, na Nyeme atenge i afite i yiwee n nu, yiwee akoro ala má i yiko, dama i tiiri kekereke na yiwee koro kunma i. 25 Dama Feme Davidi yo jɔjɔri fa ko yiri Yesu ɲusu jɔre, i ɲa,

‘Ma ɲu i ka Mibie n wo m dɔ sanɲa kere,
nyini deɛ ti, puitiripui koro yo má m.

26 Nyini deɛ ti, m ahore ti daawa, na m jojo ni ahorejo,
haari ni bo m bá wu ni, m la tama fa ko m ɲuniembaa n su,

27 dama wɔro Nyeme, a yáki má m na m ka fuinm n nu,
a yáki má na u deɛ amususufo casi ka mini so wu kpɔro.

28 A kere m atin bo m fa na m nya ngɔɔ,
na kabo a wo m dɔ ni, nyini má m la ahorejo nahore su a.’

29 M ninbaam, m koro ka m se am nahore su wɔ, fa ko ya na Feme Davidi ɲusu jɔre. I yo wuuri wɔ, na ba se i, i fanɲunma toko wo ya nu fen haari ni nyuma. 30 I tiiri Nyeme noanie kanfo n deɛ ti, na wɔ si ka Nyeme atan ndie ka, i yí yiri Feme Davidi busu nufom n nu kun, na i dí i femeya n kabo yiri Feme Davidi yo tiiri barasu ni. 31 Feme Davidi du mɔ ɲuuri sa n bo Nyeme bá yo i ni, na wɔ jojo fa ko Kristo su, Tiidefo n bo Nyeme ase ka i súnma i ni, ka i bá wu na i téngge i yiwee nu, i ɲa,

‘Nyeme yáki má na i ka fuinm nu,
na i ɲuniembaa n kpɔro.’

³² Yiri Yesu n ye Nyeme tengeeri i yiwee n nu a, na ya kere anu i, ye ya sudi i daani a. ³³ I Si Nyeme aye i su ako angoro afa atana i saa fomboro su, ye wo ma i Awiewie Casi n bo wo se ka i fa ma i ni. Deke bo am anu i ni, ni deke n bo am ati i ni, yiri la Awiewie Casi n bo i seeri ka i fa ma ya ni. ³⁴ Ma Feme Davidi ni i tii fun koori angoro a, ama, na wo se ka, 'Micea n ase m Mibie n ka, "Bra, ba tana m saa fomboro su fen,

³⁵ haari m ba ma a kunma u kpofom." ' ' "

³⁶ Na Petoro akaaki ase ka, "I ti ye ni ka Yisarelifom kere si ka, yiri Yesu n bo ambere yo kpamaari i baka jaanu n su n ye Nyeme afa i ayo Mibie n ni Kristo, ya Tiidefo n a."

³⁷ Saŋga bo minem n tiiri ahin jore n so ni, na bu ahore asaaki agaya, na ba bisa Petoro ni Yesu jaramasa nyingam n ka, "Ya ninbaam, ye ya yo se wo?" ³⁸ Na Petoro ase bu ka, "Am kaaki am wo, na ya bie am kun kun kere Nyeme nzue, Yesu Kristo dee duma n nu, na Nyeme fa am satie ce am, na i fa Awiewie Casi n ce am. ³⁹ Dama Nyeme yo seeri ka i fa Awiewie Casi n ma ambere ni am busu nufom, ni minem bo bu wo dede ni, ni minem kere bo ya Micea Nyeme n fere bu ka bu bra yiri ni i tii do n wo." ⁴⁰ Na Petoro ajojo jore beberebe atu bu fo ni anyumboro su, i ŋa, "Am yi am ŋu fite suicin n bo Nyeme ba fa cin ahin nyumafotiatiyofom n nu." ⁴¹ Na bu dongu ayo i noanie n yarada, na ba bie bu Nyeme nzue, nyini ceen ni, na ba nya mine, ba yo ka akpii nsan abuka bu ŋu su. ⁴² Na bu nyunu aboro ka bu sonson Yesu jaramasam kereewam ni, na bu kere ayo anookun, na bu saŋga di diire, na bu saŋga sere Nyeme.

Kabo Yesu susufom woowa tiiri barasu ni

⁴³ Na Nyeme ama Yesu jaramasam n ayo alekutura sam barasu barasu beberebe, na sono kere asoro Nyeme. ⁴⁴ Na yaradayofom n ayo deke kere ni anoose, na ba soro su ka, deke kere bo bu la i n ti bu kere dee wo. ⁴⁵ Bu to bu nenge kere bo bu la i wo, na bu kpaaki ŋwaa n nu, na bo bu la ma be n kere nya be. ⁴⁶ Ceen n kere ceen, bu ba tien bu noo Nyeme Sereebiri Awuru n nu wo, na bu nati sutien bu noo awuru awurum nu, na bu saŋga di diire ni ahorejo, ni bu kunnu fofoe, ⁴⁷ na bu sukansi Nyeme, na minem akoro bu jore. Na ceen kere ceen na bu sunya minem bo Nyeme ma bu anya tiide n abuka bu ŋu su.

3

Kabo wobuka be nyaari laife barasu ni

¹ Ceen n be naaso wie kerefi nsan saŋga, na Petoro ni Yohane ako Nyeme Sereebiri Awuru n nu ka bu ko sere Nyeme. Saŋga bo bu fa sere Nyeme lee. ² Sono be woori do, bu wuuri i wobuka wo, na mine nbem aso i aba atana Nyeme Sereebiri Awuru nu ano n bo bu fere i ka Ano Nyunyumi ni, na i tana susere minem bo bu ba nyemesere ni, ka bu ma i ŋwaa. Ceen n kere ceen bu fa i ba wo, na i ba susere. ³ Nyini ceen ni, saŋga bo i ŋuuri Petoro ni Yohane ka bu suwura Nyeme Sereebiri Awuru n nu ni, na wo sere bere gusu ka bu ma i deke be. ⁴ Na Petoro ni Yohane afa bu nyumbaa akpama i ŋu, na Petoro ase i ka, "Nie ya do fen." ⁵ Nyini ti, na wo tu i tii sunie bu do, i sunsun ka bu ma i deke be wo.

⁶ Na Petoro ase i ka, "M la ma ŋwaa bo m ma u, ama, deke bo m la i na m fa ma u yaa, Yesu Kristo Nazaretifo n dee duma nu, m ŋa, a yasu nati."

7 Do na Petoro aso wɔbuka n saa fɔmbɔrɔ nu, na wɔ ye i su ajina, kpenɔa sɔnɔ n jaam kere ayo fanɔa, ⁸ nyini ti, na wɔ warakpin, na wɔ jina i jaa su, na wɔ bo i bu sunati bara ye. Do na wɔ su bu su awura Nyeme Sereebiri Awuru n nu, na i sunati, na i suwarakpin, na i sukansi Nyeme. ⁹ Na jama n kere anu ka i sunati, na i sukansi Nyeme. ¹⁰ Saɔa bo minem ni siiri nu ka, yiri bo i yo tana Nyeme Sereebiri Awuru n Anɔ Nyunyumi n nu sere n lee ni, na ba mie atana, na sa n bo i yoori sɔnɔ n ayo bu alekutura.

Kabo Petoro kaanri Nyeme noanie n Nyeme Sereebiri Awuru n nu ni

¹¹ Saɔa bo wɔbuka n bita Petoro ni Yohane barasu ni, na mine kere ayo alekutura, na ba nmati aba bu do awore be bo bu fere i ka Solomon dee Lele n nu. ¹² Saɔa bo Petoro njuuri minem so ni, na wɔ se bu ka, “Yisarelifom, nzu ti ye am fa ahin sa n yo alekutura ye am nie ya so a? Am sunsun ka ya dee yiko nu ye ahin sɔnɔ n anati a, wara am sunsun ka ya yo sa bo i ko atin su Nyeme do n dee ti, nzen se? Ai, i ti ma so. ¹³ Nyeme bo Abraham ni Izaki ni Jakɔbu ni ya nam suuri i ni, yiri ye wɔ wura i amusuisufo Yesu n kpri bambaka a. Ama, am faari i wuraari yikofom saa nu wɔ, na am akete i Gomina Pilato nyunu, ka am koro ma i, haari ni bo ma gomina n ja i yaki i nu ji ni. ¹⁴ I ti Nyeme sɔnɔ fofoe wɔ, bo i yo sa bo i ko atin su Nyeme do o, ama, na am akete i, na am asere gomina n jande ka i yaki sɔnɔ kunfo nu ji. ¹⁵ Na am akun yiri Yesu n bo i ma ya ngɔɔ ni, ama, Nyeme atenje i yiwee n nu, ya njuuri i wɔ ye ya sudi i daani a. ¹⁶ Ahin sɔnɔ bo am nju i na am si i ni, Yesu dee duma n yiko nu ma i jaam kere ayo fanɔa n a. Deke n bo am anu i ni, i fite ka sɔnɔ n ayo Yesu duma n yarada n dee ti, nyini ma wɔ nya laifie ye am kere anu i n a.”

¹⁷ Na Petoro anya ase bu ka, “M ninbaam, m si ka ambere ni am tereterefom kere be mmɔo asi ma sam bo am yo yoori bu ni. ¹⁸ Dawa saɔa, Nyeme ma i noanie kanfom kere yo jɔjɔri ahin jore kere, ka, Kristo, Tiidefo n bo Nyeme ase ka i sunma i ni ba, na i ba di wahara, nyini lee ye wɔ yo yiiwa bere n a. ¹⁹ Nyini dee ti, am kaaki am wo, na am su Nyeme, na i fa am satie ce am, ²⁰ na i ma am nya numiya, na i nya sunma Kristo, Tiidefo n bo wɔ yi i ka i ba am do ni, yiri la Yesu. ²¹ Wɔ yo daka ka i wo Nyeme do angoro, haari fa ko ju saɔa n bo Nyeme ma deke kere yo yiiwa, kabo dawa saɔa na i maari i noanie kanfo casim n noo na bu seeri ni. ²² Moyisi yo seeri ka, ‘Am Micera Nyeme sunma i noanie kanfo kabo i sunmaari mini Moyisi n wo. Nyini sɔnɔ ni yo am dee tienju sɔnɔ bo i fite am nu wo. I ti ye ni ka am de i noanie, na am yo deke kere bo i se ka am yo i. ²³ Sɔnɔ kere bo i de ma Nyeme noanie kanfo n noanie ni, Nyeme yi i mi fite i dee minem nu wɔ, na i ka ngbeen.’ ²⁴ Nyeme noanie kanfom kere bo bu jɔjɔri fite Samuweli saɔa haari ba ju ni nyuma, bu kere jɔjɔri fa ko ahin sam bo bu suyo nyuma n su wɔ. ²⁵ Ambere ti Nyeme noanie kanfo dee busu nufom a, am dee la seseu n bo Nyeme yo diiri i di ni am nam ni. Na wɔ se ya na Abraham ka, ‘U busu nufom dee ti ye m yo durunya n nufom kere kisi a.’ ²⁶ Nyini dee ti, ye i du mo yiiri i amusuisufo n ye i sunmaari i am do n a, ka i ba yo am kisi, nyini la ka, i ma am kaaki am wo, na i yi am fite am satie kere nu.”

4

Kabo Yudafo tereterefom diiri Petoro ni Yohane jore ni

¹ Petoro ni Yohane toko jojo jama n do ni, na minem nbem aba bu do, bere la Nyeme sayoowa donguyofom nbem, ni Nyeme Sereebiri Awuru n nu tintinijinafom kpien, ni Sadusifom nbem. ² Bu baari ni yaa su wo, kabo Yesu jaramasa nnyom ni sukere minem ka Yesu wuuri ni, i tengeeri i yiwee nu wo, nyini kere ka minem wu, bu tenge bu yiwee nu wo le. ³ Nyini ti, na ba tara Petoro ni Yohane. Bu taraari bu naaso sangga a, na ba nyi bu haari ale ako acin. ⁴ Ama, na mine dongu bo bu tiiri Yesu jaramasa ni kereewa n ayo yarada. Nyini ti, bere kere bo bu yoori yarada ni, bu nbiesom ko yasuuri mine akpii nnu wo. ⁵ Alecin ngarama na Yudafom tereterefom, ni bu nkpienkpienm, ni Nyeme noanie kerefom kere atien bu nwo Yerusalem mie kpiri n nu. ⁶ Bo bu gusu woori do n la Anasi bo i ti Nyeme sayoowa donguyofom kere kpien ni, ni mine nbem bo bu fere bu ka Kayafasi, ni Yohane, ni Alekizanda, ni minem bo bu wo Nyeme sayoowa donguyofom busu nu n kere tieenri bu nwo. ⁷ Na ba fa Petoro ni Yohane aba ajina bu afien, na ba bisa bu ka, "Am yoori se yoori ahin sa n a? Am la yiko bono, wara nma dee duma nu ye am fa tuntuunri sono n ye wo nya laifie n a?"

⁸ Na Awiewie Casi n awura Petoro nu, na wo se bu ka, "Ya tereterefom ni ya nkpienkpienm, ⁹ sakpa n bo ya yo i ama wobuka ni, ni kabo i yoori barasu na wo nya laifie n dee ti, ye am sudi ya jore bisa ya so a, nzen se? ¹⁰ I ti ye ni ka ambere ni Yisarelifom kere si ka o, ahin sono n bo i jina bere na wo nya laifie ni, i fite Yesu Kristo Nazaretifo n duma n nu wo. Yiri ye am kuunri i, ye Nyeme tengeeri i fiteeri i yiwee n nu n a. ¹¹ Ba kere i nusu jore Nyeme jore Kadasi n nu ka, 'Yabue n bo ambere bondo tafom faari i tuuri ni, yiri ye wo kaaki bondo n jaa yabuem kere ti a.'

¹² Yiri ngumi ye Nyeme ayi i ka i ba de sono kere tii a, duma be wo ma durunya n kere nu bo i koro de ya tii ji, ma ka Yesu Kristo dee duma ni ngumi."

¹³ Na Yudafu yikofom ni tereterefom n anu kabo Petoro ni Yohane la ahoresi barasu ni, na ba si ka ba ko ma kara be mmoo, na wo yo bu alekutura. Do na ba si nu ka bu yo suuri Yesu su wo. ¹⁴ Bu nuuri ka sono n bo wo nya laifie n jina Petoro ni Yohane bi ni, nyini dee ti, ba koro ase ma jore be. ¹⁵ Na ba se Petoro ni Yohane ka bu fite so n nu. Bu fite wieeri ni, na bere nkpienkpienm n abo Petoro ni Yohane n nusu anzama. ¹⁶ Na ba bisa bu nu nu ka, "Ye ya yo ahin minem se wo? Dama sono kere bo i wo Yerusalem mie kpiri n nu si ka ba yo ahin alekutura sa bambaka ni, ya koro se ma ka ba yo ma i e. ¹⁷ Ama, nzen ya koro ma ka ahin jore n bara ye deke n kere, am ma ya njonon bu ka, ma bu se ka bu bo Yesu duma mmoo na be ti." ¹⁸ Nyini ti, na ba kaaki afere Petoro ni Yohane awura, na ba ma bu nwo ka, ma bu se ka bu bo Yesu duma, wara bu kan i nusu jore kere minem. ¹⁹ Ama, na Petoro ni Yohane ase bu ka, "Ambere mmoo ni am tii, am nie nu na am nie e, Nyeme atin su, bono ti ye a, ya de am dee noanie n wo, nzen ya de Nyeme dee n wo? ²⁰ Ya sukan kere minem n wo fa ko sam n bo yere ni ya tii ati bu, na ya nu bu ni, ya koro mo ma ya nwo." ²¹ Na bere yikofom, ni tereterefom n anjonon bu nahore su, na ba yaki bu nu aji. Bu nieeri nu, bu nu ka bu koro yo ma bu pui, dama minem kere wo Nyeme kansi su wo fa ko sa n bo wo yo ni. ²² Sono n bo bu yoori nyini alekutura sa n maari i na i nyaari laifie ni, i tara afo aburana.

Kabo yaradayofom n sereeri Nyeme ka i ma bu ahoresi ni

²³ Sanga bo Petoro ni Yohane nyaari bu tii ni, bu kaba kpieeri bu nyi koori bu bengu Yesu susufom n do o, na ba kan jore n kere bo Nyeme sayoowa donguyofon nkpienm, ni nkpienkpienm n seeri ni. ²⁴ Yaradayofom ni tiiri nyini jore n kere so ni, na bu kere ayo anookun, na ba sere Nyeme, bu na, "Ya Micera Yikofon, woro yiiri angoro ni asienyu a, ni tieku n ni dekem kere bo bu wo nu ni. ²⁵ Woro yo ma u Awiewie Casi n wuruara ya na Davidi bo i ti u dee amusuisufon n ru a, na wo se ka, 'Nzu ti ye minem bo bu ti ma Yudafom afa yaa agaya so a.

ye minem bita sunsunni bo i la ma kpere a?

²⁶ Ye durunya n nu nfemem ayasu ajina,

na bu yikofom atien bu noo,

ka bu tu lue ni Micera Nyeme ni,

ni Kristo, Tiidefon n bo Nyeme ase ka i sunma i n a.'

²⁷ To, kabo Feme Davidi yo kaanri ni, i ti nahore wo, ka Feme Herode, ni Gomina Pontiyo Pilato fa sanga ni minem bo bu ti ma Yudafom, ni Yudafom yo tienri bu noo ahin mie n nu wo, na ba kete Yesu, u amusuisufon casi n bo a yiiri i ka yiri ti Tiidefon ni. ²⁸ Bu tienri bu noo o, na ba yo dekem kere bo u dee yiko n ni u koroyanu na a du mo acici ka bu yo ni.

²⁹ Ya Mibie, ti kabo kisa bu rhorono ya barasu, nyini ti, ma yere u akoom n ahoresi, na ya kan u dee labari kpa n na ma ya soro sere. ³⁰ Fa u yiko n tuntun tukpakifom na bu nya laifie, na a ma ya yiko na ya tuntun mine, na ya yo alekutura sam barasu barasu, u amusuisufon casi Yesu n dee duma nu." ³¹ Sanga bo bu sereeri Nyeme n wieeri so ni, na dika n bo bu wo nu n akpisi. Na Awiewie Casi n awura bu kere ru, na ba kan Nyeme jore ni ahoresi.

Kabo Yesu susufom ni yoori anoose barasu ni

³² Yaradayofom n yo yoori anoose wo, na ba sanga ayo deke n kere kun. Be wo ma bere bo i se ka i nenge be tiiri i tiengu dee. Ama, bu kere kpaaki deke n kere bo bu la i nu ma bu bengu wo. ³³ Na Yesu jaramasam n akan Nyeme jore ni yiko bambaka, na ba kan akere minem kabo Yesu tengeeri i yiwee n nu ni. Na Nyeme ama bu kere adi ahoroma beberebe. ³⁴ Be awo ma bu nu bo i mieleri deke be busu. Bo bu laari asienm, ni awurum toori bu wo, na ba fa njwaa kere bo bu nyaari i ni, ³⁵ aba ama Yesu jaramasam ni, na bere gusu akpaaki i nu ama bo bu la ma pui ni, na ba fa ayo deke bo i mie bu. ³⁶ Sono be yo woori bu nu, bu fere i ka Yosefu, i ti Levi busu nufon o, bu wuuri i asien be bo bu fere i ka Sipurusi n su wo. Na Yesu jaramasam n atun i duma ka Banabasi, i bu la ka, sono bo i ma mine ahoresi ni. ³⁷ Nyini sono n toori i asien n bo i la i, na wo fa njwaa n aba ama Yesu jaramasam ni.

5

Ananiyasi ni i yi Safira dee jore

¹ Sono be yo woori do bu fere i ka Ananiyasi, na bu fere i yi ka Safira, na ba to bu aja be. ² Ama, na yiri ni i yi n ayo bu nookun, na wo yi njwaa n be afie, na wo fa bo i kaari n ama Yesu jaramasam ni. ³ Na Petoro abisa i ka, "Ananiyasi, nzu ti ye a ma Sitana awura u sunsunni nu, ye a fa njwaa n bo a toori u asien n na a nyaari i n be afie a, ye a na a dadaka Nyeme Awiewie Casi n a? ⁴ Sanga n bo a nya to ma i ni, i ti u dee wo, kisa gusu bo

a tɔ i ni, n̄waa n ti u dɛɛ wɔ. Ye nzu ti ye a yo ahin sa n a? Má adamande n̄gumi ye a n̄a a dadaka a, ama, a n̄a a dadaka Nyemɛ wɔ.” ⁵ Ananiyasi tiiri nyini n̄oan̄iɛ n sɔ ni, i kaba kpaasiiri wɔ, na wɔ wu, na sɔnɔ kerɛ bo i tiiri nyini sa n bo wɔ yo ni, na sere ati bu agaya. ⁶ Na n̄gbefɛnɛm ayasu afa tani apɔondi i, na ba fa i afite akɔ ase i.

⁷ Wɔ cɛ má, na i yi gusu aba, wɔ si má sa bo wɔ yo ni. ⁸ Na Petoro abisa i ka, “U ni u hun aja n bo am tɔori i n̄waa n kerɛ lɛɛ?” Na wɔ bɔ Petoro n nu ka, “ɛɛn, i kerɛ lɛɛ.” ⁹ Dɔ na Petoro abisa i ka, “Nzu ti ye u ni u hun ayo am nɔɔkun na am yo Micerɛ n Awiewie n na am nie a? Nie fen, minem bo bu faari u hun kɔ seeri i ni, bu jaa busu wo anɔ n nu, bu fá wɔɔ m̄mɔɔ fite lɛɛ.” ¹⁰ Jina n nu bere, na wɔ kaba akpaasi Petoro jaa bu, na wɔ wu. Bo bu seeri i hun n ba n̄uuri ka yiri gusu awu, na ba fa i akɔ ase i adodo i hun ni. ¹¹ Na Kristo jama n kerɛ, ni minem kerɛ bo bu tiiri nyini sa n bo wɔ yo ni, na sere ati bu kerɛ agaya.

Kabo Yesu jaramasam n yoori alekutura sam barasu ni

¹² Na Yesu jaramasam n ayo alekutura sam barasu barasu dɔngɔ minem n nu bo i kere ka Nyemɛ wo bu dɔ. Na yaradayofɔm n kerɛ atien bu nɔɔ Solomon Lele n bo i wo Nyemɛ Sereebiri Awuru n nu ni. ¹³ Minem bo ba yo má Yesu yarada ni soroori sere wɔ, ba koro asan̄ga má bu nu, ama, na minem n awura bu kp̄iri. ¹⁴ Na mine beberebe ayo Mibiɛ n yarada, subuka bu su san̄ga kerɛ, bu sunnu, nbiesɔm ni nbaram. ¹⁵ Na alekutura sam bo Yesu jaramasam yoori bu n dɛɛ ti, na mine asɔ bu tukpakifɔm, ni bu dasum aba ase atingberem nɔɔ su, adena Petoro ba sunati sin, na haari i awiewie m̄mɔɔ tɔ gɔ bu nbem n̄u, na bu nyá laifie. ¹⁶ Na mine beberebe afite miɛ miem bo bu bara ye Yerusalem miɛ kp̄iri n su ni, na ba fa tukpakifɔm ni minem bo ajinim yaki má bu n aba, na bu kerɛ anya laifie.

Kabo bu kereeri Yesu jaramasam n wuwuruwa barasu ni

¹⁷ Na Nyemɛ sayoowa dɔnguyofɔm n kerɛ kp̄ien ni, ni i bengum bo bu su Sadusifɔm atin su ni, aba asi Yesu jaramasam ni kɔre agaya. ¹⁸ Na ba tara Yesu jaramasam ni, akɔ anyi bu dansaraka. ¹⁹ Ama, nyini cɛɛn n kɔngue, na Nyemɛ mereke aba ateke dansaraka anɔ ni, na wɔ yi Yesu jaramasam n afite, na wɔ se bu ka, ²⁰ “Am kɔ na am kɔ jina Nyemɛ Sereebiri Awuru n nu, na am kan ahin n̄gɔɔ fɔfɔre n bo am anya i n jɔre kerɛ kere minem.” ²¹ Na jaramasam n ade i n̄oan̄iɛ ni, na aletin n̄garama fuun, na ba kɔ ajina Nyemɛ Sereebiri Awuru n nu, na ba bo i bu sukere mine.

San̄ga bo Nyemɛ sayoowa dɔnguyofɔm n kerɛ kp̄ien n ni i dɛɛ jama nbaam na ba juuri ni, na ba fere Yudafɔ tereterefɔm ni, ni Yisareli nkpien-kpienm kerɛ, na ba tien bu nɔɔ na bu fa sesesu, dɔ na ba ma nɔɔ ka bu kɔ yi Yesu jaramasam ni dansaraka n nu bra. ²² Ama, minem n bo bu sunmaari bu n kɔ juuri ni, ba n̄u má jaramasam ni dansaraka sɔɔ n nu, na ba kp̄ie bu nyi aba ase bu. ²³ Bu n̄a, “San̄ga bo ya kɔ juuri ni, dansaraka anɔ n kerɛ nyi wɔ kenken, tintinijinafɔm gusu jina anɔ n nu bere, ama, san̄ga bo ya ba tekeeri anɔ n ni, ya n̄u má sɔnɔ kun n kpein m̄mɔɔ sɔɔ n nu.” ²⁴ San̄ga bo Nyemɛ sayoowa dɔnguyofɔm n kerɛ nkpienm, ni Nyemɛ Sereebiri Awuru n nu tintinijinafɔm kp̄ien n tiiri sɔ ni, na ba birisi, ba si má sa bo wɔ yo. ²⁵ Dɔ na sɔnɔ be aba ase bu ka, “Am ti fen. Minem bo am taraari bu kɔ nyiiri bu ni, bu wo Nyemɛ Sereebiri Awuru n nu wo minem

kere su.” ²⁶ Nyini ti, na Nyeme Sereebiri Awuru n nu tintinijinafom kpien n afa i minem ako, na ba ko atara Yesu jaramasam n aba. Bu ko faari bu ni, ba mie ma bu, dama bu soroori ka minem ni tu bu yabue wo.

²⁷ Na ba fa jaramasam n aba, na ba fa bu ajina minem bo ba tien bu nco n nyunu. Na Nyeme sayoowa donguyofom n kere kpien n abisa bu bisaawam. ²⁸ I na, “Ya maari am nco nahore su ka, ma am se ka am kere kereewa be ahin sono n duma nu. Ama, am nie kabo am ayo a. Am afa am kereewa n abara aye Yerusalem mie kpiri n kere nu, ye am koro ka am se ka yere kuunri i a.” ²⁹ Na Petoro ni jaramasa nyingam n abo bu nu ka, “Wo yo daka ka ya de Nyeme nonie wo, ma adamande dee. ³⁰ Nyeme bo i ti ya nam dee Nyeme ni, yiri tengeeri Yesu fiteeri i yiwee n nu, yiri bo am kuunri i na am kpamaari i baka jaanu n su ni. ³¹ Yiri Yesu, ye Nyeme afa i atana i saa fomboro su, ka i yo ya Mofa ni ya Tiidefo, na i ma yere Yisarelifom atin, na ya kaaki ya wo, na Nyeme fa ya satie kere ce ya. ³² Yere ni Awiewie Casi ni di ahin sam n daani kan kere mine a. Yiri Awiewie Casi ni ye Nyeme afa ama minem bo bu de i nonie n a.”

³³ Sangga bo minem bo ba tien bu nco n tiiri nyini jore n so ni, na yaa ati bu agaya, ma bu koorori ka bu kun Yesu jaramasam wo. ³⁴ Ama, na bu nu kun, i ti Farasifo o, bu fere i ka Gameli, i kaaki ti Nyeme nonie kpamaawa n kerefo o, bo minem kere ma i jirima agaya. Na wo yasu ajina, na wo ma nco ka bu fa jaramasam n fite dasin kaan ka. ³⁵ Do na wo se jama n kere ka, “M lamoko Yisarelifom, am nie am tii su dongu fa ko sa n bo am koro ka am fa yo ahin minem ni. ³⁶ Am tenge su ka afo be, na sono be, bu fere i ka Tiydasi, na wo ba, na wo yo i nu ka i ti sono bo i nusu nya ma durunya n nu wo, na mine ba yo ka yaa nna kere asu i su. Ama, wo ce ma, na mine akun i, na i susufom n kere anmati asandi, na i dee atin n aka ngbeen. ³⁷ Nyini sin, sangga bo bu na bu kere asien n su jama duma na bu si bu no ni, na sono be gusu aba, yiri la Yudasi bo i fite Galili asien n su ni. Na jama beberebe asu i su, ama, na mine akun yiri gusu, na i susufom n kere anmati asandi. ³⁸ Nyini ti, kabo i ti ni, m suse am wo, ma am se ka am yo ahin minem ni pui. Am yaki bu benle. Nzen atin n bo bu bita i n ti adamande dee, i ka ngbeen wo. ³⁹ Ama, nzen i ti Nyeme dee, am koro yo ma ahin mine ni pui. Am ba nu ka am si ma na am sukun lue ni Nyeme.” ⁴⁰ Na ba de Gameli fotuuwa ni. Na ba fere Yesu jaramasam n awura, na ba fin bu ngbere, na ba ma bu nco ka, ma bu se ka bu bo Yesu duma mmoo kere mine kun. Na ba yaki bu, na ba ko. ⁴¹ Yesu jaramasam ni fiteeri minem bo ba tien bu nco n do wieeri ni, na bu ahore ajo agaya, ka Nyeme abu bu awura be nu, dama ba di nyinse Yesu dee duma n nu. ⁴² Na ceen n kere ceen, na bu suwura Nyeme Sereebiri Awuru n nu, ni minem dika, na bu yaki ma Nyeme nonie n kere ni, na bu sukan Nyeme labari kpa n kere bu ka Yesu ti Kristo n a, Tiidefo n bo Nyeme ase ka i sunma i ni.

6

Kabo bu yiiri bukafon nsom ni

¹ Na fa ko sangga su, na Yesu susufom n asunnu abuka su, na Yudafo bo bu jojo Giriki anie n ni anjuti Yudafo bo bu jojo Hiburu anie ni. Bu na ceen kere ceen na bu ce nkunafom diire ni, bu bu ma bu deem wura ma nu. ² Nyini ti, na Yesu jaramasam buru ni nnyom n afere susufom n

kere pepere atien bu nɔɔ, na ba se bu ka, “I ti má ye ni ka yere ni ya tii yaki Nyeme jore n kan, na ya sunie diire jore su.” ³ Nyini ti, m ninbaam, am nie am njuju nu, na am yi mine nso bo bu la anyunuyi, na Awiewie Casi n wo bu do, na bu la alecira, na bu kaaki la sunsunni kpa, na ya má bere nie nyini sereyam n kere su. ⁴ Na yere ni ya tii nyá ya nju, na ya nyunu bóro nyemesere, ni Nyeme noanie n kan su.” ⁵ Yesu jaramasam n seeri so ni, na wo yo minem kere fie fa ko bu jojoowa n su. Na ba yi sono be, bu fere i ka Satefano, i ti sono bo i la yarada nahore su wo, na Awiewie Casi n wo i nju, ni Filipu, ni Porokoron ni, ni Nikano, ni Timona, ni Pamenasi, ni Nikola bo i fite mie kpiri n bo bu fere i ka Antiyoki n su, na wo kaaki i nju ka i ti Yudafo, na i su bu dee atin n su ni. ⁶ Na jama n afa bu aba Yesu jaramasam n do, na ba fa bu saa anana bu nju, na ba bere Nyeme ama bu. ⁷ Na Nyeme noanie ni susandi subuka su. Na mine beberebe ayo yarada abuka Yesu susufom su Yerusalem mie kpiri n nu. Na Nyeme sayoowa dongyuofom gusu dongu ayo yarada.

Kabo bu taraari Satefano barasu ni

⁸ Satefano ti sono bo i diiri Nyeme ahoroma wo beberebe, na Nyeme ama i yiko nahore su, na wo yo alekutura sa barasu barasu minem n nu. ⁹ Ama, na Yudafo nbem ayasu ajina ase akuruwa ni yiri. Nyini minem wo ase n bo bu fere i ka Ma De M Tii tientienbunoo so n nu wo. Bu nbem fite mie kpirim n bo bu fere bu ka Sirene, ni Alekizanderiya n wo. Na bu nbem gusu fite Silisiya ni Esiya dee aworem n nu wo. ¹⁰ Ama, na Awiewie Casi ni ama Satefano alecira, na wo koro akan ayi bu. ¹¹ Nyini dee ti, na ba ma mine nbem nwaa ka bu kpie kore so Satefano ka, ba ti ka wo kpie Moyisi ni Nyeme nzuko. ¹² Bu seeri so n dee ti, na ba ye minem yaa su, ni nkpienkpienm ni, ni Nyeme noanie kerefom, na ba tara i ako Yudafo tereterefom do. ¹³ Do na ba fa mine nbem aba, na ba kpie kore aso i. Bu na, “Sanga kere ahin sono n jojo ngbeenngbeen wo fa ko ya Nyeme Sereebiri Awuru casi n su, na i kaaki jojo ngbeenngbeen fa ko Nyeme noanie kpamaawa su. ¹⁴ Ya ti ka i na, Yesu Nazaretifo ni bo fufu ya Nyeme Sereebiri Awuru n kere go, na i kaaki ya nana sayoowam kere bo Moyisi fa kereeri ya ni.” ¹⁵ Na bere tereterefom n kere afa bu nyumbaa akpama Satefano nju, na ba nju ka i nyunuawa akaaki wo ka Nyeme mereke dee su.

7

Kabo Satefano jjoori barasu ni

¹ Na Nyeme sayoowa dongyuofom kere kpian n abisa Satefano ka, “Ahin jore n kere bo ba kan i n ti nahore wo?” ² Na Satefano abo i nu ka, “M sim ni m ninbaam, am so am sui na am ti fen. Kana ya na Abraham ko wo Harani mie kpiri n nu ni, Nyeme Kpiri n yo yiiri i nju kereeri Abraham Mesopotamiya dee asien n su wo. ³ Na wo se i ka, ‘Fite yaki u asien n bo a tana su ni, ni u minem, na m kere u asien bo m koro ka a ko tana su ni.’ ⁴ Nyini ti, na Abraham ayasu Kaladiya asien n su, na wo ko awo Harani mie kpiri n nu. I woori do ye i si ba wuuri a. Nyini sin, na Nyeme ama wo yasu do aba atana ahin asien n bo ya wo su kisa ni. ⁵ Nyini sanga, Nyeme nya fa ma asien n haari kampiti so mmoo ma ma Abraham na i se ka i ti i dee. Nyeme yo seeri i ka i fa asien n ma i ni i busu nufom wo. Sanga bo i seeri i so ni, na Abraham nya wu ma baa. ⁶ Na Nyeme ase i ka,

'U busu nufom bá kó yo wofom wó asien be su, na bu fá bu yo nkokom, na bu kére bu wahara agaya kó ju afo yaa nna.' ⁷ Ama, na Nyeme ase ka, 'M bá cin minem n bo bu fá u minem yo bu nkokom n sui, na m nyá yi u minem fite nyini asien n su, na bu káaki ba fen, na bu bá su m.' ⁸ Dó na Nyeme afa sesesu na wó di i di ni Abraham, i ña, 'Baa kéré bo a wuuri i, i ti ye ni ka a wura i kenkenne. Nyini kere ka a bita sesesu n bo ya di i di n a.' Nyini ti, Abraham ba wuuri Izaki ni, i wuraari i kenkenne wó lemocue céen. Na Izaki gusu aba wu Jakóbu, na wó wura i kenkenne i lemocue céen, na Jakóbu gusu aba awu i nbaa buru ni nnyom bo bu ti ya nam ni, na wó wura bu kenkenne lemocue céen.

⁹ Na Jakóbu nbaam n asi bu niema Yosefu kóre, na ba to i afa ama Ijipiti asien n sufom. Ama, na Nyeme awo i dó, ¹⁰ na wó yi i afite kekereke kéré bo i tuuri i nu, na wó ma i alecira, na wó di Ijipiti Feme Faaro ahoroma. Na feme n afa i dika n kéré, ni Ijipiti asien n ama i ka i nie i dika. ¹¹ Na ahóe aba ató Ijipiti, ni Kanana asienm n su, abi aboro mine ñu, bo ya nam anya má diire bo bu di. ¹² Na bu si Jakóbu ati ka diire wo Ijipiti asien n su, na wó sunma i nbaam. Ciciri su dee sunma ni, na ba kó afo diire n aba. ¹³ Bu ba kpieri bu nyl kóori ajaari nnyo su ni, na Yosefu ayi i ñu akere i sinbaam ni, na Feme Faaro gusu asi Yosefu dikafom. ¹⁴ Na Yosefu asunma i sinbaam n ka bu kó fa bu si, ni i dikafom kéré ka bu bra i dó Ijipiti asien n su. Minem kéré kó yasuuri aburaso ni nnu wó, bo bu baari Ijipiti asien n su. ¹⁵ Na Jakóbu, ni i dikafom kéré ako Ijipiti asien n su, dó ye i ni i nbaam n kéré kó wuuri a. ¹⁶ Na ba fa bu aba Sekem mie kpiri n nu, na ba se bu fanfunma n bo Abraham toori i jete ñwaa beberebe Hamó nbaam dó ni.

¹⁷ Sangá n ba dodoori bo deke n bo Nyeme yo seeri ka i yo ma Abraham n yo yíwa ni, nyini sangá ni, na ya minem ni atere ade Ijipiti asien n kéré su. ¹⁸ Bo woori dó só ó, haari na sóne be aba adi Ijipiti asien n su feme, yiri asi má Yosefu. ¹⁹ Na yiri ni afa sunsunni tie adadaka ya nam, na wó bita bu ni tie bita, na wó se ya nam ka bu fa bu nbaam fa tu, adena bu wu. ²⁰ Nyini sangá n ye bu wuuri Moyisi a, i yo ti baa bo i yo nyumi agaya Nyeme dó ó. Na ba bita i i si dika haari sara nsan, ²¹ na ba nya ayi i afite, na Feme Faaro wa baabara afa i ayo i kunnu wa. ²² Na ba kere i Ijipitifom ngonle ni alecira barasu barasu kéré, na wó yasú, na i duma ata fa kó i sayoowa ni i jójowa kere nu.

²³ Sangá bo Moyisi ba juuri afo aburana ni, na i sunsunni ama i ka i kó nie i lamoko Yisarelifom busu. ²⁴ Na wó ñu ka Ijipitifom be sukere Yisarelifó kun be wuwuruwa. I ñuuri i só ni, wó sun má i nu, na wó kó abo akun Ijipitifó ni. ²⁵ Moyisi sunsunri ka, i dee minem ni tí i bu wó, ka, Nyeme ye wó yi i ka i ba de bu tii ji a, ama, ba ti má i bu só. ²⁶ I alecin, na wó ñu ka Yisarelifom mine nnyó sudi aluwa n bu ñunju nu, na wó kó akpata bu, na wó se bu ka, 'Ñjam, am ti fen, m ña am kéré ti kun wó e, ye nzu ti ye am sudi aluwa?' ²⁷ Ama, na yiri n bo i sukere i beñgu n wuwuruwa n asun Moyisi akó i sin, na wó bisa i ka, 'Ñma fa u yoori ya niesufó ni ya joredifo a?' ²⁸ A koro ka a kun mini gusu, kabo anuma a kuunri Ijipitifom wó, nzen se a?' ²⁹ Moyisi tiiri nyini jore n só ni, na wó ñmati afite Ijipiti asien n su ako awo Madiya asien n su akaaki wófo dó. Dó na wó ba aja bara, na wó wu nbaabiesom nnyo.

³⁰ Na afo aburana sin, na Nyeme mereke be ayi i ñu akere Moyisi boro kpantain n nu, fa dodo buka n bo bu fere i ka Sinayi n su, i ñu ka sin fofoe be je buwe baka be su, ama, i yara má, mereke n wo sin n nu. ³¹ Moyisi

ɲuuri i sɔ ni, na wɔ yo alekutura, na wɔ cin adodo ka i nie i nyunyumi. Dɔ na Micera n ajojo i dɔ, ase i ka, ³² 'Mini ti u nam Nyeme a, u na Abraham, ni Izaki, ni Jakobu.' Na sere ati Moyisi, na i ɲunie subobo i, wɔ bo má su ka i nie i kun. ³³ Na Micera n ase Moyisi ka, 'Deke bo a jina n ti m tienngu dɛɛ asien casi wɔ, cin yi u gbagbaa ni. ³⁴ Ma ɲu kabo m minem wo kekereke nu Ijipiti asien n su barasu. Ma ɲu kabo bu fiefie barasu, nyini dɛɛ ti ye ma jura aba ka m ba de bu tii ji. Bra na m sunma u Ijipiti asien n su.'

³⁵ Tɔ, yiri Moyisi ye Yisarelifom keteeri i n a, na ba bisa i ka, 'Nyama fa u yoori ya niesufɔ ni ya joredifo a?' Moyisi, yiri ye Nyeme sunmaari i mereke i dɔ baka n bo i je sin fofoe na i yara má n su, na mereke n ase i ka i kɔ de minem tii ji na i yo bu kpian n a. ³⁶ Na wɔ du Yisarelifom mɔ, na wo yi bu afite Ijipiti asien n su, na wo yo alekutura sam beberebe dɔ, ni kunma kpiri n bo bu fere i ka Kunma Kɔkɔɛ n su, ni sanja bo bu du boro kpantain n nu afo aburana ni. ³⁷ Yiri Moyisi yo seeri Yisarelifom ka, 'Nyeme bá yi am busu nufɔ be na i yó i noanie kanfo, kabo m ti ni.' ³⁸ Yiri Moyisi, i ni ya na Yisarelifom yo woori boro kpantain n nu n a, yiri ye Nyeme mereke n jɔjɔri i dɔ Sinayi Buka n su n a, yiri ye Nyeme yo faari i noanie n bo i ma ɲɔɔ ni maari i ka i fa ma ya nam n a. ³⁹ Ama, ya nam akoro má ka bu de i, na ba kete i na ba koro ka má bu kpie bu nyi kɔ Ijipiti asien n su. ⁴⁰ Na ba se Moyisi gɔɔ Aaron ka, 'Ta amɔem ma ya na bu du ya mɔ fa ya nati. Ya si má sa bo wɔ yo yiri Moyisi n bo i faari ya fiteeri Ijipiti asien n su ni.' ⁴¹ Na ba yi yi bu sikam, na ba fa ata amɔɛ ka nambaa dɛɛ su, na ba yo tie ama i, na ba su i, na ba di cɛɛnkpiri fa kɔ nyini deke n bo bere ni bu tii ayo i n su. ⁴² Nyini ti, na Nyeme akaaki i sin abo bu, na wo ma bu susu asarambam bo bu wo angoro ni, kabo ba kere i Nyeme noanie kanfom dɛɛ kadasi n nu lee. Bu ɲa,

'Amberɛ Yisarelifom, am yo yoori yoowam boro kpantain n nu afo aburana ni,
am yo maari mini wɔ?

⁴³ Ai, am yo sɔɔri amɔɛ n bo bu fere i ka Mɔleki na am afa tani abo i nambue n sɔ i nati wɔ,
ni amɔɛ n bo bu fere i ka Refani na i ti ka asarambaa be ni.
Bere ye am ta bu ka amɔɛm ye am su bu a.

Nyini ti, ye m má bu taraari am kɔ mie be bo i sin Babilon mie kpiri n ɲu n a.'

⁴⁴ Ya nam ni, bere yo laari nambue n bo i kere ka Nyeme wo bu dɔ n boro kpantain n nu a. Bu yoori i kabo Nyeme kereeri Moyisi ka i yo i n wɔ.

⁴⁵ Ya nam yo faari nyini nambue n maari bu sinfom wɔ, na bu ni bu mɔfo Yosuwaa afa i ako asien n bo Nyeme fon yiiri minem su na i fa maari bu ni. Na nyini nambue n awo bu dɔ haari Feme Davidi sanja. ⁴⁶ Na Feme Davidi adi ahɔɔɔma Nyeme dɔ, na wɔ sere Nyeme ka i ma i ta awuru bo Jakobu ni i dikafom fa su Nyeme. Feme Davidi akoro ata má i, ⁴⁷ ama, i wa Feme Solomon yo taari awuru n maari Nyeme a. ⁴⁸ Haari ni nyini mmɔɔ, Micera Nyeme Kpiri n yiri tana má awuru bo adamande ata i nu, kabo Nyeme noanie kanfo n ajojo i ni. I ɲa,

⁴⁹ 'Micera n ɲa o,

Angoro ni ti m femeya tanaabiri a,
na asienngu nya ti deke bo m jaa gbagbaa tien.

Ye am ta nzu awuru barasu ma m a?

Am nya nyini fofoe n ni ye m wo nu a?

50 Má mini yoori ahin dekem ni kere a? ”

51 Na Satefano akaaki ase bu ka, “Amberɛ, am ahorembaa ti kekereke, na am sui ti tantanantan ka minem bo bu su má Nyeme ni. Am nati kete Nyeme Awiewie Casi n wɔ, kabo am nam yo yoori lɛɛ. 52 Nyeme noanie kanfo bono ye am nam akere má i wuwuruwa? Na ba kun minem ni, bo bu seeri ka Sono n bo i yo sa bo i ko atin su ni bá ni. 53 Amberɛ ye Nyeme yo sunmaari i merekem ye bu faari i noanie kpamaawa maari am n a, ama, am ade má i.”

Kabo bu tuuri Satefano yabue bo kuunri i barasu ni

54 Kabo Satefano jɔɔɔri so ni, na yaa ati Yudafo tereterefoɔm n agaya, na ba kan bu noo awura nu, na bu sukpeɛ bu jee. 55 Ama, na Awiewie Casi n awura Satefano ŋu, na wɔ tu i tii anie angoro, na wɔ ŋu kabo Nyeme woowa ata papasi barasu. Na wɔ ŋu ka Yesu jina Nyeme saa fomboro su. 56 Na wɔ se bu ka, “Am nie, ma ŋu ka angoro n ateke ye Adamande Wa n jina Nyeme saa fomboro su.” 57 I seeri so ni, na Yudafo tereterefoɔm n atien kpa, na ba fa bu saa ato bu suim. Do na ba kaba abereki ato Satefano ŋu. 58 Na ba cin i afite mie n aheme, na bu sutu i yabue, na bere bo bu di daani jaraki i, na bu sutu i yabue, na ba yi bu suturam ama gbefene anyunutifo be ka i sunie bu dika, bu fere nyini gbefene n ka Soolu. 59 Bu wo Satefano yabue n tu su so ni, na i gusu subo fere Mibie ni, i ŋa, “M Mibie Yesu, de m ŋɔɔ ni.” 60 Na wɔ kutu asienɔgu, na wɔ bo awie kpa, i ŋa, “M Mibie, má a fa bu ŋgasi fa ko sa n bo bu suyo i n su.” I seeri so wieeri ni, kpenɔa na i ni durunya n akpaaki.

8

1 Soolu yo soroori su ka bu kun Satefano a.

Kabo Soolu kereeri Kristo jama n wuwuruwa barasu ni

Nyini cɛɛn n gbingbin ye bu boori i bu kereeri Kristo jamam wuwuruwa agaya, bere bo bu wo Yerusalem mie kpiri n nu ni. Na bu kere anmati asandi ako Yudiya, ni Samariya deɛ awore n kere nu, i ko kaari Yesu jaramasam ni ngumi wɔ, Yerusalem mie kpiri n nu a. 2 Na Nyeme sufɔ nbem ako ayo Satefano sutura, na ba sun sukoko agaya. 3 Ama, na Soolu aboro i nyi kabo i yo na i ka Kristo jama ni ngbeen, na i suwura awuru awurum nu, na i sucin yi yaradayofɔm ni, nbaram ni nbiesom kere, na i ma bu ko nyi bu dansaraka.

Kabo Filipu kaanri labari kpa n jɔɔɔ kereeri Samariyafɔm ni

4 Yaradayofɔm n bo bu sandiiri awore n kere nu ni, na ba nati sukan labari kpa n kere minem kere. 5 Na Filipu ako Samariya mie kpiri n su, ako sukan kere minem fa ko Kristo, Tiidefo n bo Nyeme ase ka i sunma i ni. 6 Na wɔ yo alekutura sam. Bu tiiri kabo i jɔɔɔ na bu ŋuuri alekutura sam bo i yoori bu ni, na bu kere aso bu sui nyunyumi, na ba ti kabo i se ni. 7 Na wɔ fon ayi ajinim mine donɔgu ŋu. Bu ba sufite yaki minem ni, bu tien ni fanga su na bu fite. Na minem beberebe bo bu saam ni bu jaam awu ni, ni wobukam kere anya laifie. 8 Nyini ti, na ahorejo bambaka aba Samariya mie kpiri n nu.

9 Na sono be ayo awo Samariya mie kpiri n nu, bu fere i ka Simon, i nati yo boboyaya wɔ, na minem bo bu wo mie n nu ayo alekutura, na i sukere i ŋu ka i ti sono bambaka a. 10 Na sono kere, tarakam ni nfanɔafɔm kere

asoro su ka yiri la Nyeme dɛɛ yiko n a. Na ba fere i ka Yiko Bambakafo n bo i fite Nyeme do n a. ¹¹ Deke bo i ti na bu koro i jore n la ka, i yo yoori nyini boboyaya juma n bu do ace. ¹² Ama, sanga bo Filipu ba kaanri labari kpa n jore n fa ko Nyeme femeya n ni Yesu Kristo dɛɛ atin n su, na bu deeri i noanie ni, na wo bie bu Nyeme nzue, nbaram ni nbiesom kere. ¹³ Na Simon mmoo ni i tii ayo yarada, na Filipu abie i Nyeme nzue, na i susu Filipu su deke kere bo i ko, na wo ngu abono sam barasu beberebe bo Filipu yoori bu ni, na wo yo i alekutura.

¹⁴ Na Yesu jaramasam bo bu wo Yerusalem mie kpiri n nu n ati ka Samariyafom gusu ade Nyeme noanie n ni, nyini ti, na ba sunma Petoro ni Yohane bu do. ¹⁵ Sanga bo bu ko juuri do ni, na ba sere Nyeme ama bere bo ba yo yarada ni, adena Awiewie Casi n wura bu ngu. ¹⁶ Dama ba bie bu Nyeme nzue ya Mibie Yesu dɛɛ duma n nu wo, ama, Awiewie Casi n nya wura ma bu ngu. ¹⁷ Na Petoro ni Yohane afa bu saa anana bu tii su, na ba sere Nyeme ama bu, na Awiewie Casi n awura bu ngu. ¹⁸ Simon nguuri ka Yesu jaramasam faari bu saa nanaari yaradayofom ni tii su, na bu sereeri Nyeme maari bu, na Awiewie Casi n wuraari bu ngu ni, na wo fa njwaa aba ka i fa ma Petoro ni Yohane, ¹⁹ na wo se bu ka, "Am ma mini mmoo ahin yiko n be, adena sono kere bo m fa m saa nana i ngu na Awiewie Casi n wura i mi ngu." ²⁰ Ama, na Petoro ase i ka, "Woro, u ni u njwaa kere ka ngbeen, dama a sunsun ka a koro fa njwaa to Nyeme aceeri n wo. ²¹ U saa wo ma juma n nu fieo, dama u sunsunni ti ma kpa Nyeme do. ²² Kaaki u wo fa ko u satie n bo a bita i n su, na a sere Nyeme, adena nyini sunsunni tie n bo i wo u ahore su ni, i fa ce u. ²³ Dama na ngu ka u ahorembaa yo wi agaya, na u satie akunma u." ²⁴ Do na Simon ase Petoro ni Yohane ka, "Jande, am sere Mibie n ma m, adena ma ahin sam kere bo am ajojo i n be ba tu m."

²⁵ Petoro ni Yohane diiri daani n na bu kaanri Mibie n labari kpa n jore kereeri mine wieeri ni, na ba kpie bu nyi ako Yerusalem mie kpiri n nu. Bu wo ko su ni, na ba kan labari kpa n Samariya mie aheme aheme dongu su.

Filipu ni Itiyopiya sono n jore ni

²⁶ Na Micera n mereke aba ase Filipu ka, "Yasu na a fa wie atoro u saa bie su dɛɛ atin n bo i fa Yerusalem mie kpiri n nu fa ko Gaza mie kpiri n nu ni." I ti atin bo i fa boro kpantain n nu wo. ²⁷ Na Filipu ayasu, na wo ko, i wo ko su n na wo ko atu Itiyopiya sono bo i fite Itiyopiya asien su, i la jinaabiri bambaka, yiri nie Itiyopiya feme bara n nenge kere su a. Wo ko asu Nyeme Yerusalem ²⁸ sukpie i nyi ko awuru, i tana i kponggo toroku nu wo, na i sukan Nyeme noanie kanfo Esaya dɛɛ kadasi ni. ²⁹ Na Awiewie Casi n ase Filipu ka, "Cin dodo kponggo toroku n na a su i su." ³⁰ Na wo njmati ako ati ka i sukan Nyeme noanie kanfo Esaya dɛɛ kadasi ni. Na wo bisa sono n ka, "A ti kadasi n bo a sukan i n bu?" ³¹ Na sono n abo i nu ka, "M yo se ti i bu a, bo ma ka sono akan i bu akere m?" Na wo se Filipu ka i wura toroku n nu ba tana i bi. ³² Noanie n bo i wo i kan su n la bo ba kere i ka,

"Yiri ti ka boe bo bu sufa i ko kpie i kom wo,
i kaaki ti ka bombaa bo bu sukpiekpie i ndore,
na i sun ma,
so ye wo se ma jore be a.

³³ Bu yo faari i wuraari joredifom saa nu wo,

na ba kpɛ kɔrɛ asɔ i, na ba wura i nyinse.

Be wo má bere bo i bá koro jɔjɔ fa kɔ i busu nufɔm dɔ,
dama bu yo yiiri i ɲɔɔ durunya n nu fɛn.”

³⁴ Na Itiyopiya sɔnɔ n abisa Filipu ka, “Jande, m koro ka a se m, Nyeme nɔanie kanfɔ n yo jɔjɔ ahin jɔrɛ n ni ɲma a? I jɔjɔ niiri i ɲu wɔ, nzen be a?” ³⁵ Dɔ na Filipu abo i bu ni nyini Nyeme Jɔrɛ Kadasi n bo yiri sɔnɔ n sukan i ni, na wɔ kan Yesu labari kpa n jɔrɛ n akere i. ³⁶ Bu wo kɔ su ni, na ba kɔ aju awɔrɛ be nu, na ba ɲu nzue, na sɔnɔ n ase i ka, “Niɛ, nzue yaa e, ye nzu kanda ka a koro biɛ má m Nyeme nzue a?” [³⁷ Na Filipu abo i nu ka, “Nzen a yoori Yesu Kristo yarada ni u ahorembaa kere, m koro biɛ u.” Na sɔnɔ n ase i ka, “Ma yo yarada ka Yesu Kristo ti Nyeme Wa n a.”] ³⁸ Na wɔ ma toroku n ajina, na bu kere ajura awura nzue n nu, na Filipu abie i Nyeme nzue ni. ³⁹ Na ba fite nzue n nu, bu fite wieeri ni, na Mibiɛ n Awiewiɛ n akaba akpara Filipu akɔ, sɔnɔ n aɲu má i kun, na wɔ kɔ awuru ni ahorejo. ⁴⁰ Na Filipu aɲu ka i wo miɛ kpiri n bo bu fere i ka Azotusi n nu, na wɔ yasu dɔ sukɔ, na wɔ kan labari kpa n akere minem miɛ kere bo i siinri su ni, haari na wɔ kɔ aju Sizariya miɛ kpiri n nu.

9

Kabo Sɔɔlu wo kaakiiri barasu ni

¹⁻² Nyini sanɲa n kere ni, na Sɔɔlu suboro i nyi se kabo i yo na i kere Yesu susufɔm n wuwuruwa haari i bá kun bu. Na wɔ koro ka i kɔ Damasiko miɛ kpiri n nu, na i kɔ tara nbaram ni nbiesɔm bo bu su Yesu atin su ni, na i wura bu jɔrɔkɔ, na i fa bu ba Yerusalem miɛ kpiri n nu. Nyini dɛɛ ti, na wɔ kɔ Nyeme sayoowa dɔɲguyɔfɔm kere kpɛn n dɔ, akɔ ade kadasi bo i koro la atin wura Yudafɔm tientienbunɔɔ sɔɔm n nu na i tara bu. ³ Na wɔ de atin akɔ, i kɔ sudodo Damasiko, na sin akaba afite aɲgoro ata abara ayɛ i. ⁴ Na wɔ kpaasi haari asiɲgu, na wɔ ti akonvi be ɲga, i ɲa, “Sɔɔlu, Sɔɔlu e, nzu ti ye a kere m wuwuruwa sɔ a?” ⁵ Na wɔ bisa ka, “M Mibiɛ, wɔrɔ ɲma a?” Na wɔ bo i nu ka, “Mini Yesu, mini ye a kere m wuwuruwa n a. ⁶ Ama, yasu jina na a wura miɛ n kunnu na m má sɔnɔ be kere u deke bo wɔ yo daka ka a yo ni.” ⁷ Na minem n bo bu su Sɔɔlu su n aka ajina surum, ba koro ase má jɔrɛ be, bu tiiri akonvi ni ɲga a, ama, ba ɲu má sɔnɔ be. ⁸ Na Sɔɔlu ayasu ajina, na wɔ teke i nyumbaa, ama, wɔ ɲu má asi. Nyini ti, na ba so i saa nu, na ba cin i awura Damasiko miɛ n kunnu. ⁹ I woori dɔ, i lesan bo wɔ nya koro ɲu má asi, nyini sanɲa n gusu, i di má, i nu má.

¹⁰ Yesu susufɔ n kun be woori Damasiko miɛ kpiri n nu dɔ, bu fere i ka Ananiyasi. Na Mibiɛ ni aba i dɔ ka alele nu. Na wɔ jɔjɔ i dɔ ka, “Ananiyasi.” Na wɔ bo i nu ka, “M Mibiɛ, mini yaa.” ¹¹ Na Mibiɛ n ase i ka, “Yasu, fa atin n bo bu fere i ka Atingbere Tengeewa n su, na a kɔ sɔnɔ n bo bu fere i ka Yudasi n dika, na a bisa ka a koro sɔnɔ be bo bu fere i ka Sɔɔlu ni, na i fite miɛ kpiri n bo bu fere i ka Tarasu n wɔ. Yiri Sɔɔlu n wo dɔ wo nyemesere su, ¹² wɔ ɲu sɔnɔ be ka alele nu, bu fere i ka Ananiyasi, wo wura i dɔ afa i saa anana i ɲu ka i kaaki ɲu asi bekun.” ¹³ Na Ananiyasi abo i nu ka, “M Mibiɛ, mine dɔɲgu akan nyini sɔnɔ n jɔrɛ akere m, kabo i kere u minem ni wuwuruwa Yerusalem miɛ kpiri n nu barasu. ¹⁴ Ye wo de yiko afite Nyeme sayoowa dɔɲguyɔfɔm nkpienkpiɛnm dɔ, aba Damasiko fɛn, na i ba tara minem bo bu su u n kere.” ¹⁵ Ama, na Mibiɛ n ase i ka, “Kɔ, dama mini ye ma yi i ka i yo m juma a, na i kɔ bo m duma kere

minem bo bu ti má Yudafom ni, ni bu nfemem, ni Yisarelifom, adena bu si m. ¹⁶ Na m kere i wahara n kere bo wo yo daka ka i di i, mini dee ti ni.” ¹⁷ Nyini ti, na Ananiyasi ako Yudasi dika, na wo wura Soolu do, na wo fa i saa anana i nu, na wo se i ka, “M niwa Soolu, ya Mibie ni sunmaari m u do a, yiri Yesu n ye i yiiri i nu kereeri u sannga bo a wo atin n nu suba n a. Yiri sunmaari m ka m ba ma a nu asi bekun, na Awiewie Casi n wura u nu a.” ¹⁸ Kpenga na deke be afite Soolu nyumbaa n nu ato, i ti ka jombaa bui wo. Na wo kaaki anu asi bekun. Na wo yasu ajina, na Ananiyasi abie i Nyeme nzue, ¹⁹ na wo di diire, na wo nya fannga bekun.

Kabo Soolu kaanri Nyeme jore Damasiko mie kpiri n nu barasu ni

Na Soolu awo Yesu susufom n do lennyo Damasiko mie kpiri n nu. ²⁰ Na wo kaba sukan Nyeme jore Yudafom tientienbunoo soom nu, ka Yesu ti Nyeme Wa n a. ²¹ Na jore n amie minem kere bo bu tiiri ka i sukan Nyeme jore ni, na ba bisa bu nuju nu ka, “Má sono n bo i wo Yerusalem mie kpiri n nu kun minem bo bu su Yesu su n lee? Ye kisa wo ba fen ka i ba tara minem wura bu joroko, fa bu kpie bu nyi ko ma Nyeme sayoowa donnguyoyo nkpienkpienm ni, má so?” ²² Ama, na Soolu anya fannga abuka su, na wo kan akunma Yudafom bo bu wo Damasiko n nu, na wo kan ateke bu nyi na wo ma ba si ka Yesu ti Kristo n a, Tiidefo n bo Nyeme ase ka i sunma i ni.

²³ Na wo yo lennyo, na Yudafom n atien bu nwo afa sesesu kabo bu yo na bu kun Soolu, ²⁴ ama, na wo ti kabo ba sesesu ka bu kun i ni. Na ba nminda i mie ni anom n nu, wiesu ni kongue, ka nzen i ba sufite na bu kun i. ²⁵ Ama, na ceen n be kongue, na Soolu susufom afa i awura kandie nu, na ba fa i accondi mie n kobe tukoro nu ase.

Kabo Soolu ko juuri Yerusalem mie kpiri n nu ni

²⁶ Sannga bo Soolu ko juuri Yerusalem mie kpiri n nu ni, na wo koro ka i fa i nu bo Yesu susufom n su, na i ni bere yo kun, na sere ati bu, dama ba yo má yarada ka i ti Yesu susufom n be wo. ²⁷ Do na Banabasi afa i ako Yesu jaramasam n do. Na yiri Banabasi akan akere bu kabo Soolu wo atin n nu suko Damasiko mie kpiri n nu, na i nuuri Mibie ni, ni kabo Mibie n jorori i do barasu ni, ni kabo Soolu kaanri Nyeme jore Yesu duma nu Damasiko, ni ahoresi ni. ²⁸ Banabasi seeri so ni, na ba soro su, na Soolu awo bu do Yerusalem, na i sujengbe sukan Nyeme jore Yesu duma nu, ni ahoresi. ²⁹ Na i ni Yudafom bo bu jorj Giriki anie ni abo anzama haari na ba se akuruwa ni bu benju. Na ba koro ka bu kun i. ³⁰ Sannga bo yaradayofom n tiiri ahin jore n so ni, na ba fa Soolu ako aju Sizariya mie kpiri n nu, na ba ma wo ko Tarasu mie kpiri n nu.

³¹ Na Kristo jama n anya fannga abuka su, na bu susoro Mibie n nahore su, na bu suwo ni Awiewie Casi n dee ahoresi nu, na bu sunya minem subuka su.

Kabo Petoro yoori abon sam ni

³² Na Petoro ajengbe ka i bara ye awore n kere, na ceen n be so o, na wo ko ka i ko nie Nyeme minem n bo bu wo Luda dee mie kpiri n nu n busu. ³³ Do na wo ko anu sono be, bu fere i ka Aniyasi, i saam ni i jaam kere awu, i da soro o, i afo mocue lee bo i koro yasu má. ³⁴ Na Petoro ase i ka, “Aniyasi, Yesu Kristo ama u laifie. Yasu na a nyanya u dasu ni.” Kpenga na wo kaba ayasu. ³⁵ Minem kere bo bu wo Luda mie kpiri n nu, ni bo bu

wo Saroni awɔre n nu n kere ŋuuri i so ni, na ba kaaki bu wo na ba fa bu ŋu ama Mibiɛ ni.

³⁶ Bara be yo woori miɛ kpiri be bo bu fere i ka Jopa n nu, bu fere i ka Tabita, i ti Yesu susufɔ ɔ, bu fere i duma Giriki anie nu ka Dɔkasi, i bu la ka aja. I yo sakpa wɔ sanɔa kere, na i si yaarifɔm aɔunfɔ. ³⁷ Ama, na wo ba ada tukpaki na wo wu, na ba bie i nzue, na ba fa i ada aɔgoro soɔ nu. ³⁸ Jopa gusu waari ma ni Luda, na sanɔa bo Yesu susufɔm bo bu wo Jopa n tiiri ka Petoro wo Luda ni, na ba sunma mine nnyɔ i do ka i yo anie na i bra ndende. ³⁹ Nyini ti, na Petoro ayasu asu bu su na bu kere ako. Sanɔa bo i ko juuri ni, na ba fa i afun ako aɔgoro soɔ n nu, na nkunafɔm kere atien bu noɔ abara aye i, na bu susun, na ba fa tanleem ni tani barasu barasu bo Dɔkasi la ŋɔɔ na i kpa maari bu n akere yiri Petoro. ⁴⁰ Na Petoro afɔn bu kere afite soɔ n nu, na wo kutu i naɔgoroma su, na wo sere Nyeme, na wo kaaki i nyunu awɔ fuin ni, na wo se i ka, "Tabita, yasu." Sanɔa bo i tekeeri i nyumbaa ni, na wo ŋu Petoro, na wo yasu atana. ⁴¹ Na Petoro aso i saa nu abuka i, na wo yasu ajina, na wo fere Nyeme minem n ni nkunafɔm ni kere, na wo fa i akere bu ka wo tenje. ⁴² Na nyini labari ni abara aye Jopa miɛ n kere nu, na mine beberebe ayo Mibiɛ n yarada. ⁴³ Na Petoro awo Jopa lennyɔ, i yo woori jereke be dika a, bu fere i ka Simon.

10

Petoro ni Koneliyo dɛɛ jɔre

¹ Soɔɔ be yo woori Sizariya miɛ kpiri n nu, bu fere i ka Koneliyo, i ti Romafo sojam n kpien wo, i nie soja mbaa yaa su a. Bu fere nyini soja jama mbaa n ka Itali sojam. ² Koneliyo ti soɔɔ bo i su Nyeme atin su wo, i ni i dikafɔm kere, na bu soro Nyeme. Na i suyo sakpa ma Yudafɔm bo bu ti yaarifɔm ni, na i susere Nyeme sanɔa kere. ³ Na cɛɛn n be wiesu kerefi nsan sanɔa, na wo kaba aɔu Nyeme mereke be, na mereke n aba ase i ka, "Koneliyo." ⁴ Na wo nie i gbirim, na sere ati i, na wo bisa i ka, "M Mibiɛ, nzu a?" Na mereke n abo i nu ka, "Nyeme ade u sere, wo ŋu sakpa n bo a yo ama yaarifɔm ni, i wara koro fi ma nyini sam kere. ⁵ To, kisa, sunma minem na bu ko Jopa miɛ kpiri n nu na bu ko fere soɔ bo bu fere i ka Simon Petoro ni. ⁶ I wo jereke be dika a, bu fere i gusu ka Simon, i dika n wo fa dodo tieku n wo." ⁷ Mereke n jɔjɔri i do wieeri ni, na wo ko, na Koneliyo afere i ngbefenem nnyɔ, ni soja kun be bo i su Nyeme atin su na i wo i dika ni. ⁸ Na wo kan jɔre n kere bo mereke n seeri i ni akere bu, na wo sunma bu Jopa miɛ kpiri n nu.

⁹ Na alecin ngarama, na ba de atin na bu ko Jopa, bu ko sudodo do fa ko wie kekete sanɔa, na Petoro gusu ayasu afun soɔ su ka i sere Nyeme. ¹⁰ Na ahɔɛ ati i, na wo koro deke be i di. Sanɔa bo bu wo diire n yo su ni, na deke be aba i do ka alele nu dɛɛ su. ¹¹ Na wo ŋu ka aɔgoro n ateke, na wo ŋu deke be i ti ka tani bambaka wo, ba cici i bue nna n kere, i sucɔndi ba asiɛnggu. ¹² Ajaanna barasu kere, ni cinbukunnusufɔm barasu kere, ni lanɔketefɔm barasu kere ka bu wo nu. ¹³ Na wo ti akonvi be nga, i ŋa, "Petoro, yasu na a kun di." ¹⁴ Ama, na Petoro ase i ka, "M Mibiɛ, ai. M nya di ma deke bo i ti ciire na i la fin." ¹⁵ Na akonvi n akaaki ase i bekun ka, "Deke kere bo Nyeme ayo i casi, ma a se ka i ti fin." ¹⁶ Deke n yoori so ko juuri kun kun kpe nsan a, na wo kaba afun ako aɔgoro.

17 Saŋga n bo Petoro subirisi fa kɔ deke n bo wɔ ŋu i n su ni, nyini saŋga, minem bo Koneliyo sunmaari bu ni, abisa asi Simon dika, na ba ka ajina awuru n aɔ nu. 18 Na ba fere sɔnɔ be, abisa i ka, Simon Petoro wo dɔ ɔ? 19 Petoro toko wo sunsun su, fa kɔ deke bo i baari i dɔ ka alele nu n bu. Dɔ na Awiewie Casi n ase i ka, "Ti fen. Mine nsan nbem wo fen sunienie u busu. 20 Nyini ti, yasu na a jura, na u ni bere kɔ, má a yo sika, dama mini sunmaari bu a." 21 Na Petoro ajura akɔ minem n dɔ, na wɔ se bu ka, "Mini ye am nienie m n a. Am natiiri bu la ka se wɔ?" 22 Na ba bɔ i nu ka, "Sojam kpɛn Koneliyo sunmaari ya u dɔ a. I ti sɔnɔ kpa a, na i soro Nyeme, na Yudafoɔm kere bu i agaya. Nyeme mereke be seeri i ka i fere u, na a ba i dika na a ba kan jɔre bo a la i kere i a." 23 Nyini ti, na Petoro ade minem n awura, na ba da i dɔ.

Alecín ngarama, na Petoro ayasu, na i ni minem n akɔ, bu sukɔ ni, na yaradayofom nbem bo bu wo Jopa n gusu asu i su akɔ. 24 Na i alecín fɔfɔre, na ba ju Sizariya, bu kɔ ŋu ka Koneliyo atien i lamɔsim, ni i danfo kɔm nɔɔ suɔminda yiri Petoro. 25 Saŋga bo Petoro kɔ ŋa i wura awuru n nu ni, na Koneliyo akpa i atin akutu i jaa bu haari asienɔgu, na wɔ su i. 26 Ama, na Petoro aye i su ajina, na wɔ se i ka, "Mini ni m tii mmɔɔ, ti adamande wɔ." 27 Petoro ni Koneliyo bitaari anzama sɔ ɔ haari bu kɔ wuraari awuru n nu, dɔ na wɔ ŋu ka mine beberebe atien bu nɔɔ. 28 Na wɔ se bu ka, "Ambere mmɔɔ ni am tii si ka, i ti ciire wɔ ka yere Yudafoɔm fa ya ŋu saŋga ni daanfie barasu be nu, wara ya wura bu dika. Ama, Nyeme akere m ka má m sinndi sɔnɔ be ka i woowa ti fin. 29 Nyini ti, ye a sunma fereeri m ye ma kete má ye ma ba n a. M koro ka m bisa u wɔ, nzu ti ye a sunma fereeri m a?"

30 Na Koneliyo ase i ka, "I nyuma lenna lee, ka ahin saŋga n sɔ, fa kɔ wiesu kerefi nsan, m wo m dika n nu wo nyemesere su, na sɔnɔ be akaba aba ajina m nyunu, i wura sutura fofoe papasi, 31 na wɔ se m ka, 'Koneliyo, Nyeme ade u sere, ye wɔ tenge u sakpa bo a yo ama yaarifom n su. 32 Nyini ti, sunma na bu kɔ Jopa, na bu kɔ fere Simon Petoro ni. I wo jereke be dika a, bu fere i gusu ka Simon, i dika n wo dodo tieku n wɔ.' 33 Nyini ti, ye m kaba sunmaari ka bu fere u n a, ye wɔro gusu a yo sakpa ye a ba. Kisa, ya kere gusu atien ya nɔɔ fen Nyeme nyunu, na ya ti deke n kere bo Mibie n ama u nɔɔ ka a fa ma ya ni."

Kabo Petoro kaanri Nyeme jɔre n Koneliyo dika ni

34 Na Petoro anya ase ka, "Kisa, ma si nahore su ka adamande kere ti kun wɔ Nyeme dɔ, i tambu má nu. 35 Sɔnɔ kere bo i soro Nyeme na i yo sa bo i kɔ atin su i dɔ, i mi koro i ti nzu daanfie sɔnɔ, Nyeme de i wɔ. 36 Am si labari n bo Nyeme fa maari Yisarelifom, nyini labari kpa n kere ka minem nya tanalaifie Yesu Kristo dee ti, yiri ti sɔnɔ kere Mibie a. 37 Am kere si sa bo i boori i bu Galili dee awore n nu, saŋga bo Yohane kaanri Nyeme nzue bie n jɔre ni, haari na wɔ bara aye Yudiya dee awore n kere nu. 38 Am si Yesu Nazaretifo n jɔre ni, kabo Nyeme faari i Awiewie Casi n ni yiko n wuraari i ŋu ni, ni kabo i nati bara yeeri deke kere suyo sakpa sutuntun minem kere bo Sitana mie bu n na bu nya laifie, dama Nyeme woori i dɔ a. 39 Yere, ya ŋuuri deke n kere bo i yoori bu Yudafoɔm dee asien su, ni Yerusalem mie kpiri n nu ni. Na ba kpama i baka jaanu n su, na wɔ wu. 40 Ama, i lesan ceen, na Nyeme atenge i afite i yiwee n nu, na Nyeme ama minem anu i. 41 Má sɔnɔ kere ŋuuri i a, ama, yere bo Nyeme du mɔ yiiri ya ka ya di i daani ni, yere ŋuuri i a, na ya ni yiri asaŋga adi, na ya

nu, sanɔa bo i tengeeri ni. ⁴² Na wɔ ma ya nɔɔ ka ya kɔ kan labari kpa n kere minem na ya di daani ka, yiri ye Nyeme ayi i ka i bá di ngɔɔfɔm, ni bo ba wu n kere jɔre a. ⁴³ Nyeme nɔanié kanfɔm kere yo jɔjɔri Yesu jɔre, bu ɔa, ‘Sɔnɔ kere bo i yoori i yarada, Nyeme fá i mi satie bo wɔ yo i fa ce i, Yesu dɛɛ duma n nu.’ ”

Kabo Awiewie Casi n wurari minem bo bu ti má Yudaɔm n ɔu ni

⁴⁴ Sanɔa bo Petoro toko jina wo jɔjɔ su ni, na Awiewie Casi n aba awura minem kere bo bu jina suti labari n ɔu. ⁴⁵ Na Yudaɔm bo bu ti yaradayoɔm na bu suuri Petoro su fiteeri Jopa mie kpiri n nu baari n ayo alekutura, kabo Nyeme afa i Awiewie Casi n awura minem n bo bu ti má Yudaɔm mmɔɔ ɔu ni. ⁴⁶ Na bere Yudaɔm ni, ati ka minem n sujɔjɔ anie barasu barasu sukansi Nyeme. Na Petoro ase ka, ⁴⁷ “Nyeme afa i Awiewie Casi n awura ahin minem n ɔu, kabo i fa wurari ya ɔu ni. Ye ɔma koro kete ka má ya bie bu Nyeme nzue a?” ⁴⁸ Nyini ti, na Petoro ama nɔɔ ka bu bie bu Nyeme nzue, Yesu Kristo duma n nu. Na ba sere i ka i wo bu dɔ lennyɔ.

11

Kabo Petoro kaanri i sa n bu kereeri Kristo Jama n Yerusalem ni

¹ Na Yesu jaramasam ni, ni yaradayoɔm n kere bo bu wo Yudiya awɔre n nu n ati ka, minem bo bu ti má Yudaɔm n gusu ade Nyeme nɔanié n ayo i yarada. ² Nyini ti, sanɔa bo Petoro kɔ Yerusalem mie kpiri n nu ni, na Yudaɔm yaradayoɔm nbem ajaraki i. ³ Bu ɔa, “Nzu ti ye a kɔ minem bo bu wurari má kenkenɛ n dika ye u ni bere kɔ sanɔa di diire a?” ⁴ Dɔ na Petoro abo i bu, na wɔ kan kabo jɔre n kere boori i bu kun kun n akere bu. ⁵ I ɔa, “M wo Jopa mie kpiri n nu, wo nyemesere su ni, na ma ɔu deke be, i yo m ka alele dɛɛ su wɔ. M ɔuuri deke be, i ti ka tani bambaka wɔ, ba cici i bue nna n kere, i succɔndi fite aɔgoro n nu suba asiengɔ, na wo ba ajina m bi. ⁶ Na ma nie i nu nyunyumi, na ma ɔu ajaannam barasu kere, ni cinbukunnusufɔm barasu kere, ni lanɔkpetefɔm barasu kere ka bu wo nu. ⁷ Na ma ti akonvi be ɔga, i ɔa, ‘Petoro, yasu na a kun di.’ ⁸ Ama, na ma se i ka, ‘M Mibie, ai. M nya di má deke bo i ti ciire na i la fin.’ ⁹ Na ma kaaki ati akonvi ni ɔga beku, i fite aɔgoro wɔ, i ɔa, ‘Deke kere bo Nyeme ayo i casi, má a se ka i ti fin.’ ¹⁰ Deke n yoori sɔ kɔ juuri kun kun kpe nsan a, na wɔ kaaki afun ako aɔgoro. ¹¹ Nyini sanɔa n nu, na mine nsanm n bo bu sunmaari bu m dɔ n afite Sizariya mie kpiri n nu aba aju awuru n bo m wo nu ni. ¹² Na Nyeme Awiewie Casi n ase m ka m yasu na m su bu su kɔ, má m yo sika. Na ma su bu su, na ya kere ako. Na ahin yaradayoɔm nsenm n gusu asunma m afite Jopa, na ya kere ako Sizariya, na ya kɔ awura Koneliyo dika. ¹³ Na wɔ se ya kabo i ɔuuri Nyeme mereke i dika barasu ni, ni kabo mereke n ase i ka i sunma na bu kɔ Jopa, na bu kɔ fere sɔnɔ n bo bu fere i ka Simon Petoro ni, ¹⁴ na i bá kan jɔre be kere u ni u dikafɔm kere na am nya tiide. ¹⁵ Na ma bo i bu ka m jɔjɔ. Sanɔa bo m wo jɔjɔ su ni, na Awiewie Casi n ajura awura bu ɔu, kabo i yo ba wurari ya ɔu bumboori ni. ¹⁶ Na ma tenge su kabo Mibie n yo seeri ni. I ɔa, ‘Yohane yo faari nzue bieeri am a, ama, mini fá Awiewie Casi n ba wurari am ɔu a.’ ¹⁷ I ti nahɔre wɔ ka Nyeme faari i Awiewie Casi n wurari yere Yudaɔm bo ya yo ya Mibie Yesu Kristo yarada n ɔu, ye wɔ fa awura bo bu ti má Yudaɔm gusu ɔu. Mini la ɔma bo m koro kanda Nyeme ka

má i yo sa bo i koro ka i yo i a?" ¹⁸ Saŋga bo bere Yudafoṃ tiiri so ni, ba se má jore be kun, na ba kansa Nyeme, bu ŋa, "Nyeme ama minem bo bu ti má Yudafoṃ n atin ka bere gusu kaaki bu wo na bu nya ŋoɔ."

Kristo jama n bo i wo Antiyoki n jore

¹⁹ Fite saŋga n bo bu kuunri Satefano n dee sin, na ba kere yaradayofoṃ wuwuruwa, nyini ti, na ba sandi abara aye deke kere, na nbem ako Fonisiya awore n nu, ni Sipurusi asien n su, ni Antiyoki mie kpiri n nu, na bu ko sukan Nyeme noanie n sukere Yudafoṃ ŋgumi. ²⁰ Ama, bu nbem wo nu, bu fite Sipurusi, na nbem gusu fite Sirene mie kpiri n nu, na ba ko Antiyoki, na bu sukan ya Mibie Yesu labari kpa n jore sukere minem bo bu ti má Yudafoṃ ni. ²¹ Na Mibie n yiko awo bu do nahore su, na mine beberebe ayo yarada, na ba kaaki bu wo, na ba su Mibie n dee atin n su.

²² Nyeme minem bo bu wo Yerusalem mie kpiri n nu n tiiri nyini labari so ni, na ba sunma Banabasi Antiyoki do. ²³ Saŋga bo i juuri na i juuri sakpa bo Nyeme ayo ama minem so ni, na i ahore ajo, na wo tu bu fo ka bu ma bu nyunu boro yarada n bo bu bita i fa ko Mibie n dee atin n su ni, na bu su i su ni bu ahorembaa kun. ²⁴ Banabasi tiiri sono kpa a, na Awiewie Casi n awo i do, na i la yarada agaya. Na mine beberebe aba ayo Mibie n yarada. ²⁵ Na Banabasi ako Tarasu mie kpiri n nu ka i ko nienie Soolu. ²⁶ Saŋga bo Banabasi ko juuri Soolu ni, na wo fa i na ba ko Antiyoki, na bere mine nnyo n kere ako awo do afo kun, na ba tien Kristo jama n noo, na ba kere mine beberebe. Antiyoki do ye bu du mo fereeri yaradayofoṃ n ka Kristofoṃ a.

²⁷ Nyini saŋga n nu, na Nyeme noanie kanfo nbem afite Yerusalem aba Antiyoki do. ²⁸ Bu fere bu nu kun ka Agabusi, do na Awiewie Casi n ama i yiko, na wo yasu ajina ajojo ka, ahoe bambaka be ba to durunya n kere nu. Nyini ahoe n ba tooi saŋga bo Romafom feme kpiri bo bu fere i ka Kalodisi n diiri n femeya n a. ²⁹ Na Kristo susufom ni ayo anookun ka bu kun kun n kere yiya ŋwaa kabo bu faŋga nyaari ti barasu, na bu fa ko buka bu beŋgu yaradayofoṃ bo bu wo Yudiya awore n nu ni. ³⁰ Na ba yiya ŋwaa ni, na ba fa ŋwaa n asunma Banabasi ni Soolu ka bu fa ko ma Kristo jama nkpienkpienm ni.

12

Kabo bu kereeri Kristo jama n wuwuruwa barasu ni

¹ Fa ko nyini saŋga n nu, na Feme Herode abo i bu sukere Kristo jama mine nbem wuwuruwa. ² Na wo ma ba fa takobe akun Yohane goɔ Yakobo. ³ I yoori saŋga bo Yudafoṃ sudi bu Butara ceenkpiri n wo. ⁴ Bu taraari Petoro wuraari dansaraka nu ni, na ba fa i awura sojam buru ni nsen saa nu ka bu nie i dika. Na bere gusu akpaaki nu ka mine nna nie i dika ko ju saŋga su, na nyingam nya de. Na Feme Herode asese su ka bu diiri Butara ceenkpiri n siinri, i fa Petoro jina jama n kere nyunu wo, na i di i jore. ⁵ Nyini ti, na wo ka dansaraka n nu, na Kristo jama n asere Nyeme ni anyumboro ama i.

Kabo Nyeme mereke n yiiri Petoro fiteeri dansaraka n nu ni

⁶ Nyini ceen n koŋgue n bo i alecin na Feme Herode má bu yi Petoro fite na bu di i jore ni, i da sojam nnyo afien wo. Na ba wura i joroko aminda bu i bue nnyo n kere, na nbem gusu kaaki jina dansaraka ano n nu ŋminda.

7 Kpenḡa na Nyeme mereke be aba ajina dansaraka n nu, na so n ata wein. Na mereke n abo Petoro gbengben, na wo tenḡe i, na wo se i ka, "Yasu ndende." Na jorok n bo i wo Petoro saa n afite ato. 8 Na mereke n ase i ka, "Bo u dambara ni, na a fa u gbagbaa n wura." Na Petoro ayo so, na wo kaaki ase i ka, "Fa u tanlee n wura, na a su m su." 9 Na Petoro asu i su afite dansaraka so n nu, wo si ma ka sa n bo mereke n suyo i n ti nahore wo, i sunsun ka i yo i ka alele dee su wo. 10 Na ba ko asin sojam ciciri su dee n nu, na ba ko asin nnyo su dee n gusu nu, na ba ko aju bulaari ano n bo bu teke i ka na bu sin ko mie n kunnu ni. Na ano n ni i tii ateke, na ba fite. Bu toori atingbere n nu koori mo kaan, na mereke n akaba ayaki Petoro. 11 Do na Petoro nyunu akoro, na wo se ka, "Kisa, ma si ka i ti nahore wo, ka Micera n ye wo sunma i mereke n ka i yi m fite Feme Herode saa nu, ni deke n kere bo Yudafoḡ sunsun ka bu yo m ni."

12 I faari nyini sa n kere nu so ni, na wo ko Mariya dika, i wa la Yohane n bo bu kaaki fere i Marako ni, nyini sanḡa, jama beberebe atien bu noo wo nyemesere su. 13 Na Petoro abobo dasin ano ni, na afani be, bu fere i ka Roda, na wo ba ka i ba nie soḡo n bo i bobo ano ni. 14 Na wo si akonvi n ka Petoro lee, i ahore ajo agaya n dee ti, wo teke ma ano ni, na wo nmati akpie i nyi, na wo ko ase minem bo bu wo awuru n nu n ka Petoro jina dasin. 15 Na ba se i ka, "A bo fie wo." Ama, na wo kaaki ajojo ni anyumbo ro ka i ti nahore wo. Do na ba se ka, "Kisa, i mereke a."

16 Nyini sanḡa n kere Petoro toko jina ano n nu wo bobo su. Kasin, na ba ba ateke ano ni, na sanḡa bo bu nuuri ka yiri ni, na ba yo alekutura. 17 Na Petoro afa i saa ayo bu ka bu yaki nanmie. Na wo kan akere bu kabo Mibie n yiiri i fiteeri dansaraka so n nu barasu ni. Na wo se bu ka, "Am ko kan ahin jore n kere Yakobo ni yaradayofo nyingam n kere." Na wo fite bu bi bere ako deke be.

18 Ale ba ciinri ni, na jore n amie sojam ni, ba si ma kabo bu yo. Na ba se ka, "Ye nzu ayo Petoro a?" 19 Na Feme Herode ama noo ka bu nienie Petoro busu, ama, ba nu ma i. Nyini ti, na wo bisa sojam bu jore ni, na wo ma noo ka bu kun bu. Nyini sin, na Feme Herode afite Yudiya aware n nu, na wo ko awo Sizariya mie kpiri n nu fa ko sanḡa su.

Kabo Feme Herode wuuri barasu ni

20 Na Feme Herode afa yaa agaya Tiro ni Sidon mie n nufom nu, nyini ti, na ba fa seseḡu, na ba ko ka bu nu i. Bu du mo koori soḡo be do ka, bu fere i ka Blasitusi, na bu ni i dee ayo kun ka. Blasitusi ti Feme Herode gisan n niefo kpian wo. Na wo nya fa bu ako Feme Herode do, na ba ko asere ka i ma bu ni yiri nya tanalaifie. Deke bo i ti na bu yoori so n la ka, dama bu diire kere fite yiri feme n dee asien n su wo. 21 Ceen n bo bu kpamaari i ba juuri ni, na Feme Herode awura i femeya sutura, na wo tana i femeya bie n su, na wo jojo minem n do. 22 I jojo wieeri ni, na mine kere atien, bu na, "Ahin yiri, nyeme be ajojo a, ma adamande." 23 Kpenḡa na Micera n mereke akaba abo i aji, dama wo ma ma Nyeme jirima n dee ti. Na wo da tukpaki, na kakabam awura i, na wo wu.

24 Na Nyeme noanie n asandi abara aye deke n kere, na ba nya mine dongu abuka su. 25 Banabasi ni Soolu yoori bu juma n Yerusalem mie nu wieeri ni, na ba fa Yohane bo bu kaaki fere i ka Marako ni, na ba fite Yerusalem na ba kaaki ako Antiyoki mie kpiri n nu.

13

Kabo bu yiiri Soolu ni Banabasi sunmaari bu ni

¹ Kristo jama n bo i wo Antiyoki mie kpiri n nu ni, bu nu nbem ti Nyeme noanie kanfom wo, na nbem gusu ti kerefom. Bere la Banabasi, ni Simeyon bo bu kaaki fere i ka Nigeri ni, ni Lukiyosi bo i fite Sirene mie kpiri n nu ni, ni Manaye bo bu yo sang'a taari i ni Feme Herode, ni Soolu ni. ² Sang'a bo bu cici bu nco na bu wo Mibie n su su ni, na Awiewie Casi n ase bu ka, "Am yi Banabasi ni Soolu ma m, na bu yo juma n bo ma yi bu ka bu yo i ni." ³ Bu ciciiri bu nco, na bu sereeri Nyeme n wieeri ni, na ba fa bu saa anana bu nu, na ba ma bu atin na ba ko.

Kabo Banabasi ni Soolu koori Sipurusi ni

⁴ Na Awiewie Casi n asunma Banabasi ni Soolu na ba ko aju mie kpiri be su, bu fere i ka Selusiya, na ba fa lee bambaka do, na ba ko mie be bo i wo lui bambaka be su, bu fere nyini lui n ka Sipurusi n su. ⁵ Sang'a bo bu ko juuri lui n mie kpiri n bo bu fere i ka Salamisi n su ni, na ba kan Nyeme jore Yudafom tientienbunco soom nu. Na Yohane bo bu kaaki fere i ka Marako n awo bu do abuka bu juma. ⁶ Na ba fa bere asin ako aju lui bambaka n wie atoori dee bue ni, mie kpiri be su, bu fere i ka Pafosi. Na ba ko anu boboyayaf'o be do, bu fere i ka Baari Yesu, i ti Yudaf'o o, i yo i nu ka i ti Nyeme noanie kanfo o, ama, i ti ma i. ⁷ I yo wo lui bambaka n su gomina n do o, bu fere gomina n ka Segosi Poolu, i ti sifo o. Na wo fere Banabasi ni Soolu, dama i koroori ka i ti Nyeme noanie n wo. ⁸ Ama, boboyayaf'o ni, bu kaaki fere i duma Giriki anie nu ka Elamasi ni, na wo boro i nyi ka i kanda gomina n na ma i yo Yesu yarada. ⁹ Ama, na Nyeme Awiewie Casi n awura Soolu, bo bu kaaki fere i ka Poolu nu, na wo nie boboyayaf'o n ghirim, na wo se i ka, ¹⁰ "Woro, a ti Sitana dee wa a. A ti deke kere bo i ti kpa n kporfo o. Kore ni satieyo asunnu u nu. A ti Mibie n atin kpa n saakifo o. Ceen bono ye a yaki i a? ¹¹ Ti fen, Mibie ni bo u ji kisa, na a yo anyinsin fa ko sang'a su, na a nu ma wie ka i ta kun." Kpenga na i nyunu akaba asi biri, na i suturingi sunienie sono bo i kere i atin. ¹² Sang'a bo gomina n nuuri nyini n so ni, na i tiiri kabo bu kan Nyeme noanie ni, na wo yo i alekutura, nyini dee ti, na wo yo Mibie n yarada.

Kabo Poolu ni Banabasi koori Pisidiya dee Antiyoki mie n nu ni

¹³ Na Poolu ni i lamokom n afa lee bambaka afite Pafosi dee mie kpiri n nu ako aju mie kpiri n bo bu fere i ka Perega na i wo Pamfiliya awore n nu ni. Na Yohane bo bu kaaki fere i ka Marako n akpaaki ayaki bu, na wo kpie i nyi ako Yerusalem mie kpiri n nu. ¹⁴ Na ba fite Perega ako aju Antiyoki mie kpiri n bo i wo Pisidiya awore n nu ni. Na Numiyi ceen, na ba ko awura atana bu tientienbunco so n nu. ¹⁵ Sang'a bo bu kaanri Nyeme noanie kpamaawa kadasi n bo Moyisi kereeri i ni, ni Nyeme noanie kanfom dee kadasi n wieeri ni, na bu tientienbunco so ni nkpienkpienn n asunma ase Poolu ka, "Njam, nzen am la jore be bo am kan kere jama ni, na i ma bu ahoresi, am kan kere bu." ¹⁶ Do na Poolu ayasu ajina, na wo ye i saa su, na wo bo i bu na i joko, i na, "M lamoko Yudafom, ni ambere bo am ti ma Yudafom na am su Nyeme ni, am ti fen. ¹⁷ Yisarelifom Nyeme ni, yiri yo yiiri ya nam a, na wo ma ba tere abuka su, sang'a bo bu yo ti wofom Ijipiti asien su ni. Na Nyeme afa i dee yiko bambaka n na wo yi bu afite Ijipiti asien n su, ¹⁸ na wo mindi abita bu boro kpantain n nu ako aju

afɔ aburana. ¹⁹ Na wɔ butu daanfɛ barasu nso n bo bu wo Kanana asien n su ni, na wɔ fa bu asien n ama Yisarelifɔm ka bu fa yo bu tienɔgu dɛɛ. ²⁰ Ahin n kɛrɛ yoori sɔ kɔ juuri afɔ yaa nna ni afɔ aburunu wɔ. Nyini sin, na Nyɛmɛ ayi mɔfɔm ama bu haari fa kɔ ju sanɔa bo i yiiri n noaniɛ kanfɔ Samuweli maari bu ni. ²¹ Na ba ba ase Samuweli ka bu koro femɛ wɔ, na Nyɛmɛ ama Sɔɔlu bo i ti Kisi wa n ayo bu femɛ, i fite Benjamin n dɛɛ busu nu wɔ, na wɔ bita bu akɔ aju afɔ aburana. ²² Na Nyɛmɛ ayi Sɔɔlu femɛya n nu, na wɔ fa Femɛ Davidi bo i ti Jese wa n ajina i jinaabiri. Na Nyɛmɛ adi i nusu daani, i nɔ, 'Yiri Davidi, Jese wa n ti sɔnɔ bo m ahore atara i a, yiri yɔ m sa koroowa kɛrɛ a.' ²³ Yiri Femɛ Davidi dɛɛ busu nu ye Nyɛmɛ seeri ka Yisarelifɔm Tiidɛfɔ Yesu ni fite n a. ²⁴ Kana Yesu ba ba, Yohane du mɔ ba kaanri Nyɛmɛ jɔrɛ kereeri Yisarelifɔm wɔ, ka bu kaaki bu wo na i biɛ bu Nyɛmɛ nzue. ²⁵ Na sanɔa bo Yohane ba sukoro ka i wie i juma n ni, na wɔ se minem n ka, 'Am sunsun ka mini la nɔa a? Ai, má mini la sɔnɔ n bo am nɔmɔ i ka i bá n a. Ama, am ti fɛn. Yiri bo i wo m sin suba ni, m ti kaan mmɔɔ ni bo m dodo i.'

²⁶ M ninbaam, ambere bo am ti Abraham busu nufɔm ni, ni ambere bo am ti má Yudaɔfɔm na am su Nyɛmɛ ni, yere ye Nyɛmɛ ma ba fa ahin tiide labari n ama ya a. ²⁷ Dama Yerusalemɔm ni bu nkpienkpienm kɛrɛ asi má Nyɛmɛ noaniɛ kanfɔm dɛɛ kadasi n bu, haari ni bo bu kan i bu Nɔmɔyi cɛɛn n kɛrɛ mmɔɔ ni. Ba kaaki asi má kabo Yesu ti barasu, na ba ma ba kun i. Nyini ma Nyɛmɛ noaniɛ kanfɔm kadasi n ayo yiiwa a. ²⁸ Haari ni bo ba yo anɔ má deke n bo i ti na wɔ yo daka ka bu kun i ni, bu sereeri Gomina Pilato wɔ, ka i ma bu kun i. ²⁹ Na sanɔa bo bu yoori sa n kɛrɛ bo ba kɛrɛ i Nyɛmɛ Jɔrɛ Kadasi n nu fa kɔ i nusu jɔrɛ ni, na ba jura i baka jaanu n su, na ba fa i awura yabue buɛ fanɔkunma nu. ³⁰ Ama, na Nyɛmɛ atɛnɔge i yiwee n nu, ³¹ na wɔ yi i nɔ bo i la má nɔ akere minem kɛrɛ bo bu suuri i su fiteeri Galili awɔrɛ n nu kɔɔri Yerusalem ni. Bɛrɛ n bo bu nɔuri sam bo bu yoori ni, kisa bɛrɛ sudi i daani kere ye minem n a. ³² Nyini ti, ya ba ka ya kan labari kpa sam n bo Nyɛmɛ seeri ka i fa ma ya nam ni kere am a, ³³ ye i ma noaniɛ n ayo yiiwa ama yere bo ya ti bu busu nufɔm n a, wɔ tɛnɔge Yesu i yiwee n nu, kabo ba kɛrɛ i Kansɔ Jue kɛrɛwam n nu, i jue nnyɔ su ni. Nyɛmɛ nɔ,

'Wɔrɔ ti m Wa a,
nyuma, m káaki u Si.'

³⁴ Bekun, kabo i tɛnɔgeeri i yiwee n nu na i kpɔrɔ má fanɔkunma nu ni, Nyɛmɛ akaaki ase ka,

'M fá deke kpa n bo i ti casi na i la anyunuyi n ma u,
yiri ye m seeri ka m fa ma Femɛ Davidi n a.'

³⁵ Ba kaaki akere i Kansɔ Jue kɛrɛwam n awɔrɛ be nu, ka,
'A yáki má na u Amusuisufɔ Casi n wu kpɔrɔ.'

³⁶ Femɛ Davidi yo yoori Nyɛmɛ kun koroowa haari na wɔ ba awu, na ba se i deke bo bu seeri i nam ni, na i nɔniɛmbaa n akpɔrɔ fanɔkunma n nu.

³⁷ Ama, yiri n bo Nyɛmɛ tɛnɔgeeri i yiwee n nu ni, wɔ kpɔrɔ má. ³⁸ Nyini ti, m ninbaam, m koro ka am si ka yiri Yesu dɛɛ ti ye bu kaanri labari kpa n jɔrɛ kereeri am a, ka Nyɛmɛ afa am satie ace am. ³⁹ Sɔnɔ kɛrɛ bo i yoori yiri n yarada, Nyɛmɛ afa i mi satie kɛrɛ ace i. Nɔaniɛ kpamaawa n bo Moyisi fa maari ni, wɔ koro afa má minem satie ace má bu. ⁴⁰ Am si am nɔ sa, adena má sam bo Nyɛmɛ noaniɛ kanfɔm yo seeri n be tu am.

⁴¹ Bu yo seeri ka,

'Ambere bo am yo Nyeme anzasi ni, am ti fen,
am yo alekutura na am ka ngbeen,
dama m suyo juma be am dee sanja nu,

haari ma be kan kereeri am, am de ma i.' "

⁴² Na sanja bo Pɔɔlu ni Banabasi sufite tientienbunɔɔ sɔɔ n nu ni, na minem n asere bu ka bu kaaki bra Njumiyi cɛen n bo i suba ni, na bu ba kan nyini jɔrem bo ba kan akere bu ni, na bu ti bekun. ⁴³ Sanja bo minem ni ba sandiiri tientienbunɔɔ sɔɔ n ni, na Yudafɔm nbem, ni bo bu ti ma Yudafɔm na ba kaaki bu woowa na bu su Yudafɔm atin n su ni, na bu dɔngu asu Pɔɔlu ni Banabasi su. Na Pɔɔlu ni Banabasi atu bu fɔ, ka ma bu kaaki bu sin bo sakpa n bo Nyeme ayo ama bu ni. ⁴⁴ Njumiyi cɛen n ba juuri ni, na minem n dɔngu bo bu wo mie n nu n aba atien bu nɔɔ tientienbunɔɔ sɔɔ n nu na bu ti Nyeme jɔre ni. ⁴⁵ Sanja bo Yudafɔm nkpienkpienm ni njuri jama n sɔ ni, na ba si Pɔɔlu kɔre, na bu ni yiri awura akuruwa, na ba kpie i nzuko. ⁴⁶ Ama, na Pɔɔlu ni Banabasi ajojo ni ahoresi, bu na, "I ti ye ni ka ya du mo kan Nyeme noanie n kere ambere wo ka. Ama, kabo am akete i na am koro ma ka am nya ngɔɔ n bo i la ma awieeri ni, ya yaki am wo, na ya ko kan kere minem bo bu ti ma Yudafɔm ni. ⁴⁷ Dama noanie maawa bo Mibie n fa maari ya n lee. I na,

'Ma yi u ka a yo wein ma minem bo bu ti ma Yudafɔm ni,
adena durunya n nufɔm kere nya tiide.' "

⁴⁸ Sanja bo minem n bo bu ti ma Yudafɔm tiiri ahin noanie n sɔ ni, na bu ahore ajo, na ba kansi Mibie n noanie ni. Na minem bo Nyeme ayi bu ka bu nya ngɔɔ n bo i la ma awieeri n ayo yarada. ⁴⁹ Na Mibie n noanie n asandi abara aye nyini awɔre n kere nu. ⁵⁰ Ama, na Yudafɔm nkpienkpienm n awura minem bu sin, bere la nbaram bo bu la wo na bu su Nyeme ni, ni nbiesɔm bo bu wo mie n nu na bu se na i bi ni. Na ba kere Pɔɔlu ni Banabasi wuwuruwa, na ba fon bu afite bu asien n su. ⁵¹ Na Pɔɔlu ni Banabasi akponkpon bu jaa tuturi ago bu nu, nyini kere ka ba kete mie n nufɔm lee, na ba ko mie kpiri be bo bu fere i ka Ikoniyom n su. ⁵² Na Yesu susufɔm bo bu wo Antiyoki do ni, bu ahore ajo agaya, na Awiewie Casi n awo bu do.

14

Kabo Pɔɔlu ni Banabasi kɔɔri Ikoniyom mie kpiri n nu ni

¹ Pɔɔlu ni Banabasi ko juuri Ikoniyom mie kpiri n nu ni, bu kaaki yoori so bekun, na ba wura bu tientienbunɔɔ sɔɔ n nu, na ba kan Nyeme jɔre n ni anyumboro haari na mine beberebe ayo yarada, Yudafɔm, ni bo bu ti ma Yudafɔm n kere. ² Ama, na Yudafɔm nbem bo bu yo ma yarada n awura minem bo bu ti ma Yudafɔm bu sin akpura bu ni yaradayofɔm n tii. ³ Na Pɔɔlu ni Banabasi awo do ayo lennyo. Na bu sujojo Mibie n jɔre ni ahoresi, na Mibie n ama bu fanja, na wo ma bu atin na ba yo alekutura sa barasu barasum, adena mine nu bu na bu si ka i ti nahore wo. ⁴ Na kpakpaakinu aba mie n nufɔm do, na nbem ajina Yudafɔm n sin, na nbem gusu ajina Yesu jaramasam n sin.

⁵ Na bo bu ti ma Yudafɔm ni, ni Yudafɔm ni, fa sanja ni bu mofɔm n afa sesesu atara kabo bu yo Yesu jaramasam ni tie, na bu tu bu yabue. ⁶ Na Yesu jaramasam n afa nu fa ko kabo bu koro ka bu yo ni, na ba nmati ako mie kpiri nbem bo bu fere bu ka Lisitira ni Derebi n su. Bu wo Likawoniya

awɔre n nu wɔ, na bu nya nati subara ye aheme ahemem. ⁷ Dɔ na ba kan labari kpa n akere minem.

Kabo Pɔɔlu ni Banabasi kɔ woori Lisitira mie kpiri n nu jɔre ni

⁸ Sɔnɔ be woori Lisitira mie kpiri n nu, i jaa awu, kabo bu wuuri i ni, i ti wɔbuka a, wɔ nati má. ⁹ Na wɔ tana aso i sui ati kabo Pɔɔlu sujɔɔ ni. Na Pɔɔlu afa i nyumbaa akpama i ɲu, na wɔ fa nu ka sɔnɔ n ayo yarada, ka i koro tuntun i na i nya laifie. ¹⁰ Na wɔ tien kpa ase i ka, “Yasu jina cencen.” Na sɔnɔ n ayasu kungerekun awarakpin sunati bara ye. ¹¹ Sanja bo jama n ɲuuri sa n bo Pɔɔlu ayo i sɔ ni, na ba tien kpa Likawoniya anie n nu, bu ɲa, “Ya nyemem akaaki ka adamandem wɔ, ye ba jura aba ya dɔ a.” ¹² Na ba fere Banabasi duma ka Ziyosi, bu amɔe kpiri duma lee, na ba fere Pɔɔlu ka Heremesi, dama yiri ti amɔe n cem a. ¹³ Na amɔe n bo bu fere i ka Ziyosi n sɔɔ jina mie n aheme, na amɔe n fɔ n ni mie n nufɔm anyɔndi tooram ni baka pum afa aba mie n anɔ nu ka bu fa yo tie ma Pɔɔlu ni Banabasi. ¹⁴ Sanja bo Pɔɔlu ni Banabasi tiiri kabo minem koro ka bu yo ni, na bu ahore asaaki na yaa ati bu, nyini ti, na ba cin asɔn bu sutira bo bu wura i, na ba ɲmati awura jama n afien sutien bu ɲu, ¹⁵ bu ɲa, “Njam o e, nzu ti ye am suyo sɔ a? Yere mmɔɔ ni ya tii, ti adamandem kabo am ti n wɔ. Ya ba ka ya kan labari kpa n kere am wɔ, na am yaki nyini deke ɲgbɛnm ni, na am su Nyeme bo i wo bere sanja kere ni. Yiri yiiri angoro, ni asiɛngu, ni tieku n ni dekem kere bo bu wo nu n a. ¹⁶ Dawa sanja ni, yiri Nyeme yo maari atin wo ka daanfie kere yo kabo i koro. ¹⁷ Ama, haari ni nyini n kere, sanja kere i wo sakpa ma am wɔ, i ma nzue tɔ ma am wɔ, na am alembaa bo am dɔ bu n yo nyunyumi, na am di, na am kunnu yi, na i ma am ahorejɔ. Nyini kere kere am ka i wo bere a.” ¹⁸ Haari ni nyini jɔɔɔwa n kere n mmɔɔ ni, i yoori kekereke maari Pɔɔlu ni Banabasi ye bu koro kandaari jama n ye ba yo má tie ama bu n a.

¹⁹ Na Yudafo nbem afite Antiyoki ni Ikoniom mie kpirim n nu aba Lisitira, na ba ma minem ade bu nɔanie, na ba tutu Pɔɔlu yabue, bu sunsun ka wɔ wu wɔ, na ba cin i afite mie n nu. ²⁰ Ama, na Yesu susufɔm n atien bu nɔɔ abara aye i, na wɔ yasu, na wɔ kpie i nyi awura mie n nu. Na alectin fɔfɔre, na yiri ni Banabasi afite dɔ, na ba kɔ Derebi mie kpiri n nu.

Kabo Pɔɔlu ni Banabasi kaaki kɔɔri Siriya dɛe Antiyoki n su ni

²¹ Na Pɔɔlu ni Banabasi akan labari kpa n Derebi mie kpiri n nu, na ba nya susufɔm beberebe dɔ. Na ba kpie bu nyi akɔ Lisitira, ni Ikoniom mie kpirim n nu, na ba nya akɔ Antiyoki mie kpiri n bo i wo Pisidiya awɔre n nu ni. ²² Na ba se yaradayofɔm ni ka, bu ma bu yarada n yo biiwa, na ba ma bu ahoresi. Na ba se bu ka, “Wɔ yo daka ka bu kere ya wuwuruwa beberebe ka, na ya nya koro wura Nyeme femeya n nu.” ²³ Mie kere bo bu wɔɔri su, bu yi nkpienkpienm wɔ Kristo jama n nu, na bu cici bu nɔɔ, na bu sere Nyeme, na bu fa bu wura yiri Mibiɛ n bo ba yo i yarada n saa nu ka i nie bu dika. ²⁴ Bu fite dɔ ni, na ba fa Pisidiya awɔre n nu akɔ atie Pamfiliya dɛe awɔre n nu. ²⁵ Dɔ na ba kan Nyeme jɔre Perega mie kpiri n nu, na ba nya akɔ Ataliya mie kpiri n nu, ²⁶ na ba fa lee bambaka afite dɔ akpie bu nyi akaaki akɔ Antiyoki mie kpiri n bo i wo Siriya awɔre n nu. Dɔ ye bu du mɔ sereeri Nyeme maari bu ka bu di i ahɔɔma fa kɔ nyini juma n bo kisa ba yo i awie ni. ²⁷ Sanja bo bu kɔ juuri Antiyoki ni, na ba tien Kristo jama n nɔɔ, na ba kan sam n bo Nyeme ayo bu ni, ni kabo wɔ

teke atin ama bo bu ti má Yudafoṃ na ba yo yarada barasu ni. ²⁸ Na ba wo yaradayofoṃ n dɔ mie n nu ace.

15

Kabo Kristo jama n tieɛnri bu nɔɔ Yerusalem ciciri su ni

¹ Tɔ, na mine nbem afite Yudiya awɔre n nu aba Antiyoki mie kpiri n nu, na bu sukere yaradayofoṃ ni bu dɛɛ kereewam. Bu ŋa, “Má ka ba wura am kenkenne kabo Moyisi yo kereeri ni, am koro nya má tiide.” ² Na Pɔɔlu, ni Banabasi, ni bere ase akuruwa nyannyan fa kɔ nyini jɔre n bu su. Nyini ti, na ba fa sesesu ka Pɔɔlu, ni Banabasi, ni yaradayofoṃ nbem bo bu wo Antiyoki ni, ka bu kɔ Yerusalem mie kpiri n nu na bu kɔ bisa Yesu jaramasam ni, ni Kristo jama nkpienkpienm n nyini jɔre ni.

³ Na Kristo jama n akaari bu na ba kɔ. Bu wo kɔ su ni, na ba fa Fonisiya, ni Samariya awɔrem n nu, na ba kan akere dofoṃ kabo minem bo bu ti má Yudafoṃ n ayo Nyeme yarada barasu ni, na nyini labari n ama yaradayofoṃ n ahore ajo ako asin su. ⁴ Sangá bo bu kɔ juuri Yerusalem ni, na Kristo jama ni, ni Yesu jaramasam, ni nkpienkpienm n ade bu ni bu saa nnyɔ, na ba kan akere bu fa kɔ deke n kere bo Nyeme ma ba koro ayo i ni. ⁵ Ama, na yaradayofoṃ nbem bo bu su Farasifoṃ atin n su n ayasu ajina, ase ka, “Wɔ yo daka ka minem bo bu ti má Yudafoṃ na ba yo Yesu yarada n awura kenkenne ka, na bu nya ma bu nɔɔ ka bu su Nyeme noanie kpamaawa n bo i fa maari Moyisi n su.” ⁶ Na Yesu jaramasam ni nkpienkpienm ni, atien bu nɔɔ, na bu kpokpo jɔre n nu nyunyumi. ⁷ Na ba se nyini jɔre n akuruwa bu ŋuŋu nu ace, na Petoro ayasu ajina, na wo se bu ka, “M ninbaam, am si ka mini ye Nyeme du mɔ yiiri m fiteeri am nu, ka m ma minem bo bu ti má Yudafoṃ n ti labari kpa ni, adena bu yo yarada. ⁸ Na Nyeme bo i si kabo adamande ahorembaa ti barasu ni, akere ka ba yo yarada nahore su, dama wo fa i Awiewie Casi n ama bu, kabo i yo fa maari yere mmɔɔ ni. ⁹ Nyeme dɔ, yere ni bere la má kpakpaakinu lee, dama yarada n bo ba yo i n dɛɛ ti, wo ŋmisi ayi satie kere bo i wo bu ahore su ni. ¹⁰ Kisa, nzu ti ye am koro ka am yo Nyeme na am nie a, ye am susɔ yaradayofoṃ sɔɔri bo ya nam, ni yere ni ya tii akoro asɔ má i a? ¹¹ Ai. Yere ayo yarada ka ya Mibie Yesu ahɔroma n dɛɛ ti, ye ya nya tiide a, nyini ma bere gusu nya tiide a.”

¹² Na minem kere ato amuna, na bu ti kabo Banabasi ni Pɔɔlu sukan kere bu fa kɔ alekutura sa barasu barasum bo Nyeme ma bu koro yo maari minem bo bu ti má Yudafoṃ ni. ¹³ Sangá bo bu jojo wieeri ni, na Yakobo gusu ayasu ajojo. I ŋa, “M ninbaam, am ti fen. ¹⁴ Simon atenge ya su kabo Nyeme ni i tii adu mɔ akere ka i cece wo minem bo bu ti má Yudafoṃ nu ni, ni kabo wo yi bu nbem afa bu ayo i dɛɛ minem ni. ¹⁵ Nyeme noanie kanfoṃ dɛɛ noanie n bo bu yo seeri n ni ahinm n kere ti kun wo, dama bu kereri ka, ¹⁶ Micera n ŋa,

‘Nyini sin, m káaki ba ye Feme Davidi awuru n bo wo tɔ n su,
na m tá i bɔnfo ni, na m yó i dongu.

¹⁷ Adena daanfem n bo ba ka n kere bá kpini Mibie busu,
bere la minem bo bu ti má Yudafoṃ
na ma fere bu ka bu ti m dɛem ni.

Micera ni seeri sɔ a,

¹⁸ yiri bo i yo seeri dada kere ka i yó i ni.’ ”

¹⁹ Na Yakobo akaaki ase bu ka, “Mini dɛɛ sunsunni la ka, minɛm bo bu ti má Yudafoɔm na bu suba Nyɛmɛ dɔ ni, wɔ yo má daka ka ya miɛ bu. ²⁰ Ama, i ti ye ni ka ya kerɛ kadasi ma bu, na ya se bu ka, má bu di tie niɛ, na má bu yo sakaraya, na má bu di niɛ bo ba kpɛ má i kɔm, na má bu di niɛ mbunja. ²¹ Dama ba du mɔ akan Moyisi noaniɛ kpamaawa n jɔrɛ ya nam sanja, haari ni nyuma bu toko kan i kadasi miɛ n kerɛ su wɔ, na bu sukan i na sɔnɔ kerɛ ti bu tientienbunɔɔ sɔɔm nu Njumiyi cɛɛn kerɛ.”

Kabo bu kerɛeri kadasi maari Antiyokifɔm ni

²² Dɔ na Yesu jaramasam ni, ni nkpienkpienm ni, ni Kristo jama n kerɛ afa sɛsesu asoro su ka bu yi bu nu nbem, na bu sunma bu ni Pɔɔlu, ni Banabasi Antiyoki miɛ kpiri n nu, bɛrɛ la Yudasi bo bu fere i ka Basabasi ni, ni Silasi. Nyini mine nnyɔm kerɛ ti Kristo jama n mɔfɔm wɔ. ²³ Na ba kerɛ kadasi ama bu ka bu fa kɔ. Kerɛewa n la ka,

“Yɛrɛ am ninbaam, ni Kristo jaramasam, ni nkpienkpienm ni subisa am dɔngu, ambere bo am ti má Yudafoɔm na am wo Antiyoki ni, ni bo bu wo Siriya ni Silisiya dɛɛ awɔrɛm nu ni. ²⁴ Ya ti ka ya nbem afite ya nu fɛn aba am dɔ, aba akan jɔrɛ nbem akere am bo wɔ miɛ am, na wo yo am sunsunni agaya. Yɛrɛ ni ya tii asunma má bu. ²⁵ Nyini ti, ye ya kerɛ atana asɛsɛ su, asoro su ayi minɛm asunma bu ni ya danfo kpam Banabasi ni Pɔɔlu am dɔ. ²⁶ Bɛrɛ ye ba fa bu ŋɔɔ ama ya Mibiɛ Yesu Kristo dɛɛ ti n a. ²⁷ Nyini ti, ya sɔsunma Yudasi ni Silasi am dɔ, na bɛrɛ ni bu tii bá teke bu nɔɔ, na bu kán jɔrɛ kerɛ bo i wo kadasi n nu kerɛ am.

²⁸ Kabo ya ni Awiewie Casi n dɛɛ ayo kun, na ya soro su lɛɛ, ka ya sɔ má am sɔɔri nɔnɔɔri be, sin ahin dekem bo wɔ yo daka ka am yo bu ni.

²⁹ Má am di tie niɛ, má am di niɛ mbunja, má am di niɛ bo ba kpɛ má i kɔm, na má am yo sakaraya. Nzɛn am tara am ŋu na am ayo má ahin sam ni, i yó kpa ma am. Tɔ, ya ka sanja lɛɛ.”

³⁰ Na minɛm bo bu sunmaari bu n ako aju Antiyoki. Bu kɔ juuri ni, na ba nya atien yaradayofɔm kerɛ nɔɔ, na ba fa kadasi n ama bu. ³¹ Sanja bo bu kaanri kadasi n wɛeri ni, na bu ahore ajo, na wɔ kaaki ama bu ahoresi. ³² Na Yudasi, ni Silasi bo bɛrɛ ni bu tii ti Nyɛmɛ noaniɛ kanfɔm ni, akan Nyɛmɛ jɔrɛ beberebe akere bu, na bu ahore asi, na wɔ buka bu fanja. ³³ Na ba wo dɔ ace, na yaradayofɔm n akaari bu ni ahoreda, na ba kpɛ bu nyi ako bɛrɛ n bo bu sunmaari bu n dɔ. [³⁴ Ama, Silasi ase ka i ka bu dɔ.] ³⁵ Ama, n Pɔɔlu ni Banabasi aka Antiyoki, na bu ni bu benju dɔngu akan na ba kerɛ minɛm Mibiɛ n noaniɛ ni.

Kabo Pɔɔlu ni Banabasi kpaaki yakiiri bu benju ni

³⁶ Tɔ, fa kɔ sanja su, na Pɔɔlu ase Banabasi ka, “Ma ya kpɛ ya nyi kɔ miɛm kerɛ bo ya kaanri Mibiɛ n jɔrɛ kereeri bu n su, na ya kɔ niɛ kabo ya ninbaam ti barasu.” ³⁷ Má Banabasi koro ka bu fa Yohane bo bu kaaki fere i ka Marako n na bu kerɛ kɔ ɔ, ³⁸ ama, na Pɔɔlu akete ka i sú má bu su, dama sanja bo bu wo Pamfiliya awɔrɛ n nu ni, i ŋmati yakiiri bu wɔ, wɔ su má bu su abuka má bu ni juma ni. ³⁹ Dɔ na akuruwa bambaka aba bu afien, na ba kpaaki ayaki bu benju, na Banabasi afa Marako abuka i ŋu su, na ba fa lee bambaka ako Sipurusi asien n su, ⁴⁰ na Pɔɔlu gusu afa Silasi ka i su i su, na yaradayofɔm n atien bu nɔɔ asere Nyɛmɛ ama bu, ka bu di Mibiɛ n ahɔrɔma. ⁴¹ Na wɔ kɔ abara aye Siriya, ni Silisiya awɔrɛm n nu, na wɔ ma Kristo jama n ahoresi.

16

Kabo Timoti, ni Pɔɔlu, ni Silasi nati yoori juma ni

¹ Na Pɔɔlu anati haari na wɔ kɔ aju Dɛrɛbi, ni Lisitira miɛ kpirim n nu, sɔnɔ be woori dɔ, i ti Kristo susufɔ ɔ, bu fere i ka Timoti. I ni ti Yudafo bara bo wɔ yo Kristo yarada wɔ, ama, na i si ti Girikifo ɔ. ² Na yaradayofɔm bo bu woori Lisitira ni Ikoniyom miɛ kpirim n nu n kere ase ka Timoti ti sɔnɔ kpa a. ³ Pɔɔlu koroori ka i fa Timoti buka i ɲu su wɔ, na bu sunati, na wɔ wura i kɛnkɛnɛ. Mɔ deke be dɛɛ ti a, ama, Yudafoɔm bo bu woori dɔ n dɛɛ ti, dama bu kere si ka Timoti si ti Girikifo ɔ. ⁴ Na ba nati miɛ miɛm su, na ba kan akere yaradayofɔm fa kɔ jɔrɛ n kere bo Yesu jaramasam, ni nkpienkpienm bo bu wo Yerusalem miɛ kpiri n nu n asese su asoro su ka bu yo i n su. Na ba se bu ka bu su nyini atinm su nyunyumi. ⁵ Nyini ti, na Kristo jamam n anya faɲga, na bu yarada ayo biiwa abuka su, na bu sunya minɛm subuka su ale kere bo i cin.

Kabo Pɔɔlu ɲuuri sɔnɔ be ka aleɛ nu dɛɛ su ni

⁶ Na ba fa Firigiya, ni Galatiya dɛɛ awɔrɛ n nu asin, dama Awiewiɛ Casi n ama mɔ bu atin na bu kan Nyɛmɛ jɔrɛ n Esiya dɛɛ awɔrɛ n nu. ⁷ Sanga bo bu kɔ juuri Masiya dɛɛ awɔrɛ awieeri ni, mɔ bu koroori ka bu wura Bitiniya dɛɛ awɔrɛ n nu wɔ, ama, Yesu dɛɛ Awiewiɛ n asoro mɔ bu su ka bu wura dɔ. ⁸ Nyini ti, na ba fa Masiya awɔrɛ n nu, na ba sin akɔ miɛ kpiri be bo bu fere i ka Tɔrasi n nu. ⁹ Nyini cɛɛn n kɔɲgɔɛ, na Pɔɔlu aɲu deke be ka aleɛ nu dɛɛ su, ka sɔnɔ be wo Makedoniya awɔrɛ n nu, jina susere i, i ɲa, "Jande, bra Makedoniya fen na a ba buka ya." ¹⁰ Pɔɔlu ɲuuri nyini deke n ka aleɛ nu n dɛɛ ti, ya kaba yoori siriya a, na ya kɔ Makedoniya, dama ya si ka Nyɛmɛ ye wɔ se ka ya kɔ dɔ na ya kɔ kan i labari kpa n jɔrɛ kere minɛm n bo bu wo dɔ n a.

Kabo Lidiya yoori Yesu yarada ni

¹¹ Na ya fa lee bambaka afite Tɔrasi miɛ kpiri n nu akpiɛ akɔ aju miɛ be bo i wo lui bambaka be su, bu fere nyini lui n ka Samotarase. I alecin fɔfɔrɛ na ya kɔ aju miɛ kpiri n bo bu fere i ka Nepolisi n su. ¹² Na ya fite bere akɔ miɛ kpiri be bo bu fere i ka Filipiya n su, yiri ti Makedoniya awɔrɛ n nyini bue n miɛm kere tii a. Romafɔm niɛ i su a. Na ya yo lennyɔ dɔ. ¹³ Na Nɔmiiyi cɛɛn ni, na ya fite miɛ n nu akɔ kunma nu, dɔ ye ya sunsun ka ya kɔ ɲu ka deke bo Yudafoɔm n tien bu nɔɔ sere Nyɛmɛ a. Na ya tana, na ya ni nbaram bo ba tien bu nɔɔ n abo anzama. ¹⁴ Bara be woori bu nu, bu fere i ka Lidiya, i fite miɛ kpiri be bo bu fere i ka Tiyatira n su wɔ, i tɔ sanvuin kpakpam bo i la gɔ, i ti bara bo i su Nyɛmɛ wɔ, na Nyɛmɛ ateke i sunsunni, na wɔ so i sui nyunyumi, na wɔ ti kabo Pɔɔlu suse ni. ¹⁵ Na ba biɛ i ni i dikafɔm kere Nyɛmɛ nzue, na wɔ sere ya jande ka, "Nzen am asoro su ka ma yo Mibiɛ n yarada nahɔrɛ su, am ba wo m dika." I yoori ya awaraye n dɛɛ ti, na ya soro su.

Kabo bu nyiiri Pɔɔlu ni Silasi dansaraka nu ni

¹⁶ Cɛɛn n be sɔ ɔ, ya suko deke bo Yudafoɔm n tien bu nɔɔ sere Nyɛmɛ ni, na ya ni sunguru be ayɛ, i ti afani wɔ, ajini wo i ɲu, na i nati yi munzue. Nyini dɛɛ ti, na i tofɔm anya ɲwaa beberebe afite i munzue yi n nu. ¹⁷ Na i nati susu ya ni Pɔɔlu su, na i sutiɛn suse ka, "Ahin minɛm ti Nyɛmɛ Kpiri n dɛɛ amusuusufɔm wɔ. Bere kere am kabo am yo na am nya tiide a." ¹⁸ I nati yoori sɔ ɔ, cɛɛn n kere cɛɛn, haari na yaa aba ati Pɔɔlu, na wɔ kaaki

anie i, na wo tien ajini n bo i wo sunguru n ju n na wo se i ka, “Yesu Kristo dee duma n dee yiko nu, fite yaki i.” Kpenga, na ajini n afite ayaki i.

¹⁹ To, sang'a bo afani n tofom nyuri ka bu koro nya ma nyaa fite ma i n do kun ni, na ba tara Pɔɔlu ni Silasi, na ba cin bu ako mie n kunnu afa bu awura yikofom saa nu. ²⁰ Bu faari bu ko juuri joredifom nkpienkpienm do, na ba se ka, “Ahin minem ni ti Yudafom wo, na bu nati sukpini jore ya mie n nu. ²¹ Bu nati sukere sayoowam bo ya dee noanie kpamaawa atin n su, wo yo ma daka ka ya de bu, wara ya su bu su, dama ya ti Romafom wo.”

²² Na jama n kere ato Pɔɔlu ni Silasi ju ni jore ngbɛɛngbɛɛn. Na joredifo nkpienkpienm ama ba yi Pɔɔlu ni Silasi suturam, na ba ma noo ka bu fin bu ngbere. ²³ Nyini dee ti, na ba bo bu nyunyumi, na ba ko anyi bu dansaraka, na ba ma dansaraka niefo n noo ka i tu ano n na i nie bu dika nyunyumi. ²⁴ Dansaraka niefo n deeri nyini noanie n wieeri so ni, na wo fa bu ako awura dansaraka n soo n bo i wo mo n nu, na wo bo bu tobarim.

²⁵ Na fa ko kongue jinanjin sang'a, na Pɔɔlu ni Silasi susere Nyeme, na bu sudi jue kansi i, na bu beng'u dansarakam ni suso bu sui suti. ²⁶ Jina n nu bere, na asien n akpisi agaya, haari na dansaraka soo n jaafa bo bu fa boori i bu n kere akpisi, na anom n kere ateke, na tobari n kere n bo bu fa boori bu n akporo atoto. ²⁷ Na dansaraka niefo n abo nu ayasu, na wo ju ka dansaraka soo anom n kere ateke, i sunsun ka dansarakam kere anmati asandi wo, nyini ti, na wo cin aworo i takobe ka i kun i ju wo. ²⁸ Ama, na Pɔɔlu atien kpa ase ka, “Ma a ma u ju mandim. Ya kere wo fen.” ²⁹ Na dansaraka niefo n afere ka bu fa sin bra, na wo bereki awura Pɔɔlu ni Silasi soo n nu, na sere ati i, na i nyunie subobo i, na wo ko akutu bu jaa bu. ³⁰ Do na wo fa bu afite, na wo bisa bu ka, “M mibiem, m yo se ye m nya tiide a?” ³¹ Na ba bo i nu ka, “Yo Mibie Yesu yarada, na a nya tiide, woro ni u dikafom kere.” ³² Na ba kan Mibie n noanie n akere i, i ni bo bu wo i dika n kere. ³³ Nyini cɛɛn n kongue n kere, na dansaraka niefo n afa Pɔɔlu ni Silasi ako, na wo ko anmisi bu kani n kere, na ba kaba abie yiri ni i dikafom kere Nyeme nzue. ³⁴ Do na wo fa bu ako i dika, na wo ma bu diire, na ba di. Na yiri ni i dikafom kere ahore ajo agaya ka ba yo Nyeme yarada n dee ti.

³⁵ Alecin ngarama, na joredifom n asunma npulisim ka bu ko se dansaraka niefo n ka i yaki nyini minem nu ji na bu ko. ³⁶ Nyini ti, na dansaraka niefo n asere Pɔɔlu ka, “Joredifom n ama noo ka ya yaki am na am ko. Nyini ti, am ko ni ahoreda.” ³⁷ Ama, na Pɔɔlu ase npulisim ni ka, “Haari ni bo ya ti Romafom ni, ba di ma ya jore anu ma ya ngasi be, na ba bo ya jama n kere nyunu, na ba nyi ya dansaraka. Ye kisa bu sukoro ka bu fie yi ya ji benle, nzen se? Nyini koro yo ma, ma ka bere ni bu tii aba na bu ba yi ya ji.” ³⁸ Na npulisim n ako ase joredifom ni. Bu tiiri ka Pɔɔlu ni Silasi ti Romafom ni, na sere ati bu. ³⁹ Nyini ti, na ba ba atara Pɔɔlu ni Silasi jaa, na ba nya ayi bu afite dansaraka n nu, na ba sere bu jande ka bu fite mie n nu. ⁴⁰ Na ba fite dansaraka soo n nu, na ba kaaki ako Lidiya dika, na ba ko anu yaradayofom ni, na ba ma bu ahoresi, na ba nya afite mie n nu ako.

17

Kabo Pɔɔlu koori Tesalonika mie kpiri n nu ni

¹ Na Pɔɔlu ni Silasi afa asin Amfipolisi, ni Apoloniya mie kpirim su, na ba ko aju Tesalonika mie kpiri n nu. Yudafom tientienbunoo soo wo do.

² Nyini ti, kabo i nati yo ni, na Pɔɔlu awura bu tientienbunɔɔ sɔɔ n nu ako aju Njumiyi cɛɛn nsan, na i ni bere subo anzama fa ko Nyeme Jɔre Kadasi n su, ³ na i sukan, na i suyi i bu kere bu, kabo wɔ yo daka ka Kristo Tiidefɔ n ba di wahara na i tenge i yiwee nu ni. Na wɔ se bu ka, “Yiri Kristo Tiidefɔ n la Yesu n bo m kan i jɔre kere am ni.” ⁴ Na Yudafoɔm nbem ade jɔre n bo Pɔɔlu kaanri i ni, ni Girikifoɔm beberebe bo bu su Nyeme ni, ni nbaram beberebe bo bu la anyunuyi ni, na bu kere afa bu ɔu amata Pɔɔlu ni Silasi. ⁵ Ama, na Yudafoɔm n asi bu kɔre agaya, na ba fere minem ɔgbɛɛnɔgbɛɛn nbem bo bu la má kperɛ na bu nati tana gɔɔsu ni, na ba tien jama dɔngu nɔɔ. Na ba kpisi miɛ ni, na ba ko sɔnɔ be bo bu fere i ka Jason n dika, ako ajina i dika anɔ nu, deke bo Pɔɔlu ni Silasi wo ni, na bu sutientien ka i yi bu ma bu na bu fa bu ko jama n nu. ⁶ Ama, bu ko nienieeri na ba ɔu má bu ni, na ba tara Jason ni yaradayofo nbem acin bu afa bu ako miɛ n nu yikofɔm dɔ, na bu sutien suse ka, “Ahin minem n bo ba saaki durunya n abara aye ni, aba ya miɛ n nu fɛn, ⁷ haari Jason ade bu awura i dika. Ba kete Romafoɔm femɛ kpiri n nɔaniɛ n bo wɔ fa ama ka ya su i su ni, bu ɔa femɛ be wo bere bekun, bo bu fere i ka Yesu.” ⁸ Bu seeri sɔ ni, na wɔ ye yikofɔm ni jama n ahore su. ⁹ Na yikofɔm n akpie Jason ni i benɔum kɔbuka, na ba tɔ kaari, na ba nya ayaki bu aji.

Kabo Pɔɔlu woori Beriya miɛ kpiri n nu ni

¹⁰ Nyini cɛɛn n kɔngue n kere, na yaradayofoɔm n ase Pɔɔlu ni Silasi atin nu ako aju miɛ kpiri be bo bu fere i ka Beriya n su. Bu ko juuri dɔ n na ba ko awura Yudafoɔm tientienbunɔɔ sɔɔ n nu. ¹¹ Dɔ deɛ Yudafoɔm joko n ti kpa tara bere n bo bu wo Tesalonika miɛ kpiri n nu ni. Bu soori bu sui wɔ ni nahɔre su, na ba ti kereewa n bo bu kere bu ni, na ale kere bo i cin, bere ni bu ti ka Nyeme Jɔre Kadasi n wɔ, na bu nie ka, deke n bo Pɔɔlu sukere bu n ti nahɔre wɔ, nzen i ti má nahɔre. ¹² Na Yudafoɔm ni dɔngu ayo yarada, fa sanɔa ni Girikifoɔm beberebe, nbaram bo bu la anyunuyi n ni nbiesɔm. ¹³ Ama, sanɔa bo Yudafoɔm bo bu wo Tesalonika n tiiri ka Pɔɔlu ako akan Nyeme jɔre Beriya dɔ gusu ni, na ba ba dɔ aba awura minem bu sin, na ba ye bu yaa su. ¹⁴ Kpɛnɔa na yaradayofoɔm n ayo ndende afa Pɔɔlu ako ase haari tieku n nɔɔ su, ama, na Silasi ni Timoti yiri aka Beriya dɔ. ¹⁵ Na minem n bo bu seeri Pɔɔlu atin nu ni, afa i ako aju haari miɛ kpiri be bo bu fere i ka Atensi n su. Bu kpieeri bu nyi sukɔ ni, na Pɔɔlu akaari bu ka bu ko se Silasi ni Timoti ka bu bra na bu ba tu i dɔ ndende.

Kabo Pɔɔlu kɔori Atensi miɛ kpiri n nu ni

¹⁶ Sanɔa bo Pɔɔlu wo Atensi miɛ kpiri n nu sunminda Silasi ni Timoti ni, na i ahore asaaki agaya kabo i ɔuuri ka amɔɛm asunnu miɛ n nu ni. ¹⁷ Nyini deɛ ti, na wɔ ko awura Yudafoɔm tientienbunɔɔ sɔɔ n nu, na i ni bere, ni minem bo bu ti má Yudafoɔm na bu su Nyeme ni, subo anzama. Na i sukɔ gɔɔsu cɛɛn n kere cɛɛn, na i sukan kere minem bo bu wo dɔ ni. ¹⁸ Sifoɔm asese nbem wo miɛ n nu, bu fere bu kun ka Epikurifoɔm, na bu fere nyinga n ka Sitowafɔm, na bu suse akuruwa ni Pɔɔlu, na bu nbem abisa ka, “Ye ahin jɔre beberebefɔ n ɔa se wo lɛɛ?” Na bu nbem abɔ nu ka, “I jɔɔ fa ko amɔɛ fɔfɔre nbem jɔre wɔ.” Deke bo i ti na bu seeri sɔ n la ka, Pɔɔlu sukan Yesu ni yiwee tenge n su jɔre wɔ. ¹⁹ Na ba fa Pɔɔlu ako awɔre be bo bu fere i ka Aropagosi na bu tien bu nɔɔ di jɔre n nu. Na ba se i ka, “A koro kere ya na ya ti ahin kereewa fɔfɔre n bo a sufa kere n bu? ²⁰ Ahin kereewa n bo a sukere i ni, ya si má i, ya koro ka a ma ya

ti i bu wɔ.” ²¹ Dama Atensifom ni wɔfom bo bu wo mie n nu n dɛɛ la ka, sanɔa kere bu sukan na bu suti kereewa fɔfɔrem wɔ.

²² Na Pɔɔlu ayasu ajina mie n nu tereterefom n afien, na wɔ se ka, “Ma ŋu kabo ambere Atensifom su amɔem na am yo munzue sam ni anyumboro.

²³ Dama kabo m nati bara ye nie yi kɔresi ni, ma ŋu dekem bo am su bu ni, na ma ŋu bimbindi be bo am akere su ka, ‘Nyeme n bo ya si má i n dɛɛ woobiri lɛɛ.’ Tɔ, yiri n bo am su i na am si má i ni, yiri ye m kan i jɔre kere am a.

²⁴ Nyeme bo i yiiri durunya n ni deke n kere bo i wo nu ni, yiri ti angoro ni asienɔgu kere Mibie a, i wura má amɔe sɔom bo adamande afa i saa ata bu n nu na i da.

²⁵ Sasu bekun, i fun má deke be bo i se adamande ka i yo ma i, dama yiri ni i tii ma adamande ŋɔɔ ni ŋumi a, ni deke n kere a.

²⁶ Yiri ma adamande n kere fite sɔnɔ kun busu n nu wɔ, na wo ma ba tere ade durunya n kere. Na wɔ nya akpama sanɔa sanɔa ama bu kere, na wɔ kaaki akere bu kabo bu asien nyaari ti.

²⁷ Deke n bo i ti na i yoori sɔ n la ka, bu bá turingi nienie i busu na beni bu ŋú i. Ama, haari ni nyini mmɔɔ ni, i wo má dede ni yere kere be.

²⁸ Dama yiri dɛɛ ti ye ya la ŋɔɔ ye ya wo bere ye ya nati a. Kabo am juedifo nbem gusu ase ni, ka, ‘Yere mmɔɔ ti i nbaam wɔ.’

²⁹ Nyini dɛɛ ti, kabo ya nya ti Nyeme nbaam ni, má ya sunsun ka i woowa ti ka sika, wara jete, wara yabue nyunyumi, wara deke be bo juma sifom afa bu alecira ayo i.

³⁰ Dawa sanɔa ni, Nyeme ayo anie má minem fa kɔ bu sayoowam su, dama bu yo si má. Ama, kisa, wɔ ma nɔɔ ka sɔnɔ kere bo i wo deke kere kaaki i wo na i yaki i satie.

³¹ Dama wɔ du mɔ akpama cɛen na wɔ yi sɔnɔ be ka i bá di durunya n nufom jɔre ni nahɔre. Deke bo i kere ya kere ka i bá yo sɔ n la bo i tengeeri i yiwee n nu ni.”

³² Sanɔa bo bu tiiri ka Pɔɔlu sukan fa kɔ yiwee tenge n su n jɔre ni, na bu nbem ayo i anzasi. Ama, na bu nbem ase ka, “Ya koro ka a kaaki ba kan ahin jɔre n bekun na ya ti.”

³³ Dɔ na Pɔɔlu akɔ ayaki bu.

³⁴ Na bu nbem asu i su na ba yo yarada. Bere la Diyonusiyosi, i ti Aropagosifom n nu kun wɔ, ni bara be bo bu fere i ka Damarisi ni, ni minem nbem.

18

Kabo Pɔɔlu kɔɔri Kɔrinto mie kpiri n nu ni

¹ Nyini sin, na Pɔɔlu afite Atensi mie kpiri n nu, na wɔ kɔ Kɔrinto mie kpiri n nu.

² Na wɔ kɔ atu Yudafo sɔnɔ be dɔ, bu fere i ka Akuyila, i ti Pontusi asien su fɔɔ, i ni i yi, bu fere i ka Pisisila, bu fiteeri Itali asien su baari a, wɔ nya cɛ má ye Pɔɔlu ŋuuri bu n a, dama Romafofom feme kpiri n bo bu fere i ka Kalodisi n ama nɔɔ ka Yudafofom kere fite i asien n su.

Nyini dɛɛ ti, na Pɔɔlu akɔ ka i kɔ nie bu busu,

³ na wɔ kɔ aseke bu wɔfo, na i ni bere asanɔa ayo juma, dama bu kere ti jerekem ni tani wufom wɔ.

⁴ Na Njumiyi cɛen kere, i suwura bu tientienbunɔɔ sɔɔ n nu, na i subo anzama ni bere, ni Girikifom kere, adena i kaaki bu sunsunni na bu yo yarada.

⁵ Sanɔa bo Silasi ni Timoti fiteeri Makedoniya awɔre n nu ba juuri ni, Pɔɔlu nyunu aboro ni labari kpa n jɔre kan su ŋgumi wɔ. Na i sukere Yudafofom n ka, Yesu ti Kristo n a, Tiidefo n bo Nyeme ase ka i súnma i ni.

⁶ Ama, Yudafofom n keteeri i nɔanie n wɔ, na ba kpie i nzuko. Nyini dɛɛ ti, na wɔ kɔnɔkɔnɔ i sutura wuraaawa tuturi ago bu ŋu, na wɔ se bu ka, “Ambere, nzen am nya má tiide, i ti am dɛɛ jɔre wɔ, má m dɛɛ. Fite kisa fa kɔ, m kó minem bo bu ti má Yudafofom n dɔɔ lɛɛ.”

⁷ Dɔ na Pɔɔlu

afite tientienbunoo soo n nu ayaki bu, na wo ko sono be dika, i ti ma Yudafu, ama, i su Nyeme wo, bu fere i ka, Titosi Jusitosi, i dika n mata tientienbunoo soo n wo. ⁸ Na sono n be bo bu fere i ka Kirisipusi na i ti bu tientienbunoo soo n kpien n ayo Mibie n yarada, i ni i dikafom kere, na Korintofom dongu bo bu tiiri labari n bo Poolu kaanri i ni, na bu kere ayo yarada, na ba bie bu Nyeme nzue.

⁹ Ceen n be kongue soo, na Mibie n ajojo Poolu do ka alele nu dee su, i na, "Ma a soro sere, ama, ko su na a sukan labari kpa n kere bu, ma a mo u noo, ¹⁰ dama m wo u do. Be koro fa ma i saa kan ma u na i yo u pui. Nie fen, m la mine beberebe mie n nu fen bo bu ti m dee." ¹¹ Na wo wo bu do ako aju afu kun ni kpaaki nu, na i sukere bu Nyeme noanie ni.

¹² To, bu wo bere na sono n be bo bu fere i ka Galiyo n aba adi Akaya awore n nu gomina. Nyini sangha n na Yudafom kere noo ayo kun, na ba kete Poolu nu na ba fa i ako jore diibiri. ¹³ Na ba se ka, "Ahin sono ni suboro i nyi sukere minem kereewa bo i wo i ngumi ni Nyeme noanie kpamaawa ni." ¹⁴ Sangha bo Poolu tekeeri i noo ka i jojo ni, na Gomina Galiyo ase Yudafom ka, "Nzen ma i ti ka wo yo satie be, wara wo do ngasi be, ye am sujaraki i a, ma m ti i bu ma am. ¹⁵ Ama, kabo i nya ti bisaawam fa ko noaniem, ni dumam, ni am dee noanie kpamaawam n su ni, amberu ni am tii ko yo i dongu. Mini, m koro di ma nyini jore ni." ¹⁶ Na wo ma ba fon ayi bu afite jore diibiri soo n nu. ¹⁷ Na bu kere akaba ato sono n bo bu fere i ka Sositeni n nu na bu subo i wo, jore diibiri n nyunu bere, yiri ti tientienbunoo soo nkpien a. Ama, Gomina Galiyo cece awo ma nyini n be nu.

Kabo Poolu kpieeri i nyi koori Antiyoki mie kpiri n nu ni

¹⁸ Na Poolu awo Korinto mie kpiri n nu ace, nyini sin na wo kaari yaradayofom ni na i ni Pisisila ni Akuyila ako. Bu ko juuri mie kpiri n bo bu fere i ka Kenciriya n su ni, na Poolu ayi i tii do, dama wo du mo atan ndie n dee ti. Na ba wura lee bambaka be nu do, i suko Siriya awore n nu. ¹⁹ Bu ko juuri Efeso mie kpiri n nu ni, na wo yaki Pisisila ni Akuyila do, ama, na yiri ako awura Yudafom tientienbunoo soo n nu, na i ni bere abo anzama fa ko labari kpa n su. ²⁰ Na ba sere i ka i wo bu do lennyo, ama, wo soro ma su. ²¹ Na wo sere bu atin na wo kaari bu, na wo se bu ka, "Nzen Nyeme maari m atin, m kpie m nyi ba am do." Na wo yasu Efeso do, na wo fa lee bambaka ako. ²² Sangha bo i ko juuri Sizariya mie kpiri n nu ni, na wo sin ako Yerusalem mie kpiri n nu ako ayo Kristo jama n anse, na wo nya ko Antiyoki mie kpiri n nu. ²³ Na wo yo lennyo do, na wo nya akaaki ayasu do, abara aye mie miem bo bu wo Galatiya, ni Firigiya dee aworem n nu n kere, na wo ma yaradayofom n kere ahoresi.

Kabo Apolosi koori Efeso ni Korinto mie kpirim n nu ni

²⁴ Nyini sangha ni, Yudafu sono be aba Efeso mie kpiri n nu, bu fere i ka Apolosi, bu wuuri i Alekizanderiya mie kpiri n nu wo. I yo la si fa ko Nyeme jore Kadasi n su, na i koro jojo nahore su. ²⁵ Ba du mo akere i kereewam fa ko Mibie n dee atin su, na i ahore abi na i nunie ti nyakanyaka, na i sukan na i kere minem Yesu jore nahore su. Ama, i si ma nzue bieewa be, ma ka Yohane dee Nyeme nzue bieewa ni ngumi. ²⁶ Na wo bo i bu na i sukan i ni ahoresi Yudafom tientienbunoo soo n nu. Sangha bo Pisisila ni Akuyila tiiri i kereewam n so ni, na ba fa i ako awuru, na ba kere i Nyeme atin n su jore nyunyumi abuka su. ²⁷ Nyini sin, na Apolosi akoro ka i ko

Akaya awɔre n nu, na yaradayofɔm ni bo bu wo Efeso n ama i ahoresi, na ba kere kadasi ama bu ninbaam bo bu wo Akaya n ka bu de i wɔfo nyunyumi. Saŋga bo i ko juuri do ni, na wo buka minem bo Nyeme dee ahɔroma n nu na ba yo yarada ni. ²⁸ Na Yudafɔm seeri akuruwa n dee ti, na wo fa Nyeme Jɔre Kadasi n na wo kan ayi bu fieo fieo jama n kere nyunu, ka, Yesu ti Kristo n a, Tiidefo n bo Nyeme ase ka i sunma i ni.

19

Kabo Pɔɔlu kɔri Efeso mie kpiri n nu ni

¹ Saŋga bo Apolosi toko wo Kɔrinto mie kpiri n nu ni, na Pɔɔlu anati abara aye do dee aheme mie miem n kere su, haari na wo ko aju Efeso mie kpiri n nu. Do na wo ko atu Yesu susufɔ nbem, ² na wo bisa bu ka, "Saŋga bo am yoori yarada ni, Awiewie Casi n awura am ŋu?" Na ba bo i nu ka, "Ai, ya nya ti ma ka Awiewie Casi wo bere mmɔɔ." ³ Do na Pɔɔlu abisa bu ka, "Ye nzu Nyeme nzue ye bu bieeri am a?" Na ba bo i nu ka, "Bu bieeri ya Yohane dee nzue bieewa n wo." ⁴ Na Pɔɔlu ase bu ka, "Yohane nzue bieewa n bu la ka, mine kaaki bu wo na bu yaki bu satie wo. Na wo se minem n ka bu yo sɔno n bo i wo i sin suba n yarada, yiri la Yesu." ⁵ Bu tiiri nyini n so wieeri ni, na ba bie bu Nyeme nzue ya Mibie Yesu n dee duma nu. ⁶ Na Pɔɔlu afa i saa anana bu ŋu, na Awiewie Casi n awura bu ŋu. Na ba jojo anie barasu barasu nbem, na ba kan Nyeme noanie akere minem. ⁷ Bu kere ko yasuuri nbiesom buru ni nnyo o.

⁸ Na wo wo do haari sara nsan, na Njumiyi cɛen kere, na i suwura bu tientienbunoo sɔo n nu, na i sukan kere bu fa ko Nyeme femeya n su ni ahoresi, na i ni bere subo anzama, na wo boro i nyi akere bu ka, kabo i kan n ti nahore wo. ⁹ Ama, na bu nbem afa ahorembaa kekereke, na ba kete ka bu yo ma yarada. Na ba jojo jore tie fa ko Mibie n dee atin n su, jama n kere nyunu. Nyini ti, na Pɔɔlu ayaki bu, na wo fa yaradayofɔm n afite ako Tiranusi tientienbunoo sɔo bambaka n nu, na i ni bere suten bu noo subo anzama, fa ko Yesu dee atin n su cɛen n kere cɛen. ¹⁰ Pɔɔlu bitaari i so o, haari afo nnyo, na minem kere bo bu wo Esiya dee awore n nu n ati Mibie n noanie ni, bo bu ti Yudafɔm, ni bo bu ti ma Yudafɔm n kere.

Sikeva nbaabiesom n jore

¹¹ Na Nyeme ama Pɔɔlu ayo alekutura sam bo bu la ma nusu. ¹² Haari na sanvuinm ni suturam kere bo ba kan i njunie, na bu fa ko nana tukpakifom ŋu, bu nya laifie wo, na ajinim fite yaki minem bo bu wo bu ŋu ni. ¹³ Na Yudafɔm nbem bo bere gusu nati jengbe fon yi ajinim fite minem ŋu ni, aboro bu nyi ka bu fa Yesu duma n fon yi ajinim. Bu ŋa, "Yesu n bo Pɔɔlu kan i jore n dee duma nu, ye m se am ka am fite yaki sɔno n a." ¹⁴ Yudafɔm mine nso nbem nati yo nyini sam n a. Bere la Nyeme sayoowa donguyofɔm n kere kpien be bo bu fere i ka Sikeva n dee nbaabiesom ni.

¹⁵ Ama, na ajini n ase bu ka, "M si Yesu, na m kaaki si Pɔɔlu, ama, ye ambere la ŋma n wo?" ¹⁶ Na sɔno n bo ajini n wo i ŋu ni, ato bu ŋu na wo kunma bu kere fanja, na wo bo bu na wo ma bu mandim, na ba ŋmati afite i dika n nu bu bu ngbeen. ¹⁷ Saŋga bo Yudafɔm ni minem bo bu ti ma Yudafɔm na bu wo Efeso mie kpiri n nu n kere tiiri nyini sa n so ni, na sere ati bu, na ba kansi Mibie Yesu n duma agaya. ¹⁸ Na mine dongu bo ba yo yarada n afite ajina, na ba kan bu ngasim ni bu satiem kere bo ba

yo bu n akere jama ni. ¹⁹ Na mine dongu bo bu nati yo boboyaya juma n afa bu boboyaya kadasim ni, na ba tien bu nɔɔ jama n kere nyunu, na ba yara bu kere. Kadasim n kere bo bu yaraari bu ni, i nwa a sunnu agaya, bu buuri i akunta, i kere ko yasuuri bu de e jete nwa akpii aburunu wo. ²⁰ Nyini n de e ti, na mine beberebe ati Mibie n nɔɔnie ni, na wo sandi abara ye ni fanga.

Kabo minem tientien yoori nanmie Efeso mie kpiri n nu ni

²¹ Nyini n kere sin, na Pɔɔlu afa sunsunni ka i ko Makedoniya ni Akaya de e awɔre n nu, na i nya sin ko Yerusalem mie kpiri n nu. Na wo se ka, “Nzen m nya nuuri m natiiri n kere nyaari, wo yo daka ka m ko Roma mie kpiri n nu gusu.” ²² Na wo sunma i bukafɔ nnyom ni, bere la Timoti ni Irasitusi ka bu ko Makedoniya, na yiri aka Esiya de e awɔre n nu, ayo lennyo.

²³ Nyini sang a n ye Mibie n atin n su su n ayo jore agaya Efeso mie kpiri n nu n a. ²⁴ Jete tunmi be yo wo do, bu fere i ka Demetiroasi, i fa jete wo, na i fa yo so kan kanm, bu ti ka amoe n bo bu fere i ka Atemisi n wo, na i sufa to ma minem. Na minem bo bu yo nyini juma n anya kperere beberebe afite nu. ²⁵ To, na yiri Demetiroasi afere minem bo bu yo nyini juma atien bu nɔɔ, na wo se bu ka, “Njam, am si ka ya nya ya de e ajeki kere fite ahin juma n bo ya yo i n nu wo e. ²⁶ Yiri Pɔɔlu ni, kisa, am anu i e, am ati kabo wo koro akan ateki mine beberebe nyi ni, ma bo bu wo Efeso fen ngumi, ama, ni bo bu wo Esiya de e awɔre n nu kere, i na amom bo adamandem yo bu n ti ma nyeme ni. ²⁷ Nyini n bo i wo su ni, nzen ya yakiiri na i yo so, ya juma n bo ya yo i ni, i ka ngbeen wo. Ma nyini ngumi, ama, minem fa ma ya amoe kpiri Atemisi so n yo ma pui, dama yiri Atemisi n ye minem bo bu wo Esiya awɔre n nu ni durunya n nufom kere su yiri wo. I nya yoori so, Atemisi fun nyini jirima n wo le e.”

²⁸ Jama n tiiri ahin jooowa n so ni, na yaa ati bu, na ba tien kpa, bu na, “Yere Efesofom de e amoe Atemisi ni, yiri ti yikofa a.” ²⁹ Na mie n abo nu, na minem suyo nanmie. Na jama n akaba ako atara Gayosi ni Arisitakusi, bere bo bu suuri Pɔɔlu su fiteeri Makedoniya baari ni. Na ba cin bu ako tientienbunoo fofoe paa n nu. ³⁰ Ma Pɔɔlu ni i tii koroori ka i ko deke bo jama n atien bu nɔɔ n wo, na i joo bu do, ama, yaradayofom n asoro ma i su. ³¹ Haari na nyini awɔre n nu yikofom bo bu ti i danfom n asunma asere i jande ka ma i ko tientienbunoo fofoe n nu. ³² Nyini sang a n kere ni, bu nyunu ata, na jama n sutientien, suyo nanmie, nbem na so, nbem gusu na ahin, ama, bu dongu asi ma deke n bo i ti na ba ba atien bu nɔɔ ni. ³³ Na Yudafom asun so be bo bu fere i ka Alekizanda n adu jama n nyunu, nyini de e ti, mine nbem sunsun ka yiri faari nyini sam n kere baari a. Do na wo ye i saa su ka jama n yaki nanmie, na i sukan na minem si deke bo i wo nu. ³⁴ Ama, sang a bo bu faari nu ka i ti Yudafɔ ni, na bu kere atien kungerekun, bu na, “Yere Efesofom de e amoe Atemisi ni, yiri ti yikofa a.” Ba tientien so ace haari sang a su. ³⁵ Na so be bo i ti bu mie n nu kadasi kerfo n aba bu do, na wo se bu ka, “Am yaki nanmie.” Do na wo nya se bu ka, “Ambere Efesofom, am ti fen, nma wo bere bo i si ma ka Efesofom nie Atemisi amoe kpiri so n ni yabue n bo i fiteeri angoro toori n su a?” ³⁶ So be wo ma bere bo i koro se ka ahin jore n ti ma nahore. Nyini ti, wo yo daka ka am tara am nu, ma am koro nde yo sa be bo i kunma am. ³⁷ Ahin minem bo am afa bu aba fen ni, ba wo ma

putiripui afite má amœ sɔɔ n nu, ba kaaki akpie má nzuko be ajaraki má ya amœ ni. ³⁸ Nzen Demetirosi ni i bengu jumayofom ni, la jaraki fa kɔ bu be dɔ, jɔredifom ni gomina nkpienkpienm wo bere, bu koro jaraki nyini minem bu dɔ. ³⁹ Ama, nzen sa be wo bere buka su na am koro ka ya yo i dongu a, am fa bra sangɔ bo mie n nu jama n kere la bu tientienbunɔɔ ni. ⁴⁰ Nanmie n bo am ayo i nyuma ni, i la má kperɛ, i koro fa ya wura jɔre nu, dama ya koro kan má deke n bo i ti na am ayo sɔ ni. ⁴¹ I jɔjɔri sɔ wieeri ni, na wo ma jama n asandi.

20

Kabo Pɔɔlu kɔɔri Makedoniya ni Girikifom dɛɛ awɔre n nu ni

¹ Minem ni yoori nanmie n wieeri ni, na Pɔɔlu afere yaradayofom n atien bu nɔɔ, na wo ma bu ahoresi, na wo kaari bu, na wo kɔ Makedoniya awɔre n nu. ² Na wo fa nyini awɔre n kere nu, na wo jɔjɔ yaradayofom kere dɔ, na wo ma bu ahoresi, na wo fa dɔ ako aju Girikifom dɛɛ awɔre n nu, ³ na wo wo dɔ haari sara nsan. Na sangɔ bo i wo sesesu su ka i kɔ Siriya awɔre n nu ni, na wo ti ka Yudafom akpa bu nɔ ako anminda i atin nu, nyini dɛɛ ti, na wo yo i sunsunni ka i kpie i nyi fa Makedoniya a. ⁴ Na mine nbem asu i su ako, bere la Sopateri bo bu fere i si ka Pirihusi na i fite Beriya mie kpiri n nu ni, ni Arisitakusi, ni Sekundososi bo bu fite Tesalonika mie kpiri n nu ni, ni Gayosi bo i fite Derebi mie kpiri n nu ni, ni Tikikusi, ni Torofimosi bo bu fite Esiya dɛɛ awɔre n nu ni, ni Timoti. ⁵ Na bere kere adu mɔ ako anminda ya Tɔrasi mie kpiri n nu. ⁶ Na yere aka Filipiya mie kpiri n nu, haari na Yudafom aba adi bu cɛenkpiri n asin, bo bu di i ni kponɔ na bu gɔ má ayiri nu na i yasu ni, na ya nya afa lee bambaka, na i lennu cɛen na ya kɔ atu bu Tɔrasi, na ya wo dɔ ako aju lesɔ.

Kabo Pɔɔlu kɔɔri Tɔrasi mie kpiri n nu awieeri su ni

⁷ Na Yudafom bakue n bumboori, mone cɛen, na ya kere atien ya nɔɔ ka ya sangɔ di diire. Na Pɔɔlu ajɔjɔ minem dɔ, haari kɔngue jinanjin, dama i koroori ka nyini cɛen alecin i kaari bu wo, na i kɔ yaki bu. ⁸ Ya tieenri ya nɔɔ angoro sɔɔ be nu wo, fitanam sunnu nu dɔ. ⁹ Na gbefene be, bu fere i ka Itikusi, na wo fun atana sɔɔ angoro nsan n tukoro n su, na daafiri ati i. Pɔɔlu jɔjɔ cɛeri na wo daafi, na wo fite angoro aba atɔ asienɔu. Bu jura kɔ maari i su ni, nyini sangɔ wo wu. ¹⁰ Na Pɔɔlu ajura ako asienɔu, na wo fun abutu i nɔ, na wo fa i saa abara aye i, na wo se bu ka, “Má am ma sere ti am, dama i la nɔɔɔ.” ¹¹ Dɔ na Pɔɔlu akpie i nyi afun ako angoro sɔɔ n nu dɔ, na i ni bere kere asangɔ adi diire, na ba bo anzama, haari ale ako acin, na wo kaari bu na wo kɔ. ¹² Na ba nya afa gbefene n ako awuru ni laifie, na bu ahore ajɔ ako asin su.

Kabo Pɔɔlu fiteeri Tɔrasi kɔɔri Miletosi ni

¹³ Na Pɔɔlu afa sesesu ka yere fa lee bambaka du mɔ ɔ, na yiri nati na ya ni yiri kɔ saa nu Asosi mie kpiri n nu. ¹⁴ Sangɔ bo i ba tuuri ya dɔ ni, na wo wura lee n nu, na ya ni yiri kere ako mie kpiri n bo bu fere i ka Mitulene n su. ¹⁵ Na ya yasu dɔ, i alecin, na ya kɔ dodo lui bambaka n bo bu fere i ka Kiyosi n su. Na i alecin bekun, na ya kɔ aju lui bambaka nyinga n bo bu fere i ka Samosi, na i alecin fɔfɔre, na ya kɔ aju mie kpiri n bo bu fere i ka Miletosi n su. ¹⁶ Na Pɔɔlu aboro i nyi ka i ju Yerusalem

mie kpiri n nu ka, na bu di Pentekoti ceenkpiri ni, nyini ti, wo koro má ka i ce Esiya dee awore nu, na wo san asin Efeso mie kpiri n dee bue ni.

Kabo Pɔɔlu kaariiri Efeso dee Kristo jama nkpienkpienm ni

¹⁷ Saŋga bo Pɔɔlu wo Miletosi mie kpiri n nu ni, na wo sunma afere Kristo jama nkpienkpienm bo bu wo Efeso mie kpiri n nu n ka bu ma bu ni yiri ye. ¹⁸ Saŋga bo bu ba juuri i do ni, na wo se bu ka, “Amberɛ ni am tii si kabo m woowa ti barasu, saŋga kere bo m woori am do ni, fite cɛn gbingbin n bo m ba juuri Esiya awore n nu ni. ¹⁹ M yoori m ŋu kaan wo, na ma yo Mibiɛ n juma n ni nyunvuin. Haari ni bo Yudafoɔm seseeri su ka bu kere m wuwuruwa barasu n kere ni, m mindi deeri i wo. ²⁰ Am si ka deke kere bo i ti kpa na i buka am ni, m kaanri i kereeri am wo jama n kere nyunu, ma fa afie má am su, na m sunati awuru awurum n kere nu na m sukere am. ²¹ M kan kereeri Yudafoɔm ni bo bu ti má Yudafoɔm n kere wo, ka bu kaaki bu wo fa ko Nyeme do, na bu yo ya Mibiɛ Yesu n yarada. ²² To, kisa Awiewie Casi ni ma m suko Yerusalem mie kpiri n nu n a, ama, m gusu si má deke bo i ko yo m do. ²³ Deke bo m si i n la ka, mie kere bo m ko su ni, Awiewie Casi n se m ka bu kere m wuwuruwa, na bu nyi m dansaraka. ²⁴ Ama, m fa má m tienɔu ŋɔɔ yo má puɔ. Deke bo i kpie m daafiri n kere la ka, má ka ma yo juma n bo Mibiɛ Yesu n afa ama m n awie. Yiri la ka, m kan labari kpa n fa ko Nyeme ahoroɔma n bo wo fa ama minem ni.

²⁵ Kisa m si ka am be mmoo ŋu má m kun, amberɛ bo m yo nati am nu kan Nyeme jore fa ko i femeya n su kere am ni. ²⁶ Nyini dee ti, m suse am wo lee nyuma, na woro kere bo a kaari ŋgbɛɛn, i ti má m jore. ²⁷ Dama deke kere bo Nyeme koroori ka am yo i ni, ma fa afie má am su, ma kan i akere am. ²⁸ Nyini ti, am bita am ŋu nyunyumi, na am kaaki nie Kristo jama minem kere su, bere bo Awiewie Casi n afa ama am ka am nie bu dika ni, kabo boesasafɔ nie i nboem su ni. Nyini minem ye Nyeme faari i tienɔu Wa mbunja deeri bu jiiiri n a. ²⁹ M si tenle su ka m ko yakiiri am, mine tiem ba wura am nu, kabo bedi wura nboem nu sandi bu n wo. ³⁰ Haari na am dee minem nbem bo bu wo am nu fen ni, bu ba kaaki nahore ni, na bu daɔaka yaradayofɔm nbem na bu su bu dee atin n su. ³¹ Nyini dee ti, am kpa am ŋu, na am tenɔe su ka afɔ nsan lee bo m nati bobo am ni nyunvuin, koŋɔue ni wiesu. ³² Kisa, m sufa am wura Nyeme saa nu wo lee, na i nie am dika, na m kaaki fa am wura i dee noaniɛ n bo i ma am ahoroɔma nu, na i buka am na i má am nya deke n bo Nyeme ase ka i fá ma i tienɔu minem kere ni. ³³ M konviki awo má be ŋwaa, wara sutura nu. ³⁴ Amberɛ mmoo ni am tii si ka m yo faari m saa yoori m juma a, ye m fa bukaari m ŋu ni m lamokom n kere a. ³⁵ Kabo ma yo juma n so ni, m sukere am ka am gusu yo i so o lee, na am buka yaarifom, na am tenɔe su kabo ya Mibiɛ Yesu n ni i tii seeri ni. I ŋa, “Terefie wo soɔ bo i ce aceeri n do tara soɔ bo i de aceeri ni.” ³⁶ Saŋga bo Pɔɔlu jɔɔ wieeri ni, na i ni bere kere akutu bu jaa nanɔgoroma su, na wo sere Nyeme. ³⁷ Na bu kere asun, na ba fa bu saa abara aye i, na ba biti i. ³⁸ Na bu ahore asaaki agaya, dama i seeri bu ka bu ŋu má i kun. Na ba se i atin nu, na wo ko awura lee bambaka n nu.

¹ Na ya kaari bu, na ya fa lee bambaka, na ya wo ya tii cein ako aju mie n bo i wo lui bambaka n su na bu fere i ka Kosi ni. Na i alecin na ya ko aju awore n bo bu fere i ka Rodesi ni, na ya fite do, na ya ko Patara mie kpiri n nu. ² Do na ya nu lee bambaka be ka i suko Fonisiya dee awore n nu, na ya wura i ako. ³ Ya suko ni, na ya nu Sipurusi lui bambaka ni, na ya yaki ya saa bie su, na ya sin ako Siriya awore n nu. Na ya nya ako ajina Tiro mie kpiri n nu, do ye bu yi bu soori n lee n nu a. ⁴ Na ya ko anienie Yesu susufom busu, na ya wo bu do lesu. Na Awiewie Casi n ama ba se Poolu ka ma i ko Yerusalem mie kpiri n nu. ⁵ Ama, ya yasu ceen n ba juuri ni, na ya fite ka ya ko, na bu ni bu yim, ni bu nbaam ase ya atin nu afite mie n nu ako tieku n noo su. Do na ya ni bere kere akutu ya jaa nangoroma su, na ya sere Nyeme. ⁶ Nyini sin, na ya kaari ya bengu, na yere awura lee bambaka n nu, na bere gusu akpie bu nyi ako awuru.

⁷ Na ya fite Tiro ako aju mie kpiri n nu, na ya ko anie yaradayofom ni busu, na ya da bu do lekun. ⁸ I alecin fofore na ya fite bere ako aju Sizariya mie kpiri n nu. Do na ya ko awo sono be dika, bu fere i ka Filipu, i ti Nyeme jore kanfo o. Yiri bukaari mine nsom bo bu yo yiiri bu ka bu buka Kristo jama n bo bu wo Yerusalem n a. ⁹ I yo la nbaabaram nna a, bu be nya ja ma. Bere nati yo Nyeme noanie kanfo juma n a. ¹⁰ Ya woori do yoori lennyo, na Nyeme noanie kanfo be aba do, bu fere i ka Agabusi, i fite Yudiya awore n nu wo. ¹¹ Na wo ba ya do, na wo fa Poolu dambara, acici i dee jaam ni i saam. Na wo nya ase ka, "Awiewie Casi n na o, kabo Yudafom bo bu wo Yerusalem ni cici ahin dambara n fo lee, na bu nya fa i ma minem bo bu ti ma Yudafom ni." ¹² Sanga bo ya tiiri nyini jore n so ni, na ya ni minem n bo bu wo do n asere Poolu jande ka ma i ko Yerusalem. ¹³ Ama, na wo bisa, "Nzu ti ye am suyo so na am saaki m ahore a? Mini, ma yo siriyi na m ko Yerusalem, na bu ko cici m nyama, ma nyini ngumi, ama, haari na bu kun m, ya Mibie Yesu n dee ti." ¹⁴ I seeri so ni, ya koro akanda ma i ka ma i ko, na ya mo ya noo, na ya se i ka, "To, ma Mibie n dee koroowa yo."

¹⁵ Ya diiri lennyo do ni, nyini sin, na ya sese ya nu su, na ya nya ako Yerusalem. ¹⁶ Na Yesu susufom nbem bo bu fite Sizariya n asu ya su, na ba fa ya ako ka ya ko wo sono be dika, bu fere i ka Manesoni, i ti Sipurusifo o, wo su Yesu dee atin n su ace.

Kabo Poolu ko nieeri Yakobo busu ni

¹⁷ Sanga bo ya ko juuri Yerusalem mie kpiri n nu ni, na ya ninbaam n ade ya ni ahorejo nyunyumi. ¹⁸ I alecin na Poolu afa ya ako Yakobo do, na ya ko atu Kristo jama nkpienkpienm kere ka bu wo i do. ¹⁹ Ya bisaari ahin n wieeri ni, na Poolu akan deke n kere kun kun fa ko kabo Nyeme ma wo yo i juma ama minem bo bu ti ma Yudafom ni. ²⁰ Bu tiiri nyini noanie n so ni, na ba kansa Nyeme. Ama, na ba se i ka, "Ya niwa Poolu, m na a nu Yudafom akpii beberebe bo bu wo ya nu fen na ba yo Yesu yarada, ye bu gusu nyunu aboro ka bu su Nyeme noanie kpamaawa n su. ²¹ Ba ti ka a kere Yudafom bo bu tana minem bo bu ti ma Yudafom n nu ni, ka ma bu su Nyeme noanie kpamaawa n bo Moyisi fa maari n su, ye a se bu ka ma bu wura bu nbaam kenkenne, na ma bu kaaki su Yudafom nana sayoowam su. ²² Nahore, bu ti ka a ba. Ye ya yo se wo? ²³ Ti fen, kabo ya yo n la ka, mine nna nbem wo ya nu fen bo ba tan ndie. ²⁴ Su bu su na a ko bie fin kabo bu yoowa kere ni, na a to bu tii su kaari, adena

bu koro yi bu tii. Nyini ni má sɔnɔ kere si ka jɔre n kere bo bu kan i fa kɔ u dɔ n ti kɔre wɔ, na bu si ka wɔrɔ mmɔɔ ni u tii su Nyeme noanie kpamaawa n su wɔ. ²⁵ Ama, minem bo bu ti má Yudafoɔ na ba yo yarada n yiri, ya kere kadasi ama bu, ka má bu se ka bu di tie nie, wara mbunja, wara deke bo wɔ wu i ngumi na ba kpɛe má i kɔm, na má bu yo sakaraya.” ²⁶ I alecin, na Pɔɔlu afa minem n ako na ba ko ayo fin biɛewa yoowa ni, na wɔ nya awura Nyeme Sereebiri Awuru n nu, na wɔ jɔɔ akere Nyeme sayoowa donɔguyofom ni, cɛen n bo bu ba bie fin n wie, na bu kun kun n kere yo bu tii su sayoowa ni.

Kabo bu taraari Pɔɔlu Nyeme Sereebiri Awuru n nu ni

²⁷ Sangga bo wɔ ka kaan na lesɔ cɛen n wie ni, na Yudafoɔ nbem afite Esiya dɛe awɔre n nu aba dɔ, na ba ŋu Pɔɔlu Nyeme Sereebiri Awuru n nu. Na ba ye jama n kere ahore su, na ba tara Pɔɔlu. ²⁸ Na ba tien, bu ŋa, “Yisarelifom, am buka ya. Ahin sɔnɔ ni nati jengbe deke n kere kere minem kere ɔ, ka má bu bu Yisarelifom, ni Nyeme noanie kpamaawa ni, ni Nyeme Sereebiri Awuru ni. Ye wɔ kaaki afa minem bo bu ti má Yudafoɔ aba awura Nyeme Sereebiri Awuru n nu, na wɔ yo ahin woobiri casi n fin.” ²⁹ Deke n bo i ti na bu seeri sɔ n la ka, ba du mɔ aŋu Torofimosi bo i fite Efeso mie kpiri n nu ni, ni Pɔɔlu mie kunnu, nyini dɛe ti ye bu sunsuunri ka Pɔɔlu afa i awura Nyeme Sereebiri Awuru n nu n a. ³⁰ Na mie n abo nu, na minem kere aŋmati atien bu nɔɔ, na ba tara Pɔɔlu acin ayi i afite Nyeme Sereebiri Awuru n nu. Na ba kaba anyi Nyeme Sereebiri Awuru n anɔ ni ndende. ³¹ Má bu koroori ka bu kun Pɔɔlu wɔ. Dɔ na labari n atu Romafom sojam kere kpɛen n ka Yerusalem mie kpiri n abo nu. ³² Kpeŋga na wɔ yasɔ ndende, na wɔ fa sojam ni bu nkpienkpienm, na ba ŋmati aju dɔ. Sangga bo jama n ŋuuri soja kpɛen n ni i sojam ni, na ba yaki Pɔɔlu, ba bo má i kun. ³³ Na sojam kpɛen n ako atara Pɔɔlu, na wɔ ma nɔɔ ka bu wura i jɔrɔko nnyɔ. Na wɔ bisa ka, “Ahin sɔnɔ ti nzu sɔnɔ ɔ? Ye wɔ yo nzu wɔ?” ³⁴ Na jama ni nbem sutientien sujɔɔ, bu jɔɔɔwa n woori i ngumi ngumi wɔ, ba jɔɔ má jɔre kun. Bu nanɔmie dɛe ti, wɔ koro asi má jɔre n bu. Na wɔ ma nɔɔ ka bu fa Pɔɔlu kɔ bere sojam dika bambaka n nu. ³⁵ Bu faari Pɔɔlu kɔ juuri bimbɛndi bo bu tientien su fun na bu wura gisan nu ni, na i boori i bu ka i fun kɔ sɔɔ n angoro ni, sojam n kukuuri i wɔ, dama jama n biɛkpa n dɛe ti. ³⁶ Na bu sunmati su i su, sutien kpa, bu ŋa, “Am kun i, am kun i.”

Kabo Pɔɔlu kaanri i jɔre n kereeri jama n ni

³⁷ Sangga bo bu sukoro ka bu fa Pɔɔlu wura sojam dika bambaka n nu ni, na Pɔɔlu ase sojam kere kpɛen n ka, “Ma m kan jɔre be na a ti.” Na sojam kere kpɛen n abisa i ka, “A ti Giriki anie? ³⁸ Nyini yiri, a ti má Ijipiti sɔnɔ n bo i yo duuri mine akpii nna mɔ ka bu tu gomina n ni, na i faari nyini mine akpii nna n kere kɔori boro kpantain n nu ni.” ³⁹ Na Pɔɔlu abɔ i nu ka, “Ai, mini, m ti Yudafoɔ ɔ, m ti miebaa a, m fite Tarasu wɔ, mie kpiri n bo i la duma na i wo Silisiya awɔre n nu ni. Jande, ma m jɔɔ minem ni dɔ.” ⁴⁰ Na sojam kere kpɛen n ama i atin ka i jɔɔ, na Pɔɔlu ajina bimbɛndi n bo bu tientien su fun na bu wura gisan nu ni, na wɔ fa i saa ayo minem n ka bu yaki nanɔmie. Na ba to amuna, na Pɔɔlu aɔɔɔ bu dɔ Hiburu anie nu.

22

¹ I ɲa, “M sim ni m ninbaam, am ti fen, m koro ka m kan m jɔɛ n na am ti.” ² Saɲga bo bu tiiri ka i sujɔɔ bu dɔ Hiburu aniɛ nu ni, na ba yaki nanmie na ba mɔ bu nɔɔ surum. Na Pɔɔlu ase ka, ³ “M ti Yudafɔɔ, bu wuuri m Tarasu mie kpiri n nu wɔ bo i wo Silisiya awɔɛ n nu ni, ama, bu taari m Yerusalem mie kpiri n nu fen wɔ, Gameli kereeri m kara a, ye m sɔnsɔnri ya nam sayoowa atin n kere ni anyumboro. Na ma fa m ɲu kere ama Nyeme, kabo ambere bo am jina fen nyuma n afa am ɲu ama i ni. ⁴ Na ma kere minem bo bu su ahin atin n su n wuwuruwa, haari na ma kun bu nbem. Na ma tara bu nbiesom ni nbaram anyi bu dansaraka. ⁵ Nzen am bisaari Nyeme sayoowa dɔɲguyofom n kere kpɛn ni, ni tereterefom ni, bu sé am ka noanie n bo m sujɔɔ i n ti nahore wɔ. Haari na ba ma m kadasi ka m fa kɔ ma ya minem bo bu wo Damasiko mie kpiri n nu ni, adena m koro tara Yesu minem ni, na m wura bu jɔɔkɔ fa bu ba Yerusalem na bu bá cin bu sui.”

Kabo Pɔɔlu kaanri kabo i kaakiiri i wo barasu ni

⁶ Na Pɔɔlu asa su ase bu ka, “Saɲga bo m wo kɔ su n na m kɔ dodoori Damasiko mie kpiri n ni, wie kekete saɲga lɛɛ, na sin be akaba afite angoro ata abara aye m. ⁷ Na ma kpaasi haari asiɲgu, na ma ti akonvi be ɲga, i ɲa, ‘Sɔɔlu, Sɔɔlu e, nzu ti ye a kere m wuwuruwa sɔ a?’ ⁸ Na ma bisa i ka, ‘M Mibie, wɔɔ ɲma a?’ Na wɔ bo m nu ka, ‘Mini Yesu Nazaretifɔ n a, mini ye a kere m wuwuruwa n a.’ ⁹ Na minem bo bu su m su n aɲu sin ni, ama, ba ti má akonvi n yiri ɲga. ¹⁰ Na ma bisa i ka, ‘M Mibie, ye a ɲa m yo nzu wɔ?’ Na wɔ se m ka, ‘Yasu na a kɔ Damasiko, dɔ ye bu sé u deke n kere bo Nyeme koro ka a yo i ni.’ ¹¹ Sin n bo i ta wuraari m nyumbaa nu agaya n dɛɛ ti, na ma yo anyinsin, na minem ni bo bu su m su n aso m saa nu afa m awura Damasiko. ¹² Tɔ, sɔɔɔ be woori mie n nu, bu fere i ka Ananiyasi, i su Nyeme wɔ, na i su i noanie kpamaawa n su, i ti sɔɔɔ n bo Yudafom bo bu wo mie n nu n kere ma i jirima agaya a. ¹³ Na wɔ ba m dɔ ajina adodo m, na wɔ se m ka, ‘M niwa Sɔɔlu, nie, a ɲú asi.’ Jina n nu bere na ma ɲu asi bekun, na ma nie aɲu i. ¹⁴ Na wɔ se m ka, ‘Nyeme n bo ya nam su i ni, yiri ye wɔ yi u a, na a si i sa koroowam, ye wɔ yi Sɔɔɔ n bo i yo sa bo i kɔ atin su n akere u, na a ti yiri ni i tii noanie jɔɔɔwa. ¹⁵ Dama deke bo a ɲu i na a ti i ni, wɔɔ kán kere minem kere. ¹⁶ Ye kisa, a ɲminda nzu wɔ? Yasu na bu bie u Nyeme nzue. Bo fere i duma na i ɲmisi yi u satie kere.’”

Kabo Pɔɔlu kaanri ka Nyeme asunma i minem bo bu ti má Yudafom dɔ ni

¹⁷ Na Pɔɔlu asa su ase bu ka, “Nyini ti, na ma kpɛ m nyi akɔ Yerusalem mie kpiri n nu, saɲga bo m wo Nyeme Sereebiri Awuru n nu wo nyemesere su ni, na wɔ yo m ka alele dɛɛ su wɔ, ¹⁸ na ma ɲu Yesu ka i sujɔɔ m dɔ, i ɲa, ‘Yasu na a fite Yerusalem ndende, dama minem bo bu wo fen ni dé má m jɔɛ n bo a kan kere bu ni.’ ¹⁹ Na ma bo i nu ka, ‘M Mibie, bere ni bu tii si tenle su ka m yo wuraari bu tientienbunɔɔ sɔɔm nu wɔ, na ma tara minem bo bu yo u yarada ni, na ma nyi bu dansaraka, na ma bo bu. ²⁰ Sasu bekun, saɲga bo bu sukun Satefano bo i diiri u ɲusu daani kereeri minem ni, m yo jinaari bere, na ma soro su, mini nieeri minem bo bu kuunri i n suturam su a.’ ²¹ Na Mibie n ase m ka, ‘Wɔɔ kɔ, m súnma u dede minem bo bu ti má Yudafom ni dɔ.’”

²² Nyini san̄ga n kere ni, minem ni soori bu sui wɔ, na ba ti jɔre n kere bo Pɔɔlu kaanri i ni, ama, i ba kaanri sɔ ni, na ba tien kpa, bu ɲa, “Am yi i fite fɛn. Am mini i mmɔɔ. Wɔ ti má ye ni ka i wo ni ɲɔɔ.” ²³ Na bu sutientien, yaa ati bu n dɛɛ ti, na bu sufikindi bu suturam tu, na bu susa fa sutu sandi aɲgoro. ²⁴ Na Romafɔm soja kere kpien n ama nɔɔ ka bu fa Pɔɔlu wura bu dika bambaka n nu, na bu bisa i bisaawam na bu fin i ɲgbere na bu si deke bo i ti na Yudafɔm ni tientien sɔ ni. ²⁵ Ama, san̄ga bo bu ciciiri Pɔɔlu nyama n ka bu bo i ni, na wɔ bisa soja kpien n bo i jina dodo i ka, “Atin wo nu ka am bo Roma miebaa na am asi má satie bo wɔ yo i?” ²⁶ San̄ga bo soja kpien n tiiri nyini jɔre n sɔ ni, na wɔ kɔ sojam kere kpien n dɔ, akɔ abisa i ka, “A koro ka a yo ahin sonɔ n sɛ wɔ? I ti Roma miebaa a.” ²⁷ Nyini ti, na sojam kpien n akɔ Pɔɔlu dɔ, akɔ abisa i ka, “A ti Roma miebaa a, nahɔre su?” Na wɔ bo i nu ka, “Eɛn.” ²⁸ Na sojam kpien n ase i ka, “Mini, m tɔɔri ɲwaa beberebe wɔ ye m nya kaakiiri Roma miebaa a.” Na Pɔɔlu ase i ka, “Ama, mini yiri, bu wuuri m miebaa a.” ²⁹ I seeri sɔ ni, kpeɲga na sere ati sojam bo ba yi bu ka bu bisa i bisaawa ni, na ba kɔ bu sin. Na sere ati soja kpien ni mmɔɔ, dama wɔ du mɔ abo Pɔɔlu jɔrɔkɔ ka, ye i nya siiri ka i ti Roma miebaa a.

Kabo bu faari Pɔɔlu kɔɔri Yudafɔ tereterefɔm dɔ ni

³⁰ Na i alectin, sojam kpien n akoro ka i si sa bo Pɔɔlu ayo i na Yudafɔm jaraki i ni, na wɔ yi Pɔɔlu jɔrɔkɔ ni, na wɔ ma nɔɔ ka Nyeme sayoowa dɔɲguyofɔ nkpienkpienm ni, ni Yudafɔ tereterefɔm n kere tien bu nɔɔ. Na wɔ ma Pɔɔlu aba ajina bu nyunu.

23

¹ Na Pɔɔlu afa i nyumbaa akpama Yudafɔ tereterefɔm n ɲu, na wɔ se ka, “M ninbaam, m sunsuni ti kpa wɔ Nyeme dɔ, fite m kaan nu haari ni nyuma.” ² Na Ananiyasi bo i ti Nyeme sayoowa dɔɲguyofɔm n kere kpien n ama minem bo bu jina dodo Pɔɔlu n nɔɔ, ka bu bo i nɔɔ dika, fa kɔ i nɔanie jɔjɔwa n dɛɛ ti. ³ Na Pɔɔlu ase i ka, “Nyeme bó wɔrɔ mmɔɔ, wɔrɔ bo a tana dɔ ka kobe dawa bo ba bo i ɲgoro fofoe ni. A tana na a di m jɔre, fa kɔ Nyeme nɔanie kpamaawa n dɛɛ atin su, ama, wɔrɔ ni u tii asu má i nɔanie kpamaawa n su na a tana ma nɔɔ ka bu bo m.” ⁴ Na minem bo bu jina dodo Pɔɔlu n ase i ka, “Wɔrɔ la ɲma na a kpɛ i nzuko a, yiri Nyeme sayoowa dɔɲguyofɔm n kere kpien ni?” ⁵ Na Pɔɔlu abɔ bu nu ka, “M ninbaam, ma si má ka yiri ti Nyeme sayoowa dɔɲguyofɔm n kere kpien n a. Dama ba kere i Nyeme Jɔre Kadasi n nu ka, ‘Má a jɔjɔ sonɔ bo i nie u minem su jɔre tie.’” ⁶ San̄ga bo Pɔɔlu faari nu ka, minem ni nbem ti Sadusifɔm, na bu nbem gusu ti Farasifɔm ni, na wɔ tien kpa jama n nu, i ɲa, “M ninbaam, m ti Farasifɔ. M sim mmɔɔ suuri nyini atin ni su a. Deke n bo i ti na ya tien ya nɔɔ n la ka, m la tama ka minem wu, bu tɛɲge bu yiwee nu wɔ.” ⁷ Pɔɔlu seeri sɔ wieeri na akuruwa aba Sadusifɔm ni Farasifɔm n afien, na bu tientienbunɔɔ n akpaaki nu nnyɔ. ⁸ Sadusifɔm n ɲa, sonɔ wu, i tɛɲge má i yiwee nu kun, ye bu kaaki ɲa, Nyeme mererekem, wara awiewiem wo má bere. Ama, Farasifɔm bere yo nyinin n kere yarada a. ⁹ Na jama ni sutientien suyo nan̄mie agaya buka su. Na Nyeme nɔanie kerefo nbem bo bu wo Farasifɔm ase n nu n ayasu ajina atien fan̄ga su, bu ɲa, “Yere aɲu má ahin sonɔ ni ɲgasi bo wɔ do i. Beni, awiewie be, wara Nyeme merেকে ajɔjɔ i dɔ a.”

¹⁰ Sangá bo akuruwa n ba bi boroori agaya ni, na sere ati soja kpien ni, ka minem ni bá cincin titi Pɔɔlu nu. Nyini ti, na wɔ ma sojam nɔɔ ka bu wura jama n nu na bu yi Pɔɔlu fite bu nu, na bu fa i ba wura bu dɛɛ dika bambaka n nu. ¹¹ Nyini cɛɛn n kɔŋgwe, na Mibiɛ n ayi i ŋu akere Pɔɔlu, na wɔ se i ka, “Ma u ahore si, na má a soro sere. Kabo a di m ŋu daani Yerusalem miɛ kpiri n nu fɛn ni, sɔ ye i ti ye ni ka a kɔ di i Roma miɛ kpiri n nu gusu a.”

Kabo mine nbem sɛsɛeri su ka bu kun Pɔɔlu ni

¹² I alecin fɔfɔrɛ, na Yudafo nbem atien bu nɔɔ, na ba fa sɛsesu na ba tan ndiɛ ka bu di má, bu nu má, má ka ba kun Pɔɔlu. ¹³ Bɛrɛ n bo bu tana faari nyini sɛsesu ni, bu taraari mine aburana. ¹⁴ Na ba kɔ Nyɛmɛ sayoowa dɔŋguyɔfo nkpienkpienm ni, ni Yudafo tereterefɔm ni dɔ, akɔ ase bu ka, “Yɛrɛ, ya tien ya nɔɔ atan ndiɛ ka ya dí má pui, má ka ya kun Pɔɔlu. ¹⁵ Nyini ti, amɛrɛ ni tereterefɔm ni, am sunma Romafɔm soja kpien n dɔ kɔ se i ka, i fa Pɔɔlu bra am dɔ ka am koro ka am niɛ i jɔrɛ n nu nyunyumi bekun wɔ. Ama, na ya yó siriyá ŋminda i, na ya kún i atin nu na i nya ba ju fɛn.” ¹⁶ Ama, na Pɔɔlu niwa bara be wa ati sɛsesu n bo ba fa i ni, na wɔ kɔ awura sojam sɔɔ bambaka n nu, na wɔ se Pɔɔlu. ¹⁷ Dɔ na Pɔɔlu afere sojam n kun, na wɔ se i ka, “Fa ahin gbefɛnɛ n kɔ am kpien n dɔ, i la jɔrɛ be bo i kán kere i.” ¹⁸ Na soja n afa i akɔ bu kpien n dɔ, na wɔ se i ka, “Pɔɔlu bo ba nyi i dansaraka ni fereeri m a, na wɔ se m ka m fa ahin gbefɛnɛ n ba u dɔ, dama i la jɔrɛ bo i kán kere u.” ¹⁹ Na sojam kɛrɛ kpien n aso i saa nu, na i ni yiri ŋgumi afite ahɛmɛ, na wɔ bisa i ka, “A koro ka a kan nzu jɔrɛ kere m a?” ²⁰ Na wɔ se sojam kpien n ka, “Yudafo m asɛsɛ su ye ba soro su ka ahunma bu bá sere u na a fa Pɔɔlu ma bu na bu fa i kɔ bu tereterefɔm ni dɔ, na bu yó bu ŋu ka bu koro ka bu niɛ i jɔrɛ n nu nyunyumi wɔ. ²¹ Ama, má a soro bu su, dama bu nbem ŋa bu kɔ ŋminda i atin nu wɔ, bu tara minem aburana. Ba tan ndiɛ ka bu dí má, bu nú má, má ka ba kun Pɔɔlu. Kisa ba yo siriyá su aŋminda na bu ti kabo a sé.” ²² Na sojam kɛrɛ kpien n abobo i ka, “Má a ma be si ka a kan ahin jɔrɛ n akere m.” Na wɔ ma gbefɛnɛ n atin na wɔ kɔ.

Kabo bu faari Pɔɔlu kɔɔri Gomina Felika dɔ ni

²³ Na sojam kɛrɛ kpien ni, afere soja nkpienkpienm ni nnyɔ, na wɔ ma bu nɔɔ ka, “Am fa sojam yaa nnyɔ, ni soja kpɔŋgɔfunfɔm aburaso, ni soja kpiɛbitafɔm yaa nnyɔ, na am yo siriyá kɔŋgwe n nu, kerefi ŋgɔna sangá, na am kɔ Sizariya miɛ kpiri n nu. ²⁴ Na am nya kpɔŋgɔ ma Pɔɔlu gusu, na am fa i haari na am kɔ ju Gomina Felika dɔ, na má pui yo i.” ²⁵ Na sojam kpien n akere kadasi ama gomina n ka,

²⁶ “Mini Kalodisi Lisiyasi sukere ahin kadasi n bisa wɔrɔ, m si Gomina Jirimafɔ Felika dɔŋgu a. ²⁷ Yudafo taraari ahin sɔnɔ n a, má bu koro ka bu kun i wɔ. Ama, na ma ti ka i ti Roma miɛbaa a, nyini ti, na ma fa m sojam, na ya kɔ ade i aji. ²⁸ Na ma koro ka m si deke n bo i ti na bu jarakiiri i ni, nyini ti, na ma fa i akɔ Yudafo tereterefɔm dɔ. ²⁹ Na ma ŋu ka fa kɔ bu nɔaniɛ kpamaawa n dɛɛ atin su ye bu jarakiiri i a, ama, wɔ yo má sa be bo i ti ye ni ka bu kun i, wara bu nyi i dansaraka. ³⁰ M tiiri ka Yudafo m asɛsɛ su akɔ ada aŋminda atin nu ka bu kun i, nyini dɛɛ ti, ye m ma ba kaba afa i aba u dɔ n a. Ma se minem bo bu jarakiiri i n ka bu fá jɔrɛ n bra u dɔ.”

³¹ Na sojam n ayo kabo i kereeri bu ka bu yo ni, na ba fa Pɔɔlu nyini kɔŋgue n kere, na ba fa i akɔ aju mie kpiri n bo bu fere i ka Antipatiriso n su. ³² Na i alecin fofɔre na sojam bo bu nati bu jaa su n akpie bu nyi akɔ sojam sɔɔ bambaka n nu, na ba ma soja kpɔŋɔfunfɔm n afa i akɔ aju deke bo bu sukɔ ni. ³³ Bu kɔ juuri Sizariya ni, na ba fa kadasi n ama gomina ni, na ba nya afa Pɔɔlu awura i saa nu. ³⁴ Gomina n kaanri kadasi n wieleri ni, na wɔ bisa Pɔɔlu awɔre bo i fite nu. I faari nu ka i fite Silisiya awɔre n nu wɔ, ³⁵ na wɔ se i ka, “Minem bo bu jarakiiri u n ba juuri, m ti u nɔanie.” Na wɔ ma nɔɔ ka bu fa Pɔɔlu wura Feme Herode dika n nu, na bu nie i dika nyunyumi.

24

Kabo Yudafɔm jarakiiri Pɔɔlu Gomina Felika n nyunu ni

¹ Na i lennu cɛen sin, na Ananiyasi bo i ti Nyeme sayoowa dɔŋguyofɔ n kere kprien n aba aju Sizariya mie kpiri n nu, i ni Yudafɔ tereterefɔ nbem, na ba fa jɔresifo be bo bu fere i ka Tetulɔsi n abuka bu ŋu su. Na ba jaraki Pɔɔlu gomina n nyunu. ²⁻³ Bu faari Pɔɔlu ba juuri n na Tetulɔsi abo i bu na i kan ŋgasi bo Pɔɔlu ado i. I ŋa, “Ya si Felika jirimafɔ, u ŋgɔnle kpa n bo a la i n dɛɛ ti, nyini ma ya nya tanalaifie ace a, ye kaaki aba ya asien n su a, fa kɔ nyini sunsunni n bo a la i ni. Deke kere bo ya wo ni sanɔa kere, ya nyunu ayi u fa kɔ deke n kere bo a yo ama ya ni, nyini dɛɛ ti, ya da u asi beberebe. ⁴ Tɔ, m koro má ka m jɔɔ saaki u sanɔa, ama, m sere u wɔ, sawɔre n bo a la i n dɛɛ ti, ti ya ahin jɔre kaan ni. ⁵ Ya ŋu ka ahin sɔnɔ n ti miebofɔ ɔ, na i nati sukpukpura Yudafɔm tii durunya n kere nu, na bu sudi aluwa ni bu beŋgu. I ti mɔfɔ ɔ, fa kɔ minem bo bu su Nazaretifo n atin n su ni. ⁶ Haari i yo koroori ka i wura Nyeme Sereebiri Awuru n nu wɔ na i saaki i na i yo i fin, ye ya taraari i a. [Má ya koroori ka ya fa ya nɔanie kpamaawa n atin su di i jɔre wɔ, ⁷ ama, na sojam kprien Lisiyasi n ade i ya dɔ ni fanɔa, ⁸ na wɔ ma nɔɔ ka, bo bu ni yiri la jɔre n kere bra u dɔ.] Na nzen wɔɔ mmɔɔ ni u tii niɛeri jɔre n nu, a sí deke n bo i ti na ya jaraki i ni.” ⁹ Na Yudafɔm n kere ajina su ka, jɔre n kere bo bu jɔɔ i n ti nahɔre wɔ.

Kabo Pɔɔlu kaanri i nahɔre Gomina Felika n nyunu ni

¹⁰ Na Gomina Felika ama Pɔɔlu atin ka i jɔɔ, na Pɔɔlu ase ka, “M si ka a di jɔre ahin asien n su ace, nyini ti, m ahore ti siiwa ka ma ba u dɔ na m kan de m tii. ¹¹ Wɔɔ mmɔɔ ni u tii koro bisa na a ti, ka i nyuma leburu lennyɔ lee, bo m kɔri Yerusalem mie kpiri n nu ka m kɔ su Nyeme. ¹² Bere n anu má ka m ni be suse akuruwa Nyeme Sereebiri Awuru n nu, ba kaaki anu má ka m ni be suwura minem bu sin na bu yo sa be tientienbunɔɔ sɔɔm n nu, wara mie n nu. ¹³ Bere gusu koro kan kere má u deke n bo i ti na kisa bu sujaraki m ni. ¹⁴ Ama, deke bo m soro i su ka i ti nahɔre n la ka, m su Nyeme wɔ, kabo ya nam su i ni, nyini atin n gusu ye bu ŋa i ti má nahɔre n a. Ama, m yo deke bo ba kere i nɔanie kpamaawa n nu n yarada, na m kaaki yo deke bo ba kere i Nyeme nɔanie kanfɔm dɛɛ kadasi n nu n yarada. ¹⁵ M la tama Nyeme dɔ ka minem bo bu yo sa bo i kɔ atin su, ni bo bu yo sa bo i kɔ má atin su n kere bá tenge bu yiwee n nu, kabo bere n bo bu jaraki m n gusu la nyini tama ni. ¹⁶ Nyini dɛɛ ti, sanɔa kere m boro m nyi wɔ, na m sunsunni ti casi fa kɔ Nyeme ni adamandem dɔ. ¹⁷ M fiteeri

Yerusalem, wɔ ɔɛ, nyini sin, na ma kpɛ m nyi akɔ dɔ ka m kɔ fa ŋwaa ɔɛ m minem bo bu ti yaarifɔm n na m yo m dɛɛ yoowa ma Nyemɛ. ¹⁸ M wo nyini yoowa n yo su ye bu ŋuuri m Nyemɛ Sereebiri Awuru n nu a. Nyini sanɔa ni, ma yo fin biɛ yoowa n awie mmɔɔ. Jama be awo má m dɔ, be gusu ayo má nanɔmɛ be. ¹⁹ Ama, Yudaɔm nbem bo bu fite Esiya awɔre n nu ni, yo woori dɔ a. Wɔ yo daka ka má bere mmɔɔ ni bu tii wo fen, na bu kan m ŋgasi bo ma do i n kere u. ²⁰ Nzen má nyini, yaki na ahin minem bo bu jina fen n kan ŋgasi bo m doori, sanɔa bo m jinaari bu teretereɔm nyunu na bu diiri m jɔre ni. ²¹ Má ka deke kun n kpɛin be bo bu yo sudi m jɔre na m jinaari bu nyunu ni. Yiri la bo m seeri ka minem wu, bu káaki tenge bu yiwee nu ni, nyini dɛɛ ti, ye a sudi m jɔre nyuma n a.”

²² Na Gomina Felika si Mibiɛ n atin n sereya n kere nyunyumi n dɛɛ ti, na wɔ se bu ka, “Am kɔ ka, na sojam kpɛin Lisiyasi ba baari, na m nyá di jɔre ni.” ²³ Na wɔ ma nɔɔ ka soja kpɛin n nie Pɔɔlu dika nyunyumi, ama, i ma i atin na i nati i koroyanu, na i ma i danfom gusu atin na bu koro ba buka i.

Kabo bu faari Pɔɔlu jinaari gomina n ni i yi n nyunu ni

²⁴ I yoori lennyɔ, na Gomina Felika akaaki aba, i ni i yi Durusila, i ti Yudaɔ baa a. Na wɔ sunma afere Pɔɔlu na i ba kan kabo sɔnɔ yo Yesu Kristo yarada barasu ni. Na wɔ so i sui ati. ²⁵ Ama, sanɔa bo Pɔɔlu wo jɔɔ su fa kɔ sa bo i kɔ atin su, ni tarabuɔ, ni kabo Nyemɛ bá di minem n jɔre ni, na sere ati Gomina Felika na wɔ se ka, “Tɔ, kisa, wɔ se su. A koro kɔ, na m ba nya sanɔa na m fére u.” ²⁶ Nyini sanɔa n kere ni, i sunsunni la ka Pɔɔlu má i ŋwaa a, nyini ti ye sanɔa sanɔa i fere Pɔɔlu, na bu subo anzama n a. ²⁷ Na afɔ nnyɔ aba asin, na sɔnɔ be bo bu fere i ka Pɔkiyɔsi Fesitosi ade Felika jinaabiri ni. Na Gomina Felika akoro ka i jɔ Yudaɔm n ahore, nyini dɛɛ ti, na wɔ yaki Pɔɔlu dansaraka n nu, i ma ba yi má i.

25

Kabo Pɔɔlu sereeri ka bu fa i jɔre n kɔ Romaɔm fɛmɛ kpiri n dɔ ni

¹ Gomina Fesitosi ba juuri nyini awɔre n nu ni, i lesan, na wɔ fite Sizariya miɛ kpiri n nu, na wɔ fun akɔ Yerusalem miɛ kpiri n nu. ² Na Nyemɛ sa-yoowa donɔguyofɔ nkpienkpɛnm, ni Yudaɔ teretereɔm n aba akan ŋgasi bo Pɔɔlu ado i n akere Gomina Fesitosi. Na ba sere i jande ³ ka i boro i nyi na i ma bu fa Pɔɔlu ba Yerusalem. Deke n bo i ti na bu seeri sɔ n la ka, ba sese su ka bu kɔ ŋminda i atin nu wɔ na bu kun i. ⁴ Na Gomina Fesitosi abɔ bu nu ka, “Pɔɔlu wo dansaraka nu Sizariya, mini ni m tii, m kpɛ m nyi kɔ dɔ kisa. ⁵ Am ma am nu nbem bo bu la yiko n su m su, na ya kɔ Sizariya, na nzen wɔ do ŋgasi be a, na bu koro kan i na bu jaraki i.”

⁶ Na Gomina Fesitosi awo bu dɔ, lemɔɔɛ ni leburu afien, na wɔ nya aba Sizariya. I alecin na wɔ kɔ atana jɔre diibiri ni, na wɔ ma nɔɔ ka bu fa Pɔɔlu bra. ⁷ Sanɔa bo bu faari Pɔɔlu ba juuri n ni, na Yudaɔm bo bu fiteeri Yerusalem baari n atien bu nɔɔ abara aye i. Na ba kan i ŋgasi tietie beberebe bo bu ŋa wɔ do i, bu gusu akoro akere má ŋgasi n bo bu ŋa wɔ do i n tenle su. ⁸ Na Pɔɔlu ase ka, “Ma do má ŋgasi be fa kɔ Yudaɔm dɛɛ nɔanie kpamaawa n su, ma do má ŋgasi be fa kɔ Nyemɛ Sereebiri Awuru n su, ma kaaki ado má ŋgasi be fa kɔ Romaɔm Fɛmɛ Kpiri Siza n dɔ.” ⁹ Ama, na Gomina Fesitosi akoro ka i buka Yudaɔm ni, na i da bu ahore, nyini dɛɛ ti, na wɔ bisa Pɔɔlu ka, “A soro su ka ya kɔ Yerusalem na bu kɔ

di u jore n do m nyunu, fa ko ahin sereyam kere su?" ¹⁰ Ama, na Pɔɔlu abo i nu ka, "M jina Romafom femɛ kpiri n jore diibiri wo lee, fen ye wo yo daka ka bu di m jore a. Woro mmoo ni u tii si tenle su ka ma do ma Yudafoŋ ngasi be. ¹¹ Nzen ma do ngasi be bo wo yo daka ka bu kun m, ma kete ma ka ma bu kun m. Ama, nzen jore n kere bo ba kan i n be ti ma nahore, be la ma atin bo i koro fa m wura bu saa nu. Nyini ti, m sere ka a fa m jore n ko Romafom femɛ kpiri n do." ¹² Na Gomina Fesitosi ni i nkpienkpienm n atana anu bu nu, na ba soro su, na wo se Pɔɔlu ka, "A sere ka ya fa u jore n ko Romafom femɛ kpiri n do. To, ya fa u ko i do."

Kabo bu faari Pɔɔlu baari Feme Agiripa n nyunu ni

¹³ Na wo yo lennyo, na Feme Agiripa ni i siwa baabara Berenisi aba Sizariya mie kpiri n nu, ka bu ba nie Gomina Fesitosi busu. ¹⁴ Bu woori do cɛeri kaan n dee ti, na Gomina Fesitosi akan Pɔɔlu jore n kere n akere femɛ ni. I na, "Felika yo yakiiri sono be dansaraka n nu fen. ¹⁵ Sanga bo m kooŋi Yerusalem mie kpiri n nu ni, na Yudafo Nyeme sayoowa doguyofo nkpienkpienm, ni Yudafo tereterefoŋ n aba m do, na ba kan nyini sono n jore, ka m boro m nyi di i jore n na m se ka wo do ngasi. ¹⁶ Ama, na ma se bu ka yere Romafom, ya yo ma so, nzen minem ajaraki sono, ya ma bu kere tien bu noo, na i mi si deke n bo i ti na bu jaraki i ni, na i gusu nya kan i dee bo i la i ni. ¹⁷ Sanga bo bu suuri m su ba juuri fen ni, ma wura ma nnyo nu, i alectin m kaba ko tanaari jore diibiri n wo, na ma ma noo ka bu fa sono n bra. ¹⁸ Sanga bo bu yasu jinaari na bu jaraki i ni, ba kan ma satie bo ma m sunsun ka wo yo i na bu fa jaraki i ni. ¹⁹ Ama, i ti akuruwa ye bu seeri a, fa ko bu nyemesu atin su, ni sono be bo bu fere i ka Yesu n busu, bu na wo wu, ama, Pɔɔlu na i toko la ngoo. ²⁰ Ma si ma kabo m tara ahin jore n tii ni i jaa barasu, na ma bisa Pɔɔlu ka, i koro ka ya fa i ko Yerusalem na bu ko di i jore n do, nzen se? ²¹ Ama, na Pɔɔlu asere ka, i koro ka i ka dansaraka n nu haari i ba ko Romafom femɛ kpiri n do. Nyini ti, na ma ma noo ka bu subita i haari m ba nya atin na m ma bu fa i ko femɛ kpiri n do." ²² Na Feme Agiripa ase Gomina Fesitosi ka, "M koro ka mini ni m tii ti ahin sono n jore ni." Na Gomina Fesitosi ase i ka, "Ahunma a ti i jore ni."

²³ To, na i alectin, na Feme Agiripa, ni Berenisi afite ni bu femeya jirima bambaka, na bu ba wura tientienbunoo soo bambaka n nu, bu ni soja nkpienkpienm, ni mie n nu mine anyunuyifoŋ. Na Gomina Fesitosi ama noo, na ba fa Pɔɔlu awura. ²⁴ Na Gomina Fesitosi ase ka, "Ya si Feme Agiripa, ni ambere kere bo am atien am noo fen ni, am nie ahin sono ni. Yiri dee ti ma Yudafoŋ kere bo bu wo Yerusalem, ni bo bu wo fen n yo baari m do a, na bu sutientien ka i ti ma ye ni ka i wo ni ngoo. ²⁵ Ama, m gusu afiiti i jore n nu, ma nu ma i ngasi bo wo do i na i ti ye ni ka i wu. Nyini ti, kabo yiri ni i tii asere ka m fa i jore n ko Romafom femɛ kpiri n do ni, m fa i ko doo. ²⁶ Ama, m la ma deke be tenle su bo m kere fa ma femɛ kpiri ni, fa ko ahin n jore n su. Nyini ti ye ma fa i aba woro Feme Agiripa do a, adena m ni ambere kere nie i jore n nu, na m si deke bo m kere ko ma femɛ kpiri ni. ²⁷ Dama mini do, wo ko ma atin su ka m fa sono bo ba nyi i dansaraka ko ma femɛ kpiri n na m la ma jore bo m kan kere i fa ko deke n bo i ti na bu jaraki i n su."

26

Kabo Pɔɔlu kaanri i jɔɔɛ Fɛmɛ Agiripa nyunu ni

¹ Na Fɛmɛ Agiripa ase Pɔɔlu ka, "Atin wo nu ka wɔɔɔ ni u tii jɔɔɔ." Na Pɔɔlu aye i saa su, na wɔ bo i jɔɔɛ n bu, i ɔa, ² "Fɛmɛ Agiripa, wɔ yo m fie nyuma ka m jina u nyunu, na m kan m jɔɔɛ n nahɔɔɛ su fa kɔ deke n kɛɛ bo Yudaɔɔm jaraki m n su. ³ Dama wɔɔɔ ni u tii asi kabo Yudaɔɔm nana sayoowam n ti, ni kabo ya se bu akuruwam barasu ni. Nyini dɛɛ ti, m sere u wɔ, ka a fa sawɔɔɛ na a ti m jɔɔɛ ni.

⁴ Yudaɔɔm kɛɛ si kabo m woowa yo ti barasu fite m gbefeneya nu, saɔa bo m wo m bɔsufɔm nu ni, haari ni bo m kɔ woori Yerusalem mie kpiri n nu ni. ⁵ Bu si m sa kabo m woowa yo ti, mǎ nyuma. Nzen bu ɔa bu kan nahɔɔɛ, bu se u ka m yo ti Farasifɔm be wɔ, na ma su ya dɛɛ nyini atin n bo i su ti kekereke n su ni anyumboro. ⁶ Kisa, deke bo i ti na m jina am nu nyuma na am sudi m jɔɔɛ ni, yiri la tama n bo m la i fa kɔ deke n bo Nyemɛ seeri ka i yɔ ma ya nam ni. ⁷ Nyini n ye ya aɔɔ buru ni nnyɔ n bo ya su Nyemɛ ni anyumboro wiesu ni kɔngue n ɔminda ka ya nya i n a. Fɛmɛ, ti fen, nyini tama n bo m la i n dɛɛ ti, ye Yudaɔɔm jaraki m n a. ⁸ Nzu ti ye am de mǎ ka Nyemɛ koro tenge minem bu yiwee nu a? ⁹ Nahɔɔɛ mini ni m tii yo sunsuunri ka wɔ yo daka ka m yo sam dɔngɔ na m saaki Yesu Nazaretifɔ n duma. ¹⁰ Kabo m yo yoori Yerusalem lɛɛ. Nyemɛ sayoowa dɔnguyofɔ nkpienkpienm yo maari m yiko, na ma tara Nyemɛ minem beberebe anyi bu dansaraka, na saɔa bo bu diiri bu jɔɔɛ na bu ɔa bu kun bu ni, mini mmɔɔ jina bu sin wɔ. ¹¹ Saɔa kɛɛ saɔa, m natɔ wura ya tientienbunɔɔ sɔɔm nu wɔ, na m sucin bu sui, na m sumie bu ka bu kete Yesu. Na ma fa yaa bu ɔu agaya, haari na m sukɔ mie nyingam su, kɔ sukere bu wuwuruwa."

Kabo Pɔɔlu kaanri kabo i kaakiiri i wo ni

¹² Na Pɔɔlu asa su ase ka, "Nyini dɛɛ ti, na ma sere atin Nyemɛ sayoowa dɔnguyofɔ nkpienkpienm n dɔ, na ba ma m yiko ka m kɔ Damasiko mie kpiri n nu. ¹³ Fɛmɛ, ti fen, m wo atin n nu wo kɔ su ni, fa kɔ wie kekete saɔa, na ma ɔu sin be ka i fite aɔgoro, i ta tara wie, na i wein ata abara aye m ni minem kɛɛ bo bu su m su ni. ¹⁴ Na yere kɛɛ akpaasi haari asiengɔ, na ma ti akonvi be ɔa, ka i sujɔɔ m dɔ Hiburu dɛɛ anie n nu, i ɔa, 'Sɔɔlu, Sɔɔlu e, nzu ti ye a kere m wuwuruwa sɔ a? A sukere u ɔu yaari ngbeɛn wɔ, kabo bu fa toora dɔdɔɔrifɔ sudɔ na i kete, na bu fin i baka n wɔ.' ¹⁵ Na ma bisa ka, 'M Mibiɛ, wɔɔɔ ɔma a?' Na Mibiɛ n abɔ nu ka, 'Mini Yesu ye a sukere m wuwuruwa n a. ¹⁶ Ama, yasu jina. Deke n bo i ti na ma yi m ɔu akere u n la ka, m fa u yo m amususufɔ, na a di m daani kere minem fa kɔ deke bo a ɔu i nyuma n su, ni dekem bo m bǎ yi m ɔu kere u bekun n su. ¹⁷ Na m dɛ u tii fite minem saa nu, Yudaɔɔm ni bo bu ti mǎ Yudaɔɔm ni, dama m susunma u bɛɛ dɔ a, ¹⁸ na a teke bu nyi, na a yi bu fite awosin nu ba wein nu, na a yi bu fite Sitana saa nu, na a fa bu wura Nyemɛ saa nu, adena bu yo m yarada na m fa bu satie ce bu, na bu nya jinaabiri Nyemɛ mine n nu, na bu kɛɛ saɔa wo.' "

Kabo Pɔɔlu kaanri kabo i yoori i juma n ni

¹⁹ Na Pɔɔlu asa su ase ka, "Fɛmɛ Agiripa, nyini dɛɛ ti ni, ma kete mǎ deke n bo Nyemɛ yi kereeri m ka aleɛ nu dɛɛ su ni. ²⁰ Nyini ti, m du mɔ boori i bu Damasiko mie kpiri n nu wɔ, na ma kan akere bu ka bu kaaki bu wo na bu su Nyemɛ, na bu yo sakpa bo i kere ka ba kaaki bu wo. Na ma kɔ

akan akere Yerusalemfom n gusu, na ma nya ako akan akere Yudiya dæ awore n nu fom kere. Nyini sin, na ma ko akan akere minem bo bu ti ma Yudafo m n gusu. ²¹ Nyini dæ ti, ye Yudafo m taraari m Nyeme Sereebiri Awuru n nu, ka bu kun m n a. ²² Ama, Nyeme abuka m dæ ti, ye m toko wo bere haari ni nyuma n a, adena m jina fen di daani kere nfangafom ni tarakam kere, ni mine barasum kere. M sukan ma jore fofore be wo, ma ka sam bo Nyeme noanie kanfom ni Moyisi yo seeri ka bu yo ni, ²³ ka, wo yo daka ka Kristo, Tiidefo n bo Nyeme ase ka i sunma i ni ba di wahara. Yiri ti sono bo i wu na i du mo tenge i yiwee n nu a. Na i kan wein n jore kere Yudafo m, ni minem bo bu ti ma Yudafo m n kere.”

²⁴ Pöolu wo nyini jooori n su na i kan i nahore ni, na Gomina Fesitosi atien i nu kpa, i na, “Pöolu, a bo fie wo. U kara sonson ni u si agaya n ma u ti yo ma juma.” ²⁵ Na Pöolu abo i nu ka, “Gomina Fesitosi jirimafo, ma bo ma fie, ama, m joo anyunkoro ni nahore jore wo. ²⁶ Feme Agiripa si ahin jorem kere, nyini dæ ti, ye m la ahoresi joo i nyunu n a. M si tenle su ka i si ahin sam n kere bo m sukan kere am ni, dama i be mmoo ayo ma fieewa nu. ²⁷ Feme Agiripa, a yo Nyeme noanie kanfom jore n yarada a? M si tenle su ka a yo yarada.” ²⁸ Na Feme Agiripa ase Pöolu ka, “Ahin sanja kaan nu, a sunsun ka a koro joo na a ma m kaaki Kristo susufoo, nzen se?” ²⁹ Na Pöolu abo i nu ka, “Nzen i ce o, i ce ma o, mini yiri, m nyemesere la ka, woro ni minem n kere bo m sujoo am do nyuma ni, am ba kaaki na am yo kabo m ti barasu ni, ama, bu wura ma am joroko kabo ba wura m ni.”

³⁰ I seeri so ni, na feme n ayasu ajina, yiri ni gomina ni, ni Berenisi, ni nyingam n kere bo bu tana bere ni. ³¹ Bu yasuuri na bu wo ko su ni, na ba se bu nuju nu ka, “Ahin sono n ayo ma sa be bo i ti ye ni ka bu kun i, wara bu nyi i dansaraka nu.” ³² Na Feme Agiripa ase Gomina Fesitosi ka, “Nzen ma ahin sono n asere ma ka bu fa i jore n ko Romafom feme kpiri n do, ma ya koro yaki i nu ji.”

27

Kabo bu faari Pöolu sufa ko Roma mie kpiri n nu ni

¹ To, sanja bo bu faari sesesu ka ya fa lee bambaka ko Roma mie kpiri n bo i wo Itali n asien n su ni, na ba fa Pöolu ni dansaraka nyinga nbem ama soja kprien be bo bu fere i ka Juliyosi ni, yiri nie soja asese be su a, bu fere i ka Romafom Feme Kpiri Agusito dæm. ² Na ya ko awura lee bambaka be, i fite mie n bo bu fere i ka Adaramuteno n wo. Lee n ayo siriya suko Esiya awore n nu dæ mie nbem su, na ya wura i ako. Yere ni sono be bo bu fere i ka Arisitakusi n koori a, i fite Tesalonika mie kpiri n bo i wo Makedoniya awore n nu wo. ³ Na i alecin, na ya ko aju Sidon mie kpiri n nu, na Juliyosi ayo Pöolu sakpa, i maari i atin wo, na wo ko anie i danfom busu, adena i ko nya deke bo i koro. ⁴ Ya yasuuri Sidon ka ya ko ni, ya faari Sipurusi lui bambaka n dæ bue n wo, ya koro fa ma deke bo ma ya sukoro ka ya fa ni, dama anuma n cin ya ko ya sin wo. ⁵ Ya yasuuri bere ni, na ya kpie tieku n bo i wo Silisiya, ni Pamfiliya dæ aworem n nu ni, na ya nya ako aju mie kpiri n bo bu fere i ka Mira na i wo Lisiya dæ awore n nu ni. ⁶ Do na soja kprien n anju lee bambaka be ka i fite Alekizanderiya mie kpiri n nu suko Itali, na wo fa ya awura nu. ⁷ Ya yasuuri bere ka ya ko ni, anuma n kpa ya atin wo, ya koro ako ma ndende. I yoori kekereke

ye ya nya kɔ dodoori miɛ n bo bu fere i ka Kinidosi n a. Anjuma n dɛɛ ti, ya koro akɔ má deke bo má ya sukɔ ni. Nyini dɛɛ ti, na ya fa lui bambaka n bo bu fere i ka Kereti dɛɛ bue ni, akpiɛ akɔ adodo miɛ n bo bu fere i ka Salamone ni. ⁸ Ya faari bɛɛ ni, i yoori ya kekereke ye ya nya kɔ juuri miɛ kpiri n bo bu fere i ka Dika Nyunyumi n a, lee ngbingbirim jinaabiri ni, i mata miɛ kpiri n bo bu fere i ka Lasiya n wɔ.

⁹ Na ya wo dɔ ace, haari na Yudafoɔm nɔɔ cici n aba asin, bu ɲa nyini sangɔ ni, tieku n su natiiri ti tie. Nyini dɛɛ ti, na Pɔɔlu abɔɔ bu, i ɲa, ¹⁰ “Njam, ma ɲu ka nzen ya ɲa ya kɔ ya nyunu, i yó kekereke, na deke dɔngɔ sáaki, má lee bambaka n ni nengem ɲgumi, ama, ya ɲgɔɔ mmɔɔ wo nu.” ¹¹ Ama, haari ni nyini mmɔɔ, soja kpɛn n keteeri Pɔɔlu nɔanɛ n wɔ, na wɔ de leekanfɔ n ni lee n fɔ n dɛɛ nɔanɛ ni. ¹² Deke bo ya wo ni, i ti má kpa ka ya wo dɔ haari fufuku ba tu ya, nyini dɛɛ ti, na ya dɔngɔ asoro su ka ya yasu dɔ, na ya niɛ, beni, ya koro kɔ ju miɛ kpiri n bo bu fere i ka Foniki n su na i wo Kereti lui bambaka n su ni. Lee ngbingbirim jinaabiri wo dɔ, i nɔɔ wɔ wiɛ atɔɔri dɛɛ bue n wɔ, ya koro kɔ wo dɔ, haari na fufuku n ba sin.

Kabo anjuma bambaka be yasuri tieku n nu ni

¹³ Na anjuma fafari be sukpiɛ fite ya nyunu ndiɛma biɛ su. Na ba sunsun ka bu koro kɔ deke bo ba fa bu tii awɔ ni. Nyini dɛɛ ti, na ba cin atu bulaari n bo bu fa kpamaari lee ni, na ya san tieku n ahɛmɛ akɔ adodo Kereti lui bambaka n dɛɛ bue ni. ¹⁴ Ama, wɔ cɛ má, na sɔɔ sin anjuma be bo i nati kpɛ fite wiɛ afiiri saa fɔmbɔɔ su n akpiɛ fanɲa su afite Kereti dɔ. ¹⁵ Ya kpa anjuma n atin wɔ, ya koro akɔ má deke bo ya fa ya tii awɔ ni. Nyini dɛɛ ti, na ya yaki lee bambaka ni, na wɔ su anjuma n su. ¹⁶ Na ya kɔ adodo lui be bo bu fere i ka Kawuda ni, na ya fa i sin. Lee kaan be sa lee bambaka n su, i yoori kekereke ye ya nya koro taraari i jinaari a. ¹⁷ Na ba nya acin i afun awura lee bambaka n nu. Na ba fa nyama awura lee bambaka n bu, na ba cici i kenken, na i bu n ayo fanɲa. Bu soro sere ka lee ni kpama tɛtɛkɛ n dika wɔ, miɛ kaan be wo bɛɛ, bu fere i ka Siritisi. Nyini dɛɛ ti, na ba jura lee tani n bo i bo anjuma na lee n kɔ ni, na ba nyanya i, na lee n asu anjuma n su. ¹⁸ Kabo anjuma n kereeri ya wahara sɔ ni, i alecin, na ba yiɲi nengem bo bu wo lee n nu ni nbem ajiji nzue n nu. ¹⁹ I lesan cɛɛn, na bu kɛɛ afa bu saa ayi lee n dɛɛ neɲge kɛɛ aji nzue n nu. ²⁰ Na wɔ cɛ bo ya ɲu má wiɛ, wara asarambaam, na anjuma n sukpiɛ agaya sɔ, haari na ya ba ayi tama ka ya fite má nu.

²¹ Tɔ, wɔ cɛ bo minem n adi má diire n dɛɛ ti, na Pɔɔlu ayasu ajina bu afɛn, na wɔ se bu ka, “Njam, nzen má am tiiri m nɔanɛ ni, má ya yasu má Kereti, má ya nengem ni saaki má, na bu ka ɲgbɛɛn sɔ. ²² Ama, kisa, m sutu am fɔ, am ma am ahoresi. Am be mmɔɔ ɲgɔɔ ká má nu, má ka lee bambaka ni ɲgumi saaki a. ²³ Dama anuma kɔɲgue, Nyɛmɛ n bo m su i na i dɛɛ la m ni, i mereke be ba jinaari m bi, ²⁴ na wɔ se m ka, ‘Pɔɔlu, má a ma sere ti u. Wɔ yo daka ka a kó jina Romafɔm femɛ kpiri n nyunu wɔ, na i dí u jɔɛ. Ti fen, Nyɛmɛ afa minem kɛɛ bo u ni bɛɛ sangɔ wo lee n nu n ama u.’ ²⁵ Nyini ti, njam, am fa ahoresi. Dama m daafi Nyɛmɛ ɲu ka i yó kabo i seeri m n wɔ. ²⁶ Haari ni nyini mmɔɔ, anjuma ni sún ya kɔ jina lui bambaka be su wɔ.”

²⁷ Tɔ, i bita ya fikindi Adiriya tieku n nu sɔ, haari i leburu lenna cɛɛn kɔɲgue fa kɔ i jinanjin sangɔ, na lee jumayofɔm n afa nu ka bu sudodo

asiën. ²⁸ Nyini ti, na ba fa nyama bo bu bita sunsun nië kabo nzue ngonggo ti barasu. Na ba ñu ka i toko wo ngo. Na ba ko mo kaan abuka su, na ba sunsun bekun, na ba ñu ka i wo má ngo kun. ²⁹ Na sere ati bu, bu sunsun ka lee bambaka ni kó si yabuëm wó, na i sandi nu, nyini dëë ti, na ba còndi lee n sin bulaari nòncòri nna asiëngu. Na bu susere Nyemë ka ale cin bu. ³⁰ Na lee jumayofòm n akoro ka bu wó ñmati, na ba yi lee kaan n afa ase nzue n su, na ba kpíë mbënle ka bu suyi bulaari nòncòri nbem lee bambaka n tii dika a. ³¹ Ama, na Pòolu ase soja kpíën n ni i sojam ni ka, “Má ka ahin minëm n aka lee n nu, am be mmóó fite má nu.” ³² Na sojam n akpíë nyamam bo bu bita lee kaan n aji, na wó kó.

³³ Sangá bo ale ba sukoro cin ni, na Pòolu asere minëm kere ka, bu nya diire be di. I ña, “I nyuma leburu lenna lëë, bo am wo ahoresaaki nu, na am adi má pui. ³⁴ Nyini ti, m sere am wó, am di diire, adena i buka am na am nya ñgóó. Haari am be mmóó tiñmíë kun n kpein ká má ñgbëën.” ³⁵ Pòolu seeri sò wieeri ni, na wó fa kpòncó, na wó da Nyemë asi bu kere nyunu, na wó bu i nu, na wó di. ³⁶ Na bu kere afa ahoresi, na bere gusu adi diire. ³⁷ Yere bo ya yo woori lee bambaka n nu ni, ya ti mine yaa nnyo ni minë aburaso ni nsen wó. ³⁸ Bere kere diiri na bu kunnu yiiri ni, na ba sasa diire mbaa n bo wó ka n agó nzue n nu, adena lee bambaka n ka fafaki.

Kabo lee bambaka n sandiiri nu barasu ni

³⁹ Sangá bo ale ba ciinri ni, lee jumayofòm ñuuri asiën be, ba si má i, ama, na ba ñu ka nzue be ati ada bere, ñmíë abara aye i. Na ba fa sunsunni ka nzen má bu koro yo, na ba boro bu ñyi na bu fa lee bambaka n kó wura ñmíë n nu na i kpama. ⁴⁰ Na ba nyangi lee bambaka n bulaari nòncòrim n aji nzue n nu, na ba nyangi bakam bo bu fa kan lee n dëë nyamam ni, na ba ye tani n bo i wo lee n tii su n angoro ka anuma n fa lee n kó, na bu sukan sukó ahemë. ⁴¹ Ama, na ba kó aju kunma kpíri sangaabiri, na ba wura ñmíë be nu, na lee bambaka n tii dika n aka akpama, wó koro akó má. Na nzue nyama ni subo lee ni, na wó paparaki i sin dika ni. ⁴² Na sojam n asese su ka bu kun dansarakam n kere wó, adena má be wie kpíë na i ñmati kó. ⁴³ Ama, soja kpíën n koroori ka i de Pòolu tii ji n dëë ti, na wó kete bu ñu ka má bu yo sò. Na wó ma nòó ka, bo bu si nzue wie n kere, bu du mó ti to nu na bu wie kpíë kpere su, ⁴⁴ na minëm bo bu kaari n kere nya sò baka sinsinm, ni lee buebuem n nu, na bu wie kó ju ahemë. Kabo i yoori na ya kere koro fiteeri nu, na pui ayo má be n lëë.

28

Deke bo i yoori Pòolu Malite lui bambaka n su n jore

¹ Sangá bo ya fiteeri nzue n nu wieeri ni, na ba se ya ka bu fere lui bambaka n ka Malite. ² Na mië n nufòm ade ya na ba yo ya sakpa agaya. Nzue sutó na ayere wo bere n dëë ti, na ba tórcó sin ama ya, na ya kere atun. ³ Na Pòolu atientien yee nòó agó sin n nu, jaa pumpuni wo yee n nu, na sin n warangu awura i, na wó fite akan i saa aka asense se. ⁴ Mië n nufòm ni ñuuri ka woo n akan asense Pòolu saa su sò ni, na ba se bu ñuñu nu ka, “Ahin sòncó n ti sòncó kunfó ó nahóre su, haari ni bo wo koro afite n nzue n nu ni, i nyemë atin su, wó yo má daka ka i nyá ñgóó.” ⁵ Ama, na Pòolu akpisi woo n aji sin n nu, wó ñu má yaari be. ⁶ Na minëm n asunsun ka i cé má, i ñunie wúra a, wara i kába kpaasi wu. Ama, bu ñminda cëeri

na bu ɲu má ka deke be ayo i ni, na ba kaaki bu sunsunni, na ba se ka, “I ti nyeme be wo.”

⁷ Deke bo ya sekeeri ni, fie be wo dodo do, i fo n ti lui bambaka n su sono anyumbaafɔ do, bu fere i ka Pubiliyosi. Na wo de ya wofɔ nyunyumi, na ya ka ada i dika haari lesan. ⁸ Nyini sanɗa Pubiliyosi si gusu la má laifie, i da soro, i ɲunie ado, na i suje totoko. Na Pɔolu awura soɔ n bo i da nu ni, na wo fa i saa anana i ɲu, na wo sere Nyeme ama i, na wo nya laifie. ⁹ I yoori so n deɛ sin, na tukpakifom kere bo bu wo lui bambaka n su n gusu aba Pɔolu do, na wo tuntun bu, na ba nya laifie. ¹⁰ Na ba wura ya kpiri, na ba ce ya acerim beberebe. Na sanɗa bo ya ba suyasu ka ya fa lee na ya ko ni, na ba fa deke kere bo i ti ya mieewa awura lee bambaka n nu ama ya.

Kabo Pɔolu yasu Malite na i ko juuri Roma mie kpiri n nu ni

¹¹ Ya woori do haari sara nshan, na ya nya fa lee bambaka be bo i fite Alekizanderiya deɛ mie kpiri n nu wo. Amɛ ndaam anyaari seewa mata i. Fufuku sanɗa n deɛ ti, wo jina do ace. ¹² Na ya ko aju mie kpiri n bo bu fere i ka Sarakusasi n su, na ya wo do lesan. ¹³ Na ya nya akaaki ayasu bere bekun, ako aju mie kpiri n bo bu fere i ka Regiyoni n su. Na i alecin, na anuma abo i bu sukpie fite ya nyunu ndiema saa bie su. Na i lennyo ceɛn n na ya ko aju mie kpiri n bo bu fere i ka Potiyoli n su. ¹⁴ Na ya ɲu yaradayofɔ nbem do, na ba sere ya ka ya wo bu do lesa. Na ya nya yasu aba Roma mie kpiri n nu. ¹⁵ Sanɗa bo yaradayofom n bo bu wo Roma n tiiri ya ɲga ka ya suba ni, na ba fite akpa ya atin, na ya ni bu nbem ako aye mie n bue bo bu fere i ka Apiyosi Goo n su, na ya ni bu nbem gusu ako aye Wofom Daabiri Awuru Nshan mie n nu. Sanɗa bo Pɔolu ɲuuri bu ni, na wo da Nyeme asi, na wo nya ahoresi.

Kabo Pɔolu kaanri Yesu jore Roma mie kpiri n nu ni

¹⁶ Sanɗa bo ya ko juuri Roma mie kpiri n nu ni, na ba ma Pɔolu atin ka i nya awuru be na yiri ni i tii suwo nu, na ba ma i soja kun ka i sunie i dika. ¹⁷ I woori do i lesan, nyini sin, na Pɔolu afere Yudafoɔm bo bu la anyunuyi na bu wo mie n nu ni, ka bu tien bu noo. Bu tien bu noo wieri ni, na wo se bu ka, “M ninbaam, ma yo má ya minem n sa be, ma bu má ya nana sayoowa n be ɲgbeen, ama, haari ni nyini mmoo, bu taraari m Yerusalem mie kpiri n nu wo, na ba nya afa m awura Romafom saa nu. ¹⁸ Bere gusu bisaari m bisaawam wieri ni, má bu ɲa bu fa m ji wo, dama ba ɲu má satie bo ma yo i na i ti ye ni ka bu kun m. ¹⁹ Ama, na Yudafoɔm n akete ka má Romafom n yaki m nu ji, na wo yo daka ka m sere ka bu fa m jore n ko Romafom femɛ kpiri n do, haari ni bo m la má jore be bo m fa jaraki m tiengu minem ni. ²⁰ Nyini deɛ ti, ye m fere am a, na m jajo am do na am si bo i wo bere, ka, sono n bo Yisarelifom yo i tama n deɛ ti, ye m wo ahin joroko n nu a.”

²¹ Na ba se ka, “Ya nya de má kadasi be Yudiyafom do fa ko u jore su. Ya minem bo bu fiteeri do baari n gusu, be nya kan má, wara i jajo jore tie be fa ko u do. ²² Ama, ya koro ka ya ti fite u do kabo u sunsunni ti, dama ya si ka nyini atin n bo a bita i ni, deke kere bo a ko, mine jaraki i wo.” ²³ Na ba kpama ceɛn ka bu tien bu noo. Nyini ceɛn n na mine beberebe aba atien bu noo deke bo Pɔolu da ni. Na wo kan akere bu kabo Nyeme femɛya n atin ti barasu. Fite ɲgarama haari kongue, na wo boro i nyi na i má bu si kabo Yesu ti barasu, fite kabo ba kere i Moyisi deɛ noanie kpamaawa kadasi n nu ni, ni kabo ba kere i Nyeme noanie kanfom deɛ kadasi n nu

ni. ²⁴ Na bu nbem ade i nɔaniɛ ni, ama, na nbem akete, ba yo má yarada.

²⁵ Nyini ti, bu nɔɔ ayo má kun, na ba yasu ka bu kɔ awuru, na Pɔɔlu ase bu jɔre kun be abuka su, i ɲa, “Nahɔre ye Nyeme Awiewie Casi n jɔjɔri am jɔre n a. I yo maari Nyeme nɔaniɛ kanfɔ Esaya seeri am nam ka,

²⁶ ‘Kɔ na a kɔ se nyini minem ka, Nyeme ɲa o,

Am só am sui ni nahɔre su,

ama, am tí má deke bo am so am sui ka am ti i n bu.

Am káaki niɛ ni nahɔre su,

ama, am ɲú má pui.

²⁷ Dama ahin minem tii ti kekereke,

ba tɔ bu sui na má bu ti,

ba kata bu nyumbaa na má bu ɲu.

Má nyini, bu nyumbaa ɲú i wɔ,

na bu sui tí,

na bu sí bu ahore su,

na bu káaki bu wo,

na m má bu nya laifɛ.’ ”

²⁸ Na Pɔɔlu akun i jɔjɔwa n nɔɔ, na wɔ se bu ka, “Nyini ti, m koro ka am si ka Nyeme asunma ya ka ya fa tiide labari kpa n kɔ ma minem bo bu ti má Yudaɔm ni. Bere dé i a.” [²⁹ Na Pɔɔlu kaanri sɔ wieeri ni, na Yudaɔm n ayasu afite akɔ ase akuruwa nyannyan bu ɲuɲu nu.] ³⁰ Na Pɔɔlu ade sɔɔ, na i sutɔ kaari, na wɔ wo nu haari afɔ nnyɔ, na i sude minem kere bo bu ba i dɔ ni, ³¹ na i sukan Nyeme fɛmeya n ɲusu jɔre, na i sukere minem ya Mibie Yesu Kristo jɔre ni ahoresi, be akanda má i.

Pɔɔlu kadasi bo i kere fa maari ROMAFOM ni

1 Mini Pɔɔlu sukere ahin kadasi n fa ma am a. M ti Yesu Kristo akoo ɔ, ye wo fere m ka m kaaki i jaramasa, na wo yi m ka m kan labari kpa n bo i fite Nyeme do n jore. 2 Nyini labari kpa n ye Nyeme yo seeri ka i fa ma ya n a, na wo ma i noanie kanfom akere i nusu jore ase i jore kadasi n nu. 3 Nyini labari kpa n kere ya i Wa n jore wo, nzen ya nie i fa ko i adamande dee woowa su, bu yo wuuri i fiteeri Feme Davidi dee busu n nu n wo. 4 Ama, kabo Nyeme faari i yiko tengeeri i yiwee nu ni, nyini ma Awiewie Casi n kere ka i ti Nyeme Wa a, yiri la ya Mibie Yesu Kristo ni. 5 Yiri dee ti, ma di Nyeme ahoro ma, ye wo ma ma yo i jaramasa, adena i duma n dee ti, na m ma daanfie barasu kere de i noanie ni, na bu yo i yarada. 6 Ambere Romafom gusu, am wo nyini minem bo Nyeme afere bu n nu wo, ka am kaaki Yesu Kristo dee minem. 7 To, ambere bo am wo Roma mie kpiri n nu ni, ye m sukere ahin kadasi n ma am a. Ambere bo Nyeme koro am na wo fere am na am ayo i dee minem ni, ya Si Nyeme ni ya Mibie Yesu Kristo ma am wura bu ahoro ma nu na am nya ahoreda.

Kabo ma Pɔɔlu koroori ka i ko nie Romafom busu ni

8 Ciciri su, Yesu Kristo dee ti, m da m Nyeme asi ma am kere, dama durunya n nufom kere ati kabo am ayo Yesu Kristo yarada ni. 9 Nyeme bo m su i ni m ahorembaa kun ni, na m kan i Wa n labari kpa n jore ni, yiri di m daani a, kabo m nati sere Nyeme ma am ni. 10 Sangga kere m sere i wo, ka nzen i ti i dee koroyanu, i teke atin ma m kisa, na i awieeri su na m koro ba nie am busu. 11 Dama m nyunu aboro ka m ba nu am wo, adena m fa aceeri n bo i fite Awiewie Casi n do ba ma am na am koro jina fanja kenken ni nyemesu ni. 12 Nahore, i ti deke bo ya fa ma ya benju na ya nya ahoresi wo, m ni ambere kere, kabo ya yo Yesu yarada n dee ti.

13 M ninbaam, m koro ka am si ka sangga kere, ma m koro ka m ba nie am busu wo, ama, m nya ma atin. Ma m koro ka m ba nya mine am nu ma Nyeme wo, kabo ma nya am benju nbem bo bu ti ma Yudafom ni. 14 Dama wo yo daka ka m yo so ma mine barasu kere, bo bu nyunu ateke, ni bo bu nyunu ateke ma, ni bo ba sonson kara, ni bo ba sonson ma kara. 15 Nyini dee ti, ye m ahore abi ka m ba kan labari kpa n jore kere ambere gusu bo am wo Roma mie kpiri n nu n a.

Yiko bo i wo labari kpa n nu ni

16 Nyinse ti ma m fa ko labari kpa n su, dama yiri ti Nyeme yiko bo i ma sono kere bo i yo yarada n nya tiide a, bo bu ti Yudafom ni du mo a, na bo bu ti ma Yudafom n nya to su. 17 Labari kpa n kere kabo Nyeme de sono ka i yo sa bo i ko atin su i do a. Sono kere bo i yo yarada, i fite i yaradayo n dee ti ye Nyeme de i mi ka i yo sa bo i ko atin su i do a, na nyini ma i yarada n yo biiwa. Kabo ba kere i Nyeme Jore Kadasi n nu ka, Nyeme na, "Sono bo i yo sa bo i ko atin su m do, i nya ngoo, i yarada n dee ti."

Kabo adamande kere ayo satie ni

¹⁸ Nyeme wo aṅgoro akere kabo wɔ fa yaa acin minem sui ni, bere bo bu sunsunni ti tie na bu yo satie ni, bu satie n deɛ ti, ba kete ka má minem si Nyeme nahore su. ¹⁹ Deke bo i ti na wɔ fa yaa n la ka, ba ŋu deke n kere bo i ma bu si Nyeme ni, dama yiri ni i tii ayi i kpain afite fofoe nu. ²⁰ Fite saŋga bo Nyeme yiiri durunya n ba juuri ni kisa, mine aɲu i woowa, i ti má ka bu nyumbaa aɲu i kabo i ti barasu wɔ, ama, ba ŋu dekem bo wɔ yi bu ni. Nyini dekem ni kere ka i ti Nyeme nahore su a, ni kabo i la yiko bo i la má awieeri ni. Nyini ti, be wo má bere bo i koro se ka i si má i. ²¹ Haari ni bo bu si i n kere, ba kete ka bu ma má i jirima ka i ti Nyeme, na bu kaaki da má i asi. Nyini deɛ ti, ye bu sunsunni kere aka ngbeɛn ye ngɔnle akpie bu su, ye bu ahorembaa ayo biri n a. ²² Bu bu bu ŋu ka bu ti ngɔnleɛfɔ wɔ, ama, bu ti sinnzinm wɔ. ²³ Jirima bo má bu fa ma Nyeme bo i wo bere saŋga kere ni, ba fa ama amɔɛm bo ba yo bu na bu ferema ni adamandem, ni laŋkpetefɔm, ni ajaannam, ni cinbukunnusufɔm wɔ.

²⁴ Nyini deɛ ti, ye Nyeme ayaki bu ye bu yo bu kunnu koroowa n a, na bu suyo dangba sam bu ŋuɲu nu suwura bu ŋu nyinse. ²⁵ Dama ba kete Nyeme nahoreɛɔ ni, na bu nya susu kɔre su. Na bu su dekem bo Nyeme ayi bu ni, bu su má yiri bo i yiiri deke n kere ni. Yiri deɛ la kansi saŋga kere a. Ami. ²⁶ Ba kete Nyeme n deɛ ti, ye wɔ yaki bu a, na bu suyo nyinse sam kabo bu kunnu koro n a, haari na nbaram yaki nbiesɔm do daari, na bu sufa bu beɲgu nbaram da, na bu yo kabo má wɔ yo má daka ka bu yo ni. ²⁷ Na nbiesɔm n gusu yaki nbaram do daari, na bu la konviki agaya fa kɔ bu beɲgu nbiesɔm do, na bu ni bere saŋga da ka bara ni biesɔ deɛ su. Nyini nyinse sam deɛ ti, ye ba nya suicin kabo wɔ yo daka ka bu nya i n a.

²⁸ Kabo ba kete ka bu si má Nyeme ni, nyini ma wɔ yaki bu, ye bu sunsunni tie n ma bu yo sa bo má wɔ yo má daka ka bu yo i n a. ²⁹ Bu ahorembaa ayi ni satie barasu kere ngumi wɔ, bu konviki wura bu beɲgu nengem nu wɔ, na bu suyo bu beɲgum tie, na bu susi bu beɲgum kɔre, na bu sukun bu beɲgum, na bu sudi aluwa, na bu sudadaka bu beɲgum, na bu sukɔ bu beɲgum, na bu sukan bu beɲgum jɔre, ³⁰ na bu susaaki bu beɲgum duma, na bu sukɔ Nyeme, na bu sukpie bu beɲgum nzukɔ, na bu la karambani, na bu sufɔ, na bu susunsun kabo bu yo na bu yo satiem, na bu sukete bu wufɔm noanie, ³¹ na bu la má ngɔnle, na bu yo má sa bo ba se ka bu yo i ni, na bu koro má minem, na bu si má bu beɲgum aɲunfo. ³² Bu si kabo Nyeme akere ka, sɔnɔ kere bo i nati yo sɔ, wɔ yo daka ka i mi wú ni, haari ni nyini mmɔɔ, bu toko yo nyini sam wɔ, ama, bo i kɔ tara i kere n la ka, bu jina mine bo bu gusu nati yo nyini sam ni sin wɔ.

2

Kabo Nyeme bá di sɔnɔ kere jɔre barasu ni

¹ Tɔ, wɔrɔ kere bo a kan nyini minem jɔre ni, a la má kabo a yo na a kan fite nu Nyeme do. Dama jɔre n bo a kan jaraki u beɲgu na wɔrɔ ni u tii yo nyini sam ni, nyini ma a kan jaraki u ŋu n a. ² Ya si kabo Nyeme di minem kere bo bu yo sɔ n jɔre, na i jaraki bu ni, i jɔre diiwa n ti nahore wɔ. ³ Ye wɔrɔ kere bo a kan minem n bo bu yo nyini sam n jɔre jaraki bu, na wɔrɔ mmɔɔ ni u tii yo sɔ ni, a sunsun ka a koro fite Nyeme jɔre diiwa n nu, nzen se? ⁴ Kabo Nyeme ayo sakpa bambaka ama u na i la mindi ni sawɔre ni, nzu ti ye a bu i ngbeɛn a? A si má ka deke bo i ti na i yoori nyini sakpa n la ka, i koro ka a kaaki u wo wɔ, nzen se? ⁵ Ama, kabo a yo

u ahorembaa kekereke na a kete ka a kaaki má u wo ni, a sukpini suicin ma u ɲu wɔ ɔɛɛ, cɛɛn n bo Nyemɛ bá di minem jɔɛ nahɔɛ su, na i cín bu sui na sɔnɔ kɛɛ ɲú i ni. ⁶ Na i tɔ sɔnɔ kɛɛ ɲkatɔ kabo i sayoowa ti barasu. ⁷ Mine nbem dɛɛ la ka, bu mindi nati yo sakpa, na bu kpini kansi, ni jirima, ni anuniɛmbaa bo i kpɔɔ má n busu ni, bɛɛ ye Nyemɛ má bu ɲɔɔ bo i la má awiɛri n a. ⁸ Ama, minem bo bu nati yo anyii sam, na bu kete deke kɛɛ bo i kɔ atin su Nyemɛ dɔ, na bu su satie atin su ni, bɛɛ ye Nyemɛ fá yaa bu ɲu na i cín bu sui n a. ⁹ Minem kɛɛ bo bu nati yo satie ni, bu dí wahara na bu ɲú anyumboro, bo bu ti Yudafoɔm ni dú mɔ ɲu nyini kekereke n a, na bo bu ti má Yudafoɔm gusu nyá tɔ su. ¹⁰ Ama, minem kɛɛ bo bu nati yo sakpa ni, Nyemɛ má bu nya kansi ni jirima ni ahoreda, bo bu ti Yudafoɔm ni dú mɔ nya nyini deke kɛɛ n a, na bo bu ti má Yudafoɔm n gusu nyá tɔ su. ¹¹ Dama Nyemɛ tambu má nu.

¹² Minem kɛɛ bo bu la má Nyemɛ nɔɔɔniɛ kpamaawa n na bu yoori satie, bu ká ɲɔbɛɛn, haari ni bo bu la má Nyemɛ nɔɔɔniɛ kpamaawa n ni. Na minem kɛɛ bo bu la Nyemɛ nɔɔɔniɛ kpamaawa n na bu yoori satie, bɛɛ ye Nyemɛ fá i nɔɔɔniɛ kpamaawa n di bu jɔɛ, na i bó bu asi a. ¹³ Má minem bo bu sui ti Nyemɛ nɔɔɔniɛ kpamaawa ni ye Nyemɛ de bu ka bu yo sa bo i kɔ atin su i dɔ a. Ama, bo bu yo kabo Nyemɛ nɔɔɔniɛ kpamaawa n kere ni, bɛɛ ye Nyemɛ de bu ka bu yo sa bo i kɔ atin su i dɔ a. ¹⁴ Minem bo bu ti má Yudafoɔm na bu la má Nyemɛ nɔɔɔniɛ kpamaawa ni, ama, na bu yo kabo nɔɔɔniɛ n kere ni, bu sunsunni ni bu ahorembaa kpa n dɛɛ ti, bɛɛ ni bu tii akpama nɔɔɔniɛ ama bu ɲu ɔɛɛ. ¹⁵ Kabo ba de i sɔ ni, nyini kere ka Nyemɛ nɔɔɔniɛ kpamaawa n wo bu ahore su a, na bu sunsunni gusu kere ka i ti sɔ ɔ, na i kaaki jaraki bu ka ba yo sa bo i kɔ má atin su, wara i koro jina bu sin ka ba yo sa bo i kɔ atin su. ¹⁶ Nyini kere yó cɛɛn bo Nyemɛ má Yesu Kristo ba di adamande kɛɛ jɔɛ bo i wo asiri nu n wɔ. M labari kpa n bo m kan i kere mine ni, kabo m kere i ɔɛɛ.

Yudafoɔm ni Nyemɛ nɔɔɔniɛ kpamaawa n jɔɛ

¹⁷ Ambɛɛ bo am ɲa am ti Yudafoɔm, na am daafi Nyemɛ nɔɔɔniɛ kpamaawa n ɲu, na am fa fɔ ka am si Nyemɛ ni, ¹⁸ na am si kabo Nyemɛ koroowa ti, na am sunsun nyunyumi, na am yi sa bo i ti kpa, dama am asi Nyemɛ nɔɔɔniɛ kpamaawa n kɛɛ awie, ¹⁹ am yo am ɲu ka ambɛɛ bita anyinsinm kpama a, na am ti wein ma minem bo bu wo awosin nu ni. ²⁰ Am ɲa ambɛɛ teke minem bo bu la má ɲɔnɔɔɔ ni a, na am kaaki kere minem bo bu ti ka nbaatumam ni, dama am ɲa am si Nyemɛ nɔɔɔniɛ kpamaawa n dɛɛ ti, am sunsun ka am si ɲɔnɔɔɔ ni nahɔɛ kɛɛ bo i wo i nu ni. ²¹ Ambɛɛ bo am kere minem ni, nzu ti ye am kere má am ɲu a? Ye ambɛɛ bo am se minem ka má bu wo ni, am wɔ, nzen am wɔ má? ²² Am ɲa má be saaki ajaa ciire ni, ye am saaki i, nzen am saaki má i? Am ɲa am koro má amɔɛ jɔɛ ni, ye am wɔ nɛɲɛm amɔɛ sɔɔm n nu, nzen am wɔ má? ²³ Ambɛɛ bo am bita Nyemɛ nɔɔɔniɛ kpamaawa n fa fɔ ka am si i, na am su má i su ni, ambɛɛ kaaki wura Nyemɛ nyinse a. ²⁴ Kabo ba kɛɛ i Nyemɛ jɔɛ Kadasi n nu ni, ka, “Ambɛɛ Yudafoɔm dɛɛ ti, ye minem bo bu ti má Yudafoɔm jojo wura Nyemɛ ɲgasi nu a.”

²⁵ Nzen am yo kabo Nyemɛ nɔɔɔniɛ kpamaawa n kere ka am yo ni, nyini yiri, am kenkenne n bo am awura i n la kpɛɛɛ. Ama, nzen am yo má kabo nɔɔɔniɛ kpamaawa n kere ni, i ti ka am awura má kenkenne ɔɛɛ. ²⁶ Nzen bo ba wura má kenkenne n yo kabo Nyemɛ nɔɔɔniɛ kpamaawa n kere ka bu yo

ni, Nyeme de bu ka ba wura kenkenne wo lee. ²⁷ Nyini ti, i sukere ka, bere n bo ba wura ma kenkenne na bu yo kabo Nyeme noanie kpamaawa n kere ni, bu di ambere Yudafoṃ jore jaraki am, dama am awura kenkenne na am la noanie kpamaawa ni, ama, am yo ma kabo i kere ni. ²⁸ Dama ma Yudafoṃ bo ba wura kenkenne anuniembaa su ni ngumi ti Yudafoṃ nahore su a. ²⁹ Ama, sono bo i ti Yudafoṃ nahore su la bo wo kaaki wo i ahorembaa su ni, na kenkenne wuraawa nahore su fite ahorembaa su wo, Nyeme Awiewie ni kaaki sono a, ma noanie kpamaawa ni. Nyini sono so, Nyeme kansii a, ma adamande.

3

¹ To, bo bu ti Yudafoṃ ni, bu la nzu kpere wo? Ye kenkenne wura buka nzu wo? ² Nahore, Yudafoṃ tara minem bo bu ti ma Yudafoṃ ni deke dongu nu. Ciciri su, Nyeme du mo faari i noaniem n wuraari bere saa nu a, ka bu nie i su. ³ Ye nzen Nyeme fa wuraari bere saa nu a, ye bu nbem ayo ma yarada, nyini kere ka Nyeme la ma dabunju lee, nzen se? ⁴ Ai, ma so. Haari ni bo sono kere ti korefoṃ ni, Nyeme yiri ti i nahorefo so, kabo ba kere i Nyeme Jore Kadasi n nu ni, ka, "Deke bo a kan ni, bu nu ka nyini ti nahore a, na nzen bu di u jore jarakiiri u, a kunma bu."

⁵⁻⁶ Ye nzen ya satiem n bo ya yo bu n kere kabo Nyeme yo sa bo i ko atin su, na i cin ya sui, ya koro se ka wo yo ma sakpa, nzen se? Ai, ma so. Adamande sunsunni lee. Nzen Nyeme yo ma sa bo i ko atin su, i yo se koro di durunya n nufom jore a? ⁷ Be koro se ka nzen m bu kore, na i ma minem nu kabo Nyeme nahore ti barasu, adena bu ma i jirima, ye nzu ti ye i di m jore cin m sui ka m ti satieyofa a? ⁸ I ti kabo mine nbem nati kan wo, bu na, am ma ya yo satie adena Nyeme ba ma i kaaki sakpa. Bu kpie m nzuko ka mini mmoo se so so. Bu bu kore wo. Nyeme di bu jore na i cin bu sui.

Be wo ma bere bo i yo sa bo i ko atin su sangha kere

⁹ To, ya se se wo? Yere bo ya ti Yudafoṃ ni, ya tara bo bu ti ma Yudafoṃ n nzu nu wo? Ai, ya tara ma bu pui, dama ma du mo ase am ka yere Yudafoṃ ni, ni bo bu ti ma Yudafoṃ n kere ti satieyofom wo. ¹⁰ Kabo ba kere i Nyeme Jore Kadasi n nu ni, ka, "Be wo ma bere bo i yo sa bo i ko atin su, haari sono kun n kpein mmoo.

¹¹ Be wo ma bere bo i la ngonle,

be wo ma bere bo i nienie Nyeme busu.

¹² Sono kere akaaki bu sin abo Nyeme dee atin ni, bu kere aka ngbeen, be wo ma bere bo i yo sakpa, haari sono kun n kpein mmoo wo ma bere."

¹³ Ba kaaki akere ka,

"Bu konvi ti ka fanfunma bo ba teke i su wo, na bu fa bu taferema sudadaka minem."

"Na jore bo i fite bu noo nu yo ya ka pumpuni bore wo."

¹⁴ "Nzukolee ni jore tie ngumi fite bu noo nu a."

¹⁵ "Bu ce ma na bu yi mine ngoo ndende.

¹⁶ Deke kere bu ko, bu dee la ka bu yo minem ngbeenngbeen, na bu saaki bu.

¹⁷ Bu dee la ka bu nati sukpini jore, bu koro ma tanalaifie."

¹⁸ "Bu nyunu yi ma Nyeme, nyini dee ti, bu soro ma i."

19 Ya si ka deke n kere bo ba kere i Nyeme noanie kpamaawa n nu ni, i jɔɔ ni Yudafoɔm bo bu su i su n wɔ, adena má be koro teke i nɔɔ kan jɔre be, ama, durunya n nufom kere bá jina Nyeme nyunu na i dí bu jɔre na i cín bu sui. 20 Dama be wo má bere bo i koro se ka i su noanie kpamaawa n su dee ti, ye Nyeme de i ka i yo sa bo i kɔ atin su i do a, ama, noanie kpamaawa ni ma minem si ka bu ti satieyofom a.

Kabo Nyeme na sono yo sa bo i kɔ atin su i do ni

21 Ama, kisa Nyeme ayi akere ya kabo ya yo sa bo i kɔ atin su i do, má yiri la bo ya su noanie kpamaawa n su ni, ama, yiri la bo noanie kpamaawa n ni Nyeme noanie kanfom diiri i nusu daani ka i yó n wɔ. 22 Yiri la ka, sono kere bo wɔ yo Yesu Kristo yarada, yiri ye Nyeme na i yo sa bo i kɔ atin su i do a, nyini ti, ya la má kpakpaakinu, 23 dama sono kere ayo satie afun Nyeme jirima woowa ni, 24 ama, Yesu Kristo ade sono kere tii aji, nyini dee ti ye Nyeme na sono kere ayo sa bo i kɔ atin su i do n a, i ti Nyeme aceeri wɔ. 25-26 Yiri Yesu ye Nyeme ma i deeri adamande jinaabiri n a, na wɔ fa i nju ayo yoowa na wɔ wu, adena nzen minem yoori i yarada, i mbunja n dee ti, Nyeme fá bu satie ce bu. Deke bo i ti na Nyeme yoori so n la ka, i koro ka i kere kabo yiri ni i tii yo sa bo i kɔ atin su n wɔ, dama dawa sangá Nyeme yo laari sawore fa kɔ minem bo bu yo satie n do. Ama, kisa wɔ kere ka yiri ni i tii yo sa bo i kɔ atin su wɔ, na sono kere bo i yoori Yesu yarada, Nyeme de i mi ka yiri yo sa bo i kɔ atin su i do a.

27 Nyini dee ti, nzu deke ye ya koro fa fo a? Deke be wo má bere. Noanie kpamaawa ni ma minem yo sa bo i kɔ atin su Nyeme do a, nzen se? Ai, má so. Ama, bo minem yo Yesu yarada n dee ti a. 28 Ya nie ka deke bo i kere ka Nyeme de sono ka i yo sa bo i kɔ atin su i do n la kabo wɔ yo Yesu yarada n wɔ, má ka i su noanie kpamaawa n su n dee ti a. 29 I ti nahore wɔ, ka Nyeme ti má Yudafoɔm ngumi Nyeme, i ti bo bu ti má Yudafoɔm n gusu Nyeme wɔ. 30 Nyeme ti kun wɔ. Yarada n dee ti, ye Nyeme na Yudafoɔm bo ba wura kenkenne n yo sa bo i kɔ atin su i do a, ye minem bo bu ti má Yudafoɔm na bu wura má kenkenne ni, bu yarada ma Nyeme de bu ka bu yo sa bo i kɔ atin su i do a. 31 Nyini sukere má ka ya yo Yesu yarada n dee ti, ya fa má noanie kpamaawa n yo má juma a. I ti má so, ama, nyini ma ya bita noanie kpamaawa n kenken a.

4

Kabo Abraham yoori Nyeme yarada barasu ni

1 To, am ma ya nie ya na Abraham jɔre. Ya busu nu, yiri ti ya kere na a. 2 Nzen má i sakpa yoowa dee ti ye Nyeme ade i ka i yo sa bo i kɔ atin su i do, má i koro fa fo yanfoya, ama, Nyeme do, i ti má so. 3 Dama ba kere i Nyeme Jɔre Kadasi n nu ka, "Abraham yoori Nyeme yarada, nyini dee ti ye Nyeme ade i ka i yo sa bo i kɔ atin su i do n a." 4 Nzen sono yo juma na ba to i kaari, i ti má ka bu na ba ce i aceeri wɔ, i ti i juma ni nkato o. 5 Ama, sono bo i yoori yarada, má ka i sakpa bo wɔ yo i n dee ti ye Nyeme ade i ka i yo sa bo i kɔ atin su i do n a, ama, wɔ yo yarada ka Nyeme de satieyofom ka i yo sa bo i kɔ atin su i do n dee ti a. 6 Feme Davidi mmoo yo kaanri nyini minem nusu jɔre, ka i mi la terefie, dama Nyeme ade i ka i yo sa bo i kɔ atin su i do, má ka i sakpa n dee ti a. I na,

7 "Terefie wo bu do, minem bo Nyeme fa bu ngasi ce bu ni.

Terefie wo bu do, minem bo Nyeme kata bu satie su ni.

⁸ Terefiɛfo la sɔnɔ bo Micera n ŋa i la má satie be ni.”

⁹ Tɔ, minem bo bu wuraari kenkenne n ŋgumi la nyini terefiɛ ni, nzen se a? Ai, minem bo bu wura má kenkenne ni mmɔɔ la i. Dama ya du mɔ ase ka, Abraham yarada n dɛɛ ti ye Nyeme ade i ka i yo sa bo i kɔ atin su i dɔ n a. ¹⁰ Sanga bɔnɔ ye Nyeme seeri sɔ n a? Nyini sanga Abraham awura kenkenne, nzen wɔ nya wura má? Ai, nyini sanga wɔ nya wura má. ¹¹ Nyini sanga n sin, ye i ba wuraari kenkenne n a. Na i kenkenne wuraawa n kere ka i yarada n dɛɛ ti ye Nyeme deer i ka i yo sa bo i kɔ atin su i dɔ, sanga bo i nya wura má kenkenne ni. I yoori sɔ ni, adena yiri Abraham bá yo minem bo ba yo yarada n kere si, haari ni bo ba wura má kenkenne ni, ye Nyeme ade bu ka bu yo sa bo i kɔ atin su i dɔ n a. ¹² Yiri gusu kaaki ti minem bo ba wura kenkenne n si a, má ka ba wura kenkenne n dɛɛ ti, ama, bo ba yo yarada kabo i yoori yarada sanga bo i nya wura má kenkenne ni.

¹³ Nyeme yo seeri Abraham ni i busu nufom ka i fá durunya n kere ce bu ni, má ka i su Nyeme noanie kpamaawa n su dɛɛ ti a, ama, kabo wo yo Nyeme yarada n ti ye Nyeme deer i ka i yo sa bo i kɔ atin n su i dɔ a. ¹⁴ Nzen mine su Nyeme noanie kpamaawa n su ye bu nya deke n bo Nyeme seeri ka i cé bu ni, nyini la ka yaradayo n ti ŋgbɛɛn wɔ lɛɛ, na kabo Nyeme ase n gusu la má kpɛɛ. ¹⁵ Nzen minem saaki noanie kpamaawa ni, nyini ma Nyeme fa yaa na i cin bu sui a, ama, nzen má noanie kpamaawa be wo má bɛɛ, má deke be wo má bɛɛ bo i kere ka sɔnɔ ayo satie.

¹⁶ Nyini ti, deke bo Nyeme yo seeri ka i fá ma ni, i baari minem bo bu yo yarada n dɛɛ ti wɔ. I yoori sɔ ni, adena deke n bo i yo seeri ka i yó n yó aceri kpama ma Abraham busu nufom kere, má bo bu su noanie n kpamaawa n su ŋgumi, ama, bo ba yo yarada kabo Abraham yoori ni. Yiri ti ya kere si a, ¹⁷ kabo ba kere i Nyeme Jɔɛ Kadasi n nu ni, ka, Nyeme ŋa o, “M má a yo mine barasu dɔŋgu si.” Nyeme ŋuuri ka Abraham ayo yarada ka yiri Nyeme tenge minem bo ba wu n yiwee nu, na yiri ma deke n bo i yo wo má bɛɛ n wo bɛɛ a. ¹⁸ Nyini ti, sanga bo Abraham yoori yarada na i la tama ni, i ti kekereke na i yo tama ka i bá yo mine barasu dɔŋgu si, kabo ba kere i Nyeme Jɔɛ Kadasi n nu ka, “U busu nufom bá sunnu beberebe ni.” ¹⁹ Haari ni sanga bo wɔ ju afɔ yaa, na i si ka wɔ yo kpian ni, na i yi Saara ti ŋɔrɔka na wɔ yo buke n kere ni, i ŋunie ayɔrɔki má i, i yoori yarada a. ²⁰ Wɔ yo má sika fa kɔ deke bo Nyeme seeri ka i yó i n su, ama, yarada n bo i yoori i n dɛɛ ti, na wɔ nya fanja na wɔ kansu Nyeme. ²¹ Na wɔ si tenle su ka Nyeme koro yo deke n bo i yo seeri ka i yó i ni. ²² Abraham yoori yarada a, nyini dɛɛ ti ye Nyeme ade i ka i yo sa bo i kɔ atin su i dɔ n a. ²³ Kabo ba kere i ka, Nyeme ade i ka i yo sa bo i kɔ atin su i dɔ ni, má Abraham ŋgumi dɛɛ ti ye bu kɛɛɛri i sɔ a, ²⁴ ama, yɛɛ gusu dɛɛ ti ye bu kɛɛɛri sɔ n a, yɛɛ bo Nyeme bá de ya ka ya yo sa bo i kɔ atin su i dɔ n a yo i yarada ni, yiri bo i tengeeri ya Mibie Yesu i yiwee n nu ni. ²⁵ Ya satie dɛɛ ti ye Yesu wuuri a, na wɔ tenge i yiwee n nu, adena Nyeme de ya ka ya yo sa bo i kɔ atin su i dɔ.

5

Kabo Nyeme ade ya ka ya yo sa bo i kɔ atin su ni

¹ Tɔ, ya yo yarada, na Nyeme ade ya ka ya yo sa bo i kɔ atin su i dɔ ni, ye ya ni yiri afien ayo dɔŋgu a, ya Mibie Yesu Kristo dɛɛ ti. ² Yesu Kristo dɛɛ

ti ma ya la atin jina deke bo ya wo kisa n a, yiri la Nyeme ahoroma n bo wo fa ama ya ni, na ya la ahorejo, dama ya la tama ka ya nya Nyeme dee jirima woowa n be. ³ Na nzen ya gusu la ahorejo sangha bo ya di wahara, ya si ka wahara di ni ma ya mindi a. ⁴ Nzen ya la mindi, nyini ma ya la wo kpa a, nzen ya la wo kpa, nyini ma ya la tama a. ⁵ Na tama n bo ya la i ni, i ma ya di ma nyinse, dama Nyeme afa i Awiewie Casi n ama ya, yiri ma ya si ya ahore su kabo Nyeme koro ya agaya barasu a.

⁶ Sangha bo ya la ma fanga mmoo ni, nyini sangha n ye Kristo ba wu maari satieyofom n a. ⁷ I ti kekereke ka sono soro su na i to i ngoo na i wu ma sono bo i yo sa bo i ko atin su, ama, beni, be koro fa ahoresi na i soro su na i de sono bo i yo sakpa agaya jinaabiri na i wu ma i. ⁸ Ama, Nyeme yiri akere ya kabo i koro ya barasu, dama sangha bo ya toko yo satiem ni, ye Kristo ba wu maari ya a. ⁹ Nyini dee ti, i yiwee n bo i wu maari ya ni, ye Nyeme ade ya ka ya yo sa bo i ko atin su i do n a, nyini ti, i ti nahore wo ka i de ya fite suicin n bo Nyeme fa cin satieyofom ni. ¹⁰ Sangha bo ya yo ti Nyeme kpofom ni, ye i wa Yesu wu maari ya n a, na wo yo ya ni Nyeme afien dongu, kisa na ya ni Nyeme afien ayo dongu ni, i de ya tii ji nahore su, dama Yesu la ngoo n dee ti. ¹¹ Ma nyini ngumi a, ama, ya la ahorejo na ya bo tuntun Nyeme ya Mibie Yesu Kristo dee ti, dama wo yo ya ni Nyeme afien dongu.

Adam ni Yesu Kristo jore

¹² Am ma ya tenje ya kere na Adam jore su. Yiri sono kun dee sa bo i yoori i ni faari satie baari durunya n nu a, ye satie n gusu faari yiwee ba kuunri sono kere n a, dama sono kere yo satie wo. ¹³ Satie yo woori durunya n nu ka, ye Nyeme nya ba faari i noanie kpamaawa n maari a, ama, sangha bo Nyeme nya fa ma i noanie kpamaawa n ma ma ni, minem yo kan ma satie jore, dama noanie kpamaawa be wo ma bere n dee ti. ¹⁴ Ama, haari nyini mmoo, fite Adam sangha n kere ko ju Moyisi sangha ni, yiwee la yiko kun minem so o, haari ni bo ba yo ma satie kabo Adam yoori ni. Adam woowa kere ya deke be fa ko yiri n bo i ba ba n jore a.

¹⁵ Ama, aceeri n bo Nyeme afa ama ya ni, i ti ma ka Adam dee satie ni. Sono kun satie dee ti ye mine dongu wuuri a, ama, deke bo i tara i kere n la ka, mine dongu anya ahoroma bambaka, i ti aceeri bo i fite Nyeme do o, sono kun ahoroma dee ti. Yiri la Yesu Kristo. ¹⁶ Bekun, Nyeme aceeri n ti ma ka sono kun n dee satie ni, dama sono kun n dee satie ni, nyini ma Nyeme di mine jore cin bu sui a, ama, mine dongu satie bo ba yo i n dee sin, ye Nyeme ace bu aceeri a, na wo de bu ka bu yo sa bo i ko atin su i do. ¹⁷ Ya nu ka sono kun dee satie ti, ye yiwee la yiko kun mine so n a, yiri sono kun n satie dee ti. Ama, deke bo i tara i kere n la kabo mine anya ngoo adi femeya n wo, dama ba nya ahoroma bambaka n bo i ti Nyeme aceeri ni, Nyeme ade bu ka bu yo sa bo i ko atin su i do a. I kere fite sono kun n dee ti wo, yiri la Yesu Kristo.

¹⁸ Nyini ti, kabo sono kun dee satie ti na Nyeme di minem kere jore cin bu sui ni, so bekun ye sono kun dee sakpayo ni ma Nyeme de minem kere ka bu yo sa bo i ko atin su i do na bu nya ngoo a. ¹⁹ Na kabo sono kun keteeri Nyeme noanie n na minem kere ayo satieyofom ni, so bekun ye sono kun gusu ade Nyeme noanie n a, nyini ye Nyeme de minem kere ka bu yo sa bo i ko atin su i do a. ²⁰ Nyeme faari i noanie kpamaawa n kereeri a, na mine si kabo satieyo asunnu barasu a, ama, deke bo satieyo

sunnu, Nyeme ahoroma n bo wo fa ama n sunnu tara so. ²¹ Nyini ti, kabo satie la yiko na i ma yiwee kun minem so ni, so ye Nyeme ahoroma n dee ti, ye i de minem ka bu yo sa bo i ko atin su i do a, na bu nya ngoo bo i la ma awieeri a, ya Mibie Yesu Kristo dee ti.

6

Yesu Kristo dee ti ya la ngoo

¹ To, ye ya se se wo? Ya koro ko su suyo satie, adena Nyeme ahoroma buka su, nzen se? ² Ai. I koro yo ma so. I ti ka ya ti minem bo ba du mo awu wo, fa ko satie su. Ye nzu ti ye ya toko yo satie bekun a? ³ Am si ma Nyeme nzue n bie n bu wo? Yere bo bu bieeri ya Nyeme nzue ni, ya ni Yesu Kristo ayo kun lee, na ya ni yiri asanga awu yiwee kun lee. ⁴ Sanga bo bu bieeri ya Nyeme nzue ni, i ti ka ya ni Yesu asanga awu, na ba kaaki ase ya ni yiri wo lee. Na kabo ya Si Nyeme Yikofa n tengeeri Yesu i yiwee nu ni, so ye i ma ya gusu nya nyini ngoo fofore n a.

⁵ Ya ti kabo i ti n wo, sanga bo i wuuri ni, so ye wo yo daka ka ya ba ti kabo i ti n a, i yiwee tenge n nu. ⁶ Ya si ka, ya woowa dawa ni, ba sanga akpama i ni Kristo i baka jaanu n su, adena ma ya yo akoom fa ko satie su kun, dama anuniembaa n bo i yo satie n wo ma bere kun. ⁷ Dama sono kere bo wo wu, wo de i tii afite satie nu lee. ⁸ To, kabo ya ni Kristo sanga wuuri ni, so ye ya yo yarada ka ya ni yiri sanga nya ngoo a. ⁹ Ya si ka Kristo tengeeri i yiwee n nu ni, i wu ma kun, dama yiwee la ma i nusu yiko kun. ¹⁰ Yiwee n bo i wuuri ni, i wuuri kpekun n kpein wo, na i yi satie, ama, ngoo n bo i la i ni, i wo Nyeme dee wo wo. ¹¹ So ye i ti ye ni ka ambere ni am tii si ka am awu fa ko satie su a, na am ni Yesu ayo kun, ye am la ngoo wo Nyeme dee wo a.

¹² Nyini ti, ma am ma satie la yiko fa ko am nuniembaa n su, na am yo am kunnu koroowa. ¹³ Ma am fa am nuniembaa be ma satie, na i kaaki deke bo i yo satie, ama, am fa am nu ma Nyeme ka minem bo ba tenge yiwee nu anya ngoo kisa, na am fa am nuniembaa n kere ma Nyeme na i fa am yo deke bo i yo sa bo i ko atin su. ¹⁴ Satie la ma yiko fa ko am do, dama Nyeme noanie kpamaawa n nie ma am su kun, ama, Nyeme ahoroma ni nie am su a.

Minem bo ba kaaki sa bo i ko atin su akoom

¹⁵ To, nzu bekun a? Kisa, Nyeme noanie kpamaawa n nie ma ya su kun, ama, Nyeme ahoroma ni nie ya su a. Nyini ti, ya koro yo satie, nzen se? Ai, ma so. ¹⁶ Am si ka nzen am faari am nu maari be na am deeri i mi noanie, am ti i mi n akoo o lee. Kabo i nya ti so ni, nzen am faari am nu maari satie, am ti satie akoo o, na am wu o lee. Ama, nzen am gusu deeri Nyeme noanie ni, i de am ka am ayo sa bo i ko atin su i do o lee. ¹⁷ Sanga be am yo ti satie akoom wo, ama, kisa ya da Nyeme asi ka Nyeme noanie n bo bu fa kereeri am, na am ade i ni am ahorembaa kere ni, ¹⁸ am ade am tii afite satie nu lee, am akaaki sa bo i ko atin su n akoom wo. ¹⁹ M fa adamande dee woowa, ye m fa kere kabo Nyeme ti a, dama am suti ma i bu. Am yo fa am nuniembaa n be yoori dangba sam wo, ni satie barasum wo, nyini ma am saaki noanie kpamaawa n a, so ye kisa am fa am nuniembaa yo sa bo i ko atin su, nyini ma am yo Nyeme mine casim a.

²⁰ Sanga bo am yo ti satie akoom ni, be mie ma am ka am yo sa bo i ko atin su. ²¹ Satiem bo am yo yoori bu ni, nzu kpere ye am nyaari i a?

Pui. Kisa, bu ti am nyingse wo, na i awieeri kere la yiwee wo. ²² Ama, kisa na am ade am tii afite satie nu, na am ayo Nyeme akoom ni, kperere bo am anya i ni, yiri la bo am ayo i mine casim ni, na i awieeri, am nya ngoo bo i la ma awieeri ni. ²³ Dama satie nkato la yiwee wo, ama, Nyeme aceeri n bo wo fa ama ya n la ngoo bo i la ma awieeri na i wo ya Mibie Yesu Kristo nu n wo.

7

Ajaa woowa kere kabo atin fofore n ti barasu a

¹ To, m ninbaam, m sujoko amberere bo am si noanie kpamaawa ni do a. Am si ma ka nzen sono toko la ngoo, ye noanie kpamaawa n nie i su a? Ama, i nya wu wieeri, i koro nie ma i su kun. ² Ya fa i ka, nzen bara aja, na i hun toko la ngoo, noanie kpamaawa n ma ma atin ka i yaki i ajaa, ama, nzen i hun n nya wuuri, i la atin bo i koro ko ja bieso fofore. ³ Nyini ti, nzen i hun n toko la ngoo na i ko jaari bieso fofore, bu fere i ka bara bo wo saaki ajaa ciire wo, ama, nzen i hun n awu ye i ko jaari bieso fofore, noanie kpamaawa n ma i atin wo, wo saaki ma ajaa ciire lee. ⁴ To, nyini ti, m ninbaam, i ti so o lee, amberere mmoo do. Kabo am ni Kristo ayo kun na wo wu ni, bu sangha kuunri am ni yiri wo lee. Nyini ti, noanie kpamaawa n nie ma am su kun, nyini ma am la atin na am kaaki be deem n a. Nyini la ka, am ti Kristo deem wo lee, yiri bo i tengeeri i yiwee n nu ni. Deke n bo i ti na i yo so n la ka, ya koro yo sakpa ma Nyeme. ⁵ Sangha bo ya yo su ya adamande woowa su ni, ya koroowa la ka, ya sufa ya nuniembaam suyo satiem, noanie kpamaawa n dee ti. Nyini satiem n awieeri la yiwee wo. ⁶ Ama, kisa, ya nya ya tii afite noanie kpamaawa n bo i yo nie ya su ni, dama ya wu wo. Nyini ti, ya su Nyeme wo, ya su ma atin dawa n bo i su noanie kpamaawa n bo ba kere ase n su, ama, ya su Nyeme ni atin fofore n bo Awiewie Casi n afa ama ya ni su a.

Kabo noanie kpamaawa n ma mine yo satie barasu ni

⁷ To, ye ya se se wo? Ya koro se ka noanie kpamaawa n ti satie, nzen se? Ai, ma so. Nzen ma noanie kpamaawa n awo ma bere, ma m si ma kabo satie ti. Dama nzen ma noanie kpamaawa n ase ma ka, "Ma a ma u konviki wura be dee nenge nu," ma m si ma ka nzen u konviki wuraari be dee nenge nu, i ti satie wo. ⁸ Noanie maawa n bo i seeri so n dee ti, satie anya atin m ahore su, nyini ma m la konviki barasu barasu fa ko minem nenge nu n a. Nyini kere ka nzen noanie kpamaawa n wo ma bere, satie la ma yiko, i ti ka deke bo wo wu wo. ⁹ Sangha be m yo la ngoo o, na m si ma noanie kpamaawa n jore, ama, sangha bo noanie maawa n baari ni, na wo ye satie su m ahore su, ¹⁰ na ma wu. Na ma nu ka noanie maawa n bo ma i ma ngoo ni, mini do, i faari yiwee baari a. ¹¹ Noanie maawa n dee ti, ye satie anya atin awura m ahore su adadaka m, ye i kun m a. ¹² Nyini kere kere ka noanie kpamaawa n ni i tii, ti deke kpa fite Nyeme do o, na noanie maawa kun kun n kere ti deke kpa a, na i kere sa bo i ko atin su.

¹³ Nyini ti, noanie kpamaawa n bo i ti kpa ni, wo ma ma wu wo, nzen se? Ai, ma so. Ama, satie fa nyini noanie kpa n su wo, ye i ma m wu a, adena satie kere kabo i ti barasu nahore su, na noanie maawa n ma minem si kabo satie ti deke tie agaya ni.

Woowa barasu nnyo bo i wo adamande nu ni

¹⁴ Ya si ka noanie kpamaawa n ti awiewie jore wo, ama, mini yiri, m bita adamande dee woowa a, na m ti satie akoo. ¹⁵ Sam bo m yo bu ni, m koro si ma deke n bo i ti na m yo bu ni, dama deke n bo m koro ka m yo bu ni, m yo ma nyini, ama, deke n bo m kpo bu ni, m yo nyini wo. ¹⁶ Nyini ti, nzen m yoori satie be, na m koro ma i, ma soro su ka noanie kpamaawa n ti kpa wo lee. ¹⁷ Ma nu ka ma m koroyanu ye m yo nyini satiem n a, ama, satie n bo i wo m ahore su ni ma m yo so a. ¹⁸ M si ka woowa n bo m bita i ni, i ti ma kpa haari kaan so, i ti adamande woowa a, nyini ti, sakpayo wo m ahore su, ama, m koro yo ma i. ¹⁹ M koro ka m yo sakpa, ama, m koro yo ma i, satie n bo m koro ma ka m yo i ni, m yo nyini wo. ²⁰ Satie n bo m yo bu na m koro ma ka m yo bu ni, nyini la ka, ma mini ni m tii yo bu a, ama, satie n bo i wo m ahore su ni yo bu a.

²¹ Ma nu ka nyini jore n ti nahore wo, ka, sanja kere bo m koro ka m yo sakpa, nyini sanja ye m yo satie a. ²² Dama m sunsunni ni m ahore su, m koro Nyeme noanie kpamaawa ni. ²³ Ama, ma nu ka noanie barasu be wo m juniembaa n kere nu, nyini noanie tie n kun lue ni noanie kpamaawa n bo i wo m sunsunni ni m ahore su n wo, na i kunna m juniembaa n kere nu, na i tara m nyi m. ²⁴ Oi. Mini anunfofo so. Nma de m tii ji a, na i yi m fite ahin adamande anuniembaa n nu a, bo i sucin m ko yiwee n nu, na m ka ngbeen n a? ²⁵ M da Nyeme asi, dama wo de m tii aji, ya Mibie Yesu Kristo dee ti.

To, mini do, m sunsunni ni m ahore su, m su Nyeme noanie kpamaawa n su wo, ama, m adamande dee woowa su, m su satie atin su wo.

8

Minem bo bu woowa ti kabo Awiewie Casi n koro ni

¹ Nyini ti, kisa, sono kere bo i ni Yesu Kristo ayo kun, Nyeme di ma i jore cin ma i sui. ² Dama Awiewie Casi n dee noanie kpamaawa n bo i ma ya ngoo, na i fite Yesu Kristo do ni, ade u tii aji, na wo yi u afite noanie kpamaawa n bo i ma a yo satie na a wu n nu ni. ³ Nyini noanie kpamaawa n la ma fanga, dama adamande anuniembaa woowa n ayoroki. Deke bo noanie kpamaawa n akoro ayo ma i ni, Nyeme ayo i, yiri la bo i sunmaari i tienju Wa durunya n nu fen, ni anuniembaa bo i ferema ni adamande dee n bo i yo satie ni, na wo di satie bo i wo adamande nunie n nu n jore, na wo yo i ngbeen. ⁴ Deke bo i ti na Nyeme yoori so n la ka, adena ya yo sa bo i ko atin su kabo noanie kpamaawa n kereeri ni, dama yere, ya su ma adamande anuniembaa woowa n atin su kun, ama, ya su awiewie n dee atin ni su a. ⁵ Minem kere bo bu su adamande anuniembaa woowa n atin su ni, bu sunsunni kere wo adamande sa koroowa su wo, ama, minem bo bu su Awiewie Casi n dee atin n su ni, bu sunsunni kere wo Awiewie Casi n jore su wo. ⁶ Bo i sunsunni wo adamande anuniembaa woowa n su, i mi wu o, ama, bo i sunsunni wo Awiewie Casi n jore su, i mi nya ngoo, na i nya ahoreda. ⁷ Dama sono kere bo i sunsunni kere wo adamande anuniembaa woowa n su ni, i mi ti Nyeme kpof o, i de ma Nyeme noanie kpamaawa ni, i koro de ma i wo mmoo fieo, ⁸ na bo i su adamande dee anuniembaa woowa n su ni, i koro yo ma sa bo i sun Nyeme nu.

⁹ Ama, ambere yiri, am su ma adamande anuniembaa woowa n atin n su, am su Awiewie Casi n dee atin ni su a, dama Awiewie Casi n wo am nu n wo. Ama, sono kere bo i la ma Kristo Awiewie ni, i mi ti ma Kristo dee. ¹⁰ Ama, ambere bo Kristo wo am do ni, am juniembaa n ba wu wo, satie

dɛɛ ti, ama, Awiewie Casi ni ama am ngoo, dama Nyeme do, i de am ka am yo sa bo i ko atin su wo. ¹¹ Nahore su, Nyeme tengeeri Yesu i yiwee n nu, nyini ti, nzen i Awiewie Casi n wo am nu, haari am njuniembaa wuuri mmoo, i ténge i kabo i tengeeri Yesu i yiwee n nu n wo, dama i Awiewie n wo am nu n dɛɛ ti.

¹² Nyini dɛɛ ti, m ninbaam, ya di kaari, má yere adamande anjuniembaa woowa n su dɛɛ kaari, bo má ya fa su yere adamande anjuniembaa woowa n atin su ni. ¹³ Dama nzen am su adamande dɛɛ anjuniembaa woowa n atin su, am wú wo lee, ama, nzen am ma Awiewie Casi n bukaari am, na am yakiiri adamande anjuniembaa woowa ni, am nyá ngoo. ¹⁴ Minem kere bo bu ma Nyeme Awiewie n kere bu atin, bere ti Nyeme nbaam a. ¹⁵ Dama Awiewie Casi n bo am ade i ni, i yaki má am na am kaaki yo akoom kun na am soro sere, ama, yiri ma am yo Nyeme nbaam a, na yiri ma am koro bo fere Nyeme ka, “Abba,” i bu la ka, “M Si.” ¹⁶ Awiewie Casi n ni i tii buka ya dɛɛ awiewie n ye i di daani ya ahore su se ka ya ti Nyeme nbaam a. ¹⁷ Kabo ya ti Nyeme nbaam ni, ya nyá deke n bo Nyeme ase ka i fá ma i minem ni, na ya ni Yesu Kristo gusu sánnga nya deke n bo Nyeme ase ka i fá ma i minem n a. Nzen ya ni yiri sannga diiri wahara, ya ni yiri gusu sannga nya i jirima woowa ni.

Kabo ya woowa bá ti kabo Nyeme dɛɛ n ti ni

¹⁸ M sunsun ka wahara n bo ya sudi i kisa ni, i ti má pui, ya koro fa má i sunsun má jirima woowa n bo Nyeme bá yi i kere ya ni. ¹⁹ Deke n kere bo Nyeme ayi bu n nminda ni anyumboro wo, na bu bá nu kabo Nyeme yí i nbaam fite fofoe n nu. ²⁰ Dama deke n kere bo Nyeme ayi bu n wo bere wo, bu la má kperɛ, má ka bere koro so a, ama, Nyeme ma bu la má kperɛ a. Deke bo i ti na i yo so n la ka, i la tama ²¹ ka deke n kere bo wo yi bu ni, bu nyá bu tii, na má bu yo akoom kun, na bu wu na bu kpoo, ama, na bu nyá tiide ni jirima woowa kabo Nyeme nbaam kere nya i barasu ni. ²² Ya si ka deke n kere bo Nyeme ayi bu ni, wo waraki ni yaari nu wo, haari ni kisa, kabo bara ba suwu baa na i di yaari ni. ²³ Má deke n bo Nyeme ayi bu ni ngumi wo waraki su a, ama, yere mmoo bo ya de i Awiewie bo i ti ciciri su aceeri ni, ya wo waraki su sunminda ni anyumboro wo, ka Nyeme bá fa ya yo i nbaam, na i de ya njunie ni. ²⁴ Tiide n bo ya nya i ni, nyini ma ya la tama n a. Nzen a la deke, a se má ka a la tama ka a nya i. Deke bo sono la i, i se má ka i la i tama. ²⁵ Ama, nzen ya la tama ka ya nyá deke be na ya nya nya má i, ya mindi nminda ni anyumboro wo, na ya bá nya i.

²⁶ I ti so lee, sannga kere bo ya yooaki na ya si má kabo ya yo ni, Awiewie Casi n ba buka ya, beni, ya si má kabo ya sere Nyeme barasu, ama, Awiewie Casi n ni i tii waraki so o sere Nyeme ma ya, ni waraki bo adamande koro joo má i. ²⁷ Nyeme fiiti adamande ahorembaa su na i si kabo i ti barasu a, yiri si deke bo i wo i Awiewie Casi n sunsuni nu a, dama Awiewie Casi n su kabo Nyeme koro ni su a, na i sere Nyeme ma i minem. ²⁸ Ya si ka Nyeme wo minem bo bu koro i n do, na i buka bu, adena i yo deke kere dongu ma bu, bere la minem bo i du mo seseri su ka i fere bu ni, na wo fere bu. ²⁹ Nyeme du mo siiri nyini minem wo, na wo cici ka bu bá yo kabo i Wa n ti ni, nyini ma i Wa n yoori baakpin, i nbaam kere nu n a. ³⁰ Nyeme du mo ciciri nyini n kere wo ka, na wo nya fere bu, na bere n bo wo fere bu n ye wo de bu ka bu yo sa bo i ko atin su i do n a, na bere n bo wo de bu ka bu yo sa bo i ko atin su i do ni, ye wo ma bu i jirima woowa n be n a.

Kabo Nyeme akere i koro barasu ni

³¹ Tɔ, kisa, ye ya se se wɔ bekun a, fa kɔ ahin sam kere su a? Nzen Nyeme wo ya dɔ, nma koro yo ya sa be a? ³² Nyeme akete má ka i fa má i tienɔgu Wa ni mmɔɔ ma má ya, ama, i faari i maari ya kere wɔ. Nyini ti, i yo se kete ka i má má ya deke n kere bo i ti kpa n a? ³³ Nma koro fa jɔre fa sɔ Nyeme minem bo wɔ yi bu n a? Be wo má bere, dama Nyeme ni i tii ade bu ka bu yo sa bo i kɔ atin su i dɔ a. ³⁴ Nyini ti, nma koro di ya jɔre cin ya sui a? Be wo má bere. Dama Kristo ni i tii wuuri wɔ, nahɔre na wɔ tenɔge i yiwee n nu, i tana Nyeme saa fɔmbɔrɔ su, susere i ma ya. ³⁵ Koro n bo Kristo koro ya ni, nzu deke koro kpaaki ya ni yiri a? Ai. Deke be koro kpaaki má ya ni yiri n nu. Kekereke o, wahara o, wuwuruwa o, ahɔe o, yaari o, anyumboro o, yiwee o. Deke be wo má bere bo i koro kpaaki ya ni yiri nu. ³⁶ Dama ba kere i Nyeme Jɔre Kadasi n nu ka, “Wɔrɔ dɛɛ ti, ale kere bo i cin, bu kun ya sɔ ɔ, ya ti ka nbɔem wɔ, ye bu kpɛ ya kɔm a.”

³⁷ Haari ni nyini n kere mmɔɔ ni, ya di nasara a, na ya toko di nasara buka su, Kristo bo i koro ya n dɛɛ ti. ³⁸⁻³⁹ M si tenle su ka, deke be wo má bere bo i koro kpaaki ya ni koro n bo Nyeme koro ya, ya Mibiɛ Yesu Kristo dɛɛ ti ni, yiwee wara nɔɔ o, merékem wara Sitana yikofɔm o, deke n bo bu wo bere o, wara deke n bo bu bá yo o, yiko bo i wo angoro wara asien bu o. Deke n bo Nyeme ayi bu ni, bu be wo má bere bo i koro kpaaki koro n bo i wo ya ni Kristo afien ni.

9

Minem bo Nyeme afere ayi bu n jɔre

¹ Tɔ, deke bo m sukan kere am ni, i ti nahɔre wɔ, m bu má kɔre, m ti Kristo dɛɛ wɔ, Awiewie Casi n gusu kere m sunsuni nu a, ye i di daani m ahore su a. ² Yiri la ka, m ahore asaaki agaya, na sanɔa kere i suyo m yaa ³ fa kɔ m ninbaa Yisarelifɔm dɛɛ busu. Nzen má mini ni m tii kaari nɔgbɛɛn, na m kpaaki yakiiri Kristo, adena i buka m ninbaam, m dɛɛ tienɔgu minem ni, má m koro. ⁴ Bere la Yisarelifɔm bo Nyeme maari bu atin ka bu yo i nbaam, na bu nɔuri i jirima woowa ni, na i faari sesesum diiri i di ni bere ni, na i faari nɔanie kpamaawa n maari bu ni, na i kereeri bu kabo bu su i barasu ni, na i seeri ka i yɔ sakpa beberebe ma bu ni. ⁵ Bu ti ya nam busu nufɔm wɔ, haari Kristo Tiidefɔ n bo Nyeme sunmaari i na i kaaki adamande baari durunya n nu ni, bu wuuri i fite bu dɛɛ busu n nu wɔ. Kristo Tiidefɔ ni la yiko tara deke n kere, yiri ti Nyeme a, yiri ti ye ni kansi sanɔa kere a. Ami.

⁶ I ti má ka Nyeme nɔanie n ti má nahɔre wɔ, dama má bu kere bo bu wuuri bu Yisarelifɔm busu nu ni n ti Yisarelifɔm nahɔre su a. ⁷ Nahɔre, má nbaam kere bo Abraham wuuri bu ni ti i nbaam nahɔre su a, ama, Nyeme yo seeri Abraham ka, “U wa Izaki sinfɔm nɔgumi yɔ u busu nufɔm a.” ⁸ Nyini la ka, má nbaam kere bo Abraham wuuri bu kabo adamande wu nbaam ni ti Nyeme nbaam nahɔre su a, ama, i nbaam bo Nyeme seeri ka i wú bu ni nɔgumi, ti i busu nufɔm nahɔre su a. ⁹ Dama kabo Nyeme yo seeri i n yaa, i nɔa, “Ti fen, nɔɔ cɛɛn ka buusɔ, m káaki ba na m bá nɔu ka u yi Saara bita baabiesɔ.” ¹⁰ Má nyini nɔgumi a, am tenɔge su ka ya na Izaki yo maari i yi Rebeka akunnu, ye i wuuri ndaam n a. ¹¹⁻¹² Sanɔa bo Rebeka nya wu má i ndaam ni, na bu nya yo má sakpa wara satie be ni,

nyini sanja n ye Nyeme seeri i ka, “Baakpien ni bá su baakan n a.” Nyeme dɛɛ koroyanu ye i yoori sɔ n a, yiri koro i sɔnɔ ye i yiiri i a, má ka bu be sayoowa dɛɛ ti a. ¹³ Kabo ba kere i Nyeme Jore Kadasi n nu ni, ka, Nyeme

ɲa,
“Jakɔbu, ye m koro i a,
ama, Isawu yiri, m kpo i wɔ.”

¹⁴ Ye ya se se wɔ? Ya koro se ka Nyeme ayo má sa bo i kɔ atin su, nzen se? Ai, ya koro se má sɔ fieo. ¹⁵ Dama Nyeme yo seeri Moyisi ka, “Sɔnɔ kere bo m koro ka m buka i, m búka i wɔ,
na sɔnɔ kere bo m koro ka m si i anjunfo ɔ.”

¹⁶ Nyini ti, má adamande koroyanu, wara deke bo i boro i nyi yo i ni ti jore a, ama, kabo Nyeme si anjunfo ni, nyini ti jore a. ¹⁷ Dama ba kere i Nyeme Jore Kadasi n nu ka, Nyeme yo seeri Ijipiti Feme Faaro ka, “Deke n bo i ti na m yiiri u tanaari femeya bie n su n la ka, m kere m yiko u ɲɔɔ su, na m duma tá bara ye durunya n kere nu.” ¹⁸ Nyini kere kere ka, sɔnɔ kere bo Nyeme koro ka i si i anjunfo, ye i si i mi anjunfo a, na minem bo i koro ka i yo bu ahorembaa kekereke ni, na i yo bu.

Nyeme yaafa ni i anjunfo si n jore

¹⁹ Nyini ti, beni, be koro bisa m ka, “Nzen i ti sɔ, nzu ti ye Nyeme di minem bo ba kete i n jore na i jaraki bu a? Nma koro kete na i kanda sa bo Nyeme koro i n a?” ²⁰ M ɲa, wɔɔ la ɲma na a se Nyeme akuruwa a? Dundu koro bisa má yakati tafɔ n ka, “Nzu ti ye a taari m sɔ a?” ²¹ Yakati tafɔ n la atin bo i fa i yakati n ta dundu bo i sufa yo juma cɛɛn n kere cɛɛn, na i kaaki la atin bo i fa be ta dundu bo i fa yo juma cɛɛn kpiri cɛɛn. ²² Nyini ti, Nyeme la atin bo i koro fa yaa, na minem ɲu kabo i yiko ti barasu. I gusu koro mindi agaya fa kɔ minem bo bu ma yaa ati i ni, bere bo má wɔ yo daka ka bu ka ɲɔbɛɛn ni. ²³ Na i gusu la atin bo i fa i jirima woowa bo i la má anjusu n fa kere minem bo wɔ si bu anjunfo ni, na wɔ du mɔ asese su ka bu bá nya i jirima woowa n be ni. ²⁴ Yere la nyini minem bo i si ya anjunfo, na ya nya i jirima woowa n be ni, má ka yere Yudafom ɲgumi, ye wɔ fere ya nbem a, ama, wɔ fere bo bu ti má Yudafom ni mmɔɔ nbem abuka su. ²⁵ I ti kabo Nyeme nɔaniɛ kanfo Hoseya akere i dɛɛ kadasi n nu n wɔ ka, Nyeme ɲa,

“Minem bo bu yo ti má m minem ni, m fere bu ka m minem.

Na yiri n bo ma koro má i ni, m fere i ka m sɔnɔ koroowa.

²⁶ Dika n bo i nu na m fereeri bu ka, ‘Am ti má m minem ni,’
ɔɔ ye bu fere bu ka Nyeme bo i wo bere sanja kere n dɛɛ nbaam n a.”

²⁷ Tɔ, na Nyeme nɔaniɛ kanfo Esaya abo awie fa kɔ Yisarelifom jore su, i ɲa, “Haari ni bo Yisarelifom sunnu beberebe ka ɲmie ni, bu nu mine kaan sɔ nyá tiide a. ²⁸ Dama sa n bo Micera ni yó i durunya n nu ni, i yó i wie ndende.” ²⁹ I ti kabo Esaya du mɔ seeri n wɔ, i ɲa,

“Nzen má Micera Yikofɔ n ayaki má ya busu nufom nbem,
má i yo ya kabo i yoori Sodomfom ni Gomorafom wɔ,
mie tiem bo Nyeme saaki bu ni.”

Yisarelifom ni labari kpa n jore

³⁰ Tɔ, ye ya se se wɔ? Minem bo bu ti má Yudafom ni, akpini má atin kabo bu yo sa bo i kɔ atin su Nyeme ɔɔ, ama, kisa, Nyeme ade bu ka bu yo sa bo i kɔ atin su i ɔɔ, bu yarada n dɛɛ ti. ³¹ Ama, na Yisarelifom bere, akpini atin kabo bu su nɔaniɛ kpamaawa n su, adena Nyeme de bu ka

bu yo sa bo i kɔ atin su. Ama, haari ni nyini mmɔɔ, ba koro asu má i su nyunyumi, na bu yo sa bo i kɔ atin su Nyeme dɔ. ³² Nzu ma i yoori sɔ n a? Dama ba kpini má atin kabo bu yo yarada na Nyeme de bu ka bu yo sa bo i kɔ atin su i dɔ, ama, bu kpiniiri atin ka bu sayoowa ma Nyeme de bu ka bu yo sa bo i kɔ atin su i dɔ a. Na ba bo bu jaa yabue n su na ba kpaasi.

³³ Kabo ba du mɔ akere i ase ni, Nyeme ɲa,

“Am ti fen, m sufa yabue be se Siyon mie kpiri n nu lee,
nyini yabue ni, minem bó bu jaa su na bu kpaasi.

Ama, sɔnɔ kere bo i yoori i yarada, i mi dí má nyinse.”

10

¹ M ninbaam, deke bo m koro i m ahore su la ka, m minem Yisarelifom nya tiide, m nyemesere lee sanga kere. ² M si tenle su ka bu nyunu aboro ka bu su Nyeme atin n su nahore su, ama, bu si má kabo bu yo na bu su i su. ³ Dama bu si má atin bo Nyeme de minem ka ba yo sa bo i kɔ atin su i dɔ ni, ama, bu kpini bu tienɲu atin wɔ, na bu su i su. Nyini ti, na ba kete Nyeme atin ni, ba de má kabo Nyeme ɲa bu yo sa bo i kɔ atin su i dɔ ni. ⁴ I ti nahore wɔ, ka Kristo juma n bo i yoori i ni, yiri kuunri noanie kpamaawa n kere nɔɔ a, adena sɔnɔ kere bo i yoori i yarada, Nyeme de i mi ka i yo sa bo i kɔ atin su i dɔ.

Sɔnɔ kere koro nya tiide

⁵ Moyisi yo kere fa kɔɔri kabo mine koro su noanie kpamaawa n su, na bu yo sa bo i kɔ atin su Nyeme dɔ, i ɲa, “Sɔnɔ kere bo i su noanie kpamaawa n kere su, i mi nyá ɲɔɔ.” ⁶ Ama, fa kɔ kabo yarada dee ti, na sɔnɔ yo sa bo i kɔ atin su Nyeme dɔ ni, i ɲa, “Má a sunsun u ahore su ka, ɲma fún kɔ aɲgoro a?” Nyini la ka, i kó fa Kristo jura ba lee. ⁷ Wara “Nma júra kunma ɲgongɔ n bo i la má awieeri nu a?” Nyini la ka, i kó fa Kristo fun fite bo ba wum n nu ba lee. ⁸ Deke bo i suse n la ka, “Nyeme noanie n waari má ni wɔɔ.

I wo u nɔɔ nu, ni u ahorembaa mmɔɔ su.”

Yiri la labari n bo ya kaanri i n fa kɔ yaradayo su ni. ⁹ NZen a teke u nɔɔ jɔɔɔri minem nyunu ka, Yesu ti u Mibie nahore su, na a yoori yarada u ahore su ka Nyeme tengeeri i yiwee n nu, a nyá tiide. ¹⁰ Dama sɔnɔ kere bo i yoori yarada i ahore su, ye Nyeme de i ka i yo sa bo i kɔ atin su i dɔ a. Na sɔnɔ kere bo i teke i nɔɔ jɔɔɔri minem nyunu ka wɔ yo yarada, nyini ma i nya tiide a. ¹¹ Dama ba kere i Nyeme Jɔre Kadasi n nu ka, “Sɔnɔ kere bo i yoori i yarada, i mi dí má nyinse.” ¹² Nyini ti, bo bu ti Yudafom, ni bo bu ti má Yudafom, bu la má kpakpaakinu, Micera kun ni ti bu kere Mibie a. Yiri ma minem kere bo bu bo fere i дума deke kpa bo i la má aɲusu n a. ¹³ Dama ba kere i Nyeme Jɔre Kadasi n nu ka, “Sɔnɔ kere bo i bo fereeri Mibie n дума, i mi nyá tiide.”

¹⁴ Tɔ, bu yo se koro bo fere i дума, má ka ba du mɔ ayo i yarada? Ye bu yo se koro yo i yarada, má ka ba du mɔ ati i jɔre? Ye bu yo se koro ti i jɔre a, má ka be adu mɔ akan i labari kpa n akere bu? ¹⁵ Ye bu yo se koro kan i labari kpa n kere minem a, má ka be asunma bu minem dɔ? Kabo ba kere i Nyeme Jɔre Kadasi n nu, ka, “Bo bu suba kan Nyeme labari kpa n ma ya ni, bu natiiri yo fie.” ¹⁶ Ama, má sɔnɔ kere soroori su deeri labari kpa n a, kabo Nyeme noanie kanfɔ Esaya yo seeri ni, ka, “Ya Mibie, ɲma ayo ya labari n yarada? Ai, be ade má i.” ¹⁷ Nyini ti, kana sɔnɔ ba yo Yesu

Kristo yarada, má ka wɔ ti i labari kpa n ka, kana sɔnɔ gusu ba ti labari kpa ni, má ka be akan Kristo nɔaniɛ ni akere i.

¹⁸ Ama, minɛ bo ba de má labari kpa ni, ba ti má jɔrɛ n wɔ, nzen sɛ a? Nahɔrɛ, ba ti i. Dama ba kɛrɛ i Nyemɛ Jɔrɛ Kadasi n nu ka,
 “Ba bo ndoori abara aye durunya n kɛrɛ nu,
 na bu nɔaniɛ aju asien n kɛrɛ su.”

¹⁹ M koro ka m bisa bekun ka, Yisarelifom ni, ba si má? Ba si. Moyisi du mɔ seeri ka, Nyemɛ ɲa,

“M má am si kɔrɛ fa kɔ minɛm bo bu ti má daanfɛ n nahɔrɛ su ni,
 m má am fa yaa fa kɔ minɛm bo bu la má ɲɔnɔlɛ n ɲu.”

²⁰ Na Esaya ayo ahoresi, na wɔ se bu ka, Nyemɛ ɲa,

“Haari minɛm bo bu yo nienɛ má m busu ni, m ma ba ɲu m.

Na minɛm bo bu yo bisa má m busu ni, ma bɔ bu nu afa m ɲu akere bu.”

²¹ Na Esaya akaaki ase fa kɔ Yisarelifom su ka, Nyemɛ ɲa, “Ale kɛrɛ bo i cin, m tenje m saa fere nyini minɛm n wɔ, ama, bu ti atii kekereke ni ketemafom wɔ.”

11

Kabo Nyemɛ ma Yisarelifɔ nbem diiri i ahɔrɔma ni

¹ M koro ka m bisa ka, Nyemɛ akete i minɛm wɔ, nzen sɛ a? Ai, wɔ kete má bu e. Am ti fɛn. Mini Pɔɔlu ni m tii, m ti Yisarelifɔ ɔ. M ti Abraham busu nufɔ ɔ, m fite Benjamin dɛɛ lɛɛ anɔ n nu wɔ. ² Nyemɛ akete má i minɛm bo i du mɔ yiiri bu ni. Am nya kan má Nyemɛ Jɔrɛ Kadasi n nu fa kɔ i nɔaniɛ kanfɔ Eliya n su, kabo i jarakiiri Yisarelifom Nyemɛ dɔ n wɔ, nzen sɛ? ³ Bo i ɲa, “Mícera, ba kun u nɔaniɛ kanfom kɛrɛ, ba kaaki afufu u yoowa yoobirim n kɛrɛ, wɔ kɔ aka mini ɲgumi kpein wɔ, ye bu koro ka bu kun m gusu n a.” ⁴ Ama, Nyemɛ yo seeri i sɛ wɔ? I ɲa, “Ma yaki Yisarelifom minɛ akpii nso afa ase Yisareli asien n su. Bɛrɛ ye bu nya kutu má amɔɛ Baali n na bu su i a.” ⁵ Nyini dɛɛ ti, kisa gusu, i ti sɔ ɔ lɛɛ. Nyemɛ ayi Yisarelifom nu minɛ kaan sɔ ɔ, ye wɔ fere bu a, fa kɔ i ahɔrɔma n dɛɛ ti. ⁶ I ahɔrɔma n dɛɛ ti, ye wɔ yi bu a, má ka bu sayoowa dɛɛ ti a. Nzen má i ti ka bu sayoowa n dɛɛ ti, má ahɔrɔma n ti má aceeri kun.

⁷ Nzu bekun a? Yisarelifom n anya má deke n bo bu kpiiri i busu ni, ama, minɛm n bo Nyemɛ yiiri bu ni, bɛrɛ nyaari i a, na bo bu kaari n kɛrɛ ahorembaa ayo kekereke. ⁸ I ti kabo ba kɛrɛ i Nyemɛ Jɔrɛ Kadasi n nu n wɔ, ka,

“Nyemɛ ama bu ahorembaa nɔnɔri,
 na i ma bu nyumbaa ɲu má asi,
 na i ma bu sui ti má asui,
 haari ni nyuma.”

⁹ Na Fɛmɛ Davidi ase ka,

“Ma bu cɛɛkpiri diire diibiri n kaaki toroku ni diendɛ tara bu.
 Ma bu kpaasi, na bu nya bu satɛ ɲkatɔ.

¹⁰ Ma bu nyunu si biri na bu koro ɲu má asi,
 ma bu wi biri sanɲa kɛrɛ sanɲa ka ba sɔ sɔri nɔnɔri wɔ.”

Kabo bo bu ti má Yudafom n anya tiide ni

¹¹ M koro ka m bisa ka, bo bu boori bu jaa kpaasi ni, bu yasu má kun wɔ? Ai, má sɔ. Ama, nahɔrɛ, bu kpaasi sɔ n dɛɛ ti, ye minɛm bo bu ti má Yudafom nyaari tiide a, adena Yudafom ɲu i na bu si bu kɔrɛ. ¹² Nyini ti,

ba kpaasi n dɛɛ ti, ye durunya n nufŏm anya deke kpa beberebe a, ba fun deke n bo má bu nya i n dɛɛ ti, ye bo bu ti má Yudaŏm n anya deke kpa beberebe n a. Tɔ, nzen i ti sɔ, na Yudaŏm bo bu bá yo yarada n búka su, i yó deke kpa tara sɔ.

¹³ Kisa m sujɔɔ amberɛ bo am ti má Yudaŏm ni gusu dɔ a. Juma n bo Nyɛmɛ afa ama m ni, i sunmaari m ka m yo i jaramasa amberɛ bo am ti má Yudaŏm dɔ ɔ, nyini ti ye m fa m juma n fa fɔ a, ¹⁴ na i má m tienɔ minɛm si kɔrɛ, adena bu nbem nya tiide. ¹⁵ Dama sanɔa bo Nyɛmɛ keteeri bu ni, ye i ni durunya n nufŏm kɛrɛ ayo kun a, ama, nzen i kaaki deeri bu bekun, i tí sɛ wɔ? I yó ka ba nya ɔɔ afite yiwee nu wɔ lɛɛ. ¹⁶ Nzen be faari i alembaa fɔfɔrɛ be fa yoori yoowa na i fa maari Nyɛmɛ, nyini la ka, i alembaa n kɛrɛ ti Nyɛmɛ dɛɛ wɔ lɛɛ. Ye nzen baka bunlui n ti Nyɛmɛ dɛɛ, nyini la ka, i asambaa n kɛrɛ gusu ti Nyɛmɛ dɛɛ wɔ lɛɛ.

¹⁷ Nahɔrɛ, Yisareliŏm ti ka baka n bo i su suuwa kpa n wɔ, ye ba kpɛ i asambaa ni nbem atu, na amberɛ ti ka boro baka bo i suuwa la má fanɔa, ye ba kpɛ am asa baka n bo i su suuwa kpa n dɛɛ asambaa n su a, nyini ti, am ni baka n bo i su suuwa kpa n asambaa n kɛrɛ sanɔa nya ɔɔ fite i bunlui n dɔ ɔ. ¹⁸ Nzen i nya ti sɔ, má am fa fɔ ka am ti kpa tara baka n bo i su suuwa kpa n ni i tii, dama má asambaa ni ma bunlui ni ɔɔ a, ama, bunlui ni ma asambaa ni ɔɔ a.

¹⁹ Beni, a se ka, “Ba kpɛ baka n bo i su suuwa n dɛɛ asambaa n be, adena mini nya sasuubiri a.” ²⁰ Tɔ, i ti nahɔrɛ wɔ, Yudaŏm ayo má yarada n dɛɛ ti, ye Nyɛmɛ kpɛɛri bu jiiri n a, ye u yarada n dɛɛ ti, ye a jina jinaabiri n bo a jina n a. Nyini ti, má a yo kpirikoro, ama, si u ɔ sa. ²¹ Dama nzen Nyɛmɛ ayaki má baka kpa n ni i tii dɛɛ asambaa ni, beni, i bá yaki má wɔrɔ boro baka ni mmɔɔ dɛɛ asambaa ni. ²² M ɔa a ɔu kabo Nyɛmɛ yo sakpa barasu ni, ni kabo i di mine jɔrɛ na i cin bu sui ni anyumboro barasu ni. Minɛm bo bu yo má i yarada n ye i di bu jɔrɛ cin bu sui ni anyumboro n a, ama, wɔrɔ yiri, i yo sakpa ma u wɔ, nyini ti, susu i sakpa n bo i yo ma u n su, má nyini, i kpɛ wɔrɔ mmɔɔ ji wɔ lɛɛ. ²³ Nzen Yudaŏm kaakiiri bu wo, na bu bá yoori Nyɛmɛ yarada, i koro fa bu sa bu woobiri dawa n su, dama i la yiko bo i koro yo sɔ. ²⁴ Ti fɛn. Wɔrɔ mmɔɔ ni u tii ti ka boro baka asambaa n bo ba kpɛ i afa asa baka n bo i su suuwa kpa n su wɔ. Nyini ti, a si ka Nyɛmɛ dɔ, i ti má kekereke na i káaki ba fa baka n bo i su suuwa kpa n asambaam n ba sa bu woobiri dawa n su bekun.

Kabo Nyɛmɛ si sɔnɔ kɛrɛ aɔunfɔ n jɔrɛ

²⁵ M ninbaam, asiri nu jɔrɛ be yaa, ye m koro ka am si i a, adena má am yo am ɔu kpiri ka am la si. Yiri la ka, kabo Yisareliŏm nbem ayo bu ahorembaa kekereke ni, bu bíta i sɔ haari fa kɔ ju sanɔa bo minɛm bo bu ti má Yudaŏm kɛrɛ bá ba Nyɛmɛ dɔ. ²⁶ Tɔ, i yó sɔ ɔ, na Yisareliŏm kɛrɛ bá nya tiide, kabo ba kɛrɛ i Nyɛmɛ Jɔrɛ Kadasi n nu ni, ka, “Tiidefɔ ni fite Siyon mie kpiri n nu ba,
na i bá yi deke n kɛrɛ bo i kɔ má atin su fa tu,
na i yó Jakɔbu busu nufŏm casi.

²⁷ Kabo m fá sesesu di i di ni berɛ lɛɛ,
sanɔa bo m ba yiiri satɛ n bo i wo bu ɔu ni.”

²⁸ Kabo Yudaŏm n akete labari kpa n ni, nyini ma ba kaaki Nyɛmɛ kpɔfɔm kisa n a, amberɛ bo am ti má Yudaŏm n dɛɛ ti. Ama, fa kɔ kabo Nyɛmɛ fereeri bu nam na i yiiri bu ni, bu ti i mine koroowam wɔ. ²⁹ Dama nzen

Nyeme faari i aceeri fa ceeri mine nbem, wara nzen wo fere sono, i kaaki ma i sunsunni. ³⁰ Amberɛ, am yo keteeri Nyeme noanie n wo, ama, kisa, wo si am anunfo, bere bo ba kete i noanie n deɛ ti. ³¹ To, kisa, i ti so o, bere akete Nyeme noanie ni, dama Nyeme asi am anunfo, adena i awieeri su, na i ba si bere gusu anunfo. ³² Dama Nyeme abo sono kere kun ka bu kere kete i wo, adena i awieeri su na i ba si bu kere anunfo.

Nyeme kansi jore

³³ Nahore, Nyeme alecira ni i si bo i la i n wo ngo. Kabo i di i jore ni, be koro fiiti ma nu na i ti i bu, i atin n gusu kere, sono koro si ma i bu. ³⁴ Ba kere i Nyeme jore Kadasi n nu ka, "Nma nya si deke bo i wo Micera n sunsunni nu a?"

Wara nma nya koro tu i fo a?"

³⁵ "Nma nya ce Nyeme deke be a, adena Nyeme kaaki to i mi kaari a?"

³⁶ Dama deke kere fite yiri do a, deke kere ti i deɛ wo, na deke kere ba yo i deɛ wo. Yiri ti ye ni ka ya kansi i sangha kere sangha. Ami.

12

Minem bo bu yo Nyeme sa koroowa n woowa jore

¹ Nyini ti, m ninbaam, m sere am wo, am nie kabo Nyeme asi am anunfo ayo am sakpa ni, na am fa am nju ma i, kabo ma am yo woowa fa ma i ni, ama, am toko la ngoo, na am kaaki Nyeme minem na am su i ni anyumboro. Nyini ti nyemesu bo i sun i nu a, dama wo yo sakpa ama am.

² Ma am ma am woowa ti kabo durunya n nufom woowa ti barasu ni, ama, am kaaki am sunsunni fofore, na am kaaki am wo, nyini ma am koro si Nyeme koroyanu sa a, bo i ti kpa, na i sun i nu, na i ti kabo i koro ka i ti ni.

³ To, Nyeme aceeri n bo wo fa ama m deɛ ti, m sutu am kere fo o ka, ma be wura i nju kpiri tara kabo i ti ni, ama, sono kere sunsun na i nie i nju kabo i ti nahore su barasu, na i si kabo Nyeme ama i mi yarada barasu ni.

⁴ Adamande anuniembaa n ti momo kun wo, ama, i la bue bue, i kere ni i juma bo i yo i. ⁵ Ya gusu do i ti so o lee, ya sunnu, ama, ya ni Kristo ayo kun n deɛ ti, ya ti anuniembaa momo kun wo, na ya kere ti anuniembaa n bue be bo ya buka ya benggu wo. ⁶ Nyini ti, aceeri barasu barasum bo Nyeme ahoroma n deɛ ti na wo fa ama ya ni, am ma ya fa yo i juma ni.

Nzen aceeri n bo Nyeme afa ama be n la ka i sukan Nyeme noanie ni, i ti ye ni ka i mi sufa yo juma, kabo i yarada n ti barasu ni. ⁷ Nzen Nyeme ama be aceeri ka i su amusui, i ti ye ni ka i mi sufa su. Nzen wo ma be aceeri ka i fa kere minem, i ti ye ni ka i mi sufa kere bu. ⁸ Nzen wo ma be aceeri ka i sutu minem fo na i wura bu kpekperɛ kekereke, i ti ye ni ka i mi sutu fo yo so. Nzen wo ma be aceeri ka i suyo sakpa na i ce minem aceeri, i ti ye ni ka i mi yo i ni ahorembaa kun. Nzen wo ma be aceeri ka i yo minem mofɔ, i ti ye ni ka i yo so ni anyumboro. Ye nzen wo ma be aceeri ka i suyo sakpa ma minem bo bu wo ahoresaaki nu ni, i ti ye ni ka i yo so ni ahorejo.

⁹ Am koro minem ni akunnu fofoe, am kpo satie, na am su deke bo i ti kpa su. ¹⁰ Am koro am benggu Kristofom ka am ti nibaam wo, na am bu am bengum ka bu tara am. ¹¹ Am su Mibie n ni anyumboro, ma am yo nvieya, am ma am ahorembaa bi ni nyemesu. ¹² Am la ahoresi n deɛ ti, am ma am ahore jo. Sangha kere bo am sudi wahara, am mindi, na am

sere Nyeme sanja kere ni anyumboro. ¹³ Am kpaaki am nenjem nu ma Nyeme minem bo bu la má be ni, na am boro am nyi sude minem wɔfɔ.

¹⁴ Am sere deke kpa Nyeme dɔ ma minem bo bu kere am wuwuruwa ni, am sere deke kpa ma bu, má am sere deke tie ma bu. ¹⁵ Nzen minem wo ahoreɔ nu, am ma am ni bere kere ahore ti jɔɔwa. Nzen minem wo ahoresaaki nu, am ma am ni bere kere wo ahoresaaki nu. ¹⁶ Am ma am ni am benjum sanja wo ni sawɔre, má am koro kpiri, ama, am fa am ɲu mata tarakam. Má am se ka ambere ɲgumi la ɲgonle a.

¹⁷ Nzen sɔnɔ yo am satie, má am wɔrɔ tie tɔ i kaari. Ama, am boro am nyi na am suyo sa bo i ti kpa, na sɔnɔ kere ɲu i, na bu se ka i ti kpa. ¹⁸ Nzen am koro yo i, am boro am nyi na am ni sɔnɔ kere tana ni laifie. ¹⁹ M danfo kparam, nzen be ayo am satie, má am wɔrɔ tie tɔ i kaari, ama, am yaki i, na Nyeme cɛn i mi sui, dama ba kere i Nyeme Jɔre Kadasi n nu ka, Mícera n ɲa, “Mini cɛn bu sui a, mini tɔ bu kaari a.” ²⁰ Ama, am yo kabo ba kere i Nyeme Jɔre Kadasi n nu ni, ka, “Nzen ahɔe ati u kpɔfɔ na a la diire, ma i na i di. Nzen nzuehɔe ati i, ma i nzue na i nu. Nzen a yoori sɔ, i ti ka a tɔrɔ sinmɔne ago i mi tii su wɔ leɛ.” ²¹ Má a ma satie yoowa kunma u, ama, ma u kpayo n kunma satie ni.

13

Kabo i ti ye ni ka ya de tereterefɔm nɔanie barasu ni

¹ I ti ye ni ka sɔnɔ kere de tereterefɔm nɔanie, bere bo bu la yiko na bu nie am su ni, dama yiko be wo má bere bo i fite má Nyeme dɔ. Bo bu la yiko kisa n kere, Nyeme akpama bu a. ² Nyini ti, sɔnɔ kere bo i keteeri tereterefɔm nɔanie ni, i mi sukete deke bo Nyeme akpama i n wɔ leɛ. Sɔnɔ kere bo i yoori sɔ, i sukpini suicin ma i ɲu wɔ leɛ. ³ Dama sɔnɔ kere bo i yo sakpa soro má tereterefɔm ni sere, ama, sɔnɔ kere bo i yoori satie ni, yiri soro tereterefɔm n a. Nyini ti, nzen a koro má ka a soro tereterefɔm ni, yo sakpa, na bu kansu u. ⁴ Nyeme ma tereterefɔm wo bere yo bu juma a, na bu buka u na a yo sakpa. Ama, nzen a yoori satie, ma sere ti u, dama Nyeme ama bu yiko ka bu yo bu juma ma yiri Nyeme a, na bu cin minem bo bu yo satie n sui. Bu cin má minem sui ɲgbɛnɲgbɛn. ⁵ Nyini dɛɛ ti, i ti ye ni ka am de tereterefɔm n nɔanie, má ka am soro ka bu cin am sui n ɲgumi dɛɛ ti a, ama, am ahore su, ni am sunsunni kere ka am yo sɔ n dɛɛ ti a. ⁶ Nyini dɛɛ ti, i kaaki ti ye ni ka am tɔ am lampom, dama gominam n yo bu juma ni anyumboro wɔ, Nyeme akere ka bu yo sɔ a. ⁷ Nyini ti, deke bo i ti ye ni ka am yo ma sɔnɔ kere ni, am yo ma bu. Am tɔ am lampom kaari, wara nzen ba kpie am kaari be, am tɔ i, sɔnɔ kere gusu bo i ti ye ni ka am ma i jirima, am ma i.

Kabo i ti ye ni ka ya yo fa kɔ ya benjum n dɔ ni

⁸ Má am ma be deke be kaari su am su. Deke bo wɔ yo daka ka am bita am benju kaari la ka, am sukoro am benju. Dama sɔnɔ bo i koro i benju, i mi su Nyeme nɔanie kpamaawa n kere su wɔ leɛ. ⁹ Dama am si Nyeme nɔanie maawam n kere, ka, “Má a saaki ajaa ciire, má a kun sɔnɔ, má a wɔ,” ni bo i ɲa, “Má a ma u konviki wura be dɛɛ nenje nu,” haari ni bo ba ka n kere jina nyini nɔanie kun ni su a, ka, “Koro u benju kabo a koro u ɲu ni.” ¹⁰ Sɔnɔ kere bo i koro i benju yo má i mi satie. Nyini kere ka nɔanie kpamaawa n kere jina koro su wɔ leɛ.

Minem bo bu wo wein nu n jɔre

¹¹ I ti ye ni ka am yo so, dama am si kabo ahin sang'a n ti ni. Sang'a n aju, i ti ye ni ka am tenge, má am daafi. Dama sang'a n bo ya nyá tiide n adodo, i waari má ka sang'a bo ya du mo yoori yarada ni. ¹² Wo ka kaan na ya fite korngue nu, ale sucin lee. Nyini ti, am ma ya yaki awosin nu juma kere, na ya yo wein sayoowa, kabo luekunfom sana bu biesoya nengem na bu ko kun lue ni. ¹³ Ya wo wiesu wo lee, nyini ti, am ma ya woowa ko atin su. Má ya sudi ya tii, sunu nzan subo, suyo ngbeenngbeen, má ya suyo sakaraya, suyo konvikiya ngbeenngbeen, má ya sukpini jore, na má ya susi kore. ¹⁴ Ama, am ma ya fa ya Mibie Yesu Kristo n yo deke bo ya fa wura, kabo sono fa sutura wura barasu ni, na má ya su ya juniembaa koroowa n su.

14

Má a jaraki u beng'u

¹ Am de minem bo bu yarada ti má biiwa n ni am saa nnyo, má am se bu akuruwa fa ko deke n bo bu ci bu n su na am tanda bu ahore. ² Ma ya fa i ka, nbem la yarada bo bu koro di deke kere bo bu koro, ama, nbem gusu wo bere, bu yarada ti má biiwa, bu ciire la nie, bu di toro nyawa n ngumi wo. ³ Sono bo i di nie kere nie ni, má i mi bu bo i di má nie ni ngbeen. Sono kere gusu bo i di nyawa n ngumi ni, má i mi jaraki bo i ci má pui ni, dama Nyeme ade i a. ⁴ Woro la nma na a jaraki be dee gbefene? I dee tiengu mibie ni sé ka i jina wara i kpaasi a. I ti nahore wo ka i jina a, dama i mibie ni koro ma i jina nyunyumi a.

⁵ Bekun, mine nbem do, bu sunsun ka ceen nbem ti kpa tara nbem, ama, nbem gusu sunsun ka ceen n kere ti kun wo, be tara má i beng'u. I ti ye ni ka sono kere su kabo i sunsuni nu kere ka i ti kpa n su. ⁶ Sono kere bo i sunsun ka ceen be ti kpa tara ceen nbem ni, i mi koro ka i bu Nyeme dee ti, ye i yo so a, ye sono kere bo i ci má pui n gusu, i mi koro ka i bu Nyeme dee ti, ye i yo so a, dama i da Nyeme asi fa ko diire n su, ye i nya di a. Sono kere gusu bo i di má deke nbem ni, i mi gusu bu Nyeme dee ti, ye i yo so a, dama i mi gusu da Nyeme asi fa ko diire n su, ye i nya di a. ⁷ Sono be wo má bere bo i koro se ka i wo i tii su wo wo, be gusu wo má bere bo i koro se ka i wu i tii su yiwee. ⁸ Ai, nzen ya la ngoo a, Mibie n dee ti ye ya la ngoo a. Nzen ya wu gusu a, Mibie n dee ti ye ya wu a. Nyini ti, nzen ya la ngoo wara ya wu wo, Mibie n dee la ya a. ⁹ Dama nyini dee ti ma Kristo wuuri, ye i tengeeri i yiwee n nu n a, adena i yo sono kere Mibie, bo bu la ngoo n ni bo ba du mo awu n kere. ¹⁰ Woro la nma, woro bo a jaraki u beng'u na a bu i ngbeen ni? A si má ka ya kere ba jina Nyeme nyunu na i dí ya jore? ¹¹ Kabo ba kere i Nyeme Jore Kadasi n nu ni, ka, Micera n na,

“Sono kere ba kutu m nyunu,
na sono kere ba teke i nno se ka mini ti Nyeme a.
Kabo ma se ni, nyini wo bere a.”

¹² Nyini ti, ya kere ba kan ya sa bo ya yo i n kere kere Nyeme.

Má a yo sa bo i ma u beng'u Kristof'o bo i jaa na i kpaasi

¹³ Nyini ti, am ma ya yaki ya bengum jore kan, na má ya jaraki bu kun, ama, am ma ya sunsun kabo ya yo na má ya ma ya beng'u Kristofom bo bu jaa, wara na bu kpaasi. ¹⁴ Kabo m ni ya Mibie Yesu ayo kun ni, nyini ma m si ka deke be mmoo ni i tii ti má ciire n a. Ama, nzen sono sunsun ka deke be ti ciire i do, má i mi di i. ¹⁵ Nzen diire n bo a di i n dee ti, na

a saaki u bengū Kristofō n ahore, nyini yiri, a suyo má koro sa læε. Kristo yo wuuri i dæε ti wō, má a ma i mi ka ngbæen, u diire n bo a di i n dæε ti. ¹⁶ Má am ma be jōjō jōrε tie fa kō deke kpa n bo am si i n su. ¹⁷ Dama kabo Nyemε nie i minem su ni, i ti má di ni nu jōrε wō, ama, i ti aceeri bo Awiewie Casi n afa ama minem wō, yiri la ka, ya yo sa bo i kō atin su Nyemε dō, ni tanalaifε, ni ahorejō. ¹⁸ Sōnō kere bo i suuri nyini atin n su, na i su Kristo sō, i mi yo sa bo i sun Nyemε nu a, na adamande kansi i ka i ti sōnō kpa.

¹⁹ Nyini ti, am ma ya boro ya nyi na ya su deke n bo i ma ya tanalaifε n su, na ya buka ya bengum, na ya kō mō ni ya nyemesu ni. ²⁰ Má am saaki Nyemε juma ní, diire dæε ti. Diire kere ti kpa a. Ama, nzen be di diire be na i ma i bengū bo i jaa na i kpaasi, nyini yiri, i ti má kpa. ²¹ Nzen a di nie, wara a nu nzan, wara a yo nyini n be sō, na i ma u bengū Kristofō bo i jaa na i kpaasi, i ti má ye ni ka a yo sō. ²² Yarada n bo a yo i u ahore su fa kō nyini jōrεm su, ma i wo u ni u Nyemε afien. Sōnō kere bo i yo sa bo i kō atin su, na i la má sika i ahore su ka wō yo satie, i mi la terefie nahōrε su. ²³ Ama, sōnō kere bo i ba sudi diire barasu nbem na i yo sika, Nyemε adi i mi jōrε ajaraki i ka wō yo satie, dama diire n bo i sudi i ni, wō yo má yarada. Deke kere gusu bo sōnō yo i, na i la má yarada, i ti satie wō Nyemε dō.

15

Ya yo sa bo i jō ya bengum ahore

¹ Yere bo ya la fanḡa fa kō yarada su ni, wō yo daka ka ya yo sawōrε ni bere n bo bu yarada la má fanḡa ni, na ya buka bu, na ya dada bu ahore, má ya yo sa bo i sun yere ni ya tii nu. ² Sōnō kere yo deke bo i sun i bengū nu, na i yo sakpa, na i kō mō ni i nyemesu ni. ³ Dama haari Yesu Kristo ni i tii ayo má sa bo i sun yiri ni i tii nu, ama, i ti kabo ba kere i Nyemε Jōrε Kadasi n nu n wō, ka, “Nzukōlεε barasu n kere bo minem fa kpiereri wōrō Nyemε ni, bu fa kpiereri mini wō.” ⁴ Deke n kere bo bu du mō kereeri i Nyemε Jōrε Kadasi n nu ni, bu kereeri i ka i kere ya a, adena ya la tama, dama deke bo ba kere i ni, nyini ma ya ahoresi a, na ya koro mindi a. ⁵ Nyemε ma ya mindi ni ahoresi a, yiri ma am la anōōse ni am bengū a, kabo Yesu Kristo kereeri am ni, ⁶ adena am kere tien am nōō fa anōōse, na am kansi Nyemε, ya Mibie Yesu Kristo Si.

Kabo minem bo bu ti má Yudafoḡm gusu ade Kristo labari kpa n ni

⁷ Nyini dæε ti, am de am bengum, ni am saa nnyō kabo Kristo ade am ni, nyini ma mine kansi Nyemε a. ⁸ Dama m suse am ka Kristo baari ka i ba buka Yudafoḡm n wō, i yoori sō n dæε ti, nyini ma deke n bo Nyemε seeri ka i yo ma Yudafoḡm nam n ayo biiwa nahōrε su n a. ⁹ Bekun i baari ka i ba buka minem bo bu ti má Yudafoḡm wō, na bu gusu kansi Nyemε fa kō kabo wō si bu anjunfō ni. Kabo ba kere i Nyemε Jōrε Kadasi n nu ni, ka, “Nyini dæε ti, m kánsi wōrō Nyemε,

m kánsi u duma minem bo bu ti má Yudafoḡm nu,
na m dí jue ma u.”

¹⁰ Ba kaaki akere i bekun ka,

“Ambere bo am ti má Yudafoḡm ni,

am ma am ahore jō ni Nyemε minem bo wō yi bu ni.”

¹¹ Bekun, i ḡa,

“Amberε bo am ti má Yudafoṃ ni, am kansi Micεra ni,
na am ma daanfiem kere kansi Nyeme.”

¹² Na Nyeme nɔanie kanfo Esaya gusu ase ka,

“Soṃo be bá fite Jese deε leε anɔ n nu,
i ti kabo baka tie i bunlui su n wɔ,
na i bá yo daanfiem kere feme,
yiri má bu nya ahoresi a.”

¹³ Nyeme ma ya tama, m sere i ka i ma am ahorejo ni tanalaifie kɔ sin su, kabo am ayo i yarada n deε ti, adena Awiewie Casi n yiko ma am tama bo i la má anusu.

Deke bo i ti na Pɔɔlu kereeri ahin kadasi n ni

¹⁴ Tɔ, m ninbaam, m si tenle su ka am la wo kpa, na am la si dongu, na am kaaki koro fa tu am beṅgu fo. ¹⁵ Haari ni nyini mmɔɔ, ma fa ahoresi, ye m sukere ahin kadasi n fa ma am a, adena m tenge am ahin sam n su, dama Nyeme ayo sakpa ama m, ¹⁶ ka m yo Yesu Kristo amususifo ma minem bo bu ti má Yudafoṃ ni, adena m kan Nyeme labari kpa n kere bere bo bu ti má Yudafoṃ ni, na Awiewie Casi n ma Nyeme de bu ka bu ti i deε mine casim. M yoori so ni, i ti ka Nyeme sayoowa donguyofɔ n bo i yo yoowa bo i sun Nyeme nu ni. ¹⁷ Yesu Kristo deε ti, m la atin bo m koro fo fa kɔ Nyeme juma n bo wɔ fa ama m su. ¹⁸ Nahore, i la m sere na m kan sam bo nyingam ayo bu ni, má ka sam n bo Kristo ma ma yo bu ni ngumi, yiri la bo wɔ ma ma kan i nɔanie n akere minem bo bu ti má Yudafoṃ ni, na ma yo alekutura sam, na ba de i nɔanie ni. ¹⁹ I ma m faari alekutura sam, ni Awiewie Casi n deε yiko nu fa yoori nyini juma n a. M boori i bu Yerusalem mie kpiri n nu wɔ, na ma bara aye akɔ aju haari Ilirikum awɔre n nu, na ma kan Kristo labari kpa n jore n kere akere bu. ²⁰ Deke bo m nyunu boro su agaya n la ka, m kan labari kpa n jore kere minem awɔrem n kere bo bu nya ti má Kristo duma ni, dama m koro má ka m ta be deε ataari su, ²¹ kabo ba kere i Nyeme Jore Kadasi n nu ni, ka,

“Haari ni bo minem nya kan má labari kpa n kere má bu ni,
bu nɔ i,
haari ni bo bu nya ti má labari kpa ni,
bu tí i, na bu sí i bu.”

Kabo Pɔɔlu ŋa i koro ka i kɔ nie Romafom busu ni

²² Tɔ, nyini n kere deε ti, sanɔa kere, má m koro ka m ba nie am busu wɔ, ama, m nya má atin. ²³ Ama, kisa, mie fɔfore be wo má bere bo m kɔ do na m kɔ yo juma ahin awɔrem n nu, nyini ti, kabo má sanɔa kere na m koro ka m ba nie am busu ni, ²⁴ m la tama ka m ba susin kɔ Espani deε awɔre n nu, m jina am do na m nie am busu, na m ni amberε nya tana, na am buka m na m koro kɔ ju deke bo m sukɔ ni. ²⁵ Ama, kisa yiri, m sukɔ Yerusalem mie kpiri n nu wɔ, m la buka be bo m kɔ fa ma Nyeme minem bo bu wo do ni. ²⁶ Dama Kristofom bo bu wo Makedoniya ni, ni bo bu wo Akaya deε awɔrem n nu ni, wɔ yo bu fie ka bu yi yi nwa, na m kɔ fa ma Nyeme minem bo bu wo Yerusalem na bu ti yaarifom ni. ²⁷ Bere ni bu tii afa sunsuni kpa anu ka Yerusalemfoṃ kaari su bu su, dama Yerusalemfoṃ du mɔ faari Nyeme deke kpa maari bere n bo bu ti má Yudafoṃ n wɔ, nyini deε ti, wɔ yo daka ka bere gusu nya durunya n nu nenɔe ma Yerusalemfoṃ ni. ²⁸ Tɔ, nyini ti, nzen m koro yoori nyini juma n kere wieeri, na bu nya nyini buka n kere, m bá nie am busu, na m

nyá sin kò Esipani. ²⁹ M si tenle su ka m baari, m fá deke kpa fite Kristo dɔ ba ma am.

³⁰ M ninbaam, kabo Ya Mibié Yesu Kristo wo ya dɔ, na Awiewie Casi n koro ya agaya n dɛɛ ti, m sere am wɔ, ka am buka m na ya sere Nyemɛ ni anyumboro, ³¹ ka i dé m fite Yudiya awɔre n nufɔ nbem bo bu yo má yarada n saa nu, na Nyemɛ minɛm bo bu wo Yerusalem n dé buka n bo m sufa kò ma bu ni. ³² Na nzen i ti Nyemɛ koroowa, na m bá am dɔ ni ahorejɔ, na m ni ambere kere koro dada ya benju ahore. ³³ Nyemɛ bo i ma tanalaifie n buka ya kere. Ami.

16

Kabo Pɔɔlu yoori Kristo jamam bo bu wo Roma mie kpiri n nu anse ni

¹ Tɔ, m koro ka am si ya niwa baabara n bo bu fere i ka Fibi ni, i yo Nyemɛ juma buka Kristo jama n bo i wo Kenciriyi mie kpiri n nu n wɔ.

² Am de i kabo má am de Nyemɛ minɛm barasu ni, Mibié n dɛɛ ti, na am buka i ni deke kere bo i koro, dama yiri ni i tii abuka mine dɔngɔ, haari ni mini mmɔɔ.

³ Am bisa Pirisila ni Akuyila dɔngɔ ma m. M ni bere sangɔ yo juma ma Yesu Kristo wɔ. ⁴ Bu yo tɔri bu ngɔɔ maari m wɔ, nyini dɛɛ ti ye m da bu asi n a, má mini ngumi yo bu anse a, ama, Kristo jamam kere bo bu ti má Yudafoɔm gusu yo bu anse. ⁵ Am bisa Kristo jama n kere dɔngɔ, bo bu tien bu nɔɔ bu dika ni.

Am bisa m danfo kpa Epanetosi n dɔngɔ ma m, yiri du mɔ yoori Kristo yarada Esiya dɛɛ awɔre n kere nu a. ⁶ Am bisa Mariya dɔngɔ, bo wɔ yo juma agaya abuka am ni. ⁷ Am bisa Andɔrɔnikusi ni Juniya dɔngɔ, m lamɔkɔ Yudafoɔm bo m ni bere yo woori dansaraka nu ni, bu la dumaye Kristo jaramasam kere nu, bere du mɔ yoori Kristo susufɔm ka, ye m nya ba yoori a. ⁸ Am bisa m danfo Ampiliyatusi dɔngɔ, m Mibié n dɛɛ ti, m koro i agaya. ⁹ Am bisa Wuribanisi dɔngɔ ma m, bo yiri ni yere sangɔ yo juma ma Kristo ni, na am kaaki bisa m danfo Sitakisi dɔngɔ. ¹⁰ Am bisa Apelesi dɔngɔ, bo wɔ yi i nɔ ka i ti Kristo susufɔ nahɔre su ni, na am bisa Arisitobulosi dikafɔm kere dɔngɔ. ¹¹ Am bisa m lamɔkɔ Yudafoɔ n bo bu fere i ka Herodiyon n dɔngɔ, na am bisa Naracisi dikafɔm bo bu ti Mibié n dɛɛ minɛm n buka su. ¹² Am bisa Tirifena ni Tirifosa dɔngɔ, nbara nnyɔm bo bu yo juma ma Mibié ni, ni m danfo Perisisi, yiri mmɔɔ ayo juma agaya ama Mibié n ni. ¹³ Am bisa Rufusu dɔngɔ, yiri bo Nyemɛ ayi i ka i yo i juma n ni, ni i ni bo i ti mini mmɔɔ ni ni. ¹⁴ Am bisa ahin minɛm kere dɔngɔ ma m, bere la Asinkiritusi, ni Felegon, ni Heremesi, ni Patorobasi, ni Heremasi, ni ya ninbaam kere bo bu wo bu dɔ ni. ¹⁵ Am bisa Filolokusi ni Juliya dɔngɔ, ni Nerɛyusi, ni i niemabara ni, ni Olimpasi, ni Nyemɛ minɛm kere bo bu wo bu dɔ ni. ¹⁶ Am bisa am benju dɔngɔ ni koro. Kristo jamam kere bo bu wo fen n bisa am dɔngɔ.

Awieeri su dɛɛ fɔtuuwa

¹⁷ M ninbaam, m sere am wɔ, am si am nɔ su sa ni minɛm bo bu saaki kereewam bo am adu mɔ ade i ni, na bu fa kpakpaakinu ba ni, na bu ma minɛm kpaasi fa kò bu yarada n su ni. Má am dodo bu. ¹⁸ Dama nyini minɛm sɔ, bu su má ya Mibié Yesu Kristo su, ama, bu su bu dɛɛ kunnu koroowa su wɔ, na bu bo minɛm bo bu si má pui n anɔɔfie, na bu dadaka bu. ¹⁹ Ama, ambere yiri, sɔnɔ kere ati kabo am ade Kristo nɔanie nahɔre,

nyini dɛɛ ti, m ahore ajo ako asin su. M koro ka am la si fa ko deke n bo i ti kpa n su, ama, m koro má ka am la si haari kaan so mmoo fa ko deke n bo i ti má kpa n su. ²⁰ Nyeme bo i ma tanalafie ni, i cé má, i má am yiko na am fun tientien Sitana nu mereki i. Ya Mibie Yesu Kristo buka am.

²¹ Timoti bo m ni yiri sanja yo juma n bisa am dongu, na Lukiyosi, ni Jason, ni Sosipateri, m lamoko Yudafo m gusu bisa am dongu.

²² Mini Teretiyusi gusu bisa am kere dongu, Mibie n dɛɛ duma n nu, mini ye Pɔolu ma m kereeri ahin kadasi n sufa ma am n a.

²³ M awurufobie Gayosi bisa am dongu. Kristo jama n kere tien bu noo i dika a. Irasitisi bo i ti mie n nu nwaa bitafo ni, ni ya niwa Kuwatosi kere bisa am dongu. [²⁴ Ya Mibie Yesu Kristo buka am kere. Ami.]

Pɔolu dɛɛ awieeri su noanie ni

²⁵ Am ma ya kansi Nyeme. Yiri koro ma am jina fanga kenken fa ko Yesu Kristo labari kpa n bo m kaanri i jore na am ati i n su a. I ti jore bo bu yo fa fieeri dada kere wo, ama, kisa wo fite fofoe nu. ²⁶ Yiri ye Nyeme noanie kanfo m kereeri i n a, na Nyeme bo i wo bere sanja kere n ama daanfie kere ati i, na ba de i, na ba yo i yarada. ²⁷ Nyeme ngumi la alecira a, yiri ti ye ni ka ya kansi i a, Yesu Kristo dɛɛ ti, sanja kere sanja. Ami.

Pɔɔlu kadasi ciciri su bo i kere fa maari KƆRINTOFƆM ni

¹ Mini Pɔɔlu bo Nyeme deɛ koroyanu na wo fere m ka m yo Yesu Kristo jaramasa ni, m ni ya niwa Sositeni ni sukere ahin kadasi ma am a. ² Ya sukere i na ya fa ma ambere Kristo jama n bo am wo Korinto mie kpiri n nu, na Nyeme afere am afa am ayo i deɛ mine casim ni, na wo ma am ni Yesu Kristo ayo kun ni, fa sanɔa ni minem kere bo bu bo fere ya Mibie Yesu Kristo duma n deke kere ni, yiri ti ya ni bere kere Mibie a.

³ Ya Si Nyeme, ni ya Mibie Yesu Kristo buka am, na bu ma am tanalaifie.

Sakpam bo Pɔɔlu na Nyeme ayo ama bu ni

⁴ Sanɔa kere m da Nyeme asi wo, ambere deɛ ti, fa ko sakpa n bo wo yo ama am na i fite Yesu Kristo do ni. ⁵ Yiri deɛ ti, am anya deke kpa doɔgu, haari fa sanɔa ni jore joɔɔwa, ni si kere. ⁶ Daani n bo ya diiri i fa ko Kristo nusu jore ni, ambere mmoo ni am tii si ka i ti nahore wo. ⁷ Nyini deɛ ti, am fun ma Nyeme aceeri kpa n haari kun n kpein mmoo, na am nminda fa ko sanɔa bo ya Mibie Yesu Kristo ba yi i nɔu fite ni. ⁸ Yiri ma am fanɔa haari ko ju awieeri a, na am la ma ngasi be ya Mibie Yesu Kristo deɛ ceen ni. ⁹ Nyeme la dabuɔu, yiri afere am ka am ni i Wa ya Mibie Yesu Kristo n la wo fie ni am beɔgu a.

Kpakpaakinu n bo i woori Kristo jama n afien ni

¹⁰ M ninbaam, m sere am wo, Yesu Kristo deɛ duma n nu, ka am kere fa anooɛ na ma am ma kpakpaakinu be wo am nu, ama, am ma am sunsunni ni am noanie yo kun nahore su. ¹¹ M ninbaam, deke bo i ti na m se so ni, Kolowe dikafom nbem ase m ka am la akuruwa am nɔnu nu. ¹² Yiri la ka, am nbem na, "Mini su Pɔɔlu su a," nbem na, "Mini su Apolosi su a," nbem na, "Mini su Petoro su a," ye nbem gusu na, "Mini su Kristo su a." ¹³ Kristo akpakpaaki i nɔu nu wo, nzen se? Ye bu kpamaari Pɔɔlu baka jaanu n su maari am a? Bu bieeri am Nyeme nzue Pɔɔlu deɛ duma nu wo? Ai. ¹⁴ M da Nyeme asi ka ma bie ma am be Nyeme nzue, ma ka Krisipusi ni Gayosi n ngumi. ¹⁵ Nyini deɛ ti, be koro se ma ka m bieeri i Nyeme nzue m deɛ duma nu. ¹⁶ Enehɛɛn, ma tenɔe su bekun ka m bieeri Satefanasi dikafom n gusu Nyeme nzue. Sin nyini sin, m koro tenɔe ma su ka m bieeri be Nyeme nzue kun. ¹⁷ Dama Kristo asunma ma m ka m ba bie minem Nyeme nzue wo, ama, i sunmaari m ka m ba kan i labari kpa n jore kere minem wo. Ma fa ma adamande deɛ alecira, ye m fa kan kereeri minem a, nzen ma m yo so, ma yiwee n bo Kristo wuuri baka jaanu n su n ti ngbeen wo.

Kristo ti Nyeme yiko ni alecira a

¹⁸ Dama nzen ya kan yiwee n bo Kristo wuuri i baka jaanu n su n jore kere minem bo bu suka ngbeen ni, bere do i ti sinnzinya jore wo lee. Ama, yere n bo ya nya tiide ni, i ti Nyeme yiko sa bo wo yo ama ya a lee. ¹⁹ Dama ba kere i Nyeme Jore Kadasi n nu ka, Nyeme na,

"M yo alecirafoɔm alecira ni ngbeen,

na m to sifoɔm si n atin."

²⁰ Tö, aleciraföm wo ni? Ye siföm wo ni? Ye bo bu fiiti na bu si ahin durunya n nu jöre n wo ni? Durunya n nu alecira ye Nyeme afa akaaki sinnzinya n a. ²¹ Nyeme la alecira, be koro fa má durunya n nu alecira na i fa si Nyeme. Nyeme koroyanu ye i ma ya kan labari kpa n bo i ti ka sinnzinya jöre n kere minem a, na bo ba yo yarada ni, Nyeme ade bu tii aji. ²² Dama bo bu ti Yudaföm ni, bere koro ka bu ñu alekutura sam wö, ye bo bu ti Girikiföm n gusu koro ka bu ti alecira jöre wö. ²³ Ama, yere kan Kristo Tiidefo labari kpa n jöre wö, kabo bu kpamaari i baka jaanu n su ni. Yudaföm dö, i ti ciire wö, ye bo bu ti má Yudaföm n dö, i ti sinnzinya jöre wö. ²⁴ Ama, minem bo Nyeme afere bu ni, bo bu ti Yudaföm ni, ni bo bu ti Girikiföm ni, Kristo ti Nyeme yiko ni alecira a. ²⁵ Dama Nyeme sa bo wö yo i na i ti ka sinnzinya sa n tara adamande alecira kere bo i la i, na Nyeme sa bo wö yo i na i ti ka i la má fanja ni, i tara adamande fanja kere bo i la i.

²⁶ M ninbaam, am sunsun na am nie kabo am yo ti na Nyeme ba fereeri am ni. Nzen ya ña ya nie, durunya n nufom yo bu má ka am döngu la alecira, am döngu yo ti má yikoföm, na am döngu gusu yo fite má nfanjaföm n busu nu. ²⁷ Ama, Nyeme ayi dekem bo bu ti sinnzinya sa durunya n nu ni, na wö fa awura aleciraföm nyinse, na wö yi dekem bo bu la má fanja durunya n nu ni, na wö fa awura nfanjaföm nyinse. ²⁸ Nyeme ayi bo bu ti tarakam durunya n nu fen, na wö yi minem bo bu bu má bu ni, ni dekem bo bu ti ngbeen ni, na i ma dekem bo bu la fanja n ka ngbeen. ²⁹ Deke bo i ti na Nyeme yoori i sö n la ka, adena má be koro fo yiri Nyeme dö. ³⁰ Ama, Nyeme ama am ni Yesu Kristo ayo kun, na wö ma wö yo ya dee alecirafö. Yesu dee ti ye Nyeme de ya ka ya yo sa bo i kö atin su i dö n a, ye wö yo ya i mine casim, na wö de ya tii aji. ³¹ Nyini dee ti, kabo ba kere i Nyeme jöre Kadasi n nu ni, "Söno kere bo i ña i fo, i ti ye ni ka i fo Mibie n ti."

2

Kabo Pöwlu kaanri Yesu Kristo ni i yiwee n jöre ni

¹ M ninbaam, sanja bo m baari am dö na m ba kaanri labari kpa n kereeri am, na am si Nyeme asiri nu n jöre ni, ma fa má adamande alecira ni si jöre ajojo akere má am. ² Dama m yo baari ni, ma koro má ka m kan jöre be am dö, má ka Yesu Kristo Tiidefo n dee jöre, ni kabo i wuuri baka jaanu n su ni. ³ Sanja bo m yo woori am dö ni, m ñunie ti m yörökiwa a, na sere ati m agaya, na m ñunie subobo m. ⁴ M ñonie jojóowa ni labari kpa n bo m kaanri i ni, i ti má adamande alecira ni si jöre, ama, Nyeme Awiewie Casi ni yoori alekutura sam kereeri ka m ñonie jojóowa n ti nahöre wö. ⁵ Adena má am yo yarada adamande alecira n dee ti, ama, Nyeme dee yiko n dee ti.

Nyeme alecira jöre

⁶ Tö, ama, ya jojo alecira jöre fa kere minem bo ba bi fa kö Nyeme atin n su n a. I ti má durunya n nu fen dee alecira, wara i ti má alecira bo durunya n nu nfanjaföm la i ni, bere kere bá ka ngbeen wö. ⁷ Ama, yere kan Nyeme alecira asiri nu jöre n bo i yo fa fieeri adamande ñu n wö, nyini alecira ni, Nyeme du mö ciciiri i wö ka, ye i nya ba yiiri durunya n a. I yoori sö o, adena ya nya i jirima woowa ni. ⁸ Durunya n nu nfanjaföm be mmöo asi má nyini alecira ni, nzen má bu siiri i, má bu kpama má ya

Mibiƛ Jirimafɔ n baka jaanu n su. ⁹ Ama, i ti kabo ba kere i Nyeme Jore Kadasi n nu n wɔ, ka,

“Deke bo be nyumbaa nya ɲu má i ni,
wara deke bo be sui nya ti má i ni,
wara deke bo be nya sunsun má i, i ahorembaa su ni,
nyini ye Nyeme aseƛe i su,
na i fá ma bo bu koro i n a.”

¹⁰ Ama, yere yiri, Nyeme ama i Awiewie Casi n ayi nyini n sɔ akere ya, dama Awiewie Casi ni fiiti si deke n kere a, haari ni Nyeme jore bo i wo ɲgo ni. ¹¹ Adamande be koro si má sa bo i wo i benju adamande ahore su, má ka i mi ni i tii awiewie ni si deke bo i wo i ahore su a. Sɔ ye be koro si má sa bo i wo Nyeme ahore su a, má ka Nyeme Awiewie ni ɲgumi si a.

¹² Awiewie n bo yere anya i ni, i ti má durunya n nu fen deƛe, ama, i fite Nyeme dɔ ɔ, adena ya si acerim kere bo Nyeme afa ama ya ni. ¹³ Nyini ye ya fa kere minem a. I fite má adamande alecira kereewa n nu, ama, i ti deke bo Awiewie Casi ni kereeri ya a, ye ya fa kere minem bo bu la Awiewie Casi n a. ¹⁴ Sɔnɔ bo i la má Nyeme Awiewie ni, koro de má deke n bo i fite Nyeme Awiewie n dɔ, dama yiri dɔ, nyini jorem ti ka sinnzinya jore wɔ, na i koro ti má i bu, dama be koro si má i bu, má ka Nyeme Awiewie ni buka i na i koro fiiti si i bu. ¹⁵ Sɔnɔ bo i la Nyeme Awiewie ni, i mi koro fiiti deke n kere a, ama, be koro fiiti má i mi yiri. ¹⁶ I ti kabo ba kere i Nyeme Jore Kadasi n nu barasu n wɔ ka,

“Nma asi sa bo i wo Micera n sunsunni nu,
na i kére i kabo i yo a?”

Ama, yere yiri, ya si deke bo i wo Kristo sunsunni nu.

3

Nyeme amuisufɔm jore

¹ M ninbaam, ma koro ajojo má am dɔ ka am ti minem bo bu si Awiewie Casi n jore, ama, m jɔjɔri am dɔ ka am ti bo bu bita adamande woowa a, Kristo deƛe atin n su, am ti ka nbaatumam wɔ. ² Nbaatumam koro nu nyufini ɲgumi wɔ, bu koro di má diire nonɔori, nyini deƛe ti ye m kereeri am bumboori su deƛe kereewam n a, dama am koro ti má kereewam bo bu ti kekereke n bu. Haari ni kisa, am nya koro ti má i bu. ³ Dama am toko bita adamande woowa n wɔ. Am si am benju kore wɔ, na am suse akuruwa am ɲɲu nu. Kabo am yo sɔ ni, durunya n nu adamande woowa atin leƛe, ye am bita i n a. ⁴ Dama nzen am nbem ɲa, “Mini su Pɔɔlu su a,” ye nbem gusu ɲa, “Mini su Apolosi su a,” am ti má ka durunya n nufɔm wo leƛe, nzen se?

⁵ Apolosi la ɲma? Wara Pɔɔlu la ɲma? Ya kere ti Nyeme amuisufɔm bo ya ba abuka am wɔ, ya kere ni ya juma bo wɔ fa ama ya na ya yo, ye am ayo yarada a. ⁶ Fa kɔ am yaradayo n su, i ti ka mini Pɔɔlu dɔori alembaa n a, ye Apolosi gɔori i nzue a, ama, Nyeme yiko n nu ma wɔ nyi awura mbaa. ⁷ Nyini ti, bo i dɔ mbaa n ni bo i gɔ nzue n be mmɔɔ ti má pui. Deke bo i ti jore n la sa bo Nyeme yo i n wɔ, dama yiri ma i nyi wura mbaa a. ⁸ Bo i dɔ mbaa n ni bo i gɔ nzue n kere yo juma kun wɔ. Bu kere nyá bu ɲkatɔ kabo bu jumayoowa ti barasu n wɔ. ⁹ Dama ya kere sanga yo juma kun ma Nyeme wɔ, ye ambere gusu ti ka Nyeme fie ye ya dɔ i a, na am kaaki ti ka Nyeme awuru ye ya ta i a.

¹⁰ Aceeri n bo Nyeme afa ama m ti ka sönö bo i si ataari ta nyunyumi wö, ye m se söö n bumboori fa n a. Ye be gusu dee la ka i ta taka nyini n su a. Ama, wö yo daka ka sönö kere si i nju sa kabo i ta taka su barasu. ¹¹ Dama Yesu Kristo ngumi ti ka söö fa bumboori n bo bu fa se söö n bu n a, be koro se má söö fa be bekun sin yiri nju. ¹² Ama, sönö kere bo i ta taka su, na i ti ka i faari sika, na be gusu faari jete, na be gusu faari afere bo i la anyunuyi ta takaari su, na be faari baka, na be faari wura, na be faari kara ta takaari su. ¹³ Ama, jina ceen, sönö kere jumayoowa bá fite fofoe nu, na bu nju i kabo i ti, dama sin bá yara sönö kere juma, na sin ni yó i na i nie kabo i ti. ¹⁴ Sönö kere bo i ta takaari bumboori fa seewa n su, na nzen sin n yaraari i jumayoowa na wö di má i, i mi nyá nkato. ¹⁵ Ama, sönö kere bo sin n diiri i jumayoowa ni, i nyá má nkato, ama, yiri ni i tii nyá tiide, se i ti ka sin n afundi i mi wö.

¹⁶ Am si má ka am ti ka awuru bo Nyeme wo am nu wö, nzen se? Am si má ka Nyeme Awiewie Casi n wo am nu wö? ¹⁷ Sönö kere bo i saakiiri Nyeme awuru ni, Nyeme saaki i mi, dama Nyeme awuru n ti casi wö, ye ambere ni am tii ti ka nyini awuru n a.

¹⁸ Má be se ka i dadaka i nju. Nzen be wo am nu, na i sunsun ka i la durunya n nu alecira, ma i mi yo i nju ka i ti sinnzin wö, adena i kaaki alecirafo nahöre su Nyeme dö. ¹⁹ Dama deke bo durunya n nuföm bu i ka i ti alecira ni, Nyeme dö i ti sinnzinya a. Nyini ti ye ba kere i Nyeme Jöre Kadasi n nu ka,

“Alecirafo ye Nyeme fa bu ngonletie fa tara bu n a.”

²⁰ Ye ba kaaki akere i ka,

“Mícera ni si deke kere bo i wo alecirafo sunsunni nu a,
i si ka i ti ngbeen wö.”

²¹ Nyini ti, má be se ka i fa adamande be fa fö, dama deke n kere ti am dee wö. ²² Mini Pöolu ti am dee wö, ni Apolosi, ni Petoro gusu, ni durunya, ni ngöw, ni yiwee, ni kisa dee sangä n bo ya wo nu ni, ni sangä bo i bá ba ni, deke n kere ti am dee wö, ²³ na ambere gusu ti Kristo deem, ye Kristo gusu ti Nyeme dee.

4

Kristo jaramasam juma n jöre

¹ Tö, nyini ti, wö yo daka ka am nie ya ka ya ti Kristo amusuisuföm wö, ya ti minem bo Nyeme afa i asiri nu jöre n awura ya saa nu wö. ² Jöre n bo i kaaki wo bere la ka, wö yo daka ka amusuisufö yo i juma ni nahöre su ma i mibie. ³ Mini yiri, nzen am di m jöre, wara adamande jorediföm di m jöre, m cece wo má nu, haari mini mmöw ni m tii di má m nju jöre.

⁴ M sunsunni ni m ahore su, ma yo má satie be, ama, nyini kere má ka m la má ngasi be wö lee, má ka Mibie ni ngumi ti bo i di m jöre a. ⁵ Nyini dee ti, má sönö be di i benju jöre, dama sangä nya ju má bo Mibie ni bá. I ba baari, yiri yí deke kere bo i wo awosin nu na i fie n fite fofoe nu a, na i yí deke kere bo i wo adamande ahore su fite fofoe nu. Nyini sangä ni, ye söö kere nyá i kansi Nyeme dö.

⁶ Tö, m ninbaam, ambere dee ti ye m kaanri ahin n kere fa kö m ni Apolosi jöre n a, na am nie ya woowa, na am su kabo ba kere i ase ni ngumi su, adena má am be yo kpirikoro ka möfo be tara i lamoko nyinga ni. ⁷ Nma ase am ka am tara am benju a? Nzu deke ye am la i, ye Nyeme

afa ace má am a? Deke bo am deeri i ni, ye nzu ti ye am koro kpiri ka Nyeme afa ace má am a?

⁸ Am sunsun ka am anya deke n kere bo am koro i n lee fan. Am ayo nengefom lee fan. Am akaaki nfemem ayaki ya lee fan. Nzen má am adi femeya nahore su, má i yo m fie, adena ya ni ambere kere sanja di femeya ni. ⁹ Mini do, yere n bo ya ti Kristo jaramasam ni, i ti ka Nyeme ma ya ka sin wo. Ya ti ka minem bo ba di ya jore abo ya asi ye ya wu a, na ya di nyini nyinse n na sono kere nyumbaa ju i, merékem ni adamandem kere. ¹⁰ Yere ti sinnzinm wo, Kristo dee ti, ama, ambere ti anyunutekefom wo, Kristo atin n su. Yere ti daburukafom wo, ye ambere ti nfangafom. Bu bu ambere wo, ama, yere yiri, bu bu má ya. ¹¹ Haari fa ba ju ni kisa, ahoe ni nzuehoe sukun ya a, ya la má sutura wurawa kpa, bu bita ya bo wo, ya kaaki la má deke bo ya da. ¹² Ya yo ya saa nu juma ni anyumboro wo, ye ya di a. Nzen minem kpie ya nzuko, ya sere awieeri kpa ma bu wo. Nzen bu kere ya wuwuruwa, ya mindi de i wo. ¹³ Nzen bu saaki ya duma, yere jajo kpa ma bu wo. Ya ti ka wura tie bo durunya n nufom fa go bonfo su n wo, haari ni kisa.

¹⁴ I ti má ka m koro ka m wura am nyinse dee ti, ye m sukere ahin jorem ma am a, ama, am ti m nbaa koroowam dee ti, ye m subobo am a. ¹⁵ Dama nzen haari má am la kerefom akpii buru mmoo fa ko Kristo dee atin n su, má am la má sim beberebe, mini ti am si a, Yesu Kristo dee atin n su, labari kpa n bo m kan kereeri am dee ti. ¹⁶ Nyini ti, m sere am wo, am son m su, na am ma am woowa ti kabo m woowa ti barasu ni. ¹⁷ Nyini dee ti ye m susunma Timoti am do n a. Yiri ti m wa koroowa nahore su a, na i kaaki la dabunu Mibie n atin n su. I ténge am su kabo m woowa ti Kristo atin n su, ni kabo m kere minem ka bu wo barasu, deke kere bo m ko ni, Kristo jamam n kere nu. ¹⁸ Am nbem sunsun ka m ba má am do kun, nyini ti, ba fa kpirikoro. ¹⁹ Ama, nzen Nyeme soro su, i cé má, m bá nie am busu, na m bá si nyini minem bo bu la kpirikoro ni, má ka bu noanie jajoowa ni ngumi, ama, m nie kabo bu yiko ti barasu. ²⁰ Dama kabo Nyeme nie i minem su ni, i ti má noanie jajoowa n wo, ama, i ti yiko wo. ²¹ Ahin jore nnyom nu, am koro bono o? Am koro ka m bá cin am sui, nzen se? Wara am koro ka m bá am do benle, ni koro wo?

5

Dangba sa n bo i wo Kristo jama n nu n jore

¹ Ma ti jore be, ka dangba sa wo am nu, yiri la ka sono be bita i si yi da a. Haari bo bu su má Nyeme ni mmoo yo má nyini dangba sa ni. ² Am ayo nyini sa n ye am toko koro kpiri n a fan? Ye am ahore saaki má n a? Wo yo daka ka am yi nyini sono n fite am nu. ³⁻⁴ Haari ni bo mini wo má am do ni, m awiewie wo am do, na sono bo i yoori nyini sa ni, ma du mo adi i jore ajaraki i ya Mibie Yesu dee duma n nu, kabo má mini ni m tii wo am do na m yo ni. Nzen am ba tierenri am noo, na m awiewie wo am do, na ya Mibie Yesu yiko n wo ya do, ⁵ am fa nyini sono n fa wura Sitana saa nu, na i kere i kekereke fa ko i adamande anuniembaa koroowa n su, adena i awiewie n nya tiide een n bo Mibie ni bá di minem jore ni.

⁶ Am yanfoya bo am nati fo i ni, i ti má kpa. Am si má ka ayiri kaan so ma kpono n yasu a, nzen se? ⁷ Am sunsun fa ko Butara eenkpiri n su, bo bu di kpono na bu go má ayiri nu ni, kana bu ba di eenkpiri n ni, bu du mo fa ayiri dawa n tu wo. Am yi nyini ayiri dawa n fa tu, na am yo ka

kpono fofore bo ba fa má ayiri ago má nu. Deke bo m suse n la ka, nzen satie kaan woori am nu, i saaki am kere wo. Nyini dee ti, am yi satie kere bo i wo am nu ni. Nahore, am ti mine casim wo, am ti ka kpono fofore n wo, dama ba fa Kristo ayo yoowa ama ya. Yiri ti ka ya Butara eenkpiri bombaa n bo ba kpie i kom n a. ⁸ Nyini ti, am ma ya bita Butara eenkpiri nyunyumi, na ya yaki satie bo i ti ka ayiri dawa ni, ama, am ma ya di i ka ya ti minem bo ya ti casi na ya la nahore wo, bo i ti ka kpono bo ba go má ayiri nu ni.

⁹ Kadasi n bo m yo du mo kere maari am ni, m seeri am ka, má am ni minem bo bu yo dangba sam sanja wo. ¹⁰ To, m sukan má durunya n nufom ni jore a, bere bo bu nati yo dangba sam ni, ni bo bu nyunu aboro nenje kpini su ni, ni bo bu fin bu bengum ni, ni bo bu su amoem ni. Nzen má i ti so yiri, nka má am fite yaki durunya n wo. ¹¹ To, bo m sukan n la ka, má am sanja ni minem bo bu yo bu nju ka bu ti am lamoko Kristofom na bu yo dangba sam, wara bu nyunu boro nenje kpini su, wara bo bu su amoem ni, wara bo bu nati kan minem jore, wara bo bu nati nu nzan bo ni, wara bo bu nati fin mine ni. Má am se ka am ni nyini sono n be so mmoo sanja di diire. ¹²⁻¹³ Má m juma la ka m di bo bu wo má Kristo jama n nu jore. Nyeme di bu jore a. Bo bu wo Kristo jama n nu ni, ambere ti bo am di bu jore a. Nyini dee ti, kabo ba kere i Nyeme Jore Kadasi n nu ni, ka, "Am fon yi sono tie n bo i wo am nu ni."

6

Kabo bu fa bu bengu Kristofom ko jore diibiri ni

¹ Nzen am be ni i bengu Kristofo be nyaari jore be, i ti ye ni ka i mi fa jore n ko Nyeme minem n do, má i se ka i fa ko durunya n nu joredifom bo bu si má Nyeme n do fieo. ² Am si má ka Nyeme minem bá di durunya n kere jore a, nzen se? Ye nzen am bá di durunya n kere jore, nzu ti ye am koro yo má am njuu nu jore mumukum dongu a? ³ Am si má ka ya bá di haari ni merkem jore? Ye nzu ti ye am koro di má jorem fa ko dekem bo bu wo durunya n nu n su a? ⁴ Ambere, nzen am la nyini jore n be so, ye nzu ti ye am fa ko minem bo Kristo jama n bu má bu n do a? ⁵ Deke bo m sukan i ni, i ti am nyinse wo. Alecirafu haari kun n kpein mmoo wo má am nu bo i koro di am njuu nu jorem, nzen se? ⁶ Ama, ambere, am fa am bengum ko jore diibiri wo, na am ko jina minem bo bu ti má yaradayofom nyunu, na bu di am jore.

⁷ Nahore, am akpaasi, kabo am nati fa am bengu ko jore diibiri ni. Nzen u niwa doori u ngasi be, i ti ye ni ka a mindi de i. Nzen u niwa be sisiiri u, yaki ce i, i ti ye ni bo a fa i ko jore diibiri. ⁸ Ama, ambere ni am tii wura am bengu ngasi nu wo, na am susisi am bengum, haari ni am bengu Kristofom kere.

⁹ Am si má ka sono kere bo i yo satie koro wura má Nyeme femeya n nu, nzen se? Má am dadaka am nju, minem bo bu yo dangba sa koro wura má Nyeme femeya n nu, wara bo bu su amoem, wara bo bu saaki ajaa ciire, wara nbiesom bo bu fa bu nju kaaki ka nbaram na bu ni bu bengu nbiesom sanja da ka bara ni bieso dee su ni, ¹⁰ wara awiefom, wara bo bu nyunu aboro nenje kpini su, wara bo bu nu nzan na bu bo, wara bo bu nati kan minem jore, wara bo bu nati fin minem ni, bere be mmoo koro wura má Nyeme femeya n nu. ¹¹ Am nbem yo ti so o. Ama, Nyeme anmisi ayi am

satiem ni, na wö fa am ayo i dæe mine casim, na wö de am ka am yo sa bo i kō atin su i dō, ya Mibie Yesu Kristo duma n dæe ti, ni ya Si Nyeme Awiewie n dæe ti.

Am fa am ηuniembaa yo deke bo i ma Nyeme jirima

¹² Am nbem se ka, “M la atin bo m koro yo deke kere bo m koro ka m yo i,” ama, má deke kere la kperε a. Mini mmōō koro se ka m la atin bo m koro yo deke kere bo m koro ka m yo i, ama, m yaki má na deke be kunma m. ¹³ Nbem gusu ηa, “Diire ti akunnu dæe wö, na akunnu gusu ti diire dæe.” I ti nahore wö, ama, Nyeme bá ma akunnu n ni diire n kere ka ηgbεen a. Ama, ηuniembaa n yiri, i ti má sakaraya dæe, ama, i ti Mibie n dæe wö, na Mibie n gusu ti ηuniembaa n dæe. ¹⁴ Nyeme dæe yiko n nu ye i tengeeri Mibie ni i yiwee nu a. I yiko n nu ye i bá tenge ya gusu a. ¹⁵ Am si má ka am ηuniembaa n ti Kristo ηuniembaa n bue be wö, nzen se? Ye m koro fa Kristo ηuniembaa n bue be yo sakaraya, nzen se? Ai, atin wo má nu. ¹⁶ Am si má ka sōnō kere bo i faari i ηu mataari bara sakara na bu sanga woori, bere nnyo n ayo deke kun wö lεe, nzen se? Dama ba kere i Nyeme jore Kadasi n nu fa kō biesō ni i yi jore su, ka, “Bu mine nnyo n ayo deke kun lεe.” ¹⁷ Sōnō kere bo i faari i ηu mataari Mibie n na bu sanga woori ni, i ni yiri dæe awiewie n ayo kun lεe. ¹⁸ Am ηmati fite sakaraya nu. Má satie kere bo sōnō yo i ye i saaki i ηuniembaa n a. Ama, bo i yo sakaraya ni, i mi saaki i ηuniembaa n wö. ¹⁹ Am si má ka am ηuniembaa n ti ka awuru bo Awiewie Casi n wo nu n wö, nzen se? Yiri ye Nyeme fa maari am n a, má am dæe la am ηu. ²⁰ Nyeme ato am atō kaari wö, nyini ti, am fa am ηuniembaa n fa yo deke bo i ma Nyeme jirima.

7

Kabo i ti ye ni ka biesō ni bara wo barasu ni

¹ Tō, jore n bo am kere maari m ni, am ηa, “I ti ye ni ka má biesō si bara.” ² I ti nahore wö, ama, mini dō, sakaraya dæe ti, i ti ye ni ka biesō kere la i tienngu yi, na bara kere la i tienngu hun. ³ I ti má ye ni ka biesō kete na má i ni i yi sanga, i kaaki ti má ye ni ka bara kete na má i ni i hun sanga. ⁴ Má bara n dæe la i ηuniembaa ni, i ti i hun n dæe wö, sō ye i kaaki ti a, má biesō n gusu dæe la i ηuniembaa ni, i ti i yi n dæe wö. ⁵ Má am kete am benngu daari, má ka am ayo anōōkun ka am fa nyini sanga kaan sere Nyeme, nyini sin, na am kaaki sanga bekun, adena má Sitana yo am nie na i nya am, dama am koro tara má am ηu dæe ti. ⁶ I ti má ka m suma am nōō ka am yaki i wö, ama, m suma am atin ka am koro yo sō. ⁷ Mini dō, nzen má sōnō kere wo kabo m wo ni, i yo m fie, ama, sōnō kere ni i aceeri bo Nyeme afa ama i, be dæe wo i ηgumi, na be gusu dæe wo i ηgumi, i kere ti má kun.

⁸ Kisa m sujōjō amberε nbiesōm ni nbaram bo am nya ja má ni dō a, ni nkunafōm, nzen má am wo kabo m wo ni, na am ja má, i ti kpa. ⁹ Ama, nzen am koro tara má am ηu, am ja. Nzen am yo sō, i ti ye ni bo sanga kere am la konviki agaya fa kō bara ni biesō dika, na am koro tara má am ηu ni.

¹⁰ Ahin ti nbiesōm ni nbaram ajaafōm dæe jore ye m sukan i n a, má mini suse a, ama, i ti Nyeme nōanie maawa a, ka má bara yaki i hun ajaa.

¹¹ Ama, nzen i kƆ yoori ka be afite i hun dika, má i ja kun, i tana sƆ, wara i kaaki kƆ i hun n dika. Má biesƆ n gusu se ka i yaki i yi ajaa.

¹² Minem bo ba ka ni, m dɛɛ fɔ ye m sufa tu am n a, má Nyemɛ seeri sƆ a. Nzen Kristofɔ be yi ti má yaradayofɔ, na wɔ soro su ka i tana i hun n ajaa bu, má i yaki i ajaa, i bita i. ¹³ Nzen bara be ti Kristofɔ, na i hun ti má yaradayofɔ, na biesƆ n asoro su ka i ni i yi n sangɔ tana, má bara n yaki i ajaa, i tana. ¹⁴ Dama biesƆ n bo i yo má yarada ni, Nyemɛ ade i ayo i dɛɛ sɔnɔ, i yi n bo i ti Kristofɔ n dɛɛ ti, na bara n gusu bo i yo má yarada ni, Nyemɛ ade i ayo i dɛɛ sɔnɔ, i hun n bo i ti Kristofɔ n dɛɛ ti. Nzen má nyini, Nyemɛ dé má bu nbaam, ama, kabo i ti ni, Nyemɛ ade bu. ¹⁵ Ama, nzen bo i ti má yaradayofɔ n kete ka i ja má, yaki i na i kƆ, nyini sangɔ, Kristofɔ n la má ngasi be. Nyemɛ afere ya ka ya wo ni tanalaifɛ wɔ. ¹⁶ Wɔrɔ bara ni, beni, wɔrɔ dɛɛ ti, u hun ni nyá tiide, na wɔrɔ biesƆ n gusu, beni, wɔrɔ dɛɛ ti, u yi ni nyá tiide.

Kabo ya yo ti na Nyemɛ fereeri ya ni, ya ti sƆ

¹⁷ Tɔ, am ma sɔnɔ kɛrɛ wo kabo Mibiɛ n kereeri i sangɔ bo Nyemɛ fereeri i ni. Deke kɛrɛ bo m kƆ Kristo jamam n nu, kabo m kɛrɛ bu ka bu yo lɛɛ. ¹⁸ Nzen be wo bɛrɛ, na wɔ du mɔ awura kenkenne ka, ye Nyemɛ ba fereeri i, i ti ye ni ka i mi yaki i kenkenne yoowa n sƆ. Nzen be gusu wo bɛrɛ, na wɔ wura má kenkenne, ye Nyemɛ afere i, i ti ye ni ka i mi wo sƆ, má i se ka i wura kenkenne. ¹⁹ Bo wɔ wura kenkenne n ni bo wɔ wura má kenkenne ni, i be mmɔɔ ti má pui, ama, deke bo i ti jɔrɛ nahɔrɛ su n la ka, sɔnɔ bita Nyemɛ nɔaniɛ maawam ni. ²⁰ I ti ye ni ka sɔnɔ kɛrɛ wo kabo i yo ti barasu na Nyemɛ nya ba fereeri i ni. ²¹ Nzen a ti akɔɔ, ye Nyemɛ afere u, má a ma i yo u yaa, ama, nzen a si ka a koro nya atin na a de u tii, a koro yo sƆ. ²² Dama sɔnɔ kɛrɛ bo i ti akɔɔ na Mibiɛ n afere i, i ti Mibiɛ n dɛɛ sɔnɔ bo wɔ de i tii aji wɔ, sɔnɔ kɛrɛ gusu bo i ti má akɔɔ na Mibiɛ n afere i, sɔ ye wɔ kaaki Kristo akɔɔ a. ²³ Nyemɛ ato am ato kaari wɔ, nyini dɛɛ ti, má am yo adamandem akɔɔm. ²⁴ Nyini ti, m ninbaam, kabo sɔnɔ kɛrɛ ti na Nyemɛ afere i ni, i ti ye ni ka i mi wo sƆ ni Nyemɛ.

Nbaram ni nbiesɔm bo bu ja má n jɔrɛ

²⁵ Fa kƆ minem bo ba nya aja má ajaa n dɔ ni, m la má kereewa bo i fite Mibiɛ n dɔ fa kƆ nyini n dika, ama, Mibiɛ n asi m anjunfɔ na m la dabunju n dɛɛ ti, ye m koro ka m se am deke bo i wo m sunsunni nu n a. ²⁶ Mie n bo ya wo nu kisa n dɛɛ ti, mini dɔ, nzen má sɔnɔ kɛrɛ koro wo i wo, má i ti kpa. ²⁷ Nzen a du mɔ aja bara, má a kpini atin na a yaki ajaa ni. Nzen a nya ja má gusu, má a kpini atin na a ja. ²⁸ Nzen a ti biesƆ ye a ja bara, a yo má satie, nzen a ti sunguru gusu ye a ja biesƆ, a yo má satie. Ama, wahara n bo ajaajafɔm di i durunya n nu n ye m koro má ka am di i be a. ²⁹ M ninbaam, deke bo m suse n la ka, sangɔ n waari má kun. Nyini ti, fa kisa fa kƆ, bo bu la nbaram ni, i ti ye ni ka bu wo ka bu la má be. ³⁰ Na bo bu sun ni, ma bu wo ka bu sun má, na bo bu ahore ajo ni, ma bu wo ka bu ahore ajo má, na bo bu to nengem ni, ma bu wo ka má bu dɛɛ la nenge ni. ³¹ Na bo bu fa durunya n nu nengem fa yo bu jumam ni, ma bu wo ka bu cɛɛ wo má bu nu, dama ahin durunya n ni deke kɛrɛ bo i wo nu n ti siinwa a.

³² M koro má ka deke be miɛ am, am sunsunni nu. Sɔnɔ bo i la má bara ni, i sunsunni kɛrɛ wo Mibiɛ n dɛɛ juma ni su a, i dɛɛ la ka, i yo sa bo i sun

Nyeme nu wo. ³³ Ama, sɔnɔ bo wo ja bara, i sunsunni kere wo durunya n nu dee dekem ni su a, i dee la ka, i yo sa bo i sun i yi nu wo, ³⁴ nyini ti, i sunsunni ti nnyo nnyo ɔ lee. Na bara bo i ja má, wara sunguru bo i si má biesɔ, i sunsunni kere wo Mibie n juma ni su a, adena i wo casi nuniembaa ni i awiewie nu. Ama, bara bo i la hun, i sunsunni kere wo durunya n nu dee dekem ni su a, i dee la ka, i yo sa bo i sun i hun nu wo. ³⁵ M koro ka m buka am wo, nyini ti ye m se sɔ n a, i ti má ka m koro ka m kanda am atin wo. Ama, m koro ka am yo sa kere bo i kɔ atin su wo, na am fa am nju ma Mibie n nahore su, na am su i nyunyumi.

³⁶ Ama, nzen sunguru be wo bere na wo nya si má biesɔ, na ba ce i, na i ni biesɔ n kere ayo bu sunsunni nu ka bu ja má, ama, kasin na biesɔ n ba nju ka i koro tara má i nju, na bara n aju ajaa, i koro ja i, i ti má satie.

³⁷ Ama, nzen wo jina su kekereke i sunsunni nu, na i ti má deke bo bu mie i, na i koro tara i nju fa kɔ i kunnu koroowa su, na wo yo i sunsunni nu ka i ja má sunguru ni, ama, bu wo ka bu ti danfoya a, bo bu si má bu beɱgu ka bara ni biesɔ, nyini ti kpa a. ³⁸ Nyini ti, sɔnɔ kere bo i jaari i sunguru ceewa ni, nyini ti kpa, ama, bo i ja má i fieo ni, i mi yo sakpa tara bo i ja i ni.

³⁹ Nzen bara ni i hun wo bere, na biesɔ n nya wu má, bara n la má atin bo i fite i ajaa n bu, ama, nzen i hun wuuri, i la atin bo i kɔ ja sɔnɔ kere bo i koro, ama, wo yo daka ka i mi ti Mibie n dee sɔnɔ. ⁴⁰ M dee sunsunni nu, nzen má i wo sɔ na i ja má, má i la terefie agaya tara bo i ja. M nie ka mini mmɔɔ ni m tii la Nyeme Awiewie ni.

8

Amɛ diire diiwam n jore

¹ Tɔ, fa kɔ dekem bo bu kpie bu kɔm yo tie fa ma amɛem dee jore, ya si ka ya kere la si. Ama, si ka nyini n sɔ ma mine wura bu nju kpiri wo, ama, koro yiri, i buka sɔnɔ ɔ, na i woowa ti kpa. ² Sɔnɔ kere bo i yo i nju ka i si deke be, i mi nya la má si nahore su kabo má i sunsun ka i si i ni. ³ Sɔnɔ kere bo i koro Nyeme ni, Nyeme si yiri wo.

⁴ Nyini ti, fa kɔ kabo minem di amɛ tie diirem ni, ya si ka amɛ ti má pui durunya n nu, na nyeme be wo má bere sin ya Nyeme ni ngumi kpein nju. ⁵ Haari nzen dekem bo minem nja bu ti amɛem wo angoro ni asiɱgu fɛn, na nzen i ti nahore ka amɛem ni mibiem dɔngu wo bere mmɔɔ, ⁶ yere dɔ, Nyeme kun n kpein wo bere a, yiri la ya Si Nyeme, yiri yo yiiri deke n kere a, ya wo bere ma yiri wo. Ya kaaki la Mibie kun n kpein wo, yiri la Yesu Kristo, Nyeme ma yiri yiiri deke n kere a, i dee ti ye ya wo bere a.

⁷ Ama, má sɔnɔ kere la nyini si n a, nbem wo bere bo ba su amɛem ace, nyini ti, haari ni kisa nzen bu diiri nyini diire n be, bu sunsun ka bu toko di amɛ tie nie wo, na bu sunsunni suma bu nnyo nnyo ɔ, ka bu ti má casi.

⁸ Nyeme de má ya diire dee ti, nzen ya diiri i, i buka má ya pui, nzen ya di má i gusu, i kpie má ya su. ⁹ Ama, am si am nju sa, ambere bo am ade am tii ni, na má am yo sa be bo i ma am niwa n bo i jaa kpaasi, yiri n bo i yarada ti má biiwa ni. ¹⁰ Nzen sɔnɔ bo i sunsunni n ti nnyo nnyo n nju ka wɔɔ bo a la nyini si n sɔ wo amɛ awuru n nu sudi amɛ diire be, nyini ma i ahoresi ka i di be na i nie a, má sɔ? Eɛn, i mi dí ɔ. ¹¹ A yoori sɔ, u si n dee ti, a suma u niwa n ka ngbeɛn lee, yiri n bo i yarada ti má biiwa ni. Yiri gusu ti u niwa bo Kristo wuuri i dee ti wo. ¹² Nzen am yo sɔ, am suyo

am ninbaam satie wɔ ɛɛ, na am sufɔndɔ bu sunsunni bo i ti nnyɔ nnyɔ n ɛɛ, nyini n sɔ ni, am suyo Kristo gusu satie wɔ ɛɛ. ¹³ Nyini ti, nzen diire bo m di i, na i ma m niwa Kristofɔ bo i jaa kpaasi, m di má nie bekun fieo, adena má m niwa n bo i jaa kpaasi.

9

Atin bo Kristo jaramasam la i fa kɔ bu juma n su ni

¹ M ti má sɔnɔ bo ma de m tii wɔ, nzen sɛ? M ti má Kristo jaramasa a, nzen sɛ? Ma ŋu má ya Mibiɛ Yesu wɔ, nzen sɛ? Kabo am ayo yarada ni, má ambere ti m jumayoowa, Mibiɛ n dɛɛ ti a, nzen sɛ? ² Haari nzen nyingam de má m ka m ti jaramasa, ambere si ka m ti i jaramasa a, dama kabo am ni Mibiɛ n ayo kun ni, nyini kere am ka m ti i jaramasa a.

³ Nzen mine se m jɔre, ka m ti má Kristo jaramasa, má m bisa bu ka, ⁴ mini ni Banabasi, ya la má atin ka ya de deke bo ya di i, ni deke bo ya nu i, Kristo jama n dɔ ɔ, nzen sɛ? ⁵ Ya la má atin ka nzen ya sukɔ atin, ya koro fa ya yim bo bu ti yaradayofɔm bita nu, kabo ya bengu Kristo jaramasa nbem yo ni, ni kabo ya Mibiɛ niemam, ni Kefasi bo bu kaaki fere i ka Petoro gusu yo ni, nzen sɛ? ⁶ Wara m ni Banabasi ŋgumi ye i ti ye ni ka ya yo ya saa nu juma ka, na ya nya di a? ⁷ Nma wo bere bo i yo soja juma na i tɔ i tii su kaari a? Ai, bu tɔ bu wɔ. Nma wo bere bo i ta bakam, na i di má suuwam be a? Ai, bu di wɔ. Wara nma wo bere bo i sasa nengendɔrem na i nu má nɔnɔ a? Ai, bu nu wɔ. ⁸ M sufa má adamande dɛɛ sunsunni nu ye m sufa se sɔ n a, ama, kabo nɔanie kpamaawa n kere ɛɛ. ⁹ Ba kere i Nyeme nɔanie kpamaawa n bo i fa maari Moyisi n nu ka, “Nzen a bita toora subobo ŋgani, má a cici i nɔɔ.” Tɔ, naanim ŋgumi ye Nyeme cɛɛ wo bu nu a, nzen sɛ? Ai, má bere ŋgumi. ¹⁰ Nahɔre, ya ti ka dɔdɔɔrifɔm wɔ, yere dɛɛ ti ye bu kereeri sɔ a, adena bo i dɔ ŋgani n ni bo i bobo i n kere la tama ka bu nyá be na bu kpáaki nu. ¹¹ Yere kaanri Nyeme nɔanie ni kereeri am a, kabo dɔdɔɔrifɔ dɔ aɛmbaa ni, na ambere ade i. Ye nzen i ti sɔ, yere la má atin bo ya koro nya deke be am dɔ, nzen sɛ? ¹² Nzen nyingam la atin ka bu de nengem am dɔ, yere la má atin bo ya de tara sɔ, nzen sɛ?

Ama, yere akere má ya yiko ka ya de nyini n be sɔ, dama ya koro má ka ya kanda minem, na má bu de Kristo labari kpa ni. ¹³ Am si má ka, minem bo bu yo juma Nyeme Sereebiri Awuru n nu ni di nyini nu wɔ, nzen sɛ? Na bo bu nati yo juma Mikun yoowa yoobiri n su ma minem gusu di nyini nu wɔ, nzen sɛ? ¹⁴ Sɔ ye Micera n ama nɔɔ a, ka bo bu kan labari kpa n jɔre n nya deke bo bu di i fite labari kpa n kan nu a.

¹⁵ Ama, haari ni bo má m la atin ka m yo sɔ ni, ma yo má nyini n be sɔ, na m sukerɛ má ahin kadasi n ka m de deke be am dɔ ɔ, dama nzen m wuuri, má i ti ye tara bo be se ka m fɔ yanfɔya ŋgbɛɛn ni. ¹⁶ Nzen m kan labari kpa n jɔre kere mine, m la má atin bo m fɔ, dama i ti m juma bo Nyeme ama m ka m yo i wɔ. Nzen m keteeri ka m yo má i, m nyá suicin. ¹⁷ Nyini ti, nzen m kan labari kpa n jɔre m koroyanu, m nya ŋkato, ama, i ti má m koroyanu, dama Nyeme afa nyini juma n ama m ka m yo i a. ¹⁸ M dɛɛ ŋkato la bɔnɔ? Yiri la ka m kan labari kpa n jɔre fa kere minem ŋgbɛɛn, m la atin bo m sere deke be bu dɔ, ama, m yo má i.

¹⁹ Haari ni bo ma de m tii na m ti má be dɛɛ akɔɔ ni, m fa m ŋu yo akɔɔ ma sɔnɔ kere wɔ, adena m koro nya mine dɔnggu na bu su Kristo

su. ²⁰ Nzen m kƆori YudaƆm dƆ, m yo kabo bu yo n wƆ, adena m koro nya bu nbem na bu su Kristo su. Nzen m kƆori minem bo Nyeme nƆanie kpamaawa n nie bu su n dƆ, haari ni bo nƆanie kpamaawa n nie má mini ni m tii su kun ni, m yo kabo bu yo n wƆ, adena m koro nya minem bo nƆanie kpamaawa n nie bu su ni nbem na bu su Kristo su. ²¹ Nzen m kaaki kƆori minem bo bu la má nƆanie kpamaawa n dƆ, m yo kabo bu yo n wƆ, i ti má ka m su má kabo Nyeme nƆanie kpamaawa n kere n su wƆ, ama, Kristo dƆe nƆanie ni nie m su a, adena m koro nya minem bo bu la má nƆanie kpamaawa n na bu nbem su Kristo su. ²² Nzen m kƆori minem bo bu yarada la má fanƆa n dƆ, m yo m ɲu ka mini mmƆƆ la má fanƆa wƆ, adena m koro nya bu nbem na bu su Kristo su. Deke kere bo m kƆ, m yo m ɲu kabo nyini minem yo barasu n wƆ, adena m koro ma bu nbem nya tiide. ²³ M yo nyini n kere sƆ ɔ, labari kpa n dƆe ti, adena m ni nyingam kere sanƆa di i kperƆe.

²⁴ Am si ka nzen minem awura akuruwa ka bu ɲmati, na bu nie bo i kunma i bengum, bu kere ɲmati wƆ, ama, bu nu sƆnƆ kun bo i kƆ kunmaari bu kere ni, yiri nya aceeri n a. Nyini ti, sƆnƆ kere mie i nyi, na i wo woowa kpa fa kƆ Kristo atin n su, kabo ɲmatiiƆ n bo i kunma i bengum n ti ni, adena i nya aceeri ni. ²⁵ Minem bo bu ɲmati ɲmatiiƆ ni, wara bo bu bo baalƆ ni, bu kere boro bu nyi wƆ ni anyumboro fa kƆ nyini kƆkƆrƆ n su. Bu yo sƆ ɔ na bu nya aceeri n bo i cƆ má ni, ama, yere yiri, ya nyá aceeri n bo i wie má na i wo bƆre sanƆa kere n wƆ. ²⁶ Nyini dƆe ti, mini, m ɲmati má ɲgbɛɛɲgbɛɛn ka sƆnƆ bo i si má bo i wo nu ni. M ti má sƆnƆ bo m bo acƆre na m bo fun. ²⁷ Ama, m kere m ɲunie n wahara a, na i yo kabo m koro ni, adena má m yo sƆnƆ bo m kan labari kpa n jƆre kere minem, na mini mmƆƆ fun aceeri ni.

10

Kabo PƆɔlu bƆbƆri bu ka má bu su amƆem ni

¹ M ninbaam, m koro ka m tenƆe am su ka sanƆa bo ya nam yo suuri Moyisi su fiteeri Ijipiti asien n su ni, yinyingum n yo kataari bu kere ɲu wƆ, na bu kere ayo awura kunma nzue bambaka n nu na ba kpie. ² Kabo i yoori sƆ ni, i yo ti ka ba bie bu Nyeme nzue, afa bu ama Moyisi wƆ lƆe. ³ Bu kere yo sanƆa diiri diire n bo i ti má durunya n nu fen dƆe diire n a, ⁴ na bu kere asanƆa anu deke nuuwa kun n bo i ti má durunya n nu fen dƆe ni, dama yabue n bo n zue n sƆngi fiteeri nu na bu nuuri i n na i suuri bu su ni, i fite má durunya n nu fen, nyini yabue n la Kristo TiideƆo ni. ⁵ Ama, haari ni nyini mmƆƆ, bu dƆngum sayoowa asun má Nyeme nu, nyini dƆe ti na ba wu aka ɲgbɛɛn boro kpantain n nu.

⁶ TƆ, ahin sam kere bo bu yo yoori ni, bu ti deke bo bu sufa kere ya a, ka má ya sufa konviki, na ya su satiem su, kabo bu yo yoori ni. ⁷ Na má am su amƆem kabo bu nbem yo yoori ni. Kabo ba kere i Nyeme jƆre Kadasi n nu ni, ka, “Minem n yo tanaari wƆ, na ba di, na ba nu, na ba nya ayasu agƆ agƆre.” ⁸ Má am ma ya yo sakaraya kabo bu nbem yo yoori, na cƆen kun nu na bu minem kƆ akpii aburanyƆ ni akpii nsan wuuri ni. ⁹ Má am ma ya yo Mibie n na ya nie, kabo bu nbem yo yoori i na bu nie, na woom kan kuunri bu ni. ¹⁰ Má am sunjuti kabo bu nbem yo ɲunutiiri na mereke saakifo n ba kuunri bu na bu kaari ɲgbɛɛn ni.

¹¹ Ahin sam kere bo bu yo yoori ni, bu ti deke bo bu sufa kere ya wƆ, nyini ma bu kereeri bu seeri n a, na bu fa bƆbƆ yere n bo ya wo ahin awieeri

su sanƆa n nu ni. ¹² Nyini ti, sƆnƆ kere bo i sunsun ka i jina nyunyumi, i ti ye ni ka i mi si i ŋu sa, na mǎ i kpaasi. ¹³ Gberɛgberɛ be wo mǎ bere bo wƆ tu am, na i be nya tu mǎ adamande. Nyeme la dabunu, i yǎki mǎ na gberɛgberɛ bo i kúnma am bá tu am, ama, haari nzen gberɛgberɛ be bá tuuri am, i kpíni atin ma am, na i mǎ am koro mindi de i.

¹⁴ Nyini dɛɛ ti, m ninbaa koroowam, am ŋmati fite amɔɛ su nu. ¹⁵ M sujoƆ am dƆ ka am ti minɛm bo bu nyunu ateke wƆ, amberɛ mmɔɔ ni am tii, am si deke n bo m sujoƆ i n bu. ¹⁶ Nzen ya sudi ya Mibiɛ n diire ni, na ya faari awa n ni nzan n na ya yo kisi ƆƆ su, na ya kere sanƆa nuuri i, i ti Kristo mbunja wƆ lɛɛ, ye ya nu i n a. KƆnƆ n gusu bo ya kpiekpie i nu na ya sanƆa di i ni, i ti Kristo ŋuniembaa n wƆ lɛɛ, ye ya di i n a. ¹⁷ KƆnƆ n bo ya kere sanƆa di i n ti mɔmɔ kun wƆ, nyini dɛɛ ti, yere bo ya ti mine beberebe ni, ya ti aŋuniembaa kun wƆ lɛɛ, dama ya kere sanƆa di kƆnƆ kun n wƆ. ¹⁸ Am niɛ kabo Yisarelifɔm yoori ni. Minɛm bo bu di dekem bo bu fa yo yoowa Mikun yoowa yobiri n su n ni, bu ni Nyeme la wo fiɛ bo i ma bu yo anɔɔkun, fa kɔ bu nyemesu atin n su. ¹⁹ M suse mǎ ka dekem bo bu yo tie n ma bu n wo mǎ bere wƆ, wara amɔɛm ni bu tii wo mǎ bere. Ai, mǎ sɔ. ²⁰ Ama, dekem bo amɔɛsufɔm yo tie ma bu ni, bu yo ma ajinim wƆ, bu yo ma mǎ Nyeme. M koro mǎ ka am di amɔɛ tie diirem, na am ni ajinim sanƆa. ²¹ Nahɔɛ, m koro ka am si ka am koro nu mǎ ya Mibiɛ ni nzan awa n nu, na am kaaki nu ajinim dɛɛ gusu buka su, nyini koro yo mǎ, na am kaaki koro di mǎ ya Mibiɛ n diire ni, na am kaaki di ajinim dɛɛ buka su, nyini koro yo mǎ, ²² wara ya koro ka Mibiɛ n si ya kɔɛ na i fa yaa ya ŋu wƆ. Ya la fanƆa tara i wƆ, nzen se? Ai, ya lá mǎ fanƆa.

Ya yo sa bo i sun Nyeme nu

²³ Am nbem se ka, “Ya la atin bo ya koro yo deke kere bo ya koro ka ya yo i ni.” I ti nahɔɛ wƆ, ama, mǎ deke kere la kperɛ a. Am ŋa, “Ya la atin bo ya koro yo deke kere bo ya koro ka ya yo i ni.” I ti nahɔɛ wƆ, ama, mǎ deke kere buka ya a. ²⁴ Mǎ am niɛ kabo am yo na ambere ŋgumi yo ye, ama, am niɛ kabo am yo na am bengum gusu yo ye. ²⁵ Niɛ kere bo nanƆosim tɔ i ni, am di i, mǎ am yo sika. ²⁶ Dama ba kere i Nyeme Jɔɛ Kadasi n nu ka, “Durunya n ni deke n kere bo i wo nu n ti Mícɛra n dɛɛ wƆ.” ²⁷ Nzen sƆnƆ bo i yo mǎ yarada baandiiri am ka am ba di diire, na am soro su, am di deke kere bo bu fa ma am ni, mǎ am kere nu, sika dɛɛ ti. ²⁸ Ama, nzen be se am ka, ahin niɛ n ti tie niɛ wƆ, nyini yiri, mǎ am di, yiri n bo wƆ se sɔ ni, i sunsunni suma i nnyɔ nnyɔ n dɛɛ ti, mǎ am di. ²⁹ I mi n dɛɛ sunsunni nnyɔ nnyɔ n dɛɛ ti, mǎ a di i, mǎ u dɛɛ ti a. M dɛɛ la m tii, ye nzu ti ye m ma be dɛɛ sunsunni nnyɔ nnyɔ n di m jɔɛ, na mǎ m yo kabo m koro a. ³⁰ Nzen m da Nyeme asi ƆƆ diire n su na m di i, be yo se koro jaraki m diire n dɛɛ ti a? Dama ma du mɔ ada Nyeme asi aƆ diire n su.

³¹ Nyini ti, nzen am diiri diire, wara am nuuri deke nuuwa, wara deke kere bo am yoori i, am yo i na i wura Nyeme kpiri. ³² Mǎ am yo sa bo i ma minɛm bo bu jaa na bu kpaasi, bo bu ti Yudafɔm ni, ni bo bu ti mǎ Yudafɔm, haari ni Kristo jama ni. ³³ Sɔ ye mini mmɔɔ ni m tii boro m nyi a, na m yo sa bo i sun sƆnƆ kere nu, m suniɛ mǎ kabo m yo na mini ŋgumi yo ye wƆ, ama, m yo deke bo i buka sƆnƆ kere wƆ, adena bu nya tiide.

11

¹ Am sɔn m su, na am ma am woowa ti kabo m woowa ti barasu n na m sɔn Kristo su ni.

Tii kata su jɔre fa kɔ nyemesere su

² Tɔ, m kansi am wɔ, dama sanja kere am nati tenje m su wɔ, na am bita kereewam bo m fa kereeri am n ni nahɔre su ni. ³ Ama, deke bo m koro ka am si i la ka, biesɔ kere tiifo la Kristo wɔ, na bara kere tiifo la i hun, na Kristo gusu tiifo la Nyeme. ⁴ Nyini ti, biesɔ kere bo i susere Nyeme, wara i sukan Nyeme noanie n kere minem, na i kata i tii su, i mi awura i tiifo n nyinse wɔ lɛɛ. ⁵ Na bara kere bo i susere Nyeme, wara i sukan Nyeme noanie n kere minem, na wɔ kata mǎ i tii su, nyini bara n suwura i tiifo nyinse wɔ lɛɛ. I ti ka wɔ yi i tii wɔ lɛɛ. ⁶ Nzen bara kete ka i kata mǎ i tii su, nyini yiri, i ti ye ni ka i kpiekpie i tii ni, ama, nzen i ti i nyinse ka i kpiekpie i tii, wara i yi i, nyini yiri, i ti ye ni ka i fa deke kata su. ⁷ Nyini ti, i ti mǎ ye ni ka biesɔ susere Nyeme na i fa deke be kata i tii su, dama i ferema ni Nyeme wɔ, i de Nyeme jirima woowa a, ama, bara n yiri, i de biesɔ n jirima woowa a. ⁸ Dama Nyeme afa mǎ bara ye i fa yoori biesɔ a, ama, i du mɔ yiiri biesɔ ɔ ka, na wɔ nya ayi bara afite i nɔnie nu. ⁹ Mǎ bara dɛɛ ti, ye Nyeme yoori biesɔ a, ama, biesɔ dɛɛ ti, ye i yoori bara a. ¹⁰ Nyini dɛɛ ti, wɔ yo daka ka bara cin acici, na i kere ka be la i yiko, merɛkem dɛɛ ti. ¹¹ Ama, haari ni nyini n kere ni, fa kɔ Mibie n dɛɛ atin n su, bara wo mǎ i ngumi, na biesɔ gusu wo i ngumi. ¹² Dama kabo Nyeme yo yiiri bara fiteeri biesɔ nɔnie nu ni, sɔ ye bara gusu wu biesɔ a, ama, deke n kere fite Nyeme dɔ ɔ. ¹³ Ambere mmɔɔ ni am tii, am sunsun na am nie, i ti kpa ka bara sere Nyeme na mǎ i cin acici? ¹⁴ Am nie kabo adamande woowa ti a, i kere ka nzen biesɔ yaki i tiɔnmie na i yo tintiin jɔnjɔndi, minem bu mǎ i. ¹⁵ Ama, nzen bara la tiɔnmie tintiin ye i la jirima a, dama Nyeme ama i tiɔnmie n ka i fa kata i tii su wɔ. ¹⁶ Nzen be wo am nu na i yo i nɔ ka i se akuruwa fa kɔ kabo m suse ni, m koro ka m se am ka, yere, ya su mǎ nyini yoowa n su, haari ni deke kere bo Kristo jamam tien bu nɔɔ ni, be yo mǎ sɔ.

Ya Mibie n diire n jɔre

¹⁷ Tɔ, ahin kereewam bo m koro ka m fa kere am ni, m koro kansi mǎ am, dama sanja bo am ba tien am nɔɔ, sam bo am yo bu ni, bu buka mǎ am, bu ma am kɔ am sin wɔ. ¹⁸ Ciciri su, ma ti ka sanja bo am ba tien am nɔɔ na am su Nyeme ni, am la kpakpaakinu wɔ. Ma yo yarada ka, beni, i ti nahɔre wɔ. ¹⁹ Nahɔre, wɔ yo daka ka am la kpakpaakinu am nu, adena am si bo bu ti yaradayɔfɔm nahɔre su ni. ²⁰ Am ba tien am nɔɔ ni, mǎ ya Mibie n diire n ye am tien am nɔɔ di i n a. ²¹ Dama sanja bo am ba sudi ni, sɔnɔ kere di i tienɔgu diire wɔ, be nminda mǎ i bengɔ, na ahɔɛ suti nbem, na nbem nu nzan subo. ²² Am la mǎ am tienɔgu awurum wɔ, bo am koro di na am nu wɔ, nzen sɛ? Wara am bu Kristo jama ni ngbɛɛn wɔ, haari na am suwura bo bu la mǎ pui nyinse? Am nɔ m se am sɛ wɔ? Am nɔ m kansi am wɔ, nzen sɛ? Ai, m koro kansi mǎ am ni nyini yiri.

²³ Dama deke n bo mini ni m tii deeri i fiteeri Mibie n dɔ ni, nyini ye ma fa akere am n a. Kɔngue n bo bu tɔɔri ya Mibie Yesu maari i kpɔfɔm ni, na wɔ fa kpɔnɔ, ²⁴ na wɔ da Nyeme asi, na wɔ bubu i nu, na wɔ se bu ka, "Ahin kpɔnɔ n ti m nɔniembaa lɛɛ ye m sufa ma am n a. Am yo ahin sɔ adena am fa tenje m su." ²⁵ Bu diiri diire n wieeri ni, na wɔ kaaki afa awa

n ni nzan ni, na wɔ se bu ka, “Ahin nzan n ti sɛsɛsu fɔfɔre n bo Nyeme sufa m mbunja n sudi i di wɔ. Saŋga kere bo am ba sunu nyini nzan ni, am tenje m su.” ²⁶ Nyini la ka, saŋga kere bo am ba sudi ahin kponɔ n na am sunu ahin nzan ni, am subo Mibie n yiwee ni ndoori wɔ lɛɛ, haari fa ko ju saŋga bo i bá kaaki ba bekun ni.

²⁷ Nyini ti, sɔnɔ kere bo i diiri ya Mibie n kponɔ ni, wara i nuuri i nzan ni, na i bu má i, Nyeme di i mi jɔre jaraki i, dama wɔ fa má ya Mibie junie n ni i mbunja n ayo má juma. ²⁸ Wɔ yo daka ka sɔnɔ kere nie i ahorembaa su ka, na i nya di ahin kponɔ ni, na i nya nu nzan ni. ²⁹ Dama sɔnɔ kere bo i diiri kponɔ n na i nuuri nzan n na wɔ si má ka ya Mibie juniembaa n lɛɛ, Nyeme bá di i mi jɔre jaraki i. ³⁰ Nyini dɛɛ ti ye am nu, mine dɔŋgu ayɔrɔki ada tukpaki, haari nbem awu n a. ³¹ Nzen yere ni ya tii du mɔ fiiti nieɛri kabo ya woowa ti, Nyeme di má ya jɔre cin má ya sui. ³² Ama, nzen Mibie n fiiti ya na i cin ya sui, i yo sɔ ɔ adena i di má ya jɔre na i yo ya ŋgbɛɛn, cɛɛn n bo i bá di durunya n nufɔm jɔre ni.

³³ Nyini dɛɛ ti, m ninbaam, saŋga kere bo am ba tien am nɔɔ, na am di, am kere ŋmindam am benɔ, na am saŋga di. ³⁴ Nzen ahɔɛ ati be, i ti ye ni ka i mi di diire awuru ka, na i nya ba, adena nzen am ba tien am nɔɔ, na má Nyeme di am jɔre cin am sui. Jɔre n kere bo wɔ ka ni, nzen m ba baari, m yó i dɔŋgu.

12

Aceerim bo Awiewie Casi n fa ma minem n jɔre

¹ Tɔ, m ninbaam, m koro ka am si sa bo i wo bere fa ko Awiewie Casi n aceerim su. ² Am si ka saŋga bo am yo su má Nyeme ni, bu yo taari am nyi wɔ, na am susu amɔɛm bo bu koro jɔjɔ má ni. ³ Nyini ti, m koro ka am si ka sɔnɔ kere bo Awiewie Casi n wo i dɔ, i mi koro se má ka, “Yesu aka ŋgbɛɛn,” na be gusu koro se má ka “Yesu ti m Mibie,” má ka Awiewie Casi n wo i mi dɔ.

⁴ Aceerim barasu barasu wo bere, ama, Awiewie Casi n ti kun wɔ. ⁵ Amusuim bo ya yo buka minem wo bere barasu barasu, ama, ya su Mibie kun wɔ. ⁶ Sɔnɔ kere la atin barasu barasu kabo i mi koro fa yo i juma, ama, Nyeme kun ni yo nyini n kere a. ⁷ Nyeme ma sɔnɔ kere Awiewie Casi n aceerim n bo i kere ka Awiewie Casi n wo i mi dɔ a, na i fa buka Kristo jama n kere. ⁸ Awiewie Casi ni ma sɔnɔ be jɔjɔ alecira jɔre a, nyini Awiewie ni ma be gusu jɔjɔ si jɔre a. ⁹ Nyini Awiewie ni ma be yarada ye i yo yiko juma n a, nyini Awiewie kun ni ma be yiko ye i mi n koro tuntun tukpakifɔm na bu nya laifie a. ¹⁰ Nyini Awiewie ni ma be yiko ye i koro yo alekutura sam a, yiri ma be yiko ye i kan Nyeme nɔɔɔnɛ n kere minem a, yiri ma be yiko ye i koro si jɔre n bo i fite Nyeme Awiewie Casi n dɔ a, yiri ma be yiko ye i koro jɔjɔ anie barasu barasu a, yiri gusu ma be yiko ye i koro kere anie barasu barasum bu a. ¹¹ Nyini Awiewie kun ni yo nyinim kere a, yiri ce sɔnɔ kere aceeri barasu barasu n kabo i koro a.

Aɲuniembaa kun n ni i bue barasu n jɔre

¹² Aɲuniembaa n la bue barasu barasu beberebe wɔ, haari ni bo i la bue barasu barasu ni, i ti aɲuniembaa kun wɔ, Kristo gusu ti sɔ ɔ lɛɛ, yere ti i bue barasu barasu n a. ¹³ Awiewie kun n ye ba fa abie ya kere Nyeme nzue a, ye ya kere ayo aɲuniembaa kun, bo bu ti Yudafɔm, ni bo bu ti má

Yudaföm, bo bu ti akööm, ni bo bu ti má akööm, ya kere ade nyini Awiewie kun ni ya ahore su a.

¹⁴ Tö, anuniembaa n la bue barasu barasu beberebe wö, bu ti má kun. ¹⁵ Nzen má ajaari n seeri ka, “M ti má asaa, nyini ti, m ti má anuniembaa n be fieo,” nyini kere má ka i ti má anuniembaa n bue be kun wö. ¹⁶ Na nzen má asui n gusu seeri ka, “M ti má anyumbaa, nyini ti, m ti má anuniembaa n be fieo,” nyini kere má ka i ti má anuniembaa n bue be kun wö. ¹⁷ Nzen má anuniembaa n bue n kere tiiri anyumbaa, má bu yo se koro ti deke nga a? Ye nzen má bu kere tiiri asui, má bu yo se koro de nvan a? ¹⁸ Ama, kabo Nyeme koro n ye wö fa ama anuniembaa bue barasu n kere a, ye wö yo i anuniembaa kun a. ¹⁹ Nzen má i kere ti bue barasu kun, má i ti má anuniembaa lee. ²⁰ Kabo i ti ni, anuniembaa bue barasu n sunnu, ama, i ti anuniembaa kun wö. ²¹ Nyini ti, anyumbaa n koro se má asaa n ka, “Wöwö, a kun má m kperere be, m koro má u.” Wara atii n koro se má ajaari n ka, “Wöwö, a kun má m kperere be, m koro má u.” ²² Ama, haari anuniembaa bue barasum n bo ya nga bu la má fanga ni mmöo kun kperere wö. ²³ Na anuniembaa bue barasu n bo i la má jirima ni, yiri ye ya nie i dika nyunyumi a. Na anuniembaa bue barasu n bo ya nu i ka i la ya nyinse ni, ya yo yiri döngu a, na má ya di nyinse. ²⁴ Na anuniembaa n bue n bo bu wo fofoe nu ni, ya nie má bu dika nyunyumi. Ama, kabo Nyeme yoori anuniembaa n ni, deke n bo yere fa má i yo má pui ni, yiri ye wö wura i jirima a, ²⁵ adena má i la kpakpaakinu, ama, na bue barasu n kere cece wo i benggu nu. ²⁶ Nzen anuniembaa bue kun diiri yaari, anuniembaa bue n kere sudi yaari n a, ye nzen anuniembaa n bue be sunya kansi, anuniembaa bue n kere ahore ti jöowa wö lee.

²⁷ Ambere kere ti Kristo anuniembaa n wö, na am kere kun kun n ti i bue barasu be wö lee. ²⁸ Na Nyeme ayi i mine nbem Kristo jamam n nu, na wö ma bu kere ni bu juma. I du mö yiiri jaramasam wö, nnyo su, bo bu kan Nyeme noanie n kere minem ni, nsan su la kereföm, bo bu buka su la bo bu yo alekutura sam ni, ni bo bu tuntun tukpakiföm na bu nya laifie ni, ni bo bu buka minem ni, ni Nyeme mine möföm bo bu kere nyaari ni, ni bo bu jöjo anie barasu barasu ni. ²⁹ Söno kere ti jaramasa a? Ai. Söno kere kan Nyeme noanie n kan kere minem a? Wara söno kere koro kere a? Ai. Söno kere la yiko koro yo alekutura sam a? Ai, i ti má so. ³⁰ Söno kere la yiko koro tuntun tukpakiföm na bu nya laifie a? Ai. Söno kere koro jöjo anie barasu barasu a? Ai. Söno kere koro yi anie jöjowa barasu barasu n bu a? Ai. ³¹ Ama, am kere boro am nyi na am nya aceerim n bo bu la má anusu ni.

Kisa, m koro ka m kere am atin n bo i ti kpa tara i kere ni.

13

Koro jöre

¹ Nzen m jöjo adamande anie barasu barasu n kere, na nzen m jöjo merékem anie, na m koro má minem, m ti ka adanjwore wö, wara m ti ka coco bo i bobo i benggu na i yo nanmie ngbeen wö. ² Nzen m de Nyeme noanie n Awiewie Casi n dö, na m kan kere minem, na m la si kere na m si deke n kere bo bu wo asiri nu ni, na nzen m la yarada haari bo m koro se bukam ka bu yasu bu tanaabiri, ama, na m koro má minem, m ti ngbeen wö lee. ³ Na nzen m faari m nengem kere fa kpaaki nu maari yaariföm, na

m faari m ñuniɛmbaa fa maari, na bu yara m sin, na m koro má minem, nyini n kere bo m yo i n ti ñgbɛɛn wɔ lɛɛ.

⁴ Sɔno bo i la koro, i mi la sawɔre wɔ, na i yo kpa, i mi si má mine kɔre, i mi fɔ má yanfɔya, i mi koro má kpiri. ⁵ Sɔno bo i la koro, i mi la má anyumbaa wuruuwa, i mi yo má sa bo yiri ñgumi yo ye, i mi fa má yaa ndende, i mi fa má jɔre se má i kunnu na i tenge su. ⁶ Sɔno bo i la koro, i mi ahore ti má jɔwa fa kɔ satie su, ama, i mi n ahore ti jɔwa fa kɔ deke bo i ti nahɔre su a. ⁷ Sɔno bo i la koro mindi de deke kere wɔ, na i la yarada fa kɔ deke kere nu, na i la ahoresi fa kɔ deke kere nu, na i la mindi sangga kere.

⁸ Koro la má awieeri. Ama, aceerim bo Awiewie Casi n fa ma minem na bu koro kan Nyeme ñoaniɛ n kere minem ni, i la sangga bo i ba sin wɔ, minem bo bu jɔɔ anie barasu barasum ni, bu bá mɔ bu nɔɔ ɔ, na bo bu la si ni, i la sangga bo i bá sin wɔ. ⁹ Kisa ya si má deke n kere wie má, na Nyeme ñoaniɛ n bo ya kan kere minem ni, ya si má i kere wie má. ¹⁰ Ama, nzen Kristo ba baari, nyini sangga deke n bo ya si má i kere ni aba i awieeri lɛɛ. ¹¹ Sangga bo m yo ti baatuma ni, m yo jɔɔ baatumaya jɔre wɔ, na m sunsun kabo baatuma sunsun ni, ama, m nyunu ba tiiri ni, na ma yaki baatumaya jɔrem n kere. ¹² Kisa dekem bo ya ñu i ni, i ti ka ya nie ñu i nieɛnu nu wɔ, ama, ya bá ñu i fofoe nu, kabo ya ñu ya ñu n wɔ. Kisa m si má deke n kere, ama, sangga suba bo m bá si deke n kere, kabo Nyeme si m nahɔre su ni. ¹³ Tɔ, kisa ahin deke nsanm ni wo bere a, bere la yarada, ni tama, ni koro, ama, bo i tara bu kere n la koro wɔ.

14

Awiewie Casi n aceerim bo i buka su n deɛ jɔre

¹ Tɔ, am bita koro atin na am koro am beɱgu ni anyumboro, na am kpini Awiewie Casi n aceerim busu, maala bo i ma am koro kan Nyeme ñoaniɛ n kere minem ni. ² Dama bo i jɔɔ anie barasu barasu n jɔɔ má adamandem dɔ, ama, i jɔɔ Nyeme dɔ a. Nahɔre, be koro ti má kabo i sujɔɔ n bu, dama Awiewie Casi n deɛ yiko n nu ye i jɔɔ asiri nu jɔrem a. ³ Ama, sɔno bo i kan Nyeme ñoaniɛ n kere minem ni, i jɔɔ ma minem wɔ, na i buka bu na bu nya fanga buka su, na i ma bu ahoresi, na i kaaki ma bu ahoreda. ⁴ Sɔno bo i jɔɔ anie barasu barasu n buka má be, i buka yiri ni i tii ñgumi wɔ. Ama, bo i kan Nyeme ñoaniɛ n kere minem ni, yiri buka Kristo jama n wɔ, na i nya fanga buka su. ⁵ Tɔ, nzen má am kere koro jɔɔ anie barasu barasu, má i yo m fie. Ama, bo i yo m fie kɔ tara i kere n la ka, am koro kan Nyeme ñoaniɛ n kere minem. Sɔno bo i kan Nyeme ñoaniɛ n kere minem n tara bo i jɔɔ anie barasu barasum ni, má ka be akoro akere nyini anie barasu barasum bu, na i buka Kristo jama n na i nya fanga.

⁶ M ninbaam, nzen kisa na m baari am dɔ, na m jɔɔri anie barasu barasum, nzu kpere ye am nyá i a? Ai, am nyá má kpere be. Má ka ma kan sa bo Nyeme ayi i akere m n ama am, wara m kan si jɔre be kere am, wara m kan Nyeme ñoaniɛ n kere am, wara m kan kereewa bo i fite Awiewie Casi n dɔ kere am. ⁷ Sɔ ye i ti a, nzen be fitaari tere, wara be bo bieku, na wɔ tɔ má su, bu yo se koro di jue soro su a? ⁸ Bekun nzen be kaanri lue awie, na wɔ sun má kabo lue awie sun ni, bu yo se koro cici lue a? ⁹ I ti sɔ ɔ lɛɛ, amberɛ mmɔɔ dɔ, nzen am jɔɔ anie barasu, na i la má bu, mine yo se koro si kabo am suse n a? I ti ka am sujɔɔ gɔ nzue awa sin wɔ lɛɛ. ¹⁰ Daanfie anie barasu barasum sunnu durunya n nu, i gusu be

wo má beré bo i la má bu, i kéré la bu. ¹¹ Tó, nyini ti, nzen be jójó anié be na m ti má i, m ti daanfíe barasu be wó lée i mi dó, ye i gusu ti daanfíe barasu be wó lée m dó. ¹² Kábo am nyunu aboro ka am nyá Awíewíe Casi n aceerim ni, am boro am nyi ni aceerim bo bu koro buka Kristo jama n na i nya fangá buka su.

¹³ Nyini ti, sǎnǎ kéré bo i jójó anié barasu barasum, i ti ye ni ka i sere Nyémé na i má i aceeri n bo i koro yi i bu kere minem ni. ¹⁴ Dama sanga kéré bo m sere Nyémé na m sere anié barasu barasu be nu, m awíewíe susere Nyémé a, ama, m ti má i bu m sunsunni nu. ¹⁵ Nyini ti, deke bo i ti ye ni ka m yo la ka, m sere Nyémé fite m awíewíe nu wó, na m kaaki sere i fite m sunsunni nu, na m di jue fite m awíewíe nu kansí Nyémé, na m kaaki di jue fite m sunsunni nu kansí Nyémé. ¹⁶ Nzen a sukansí Nyémé na i fite u awíewíe nu, na be wo u bi bo i nya si má Nyémé atin ni, i mi yo se koro ti u nyemesere n bu a, na i soro su se ka, “Ami” a? ¹⁷ Haari nzen u nyemesere ti kpa, i buka má yiri n bo i ti má i bu ni. ¹⁸ M da Nyémé asi ka m jójó anié barasu barasum tara am kéré. ¹⁹ Ama, nzen m ni Kristo jama n aba atien ya nǎo susu Nyémé, na m jójóori jǎre kaan bo i fite m sunsunni nu, na bu tiiri i bu, i tara bo m jójó jǎre beberebe anié barasu nu ni.

²⁰ M ninbaam, má am sunsun kábo nbaatumam sunsun ni, ama, fa kǎ satieyo dika, am yo kábo nbaatumam yo ni, na am ma am sunsunni ti kábo anyunutfóm dǎe ti ni. ²¹ Dama ba kéré i Nyémé nǎanie kpamaawa n nu ka, Micera n ɲa,

“M fá minem bo bu jójó daanfíe anié barasu barasum
na m má bu jójó m tienggu minem dó.

Ama, haari ni nyini n kéré mmǎo,
bu dé má m nǎanie ni.”

²² Nyini ti, anié barasu barasum jójóowa n kere minem bo ba nya yo má Kristo yarada ni nyaari a, má bo ba yo yarada ni. Na bo bu kan Nyémé nǎanie n kere minem ni, bu kere bo ba yo yarada ni nyaari a, má bo bu yo má yarada ni. ²³ Nyini ti, nzen ambere Kristo jama n atien am nǎo, na am kéré sujójó anié barasu barasum, na bo bu nya si má Nyémé atin ni, wara bo bu nya yo má yarada wuraari am nu, bu sé ka am nyunu akan am wó, má sǎ? ²⁴ Ama, nzen am atien am nǎo, na am kéré sukan Nyémé nǎanie ni, na bo i nya si má Nyémé atin ni, wara, bo i ti má yaradayofó aba awura am nu, na i ti kábo sǎnǎ kéré sujójó ni, i mi n sunsunni nu kere i ka i ti satieyofó o, na Nyémé nǎanie n di i jǎre jaraki i. ²⁵ Nyini ma i mi n kan asiri jǎre kéré bo i wo i ahore su n fite fofoe nu a, na i kutu i jaa su, na i kansí Nyémé, na i se ka, “Nyémé wo am dǎ nahǎre su.”

Kábo i ti ye ni ka sǎnǎ kéré tara i ɲu Kristo jama n nu barasu ni

²⁶ Tó, m ninbaam, nzu deke ye i ti ye ni ka am yo i a? Deke bo m koro ka m kan kere am la ka, nzen am ba tien am nǎo, na be la jue bo i di, wara be la kereewa be bo i kere, wara be la sayikereewa bo i fite Nyémé dǎ, wara be la anié barasu be bo i jójó, wara be yi anié jójóowa n bu kere am, deke n kéré bo am yo i ni, am yo i na i buka Kristo jama ni, na i nya fangá buka su. ²⁷ Nzen nbem ba sujójó anié barasu barasum, i ni i agaya kéré, bu yo mine nnyo, wara mine nsan, má bu tara sǎ. Bu ɲa bu jójó, bu jójó kun kun, i ti ye ni ka be gusu kaaki yi i bu kere am. ²⁸ Ama, nzen be koro kaaki yi má i bu kere má am, i ti ye ni ka i mi n bo i sujójó anié barasu barasum n mǎo i nǎo Kristo jamam nu, na i jójó ma i ɲu ni Nyémé. ²⁹ Minem bo

bu kan Nyeme noanie n kere minem ni, i ti ye ni ka bu mine nnyo wara bu mine nsan jojo a, na nyingam bo ba ka n fiiti i nu. ³⁰ Nzen be sujojo, na Nyeme ayi deke be akere sono nyinga, i ti ye ni ka sono n bo i du mo sujojo n mo i noo, na yiri n bo Nyeme ayi deke be akere i n jojo. ³¹ Dama am kere koro kan Nyeme noanie n kun kun kere am bengwu wo, adena am kere sonson deke be nu, na i ma am ahoresi. ³² I ti ye ni ka bo bu kan Nyeme noanie n kere minem n kere la tarabuŋu fa ko bu Nyeme noanie n kan su. ³³ Dama Nyeme ti ma bo i fa kpakpaakinu ba i minem do, ama, i ma bu la tanalaifie wo.

I ti so o lee, Kristo jama n kere nu, ³⁴ nzen am ba tieenri am noo, i ti ye ni ka nbaram mo bu noo, bu la ma atin ka bu jojo. Ama, wo yo daka ka bu yo bu ru benle, na bu su kabo noanie kpamaawa n kere n su. ³⁵ Nzen bu koro ka bu bisa jore be, i ti ye ni ka bu bisa bu hunm awuru, dama i ti nyinse wo ka bara jojo Kristo jama n nu. ³⁶ Nyeme noanie n du mo fite ambere do a, nzen se? Wara ambere ngumi ade Nyeme noanie n a? ³⁷ Nzen be sunsun ka i ti Nyeme noanie kanfo, wara i sunsun ka i si Awiewie Casi n acerim jore, i ti ye ni ka i mi si tenle su ka ahin noanie n bo m sukere ma am ni, i ti Mibie n dee noanie maawa a. ³⁸ Nzen be wo am nu, na i de ma ahin jore n bo m sukere ma am ni, ambere mmoo bu i mi ngbeen. ³⁹ Nyini ti, m ninbaam, i ti ye ni ka am boro am nyi na am sukan Nyeme noanie n kere minem, na ma am kanda minem ka ma bu jojo anie barasu barasum ni. ⁴⁰ Na am yo deke kere nyunyumi na i ko atin su.

15

Yesu Kristo yiwee tenge n jore

¹ To, m ninbaam, kisa m koro ka m tenge am su fa ko labari kpa n bo m yo kan kereeri am n su. Am yo yoori i yarada a, na am ajina i su kenken.

² Nzen am bitaari labari kpa n bo m kan kereeri am kenken, nyini ma am tiide a, nzen ma nyini yiri, am yarada n bo am ayo i n ti ngbeen wo lee.

³ Dama labari kpa n bo m deeri i na m kan kereeri am ni, i jore anyumbaa la ka, Kristo wuuri ya satie ti wo, kabo ba kere i Nyeme Jore Kadasi n nu lee, ⁴ ka i wuuri na bu seeri i ni, na Nyeme atenge i yiwee n nu i lesan ceen, kabo Nyeme Jore Kadasi n kere lee. ⁵ I tengeeri ni, na wo yi i ru akere Kefasi bo bu kaaki fere i ka Petoro ni, na wo ba ayi i ru akere i susufo buru ni nnyom ni. ⁶ Nyini sin, na wo yi i ru akere ya ninbaam nbem, bu tara mine yaa nnu, bu kere sangwa wo woobiri kun wo. Bu nu, bu dongu toko la ngoo, nbem gusu awu. ⁷ Na wo yi i ru akere Yakobo, na wo ba akaaki ayi i ru akere i jaramasam kere. ⁸ Awieeri su, na wo yi i ru akere mini, bo m ti ka baa bo ba wu i na i sangwa nya ju ma ni. ⁹ Dama mini ti jaramasam kere nu kaan, haari ma wo ti ma ye ni ka bu fere m jaramasa mmoo, dama m yo kereeri Kristo jama n wuwuruwa wo. ¹⁰ Nyeme ahoroma n dee ti, ye m ti kabo m ti n a. Ahoroma n bo wo fa ama m ni, i ti ma ngbeen, ama, m koro se ka ma yo juma atara nyingam kere mmoo. Ma mini ni m tii yoori i a, ama, Nyeme dee ahoroma n bo wo fa ama m ni, nyini ma m koro yoori i a. ¹¹ Nyini ti, mini, wara bere o, labari kpa n ye ya kan i a, labari kpa n gusu dee ti ye am yoori yarada n a.

Kabo Nyeme minem ba tenge yiwee nu ni

¹² To, labari kpa n bo ya kan i ni, ya ru, "Nyeme atenge Kristo i yiwee n nu." Ye nzu ti ye am nbem ru yiwee tenge wo ma bere a? ¹³ Nzen yiwee

tenge wo má bere, nyini la ka, Nyeme atenge má Kristo mmoo i yiwee n nu lee. ¹⁴ Nzen Nyeme atenge má Kristo i yiwee n nu, nyini la ka, labari kpa n bo ya kan i ni, i ti ngbeen wo lee, na yarada n bo am ayo i n gusu ti ngbeen wo lee. ¹⁵ Má nyini ngumi, nyini la ka, ya bu kore aso Nyeme wo lee, dama ya na wo tenge Kristo i yiwee n nu, ama, bu na bo ba wu n tenge má yiwee nu. ¹⁶ Na nzen bo ba wu n tenge má bu yiwee nu, nyini la ka, wo tenge má Kristo mmoo i yiwee n nu lee. ¹⁷ Na nzen wo tenge má Kristo i yiwee n nu, yarada n bo am ayo i n ti ngbeen wo lee, na am toko wo am satiem nu wo lee, ¹⁸ na bo bu yo yoori Kristo yarada na ba wu n kere aka ngbeen lee. ¹⁹ Nzen durunya n nu fen ngumi ye ya la tama n fa ko Kristo do, nyini yiri, ya ti minem bo ya la anunfo tara sono kere.

²⁰ Ama, nahore su, Nyeme atenge Kristo i yiwee n nu. Minem bo ba wu n kere nu, yiri tiiri bo i du mo tengeeri i yiwee nu a. ²¹ Adamande kun dee ti, ye yiwee kun sono kere n a, adamande kun gusu dee ti, ye mine ba tenge bu yiwee n nu a. ²² Na kabo Adam dee ti na adamande kere wu ni, so ye Kristo dee ti ma adamande kere ba tenge bu yiwee nu na bu nya ngoo a. ²³ Ama, sono kere ni i sangba bo Nyeme ba tenge i. Bo ba wu n kere nu, Kristo ti bo Nyeme du mo tengeeri i yiwee nu a, na bo bu ti i minem n gusu ba tenge sangba bo i ba kaaki ba ni. ²⁴ Nyini sin na deke n kere ba awieeri, na i nya fa femeya n wura i Si Nyeme saa nu, nyini sangba, wo kunma femeya kere, ni nfangafom kere, ni yikofom kere lee. ²⁵ Dama wo yo daka ka i di femeya ni haari i ba kunma i kpofom, na i nana bu kere nu. ²⁶ I kpofon n bo i ba kunma i awieeri su n la yiwee wo. ²⁷ Dama ba kere i Nyeme Jore Kadasi nu ka, "Wo fa deke n kere awura i saa nu ka i nie bu su." Bo i na wo fa deke n kere awura i saa nu ka i nie bu su ni, nyini kere ma ka Nyeme bo i faari deke n kere wuraari yiri Kristo saa nu afa i tii awura i saa nu lee. ²⁸ Na sangba bo i ba faari deke n kere wuraari i saa nu ni, na yiri Baa n ni i tii nya fa i nu wura i Si Nyeme saa nu. Nyini sangba Nyeme dee la deke n kere, na deke n kere wo bere yiri ti wo.

²⁹ To, nzen bu na yiwee tenge wo má bere, ye bo bu de minem bo ba wu n jinaabiri na bu bie bu Nyeme nzue ma bu n di, bu yo se wo? Nzen bo ba wu n tenge má bu yiwee nu, nzu ti ye bu bie Nyeme nzue ma bu a? ³⁰ Ye nzu ti ye yere to ya ngoo sangba kere n a? ³¹ Ale kere bo i cin, m wo yiwee nu wo, i ti so o lee, m ninbaam, m fa ambere bo m hoe ye m se so n a, ya Mibie Yesu Kristo dee ti. ³² Nzen m ni minem bo bu ti ka boro nengem, kun lue, Efeso mie kpiri n nu, na i ko yo ka adamande woowa dee ti m la tama, nzu kperere ye ma nya i a? Nzen bo ba wu n tenge má bu yiwee nu, nyini yiri, i ti kabo mine nbem n nati se n wo, bu na,
"Am ma ya di, na ya nu,

dama ahunma ya wu o."

³³ Má am ma be dadaka am, kabo minem nati se ni, ka,
"Sono tie suuri sono kpa su,
i saaki i woowa kpa n wo."

³⁴ Am kaaki sunsun nyunyumi, na má am yo satie kun, dama am nbem si má Nyeme. Nyini n bo m se so ni, i ti am nyinse wo lee.

Bo bu ba tenge bu yiwee n nu n dee anuniembaa n jore

³⁵ To, beni, be koro bisa ka, bo ba wu ni, bu tenge bu yiwee nu se wo? Anuniembaa barasu bono ye bu fa ba? ³⁶ Woro sinnzin ni, a si ma ka nzen a do deke mbaa, ma ka i wu wo ka, ye i nya fi a, nzen se? ³⁷ Deke

mbaa n bo a do i ni, beni, ngani mbaa wara abuwe ye a do i a, ama, i ba fiiri, i kaaki nyawa a, i ti má ka mbaa n bo a doori i ni. ³⁸ Nyeme ma i kere anuniembaa n kabo i koro a, deke mbaa barasu n kere, ni i tienju anuniembaa. ³⁹ Anuniembaa n kere wo i ngumi wo, i ti má kun, adamande dee wo bere i ngumi, ajaannam dee wo bere bu ngumi, lanjpetefom dee wo bere bu ngumi, na jombaam dee wo bere bu ngumi. ⁴⁰ Dekem bo bu wo angoro n wo bere, na a yaki bo bu wo durunya n nu fen ni. Angoro deem nyumi wo bere bu ngumi, na durunya n nu fen n deem gusu nyumi wo bere bu ngumi. ⁴¹ Wie nyumi wo bere i ngumi, sara nyumi wo bere i ngumi, asarambaam nyumi wo bere bu ngumi, ama, bu nbem yo nyumi tara nbem.

⁴² To, kabo i ti lee fa ko yiwee tenge n su. Anuniembaa n bo bu se i ni, i kporo o, na bo i tenge, i kporo má fieo. ⁴³ Deke n bo bu se i ni, i la má anyunuyi, ama, i bá tengeeri, i woowa yo nyumi wo. Deke n bo bu se i ni, i la má fanga, ama, i bá tengeeri, i la fanga wo. ⁴⁴ Deke n bo bu se i ni, i ti durunya n nu adamande anuniembaa a, i bá tengeeri, i ti anuniembaa bo Awiewie Casi n ma i ngoo n wo. Kabo durunya n nu adamande anuniembaa wo bere ni, so ye anuniembaa n bo Awiewie Casi ma i ngoo n gusu wo bere a. ⁴⁵ I ti kabo ba kere i Nyeme Jore Kadasi n nu n wo, ka, "Ciciri su dee adamande ngoofo n la Adam wo," na Adam n bo i ka sin n ti awiewie bo i ma ngoo ni. ⁴⁶ Bo i ti awiewie ni, má yiri du mo baari a, ama, bo i ti adamande ngoofo ni du mo baari a, na bo i ti awiewie n anya to su. ⁴⁷ Ciciri su dee adamande n fite durunya n nu fen wo, Nyeme yo faari natie yoori i a, ama, bo i to su nnyo su n fite Nyeme do angoro baari a. ⁴⁸ Minem bo bu ti durunya n nufom ni, bu ti kabo sono n bo Nyeme faari natie yoori i n ti n wo. Na bo bu ti Nyeme minem n gusu ti kabo sono n bo i fite Nyeme do angoro n ti ni. ⁴⁹ Kabo ya ferema ni sono n bo Nyeme faari natie yoori i ni, so ye ya bá ferema ni sono n bo i fite angoro n a.

⁵⁰ M ninbaam, m suse am wo lee, ka, ya nuniembaa n bo i ti nie ni mbunja ni, i koro wura má Nyeme femeya n nu, na deke n bo i kporo n koro nya má deke n bo i wo bere sangá kere ni. ⁵¹ Am ti fen, m suse am asiri nu jore wo lee, ka, má ya kere wú a, ama, ya kere nuniembaa ni bá kaaki fofore wo. ⁵² I yó kungerekun wo, anyumbaa kata ni i teke, sangá bo bu bá fitaari awieeri su dee awie ni, na bo ba wu n ténge bu yiwee nu, bu kporo má kun, na yere gusu nuniembaa n káaki fofore. ⁵³ Dama wo yo daka ka ahin anuniembaa n bo i kporo n kaaki anuniembaa n bo i kporo má ni, na anuniembaa n bo i wu n gusu kaaki anuniembaa n bo i wu má. ⁵⁴ Sangá bo anuniembaa n bo i kporo n bá kporo má kun ni, na anuniembaa n bo i wu n gusu bá wu má kun ni, nyini sangá Nyeme noanie ni yó yiiwa lee, bo ba kere i ka, "Ba di nasara yiwee nu ayo i ngbeen ni."

⁵⁵ "Keto, yiwee, u yiko n bo a fa kan n wo ni?"

Keto, u nasara n wo ni?"

⁵⁶ Deke n bo yiwee bita kan n la satie wo, ye satie nya i yiko n fite Nyeme noanie kpamaawa n nu wo. ⁵⁷ Ama, ya da Nyeme asi, dama ya Mibie Yesu Kristo dee ti, i ma ya di nasara.

⁵⁸ Nyini dee ti, m ninbaa koroowam, am jina kenken na má am fa am nu ji, am boro am nyi suyo Mibie n juma n sangá kere, dama am si ka juma n bo am suyo i ma Mibie n ti má ngbeen.

16

Nyɔaa n bo bu yi yi i na bu fa kɔ ma Nyɛmɛ minɛm ni

¹ Tɔ, fa kɔ nyɔaa n bo am yi yi i na am fa kɔ buka Nyɛmɛ minɛm ni, am yo kabo m kereeri Kristo jamam n bo bu wo Galatiya awɔre n nu n ka bu yo ni. ² Yudafɔm bakue n bumboori, mɔne kere mɔne, am nie kabo Nyɛmɛ awura am abaraka fa kɔ dekem bo am la bu n su, na am suyiyi nyɔaa be se, adena nzen m bá baari, am yi má nyɔaa kun. ³ Nyini sangɔ na m bá juuri, m kere kadasi ma minɛm n bo am ayi bu ni, na m fá sunma bu na bu fá am aceerim kɔ Yerusalem mie kpiri n nu. ⁴ Na nzen i ti ye ni ka mini mmɔɔ kɔ, na m ni bere kere kó.

Kabo Pɔɔlu koro ka i kɔ nie Kɔrintofɔm busu ni

⁵ M koro ka m fa Makedoniya deɛ awɔre n nu, na m sin ba nie am busu. ⁶ Beni, m yó lennyɔ am dɔ, wara fufuku ni sín ka, ye m nyá ba yasu a, adena am buka m na m kɔ deke kere bo m koro ka m kɔ ni. ⁷ Dama m koro má ka m bá jina angoro nie am busu na m sin, m la tama ka nzen Mibie n soroori su, m yó lennyɔ am dɔ. ⁸ M wó Efeso mie kpiri n nu fen haari Butara Cɛnkpiri n sangɔ. ⁹ Dama atin bambaka ateke ama m, na m yo juma n nahɔre su, ama, m kpɔfɔm gusu asunnu.

¹⁰ Nzen Timoti bá baari am dɔ, am de i ni am saa nnyɔ, má am ma i ahore saaki, yiri mmɔɔ yo Mibie n juma n kabo m yo i n wɔ. ¹¹ Má be se ka i bu i ngbɛɛn, ama, am kaari i ni ahoreda na i ba tu m, dama m sunie i ni ya ninbaam n atin nu ka bu bá.

¹² Fa kɔ ya niwa Apolosi yiri, ma sere i ni anyumboro ka i yo anie, na i ni ya ninbaam bá na bu bá nie am busu, ama, wɔ soro má su ka i bá kisa, ama, nzen Nyɛmɛ ba maari i atin, i bá.

Awieeri su jɔre ni anse

¹³ Má am fa am nyu ji, am jina kenken ni am yarada ni, na am yo nbiesɔm, na am fa ahoresi. ¹⁴ Deke n kere bo am yo i ni, am yo i ni koro.

¹⁵ M ninbaam, am si Satɛfanasi ni i dikafɔm jɔre, bere duuri mɔ yoori Kristo yarada Akaya awɔre n kere nu a, na ba fa bu nyu asu Nyɛmɛ minɛm amusui, nyini ti, m sere am wɔ jande, ¹⁶ ka am bu nyini minɛm bo bu ti sɔ ni, ni minɛm kere bo bu buka su, na bu yo bu juma n ni anyumboro ni. ¹⁷ Sangɔ bo Satɛfanasi, ni Fɔtunatusi, ni Akayakusi ba tuuri m ni, na wɔ yo m fie agaya, dama bu deeri am deɛ jinaabiri wɔ, na ba yo deke n bo má am yo i ma m ni. ¹⁸ Dama kabo bu baari ni, bu ma m ni ambere kere anya ahoresi, nyini ti, i ti ye ni ka am bu minɛm bo bu ti sɔ ni.

¹⁹ Kristo jamam bo bu wo Esiya awɔre n nu n kere bisa am dɔngu. Akuyila, ni i yi Pisisila, ni Nyɛmɛ minɛm bo bu tien bu nɔɔ bu dika n kere gusu bisa am dɔngu, Mibie n deɛ ti. ²⁰ Ya ninbaam kere bo bu wo fen n bisa am dɔngu. Am gusu bisa am beɔgum dɔngu ni koro.

²¹ Mini Pɔɔlu ni m tii sufa m saa sukere ahin kereɛwa n bisa am dɔngu a. ²² Sɔnɔ kere bo i koro má Mibie ni, Nyɛmɛ yó i mi ngbɛɛn. *Marana ta*, i bu la ka, Ya Mibie, bra.

²³ Ya Mibie Yesu buka am kere.

²⁴ M koro am kere Yesu Kristo deɛ ti. Ami.

Pöolu kadasi nnyo su bo i kere fa maari KÖRINTOFÖM ni

¹ Mini Pöolu bo m ti Yesu Kristo jaramasa Nyeme dee koroyanu ni, m ni ya niwa Timoti sukere ahin kadasi n ma am a. Ya sukere i na ya fa ma ambere Kristo jama n bo am wo Korinto mie kpiri n nu ni, ni Nyeme minem kere bo bu wo Akaya dee awore n nu ni. ² Ya Si Nyeme, ni ya Mibie Yesu Kristo buka am, na am nya tanalaifie.

Kabo Pöolu daari Nyeme asi ni

³ Am ma ya kansi Nyeme, yiri bo i ti ya Mibie Yesu Kristo Si ni. Yiri ti ya Si bo i si ya anjufo a. Yiri ti Nyeme bo i dada ya ahore a. ⁴ Yiri dada ya ahore a, ya wahara kere nu, adena yere gusu koro dada minem ahore, bere n bo bu wo wahara n kere nu ni. Kabo Nyeme ama yere mmoo ni ya tii anya ahoreda ni, yere ma bere n gusu nya nyini ahoreda n a. ⁵ Dama kabo ya ni Kristo susanga di i wahara n agaya ni, so ye yiri dee ti, ye ya nya ahoreda agaya n a. ⁶ Sangga kere bo ya nu kekereke, i ma am nya ahoreda ni tiide wo. Na sangga kere bo ya nya ahoreda ni, i ma am ahoreda a, na am yo sawore mindi de nyini wahara n bo ya di i n be. ⁷ Ya la tama fa ko am do, ya yo ma sika. Dama ya si ka kabo am ni yere kere susanga di ya wahara n be ni, so ye ya ni ambere kere susanga nya ya ahoreda n a.

⁸ M ninbaam, ya koro ka am si kabo ya nuuri kekereke Esiya dee awore n nu barasu ni, ya nuuri anyumboro bo i la ma anjusu, haari na ya yi tama ka ya wu awie. ⁹ Nahore, ya sunsun ka ya wu wo. Ama, i yo so na ma ya daafi ya nu su, ama, na ya daafi Nyeme nu, dama yiri tenge bo ba wu n a. ¹⁰ Wo yi ya afite nyini yiwee n bo i la ma anjusu n nu, na i yi ya fite nu bekun. Ya yo yiri tama ka i toko syyi ya fite nu bekun a, ¹¹ kabo am buka ya ni am nyemesere ni. Nyini ma mine donggu ba da Nyeme asi, fa ko kabo wo de mine donggu nyemesere n na wo yo sakpam ama ya ni.

Kabo Pöolu kaakiiri i sunsunni ka i kaaki ba ma bu do ni

¹² Deke n bo ya fa fo n la ka, ya sunsunni nu kere ya ka ya bo ma anoojie, na ya ahorembaa ti casi wo Nyeme do durunya n nu, maala fa ko am do, ma ka ya su durunya n nu alecira su n dee ti a, ama, Nyeme yo bukaari ya n dee ti a. ¹³ Ya kere ma jore be ma ma am, ma ka jore bo am kan i na am kaaki koro ti i bu ni. M la tama ka am ba si i kere haari ni i awieeri, ¹⁴ dama am adu mo asi ya nusu jore kaan, nyini ma am ba koro fa ya fo n a, kabo ya ba fa am fo, ceen n bo ya Mibie Yesu ba kaaki ba n a.

¹⁵ M la ahoresi fa ko nyini n su dee ti, ma sese su ka m du mo ba nie am busu, adena ma am nya buka kpe nnyo. ¹⁶ Deke bo i ti na m se so n la ka, ma sese su ka ma m fa am do na m nie am busu, na m sin ko Makedoniya dee awore n nu, na m ba sufite do ba, na ma m fa am do bekun, adena am buka m na m koro ko ju Yudiya awore n nu. ¹⁷ Nyini n bo m seseeri su so ni, m la ma jinakunsu wo lee, nzen se? Wara m sese su kabo durunya n nufom n yo n wo, na m se ka "Een," na m kaaki se ka "Ai," nzen se? ¹⁸ Nyeme la dabuju ni nahore n dee ti, noaniem bo ya kan kereeri am ni, i ti ma "Een," na i kaaki ti ma "Ai". ¹⁹ Dama Nyeme Wa Yesu Kristo n bo ya kaanri i jore kereeri am ni, mini ni Silivanusi ni Timoti, yiri Yesu dee jore

ti má “Éen,” na i kaaki ti má “Ai,” ama, i deke kere ti “Éen” ɔ. ²⁰ Dama dekem kere bo Nyeme seeri ka i yó bu ni, bu kere ti “Éen” ɔ, Yesu dee ti. Nyini ti, i dee ti ye sanja bo ya kansa Nyeme, ya se ka, “Ami” n a. ²¹ Tɔ, Nyeme ni i tii ma ya ni ambere kere koro jina kenken a, kabo ya ni Kristo ayo kun ni. Yiri ayi ya ka ya su i n a. ²² Yiri ase ya nyaari ka ya ti i dee minem a, na wo fa i Awiewie Casi n awura ya ahore su na i kere kabo i má ya deke n kere bo i seeri ka i fá ma i minem ni.

²³ Nyeme di m daani m ahore su a, ma koro má ka m kan am ndie, nyini dee ti ye ma kaaki aba má Kórinto mie kpiri n nu n a. ²⁴ I ti má ka ya sumie am kabo am yo yarada n wo, ama, ya ni ambere kere buka ya benju wo, na am nya ahorejo, dama yarada n dee ti ye am jina kenken n a.

2

¹ Nyini ti, na ma yo m sunsunni nu ka m ba nie má am busu kun na am ahore saaki. ² Dama nzen m ma am ahore saakiiri, nmam ma m ahore da a? Má ambere bo ma saaki am ahore ni? ³ Deke bo i ti na m kereri so n la ka, ma koro má ka m ba na má am ma m ahore saaki, ambere bo má i ti ye ni ka am ma m ahore jo ni. M la ahoresi fa ko am do, ka deke n bo i ma m ahore jo ni, nyini má am gusu kere ahore jo n a. ⁴ Dama m woori ahoresaaki, ni ahorembaa yaari, ni nyunvuin agaya nu, ye m kereri am n a. I ti má ka m koroori ka m saaki am ahore wo, ama, m koroori ka am si kabo m koro am agaya barasu n wo.

Kabo Pɔɔlu ŋa bu fa ce be bo wo do ŋgasi ni

⁵ Kabo be ayo ahoresaaki sa ni, má mini ye wo saaki m ahore a, ama, wo saaki am kere ahore a, nzen má nyini, wo saaki am nu be ahore. M gusu koro má ka m jojo jore n na i ko sin su agaya. ⁶ Suicin n bo ambere mine beberebe n kere fa kereeri i mi ni, wo se i su so. ⁷ Ama, kisa, kabo i ti ye ni ka am yo i n la ka, am kaaki de i mi, na am fa i ŋgasi ce i, na am dada i ahore, má so, ahoresaaki agaya ni má i kpaasi wo. ⁸ Nyini ti, m sere am wo, am kaaki de i na am kere i kabo am la koro fa ko i do ni. ⁹ Deke bo i ti na m kereri am n la ka, m koro ka m yo am na m nie ka am de deke n kere bo m se am ka am yo i ni. ¹⁰ Soɔɔ bo am fa i ŋgasi ce i ni, mini mmoo fa ce i mi. Sa bo i ti na ma fa i ŋgasi ace i ni, nzen i la ŋgasi bo i ti ye ni ka m fa ce i mmoo, ma yo so Kristo nyunu, ambere dee ti wo. ¹¹ Ya yo so ɔ, adena má Sitana koro kunma ya. Dama ya si tenle su kabo i la ŋgonletie barasu ni.

Kabo i miseri Pɔɔlu ka i ti bu jore Titosi do ni

¹² Tɔ, m ko juuri Torasi mie kpiri n nu ka m kan Kristo labari kpa n jore kere bu ni, na ma ŋu ka Mibie n adu mo ateke atin ama m. ¹³ Haari ni nyini n kere mmoo, m ahore ada má, dama ma ŋu má ya niwa Titosi do. Nyini dee ti, na ma kaari bu, na ma sin ako Makedoniya awore n nu.

¹⁴ Ama, ya da Nyeme asi, dama kabo Kristo adi nasara na ya ni yiri ayo kun ni, sanja kere, yiri Nyeme ma ya nati su Kristo su, i nasara natiiri nu a, na deke kere bo ya ko ni, yiri fa ya bara ye a, na ya ma minem si i jore, kabo deke nvani bara ye deke kere ni. ¹⁵ Dama ya ti ka ayiri kunkuunwa nvanvani bo Kristo fa ma Nyeme n wo, na i nvanvani n bara ye minem bo bu sunya tiide ni, ni bo bu suka ŋgbɛɛn n do ɔ. ¹⁶ Bo bu suka ŋgbɛɛn ni, bere bu ya ka nvanvani n bo i sufa yiwee ba bu do ɔ, ama, bo bu sunya tiide ni, bere bu ya ka nvanvani n bo i suma bu nya ŋɔɔ Nyeme

dɔ ɔ. Ahin juma n yiri, nma koro fa i tienngu fanga yo i a? ¹⁷ Ya ti má ka mine dongu bo bu bita Nyeme jɔre n yo wata na bu di i kperɛ ni, ama, yere yiri, ya ti nahorefom wɔ, haari na ya ti mine bo wɔ yi ya asunma ya wɔ, na ya jina i nyunu ye ya kan i jɔre a, kabo ya ni Kristo ayo kun n dɛɛ ti.

3

Sesesu fɔfɔre n bo Yesu adi i di n dɛɛ amusuifom jɔre

¹ Ya sukaaki kan kere am kabo ya ti na am si ya, nzen sɛ? Wɔ yo má daka ka ya yo kabo nbem yo ni, ka ya fa kadasi bo i kere kabo ya ti barasu n bita nu, wara ya de kadasi am dɔ na i kere mine nyingam kabo ya ti barasu, nzen sɛ? ² Ai, ya kadasi n la ambere ni am tii wɔ, kadasi n bo ba kere i awura ya ahore su ni, na mine kere koro kan i na bu si kabo i ti. ³ Na bu koro nɔ ka ambere ti kadasi n bo Kristo akere awura ya saa nu afa asunma ya n a. Wɔ fa má deke kereewa nzue fa kereeri i a. Ama, Nyeme bo i wo bere sangɔ kere n dɛɛ Awiewie n ye i fa kereeri i a. Wɔ kere má i agɔ má yabue peperepe su wɔ, kabo Nyeme yo kereeri i noanie kpamaawa n maari Moyisi ni, ama, i kereeri i gɔori adamandem ahore su wɔ.

⁴ Deke bo i ti na ya koro jojo sɔ n la ka, ya la ahoresi Nyeme dɔ, Kristo dɛɛ ti. ⁵ Ya la má deke bo i kere ka yere ni ya tii koro yo juma n a. Deke bo i ma ya koro yo i n fite Nyeme dɔ ɔ. ⁶ Yiri Nyeme ama ya koro ayo i amusuifom a, fa kɔ sesesu fɔfɔre n bo wɔ di i di n su a. Nyini sesesu n fite má Nyeme noanie kpamaawa n bo wɔ kere i n dɔ, ama, i fite i Awiewie n dɔ ɔ. Noanie kpamaawa kereewa n fa yiwee ba, ama, Awiewie n ma nɔɔ ɔ.

⁷ Tɔ, noanie kpamaawa n bo Nyeme yo kereeri i gɔori yabue peperepe n su na i fa maari Moyisi ni, nyini sangɔ, i yoori sɔ ni, i jirima bambaka n taari wɔ, na Yisarelifom n akoro anie má Moyisi nyunuawa dika, dama i nyunuawa taari wein agaya, haari ni bo i ba saari wɔ. Kabo noanie kpamaawa n bo i fa yiwee ba n ti n na Nyeme boori i juma n bu ni jirima bambaka n sɔ ni, ⁸ i Awiewie ni yó i dɛɛ juma n ni jirima bambaka bo i tara nyini ni, má sɔ? ⁹ Kabo noanie kpamaawa n bo i yo diiri minem jɔre ciinri bu sui n ti n na i juma yo la jirima bambaka sɔ ni, nyini yiri, juma n bo i ma Nyeme de minem ka bu yo sa bo i kɔ atin su i dɔ n dɛɛ jirima bambaka tara sɔ. ¹⁰ Nahɔre, deke n bo i yo la jirima bambaka ni, i la má jirima kun, deke n bo i la jirima bambaka tara sɔ n dɛɛ ti. ¹¹ Kabo deke n bo i ti siinwa n ti n na i yo la jirima bambaka sɔ ni, nyini yiri, deke n bo i wo bere sangɔ kere n dɛɛ jirima bambaka n tara sɔ.

¹² Kabo ya la tama ka i ti sɔ n dɛɛ ti, ye ya la ahoresi agaya koro jojo sɔ n a. ¹³ Yere ti má ka Moyisi bo i yo faari sanvuin kataari na má Yisarelifom nɔ i nyunuawa bo i ta wein na i susaari ni. ¹⁴ Ama, haari ni nyini n kere mmɔɔ ni, bu sui yo tiiri tantanantan a. Haari ni nyuma, sangɔ kere bo bu ti ka be sukan sesesu dawa n dɛɛ kadasim ni, i yoori bu ka nyini sanvuin n toko kata bu sunsunni su wɔ, má ka Kristo ngumi koro yi i a. ¹⁵ Haari ni nyuma, sangɔ kere bo bu kan kadasim n bo Nyeme ma Moyisi kereeri bu ni, i yoori bu ka sanvuin n toko kata bu sunsunni su wɔ. ¹⁶ Ama, bu koro yi i, kabo ba kere i fa kɔ Moyisi jɔre n su ni, ka, “Sangɔ bo i fa i nyunu wɔ Mibie ni, sanvuin n kata má i nyunuawa kun.” ¹⁷ Tɔ, deke n bo bu kereeri i ka “Mibie n” ni, bu kere niiri i Awiewie n wɔ. Deke bo Mibie n Awiewie n wo ni, dɔ ye mine nya bu tii a. ¹⁸ Yere yiri, ya la má sanvuin bo i kata ya nyunu. Kabo ya nie nɔ deke nieɛnu nu ni, sɔ ye ya nie nɔ Mibie

n jirima woowa n a, na i ma ya woowa kaaki kabo i ti ni, na ya sunya i jirima woowa ni, subuka su sanƆa kere. Ahin n fite Mibie n Awiewie n do ɔ.

4

Ajeke n bo i ti ka i wo dundu nu n jore

¹ Nyini ti, kabo Nyeme asi ya anunfo na wo fa ahin juma n ama ya ni, ya nunie yoroƆi ma ya. ² Yere, ya kete deke kere bo i ti nyinse sa na bu kata i su asiri nu ni, ya dadaka ma be, ya kaaki ma Nyeme noanie ni. Ama, ya kan nahore n fofoe nu wo, nyini ma ya fa kere sono kere na i si i sunsunni nu kabo ya wo ti Nyeme do a. ³ Na haari nzen deke be akata labari kpa n bo ya kan i n su, bere n bo bu suka ngbeen ni ngumi do, ye deke be akata i su a. ⁴ Dama Sitana bo i ti durunya n nu fen dee nyeme n ata bu nyi bu sunsunni nu na ma bu yo yarada, adena ma bu nu labari kpa n dee wein n fa ko Kristo jirima woowa n su, yiri bo i ti kabo Nyeme ti ni. ⁵ Ya kan ma yere ni ya tii jore wo, ama, ya kan Yesu Kristo jore a, ka yiri ti sono kere Mibie a. Yere, ya ti am dee akoom wo, yiri Yesu dee ti. ⁶ Dama Nyeme bo i yo seeri ka, "Ma wein ta fite awosin nu" ni, yiri ma i wein ata ya ahore su a, na i ma ya si i jirima woowa n bo i ta fite Yesu Kristo nyunuawa dika ni.

⁷ Ahin jore n ti ajeke bo ya la i Nyeme do ɔ, ama, yere yiri, ya ti ka dundu bo ba fa yakati ata ya n ye ya la ahin ajeke n a. I ti so ɔ, adena mine nu i na bu si ka nyini yiko n bo i la ma anusu n ti Nyeme dee wo, i fite ma ya do. ⁸ Bu mie ya so ɔ deke kere nu, ama, Nyeme yi ya nu wo. Ya tanda so ɔ, ama, ya yi ma tama. ⁹ Bu kere ya wuwuruwa so ɔ, ama, Nyeme yaki ma ya. Bu bo ya ji asienƆu so ɔ, ama, ya ka ma ngbeen. ¹⁰ Sanga kere ya nati nu yiwee n bo Yesu wuuri i n be wo, adena minem koro nu ngoo n gusu bo Yesu la i n be, ya nunie nu. ¹¹ Nahore, yere bo ya la ngoo ni, sanga kere bu fa ya wura yiwee woobiri wo, Yesu dee ti, adena bu koro nu ngoo n gusu bo Yesu la i n ya nunie nu. ¹² To, yere, ya wo yiwee nu wo, ama, ambere wo ngoo nu wo, Nyeme do.

¹³ Ya jore n ti kabo ba kere i Nyeme Jore Kadasi n nu wo, ka, "M yo yoori yarada a, nyini dee ti ye m jooƆori so n a." To, yere gusu ayo nyini yarada kun n wo, nyini dee ti ye ya jooƆo so n a. ¹⁴ Dama ya si tenle su ka Nyeme bo i tengeeri Yesu i yiwee n nu ni, yiri sanga tenge ya ni Yesu yiwee n nu a, na i fa ya ni ambere kere ko i nyunu. ¹⁵ Ahin n kere ma am nya kpere a, adena mine donƆu sunya Nyeme ahoroƆa ni subuka su, na i la ma anusu, nyini ma bu suda Nyeme asi subuka su a, na i wura Nyeme kpiri.

Ya la yarada n ye ya nati a

¹⁶ Nyini dee ti, ya nunie yoroƆi ma ya. Haari ni bo ya nuniembaa sugbaraki ni, ama, ya ahore su, ya sunya fanga fofore Nyeme do ɔ, ale kere bo i cin. ¹⁷ Ahin waharam bo ya sudi bu ni, bu ti ma pu, na bu ce ma, nyini ni ma ya nya jirima woowa bo i la ma anusu na i wo bere sanga kere n a. ¹⁸ Ya fa ma ya nyumbaa kpama ma dekem bo ya nu bu n su, ama, dekem bo ya nu ma bu ni, ya fa ya nyumbaa kpama bere su a, dama bo ya koro nu i ni, i ce ma, ama, bo ya koro nu ma i ni, i wo bere wo, sanga kere.

5

¹ Tö, ya si durunya n nu fen dëe añuniëmbaa n jöre, i ti ka nambue wö, nzen wö saaki, söñö kerë la ataari kpa bo Nyeme ata i afa ase i. Má adamande taari i a, nyini awuru n wo angoro wö, i wo bere sanja kerë wö. ² Kabo i ti sö na ya toko wo fen ni, ya wo waraki su wö. Ya ahore su, ya koro ka Nyeme fa ya wura ya awuru n bo i fite angoro n nu wö, na i kata ya ñu. ³ Ya koro i sö ö, na ya wura i ka sutura na má ya nati ya bu ngbeen. ⁴ Yere bo ya toko wo ahin nambue n nu ni, ya waraki wö, na ya wo ahore tanda nu sö ö lëe. I ti má ka ya koro ka ya yi i se wö, ama, ya koro ka ya wura angoro dëe n nu wö, na i kata ya ñu, adena Nyeme bá kaaki ahin añuniëmbaa n bo i wu ni, na i ma ya i dëe ngöñ ni. ⁵ Nyeme ni i tii adu mö aseë nyini deke n su ase ya a. Na wö fa i Awiewie n ama ya, na i kere kabo i má ya deke n kerë bo i seeri ka i fá ma i minem ni.

⁶ Tö, nyini ma ya la ahoresi sanja kerë n a. Ya si tenle su ka kabo ya toko wo ahin añuniëmbaa n nu ni, ya nya wo má Mibie n dika n nu lëe. ⁷ Kisa ya la yarada ye ya nati a, má ka ya nyumbaa ye ya fa ñu asi nati a. ⁸ Yere, ya la ahoresi n dëe ti, ye ya ña ya yaki ahin añuniëmbaa n a, na ya kö awuru Mibie n dö. ⁹ Nyini ti, yere yiri, nzen ya wo ya awuru n nu, wara ya wo má nu, ya boro ya yo sa bo i sun Mibie n nu wö. ¹⁰ Dama wö yo daka ka söñö kerë bá jina Kristo nyunu, i jöre diibiri ni, adena i mi nya i ñkatö fa kö dekem bo i yoori bu i ngöñ n su ni, bo i ti kpa, ni bo i ti má kpa ni.

Kabo Yesu Kristo dëe ti na ya ni Nyeme afien ayo döngü ni

¹¹ Ya si kabo i ti na ya soro Mibie n ni, nyini dëe ti, ye ya boro ya nyi na ya ma minem kaaki bu sunsunni fa kö i jöre n su a. Nyeme si kabo ya woowa kerë ti barasu. Na m la tama ka am sunsunni nu, ambere mmö si ya woowa. ¹² Ya sukaaki kan kere má am bekun kabo ya ti wö, ama, ya sukere am deke bo i ti na am koro fa ya fö n wö, adena nzen minem bá koro ka bu fö deke bo bu koro ñu i n su, na i fite má ahorembaa su, dama bu koro ka bu bu am ngbeen n dëe ti, tö, am koro bö bu nu ni jöre kpa. ¹³ Nzen bu ña ya bo fie wö, Nyeme dëe ti ye ya bo fie a, ye nzen ya nyunu ti koroowa gusu a, ambere dëe ti ye ya nyunu ti koroowa a. ¹⁴ Koro n bo Kristo fa koro ya ni, yiri nie ya su a, dama ya yo ya sunsunni ka söñö kun n bo i wu maari söñö kerë n dëe ti ni, nyini la ka, söñö kerë awu wö lëe. ¹⁵ I wu maari söñö kerë wö, adena bo bu wo ni ngöñ n bita bu ngöñ n ka i ti má bu dëe, ama, i ti i dëe wö, yiri n bo i wu maari bu na wö kaaki atenge i yiwee n nu bekun ni.

¹⁶ Nyini dëe ti, fa i kisa fa kö, kabo durunya n nuföm n bu söñö ni, yere, ya bu má be sö kun, haari ni bo ya yo buuri Kristo mmö sö ni, kisa ya bu má i sö kun. ¹⁷ Nyini yiri, nzen be ni Kristo ayo kun, i mi n ayo deke föfore wö lëe, i woowa dawa n asin, na i deke n kerë akaaki föfore wö lëe. ¹⁸ Nyini n kerë fite Nyeme dö ö. Yiri ama Kristo ayo ya ni yiri ni i tii afien döngü a, ye wö ma ya juma n bo i yo i ni minem afien döngü. ¹⁹ Nyini la ka, Nyeme ma Kristo yo i ni durunya n nuföm afien döngü a, na i tenje má bu satie jöre su, haari kaan sö, ye wö fa nyini afien döngüyo n jöre n awura ya saa nu, ka ya kan i. ²⁰ Nyini dëe ti, ya ti sunmaföm bo ya jina Kristo jaa nu wö. I ti ka Nyeme ni i tii sufa ya susere am jande a. Ya jina Kristo dëe jaa nu susere am wö, ka, am ma yiri yo am ni Nyeme afien döngü. ²¹ Yiri Kristo n bo i la má satie be ni, yiri ye Nyeme ma wö

de satieyofom n jinaabiri a, yere dee ti, adena ya kaaki minem bo Nyeme de bu ka bu yo sa bo i ko atin su i do.

6

¹ Yere bo ya ni Nyeme sang'a yo juma ni, ya sere am wo, ahorma n bo am ade i ni, ma am ma i ka ngben. ² Dama Nyeme na, "Sanga kpa n ba juuri ni, ye m deeri am sere a, na tiide ceen n ye m bukaari am a."

Am ti fen, kisa ti sanga kpa n a. Am ti fen, kisa ti tiide ceen n a.

³ Ya sukanda ma be atin wo, adena ma be jaraki ya fa ko ya juma n bo ya yo i n su. ⁴ Ama, deke n kere nu, ya kere ka ya ti Nyeme amuisufom wo. Dama haari nzen ya wo wahara nu, ni kekereke nu, ni anyumboro nu, ya mindi de i wo. ⁵ Haari na ba bo ya, na ba nyi ya dansaraka, na ba di aluwa ya busu, na ya yo juma kekereke, na ya kpie daafiri, na ya da ahoe, ⁶ nyini n kere ni, na ya kere ka ya woowa ti casi wo, na ya la si Nyeme do, na ya mindi, na ya yo kpa, na ya wo ni Awiewie Casi ni, na ya la koro nahore su. ⁷ Ya kan nahore jore wo, na ya yo juma n ni Nyeme dee yiko n nu. Ya bita biesoya nenje bo i ti sa bo i ko atin su Nyeme do o, i wo ya saa fomboro, ni ya saa bie nu wo. ⁸ Bu wura ya kpiri wo, na bu kaaki yo ya kaan. Bu kansi ya a, na bu kaaki jaraki ya. Bu na ya dadaka minem wo, ama, bu kaaki na ya kan nahore wo. ⁹ Ya ti ka minem bo be si ma ya wo, ama, deke kere minem si ya so o lee. Ya ti ka ya wu wo, ama, ya la ngoo so o lee. Bu bo ya ni anyumboro so o, ama, ya wu ma. ¹⁰ Ya wo ahoresaaki nu so o lee, ama, sanga kere ya la ahorejo o. Ya wo ka ya ti yaarifom wo, ama, ya fa ajek'e ma minem dongu wo. Ya ti ka ya la ma pui wo, ama, deke n kere ti ya dee wo.

¹¹ To, ambere ya danfo Korintofom, ya fa ma deke be afie ma am su, ya teke ya ahorembaa ama am. ¹² Yere, ya kpie ma am ya koro, ambere yiri, am akpie ya am koro. ¹³ Am ti ka m nbaam dee ti ye m suse am so n a, ka am gusu teke am ahorembaa ma ya, kabo ya teke ya dee ama am ni.

Ma am fa am nu bo minem bo bu yo ma Kristo yarada n su

¹⁴ Ma am fa am nu bo minem bo bu yo ma Kristo yarada n su, dama bo i yo sa bo i ko atin su Nyeme do n ni ketemafoni, i yo se ye bu koro sanga wo a? Wara wein ni awosin yo se koro sanga wo a? Ai, i koro yo ma. ¹⁵ Nzu anose wo Kristo ni Sitana afien a? Wara nzu tana wo sono bo wo yo Kristo yarada n ni bo wo yo ma i yarada n afien a? Ai, bu la ma tana. ¹⁶ Nzu anose wo Nyeme Sereebiri Awuru n ni amoen afien a? Ai, bu la ma anose be. Yere ti ka Nyeme Sereebiri Awuru n a, ye yiri Nyeme bo i wo bere sanga kere n wo nu n a. Kabo Nyeme ni i tii ase ni, ka, "M wo bu do, na m ni bere sanga nati, na m yo bu Nyeme, na bu yo m minem."

¹⁷ Nyini ti, Nyeme akaaki ase ka,

"Am fite yaki bu,
na am kpaaki yaki bu,

Micera ni seeri so a.

Na ma am fa am nu mata deke bo i ti ma casi,
na m de am.

¹⁸ Na m yo am Si,

na ambere gusu yó m dɛɛ nbaam.
Kabo Micera Kpiri n ase lɛɛ.”

7

¹ M ninbaa koroowam, ahin deke n kere bo Nyeme ase ka i yó ma ya n dɛɛ ti, am ma ya kpakpara ya ɲu fite deke kere bo i ma ya ɲuniembaa n ni ya awiewie n yo fin ni, na am ma ya soro Nyeme na ya woowa kere ti kabo Nyeme koro ka i ti ni.

Kabo bu sayoowa ma Pɔɔlu ahore jɔɔri ni

² Am teke am ahorembaa na am de ya. Ya do má am be ɲgasi, ya saaki má am be, ya sisi má am be. ³ Deke bo i ti na m se ahin sɔ ni, i ti má ka m sujaraki am wɔ, dama ma du mɔ ase am ka am jɔɛ wo ya ahore su, ya ni ambere ti kun wɔ, haari yiwee nu wara ɲɔɔ nu. ⁴ M la ahoresi agaya fa kɔ am dɔ, na m fa am fɔ agaya, na m la ahoreda agaya ambere dɛɛ ti, haari ni wahara n bo ya di i n kere ni, m la ahorejɔ bo i la má aɲusu.

⁵ Dama sanja bo ya ba juuri Makedoniya awɔre n nu ni, ya nya má ɲumiyi haari kaan sɔ mmɔɔ, ama, ya ɲuuri kekereke wɔ deke kere nu. Minem fa aluwa kpura ya sɔ ɔ, na sere suti ya, ya ahore su. ⁶ Ama, Nyeme yiri, yiri dada minem bo bu ahore asaaki n ahore a, yiri adada ya ahore a, Titosi baawa n dɛɛ ti. ⁷ Má ka i baawa ni ɲgumi dɛɛ ti a, ama, ahoreda n bo am ni yiri kere nyaari i n dɛɛ ti a. Wɔ se ya kabo am wara ado m na am koro ka am ɲu m barasu ni, ni kabo am ahore asaaki fa kɔ jɔɛ n su ni, ni kabo am ahore abi m busu barasu ni, nyini ma m ahore ajɔ akɔ asin su n a.

⁸ Haari nzen kadasi n bo m yo kere maari am n asaaki am ahore, ma yo má m si i n sɔ, fa kɔ nyini n dika. Nzen má m ɲuuri kabo nyini kadasi n ama am ahore asaaki, haari ni bo wɔ ce má ni, má m yoori m si i n sɔ.

⁹ Kisa m ahore ajɔ, má ka am ahore asaaki n dɛɛ ti a, ama, am ahoresaaki ni, wɔ ma am akaaki am wo n dɛɛ ti a. Nyini ahoresaaki ni, yiri ama am akaaki kabo Nyeme koro n a, adena má am kpaasi fieo, yere dɛɛ ti. ¹⁰ Dama ahoresaaki bo i ti kabo Nyeme koro ni, yiri ma ya kaaki ya wo ye ya nya tiide a, na ya yo má m si i n sɔ a. Ama, durunya n nu dɛɛ ahoresaaki n fa yiwee ba. ¹¹ Am nie sa bo Nyeme ma am ayo i a, nyini ahoresaaki n dɛɛ ti, kabo am nyunu aboro ka am yo jɔɛ n dɔɲgu na má be jaraki am ni, ni kabo yaa ti am fa kɔ yiri n bo wɔ do ɲgasi n su ni, ni kabo jɔɛ n ama sere ati am ni, ni kabo am wara ado m na am koro ka am ɲu m ni, ni kabo am ahore abi m busu ni, ni kabo am nyunu aboro ka am fa nahɔre cin i sui ni. Deke n kere nu, am akere ka am la má ɲgasi be lɛɛ, fa kɔ nyini jɔɛ n su. ¹² Deke bo i ti na m yo kereeri kadasi n maari am ni, má yiri n bo i doori ɲgasi n dɛɛ ti a, wara sɔnɔ n bo wɔ do i ɲgasi n dɛɛ ti a, ama, deke n bo i ti na m yo kereeri i sɔ n la ka, adena Nyeme ma am si kabo am cɛɛ wo ya nu ni anyumboro su barasu ni. ¹³ Nyini n kere adada ya ahore a.

Má nyini ahoreda n ɲgumi ye ya la i a, ama, deke bo i ma ya ahore ajɔ agaya n la kabo Titosi ahore ajɔ ni, dama ambere kere adada i ahore a.

¹⁴ Nyini ma ya ahore ajɔ sɔ a, dama ma du mɔ afa am afɔ kabo am ti barasu n akere yiri Titosi, na am ama ma di má nyinse. Kabo jɔɛ n kere bo ya kan kereeri am n ti nahɔre ni, sɔ ye minem koro ɲu kabo ya fɔɔri am ɲusu jɔɛ n kereeri Titosi n gusu n ti nahɔre a. ¹⁵ Deke bo i ma yiri Titosi koro am agaya ni, maala bo i tenje su kabo am kere deer i nɔanie n ni, ni kabo am deer i ni am saa nnyɔ n na sere ti am agaya na am ɲunie

subobo am ni. ¹⁶ M ahore ti joowa, dama deke n kere nu, m la ahoresi fa ko am do.

8

Aceeri n bo bu de ko maari Yerusalem dee Kristo jama n jore

¹ To, m ninbaam, ya koro ka am si kabo Nyeme ama Kristo jamam bo bu wo Makedoniya dee awore n nu n adi i ahoroma barasu ni. ² Sangga bo bu wo wahara ni kekereke nu agaya ni, na ba kere kabo bu ahore ajo ako asin su, na ba ce aceerim beberebe ni bu ahorembaa kun, haari ni bo yaari ati bu agaya ni. ³ M koro di daani ka bu maari bu fangga nyaari wo, haari ba ma atara kabo ma bu ma ni mmoo. Bu koroyanu, ⁴ na ba sere ya jande ka ya ma bere mmoo nya atin na bu saa wo nyini juma n nu, bo ya de aceerim fa ma Nyeme minem ni. ⁵ Haari na ba yo ako atara kabo ma ya sunsun ka bu yo ni. Bu du mo faari bu nu maari Mibie n wo ka, na ba nya fa bu nu ama yere gusu, kabo Nyeme koro ni. ⁶ To, kabo Titosi ti sono bo i boori ahin aceeri juma n bu am nu ni, wo yo daka ka ya sere i jande na i suyo i so ma am, haari i ko wie. ⁷ Ambere, am boro am nyi deke n kere nu wo, bere la yarada n bo am la i ni, ni kabo am koro jajo ni, ni kabo am la si ni, ni kabo am cee wo deke n kere nu ni, ni kabo am la koro ma ya ni. Kabo i ti so ni, wo yo daka ka am boro am nyi yo ahin aceeri juma n gusu.

⁸ I ti ma ka m suma am noo ka am yo so o, ama, m koro ka m kere am kabo nyingam la koro ni anyumboro na bu buka n wo, adena m yo am na m nie ka am la koro nahore su. ⁹ Am si juma kpa n bo ya Mibie Yesu Kristo yoori i ni, i yo ti ajekeso Nyeme do o, ama, ambere dee ti na wo kaaki yaarifso, adena am kaaki ajekesom Nyeme do, kabo wo kaaki yaarifso n dee ti. ¹⁰ Ahin jore n yiri, afara, ambere du mo boori nyini juma n bu a, ma ka am du mo boori i bu ni ngumi, ama, ni kabo am koroori ka am yo i n gusu ni, nyini ti, fo bo m koro ka m fa tu am n la ka, ¹¹ i ti ye ni ka am yo juma n bo am na am yo i n ko wie kisa, adena kabo am yo la anyumboro am sunsunni nu, na am koro ka am yo i ni, so ye am kere anyumboro a, na am fa deke n bo am la i n fa yo i wie. ¹² Nzen be la anyumboro na i koro ka i ce aceeri, Nyeme de i aceeri n fa ko deke bo i koro ce n su wo, ma deke bo i koro ce ma ni. ¹³ I ti ma ka ya koro ka ya yi nbem fie nu, na ambere fie wo. Ai, ama, ya koro ka i se su ma sono kere wo. ¹⁴ To, kisa am la i, na nbem la ma i ni, am buka bu. Na nzen bu gusu ba la i, na am la ma i, bu gusu buka am. So ye i se su ma sono kere a. ¹⁵ I ti kabo ba kere i Nyeme jore Kadasi n nu wo, ka,

“Bo i tambuuri beberebe ni, wo sunnu asin ma su,
ye bo i tambuuri kaan n gusu, wo kpie ma i su.”

Titosi ni i bukafom n jore

¹⁶ Ya da Nyeme asi, yiri ma Titosi nyunu aboro na i cee wo am do a, kabo mini mmoo dee ti ni. ¹⁷ Ya sere yiri Titosi ka i ba am do, na wo soro su, ama, yiri ni i tii dee koroyanu ye i na i ko a, dama i cee du mo wo am do. ¹⁸ Bo i buka i su, ya susunma ya niwa be gusu am do. I ti sono bo i yo labari kpa n juma a, nyini dee ti, Kristo jama n kere kansu i wo. ¹⁹ Ma nyini ngumi, ama, yiri ye Kristo jama n kere ayi i ka i susu ya su buka ya a, na ya nie ahin aceeri ceewa juma n su n a. Ahin juma n wura Nyeme kpiri wo, na i kere kabo ya koro ka ya buka minem ni anyumboro ni. ²⁰ Ya koro ma ka be jaraki ya fa ko kabo ya nie ahin aceeri beberebe n

su ni. ²¹ Nyini ti, ya boro ya nyi wɔ, na ya yo sa bo i kɔ atin su, má Nyeme ngumi dɔ, ama, adamande mmɔɔ dɔ.

²² Ya kaaki susunma ya niwa be buka bu su. I ti sɔnɔ bo ya yo i anie atin barasu nu, aɲu ka i la anyumboro fa kɔ deke dɔngɔ su. Kisa ya ɲu ka i la anyumboro tara sɔ, dama i la ahoresi fa kɔ am dɔ. ²³ Titosi yiri, i ti m matafɔ bo m ni yiri sanɲa yo juma ma am wɔ. Ya ninbaa nnyɔm bere yiri, bu ti minem bo Kristo jamam n asunma bu wɔ, na bu kaaki wura Kristo kpiri. ²⁴ Nyini ti, am yi am ɲu fofoe nu, na am kere Kristo jamam ni kabo am la koro ni, na bu si deke n bo i ti na ya fa am fɔ ni.

9

Kabo ya buka ya beɲu Kristofɔm bo ba fun i ni

¹ Tɔ, aceerim bo am fa kɔ buka Nyeme minem ni, mini dɔ, wɔ ti má ye ka m kere i jɔrɛ. ² Dama m si kabo am koro ka am buka barasu ni, haari ma du mɔ afa am afo Makedoniya awɔrɛ n nufɔm dɔ, ka ambere Akaya awɔrɛ n nufɔm n adu mɔ akpa am ɲu haari afara kere. Kabo am nyunu aboro na am koro ka am ce ni, wɔ yo bu dɔngɔ gusu ɲunie nyanyaka ye bu koro ka bu ce n a. ³ Nyini ye m susunma ahin ya ninbaam am dɔ n a, adena kabo ya fa am afo akere bu ni, na má i ka ngbɛɛn, ama, am yo siriya, kabo ma du mɔ ase bu ka am yo siriya ni. ⁴ Má nyini, nzen Makedoniyafɔm nbem suuri m su baari, na bu ba ɲu ka am nya yo má siriya, i ti ya nyinse wɔ, ya kan má am dɛɛ yiri, kabo ya yo am yarada n dɛɛ ti. ⁵ Nyini dɛɛ ti, ma ɲu ka wɔ yo daka ka m sere ya ninbaam ni, na bu du m mɔ am dɔ, na bu buka am, na am sese am aceeri n bo am yo sereeri ka am yi fa ma n su. Nyini ma i yo koro aceeri a, i ti má ka bu miɛ am wɔ.

⁶ Am tenge su, ka sɔnɔ bo i dɔ kaan, i bá kpɛ kaan wɔ. Na sɔnɔ bo i dɔ dɔngɔ, i bá kpɛ dɔngɔ wɔ. ⁷ Sɔnɔ kere ce aceeri n kabo wɔ du mɔ asunsun i ahore su ka i ce barasu ni, má ka bu miɛ i wɔ, ama, i mi ma ni ahorejo, dama Nyeme koro bo i ce ni ahorejo ɔ. ⁸ Yiri Nyeme ni, yiri koro ma am nya i aceeri barasu kere a, na am nya deke kere bo am koro sanɲa kere, na i se am su, na am nya i buka su, adena am koro yo juma kpa kere. ⁹ Kabo ba kere i Nyeme Jɔrɛ Kadasi n nu ni, ka,

“Wɔ sandi i aceerim afa ama jaarifɔm ni,
na i kpayo n wo bere sanɲa kere.”

¹⁰ Nyeme ti bo i ma dɔdɔrifo ni alembaa n a, na i kaaki ma minem diire na bu di a, yiri ma am alembaa n a, na i ma i sunnu buka su, na i kaaki ma am kpayo subuka su sanɲa kere. ¹¹ Na i ma am sunya beberebe deke n kere nu, adena am koro suyo kpa ma minem sanɲa kere, nyini ma minem da Nyeme asi, fa kɔ deke n bo ya yo i n su a. ¹² Ahin aceeri juma n bo am yo i ni, i ti má ka i subuka Nyeme minem bo ba fun i ni ngumi wɔ, ama, i kaaki ma minem dɔngɔ da Nyeme asi wɔ. ¹³ Ahin juma n bo am suyo i kɔ wie ni, nyini kere kabo am woowa ti barasu a. Na minem ɲu i, na bu kansɔ Nyeme kabo am ade yiri Nyeme nɔanie n na am kan kere minem nahɔrɛ, ka am su Kristo labari kpa n jɔrɛ n su ni. Bo i buka nyini n su la kabo am yo kpa, na am kpaaki am nenɲem nu ma bere ni nyinɲam kere ni. ¹⁴ Kabo Nyeme ama am anya i ahɔrɔma akɔ asin su ni, bere, bu koro am ni anyumboro na bu sere Nyeme ma am. ¹⁵ Am ma ya da Nyeme asi fa kɔ i aceeri n bo wɔ fa ama ya na i la má aɲusu ni.

10

Kabo Pɔɔlu jɔɔ fa kɔɔri i jumayoowa nyaari n su ni

¹ Mini Pɔɔlu ni m tii, m susere am wɔ, Kristo sawɔre n ni i benle woowa n deɛ ti, mini bo nbem ɲa nzen m wo am dɔ, m san nya ni, ama, nzen m wo má am dɔ yiri, m la ahore wɔ. ² Deke bo i ti na m susere am n bu la ka, m koro má ka am ma m yo ahore, sanɲa bo m ba baari am dɔ ni, na m yo ahoresi jɔɔ am, kabo m sunsun ka wɔ yo daka ka m jɔɔ bu ni, bere bo bu ɲa ya su durunya n nufɔm woowa n su ni. ³ Haari ni bo ya wo durunya n nu ni, ya kun má lue n kabo durunya n nufɔm kun lue ni. ⁴ Biesɔya neɲgem bo ya fa kun lue n ti má durunya n nu fen deɛ biesɔya neɲgem. Ama, i fite Nyeme deɛ yiko n nu wɔ, na i kunma na i saaki fanɲa woobiri kere, na i kunma na i saaki sunsunni kere bo i ti má nahɔre, ⁵ na i kunma na i saaki deke kere bo i wura i ɲu kpiri na i kanda minem na má bu si Nyeme ni, na i ma ya kunma sunsunni kere bo i ti ka ya kpɔfɔm ni, na bu de Kristo nɔaniɛ ni. ⁶ Ambere, am deeri i nɔaniɛ n wieeri, ye ya bá cin bu kere sui a, bere bo ba kete ka bu de má i nɔaniɛ ni.

⁷ Ambere, deke bo am nyumbaa ɲu i ni, nyini ye am sunsunni wo i su a. Nzen be la ahoresi ka i ti Kristo deɛ sɔnɔ, i ti ye ni ka i mi kaaki sunsun ka yere mmɔɔ ti Kristo minem wɔ, kabo yiri mmɔɔ ti ni. ⁸ Haari nzen m fɔ yanfoya tara kabo má m fɔ ni, fa kɔ yiko n bo Mibie n afa ama ya n su, i la má m nyinse, nyini yiko n ye Mibie n maari ya, ka ya fa buka am, na am kɔ mɔ ni am nyemesu ni, wɔ ma má ya ka ya fa saaki am ji wɔ. ⁹ M koro má ka i yo ka m sukere am kadasim n na m wura am sere wɔ. ¹⁰ Dama nbem bo bu kan m jɔre ni, bu ɲa, m kadasim wo nɔ na bu la fanɲa, ama, sanɲa bo mini ni m tii ba wo am dɔ, m ti sɔnɔ yɔrɔkiiwa a, kabo m jɔɔ ni, be fa yo má pui. ¹¹ I ti ye ni ka nyini minem sɔ n si ka, kabo sanɲa bo ya wo má dɔ na ya kere kadasim n nu ni, sɔ ye ya yó a, sanɲa bo ya wo am dɔ ni.

¹² Ahin minem ni, bere ni bu tii kan kere minem kabo bu ti wɔ, ama, yere yiri, ya soro sere ni bo ya fa ya ɲu bo bu su, wara na ya fa ya ɲu bu bu. Ama, kabo bu fa bu ɲu bo bu beɲgum su ni, na bu fa bu ɲu bu bu ni, nyini kere ka bu la má ɲgɔnle haari kaan sɔ leɛ. ¹³ Yere yiri, ya wura má ya ɲu kpiri, na ya fɔ tara kabo i ti ye ni ka ya fɔ ni. Ya yo kɔ jina ya juma yoobiri nyaari wɔ, deke bo Nyeme afa ama ya ka ya yo ni, haari ya yo aba aju ambere mmɔɔ dɔ. ¹⁴ Nzen má ya du má mɔ aba má am dɔ, nyini yiri, ya suyo kɔ sin ya juma yoobiri nyaari wɔ leɛ, fa kɔ ahin jɔre n su. Ama, kabo i ti ni, yere ti minem bo ya duuri mɔ a, haari bo ya ba juuri am dɔ, na ya kan Kristo labari kpa n akere am. ¹⁵ Yere, ya gusu fa má nbem juma fa fɔ má, na má ya fɔ tara ya juma yoobiri nyaari. Ama, ya la tama ka kabo am yarada subuka su ni, ya juma ni sandi bara ye am nu, kabo ya juma yoobiri nyaari ti ni. ¹⁶ Adena ya koro kɔ kan labari kpa n kere minem, bo bu wo asienm bo bu wo am nyunu dɔ ni. Ya koro má ka ya yo wura nbem deɛ juma yoobiri bo ba du mɔ ayo i n nu, na ya fa fɔ. ¹⁷ Ama, kabo ba kere i Nyeme Jɔre Kadasi n nu ni, ka, "Sɔnɔ kere bo i ɲa i fɔ, i fɔ Mibie n deɛ ti." ¹⁸ Dama má sɔnɔ bo yiri ni i tii kan kere kabo i ti ni, ye Mibie n de i ka i ti sɔnɔ kpa, ama, bo Mibie n kere ni, yiri ti sɔnɔ kpa.

11

Pöolu ni jaramasa köreföm n jöre

¹ Tö, má am soro su, na am yo sawöre ma m, na m jójo sinnzin jöre kaan so. Jande, am yo sawöre ma m. ² M si am köre kabo Nyeme si am köre ni, dama am ti m dëe nbaam wö, ka baabara bo i nya si má biesö, ye ma fa am ace biesö kun, yiri la Kristo. ³ Ama, m soro sere wö, dama nzen m tengeeri Hawa jöre n su, yiri la kabo woo n yo faari ngönletie dadakaari i na i nyaari i na i kunmaari i ni, nyini ma m soro ka beni, ambere mmöo bá mini fa kö am sunsunny nu, na am yaki Kristo dëe atin n bo am su i su, na am ahorembaa ti kun, na am woowa ti casi Kristo dö ni. ⁴ Dama nzen be ba baari am dö na i ba kaanri Yesu be jöre, na i ti má Yesu n bo ya kan i jöre kereeri am ni, wara nzen am deeri awiewie be, na i ti má Awiewie n bo am du mö deeri i ya dö ni, wara labari kpa barasu be bo i ti má bo am deeri i ni, ambere koro yo nyini sawöre na am de nyini n so a. ⁵ Bere bo bu yo bu ñu ka bu ti Kristo jaramasam na bu la má añusu ni, mini yiri, m sunsun má ka m ti kaan ni bere fieo. ⁶ Haari ni bo m ti má söñö bo i koro jójo kabo bu jójo ni, m la si yiri, ma du mö akere am ka i ti sö ö, deke n kere nu ni sanja kere.

⁷ Am aju má i? Sanja bo m ba kaanri Nyeme dëe labari kpa n kereeri am ngbëen, na ma de má deke be ni, m yoori m ñu kaan wö, na m wura am kpiri, ma do ngasi wö lëe, nzen se? ⁸ M koro se ka m yo fiinri Kristo jamam nbem wö lëe, dama m yo deeri buka bu dö ö, ye m fa ba bukaari am a. ⁹ Sanja bo m yo wo am dö na m la má pui ni, ma fa má m fie afie má be, dama ya ninbaam bo bu fite Makedoniya awöre n nu yo bukaari m ni deke kere bo wö kpie m su ni. Ma koro má ka m fa m fie fie am be deke be nu. M woori sö ö, na m toko wo sö ö lëe. ¹⁰ Kristo dëe nahöre n bo i wo m nu n dëe ti, be wo má bere bo i koro kanda m na m fö má nyini yanföya ni, Akaya awöre n kere nu. ¹¹ Nzu ti a? Ka m koro má am, nzen se? Aí, Nyeme si ka m koro am.

¹² Nyini ti, deke n bo m yo i ni, m kó su yo i sö ö, adena m tö bu atin, bere köreföm ni bo bu koro ka bu nya atin na bu fö, na bu se ka ya ni bere kere jumayoowa se ni. ¹³ Dama nyini minem sö ti jaramasa köreföm wö, bu nati bu köre wö, fa kö bu jumayoowa su, na bu yo bu ñu ka bu ti Kristo jaramasam wö. ¹⁴ Nyini n sö n ti má alekutura, dama haari Sitana ni i tii mmöo yo i ñu ka i ti mërëke bo i ta wein n wö. ¹⁵ Nyini ti, i ti má alekutura, ka i amusuifufom mmöo yo bu ñu ka bu su nahöre atin su wö. Ama, bu awieeri bá kere kabo bu jumayoowa ti a.

Kabo Pöolu diiri wahara i jumayoowa n dëe ti ni

¹⁶ M koro ka m kaaki se am bekun wö, ka má be sunsun ka m ti sinnzin wö, ama, nzen am sunsun sö yiri, am yo sawöre na am de m ka m ti sinnzin wö, adena mini mmöo koro fö kaan sö. ¹⁷ Ahin ahoresi n bo m fa fö sö ni, i fite má Mibie n dö, ama, m jójo ka m ti sinnzin wö. ¹⁸ Kabo minem döngu fö kabo durunya n nuföm yo ni, sö ye mini gusu fö n a. ¹⁹ Am aju má i? Ambere la alecira a, am mindi de minem bo bu ti sinnzin n wö, ni ahoreda a. ²⁰ Nahöre, haari minem bo bu mie am fa am yo bu akööm ni, am mindi de bu wö, wara nzen be asisi am, am mindi de i wö, wara nzen be anya am taraabiri, am mindi de i wö, wara nzen be kere i ñu am dö, am mindi de i wö, wara nzen be boori am nyöönü, am mindi

de i wɔ. ²¹ Yerɛ, ya yo má nyini n be sɔ am nu, i ti m nyinse wɔ, beni, ya yɔrɔki ya ɲu n dɛɛ ti a.

Ama, kabo nyini minem soro má sɛrɛ na bu fɔ deke kɛrɛ ti ni, mini mmɔɔ, kisa m gusu soro má sɛrɛ na m fɔ fa kɔ nyini dekem n su. Beni, am sunsun ka m jɔjɔ ka m ti sinnzin wɔ. ²² Bu ɲa bu ti Hiburufɔm wɔ? Tɔ, mini mmɔɔ, m ti sɔ ɔ. Bu ɲa bu dɛɛ la Yisarelifɔ nyemesu atin ni? Tɔ, mini mmɔɔ, m su nyini n su a. Bu ɲa bu ti Abraham anumam wɔ? Tɔ, mini mmɔɔ, m ti sɔ ɔ. ²³ Bu ɲa bu ti Kristo amusuisufɔm wɔ? Tɔ, m tara bu. Am niɛ, i ti ka m nyunu akan m ye m jɔjɔ sɔ n a. Ama, nahɔrɛ, ma yo juma atara bu, ba nyi m dansaraka bo i la má nɔ, bu boori m haari m ɲgɔɔ ba kaari kaan sɔ ɔ, sanɲa dɔɲɲu, kaan sɔ, má ma wu. Nyinin kɛrɛ nu, m tara bu. ²⁴ Kpe nnu lɛɛ bo Yudafɔm n afɛn m ɲgbere mbaa kun kun aburana kun kpɛ su. ²⁵ Kpe nsen lɛɛ bo ba fin m ni bulaari ɲgbere. Ba tu m yabue kpekun. Kpe nsan lɛɛ bo m wo lee bambakam nu tieku n su na ba sandi nu, haari na ma da tieku n nu kpekun, kɔɲɲue ni wiesu. ²⁶ M nati sɔ lɛɛ sanɲa kɛrɛ, m la má tana, ma ɲu anyumboro nzuɛtinm kpɛɛbiri, ma ɲu anyumboro minem bo bu nati fin bu bengum n saa nu, ma ɲu anyumboro m tieɲɲu minem saa nu, ma ɲu anyumboro minem bo bu ti má Yudafɔm saa nu, ma ɲu anyumboro miɛ kpirim su, ma ɲu anyumboro boro kpantainm nu, ma ɲu anyumboro tieku n su, ma ɲu anyumboro ya ninbaa kɔrɛfɔm n dɔ, berɛ bo bu yo bu ɲu ka bu ti Kristo minem ni. ²⁷ Ma yo juma nahɔrɛ su adi wahara, ma kpɛ daafiri sanɲa dɔɲɲu, ma da ahɔɛ ni nzuehɔɛ, ma fun diire sanɲa dɔɲɲu, na ayere ati m, na ma nati m ɲunie ɲgbɛɛn. ²⁸ Dekem bo ba ka ni, m kán má bu jɔrɛ, ama, deke bo i kpɛ m daafiri ale kɛrɛ bo i cin ni, yiri la kabo m sunsun Kristo jama n kɛrɛ jɔrɛ n wɔ. ²⁹ Bu nu ɲma agbaraki ye i gbarakiiwa n asa má m a? Bu nu ɲma ye bu ma i yo satie ye i yo má m yaa?

³⁰ Tɔ, sanɲa bo wɔ daka ka m fɔ, m fɔ fa kɔ dekem bo bu kere ka m la má fanɲa n su wɔ. ³¹ Nyeme si ka m bu má kɔrɛ, yiri ti ya Mibie Yesu Si a, yiri ti ye ni ka ya kansɛ i sanɲa kɛrɛ a. ³² Sanɲa bo m yo woori Damasiko miɛ kpiri n nu ni, na gomina be wo berɛ, yiri ye Fɛmɛ Aretasi yo faari miɛ n yiko wurari i saa nu, na nyini gomina n ama tintinjinafɔm n akɔ aɲminda miɛ n ka bu tara m. ³³ Ama, na minem n afa m awura kandie bambaka nu, na ba fa m accɔndi kobe n tukoro nu, ajura asiɛɲɲu, na ma foro gomina n saa nu.

12

Sayikereewa n ni deke n bo Pɔɔlu ɲuuri i ka alɛɛ nu n jɔrɛ

¹ Tɔ, wɔ yo daka ka m fɔ, haari ni bo i la má kperɛ be ni. M la deke nbem bo m kan buka su, berɛ la kabo Nyeme yiiri deke nbem kereeri m ka alɛɛ nu ni, ni kabo i yiiri sayoowam kereeri m ni. ² M si sɔnɔ be jɔrɛ, i ti Kristo sɔnɔ ɔ, yiri ye Nyeme yo faari i fun kɔɔri anɲoro woobiri nsan su ni i dɔ n a, i nyuma afɔ buru ni nna lɛɛ. Nzen i kɔɔri ni i ɲuniembaa a, wara i awiewie nu, mini, m si má, Nyeme si a. ³⁻⁴ Nahɔrɛ, m si nyini sɔnɔ n jɔrɛ, yiri ye Nyeme faari i fun kɔɔri aleɛɛma nu n a, na wɔ ti jɔrɛm bo bu la má kan, na be gusu la má atin ka i jɔjɔ bu, ama, kabo i yoori ni, ma si má, nzen i kɔɔri ni i ɲuniembaa a, wara i awiewie nu, mini, m si má, Nyeme si a. ⁵ Tɔ, nyini sɔnɔ n sɔ, ye m fa fɔ n a, ama, mini ni m tii, m koro fɔ má deke be ti, má ka dekem bo bu kere ka m la má fanɲa n ye m

fa fö a. ⁶ Haari nzen má m ña m fö mmöö, má m ti má sinnzin wö, dama má m kan nahöre wö. Ama, m yaki i sö ö, adena má am be wura m kpiri tara dekem bo i ñu ka m yo bu, ni dekem bo i ti ka m kan bu ni.

⁷ Tö, fa kö sayikereewa beberebe n bo Nyeme fa kereeri m su, wö koro má ka nyini ðe ti na m wura m ñu kpiri. Nyini ti, i maari Sitana faari töre be wurari m ñuniembaa nu, i ti ka buwe ye i wöwö m a, na i sukere m wahara, adena má m wura m ñu kpiri. ⁸ Kpe nsan lee bo ma sere Mibie n fa kö ahin jöre n su, ka i ma i fite yaki m. ⁹ Ama, na wö se m ka, “M ahöröma n ase u su, dama sanja bo a la má fanja ni, ye m kere m yiko kabo m koro a.” Kabo i seeri sö n ðe ti, nyini ma m la ahoreda na m fö fa kö kabo m la má fanja n a, adena Kristo yiko n wo m dö sanja kere a. ¹⁰ Nyini ma Kristo ðe ti ye m ahore ti daawa n a, sanja bo m la má fanja n a, ni sanja bo bu kpie m nzukö ni, ni sanja bo m ñu kekere ni, ni sanja bo bu kere m wuwuruwa ni, ni sanja bo m ñu anyumboro ni. Dama sanja bo m la má fanja ni, nyini sanja n ye m la yiko Nyeme dö a.

Kabo Pöolu kereeri ka bu jöre kpie i daafiri ni

¹¹ Tö, kabo m jöjö ni, ma yo ka sinnzin wö lee, ambere mie m a, ye m yo sö n a. Má ambere ti minem bo am kan kereeri kabo m ti n a, má i ti ye. Dama bere n bo bu yo bu ñu ka bu ti Kristo jaramasam na bu la má anjusu ni, mini yiri, haari ni bo m ti má pui ni, m ti má kaan ni bere fieo. ¹² Nahöre, sam bo bu kere ka m ti jaramasa ni, ye m yoori bu am dö n a, ni mindi kere, ni alekutura sam, ni yiko sam, ni abonö sam n a. ¹³ Nzu deke ye m yo maari Kristo jamam bo bu wo mie nyingam su n ye ma yo ama má am a? Má ka bo ma fa má m fie be afie má am ni. Tö, ma do ngasi, am fa ce m.

¹⁴ Am ti fen, kisa ma sese m ñu su ka m ba nie am busu kpe nsan su lee, ama, m toko koro má ka m ba fa m fie fie am. M suba má ka m koro am nenge be wö, ama, m koro ambere wö. Dama má nbaam kpini nengem se bu wuföm a, ama, bu wuföm ni kpini se bu nbaam n a. ¹⁵ Mini, deke bo m la i ni, m di i ka a, na m fa buka am, na m fa m ñu kere ma am, nyini ma m ahoreda. Ma si má, m koro am agaya n sö n ðe ti, ye ambere koro m kaan sö n a? Ai, atin wo má nu. ¹⁶ Tö, am nbem ña ma fa má m fie be afie má am, ama, bu ña m fa ngönletie wö, na ma dadaka am anya am taraabiri. ¹⁷ Ka se? Minem bo m yo sunmaari bu am dö ni, m ma bu be sisiiri am be maari m, nzen se? Ai, be asisi má am ama má m. ¹⁸ M yo sereeri Titosi wö, na wö ba am dö, na ma ma ya niwa n asunma i. Titosi yo sisiiri am, nzen se? Ai, wö sisi má am. Ambere mmöö anju ka m ni yiri kere sunsunni ti kun wö, na ya kere su atin kun su a.

¹⁹ Beni, nyini n kere bo ya jöjö i sö ni, am sunsun ka ya sukan de ya tii wö, nzen se? Ai, i ti má sö. M ninbaa koroowam, kabo ya ni Kristo ayo kun na ya jina Nyeme nyunu n ye ya se sö n a. Deke n kere bo ya yo i ni, i buka am na am kö mö ni am nyemesu n wö. ²⁰ M soro sere wö, m koro má ka m ba baari am dö, na má m ba tu am kabo m koro ka m ti ni, wara na ambere gusu ñu m kabo má am koro ka m ti ni. M soro sere ka, beni, m bá ñu ka, am suse akuruwa, na am susi kore, na am sufa yaa, na am suyo anyii sam, na am sukan am benju jöre susaaki bu, na am sukpara tere, na am suyo kpirikoro, na am la kpakpaakinu. ²¹ M soro sere ka m ba juuri, na má Nyeme ma m yo m ñu kaan am nyunu, na má m ahore saaki fa ma bu, bere bo ba du mö ayo satie, na bu nya kaaki yaki má bu dangba sayoowam, ni sakaraya, ni konvikiya ngbeennngbeennm ni.

13

Awieeri su dɛɛ bɔbɔwa ni anse ni

¹ Tɔ, ahin baawa n bo m sɔba ni, yiri yo m kpe nsan su bo m ba niɛ am busu a. Kabo ba kɛrɛ i Nyemɛ Jɔrɛ Kadasi n nu ni, ka, “Jɔrɛ kɛrɛ bo ba kan i na i ti nahɔrɛ, mǎ ka mine nnyɔ, wara mine nsan adi i daani.”

² Saɔga bo m yo baari am dɔ ba niɛeri am kpe nnyɔ su ni, m yo bɔbɔri am nbem. Kisa na m wo mǎ am dɔ ni, m koro ka m bɔbɔ bu bekun fa kɔ nyini n su, ka nzen m baari, m yǎki mǎ bere n bo bu yo yoori satie ni, ni bo bu buka bu su kisa n kɛrɛ. ³ Dama am ŋa am koro ka am ŋu deke bo i kere ka Kristo fa m su, ye i jɔjɔ am dɔ sɔ a. Tɔ, am anju ka yiri ti mǎ bo i la mǎ faɔga, ama, i la yiko am nu. ⁴ Nahɔrɛ, saɔga bo bu yo kpamaari i baka jaanu n su ni, i yo la mǎ faɔga, ama, haari ni nyini n kɛrɛ, kisa i la ŋgɔɔ wo bere, Nyemɛ dɛɛ yiko n dɛɛ ti. Sɔ ye i ti a, yere bo ya ni yiri kere ayo kun ni, yere mmɔɔ la mǎ faɔga lɛɛ, ama, Nyemɛ yiko n dɛɛ ti, ye ya ni yiri sɔwo a, na ya yo juma ma am.

⁵ Ambere ni am tii, am fiiti am ŋu na am niɛ ka am woowa kere ka am ayo yarada nahɔrɛ su, wara am ayo mǎ. Am si mǎ ka Yesu Kristo wo am dɔ ɔ, nzen se? I wo am dɔ yiri, ŋka am woowa kere ka am ayo mǎ yarada nahɔrɛ su wɔ. ⁶ M la tama ka am bǎ si ka, yere, ya ti mǎ bo bu woowa kere ka ba yo mǎ yarada nahɔrɛ su ni. ⁷ Haari ni nyini mmɔɔ, ya sere Nyemɛ ma am wɔ, ka, mǎ am yo sa be bo i kɔ mǎ atin su, mǎ ka ya koro ka mine ŋu ya woowa na i kere ka ya yo yarada nahɔrɛ su, ama, ya koro ka am yo sa bo i ti kpa a, haari nzen mǎ minem ŋu ya woowa na i kere ka ya yo mǎ yarada nahɔrɛ su. ⁸ Yere, ya koro yo mǎ deke bo i jaraki nahɔrɛ ni, ama, ya yo deke bo i su nahɔrɛ ni ŋgumi su a. ⁹ Ya ahore ti jɔɔwa a, saɔga kɛrɛ bo ya la mǎ faɔga, na ambere la yiko Nyemɛ dɔ. Ahin n ye ya sere Nyemɛ ma am a, ka, i ma am woowa yo kabo i koro ni. ¹⁰ Nyini mmɔɔ dɛɛ ti, ye m wo mǎ am dɔ ye m sukere am ahin kadasi n sɔ n a, adena m ba baari am dɔ, na mǎ m fa Mibiɛ n yiko n fa yi am anyumbo, nyini yiko n ye i maari m ka m fa buka am, na am kɔ mɔ ni am nyemesu n a, wɔ ma mǎ m ka m fa saaki am ji wɔ.

¹¹ M ninbaam, jɔrɛ bo wɔ ka n la ka, am ma am ahore jɔ, am boro am nyi na am wo wo kpa, am ti kabo m sereeri am ni, am la anɔɔse ni am bengum, am wo ni tanalaifiɛ. Nyemɛ ti tanalaifiɛ ni korofɔ a, yiri wɔ am dɔ a. ¹² Am bisa am beɔgu dɔɔɔgu ni koro. Nyemɛ minem kɛrɛ bo bu wo fen n bisa am kɛrɛ dɔɔɔgu.

¹³⁻¹⁴ Ya Mibiɛ Yesu Kristo dɛɛ ahɔrɔma ni, ni Nyemɛ dɛɛ koro ni, ni Awiewie Casi n dɛɛ wo fie n wo am kɛrɛ dɔ.

Pɔɔlu kadasi bo i kɛrɛ fa maari GALATIYAFOM ni

1-2 Mini Pɔɔlu bo m ti Yesu Kristo jaramasa n ni ya ninbaam bo bu wo m do fen n kɛrɛ, sukɛrɛ ahin kadasi n ma ambɛrɛ Kristo jama minɛm bo am wo Galatiya dɛɛ awɔrɛ n nu n wɔ. Yesu Kristo ni ya Si Nyɛmɛ bo i tɛŋgeeri Kristo i yiwee n nu ni, afa m ayo i jaramasa, mǎ adamande yoori m a, bekun mǎ minɛm gusu faari juma n maari m a.

³ Ya Si Nyɛmɛ, ni ya Mibie Yesu Kristo buka am, na bu ma am ahoreda.

⁴ Ya Si Nyɛmɛ koroyanu n dɛɛ ti, na wɔ ma Yesu ade ya jinaabiri awu ya satie dɛɛ ti, adena i de ya fite ahin durunya tie n bo ya wo nu n nu. ⁵ Yiri ti ye ni ka minɛm kɛrɛ kansi i sanja kɛrɛ sanja. Ami.

Labari kpa kun n kpein n wo bɛrɛ a

⁶ Am jɔrɛ amie m bo m si mǎ kabo m kan. Kristo dɛɛ aɗunfo si ti, ye Nyɛmɛ afere am ka am ba su i, wɔ nya cɛ mǎ, ye am akaaki am sin abo i ndende, susu labari barasu be bo i wo i ŋgumi ni labari kpa n ni. ⁷ Labari kpa nyiŋga be wo mǎ bɛrɛ, deke bo i ti na m se so n la ka, minɛm nbem koro ka bu ta am nyi wɔ, na bu fa kereewa barasu nbem kaaki Kristo labari kpa ni. ⁸ Ama, haari nzen yɛrɛ be, wara nzen Nyɛmɛ mɛrɛke be fiteeri aŋgoro ba kaanri labari barasu be, na i ti mǎ kabo ya du mɔ kaanri i ni, Nyɛmɛ yó i mi ŋgbɛn. ⁹ Kabo ya du mɔ ase am ni, nyini ye m kaaki suse am bekun n a, ka, nzen be ba kaanri labari barasu be bo i wo i ŋgumi ni bo am ade i ni, Nyɛmɛ yó i mi ŋgbɛn.

¹⁰ Bu ŋa m suyo ni juma n ka mine kansi m wɔ, ama, i ti mǎ so, m koro ka m yo bo Nyɛmɛ kansi m wɔ, m suyo mǎ sa bo mine se ka m ti kpa. Nzen mǎ m ŋa m yo sa bo i sun mine nu, mǎ m koro yo mǎ Kristo akɔɔ.

Kabo Pɔɔlu ba yoori Kristo jaramasa barasu ni

¹¹ M ninbaam, m koro ka am si ka labari kpa n bo m kaanri i jɔrɛ kereeri am ni, i ti mǎ deke bo i fite adamande sunsunni nu wɔ. ¹² I ti mǎ ka m deeri i fiteeri adamande do ɔ, mǎ be gusu kaaki fa kereeri m a. Ama, Yesu Kristo ni i tii yiiri i kereeri m a.

¹³ Am yo tiiri kabo m woowa yo ti barasu, sanja bo m yo suuri Yudafoɗ dɛɛ atin n su ni. M yo kereeri Kristo jama n wuwuruwa agaya, na mǎ m butu bu. ¹⁴ M yo suuri Yudafoɗ atin n su nahɔrɛ su taraari m sara sufom doŋgu bo bu su nyini atin n su ni. M nyunu yo boroori agaya kabo m yo na m su ya nana sayoowam su. ¹⁵ Nyɛmɛ ahɔrɔma n dɛɛ ti, sanja bo bu nya wu mǎ m ni, ye i yiiri m ka m yo i juma n a. Sanja n bo i suunri Nyɛmɛ nu n ba juuri ni, ¹⁶ na wɔ yi i Wa n akere m, adena m ko kan i labari kpa n jɔrɛ kere minɛm bo bu ti mǎ Yudafoɗ ni, ye ma ko mǎ be do na i ko kere m kabo m yo n a. ¹⁷ Ma kaaki akɔ mǎ Yerusalem mie kpiri n nu na m ko ŋu minɛm bo bu du mɔ ti Kristo jaramasam ni. M kɔɔri Arabiya asien n su wɔ, na ma fite do, na ma nya akaaki akɔ Damasiko mie kpiri n nu. ¹⁸ I dɛɛ afo nsan sin, na ma ko Yerusalem ka m ko nie Kefasi busu, yiri bo bu kaaki fere i ka Petoro ni, na ma ko awo i do cɛɛn buru ni nnu. ¹⁹ Sanja bo m woori do ni, ma ŋu mǎ Kristo jaramasam n be abuka mǎ su, mǎ ka Yakobo, ya Mibie niema ni.

²⁰ Nɔɔnɛ n bo m sukere ma am ni, i ti nahɔre wɔ, m bu má kɔre. Nyeme ti m daanifo a. ²¹ Nyini sin na ma fite Yerusalem, na ma kɔ Siriya ni Silisiya dɛɛ awɔrem n nu. ²² Nyini sanɔa Kristo jamam n bo bu wo Yudiya awɔre n nu n be nya ɔu má m na bu ba si m, ²³ se ba ti ka mine ɔa, “Ahin sonɔ n yo kere ya wuwuruwa a, na i kun mine bo ba de Kristo labari kpa n na i mini bu, kisa i nati kan labari kpa n jɔre kere mine wɔ.” ²⁴ Deke n bo Nyeme ma m koro yoori i n dɛɛ ti, na ba kansi Nyeme.

2

Pɔɔlu ni i beɔgu jaramasa nbem jɔre

¹ Sanɔa bo ya fite Yerusalem mie kpiri n nu ni, i afo buru ni nna sin, na m ni Banabasi akaaki akɔ do bekun, na ya fa Titosi abuka ya ɔu su. ² Deke n bo i ti na m kɔɔri n la ka, Nyeme kereeri m ka m kɔ a. Na m ni Kristo jama nkpienkpienm n atien ya nɔɔ ya ɔgumi deke be, na ma kan ateke bu nyi, akere bu fa kɔ labari kpa n jɔre bo m kan kere minem bo bu ti má Yudafoɔ ni. Dama ma koro má ka juma n bo m suyo i n kere ka ɔgbɛɛn. ³ To, haari ni bo Titosi yo woori m do na i ti má Yudafoɔ ni, ba mie má i ka i wura kenkenne. ⁴ Ama, be abisa má ya i jɔre be, se mine nbem ba sanɔaari ya nu, bu yo bu ɔu ka bu ti Kristo dɛɛ minem wɔ. Bere seeri ka wo yo daka ka i wura kenkenne n a. Bu faari bu ɔu mataari ya a, adena bu nie kabo Yesu Kristo dɛɛ ti na ya nya ya tii ni. Má bu koro ka ya su nɔɔnɛ kpamaawa n su wɔ, na ya yo akɔɔm. ⁵ Ama, na ya fa nu, ya ma má bu anyunu fieo, adena má be kaaki i sin bo labari kpa n bo i ti nahɔre, na ya kan kere am su. ⁶ Bere n bo mine bu bu ka bu ti nkpienkpienm ni, m cɛɛ awo má bu nu ka bu ti nkpienm, dama Nyeme tambu má nu, nyini nkpienkpienm n gusu ala má kaakiwa bo bu kaaki m fa kɔ m labari kpa n su. ⁷ Se deke bo bu ɔuuri i n la ka, Nyeme ye wɔ yi m ka m kan i labari kpa n jɔre kere minem bo bu ti má Yudafoɔ n a, kabo wo yi Petoro ka i kan i labari kpa n jɔre kere Yudafoɔ ni. ⁸ Dama Nyeme ama m yiko ka m kan i labari kpa n jɔre kere minem bo bu ti má Yudafoɔ ni, kabo wo ma Petoro yiko ka i kan i labari kpa n jɔre kere Yudafoɔ ni. ⁹ Na Yakobo, ni Petoro, ni Yohane bo mine bu bu ka bu ti Kristo jama mɔfoɔm n aɔu ka, Nyeme ama m nyini juma n ka m yo i a, nyini dɛɛ ti, na ba fa bu saa awura m ni Banabasi saa nu, na ba de ya ni bu saa nnyo. Na ya kere asoro su ka m ni Banabasi kɔ yo juma ni minem bo bu ti má Yudafoɔ ni, na bere gusu kɔ yo juma ni Yudafoɔ ni. ¹⁰ Ama, jɔre n bo bu seeri ya n la ka, má ya wara fi yaarifom sa. Nyini ye m yo la anyumboro ka m yo i a.

Kabo Pɔɔlu jarakiiri Petoro barasu ni

¹¹ Ama, Petoro ba baari Antiyoki mie kpiri n nu na ma jaraki i, ma fie má i su, dama sa n bo i yoori i ni, wɔ kɔ má atin su. ¹² Sanɔa bo i du mɔ ba tuuri ya ni, i ni ya ninbaa Kristofom bo bu ti má Yudafoɔ ni sanɔa di diire a. Na mine nbem afite Yakobo do aba ka bu ba nie ya busu. Bu ba juuri ni, na wɔ cin i ɔu afite minem bo bu ti má Yudafoɔ n nu. I ni bere asanɔa adi má diire kun, dama i soro Yudafoɔm n ahore wɔ. ¹³ I yoori so ni, na Yudafoɔ nyinɔam bo bu wo Antiyoki n gusu ayo kabo i yoori ni. Bu si kabo má bu yo, ama, ba yo má so. Na Banabasi gusu ason bu su. ¹⁴ M ɔuuri ka bu su má Yesu labari kpa n bo i ti nahɔre n su ni, na ma se Petoro jama n kere nyunu ka, “Wɔɔɔ, a ti Yudafoɔ ɔ, ama, u woowa ti ka bo bu ti

má Yudafoṃ wɔ. Ye nzu ti ye a koro ka a miɛ minem bo bu ti má Yudafoṃ na bu wo kabo Yudafoṃ wo barasu n a?"

Yarada dɛɛ ti ye sɔnɔ kɛɛ nya tiide a

¹⁵ Nahɔɛ, ya fiteebiri, yɛɛ ti Yudafoṃ wɔ, ya ti má minem bo bu su má Nyɛmɛ na ya fere bu ka satieyofom ni. ¹⁶ Ya si ka na nzen sɔnɔ yo Yesu Kristo yarada, ye Nyɛmɛ de i mi ka i yo sa bo i kɔ atin su i dɔ a, ama, i ti má ka i mi su Nyɛmɛ nɔanie kpamaawa n su, ye Nyɛmɛ de i ka i yo sa bo i kɔ atin su i dɔ a. Tɔ, ye yɛɛ gusu ayo Yesu Kristo yarada, adena Nyɛmɛ de ya ka ya yo sa bo i kɔ atin su i dɔ, i ti má ka ya su nɔanie kpamaawa n su n dɛɛ ti a. Dama be wo má bɛɛ bo i su nɔanie kpamaawa n su na Nyɛmɛ de i ka wɔ yo sa bo i kɔ atin su i dɔ. ¹⁷ Kabo ya boro ya nyi na ya su Kristo su na Nyɛmɛ de ya ka ya yo sa bo i kɔ atin su i dɔ ni, nyini kere ka yɛɛ Yudafoṃ gusu ti satieyofom ka minem bo bu ti má Yudafoṃ ti n wɔ. Ama, nyini n sukere má ka Kristo subuka minem na bu yo satie wɔ lɛɛ. Ai, i ti má sɔ. ¹⁸ M yo su nɔanie kpamaawa n su wɔ, ama, ma yaki i, nzen kisa na m ŋa m kaaki bo i bu su i su bekun, nyini sanja, ma fa m ŋu ayo satieyofom lɛɛ nahɔɛ su.

¹⁹ Mini dɔ, fa kɔ nyini nɔanie kpamaawa n su, i yo m ka ma wu wɔ, m su má i su kun, adena m nya ŋɔɔ Nyɛmɛ dɔ. I ti ka m ni Yesu Kristo asanja awu baka jaanu n su a. ²⁰ Ahin ŋɔɔ n bo m la i ni, durunya n nu fɛn ni, yiri Nyɛmɛ Wa n koro m dɛɛ ti, na wɔ wu ama m, na ma yo i yarada, nyini dɛɛ ti ye m la ŋɔɔ n a. ²¹ Ma kete má kabo Nyɛmɛ ayo ya sakpa akere i koro barasu ni. Ama, deke bo m suse n la ka, nzen sɔnɔ ŋa i su nɔanie kpamaawa n su, na nyini kere ka wɔ yo sa bo i kɔ atin su Nyɛmɛ dɔ, nyini la ka, yiwee n bo Kristo wuuri i n ti ŋgbɛɛn wɔ lɛɛ.

3

Nɔanie kpamaawa n ni yarada jɔɛ

¹ Ambɛɛ Galatiyafom, am la má ŋɔnɔlɛ wɔ. Nja adadaka am a? M yo seeri am, kabo Yesu Kristo wuuri baka jaanu n su barasu ni, ma fie má am su. ² Am ma m bisa am ahin bisaawa ni, am suuri nɔanie kpamaawa n su n dɛɛ ti, ye am deeri Nyɛmɛ Awiewie Casi n a? Wara nzen bo am tiiri Yesu labari kpa n jɔɛ na am yoori yarada n dɛɛ ti, ye am deeri i a? ³ Nzu ti ye am la má ŋɔnɔlɛ sɔ a? Am boori i bu ni Awiewie Casi n wɔ, ye i baari sɛ ye am koro ka am fa m fanja wiewie i a? ⁴ Deke n kɛɛ bo Nyɛmɛ ayo i na am anju i n ti ŋgbɛɛn wɔ lɛɛ, nzen sɛ? Mini dɔ, i ti má ŋgbɛɛn. ⁵ Bo am ati labari kpa n na am ayo yarada n dɛɛ ti, ye Nyɛmɛ afa i Awiewie n ama am, ye Nyɛmɛ yoori alekutura sam am nu a, nzen bo am su nɔanie kpamaawa n su n a?

⁶ Nyini ye ba kɛɛ i Nyɛmɛ Jɔɛ Kadasi n nu ka, "Abraham yoori Nyɛmɛ yarada n dɛɛ ti, ye Nyɛmɛ ade i ka i yo sa bo i kɔ atin su i dɔ n a." ⁷ Nyini kere ya ka, bo ba yo Nyɛmɛ yarada ni, bɛɛ ti Abraham busu nufom nahɔɛ su a. ⁸ Nyɛmɛ Jɔɛ Kadasi n kere ka, minem bo bu ti má Yudafoṃ bá yo Nyɛmɛ yarada, na i de bu ka ba yo sa bo i kɔ atin su i dɔ. Nyɛmɛ du mɔ kaanri labari kpa n jɔɛ kereeri Abraham wɔ, na wɔ se i ka, "Wɔɔ dɛɛ ti, ye m yó adamande kere kisi a." ⁹ Nyini ti, sɔnɔ kere bo i yo yarada, Nyɛmɛ yó i kisi, kabo Abraham yoori yarada, na Nyɛmɛ yoori i kisi barasu ni.

¹⁰ Sɔnɔ kɛɛ bo i su nɔanie kpamaawa n su na i sunsun ka Nyɛmɛ dé i ka wɔ yo sa bo i kɔ atin su, Nyɛmɛ nɔɔ dí i mi. Dama ba kɛɛ i Nyɛmɛ Jɔɛ

Kadasi n nu ka, “Nyeme nɔɔ dɛ sɔnɔ kere bo i ɲa i su nɔɔniɛ kpamaawa n su, na i su má i kere kpakpati su kɔ wie má.” ¹¹ Ya si ka, má ka sɔnɔ su nɔɔniɛ kpamaawa n su ye Nyeme de i mi ka i yo sa bo i kɔ atin su i dɔ a. Dama ba kere i Nyeme Jɔre Kadasi n nu ka, Nyeme ɲa, “Sɔnɔ bo i yo sa bo i kɔ atin su m dɔ, i nyá ɲɔɔ, i yarada n dɛɛ ti.” ¹² Nɔɔniɛ kpamaawa n wo bere i ɲgumi, na yarada n bo ya yo Nyeme n gusu wo bere i ɲgumi. Ba kere i Nyeme Jɔre Kadasi n nu ka, “Sɔnɔ kere bo i su nɔɔniɛ kpamaawa n kere su, i mi nyá ɲɔɔ.” ¹³ Ama, sɔnɔ kere bo i su nɔɔniɛ kpamaawa n su, Nyeme nɔɔ dɛ i mi, nyini dɛɛ ti ye Kristo kaari ɲgbɛɛn wuuri baka jaanu n su deeri ya tii jiri n a. Dama ba kere i Nyeme Jɔre Kadasi n nu ka, “Nyeme yó sɔnɔ kere bo ba sense i baka n su ɲgbɛɛn.” ¹⁴ Deke n bo i ti na Yesu Kristo wuuri nyini yiwee n la ka, nɔɔniɛ n bo Nyeme diiri i di ni Abraham ka i yó minem bo bu ti má Yudafoɔm kisi ni, nyini dɛɛ ti, nzen ya yo Kristo yarada, Nyeme ɲa i ma ya Awiewie Casi n bo wo di i di ka i fa ma ya ni.

Sesesu n bo Nyeme diiri i di ni Abraham n jɔre

¹⁵ M ninbaam, m koro ka m fa adamande woowa n m fa kere kabo Nyeme woowa ti barasu. Nzen mine nnyɔ afa sesesu adi i di ka bu yo deke be, sɔnɔ wo má bere bo i koro kete i, wara i kaaki i. ¹⁶ Nyini ti, Nyeme diiri nyini di n ni Abraham ni i busu nufɔ n wo, wo se má ka i busu nufɔm kere, ama, i ɲa i busu nufɔm kun, yiri la Kristo. ¹⁷ Deke bo m suse n la ka, Nyeme yo faari sesesu wo, na wo di i di ni Abraham ka i yo i. Na i dɛɛ afo yaa nna ni afo aburasan sin, na wo fa i nɔɔniɛ kpamaawa n ama Moyisi, ama, sesesu n bo wo du mo adi i di ni, i koro saaki má i. ¹⁸ Sesesu n bo Nyeme diiri i di n dɛɛ ti, ye Nyeme ceeri Abraham aceeri n a. Má ka bo i su nɔɔniɛ kpamaawa n su dɛɛ ti ye i ce i aceeri n a.

¹⁹ Nzen i ti sɔ, nzu ti ye Nyeme ma Moyisi yo faari i nɔɔniɛ kpamaawa n maari minem a? Nyeme koro ka mine si kabo satie n ti wo, ye i faari i nɔɔniɛ kpamaawa n maari a, fa kɔ ju sanɲa bo Abraham busu nufɔ ni bá ba. Yiri ye Nyeme diiri i di ni Abraham n a. Nyeme yo faari i nɔɔniɛ kpamaawa n maari i merékem wo, na ba kan akere Moyisi bo i wo Nyeme ni i minem afien, na i gusu anya akan akere minem ni. ²⁰ Nyeme yo faari i nɔɔniɛ kpamaawa n maari merékem, ni Moyisi wo, ye bu kan kereeri minem a, ama, sesesu n bo Nyeme yo diiri i di ni Abraham ni, be wo má bu afien, se Nyeme ɲgumi.

Deke n bo i ti na Nyeme faari i nɔɔniɛ kpamaawa n maari i ni

²¹ Nɔɔniɛ kpamaawa n kete dekem bo Nyeme seeri ka i yó i ni, nzen se? Ai, i kete má. Nzen má nɔɔniɛ kpamaawa n be wo bere bo i koro ma ɲɔɔ, nyini la ka, nzen sɔnɔ suuri nɔɔniɛ kpamaawa n su, ye Nyeme de i ka i yo sa bo i kɔ atin su i dɔ a. ²² Ama, ba kere i Nyeme Jɔre Kadasi n nu ka, sɔnɔ kere ti satieyofɔ ɔ, adena minem bo bu yoori Yesu yarada ni, bere nyá deke n bo Nyeme seeri ka i fá ma yaradayofɔm n a. ²³ Sanɲa bo Yesu nya ba má na ya yo i yarada ni, ya yo su nɔɔniɛ kpamaawa n su a, nyini nɔɔniɛ kpamaawa ni, i kere ya kabo ya yo, ye i nie ya su a, haari ba fa juuri sanɲa n bo Yesu baari na ya yo i yarada ni. ²⁴ Nyini ti, kana Yesu bá ba ni, nɔɔniɛ kpamaawa n ti ka sɔnɔ bo i bita ya a, haari na Yesu aba aba, adena Nyeme de ya ka ya yo sa bo i kɔ atin su i dɔ, ya yarada n dɛɛ ti. ²⁵ Ama, ahin sanɲa n bo ya yo Yesu yarada ni, nɔɔniɛ kpamaawa n bita má ya kun. ²⁶ Ambere kere bo am ayo Yesu Kristo yarada ni, nyini dɛɛ ti

ye am ayo Nyeme nbaam a. ²⁷ Ambere kere bo bu biɛeri am Nyeme nzue ni, am ni Kristo ayo kun ɛɛ, nyini kere ka am ade i deɛ woowa n wo ɛɛ. ²⁸ Nyini ti, kabo am ni Kristo ayo kun ni, am kere ti deke kun wo ɛɛ. Bo bu ti Yudafom ni bo bu ti má Yudafom, bo bu ti akoonbaam ni bo bu ti má akoonbaam, nbiɛsom ni nbaram kere akaaki deke kun wo ɛɛ. ²⁹ Kisa am ti Kristo deɛ minem wo, nyini la ka, am ti Abraham busu nufom wo, bo am nya deke n bo Nyeme seeri ka i fá ma i minem ni.

4

¹ Deke n bo m suse am la ka, awurubaa bo i bá di i si nenje n kere aja, na i nyunu nya ti má ni, i ni akooɓaa ti kun wo, haari bo i si aja n kere ti i deɛ ni. ² Saɗga bo i toko ti kaan ni, i wo i minem saa nu wo, ye bu nie i su a, haari fa ko ju saɗga bo i si seeri ka i di aja ni. ³ Ya gusu yo ti so ɔ ɛɛ, dama saɗga bo ya yo si má Yesu jore ni, ya yo ti akoom wo, fa ko durunya n nu satie yoowam su. ⁴ Ama, saɗga n ba juuri ni, na Nyeme asunma i Wa, na ba wu i kabo bu wu adamande ni, noanie kpamaawa ni bita i a, ⁵ adena i koro de minem bo noanie kpamaawa n bita bu n tii ji, na bu yo Nyeme nbaam nahore su.

⁶ Ya ti Nyeme nbaam deɛ ti ye i sunmaari i Wa n deɛ Awiewie n ka i ba wura ya ahorembaa su. Nyini ti, ye ya koro bo fere Nyeme ka, “*Abba*,” i bu la ka, “*M Si*.” ⁷ Nyini ti, a ti má akoo kun, a ti Nyeme wa a. Nzen a nya ti Nyeme wa, nyini la ka, i má u deke n kere bo i fa ma i nbaam ni.

Kabo Pɔɔlu ceɛ woori Galatiyafom nu ni

⁸ Saɗga bo am nya si má Nyeme ni, am yo suuri dekem bo bu ti má Nyeme n wo, ye am ayo bu akoom a. ⁹ Ama, kisa, am asi Nyeme, wara yiri Nyeme asi am. Nzu ti ye am koro ka am kaaki am sin bo Nyeme a, na am su durunya n nu satie yoowam, bo bu la má faɗga n su a? Nzu ti ye am koro ka am yo bu akoom na am kaaki su bu bekun a? ¹⁰ Am nyunu aboro ceenkpirim ni yoowam n su a, bere la yoowa n bo am bu lemoɓe kere ni, ni bo am yo i sara kere ni, ni bo afo ba ye na am yo bu ni. ¹¹ M koro má ka juma n kere bo ma yo i ama am n ka ngbeɛn, nyini ti ye am sayoowa kpie m daafiri ceɛn kere n a.

¹² M ninbaam, m suser am wo, am ma am woowa ti kabo m woowa ti barasu ni, dama m woowa ti kabo am woowa ti n wo. Am ado má mini ngasi be. ¹³ Am si ka saɗga bo m du mo ba kaanri labari kpa n jore kereeri am ni, m yo la má laifie n deɛ ti, ye m koro nyaari atin a. ¹⁴ Haari ni bo m yo la má laifie n kere ni, na i yoori kekereke ma am ni, am akete má m, abu má m ngbeɛn, ama, am deeri m ni am saa nnyo ɔ, kabo má am de Nyeme mereke wara Yesu Kristo barasu n wo. ¹⁵ Nzu ti ye kisa am ahore ti má joowa kabo i yo ti dawa n a? Nyini saɗga ni, mini mmoo ni m tii si ka, nzen má m yo seeri ka am lokoti yi am nyumbaa fa ma m, na má am koro yo i, má am yo i wo. ¹⁶ Bo m tu am fo seeri am nahore n deɛ ti, ye kisa ma kaaki am kpofa? ¹⁷ Nyini minem bo bu boro bu nyi na bu ceɛ wo am nu ni, bu sunsunni ti má kpa. Bu koro ka am kaaki yaki Kristo atin n wo, na am boro am nyi su bu deɛ atin n su. ¹⁸ Nzen má am nyunu aboro nahore su ka am yo sakpa saɗga kere, má i ti kpa, nzen haari n wo má am do mmoo. ¹⁹ M nbaam, am jore yo m yaa, kabo bara ba suwu baa na i yo i yaa barasu n wo, i suyo m yaa so ɔ, má ka Kristo aba awo am nu, na am woowa ti kabo Kristo woowa ti barasu ni. ²⁰ M ahore su, má m koro

ka m wo am do kisa, na m da m boe na ya bo anzama, dama ma tanda fa ko am do.

Saara ni Haga woowa n dee jore

²¹ Ambere bo am koro ka am su Nyeme noanie kpamaawa n su ni, am si ma kabo i noanie kpamaawa n kere n wo, nzen se? ²² Ba kere i Nyeme Jore Kadasi n nu ka, Abraham yo la nbaa nbiesom nnyo o, baa n bo afani n wuuri i ni, ni baa n bo awurubara wuuri i ni. ²³ Baa n bo afani n wuuri i ni, kabo bara kere nyinse, na bu wu baa ni, i nyinse wuuri i so o. Ama, awurubara n dee wa n bo i wuuri i ni, kabo Nyeme yo seeri Abraham n ye i wuuri i a. ²⁴ Kabo nbara nnyom woowa n ti ma kun na bu woowa wo i ngumi ni, i la bu wo. Bu ti ka sesesu nnyom bo Nyeme diiri i di n wo. Kun la Haga, afani n bo i dee busu nufom ti akoom ni. I kere kabo Nyeme noanie kpamaawa n bo i yo fa maari Moyisi Sinayi Buka n su n maari minem yoori akoom barasu n wo. ²⁵ Haga ade Sinayi Buka n bo i wo Arabiya asien n dee jinaabiri wo, i ti ka Yerusalem mie kpiri n bo i wo durunya n nu fen kisa n wo, i ni i busu nufom kere ti akoom wo. ²⁶ Ama, Yerusalem n bo i wo angoro n dee minem anya bu tii, bere ti awurubara Saara dee nbaam a, yiri ti ya ni a. ²⁷ Dama ba kere i Nyeme Jore Kadasi n nu ka,

“Woro bara noroka ni, bo a wu ma baa ni,
ma u ahore jo ko sin su.

Tien, na a siri ni ahorejo,

woro bara n bo a si ma baawu yaari ni,
dama bara n bo i hun akete i n la nbaam
tara bara n bo i la hun ni.”

²⁸ M ninbaam, kisa ambere ti ka Izaki bo i ti awurubaa n a, dama yiri ye Nyeme seeri Abraham ka bu wu i n a, ye ambere gusu ti Nyeme nbaam n a. ²⁹ Kabo nyini sanja na afani n wa n yo kereeri awurubara n wa Izaki n wahara ni, yiri ye bu wuuri i ni Awiewie Casi n dee yiko nu a. Minem bo bu su Moyisi noanie kpamaawa n su ni, sumie yere n bo Nyeme Awiewie n yiko nu na ya kaaki Nyeme nbaam n so lee. ³⁰ Nyeme Jore Kadasi n se se wo? I na, “Fon yi ahin afani n ni i wa n fite fen. Wo ti ma ye ni ka ahin bara n wa n nya aja nenje n be. Ama, i ti ye ni ka awurubara n wa ni fa i kere a.” ³¹ Nyini ti, m ninbaam, ya ti ma afani n dee nbaam, ama, ya ti awurubara n dee nbaam wo.

5

Kabo ya bita ya tiide n bo ya nya i n kenken

¹ Kristo ade ya tii aji, nyini ti, am wo ni nyini tiide n bo am anya i n nu, am bita i kenken na ma am wo ka am ti akoom kun.

² Am ti kabo mini Poolu suse am ni. Nzen am soro su na be wuraari am kenkenne, nyini la ka, deke n bo Kristo ayo ama am n ti ngbeen wo lee. ³ M koro ka m bobo am wo lee bekun, ka sono kere bo i soro su na bu wuraari i kenkenne, wo yo daka ka i mi su noanie kpamaawa n kere su, ma i yaki kun n kpein mmoo. ⁴ Ambere bo am sunsun ka am su noanie kpamaawa n su, na am na nyini ma Nyeme de am ka am yo sa bo i ko atin su i do ni, am ni Kristo akpaaki lee, am di ma Nyeme ahoroma n kun. ⁵ Ama, yere yiri, Awiewie Casi n ama ya yo yarada, ye ya la ahoresi nminda ka Nyeme ba de ya ka ya yo sa bo i ko atin su i do. ⁶ Nzen ya ni Kristo ayo kun, na ya wura kenkenne, i ti ma pui, nzen ya wura ma kenkenne gusu, i ti ma pui. Ama, nzen ya yo Yesu Kristo yarada, na ya koro ya bengum na ya yo

sakpa, nyini ti jore n a. ⁷ Kabo am yo su Kristo atin n su ni, am yo boro am nyi wo nahore su. Kisa nma adaka am ye am akaaki am sunsunni ka ma am de nahore n a? ⁸ Nyini noanie n bo ba fa akaaki am sunsunni n fite ma Nyeme bo wo fere am ka am ba su i n do. ⁹ Bu na, ayiri n bo bu fa go kpono nu n ti kaan so o, ama, yiri ma i yasu yo dangu a. ¹⁰ Ama, m la ahoresi fa ko am do, kabo ya ni ya Mibie Yesu Kristo ayo kun ni, ka, am kaaki ma am sunsunni na am yaki atin n bo ya bita i ni. Sono kere bo i koro ka am kaaki am sunsunni ni, Nyeme cin i mi sui.

¹¹ M ninbaam, nbem na m toko nati kan i ka i ti ye ni ka Kristo minem kere wura kenkenne. Nzen ma i ti nahore ka m kan i so o, ye nzu ti ye Yudafom kere m wuwuruwa n a? Nzen ma m kan i so, ye haari nzen m kan fa ko yiwee n bo Yesu wuuri i baka jaanu n su ni, ma i ti ma jore. ¹² Minem bo bu mie am ka am wura kenkenne ni, ma i yo m fie ka bu sa bu nu na ma bu bieso dika yo juma.

¹³ M ninbaam, Nyeme afere am ka i de am tii ji wo. Ama, ma am nie ka am anya am tii n dee ti, na am yo am kunnu koroowa, ama, am koro am benggu nahore su, na am buka am benggu. ¹⁴ Dama Nyeme noanie kpamaawa n kere jina noanie maawa kun su a, yiri la ka, "Koro u benggu kabo a koro u nu ni." ¹⁵ Ama, nzen sanja kere na am sudi aluwa na am nuni sukpi am benggu nu, na am asi ma am nu sa, am saaki am nunu nu wo lee.

Nyeme Awiewie n ni adamande woowa

¹⁶ M suse am wo, am wo kabo Awiewie Casi n kere am ka am wo ni, adena ma am yo am kunnu koroowa kabo dawa na am yo yoori barasu ni. ¹⁷ Dama deke bo yere adamande kunnu koro i ni, Awiewie Casi n koro ma i, ye deke bo Awiewie Casi n koro i ni, yere adamande dee woowa n koro ma i. Nyini ti, sanja kere yere adamande dee woowa n ni Awiewie Casi n se akuruwa ni i benggu wo. Nyini ye ya koro yo ma kabo ya koro ka ya yo n a. ¹⁸ Nzen am yo kabo Awiewie Casi n koro ka am yo ni, noanie kpamaawa n nie ma am su kun.

¹⁹ Sono kere si kabo minem bo bu su adamande woowa su n ti barasu. Yiri la sakaraya, ni dangba sayoowam, ni konvikiya ngbeenngeennm. ²⁰ Na bu su amoe, ni ayiri di ngbeenngeenn, na bu sukpo mine, na bu sukpini jore, na bu susi kore, na bu sufa yaa, na bu suyo anyii sam, na bu suse akuruwa kpakpaaki bu nunu nu, ²¹ na bu susi bu bengum kore, [na bu sukun mine,] na bu sunu nzan bo, na bu suyo ngbeenngeenn kabo nzan nufom yo barasu ni, na bu suyo sa barasu nbem. Kabo ma du mo ase am ni, m toko bobo am wo lee, ka, sono kere bo bu yo nyini sam ni koro wura ma Nyeme femeya n nu.

²² Ama, deke bo Awiewie Casi n ma mine yo i la ka, bu koro bu benggu, na bu la ahorejo, na bu ahorembaa ti daawa, na bu la mindi, na bu buka mine, na bu yo sakpa, na bu la dabunu, ²³ na bu yo bu nu tarakam, na bu la tarabunu. Noanie kpamaawa be wo ma bere bo i jarako minem bo bu bita nyini woowa atin ni. ²⁴ Minem bo bu ti Yesu Kristo deem ni, ba yaki bu dawa dee koroowa ni i sayoowam n kere, bu ti ka ba kpama bu baka jaanu n su ye ba wu a. ²⁵ Awiewie Casi n ama ya ngoo. Nyini ti, am ma ya wo kabo i kere ya ka ya wo ni. ²⁶ Ma am ma ya wura ya nu kpiri, na ma am ma ya yo sa bo i ye mine ahore su, na ma ya si kore.

6

Kabo ya buka ya lamako Kristofom barasu ni

¹ M ninbaam, nzen am nu ka am nu be suyo satie, ambere bo am wo kabo Awiewie Casi n kere ka am wo barasu ni, am tara am nu benle, na am buka i mi na i yo sa bo i ti kpa. Na am si am nu sa, na ma am gusu yo satie be. ² Nzen am nu ka am benju wo kekereke nu, am buka i. Nzen am yo so, nyini kere ka am ade Kristo kereewam n bo wo fa ama ya n nahore su lee. ³ Woro kere bo a ti ma pui, na a sunsun ka a ti be ni, a dadaka u nu wo lee. ⁴ Sono kere nie i sayoowa, nzen i mi nu ka i sayoowa ti kpa, nyini sangha, i mi koro kansi i nu. Ama, ma i nie ka i sayoowa tara i bengum dee ti, na i fa fo. ⁵ Dama sono kere la i tienju sayoowa. ⁶ Ambere bo bu sukere am Nyeme noanie n ni, am buka bere n bo bu kere am ni, ni deke kere bo am la i.

⁷ Ma am dadaka am nu, na am sunsun ka be koro dadaka Nyeme, dama deke kere bo sono yoori, Nyeme fa nyini to i mi kaari a. ⁸ Nzen sono yo kabo adamande woowa koro barasu ni, nyini ma i mi wu a na i ka ngbeen. Nzen i yo kabo Awiewie Casi n koro ka i yo ni, nyini ma i mi ba nya ngoo bo i la ma awieeri a. ⁹ Nyini ti, ma am ma ya fie ni sakpayo, dama nzen ya fie ma, na sangha n ba juuri, Nyeme to ya nkato. ¹⁰ Nyini ti, nzen ya la deke ya saa nu bo ya fa yo sakpa, ya yo buka sono kere, maala ya lamako Kristofom ni, bere yiri, i ti ye ni ka ya buka bu sangha kere.

Awieeri su dee noanie bo Poo lu fa kaari bu ni

¹¹ Am nie, mini ni m tii sufa m saa sukere ahin kerewa n ngbingbiri n kere ma am a. ¹² Minem bo bu mie am ka am wura kenkenne ni, bu koro ka mine kansi bu wo. Deke n bo i ti na bu yo so n la ka, bu koro ma ka mine kere bu wuwuruwa fa ko yiwee n bo Kristo wuuri i baka jaanu n su ni. ¹³ Bere bo ba wura kenkenne ni, bere mmoo ni bu tii su ma Nyeme noanie kpamaawa n su. Ama, deke bo i ti na bu koro ka am wura kenkenne n la ka, bu koro ka bu fa fo o, ka, ba ma am asu bu dee yoowa n su. ¹⁴ Ama, mini yiri, m fo ma yanfoya fa ko deke be su, ma ka fa ko yiwee n bo ya Mibie Yesu Kristo wuuri baka jaanu n su ni. Nyini yiwee n bo i wuuri i n dee ti, mini do, m bu durunya n ka i ti ngbeen wo, na durunya n gusu bu m ka m ti ngbeen wo. ¹⁵ Dama nzen sono su Kristo atin n su na wo wura kenkenne, i ti ma pui, wo kaaki awura ma kenkenne gusu, i ti ma pui. Deke bo i ti jore nahore su n la ka, i ti ye ni ka mine nya wo fofore bo i fite Nyeme do ni. ¹⁶ Nyeme ma sono kere bo i su ahin atin n bo m kere n su ahoreda, na i si bu anunfo, dama bere ti Nyeme minem bo bu ti Yisarelifom nahore su a.

¹⁷ Kisa m koro ma ka be kpini jore be ma m kun, dama m la deke bo i wo m junie su sukere ka m ti Yesu dee wo.

¹⁸ M ninbaam, ya Mibie Yesu Kristo buka am kere. Ami.

Pɔɔlu kadasi bo i kɛrɛ fa maari EFESOFOM ni

¹ Mini Pɔɔlu bo Nyɛmɛ dɛɛ koroyanu na m ti Yesu Kristo jaramasa ni, sukere ahin kadasi n ma amberɛ Nyɛmɛ minɛm bo am wo Efeso miɛ kpiri n nu, na am bita Yesu Kristo atin n nahɔrɛ su, na am ni yiri ayo kun ni. ² Ya si Nyɛmɛ, ni ya Mibiɛ Yesu Kristo buka am na bu ma am ahoreda.

Kabo Nyɛmɛ ayo ya kisi ni

³ I ti ye ni ka minɛm kɛrɛ kansɛ Nyɛmɛ, yiri bo i ti ya Mibiɛ Yesu Kristo Si, kabo i ma ya ni Kristo ayo kun ni, nyini dɛɛ ti, wo fa deke kpa kɛrɛ bo i wo angoro na i fite i Awiewiɛ n do ni ayo ya kisi. ⁴ Dama sanɓa bo Nyɛmɛ nya yi má durunya ni, ye i yiiri ya ka ya yo i minɛm a, na ya ni Kristo yo kun, adena ya yo casi, na má be koro jaraki ya Nyɛmɛ do. Koro n bo i koro ya n dɛɛ ti, ⁵ wo du mo acici ka i fá ya yo i kunnu nbaam Yesu Kristo dɛɛ ti. Deke bo i koro ka i yo i ni, i koroowa lɛɛ. ⁶ I Wa koroowa n dɛɛ ti wo ma ya ahɔrɔma ace ya nyini aceeri n bo i la má anjusu n a. Nyini dɛɛ ti, i ti ye ni ka minɛm kɛrɛ kansɛ i fa ko sakpa n bo wo yo i ama ya n su. ⁷⁻⁸ Kabo ya ni Yesu Kristo ayo kun ni, i mbunja n bo i fiteeri i nɗunɛ nu sanɓa bo i wuuri n dɛɛ ti, ye Nyɛmɛ ade ya tii aji, afa ya satie kɛrɛ ace ya. Wo buka ya agaya, ama ya ahɔrɔma bo i la má anjusu, wo ma ya alecira ni si barasu kɛrɛ. ⁹ Nyɛmɛ ayi deke bo i du mo koroori ka i yo i, na i wo i ahorembaa su na be si má i n akere ya, Yesu Kristo ama wo yo yiiwa. I koroowa lɛɛ. ¹⁰ Nyini deke n bo Nyɛmɛ koroori ka i yo i n la ka, nzen sanɓa n ba juuri, i bó deke kɛrɛ kun, bo bu wo angoro, ni bo bu wo asiɛnɓu n kɛrɛ, na i má Yesu Kristo yo i kɛrɛ tii. ¹¹ Deke n kɛrɛ bo Nyɛmɛ adu mo acici ka i yo i ni, kabo yiri Nyɛmɛ koro n lɛɛ ye wo yo i n a. Ye wo yi ya ka ya yo i dɛɛ minɛm, na ya ni Kristo yo kun. ¹² Adena minɛm nɗu ya woowa, yere bo ya du mo afa ahoresi ni Kristo ni, na bu kansɛ Nyɛmɛ na bu wura i kpiri.

¹³ I ti so ɔ lɛɛ am gusu do. Am tiiri labari kpa n bo i ti nahɔrɛ na i ma am nya tiide n jɔrɛ ni, ye am yoori Kristo yarada a, ye Nyɛmɛ afa i Awiewiɛ Casi n ase am nyaari, kabo i yo seeri ni, yiri kere ka am ti i dɛɛ minɛm a. ¹⁴ Kabo wo du mo ama ya Awiewiɛ Casi ni, nyini kere ka Nyɛmɛ má ya deke n kɛrɛ bo i seeri ka i fá ma i minɛm n a. Yiri ma ya yo yarada, na ya la ahoresi haari fa ko ju cɛɛn n bo ya nyá tiide nahɔrɛ su a. Nyini dɛɛ ti, minɛm nɗu kabo ya ti barasu na bu kansɛ Nyɛmɛ jirima woowa n bo i la má anjusu ni, na bu wura i kpiri.

Kabo Pɔɔlu sereeri Nyɛmɛ maari Efesofom ni

¹⁵ Nyini dɛɛ ti, fite sanɓa bo m tiiri ka am ayo Kristo yarada ni, ni kabo am koro Nyɛmɛ minɛm kɛrɛ barasu ni, ¹⁶ am woowa dɛɛ ti, sanɓa kere m da Nyɛmɛ asi, na m susere i ma am. ¹⁷ M sere ya Si Nyɛmɛ, i jirima woowa la má anjusu. Yiri ti ya Mibiɛ Yesu Kristo Nyɛmɛ a. M sereeri i ka i ma i Awiewiɛ Casi n buka am, na am nya alecira, na i teke am nyi, bo am si Nyɛmɛ nahɔrɛ su. ¹⁸ M kaaki sere i ka i teke am nyi na am nɗu i wein ni, adena am si deke n bo i ti na wo fere am n na am la ahoresi fa ko i busu ni, na am kaaki si deke n bo i ti kpa na i la jirima agaya, bo wo se ka i fá ma i minɛm ni. ¹⁹ Na am si kabo i yiko n la má anjusu barasu ni, na i koro yo

juma ma yere n bo ya yo i yarada ni. Nyini yiko ni ti bambaka la fanga a, ²⁰ yiri ye Nyeme fa tengeeri Kristo i yiwee n nu, afa i atana angoro i saa fomboro su n a. ²¹ Deke bo i wo lee, i la yiko tara yikofom kere, amoe o, ayiri o, biefoya o, mereke o, jina o, nuni o, ni ajini o, na i duma n tara duma kere bo i wo ahin durunya n bo ya wo nu ni, ni durunya n bo i suba ni. ²² Nyeme afa deke n kere awura Kristo saa nu ka i nie bu su, na wo ma yiri Kristo bo i nie deke n kere su n ayo Kristo jama n kere tii a. ²³ Kristo jama n kere ti i nunie n a, ye i wo bu nu, ye i woowa ade deke n kere a.

2

Kabo ya fite yiwee nu na ya nya ngoo fofore barasu ni

¹ Sangha bo am yo keteeri Nyeme noanie na am yo satie ni, am ti ka am awu wo. ² Nyini sangha ni, am yo satie kabo kisa durunya n nufom yo n wo. Na am sude Sitana bo i bita asien ni angoro afien n yiko na am de i noanie. Yiri bita minem kere bo ba kete Nyeme noanie n a. ³ Nahore, yere mmoo yo ti so o lee, na ya suyo dekem bo ya konviki wo bu nu, na ya suyo deke kere bo i ti ma kpa na ya nu i, na ya koro i ya sunsunni nu ni. Ma ya kere gusu di nyini wahara n bo Nyeme afa yaa ka i fa cin minem sui, bere bo ba kete i noanie n wo.

⁴ Ama, Nyeme si anjuno agaya, na i kaaki koro ya agaya, ⁵ ya yo ti ka ya wuuri wo, fa ko i noanie n bo ya keteeri n su ni, haari ni nyini mmoo, i koro n dee ti, wo sangha ama ya ni Kristo ngoo. I dee ahoroma ni ma am nyaari tiide a. ⁶ Ya ni Yesu Kristo ayo kun n dee ti, Nyeme atenge ya yiwee nu kabo i tengeeri Kristo i yiwee n nu ni, na ya ni yiri kere sangha tana Nyeme femeya n nu. ⁷ Deke bo i ti na Nyeme yoori so n la ka, fa i kisa fa ko, i kere i ahoroma n bo i la ma anjusu ni, yiri la kabo i ma Yesu Kristo ayo sakpa abuka ya barasu ni. ⁸⁻⁹ Am yarada n bo am ayo i n dee ti, Nyeme ahoroma ni ma am nyaari tiide a, ma am sakpa dee ti a, ama, Nyeme aceeri a. Nyini ti, ma be se ka i fa fo. ¹⁰ Kabo ya ti kisa ni, Nyeme yiiri ya so a. Ya ni Kristo ayo kun n dee ti, ye wo ma ya ngoo fofore a, ka ya fa yo sakpa n bo Nyeme yo fa seeri ya ka ya yo i n a.

Kristo ni i minem kere ayo kun

¹¹ Nyini ti, amere bo am ti ma Yudafom ni, am tenge su kabo am woowa yo ti barasu ni. Yudafom fere am ka tokurukum wo, na bu fere bu nu ka minem n bo ba wura kenkenne, nyini n so ti adamande anjuniembaa su yoowa a. ¹² Am tenge su ka sangha bo am yo si ma Kristo ni, am wo dede ni yiri wo, na am ti ma mine n bo Nyeme ayi bu n be. Sese su n bo Nyeme yo diiri i di seeri ka i buka i minem ni, am wo ma nu. Am yo wo durunya n nu wo, ama, am yo la ma ahoresi be, na am kaaki si ma Nyeme. ¹³ Ama, kisa, na am ni Yesu Kristo ayo kun ni, amere bo ma am yo wo dede ni Nyeme ni, Kristo mbunja n bo i fiteeri i nunie n nu, sangha bo i wuuri ni, acin am adodo Nyeme a. ¹⁴ Dama Kristo ti sono bo wo ma ya sese su ni tanalaife a. Yiri yo faari i nu yoori yoowa yiiri kpo bo i ti ka kobe na i wo Yudafom, ni bo bu ti ma Yudafom n afien a, na wo ya bu kun. ¹⁵ I yiwee n bo i wuuri i n dee ti, wo ma Nyeme noanie kpamaawa n yo ma juma kun, i ni i noanie maawam, ni i atinm kere. I yoori so o, adena i fa yere Yudafom, ni bo bu ti ma Yudafom n yo ya daanfie kun. Ya ni yiri ayo kun n dee ti, ye wo sese ya su ama ya tanalaife n a. ¹⁶ I yiwee n bo i wuuri baka jaanu n su n dee ti, wo yi kpo bo ma i wo ya afien ni, ayo ya mine

kunm akaaki ya aba Nyeme do. ¹⁷ Kristo ba kaanri labari kpa n bo i yo minem ahien donngu n maari ambere bo am ti má Yudafom, na am wo dede ni Nyeme n wo, ni Yudafom bo bu dodo i ni. ¹⁸ Kristo dee ti, ye Awiewie Casi n ama ya ni bere kere atin ka ya koro ba ya Si Nyeme do a.

¹⁹ Nyini ti, ambere bo am ti má Yudafom ni, kisa am ti má wofom kun Nyeme minem do, ama, am anya atin abo Nyeme dee minem su, ye am ayo i dikafom. ²⁰ Am kaaki ti ka soo n bo Nyeme suta i n wo, wo ta am ataka ataari fa bumboori seewa n su, yiri la bo Kristo jaramasam, ni Nyeme noanie kanfom du mo fa seeri soo n bu ni. Nyini fa seewa n la Nyeme noanie n bo bu yo kaanri i n wo. Ye Yesu Kristo ti ka soo n jantaraka n a. ²¹ Soo n deke n kere wo yiri su a, ye i maari i yo woobiri casi ma Nyeme a. ²² Am ni yiri kere ayo kun n dee ti, ambere mmoo ti Nyeme Sereebiri Awuru n wo lee, bo i Awiewie Casi n wo nu ni.

3

Deke bo i yo wo fiexwa n nu na Nyeme yi kereeri Poo lu ni

¹ Mini Poo lu, m woori dansaraka nu, Yesu Kristo ni ambere bo am ti má Yudafom n dee ti wo. ² Nahore, m nie ka am ati kabo Nyeme asi m anjunfo ka m yo ahin juma n ma am ni. ³ Nyeme yo yiiri deke bo i wo i ahorembaa su n akere m, bo i koro ka i yo i na be si má i ni. Ma du mo akere i jore kaan akere am. ⁴ Nzen am kaanri kadasi n bo ma kere i ni, am nu kabo m koro siiri Kristo nusu jore kere bo i wo asiri nu ni. ⁵ Dawa sangga ni, Nyeme ayo ayi má nyini asiri nu jore n akere má adamande be. Ama, kisa, Nyeme ma i Awiewie Casi n ayi i akere minem bo wo yi bu ka bu yo i jaramasam, ni i noanie kanfom n a. ⁶ Asiri bo i wo bere n la ka, ya de labari kpa n na ya ni Yesu Kristo ayo kun n dee ti, bo bu ti Yudafom, ni bo ti má Yudafom, ya kere sangga nya deke n bo Nyeme fá ma i minem, na ya sangga yo i minem, na ya sangga nya deke n bo Nyeme seeri ka i fá ma i minem ni.

⁷ Nyeme ahoroma n dee ti, wo ce m aceeri ayi m ka m yo i labari kpa n amususufo, ye wo ma m yiko ka m fa yo i juma ni. ⁸ Nyeme minem n nu, mini ti bu kere kaan, ama, haari ni nyini n kere ni, Nyeme ayi m ama m ahin atin n ka m ko kan i labari kpa n jore kere minem bo bu ti má Yudafom ni, na bu si sakpa bo Kristo ayo i, na be koro si má i kere bu ni. ⁹ Na wo kaaki ama m atin ka m ma soro kere nu sa bo minem si má i, na Nyeme koro ka i yo i na i yo yiwa. Nyeme yiiri deke n kere a, na wo bita nyini asiri nu sam n bo i koro ka i yo i, i ahore su dawa ni. ¹⁰ Deke n bo i ti na i yoori so n la ka, nzen nfangafom ni yikofom bo bu wo angoro n nu ka minem bo bu ti Yudafom, ni bo bu ti má Yudafom n abo kun ayo Kristo jama ni, ka kisa bu si alecira barasu barasu bo Nyeme la i na i la má anusu ni.

¹¹ Nyeme yoori nyini kere, kabo dawa na i sunsun ka i yo i ni, ya Mibie Yesu Kristo dee ti, ye i ma i kere yoori yiwa a. ¹² Kabo ya yo Kristo yarada na ya ni yiri ayo kun ni, nyini ma ya la ahoresi koro ba Nyeme nyunu na ya soro má sere n a. ¹³ Nyini ti, m sere am wo, má am ma am njunie yoroki am, fa ko wahara n bo m sudi i ambere dee ti ni, i ti deke bo i wura am kpiri wo.

Koro bo Kristo fa koro i minem barasu ni

¹⁴ Nyini kere deɛ ti ye mini Pɔɔlu kutu sere ya Si Nyeme ma am n a. ¹⁵ Yiri ti lamosi kere bo i wo angoro ni asiengu n kere Si a. ¹⁶ M nyemesere la ka, i la jirima woowa bo i la má anjusu n deɛ ti, i Awiewie Casi n ma am nya yiko bambaka am ahore su, ¹⁷ na kabo am yo Kristo yarada ni, i wo am ahore su, na m kaaki sere i ka am la koro nahore su, na am jina kenken, fa kɔ koro n bo am la i n su. ¹⁸ Adena am ni Nyeme minem kere sanja fiiti ni anyumboro, na am si kabo Kristo koro am agaya, ni kabo i koro la má anjusu ni. ¹⁹ M nyemesere bekun la ka, i ma am kaaki si kabo Kristo koro am ni, haari ni bo adamande koro si má nyini koro n bo i la má anjusu ni, na m sere i ka i ma am woowa kere ti kabo yiri Nyeme woowa ti barasu ni.

²⁰ Nyeme yiko n bo i wo ya ahore su suyo juma n deɛ ti, i koro yo deke n kere ma ya tara kabo má ya sunsun ka ya sere i barasu ni. ²¹ Nyeme ti ye ni ka ya kansu i sanja kere sanja, yere kere bo ya ti Kristo jama n na ya ni Kristo ayo deke kun ni. Ami.

4

Kristo jama n kere ti deke kun wɔ

¹ Nyini ti, mini Pɔɔlu bo m su Mibie n deɛ ti na m wo dansaraka nu ni, m susere am jande ka, am wo wo bo i kɔ atin su, kabo Nyeme fereeri am na i kereeri am ka am wo barasu ni. ² Am yo am ŋu kaan na am yo benle, na am yo sawore, na am la mindi de am benggu ni koro, sanja kere. ³ Anɔɔse n bo Awiewie Casi n afa ama am na am ayo kun n deɛ ti, am boro am nyi na am tana laifie na am bita nyini anɔɔse n ni am benggu. ⁴ Yere kere bo ya ti Kristo minem ni ayo ka anjuniembaa kun wɔ. Na Awiewie Casi kun ni wo ya kere do a, na ya kere kaaki la ahoresi fa kɔ deke kun n bo i ti na wo fere ya ni. ⁵ Ya la Mibie kun wɔ, deke kun ye ya yo i yarada. Mibie kun n duma nu ye bu fa bie ya kere Nyeme nzue a. ⁶ Nyeme kun wo bere a, yiri ti ya kere Si a, yiri kaaki ti ya kere Mibie a, i ma ya kere yo i juma a, na i wo ya kere do.

⁷ Ama, Kristo akpaaki i aceeri n ama ya kun kun n kere kabo i koro ni. ⁸ Nyini ti, ye ba kere i Nyeme Jore Kadasi n nu ka, “Sanja bo i fun kɔɔri angoro ni, na wɔ fa domuem akɔ, na wɔ ce mine aceerim.” ⁹ Bo ba kere i ka wɔ fun akɔ angoro n la ka, i du mɔ wo angoro do ye i jura baari asiengu fen a, ye wɔ kaaki akɔ angoro do bekun a. ¹⁰ Yiri n bo i jura baari asiengu n la bo wɔ fun akɔ angoro dede n wɔ, ye i woowa ade deke n kere a. ¹¹ Yiri faari i aceerim ceeri i minem n a, yiri la bo wɔ yi nbem ka bu yo i jaramasam, na wɔ yi nbem ka bu yo Nyeme noanie kanfɔm, ye wɔ yi nbem ka bu kan Nyeme labari kpa n jore kere minem, ye wɔ yi nbem ka bu yo sasafɔm, ni kerefɔm. ¹² Kristo faari nyini aceeri maari a, na bu sese Nyeme minem su, adena bu buka bu bengum na bu yo i juma ni, na Kristo jama n nya fanga buka su. ¹³ Na ya kere fa anɔɔse fa kɔ kabo ya yo Nyeme Wa n yarada ni, na ya si i nahore su subuka su, na ya yarada yo biwa, na ya kɔ ya nyunu buka su, na ya woowa kere ti kabo Kristo wo ti barasu ni. ¹⁴ Na má ya yo ka nbaatumam, adena má korefɔm ba fa bu ŋɔnletie kere ya na bu dadaka ya, na ya mini.

¹⁵ Ama, am ma ya koro ya benggu, na ya sujojo nahore, na ya kɔ ya nyunu buka su, na ya woowa kere ti kabo Kristo woowa ti barasu ni, dama yiri ti ya tii a. ¹⁶ Na yere bo ya ti i minem ni ti ka i nuniembaa a. Kristo ti bo i bifa anjuniembaa bue barasu n kere a, na ya kere bo kun, na ya kere suyo

juma n bo wɔ fa ama ya ni, subuka ya benngu, na ya koro ya benngu, na anjuniembaa n kere nya fanja buka su.

Kabo ya kaaki wo fɔfɔre barasu ni

¹⁷ Nyini ti, m koro ka m fa yiko n bo Mibie n afa ama m ni, na m bɔbɔ am, ka, má am ma am woowa ti kabo minem bo bu su má Nyeme woowa n ti barasu ni, dama bu sunsunni kere ti ngbɛen wɔ. ¹⁸ Bu wo awosin nu n dɛɛ ti, bu la má ngɔɔ n bo Nyeme ma i minem ni, dama bu si má be, na bu ahorembaa kaaki ti kekereke n dɛɛ ti. ¹⁹ Nyinɛ ti má bu fa kɔ deke be su kun, sanja kere bu dɛɛ la ka, bu suyo sa ngbɛenngbɛennm wɔ, na bu suyo dangba sam, bu tara má bu ŋu, na bu suyo anyii sam barasu kere.

²⁰ Ama, ambere yiri, sanja bo bu kereeri am fa kɔ Kristo ŋusu jɔre ni, má kabo bu kereeri am lɛɛ. ²¹ M nie ka am adu mɔ asonson i ŋusu jɔre kere, am nya ti i susufom ni, ba kere am ka Yesu ti bo i la nahɔre n a. ²² Nyini dɛɛ ti, am yaki am woowa dawa n bo i ti má kpa n ji. Am woowa dawa n koro ka i daka am na i saaki am a, dama i má am yo dekem bo bu ti má kpa a, na bu mini am. ²³ Am ma Nyeme kaaki am sunsunni ni am ahorembaa fɔfɔre. ²⁴ Na am fa wo fɔfɔre n bo Nyeme afa ama am na i ferema ni yiri Nyeme dɛɛ woowa ni. Nyini woowa ni kɔ atin su a, na i kaaki ti casi nahɔre su a.

²⁵ Nyini ti, má am bu kɔre, am kan nahɔre ma am benngu, dama ya kere ti anjuniembaa kun n bue barasu be wɔ. ²⁶ Nzen am be fa yaa, má i yo satie, má i fa yaa haari wie kɔ tɔ. ²⁷ Má am ma Sitana atin haari kaan sɔ, na i ma am yo satie. ²⁸ Sɔnɔ kere bo i yo wɔ, i ti ye ni ka i mi yaki awie, na i yo i tienngu juma ni anyumboro su, na i nya i koroowa, adena i koro buka yaarifom. ²⁹ Má am ma jɔre tie fite am nɔɔ nu, ama, am ma am nɔɔ fite kpa, na i buka minem, na bu kɔ bu nyunu buka su, na sɔnɔ kere bo i tiiri i, i mi koro su Nyeme atin n su nyunyumi. ³⁰ Má am saaki Nyeme Awiewie Casi n ahore, dama yiri ye Nyeme afa i ase am nyaari a, ka i bá de am ti ji cɛen be a. ³¹ Má am ma am kunnu yo wiwi, má am ma yaa ti am, má am kan am benngu ndie, má am se akuruwa, má am kpie am benngu nzukɔ, má am kpo am benngu deke be ti. ³² Ama, am yo am benngu kpa, na am si am benngu anjufɔ, na am fa am benngum ngasi ce bu kabo Nyeme afa ace am Kristo dɛɛ ti ni.

5

Nyeme minem woowa a

¹ Nyini ti, kabo am nya ti Nyeme nbaa koroowam ni, am boro am nyi, na am ma am woowa ti kabo i woowa ti barasu ni. ² I ti ye ni ka am ma koro wo am dɔ, kabo Kristo koro ya barasu na i faari i ŋu yoori yoowa maari ya na i suunri Nyeme nu ni.

³ Kabo am ti Nyeme minem ni, má am yo sakaraya, má am yo dangba sam, má am se ka am nyunu boro nenge kpini su, má am bo nyini sereyam n be mmɔɔ anzama am nu. ⁴ Na má am ma jɔre ngbɛenngbɛen fite am nɔɔ nu, má am jɔɔ jɔre bo ngonle wo má nu, má am yo kɔkɔɔ tie. Ama, i ti ye ni ka am da Nyeme asi sanja kere. ⁵ Am si tenle su ka sɔnɔ kere bo i yo sakaraya, ni dangba sam, ni bo i nyunu boro nenge kpini su, sɔnɔ kere bo i yo sɔ, i mi su má Nyeme, i su nengem wɔ. Kristo ni Nyeme bá nie má i su, na i nya má deke n bo Nyeme ase ka i fá ma i minem ni.

⁶ Má am ma be fa i jore ngbeen be dadaka am, dama nyinim so dee ti, ye Nyeme fá yaa cin minem bo ba kete ka bu de má i noanie n sui n a. ⁷ Nyini ti, má am ni nyini minem so sanja wo. ⁸ Sanja be, ambere mmoo ni am tii yo woori awosin nu yo satie wo, ama, kisa, na am akaaki ya Mibie Yesu minem ni, am ti wein nufom wo lee. Nyini ti, am ma am woowa kere ka am ti wein nufom wo. ⁹ Má pui ti ye m se so a, dama minem bo bu wo wein nu ni, bere la wo kpa a, ye bu yo sa bo i ti kpa kere a, na bu yo sa bo i ko atin su Nyeme do, na bu bita nahore. ¹⁰ Nyini ti, am boro am nyi, na am si deke bo i sun Nyeme nu. ¹¹ Má am fa am nu bo minem bo bu wo awosin nu n su, na am yo sa ngbeenngbeen n bo bu yo i ni, ama, am yi bu nyini sayoowam fite fofoe nu. ¹² I ti nyinse wo mmoo, ka ya bo su fa ko bu nyini sam bo bu yo bu asiri nu ni. ¹³ Ama, deke kere bo i wo fiewa nu, na i nya fiteeri fofoe nu, nyini sanja, kabo i ti kere, i nyunu da casi wo lee, dama i wo wein nu wo. ¹⁴ Dama deke kere bo i nya fiteeri fofoe nu ti wein wo. Nyini ti ye ba se ka,

“Woro daafirifo ni, yasu
na a tenge u yiwee nu,
na Kristo dee wein n ta go u nu.”

¹⁵ Nyini ti, am si am nu sa na am si wo, má am wo kabo bo bu si má be n wo barasu ni, ama, am wo kabo minem bo bu la ngonle n wo barasu ni. ¹⁶ Sanja kere am boro am nyi na am suyo Nyeme juma, na má am tana ngbeen, dama ahin sanja n bo ya wo nu ni, satieyo asunnu agaya. ¹⁷ Nyini ti, má am yo ka sinnzinm, ama, am boro am nyi, na am si deke bo Mibie n koro ka am yo i. ¹⁸ Má am nu nzan bo, dama nzan saaki sono tii wo, ama, am ma Awiewie Casi n wo am do sanja kere. ¹⁹ Am fa Nyeme noanie bo bu wo kansu jue kerewam n nu n fa di jue ma am benju, na am di jue n bo Awiewie Casi n kere am, na am di jue kansu Nyeme am ahore su. ²⁰ Am da ya Si Nyeme asi sanja kere, fa ko deke kere su, ya Mibie Yesu Kristo dee ti.

Nbaram ni bu hunm jore

²¹ Am soro Kristo n dee ti, am de am benju noanie. ²² Nbaram, am de am hunm noanie kabo am de Mibie n noanie barasu ni. ²³ Dama bieso la yiko nie i yi su, kabo Kristo la yiko nie i jama n su barasu ni. Kristo jama n ti i nuniembaa a, yiri ni i tii, ti bu Tiidefo a. ²⁴ Kabo Kristo jama de i noanie barasu ni, so ye i ti ye ni ka nbaram de bu hunm noanie deke kere nu n a.

²⁵ Nbiesom, am koro am yim kabo Kristo koro i jama n na i too ri i ngoo wu maari bu barasu ni, ²⁶ adena i yo bu casi wo. Nyeme noanie n bo bu tiiri i ni, ye bu bieseri bu Nyeme nzue yiiri satie kere bo i wo bu ahore su a, ²⁷ adena i fa bu bo i nu su na bu wo i do, na bu yo nyumi agaya, na bu yo casi na bu la má fin be wara bu la má ngasi be, na be koro jarki má bu. ²⁸ So ye i ti ye ni ka nbiesom koro bu yim kabo bu koro bu nu barasu n a. Dama bieso kere bo i koro i yi koro i nu wo lee. ²⁹ Sono be wo má bere bo i koro má i nu, ama, sono kere nie i nu su wo nyunyumi, kabo Kristo nie i jama su barasu ni, ³⁰ dama ya kere ti Kristo nuniembaa n wo lee. ³¹ Ba kere i Nyeme Jore Kadasi n nu ka, “Nyini dee ti, bieso yaki i si, ni i ni, na i fa i nu mata i yi, nyini sanja bu mine nnyo n ayo deke kun lee.”

³² Asiri nu jore bambaka be wo ahin noanie n nu, na ma nu i la ka, i sukan fa ko Kristo ni i jama n jore wo. ³³ Ama, jore n bo m koro ka m se

am n la ka, i ti ye ni ka bieso kere koro i yi, kabo i koro i ngu ni, na bara kere bu i hun.

6

Nbaatumam ni bu wufom jore

¹ Nbaatumam, am de am wufom noanie, Mibie n dee ti, dama nyini ti kpa a. ² Ka, “Bu u si ni u ni.” Ahin n ti Nyeme noanie maawa ciciri su bo Nyeme bukaari su seeri ka nzen a yoori so, i ma u deke kpa, ³ ka, “Nyini ma a ngu u ngu fie a, na u ngoo ko tintiin durunya n nu fen a.”

⁴ Nbaasim, ma am yo sa bo i ye am nbaam yaa su. Ama, am ta bu ataari bo i ti kpa, na am tu bu fo fa ko Mibie n dee atin n su.

Akoom ni bu mibiem jore

⁵ Ambere bo am ti akoom ni, am de am mibiem bo bu wo durunya n nu fen n noanie, na am soro bu ahore, na am yo deke kere bo bu na am yo i ni am ahorembaa kun, kabo am yo ma Kristo barasu ni. ⁶ Ma am yo ka bu nie am dee ti, na am koro ka am yo na bu kunnu jo am ngu, ama, am yo bo i sun Nyeme nu, ni am ahorembaa kun, ka am ti Kristo dee akoom ti. ⁷ Am yo am juma kere ma am mibiem ni ahorejo, ka am suyo ma ya Mibie Yesu wo, ama, ma ka am suyo ma adamande wo. ⁸ Nahore, ye m na am si ka, sono kere bo i yoori i juma nahore su, Mibie ni to i mi nkato, nzen i ti akoo o, wara i ti ma akoo o.

⁹ Ambere gusu bo am ti bu mibiem ni, am bita bu nyunyumi, ma am suwura bu sere. Ma am ma am wara fi ka am ni bere kere Mibie n bo i wo angoro n ti kun wo. I tambu ma nu.

Biesoya nenje bo Nyeme afa ama ya n jore

¹⁰ Jore n bo wo ka n la ka, am ma Mibie n ma am fanja fa ko i yiko bambaka n bo i la i n su. ¹¹ Am fa biesoya nenje n kere bo Nyeme afa ama am n sana, adena am ba koro jina kenken na am kunma Sitana ngonletie kere bo i fa dadaka am ni. ¹² Dama ma ya ni adamande kun lue n a, ama, ya kun lue n ni Sitana ni yikofom barasu barasum kere bo bu wo angoro ni, ni bo bu la yiko bita minem bo bu wo awosin nu durunya n nu fen n wo. ¹³ Nyini ti, am fa biesoya nenjem bo Nyeme afa ama am sana, adena sanja kere bo Sitana ba kun am lue, am koro kete i na am kunma i nahore su, na am jina kenken. ¹⁴ Nyini ti, am kpa am ngu, na am jina kenken, na am fa nahore fa yo ka dambara bo am wii nu, na am yo sa bo i ko atin su sanja kere, nyini kanda am a, ka bulaari peperepe bo am fa kanda am hoe su. ¹⁵ Na am ma labari kpa n bo i ma ahoreda n yo ka gbagbaa bo am koro fa wura jina kenken. ¹⁶ Am yoori nyini wieeri na am nya fa yarada yo deke bo am fa kanda de Sitana awiem kere bo i tu bu na bu je ka sin ni. ¹⁷ Am fa tiide n bo Nyeme afa ama am n yo ka bulaari kere bo am fa butu kanda am tii, na am fa Nyeme noanie n yo ka takobe bo Awiewie Casi n afa ama am. ¹⁸ Am yoori nyinim kere ni, am sere Nyeme ka i jina am sin buka am, na am susere i sanja kere, kabo Awiewie Casi n kere am ka am sere i barasu ni. Nyini dee ti, sanja kere am sere i so, ma am daafi, na ma am fa am ngu ji, na am susere Nyeme ma i minem kere. ¹⁹ Am sere Nyeme ma m, na sanja kere bo m na m jojo, na Nyeme ma m noanie bo m jojo, adena m koro jojo ni ahoresi, na m koro teke m noo kan labari kpa n bo minem si ma i n jore n kere minem. ²⁰ Dama Yesu Kristo ayi m ka m yo i jaramasa na m kan nyini labari kpa n jore dee ti, ye m wo

dansaraka nu n a. Nyini ti, am sere Nyeme na i ma m ahoresi, na m kan labari kpa n jore kere minem, kabo ma i ti ye ni ka m kan kere bu ni.

Awieeri su dee anse yoowa ni

²¹ Ya niwa Tikikusi bo ya koro i agaya na i la dabunju na i yo Mibie n juma n ni, yiri ba kan m nusu jore kere kere am, na am si kabo m woowa ti barasu. ²² Nyini dee ti, ye m susunma i am do a, adena am si kabo ya kere woowa ti barasu, na i ma am ahoresi. ²³ M sere ya Si Nyeme ni ya Mibie Yesu Kristo ka bu ma ya ninbaam kere ahoreda, ni koro, ni yarada. ²⁴ Nyeme buka ambere kere bo am koro ya Mibie Yesu Kristo n ni koro bo i la ma awieeri ni.

Ɖoolu kadasi bo i kerɛ fa maari FILIPIYAFOM ni

¹ Mini Ɖoolu ni Timoti bo ya ti Yesu Kristo akoom ni, yere sukere ahin kadasi n ma Nyeme minem bo bu wo Filipiya mie kpiri n nu ni, na ba de Yesu Kristo na bu ni yiri ayo kun ni, fa ko tu Kristo jama mafom, ni bu bukafom kere. ² Ya Si Nyeme, ni ya Mibie Yesu Kristo buka am kere na bu ma am ahoreda.

Kabo Ɖoolu sereeri Nyeme maari Filipiyafom ni

³ Saŋga kere bo m ba tenge am jore su, m da Nyeme asi ma am wo. ⁴ Na saŋga kere gusu bo m sere Nyeme ma am, m sere i ni ahorejo o, ⁵ dama fite cɛɛn n bo am deeri Kristo labari kpa haari ba ju ni nyuma ni, am abuka m bo ma koro akan Kristo labari kpa n jore akere minem. ⁶ Nyini ti, m la ahoresi ka Nyeme wo am do, yiri boori i bu yoori nyini sakpa ni am nu a, yiri sũyo i so a, haari ko ju cɛɛn n bo Yesu Kristo ba kaaki ba ni.

⁷ Saŋga kere am jore wo m ahore su wo, nyini ti, kabo m sunsun fa ko am do ni, wo yo daka ka m yo so. Dama am kere abuka m fa ko juma n bo Nyeme afa ama m ka m yo i ni. Haari ni bo kisa m wo dansaraka nu ni, wara saŋga bo m nati m koroyanu ni, am bukaari m wo, na ma kan akere mine ka labari kpa n ti nahore wo, adena bu yo yarada nahore su. ⁸ Nyeme di m daani ka am sa wo m ahore su saŋga kere a, ka m koro am ni koro bo Yesu Kristo fa koro ya ni. ⁹ M nyemesere la ka, am sukoro am bengu buka su saŋga kere, na am susi Nyeme atin n kere, na am si nahore atin, ¹⁰ adena am si na am koro tambu yi deke bo i ti kpa nahore su, na am yo casi na am la ma ngasi be fa ko cɛɛn bo Kristo ba kaaki ba ni. ¹¹ Na m susere Nyeme ka Yesu Kristo buka am, na am wo wo kpa, na am suyo sakpa saŋga kere, na mine nu i na bu kansi Nyeme na bu wura i kpiri.

Yesu Kristo dee ti ye m la ngoo a

¹² M ninbaam, m koro ka am si ka sa bo wo tu m na m wo dansaraka n nu ti ma tie, nyini ma labari kpa n akoro abara aye a. ¹³ Nyini dee ti, tintinjinafom ni minem kere bo bu wo fen n asi ka, m ti Kristo dee amususufo dee ti ye m wo dansaraka nu a. ¹⁴ M dansaraka n nu woowa n awura ya ninbaam dongu kperɛ kekereke Mibie n dee ti, wo ma ba nya ahoresi abuka su bo bu koro sukan labari kpa n jore saŋga kere na bu soro ma sere.

¹⁵ Nahore, koresi ni akuruwa se ti, ye bu nbem kan Kristo labari kpa n jore n a, ama, nbem gusu kan i ni akunnu fofoe wo. ¹⁶ Bere n bo bu yo i ni akunnu fofoe ni, Nyeme koro ti ye bu yo so n a, dama bu si ka Nyeme ma m wo fen a, na m tu ngoni fa ko Kristo labari kpa n jore su. ¹⁷ Nyingam ni, bu kan ma Kristo labari kpa n jore ni bu sunsunni kpa, ama bu bita anyii sunsunni wo, adena bu ma m di wahara dansaraka n nu.

¹⁸ Nyini n kere bo bu suyo i ni, i be mmoo kpie ma m daafiri. Ama, deke bo i yo m fie n la ka, bu ma Kristo labari kpa ni susandi bara ye buka su wo. Nzen bu kan ma i ni bu sunsunni kpa, wara bu kan i ni bu akunnu fofoe, m dee la ka, saŋga kere m ahore ti joowa. ¹⁹ Dama m si ka nyemesere bo am sere Nyeme ma m saŋga kere n ni buka bo m nya i fite

Yesu Kristo Awiewie Casi n do ni, nyini ma m nya m tii a. ²⁰ M fa ahoresi ni tama yo m juma ni anyumboro sangga kere, na ma nyinse ti m, adena nzen m wuuri, ni bo ma wu ma kere, m woowa koro ma mine kansi Kristo dee duma. ²¹ Mini do, nzen m la ngoo, Kristo dee ti a, nzen ma wu, i ti m kperewo. ²² Ama, nzen m toko la ngoo ahin durunya n nu fen na m koro yo sa bo i kun kperewo Nyeme do, nyini yiri, m si ma bo m yi ahin deke nnyom nu. ²³ Ma ka afien ni afien wo, dama m koro ka ma m wu wo na m ko wo Kristo do, m nu ka nyini n ti ye tara durunya n nu fen bo m wo ni. ²⁴ Ama, nzen m kaaki nie bekun a, ambere dee ti, i ti ye ni ka ma m wu, ama, m wo ni m ngoo durunya n nu fen. ²⁵ To. Nyini dee ti, m si tenle su ka m wu ma kisa, m wo bere wo, na m buka am na am koro yo Kristo yarada ni nahore, na am ahore jo. ²⁶ Adena nzen m ba kaaki ba nieleri am busu bekun, nyini sangga, am la deke bo am koro fa kansi Yesu Kristo, fa ko sa n bo wo yo ama m ni.

²⁷ To, kisa, jore kere bo i wo bere la ka, am ma am woowa ti kabo Kristo labari kpa n kere ka am wo barasu ni, na nzen m ba koro ba nieleri am busu, wara ma koro aba ma n kere, na m ti am jore ka Awiewie Casi n ma am la jinakunsu, na am la sunsuni kun ni anose, suboro am nyi sutu ngoni kan Kristo labari kpa n jore kere minem na bu yo yarada. ²⁸ Na ma am soro sere fa ko am kpofom do, am ma am ahore ti siiwa sangga kere, nyini ma bu nu na bu si ka bu ka ngbeen a, ama, ambere yiri, am nya tiide, dama Nyeme ma am nya tiide a. ²⁹ Dama Nyeme ace am aceeri Kristo dee ti, ka am yo Kristo yarada, ma nyini ngumi, ama, am kaaki di wahara ma i. ³⁰ Nyini ti, kisa am koro buka m na ya kere kun nyini lue ni. Yiri ye am yo nuuri ka m tu i ngoni n a, ye kisa am ti ka m toko tu i ngoni n a.

2

Kabo Yesu Kristo yikofa n yoori i nu kaan barasu ni

¹ Kristo wo am nu n dee ti, yiri ma am ahore si a, na i dee koro bo i fa koro am ni, da am ahore. Am ni Awiewie Casi n la wo fie, am yo sakpa na am si am bengum anjufo. ² Nyini dee ti, m sere am wo, jande, am kere fa sunsuni kun, na am koro am bengum, na am fa anose, na m ahorejo ko sin su. ³ Ma am sunsun kabo am yo na ambere ngumi nya i, ma am wura am nu kpiri, ama, am yo am nu kaan, am bu am bengum ka bu tara am. ⁴ Ma am nie kabo am yo na ambere ngumi yo ye, ama, am nie kabo am yo na am bengum gusu yo ye. ⁵ Am ma am sunsuni ti kabo Yesu Kristo dee ti barasu ni. ⁶ I woowa ti kabo Nyeme woowa ti n wo sangga kere, ama, wo se ma een be ka i tu ngoni wura i nu kpiri na i ni Nyeme se, ⁷ ama, i keteeri nyini n kere bo ma i ti i dee n wo, na wo fa i nu ayo akoo, na wo kaaki adamande. I woowa ti kabo adamande woowa ti barasu n wo, ⁸ i yoori i nu kaan wo, na wo de Nyeme noanie ni, haari na wo wu yiwee tie, yiri la bo bu kpamaari i baka jaanu n su ni. ⁹ Nyini dee ti, ye Nyeme awura i kpiri agaya aye i su angoro ama i duma bo i tara duma kere n a, ¹⁰ adena mine ni deke kere bo bu wo angoro, ni bo bu wo durunya n nu fen, ni bo bu wo asien bu n tiiri Yesu duma ni, bu kuu i na bu su i. ¹¹ Na sono kere teke i noo kan ka Yesu Kristo ti deke n kere Mibie a, nyini wura ya Si Nyeme kpiri a.

Am ma ya woowa ta wein durunya n nu

¹² Nyini dɛɛ ti, m ninbaa koroowam, am yo deeri m nɔaniɛ n wɔ sanɔa kɛrɛ, kisa bo m wo má am dɔ ni, nyini ti ye ni ka am de m nɔaniɛ n tara kabo m yo wo am dɔ n a. Tiide n bo am anya i n dɛɛ ti, am yo Nyemɛ juma n ni anyumboro, bo i kere ka am anya tiide, na am soro Nyemɛ. ¹³ Dama Nyemɛ suyo i juma am ahore su a, na i ma am de i nɔaniɛ ni, na am yo i koroowa. ¹⁴ Deke kɛrɛ bo am yo i ni, má am nɔnɔti na am se akuruwa, ¹⁵ adena am yo mine casim bo be koro jaraki má am, na am yo Nyemɛ nbaam bo am la má nɔgasi be na am ma am woowa ti wein, na am wo nyumafɔ satieyofɔ nɔgɛɛn m n nu, na am ta ka asarambaam. ¹⁶ Na am bita Nyemɛ nɔaniɛ ni, yiri ma minem nɔnɔ a. Nzen am yo sɔ, nyini ma m koro bo m hoe fa kɔ am woowa n su a, cɛɛn n bo Kristo bá kaaki ba ni, na m si ka juma n bo m yiiri anyumboro yoori am nu ni, aka má nɔgɛɛn. ¹⁷ Kabo am ayo Kristo yarada, na am sukun am nɔnɔ yo i juma n ni nahɔrɛ su ni, na haari nzen m wuuri mmɔɔ na am yarada buka su, m ahore ti jɔɔwa, na i yo m ni ambɛrɛ kere fie, ¹⁸ am gusu ma am ahore jɔ kabo m ahore ti jɔɔwa barasu ni.

Timoti ni Ipaforoditosi jɔrɛ

¹⁹ Nzen ya Mibiɛ Yesu soro su, m la ahoresi ka i cɛ má, m súnma Timoti am dɔ na i ba niɛ am busu, na i ba kaaki baari, na m gusu tí kabo am wo ti na m ahore da. ²⁰ Deke bo i ti na m sunma i am dɔ n la ka, be cɛɛ wo má am nu, yiri nɔgumi ti bo i buka m su bo i cɛɛ wo am nu a. ²¹ Bo ba ka n kɛrɛ, bu cɛɛ wo má Kristo juma n nu, se bu cɛɛ wo bu sa koroowam nu a. ²² Ambɛrɛ mmɔɔ ni am tii si ka Timoti woowa kere kabo i su Nyemɛ atin n su ni nahɔrɛ su, na am si ka m ni yiri sanɔa yo juma kabo baa ni i si bo su yo juma n wɔ, adena mine dɔnɔgu de labari kpa ni na bu yo yarada. ²³ Nyini ti, nzen m nɔnɔni m jɔrɛ n kɛrɛ nyaari, m súnma i kisa bɛrɛ na i ba niɛ am busu. ²⁴ Nzen Mibiɛ n soro su, m la ahoresi ka i cɛ má, mini mmɔɔ ni m tii bá niɛ am busu.

²⁵ Ma nɔnɔ ka, i ti ye ni ka m súnma ya niwa Ipaforoditosi am dɔ. M ni yiri sanɔa yo juma na ya ti ka sojam bo bu buka bu bɛnɔgu lue n nu wɔ, ya Mibiɛ Yesu dɛɛ atin su. Na ambɛrɛ ni am tii sunmaari i m dɔ, na wɔ ba abuka m ni deke kɛrɛ bo m koro ni. ²⁶ I wara ado am, ka i ba niɛ am busu, i ahore akaaki asaaki, dama am yo tiiri ka wɔ da tukpaki. ²⁷ Nahɔrɛ, i tukpaki n wuraari i, kaan sɔ, má wɔ wu. Ama, na Nyemɛ asi i anɔnɔ, má yiri nɔgumi, m ni yiri kɛrɛ, adena má m ahore saaki buka su. ²⁸ Nyini dɛɛ ti, ye m koro ka i ba am dɔ ndende, na am nɔnɔ i na am ahore kaaki jɔ bekun, na má m ahore saaki kun. ²⁹ Am de i ni am saa nnyɔ ni ahorejo, Mibiɛ n dɛɛ ti. Na am bu minem kɛrɛ bo bu woowa ti kabo i woowa ti barasu ni. ³⁰ Dama Yesu Kristo dɛɛ juma n dɛɛ ti, i yo tɔɔri i nɔnɔ a, má wɔ ka kaan sɔ na i wu. I yoori sɔ ni, adena i buka m na i yo deke n bo am akoro ayo má i ni.

3

Sɔnɔ bo i yo sa bo i kɔ atin su Nyemɛ dɔ nahɔrɛ su

¹ M ninbaam, jɔrɛ bo i wo bɛrɛ la ka, am ma am ahore jɔ kabo am ni Mibiɛ n ayo kun ni. I ti ye ni ka m kaaki kɛrɛ na m tenɔe am su fa kɔ kabo m yo kɛrɛ seeri am ni, dama i ti deke bo i buka am wɔ, na má am wura kekereke nu. ² Am si am nɔnɔ sa, ni minem bo bu ti satieyofɔm na bu ti ka caam ni, na bu nɔnɔ nzen sɔnɔ awura má kenkenne, i nya má tiide ni. ³ Yerɛ ti Nyemɛ minem bo ba wura kenkenne nahɔrɛ su a, má bɛrɛ, dama

Nyeme Awiewie Casi ni buka ya ye ya koro su Nyeme na ya la ahorejo a, fa ko kabo ya ni Yesu Kristo ayo kun ni. Nyini ti, ya daafi má sayoowa be ɲu fa ko anjuniɛmbaa su.

⁴ Mini ni m tii, má m la atin bo m koro se ka m daafi m ɲu fa ko sayoowam su. Nzen be ɲa i la atin, na i daafi i ɲu fa ko nyini sayoowam su, má m koro se ka, m la atin tara i mi fieo. ⁵ Bu wuuri m ni, m lemɔcɔe cɛɛn bu wuraaɾi m kenkenne wɔ. M ti Yisarelifɔ baa a, na m fite Benjamin dɛɛ lɛɛ anɔ n nu wɔ, na m ti Hiburufɔm anuma a nahɔre su. M yo ti Farasifɔm kun wɔ, na m su Nyeme noanie kpamaawa n su kabo i ti ye ni ka bu su i su barasu ni. ⁶ M yo bita i ni anyumboro wɔ, kabo m yo na m kere Kristo jama n wuwuruwa ni. Fa ko kabo sɔnɔ de Nyeme noanie kpamaawa n na i su i su nahɔre su, mini la má ngasi be. ⁷ Ama, nyini deke n kere bo m yo buuri bu ka bu la kperɛ ma m ni, Kristo dɛɛ ti, ma ɲu ka bu kere ti ɲgbɛɛn wɔ kisa. ⁸ I ti nahɔre wɔ ka, ma ɲu ka deke n kere ti ɲgbɛɛn wɔ, adena m koro si m Mibie Yesu Kristo, yiri tara deke n kere a. Yiri dɛɛ ti, ma yaki deke n kere bo m yo yoori bu n ka bu ti ɲgbɛɛn wɔ. M nie bu kere ka wura a, adena m koro de Kristo ni m saa nnyɔ, ⁹ na m ni yiri yo deke kun nahɔre su. Kisa m koro se má ka m yo sa bo i ko atin su Nyeme dɔ, kabo Nyeme noanie kpamaawa n kere ni, ama, kisa, kabo ma yo Kristo yarada n dɛɛ ti, ye Nyeme de m ka m yo sa bo i ko atin su i dɔ a. Deke n bo i ma i de m ka m yo sa bo i ko atin su i dɔ n la bo ma yo i yarada n wɔ. ¹⁰ Deke bo m koro i n kere la ka, m si Kristo, na m nyá i yiko n bo i koro tenggeeri i yiwee n nu ni, na m dí i dɛɛ wahara n bo i diiri n be, na m wú i dɛɛ yiwee n be. ¹¹ Nyini ma m la tama ka mini gusu tɛnge m yiwee nu a.

Kabo ya boro ya nyi na ya nya Kristo aceeri ni

¹² M suse má ka ma du mɔ aju su na m ti kabo Nyeme koro ka m ti ni, wara ma du mɔ ayo casi wɔ, ama, m toko boro m nyi wɔ, adena m nya deke n bo i ti na Yesu Kristo afa m ayo i dɛɛ sɔnɔ ni. ¹³ M ninbaam, mini ni m tii suse má ka ma ju su kabo i koro ka m woowa ti barasu n wɔ, se deke kun ye m nyunu aboro i su a, m wara afi dekem kere bo m yo yoori bu n sa, ama, m sukoro ka m boro m nyi wɔ, na m saa kan deke n bo i wo m nyunu ni. ¹⁴ Nyini ti, m mie m nyi wɔ na m ko m nyunu, adena m ko ɲu i awieeri, na m nya aceeri n bo Nyeme afere m ama m ɲgɔɔ i dɔ ni, Yesu Kristo dɛɛ ti. ¹⁵ I ti ye ni ka yere kere bo ya yarada ti biiwa ni, ya nyunu boro fa ko nyini dika. Na nzen am sunsinni ba woori i ɲgunɲumi, fa ko i noanie n su, Nyeme yí i nyi kere am, na am tí i bu. ¹⁶ Ama, bo i wo bere la ka, kabo ya bita Nyeme atin ba ju haari ni nyuma ni, am ma ya toko bita i sɔ.

¹⁷ M ninbaam, am ma am woowa ti kabo m dɛɛ n ti barasu ni. Woowa kpa n bo ya du mɔ afa akere am ni, am nie minɛm bo bu bita nyini woowa kpa n ni, na am sɔn bu su. ¹⁸ Dama sanɲa kere m nati se am ka, nbem woowa kere ka bu ti Kristo kpɔfɔm wɔ, fa ko i yiwee n bo i wuuri i baka jaanu n su ni. Ye kisa m kaaki suse am bekun ni nyunvuin n a. ¹⁹ Nyini minɛm sɔ, bu nyeme la bu kunnu wɔ, na deke bo má i ti bu nyinse ni, bu fa nyini fa yo yanfɔya. Bu sunsinni kere wo durunya n nu fɛn nengem ɲgumi sɔ a, nyini ti, bu awieeri, bu ká ɲgbɛɛn wɔ. ²⁰ Ama, yere yiri, ya ti Nyeme dika n bo i wo angoro n nu nbaam wɔ, ye ya sunɲinda ya Mibie Yesu Kristo, ya Tiidefɔ ni, ni anyumboro, ka i fite Nyeme dika n bo i wo angoro n nu ba. ²¹ Na i bá kaaki ya ahin anjuniɛ n bo i wú ni, na i má i yo

anunie fofore barasu be bo i ti kabo i dee anunie woowa n bo i la jirima n ti barasu ni. I fa i yiko n bo i fa nie deke n kere su ni fa yo nyini kere a.

4

Kabo Pɔɔlu tuuri bu fo ni

¹ M ninbaam, m koro am agaya, na m ahore abi ka m nju am ni, ambere ti, ye m ahore ti jooa sanja kere a, ambere ti m kperere bo ma di i m jumayoowa n nu a. Nyini ti, am bita Mibie n dee atin n ni nahore su. ² Yuwodiya, ni Sintiki, m sere am wo jande, ka, am fa anoose, dama am ti nibaam wo, Mibie n dee ti. ³ To, woro gusu bo a ti m matafo nahore su ni, m sere u wo, ka, a buka nyini nbara nnyom ni, dama bere yiiri anyumoro bukaari m, ye ya kaanri labari kpa n jore n a, fa sanja ni Kerementi, ni nyingam bo m ni bere sanja yo juma ni. Nyeme akere bu kere duma awura ngoo kadasi n nu. ⁴ Ya Mibie n dee ti, am ma am ahore jo sanja kere, m kaaki suse am bekun wo ka, am ma am ahore jo. ⁵ Am ma sono kere nju ka am ti benle, dama Mibie ni kaaki ba kisa. ⁶ Ma am koko fa ko deke be su, ama, am kan am sa bo i ti am mieewa kere fa kere Nyeme sanja kere, na am sere i, na am da i asi am ahore su. ⁷ Am yoori so, Nyeme ma am ahoreda bo i la ma anusu, na i sunie am dika fa ko am ahore su ni am sununni nu, dama am ni Yesu Kristo ayo kun n dee ti.

⁸ M ninbaam, jore n bo wo ka n la ka, am ma am sununni kere wo dekem bo bu ti kpa, na bu la kansu n su. Bere la deke bo i ti nahore, ni bo i la anyunuyi, ni sa bo i ko atin su, ni bo i ti casi, ni bo i ti koro sa, ni bo i la jirima. ⁹ Dekem bo am sonson bu fiteeri m do ni, ni bo am deeri m do ni, bere la m noanie ni, ni m sayoowa ni, am su bu su na am fa yo juma. Nyeme la ahoreda, yiri wo am do a.

Kabo Pɔɔlu yoori bu anse fa ko bu buka n su ni

¹⁰ Ya Mibie n dee ti, m ahore ajo ako asin su, dama wo ce bo m ti ma am nja, ama, kisa am akaaki akere ka am cece wo m nu. M si ka sanja kere am cece wo m do, se kabo am yo na am buka m n ye am anya ma atin a. ¹¹ Bo m suse so ni, i ti ma ka deke be mie m wo ye m sukan so n a, dama nzen m la i, ni bo m la ma i kere, m si kabo m tara m nju na m wo barasu. ¹² M si kabo yaari ti sono na i ti barasu, na m kaaki si kabo sono nya i agaya na i ti barasu. Deke kere bo m wo, na sa be atu m, nzen m di na m kunnu yi o, wara nzen m da ahoe o, nzen m la nenge beberebe o, wara i ti kaan o, m si kabo m tara m nju barasu na m nyunu yi i. ¹³ Yesu Kristo maari m fanga n dee ti ye m koro yo deke n kere a.

¹⁴ Ama, am ayo sakpa, kabo mie tuuri m na m ni ambere kere sanja di wahara ni. ¹⁵ Ambere Filipiyafom si ka fite sanja bo m boori i bu ba kaanri labari kpa n jore kereeri am ni, nyini sin, na m ba fiteeri Makedoniya awore n nu ni, Kristo jama kun n kpein be mmoo ace ma m aceeri be, ma ka ambere ngumi ceeri m aceeri a. ¹⁶ Sanja bo m toko wo Tesalonika mie kpiri n nu ni, na mie tuuri m ni, am yo sunmaari m do ni aceeri kpe nnyo. ¹⁷ I ti ma ka m koro ka sanja kere m sude aceeri fite am do o, ama, m koro ka am yo so, na Nyeme yo am kisi. ¹⁸ Deke n kere bo am fa sunmaari m do ni, m saa akan i, am ace m atara kabo ma m koro ni mmoo. Kisa m koro ma pui kun, dama Ipaforoditosi afa am aceeri n kere aba ama m. I ti ka yoowa bo ba yo i ama Nyeme na wo sun i nu ade i ni akunnujo wo. ¹⁹ M Nyeme Feme ni, yiri la nenge ni ajeke kere a, i kere wo Yesu Kristo

dɛɛ jirima nu wɔ, i má am deke kɛɛ bo am fun i. ²⁰ Ya Si Nyɛmɛ ni, yiri ti ye ni ka ya kansɛ i sanga kɛɛ sanga. Ami.

Kabo Pɔɔlu yoori bu anse awieeri su ni

²¹ Am bisa Nyɛmɛ minɛm kɛɛ dɔŋgu ma m. Bɛɛ ti Yesu Kristo dɛɛm a. Ya ninbaam bo bu wo m dɔ fɛn n bisa am kɛɛ dɔŋgu. ²² Nyɛmɛ minɛm kɛɛ bisa am dɔŋgu, maala bo bu yo juma Romafom Fɛmɛ Kpiri Siza dika ni. ²³ Ya Mibiɛ Yesu Kristo buka am kɛɛ.

Pɔɔlu kadasi bo i kerɛ fa maari KOLOSIYAFOM ni

1 Mini Pɔɔlu bo Nyemɛ dɛɛ koroyanu na m ti Yesu Kristo jaramasa ni, m ni ya niwa Timoti ² sukere ahin kadasi n ma Nyemɛ minem bo wɔ yi bu Kolosiya mie kpiri n nu n a, na bu ti ya ninbaam bo bu su Kristo su nahɔre su ni. Ya Si Nyemɛ buka am na i ma am ahoreda.

Kabo Pɔɔlu sereeri Nyemɛ na i daari i asi ni

³ Sanja kere ya sere Nyemɛ ma am wɔ, yiri ti ya Mibie Yesu Kristo Si a, na ya da i asi fa kɔ kabo am woowa ti barasu n wɔ, ⁴ dama ya ti kabo am ayo Yesu Kristo yarada, ni kabo am koro Nyemɛ minem kere barasu ni. ⁵⁻⁶ Deke n bo i ti na am yoori sɔ n la ka, am la ahoresi ka am nyá deke n bo Nyemɛ afa ase angoro ka i fá ma am ni. Am du mɔ tiiri nyini ahoresi n jɔre sanga bo minem ba kaanri labari kpa n bo i ti nahɔre n jɔre kereeri am n wɔ. Labari kpa n bo am deeri i ni, wɔ tereki abara aye durunya n kere, mine ade i, bu suyo sakpa durunya n kere nu. Fite sanja bo am tiiri i ni, am deeri i ye am siiri sakpa n bo Nyemɛ ayo ama am ni nahɔre su n a. ⁷ Ya lamoko akɔɔ Ipafarasi bo ya koro i ni, yiri du mɔ kereeri am ahin labari kpa n a. Yiri ti Kristo amususufɔ bo i la dabunju na i yo i juma buka am a, ⁸ yiri seeri ya kabo Nyemɛ Awiewie Casi n abuka am na am koro minem barasu n a.

⁹ Nyini ti, fite cɛɛn bo ya tiiri kabo Nyemɛ ayo sakpa n ama am ni, sanja kere ya sere Nyemɛ ma am wɔ, ka i ma am si nahɔre su kabo i koro ka am yo barasu ni, na i kaaki ma Awiewie Casi ma am nya si ni alecira barasu kere. ¹⁰ Nyini ma am koro wo kabo i ti ye ni ka Ya Mibie minem wo barasu n a, na am yo kabo i koro n kere, na am yo sakpa barasu barasu kere, na am si Nyemɛ nahɔre su buka su. ¹¹ Ya kaaki sere Nyemɛ ka i ma i jirima ni i yiko n bo i la má anjus n ma am fanja barasu kere, na am koro mindi, na am la sawɔre fa kɔ kekereke kere bo i tu am, ni ahorejo. ¹² Na am da ya Si Nyemɛ asi, dama yiri ama am ayo minem bo am aju su ka am sanja nya deke n bo i fá ma i minem bo bu wo wein n nu ni. ¹³ Yiri ye wɔ yi ya afite awosin dɛɛ femeya yiko n kere nu, ye wɔ fa ya awura i Wa koroowa n dɛɛ femeya n nu a. ¹⁴ Yiri Kristo dɛɛ ti, ya nya tiide, ye wɔ fa ya satie ace ya.

Kabo Kristo woowa ni i juma ti barasu ni

¹⁵ Kabo Nyemɛ bo ya ŋu má i n woowa ti ni, yiri Kristo woowa ti sɔ ɔ, yiri ti Nyemɛ Wa kpian n bo i ti deke kere bo Nyemɛ ayi bu n tii a. ¹⁶ Yiri ye Nyemɛ maari i yiiri deke kere bo i wo angoro ni asiengu n a, ni dekem bo ya ŋu bu, ni bo ya ŋu má bu ni, ni yikofɔm kere, ni nfangafɔm, ni nfemem kere. Nyemɛ maari yiri yiiri deke n kere a, adena deke n kere wura i kpiri. ¹⁷ Yiri du mɔ woori bere wɔ ka, ye Nyemɛ nya ba yiiri deke n kere a. Yiri ma deke n kere toko wo bere a. ¹⁸ Yiri ti i jama n kere tii a, ye i jama n ti i ŋuniembaa ni, yiri ti i jama n bumboori a, yiri ye Nyemɛ adu mɔ atenge i yiwee nu a, adena i yo deke n kere bo Nyemɛ ayi bu n mɔfo. ¹⁹ Dama wo sun Nyemɛ nu ka, i dɛɛ woowa kere wo i Wa n nu. ²⁰ Na Baa n dɛɛ ti ma Nyemɛ akoro akaaki deke n kere bo bu wo angoro ni asiengu ama bu ni

Nyemε ayo kun, i mbunja n bo i fiteeri i n̄unie nu baka jaanu n su ni, ayo bu ni Nyemε afien d̄on̄gu a.

²¹ Amberε, san̄ga be, am yo woori dede ni Nyemε w̄o, am yo ti i kp̄o-fōm w̄o, dama am yo yo satiem w̄o, na am sunsunni ti má kpa, ²² ama, kisa i Wa n woori ka adamande w̄o, na i wuuri baka jaanu n su ni, nyini ma am ni yiri ayo kun a, adena i yó am casi, na má be koro jaraki am, na am lá má ngasi be Nyemε do. ²³ Ama, i ti ye ni ka am subita yarada n bo am la i kenken san̄ga kerε, na má am yaki i, má am ma deke be kanda am fa k̄o kabo am tiiri labari kpa n bo i maari am yoori i tama n j̄orε ni. Nyini labari n ye bu kaanri i j̄orε durunya n kerε nu n a, ye mini P̄ōlu mm̄ō ti i amususuf̄o, ye m kan i j̄orε n a.

Kabo P̄ōlu yo juma ma Kristo jama n barasu ni

²⁴ Ama, kisa w̄o yo m fie kabo m sudi wahara amberε d̄ε ti ni, na wahara n bo m di i m n̄unie n nu ni, m sudi i s̄o haari m k̄o wie i, kabo Kristo gusu diiri wahara ni, m dí i ma i jamam bo bu ti i n̄uniembaa n w̄o. ²⁵ Nyemε ayi m ka m yo Kristo jama n amususuf̄o a, ye w̄o ma m ahin juma n ka m yo buka am a. Nyini la bo i n̄a m kan i n̄oan̄ie n kerε pepere kere am ni. ²⁶ I ti j̄orε bo Nyemε yo fa fīeri dawafōm kerε su w̄o, ama, kisa w̄o fa i akere i minem bo w̄o yi bu ni. ²⁷ Berε ye Nyemε koro ka i kere bu j̄orε bo i wo fīewa nu n a, yiri la alekutura sa bo i la má ājusu na i koro ka i yo ma amberε bo am ti má Yudafōm ni. Yiri la ka, Kristo wo am nu, na am la ahoresi ka am nyá i d̄ε jirima woowa n be. ²⁸ Ya kan Kristo j̄orε kere s̄ō kerε w̄o, na ya kere bu na ya b̄ō bu, ni alecira bo w̄o fa ama ya ni, na bu ba i d̄o ba su i ka minem bo bu nyunu ati Kristo d̄ε atin su. ²⁹ Nyini d̄ε ti, ye m yo ahin juma n ni anyumboro n a. I d̄ε yiko n bo i la má ājusu ni ma m fan̄ga ye m koro yo juma n a.

2

¹ M koro ka am si kabo m tu n̄goni yo juma n ni anyumboro ma amberε, ni Lawodikayafōm, ni minem bo bu nya si má m ni. ² M koro ka m yo s̄o na i wura am kp̄erε kekereke, na am la an̄ōs̄e, na am koro am benggu ni nah̄orε su, na am si Nyemε nah̄orε su, na am de i n̄oan̄ie ni, na i ma am ahorej̄o, na am si j̄orε n bo Nyemε yo fa fīeri ni. Yiri la Yesu Kristo. ³ Yiri n̄gumi ti bo i koro ma ya alecira ni si kerε fa k̄o Nyemε j̄orε n bo i wo fīewa nu wo i d̄o ni.

⁴ M koro má ka be fa an̄ōfīfīe daka am, nyini d̄ε ti, ye m se am s̄o n a. ⁵ Haari ni bo m wo má am d̄o ni, m sunsunni yiri wo am d̄o, kabo am ayo Kristo yarada nah̄orε su na am la an̄ōs̄e bita i atin kenken ni, nyini ayo m fīfīe agaya.

Am ma am woowa ti kabo Kristo d̄ε ti ni

⁶ Kabo am asoro su ade Yesu Kristo ka am Mibie ni, am ma am woowa ti ka minem bo bu ni yiri ayo kun ni. ⁷ Am bita i kekereke, na am subuka su fa k̄o Nyemε atin su, na am ma am yarada yo biiwa nah̄orε su kabo ba kere am ni. Na am suda i asi agaya.

⁸ Am si am n̄u sa, na má be fa adamande n̄gon̄le, ni sa n̄gb̄en be dadaka am na am su bu su. Berε la adamande kereewam, ni durunya n nu satie yoowam bo bu fa kere minem na i ti má Kristo d̄ε kereewa ni. ⁹ Dama Nyemε d̄ε woowa kere wo Kristo d̄ε n̄unie n nu w̄o. ¹⁰ Kabo am ni yiri

ayo kun ni, nyini ma am anya deke kere pepere a. Yiri ti yikofom, ni nfangafom kere tii a.

¹¹ Kabo am ni Kristo ayo kun ni, nyini kere ka am awura kenkenne nahore su a, ma ajuniembaa su yoowa bo adamande yo i ni, ama, yiri la bo Kristo ayi am satie n kere ni. ¹² Saŋga bo bu biɛri am Nyeme nzue ni, i kere ka ba saŋga ase am ni Kristo wo leɛ, na am ni yiri asaŋga atenge i yiwee n nu leɛ, dama am la yarada ka Nyeme deɛ yiko n nu ye wo tenge Kristo i yiwee n nu a. ¹³ Saŋga be, am yo ti fuinm wo, dama am ti satieyo-fom wo, na am ayo awura ma kenkenne na am su ma Nyeme. Ama, kisa Nyeme ama am ni Kristo asaŋga anya ngoo fofore. Wo fa ya satie kere ace ya. ¹⁴ Satie kere bo ya yo yoori na ba kere i ka i ti ngasi jore ni, Yesu yiwee n bo i wuuri baka jaanu n su n deɛ ti, wo nmisi ayi nyini ngasi sa n kere, ¹⁵ na wo kunma yikofom ni nfangafom kere, awura bu nyinse fofoe nu.

¹⁶ Nyini ti, ma am ma be jaraki am fa ko sayoowa be su, kabo am yo fa ko diire diiwam ni bu ciirem, wara deke nuuwam ni bu ciirem, wara ceen-kpiri ciirem, wara sara fofore ciire yoowam, wara Njumiyi ceen n ciirem.

¹⁷ Nyini yoowam kere ferema ni deke n bo i suba n wo, yiri la Kristo. ¹⁸ Am si am nu sa ni minem bo bu na ba nu deke yikereewa nbem, na bu yo bu nu ka bu ti tarakam, na bu su merékem ni. Adamande deɛ sunsunni nu kpirikoro la nyini n kere bo bu yo so ni. Ma am ma bu nu am ngasi be.

¹⁹ Nyini minem so da ma Kristo bo i ti i jama n tii n nu. I jama n ti i njuniembaa a. Yiri nie i njuniembaa barasu barasu n kere suyo i kun a, na i ma i wura i benggu nu, na i sasa suyo fanga, na i buka nyemesu atin su, kabo Nyeme koro ni.

²⁰ Kabo am ni Kristo asaŋga awu ni, am anya am tii afite durunya n nu satie yoowam kere nu. Nzu ti ye am su bu nyini ciirem su a? ²¹ Bo bu na, ma am tara ahin, ma am di ahin, ni bo bu na ma am fa am saa kan ahin dekem ni. ²² Nyini ciirem kere ti adamande deɛ kereewam wo, nzen sono suuri bu su, bu kere kaari ngbeen wo. ²³ Nyini ciirem ni, mine sunsun ka bere n bo bu su nyini n kere su n ti alecirafom wo, ama, bu ti ma alecirafom, bu su dekem bo bu ahorembaa koro ni su a, na bu yo bu nu taraka, na bu sukere bu nu wahara, ama, nyini n kere bo bu yo i ni, bu koro tara ma bu nu fa ko adamande konviki dika.

3

Woowa dawa n ni woowa fofore n jore

¹ Nyini ti, kabo am ni Kristo asaŋga atenge i yiwee n nu ni, am ma am ahorembaa kere wo dekem bo bu wo angoro n su, dika n bo Kristo tana Nyeme saa fomboro su ni. ² Am ma am sunsunni kere wo dekem bo bu wo angoro n su, ama, ma dekem bo bu wo durunya n nu fen ni. ³ Dama am ni Kristo asaŋga awu wo, ye am ni yiri ayo kun a, ye Nyeme afa am ni yiri ngoo afie yiri ni i tii do a. ⁴ Kristo ti am ngoo nahore su a, i ba baari, am ni yiri kere saŋga fite a, na am nya i jirima woowa ni.

⁵ Nyini deɛ ti, am yaki am njuniembaa sa koroowa kere, ma am yo sakaraya, am yaki dangba sayoowam, am yaki konviki ngbeenngbeen, ma am ma am nyunu boro satieyo su. Ma am ma am nyunu boro nenje kpini su, sono kere bo i yo so, i mi su ma Nyeme, i su nengem wo. ⁶ Nyini deɛ ti, ye Nyeme fa yaa cin minem sui a, bere bo ba kete ka bu de ma i noanie na bu yo nyini sam ni. ⁷ Saŋga be, amberɛ mmoo ni am tii yo yo nyini

sam wɔ, dama kabo am woowa yo ti ɛɛ. ⁸ Ama, kisa, am yaki nyini kere fieo, yaafa ni aɲunkpini, na má am ma nzuko kpɛ ni jɔre ɲgbɛɛɲgbɛɛn fite am nɔɔ nu, ⁹ má am bu kɔre sɔ am bɛngu, dama am ayaki am dawa dɛɛ yoowa n kere fieo fieo, ¹⁰ am afa wo fɔfɔre. Nyeme suma am nyini woowa fɔfɔre n a, adena i má am woowa ti kabo i dɛɛ woowa ti barasu ni, na am koro si i nahɔre su. ¹¹ Nyini woowa fɔfɔre n bo Nyeme ayo i n dɛɛ ti, Yudafoɱ ni minem bo bu ti má Yudafoɱ ti kun wɔ, minem bo ba wura kenkenne o, ni bo ba wura má kere ti kun wɔ, ni minem bo bu jɔɔ anie barasu nbem, ni minem bo bu nyunu nya teke má, ni akɔɔm ni awurunbaam, bu kere ti kun wɔ. Ama, bo i kɔ tara bu kere n la Kristo, yiri wo bu kere ahore su a.

¹² Am ti minem bo Nyeme koro am, na wɔ yi am afa ayo i dɛɛm wɔ. Nyini ti, i ti ye ni ka am si aɲunfo na am buka minem, na am yo am ɲu kaan, na am yo benle, na am la mindi, ¹³ na am yo sawɔre de am bɛngum. Nzen be ni i bɛngu anya jɔre, am fa ce am bɛngu. Kabo Kristo afa am ɲgasi ace am ni, amɛre gusu fa am bɛngum ɲgasi ce bu. ¹⁴ Bo i tara i kere n la ka, am koro am bɛngu, dama koro ma am yo kun a, na am yo anɔɔse nahɔre su. ¹⁵ Kristo afere am ayo am deke kun ama am ahoreda, nyini dɛɛ ti, am ma nyini ahoreda n wo am dɔ sanɲa kere, na am suda Nyeme asi. ¹⁶ Am ma Kristo jɔre n wo am ahore su ni nahɔre su. Am fa Nyeme nɔanie na am fa kere am bɛngu, ni alecira kere bo am la i ni, na am fa tu am bɛngu fɔ. Am fa Nyeme nɔaniem bo bu wo kansu jue kereɛwam n nu n fa di jue kansu Nyeme, na am di jue n bo Awiewie Casi n kere am, na am di jue da Nyeme asi am ahore su. ¹⁷ Am sayoowa, ni am jɔɔɔwa kere nu, am yo i ya Mibie Yesu dɛɛ duma n nu, na am da ya Si Nyeme asi Kristo dɛɛ ti.

Kabo i ti ye ni ka Kristo susufɔm bita bu awuru barasu ni

¹⁸ Nbaram, am de am hunm nɔanie kabo i ti ye ni ka Mibie n susufɔm yo ni. ¹⁹ Nbiesɔm, am koro am yim, má am bita bu ni joko tie. ²⁰ Nbaatumam, am de am sim ni am nim nɔanie fa kɔ deke kere su. Nzen am yo sɔ, nyini yo Mibie n fie a. ²¹ Nbaasim, má am yo sa bo i ye am nbaam yaa su, na bu ahore saaki. ²² Amɛre bo am ti akɔɔm ni, am de am mibiem bo bu wo durunya n nu fen n nɔanie deke kere nu, má am yo ka bu nie am dɛɛ ti, na am koro ka am yo na bu ahore jɔ am ɲu, ama, am yo deke kere bo bu ɲa am yo i n ni am ahorembaa kun, ka am su Mibie n dɛɛ ti. ²³ Am yo am juma kere ni am ahorembaa kun, ka am suyo ma Mibie n wɔ, ama, má ka am suyo ma adamande wɔ. ²⁴ Am si ka am nyá ɲkatɔ bo Nyeme ase ka i fá ma i minem ni. Dama am Mibie n bo am su i ni, yiri la Kristo wɔ. ²⁵ Sono kere bo i yoori sa bo i ti má kpa, Nyeme tó i mi kaari, dama Nyeme tantambu má nu.

4

¹ Amɛre gusu bo am ti mibiem ni, am yo am akɔɔm kpa, na am yo deke bo i ti ye ni ka am yo ma bu ni, dama am si ka am gusu la am Mibie n bo i wo ɲgoro.

Nyemesere ni fɔtu jɔre

² Am susere Nyeme sanɲa kere ni anyumboro, má am fa am ɲu ji, am suda i asi. ³ Nzen am sere Nyeme, am sere ma ya gusu, na Nyeme teke atin ma ya na ya kan labari kpa n fa kɔ Kristo jɔre n bo i yo wo fieɛwa nu n kere minem. Dama labari kpa n dɛɛ jɔre ti, ye m wo dansaraka nu n a.

⁴ Am sere Nyeme ma m, na i jina m sin na m koro kan labari kpa n kabo i ti ye ni ka m yi i bu nyunyumi kere minem na bu ti i bu. ⁵ Am fa ngonle na am si kabo am wo fa ko minem bo bu ti ma Kristofom do. Sanja kere bo am nya atin, am fa yo sakpa, kabo i ti ye ni ka am yo ni. Ma am saaki am sanja n bo am la i ni. ⁶ Sanja kere bo am na am jojo minem do, am ma am nonie fite kpa na i yo bu fiefie, na am si kabo am bo sondo kere nu barasu.

Kabo Pɔɔlu yoori bu anse awieeri su ni

⁷ Ya niwa Tikikusi ba kan m nusu jore kere kere am. Yiri ye ya koro i agaya, i bita nahore fa ko i juma su, i ti ya lamoko akoo o, fa ko Mibie n juma n su. ⁸ Nyini ti, ye m susunma i am do n a, ka i ba kan kere am kabo ya kere ti barasu, na am ahore si.

⁹ I ni Onisimo suba a. Yiri mmoo ti ya niwa bo ya koro i wo, i bita nahore fa ko i juma su, i ti am be wo. Bu ba kan deke kere bo i suyo fen kere am.

¹⁰ Arisitakusi bo m ni yiri kere wo dansaraka nu fen ni, bisa am kere dongu. Banabasi niema Marako gusu bisa am kere dongu. Ma du mo ase am kabo am yo barasu, ka i baari, am de i ni am saa nnyo. ¹¹ Yesu n bo bu kaaki fere i ka Jusitosi n gusu bisa am kere dongu. Bere mine nsan n ngumi ti m lamoko Yudafom bo ba yo yarada, na m ni bere sanja yo Nyeme femeya n nu juma n a. Bu ti minem bo bu ma m ahoresi. ¹² Ipafarasi gusu bo i ti am be na i ti Kristo akoo n bisa am dongu. Sanja kere i sere Nyeme ni anyumoro ma am wo, adena am la jinakunsu na am su Nyeme ni nahore, na am yarada yo biiwa, na am de i nonie ni kabo Nyeme koro n kere. ¹³ Mini mmoo ni m tii koro di i daani, kabo i yi anyumoro yo juma ma ambere, ni Lawodikayafom, ni Herapolisifom barasu. ¹⁴ Luka bo ya koro i na i ti dokotie ni, i ni Demasi kere bisa am dongu.

¹⁵ Am bisa ya ninbaam kere bo bu wo Lawodikaya ni, ni Nimfa, ni Kristo jama n kere bo bu nati tien bu noo i dika n dongu. ¹⁶ Nzen am kaanri ahin kadasi n wieeri, am yo anie na am fa ma Lawodikayafom na bu gusu kan i. Na am boro am nyi na am gusu kan m kadasi n bo bere Lawodikayafom fa ma am ni. ¹⁷ Am se Akipusi ka i boro i nyi, na i yo juma n bo Mibie n fa maari i ni, na i wie i.

¹⁸ Mini Pɔɔlu ni m tii sufa m saa sukere ahin kerewa n bisa am dongu a. Ma am ma am wara fi ka m wo dansaraka nu wo. Nyeme buka am kere.

Ɖoolu kadasi ciciri su bo i kere fa maari TESALONIKAFOM ni

¹ Mini Ɖoolu, ni Silivanusi, ni Timoti sukere ahin kadasi n ma ambere Kristo jama n bo am wo Tesalonika mie kpiri n nu na am ti ya Si Nyeme ni ya Mibie Yesu Kristo dee minem ni. Nyeme buka am, na i ma am ahoreda.

Kabo Tesalonikafom woowa ni bu yarada tiiri barasu ni

² Saŋga kere ya da Nyeme asi ambere kere dee ti wo, na ya susere Nyeme ma am, ³ na ya sutenge am su ya Si Nyeme do, kabo am fa am yarada fa yo juma barasu ni, ni kabo am la koro, na am fa yo juma barasu ni, ni kabo am bita am tama n kenken fa ko ya Mibie Yesu Kristo do ni. ⁴ Ya ninbaam, Nyeme koro am, na ya si ka wo yi am ka am yo i tienngu dee minem, ya si ka i ti so o, ⁵ dama saŋga bo ya kaanri labari kpa n kereeri am ni, wo ti ma nɔaniɛ jɔjɔwa ngumi wo, ama, i fite Awiewie Casi n dee yiko n nu wo, ye am siiri tenle su ka i ti nahore a. Saŋga bo ya woori am do ni, am ŋuuri kabo ya wo tiiri barasu, i fiteeri ka ambere dee ti ye ya woori so a, adena i buka am. ⁶ Na am ason ya ni Mibie n dee wo n su, haari ni bo am diiri wahara agaya n kere ni, am deeri labari kpa n wo, ni ahorejo n bo i fite Awiewie Casi n do ni. ⁷ Am nyini wo n ti, yaradayofom kere bo bu wo Makedoniya ni Akaya aworem n nu anu ka i ti ye ni ka bu son am su. ⁸ Ma ka Makedoniya ni Akayafom tiiri Mibie n labari n fiteeri am do n ngumi, ama, yarada n bo am yoori Nyeme ni, i jore abara aye deke kere. Nyini ti, ya la ma jore be bo ya kan kun. ⁹ Nyini minem n kere kan kabo am deeri ya barasu, saŋga bo ya baari am do ni, ni kabo am kaakiiri am sin boori amɔem na am su Nyeme bo i ti nahorefɔ na i wo bere saŋga kere ni, ¹⁰ na am ŋminda i Wa Yesu, yiri fite Nyeme do angoro ba a, yiri ye Nyeme atenge i yiwee n nu n a, yiri yi ya fite jina cɛen dee kekereke n nu a.

2

Kabo Ɖoolu yoori i juma Tesalonika mie kpiri n nu barasu ni

¹ Ya ninbaam, ambere mmoo ni am tii si ka, ba n bo ya baari am do ni, wo ka ma ngbeen. ² Am si kabo bu boori ya, na bu wuruuri ya nyinse Filipiya mie kpiri n nu ka, ye ya nya baari am do Tesalonika a. Ama, na Nyeme ama ya ahoresi na ya koro akan i labari kpa n akere am, haari ni bo mine donngu asoro ma ya su mmoo ni. ³ Nɔaniɛ n bo ya kan kereeri am ni, i ti ma ka ya mini atin wo, wara i ti ma ka ya la sunsunni tie be wo, i sa su ti ma ka ya koro ka ya dadaka be wo. ⁴ Ama, saŋga kere ya jɔjɔri kabo Nyeme koro n wo, dama yiri jina ya sin a, ye wo fa labari kpa n ama ya ka ya kan i. Ya yo ma ka i sun adamande nu wo, ya yo ka i sun Nyeme nu a, dama yiri fiiti si deke bo i wo ya ahore su a. ⁵ Am si tenle su ka ya ba abo ma am anɔɔfie wo, na ya ba akan ma labari kpa n ka ya nyunu aboro nenje kpini su wo. Nyeme wo ya daani, ⁶ ya yo akoro ma kansu am do, wara be do. ⁷ Ma kabo ya ti Kristo jaramasam ni, ma ya koro se am ka am yo deke kere ma ya. Ama, saŋga bo ya woori am do ni, ya woori benle wo, kabo bara baawufɔ nie i nbaam dika n wo. ⁸ Koro bo ya fa koro am n dee ti, ye ya kaanri Nyeme labari kpa n maari am a, na ya gusu akun

ya ŋu ama am, dama ya koroori am agaya n dɛɛ ti. ⁹ Nahɔrɛ, ya ninbaam, am tenge su kabo ya boroori ya nyi yoori juma nahɔrɛ su, ya yoori juma wiesu, ni kɔngue, adena má ya fa ya fie fie be, sanɔa bo ya kaanri Nyeme labari kpa n maari am ni.

¹⁰ Ambere yaradayofom ni, am ni Nyeme mmɔɔ kere wo ya daani, kabo ya wo tiiri, sanɔa bo ya woori am dɔ ni. Ya woori am dɔ ni akunnu fofoe wɔ, na ya sa kere akɔ atin n su, ya yo má sa be bo i fa jaraki ba.

¹¹ Am si ka sanɔa bo ya woori ni ambere ni, ya bitaari am kabo sɔnɔ bita i nbaam n wɔ. ¹² Ya maari am ahoresi, na ya dada am ahore, na ya ye am nyi ka am wo kabo i ti ye ni ka Nyeme minem wo barasu n a. Yiri fereeri am a, ka, am ba yo i dɛɛ minem bo i nife am dika, na am bá nya i dɛɛ jirima ni.

¹³ Na ya gusu da Nyeme asi sanɔa kere, dama sanɔa bo am deeru Nyeme noanie n bo ya kan kereeri am ni, am ade má i ka i fite adamande dɔ, ama, am ade i ka i ti Nyeme noanie wɔ, na i ti sɔɔ nahɔrɛ su, ye i wo ambere yaradayofom ahore su yo juma a. ¹⁴ Ya ninbaam, sam bo bu yo tuuri Kristo jamam bo bu wo Yudiya asien n su ni, nyini sam ye ba tu ambere gusu n a. Kabo am tienɔu minem akere am wahara barasu ni, sɔ ye Yudafom yo fa kereeri Kristo jamam n a. ¹⁵ Bere kuunri Nyeme noanie kanfom ye bu kaaki kuunri ya Mibie Yesu, na ba kere ya wuwuruwa, na ba yo sa bo i sun má Nyeme nu, na ba yo adamande kere kpɔfom. ¹⁶ Na ba koro ka bu kanda ya ka má ya kan Nyeme noanie n kere minem bo bu ti má Yudafom ni, adena má bu nya tiide. Na nyini satie n aba abuka bu satie n kere su akɔ asin su. Ama, kisa, Nyeme afa yaa bu ŋu, i sudi bu jɔrɛ.

Kabo má Pɔɔlu koroori ka i kɔ nie Tesalonikafom busu ni

¹⁷ Ya ninbaam, sanɔa bo ya kpaaki yakiiri am kaan sɔ ni, ya sunsunni yiri woori am dɔ, na ya wara ado am agaya, na ya boro ya nyi ka ya ba nie am busu. ¹⁸ Má ya koroori ka ya kpie ya nyi ba am dɔ. Haari na mini Pɔɔlu ni m tii akoro ka m kpie m nyi ba am dɔ, kpe nyenye kere, ama, Sitana akanda ya. ¹⁹ Ya koro ka ya kpie ya nyi ba am dɔ, dama sanɔa bo ya Mibie Yesu bá kpie i nyi ba ni, ya lá ahoresi ambere dɛɛ ti, na ya lá ahorejɔ, na ya káaki koro fɔ ka ya nya teremasu i dɔ. ²⁰ Nahɔrɛ, ambere ti, ye ya la ahorejɔ koro bo ya hoe n a.

3

¹ Kabo ya ni ambere akpaaki aɛ n dɛɛ ti, ya wara ado am agaya, nyini ti, ya ŋa yere ka Atensi mie kpiri n nu. ² Na ya sunma ya niwa Timoti ka i ba nie am busu. Ya ni yiri sanɔa yo juma fa kɔ Kristo labari kpa n kan su, ye ya sunmaari i ka i ma am nya ahoresi, na i ma am jina kenken fa kɔ am yarada n su. ³ Adena má am be ŋunie yɔrɔki i fa kɔ ahin wuwuruwam bo bu sukere am n ti. Ambere mmɔɔ ni am tii si ka, nyini sam bo bu tu yere yaradayofom ni, Nyeme koroowa lɛɛ. ⁴ Dama sanɔa bo ya toko wo am dɔ ni, ya yo seeri am ka bu bá kere ya wuwuruwa. Kabo am si ni, nyini lɛɛ ye wɔ tu ya n a. ⁵ Nyini ti, ma koro amindi má, ye m sunmaari Timoti na i ba nie ka am toko bita am yarada n kenken n a. Beni, kisa Sitana akoro anya atin adadaka am, wɔ ma ya juma n bo ya yo i am dɔ n kere aka ngbeɛn.

⁶ Ye kisa, Timoti akpie i nyi afa labari aba ama ya fa kɔ kabo am yarada, ni am koro n ti barasu. Wɔ se ya ka am la sunsunni kpa fa ma ya sanɔa kere, na am koro ka am ŋu ya kabo ya gusu koro ka ya ŋu am ni. ⁷ Nyini ti, ya ninbaam, haari ni bo ya wo kekereke nu na ya sudi wahara n kere

ni, am yarada n ama ya ahoresi. ⁸ Na nzen am jinaari kun su, fa kɔ Mibiɛ n dɛɛ atin n su, ya koro da na ya daafi. ⁹ Kisa ya si má kabo ya da Nyemɛ asi fa ma am mmɔɔ, fa kɔ ahorejɔ bambaka n bo wɔ fa ama ya, am dɛɛ ti. ¹⁰ Kɔɲguɛ ni wiesu kere ya sereeri Nyemɛ nahɔrɛ su wɔ, ka, i ma ya ba ɲu ya ɲu, na ya kere am dekem bo i kpɛ am su fa kɔ am yarada n su.

¹¹ Ya sere ya Si Nyemɛ, ni ya Mibiɛ Yesu ka bu teke atin ma ya, na ya koro ba am dɔ. ¹² Na ya sere Mibiɛ ni, ka, i ma am la koro buka su, na am fa koro am beɲgu ni minem kere kɔ sin su, kabo ya gusu koro am ni. ¹³ Na i ma am nya ahoresi, na am jina kenken, na am ba yo mine casim bo be koro jaraki má am, ya Si Nyemɛ dɔ, saɲga bo ya Mibiɛ Yesu bá baari ni i tienɲu minem kere ni.

4

Kabo ya wo wo bo i sun Nyemɛ nu barasu ni

¹ Ya ninbaam, ya yo kereeri am kabo i ti ye ni ka am wo barasu na i yo Nyemɛ fie. Ya si ka am wo nyini wo n wɔ nahɔrɛ su. Ama, ya sere am jande wɔ, ya Mibiɛ Yesu duma n nu, ka, am wo wo bo i kɔ tara sɔ. ² Dama am si noanie n bo ya Mibiɛ Yesu fa maari ya na ya gusu fa maari am ni. ³ Nyemɛ koro ka am wo wo casi wɔ, na má be yo sakaraya. ⁴ I ti ye ni ka biɛsɔ kere ni i yi tara bu ɲu, na bu wo wo bo i ti casi na i la kansɛ. ⁵ Má am ma am konviki wo sakaraya sereya nu kabo minem bo bu su má Nyemɛ n yo ni. ⁶ Kabo i nya ti sɔ ni, má Kristo susufɔ be se ka i bu i niwa Kristo susufɔ ɲgbɛɛn fa kɔ nyini sam su. Ya yo seeri am wɔ ni nahɔrɛ kekereke, ka, sɔnɔ kere bo i yoori sɔ, Mibiɛ ni cɛn i mi sui. ⁷ Nyemɛ fereeri ya ka ya wo wo bo i ti casi wɔ, i koro má ka ya fa ya ɲu wura sakaraya sereya n nu. ⁸ Nyini ti, sɔnɔ kere bo i keteeri ahin kereewa ni, i ti má ka i sukete adamande wɔ, ama, i sukete Nyemɛ wɔ, yiri ma am i Awiewie Casi n a.

⁹ Tɔ, fa kɔ kabo am koro am ninbaam ni, ya la má jɔrɛ be bo i ti ye ni ka ya kere ma am, dama Nyemɛ akere amberɛ ni am tii kabo am koro am beɲgu barasu. ¹⁰ I ti nahɔrɛ wɔ, ka, am koro ya ninbaam kere bo bu wo Makedoniya awɔrɛ n nu ni. Haari ni nyini mmɔɔ, ya susere am wɔ, am koro bu koro bo i kɔ tara sɔ. ¹¹ Am yo anie na am wo benle, na am nie am tienɲu juma bo am yo i, na am fien anɲye na am di, kabo ya du mɔ seeri am ni. ¹² Nzen am yoori sɔ, nyini má minem bo bu nya yo má Yesu yarada n bu am a, na am nie má be anyumbaa fa kɔ am sa koroowa su.

Kabo Mibiɛ ni bá kpɛ i nyi ba n jɔrɛ

¹³ Tɔ, ya ninbaam, ya koro ka am si deke bo i ti nahɔrɛ fa kɔ minem bo ba wu n dɔ, adena má am ahore saaki ka minem bo bu la má tama be ni. ¹⁴ Ya yo yarada ka Yesu wuuri wɔ na wɔ tenɲe bekun, nyini ti, ya kaaki la yarada ka Nyemɛ tɛɲge minem bo bu yoori Yesu yarada na ba wu ni, na i má bu su Yesu su ba. ¹⁵ Kereewa bo ya sufa kere am kisa n fite Mibiɛ n dɔ, ka, yere bo ya toko la ɲɔɔ ni, cɛɛn n bo Mibiɛ n ba baari ni, yere, ya dú má bere n bo ba wu n mɔ. ¹⁶ Dama Mibiɛ n ni i tii bá fite aɲgoro n nu jura na i má nɔɔ, na Nyemɛ mereke kpɛn n tien, na bu kán Nyemɛ awie ni. Na minem bo bu yoori Yesu yarada na ba wu n dú mɔ tenɲe bu yiwee n nu. ¹⁷ Nyini saɲga, na Nyemɛ fá bere, ni yere bo ya toko la ɲɔɔ ni, na ya kpá Mibiɛ n atin aɲgoro yinyingɲu n nu. Na ya kó wo Mibiɛ n dɔ saɲga kere. ¹⁸ Nyini ti, am fa ahin noaniem fa si am beɲgum ahore.

5

¹ Ya ninbaam, fa kɔ sanɔa n bo Mibiɛ ni bá ba ni, ya la má jɔrɛ be bo i ti ye ni ka ya kɛrɛ ma am fa kɔ nyini sanɔa n su kun. ² Dama ambɛrɛ mmɔɔ ni am tii si tenle su ka cɛɛn n bo Mibiɛ ni bá kaaki ba ni, i yó kabo awiefɔ ba kɔɔgɛ ba wɔ n wɔ. ³ Sanɔa bo minem ba suse ka tanalaifɛ ni ahoreda wo bɛrɛ ni, nyini sanɔa n nu ye kekereke kába ba tu bu a, kabo bara ba kutu ka i wu baa na i ti barasu ni. Nyini kekereke ni, sɔnɔ be kóro fite má nu. ⁴ Ama, ambɛrɛ, ya ninbaam ni, am wo má awosin nu bo Mibiɛ n ba cɛɛn ni bá fura am nu, kabo awiefɔ ba fura sɔnɔ nu na i wɔ n wɔ. ⁵ Ambɛrɛ kɛrɛ ti minem bo am wo wein n nu wɔ, kabo wiesu ti ni. Ya wo má kɔɔgɛ nu, wara awosin nu. ⁶ Nyini ti, má am ma ya daafi kabo nyingam daafi ni, am ma ya nyunu wo su na ya tara ya ŋu. ⁷ Kɔɔgɛ ye minem daafi a, kɔɔgɛ gusu ye minem nu nzan bo a. ⁸ Ama, yɛrɛ wo wein nu wɔ, nyini ti, am ma ya tara ya ŋu, na ya fa yarada ni koro fa kanda ya ŋu ka bulaari pɛpɛrɛpɛ bo ya fa kanda ya hoe su, na ya fa ahoresi ka ya nya tiide yo ka bulaari kere bo ya fa butu kanda ya tii. ⁹ Dama Nyemɛ ayi má ya ka i fá yaa na i cin ya sui wɔ, ama, i yiiri ya ka ya nyá tiide, ya Mibiɛ Yesu Kristo dɛɛ ti wɔ. ¹⁰ I wuuri yɛrɛ dɛɛ ti wɔ, na sanɔa bo i bá ba ni, nzen ya la ŋɔɔ o, wara nzen ya wu wɔ o, ya ni yiri sanɔa wo a. ¹¹ Nyini ti, am ma am beɔgu ahoresi, na am buka am beɔgu na am kɔ mɔ ni am nyemesu ni, kabo kisa na am suyo ni.

Fɔtu jɔrɛ

¹² Ya ninbaam, ya sere am wɔ, ka, am bu mɔfɔm ni, bɛrɛ bo bu yo Nyemɛ juma ni anyumboro ma am ni, na bu niɛ am su, na bu kere am Nyemɛ atin ni. ¹³ Am ma bu jirima nahɔrɛ su, ni koro, fa kɔ bu juma n bo bu yo i n dɛɛ ti. Am ma tanalaifɛ wo am ni am beɔgum dɔ.

¹⁴ Ya ninbaam, ya kaaki sere am wɔ, ka, am bɔbɔ nviɛyafɔm ni, na am ma sɛrɛfɔm n ahoresi, na am buka daburukafɔm ni, na am fa sawɔrɛ ni sɔnɔ kɛrɛ. ¹⁵ Má be se ka i fa i beɔgu satie bo i yo i fa tɔ i mi kaari, ama, sanɔa kɛrɛ am ma am sunsunni la ka, am yo sakpa ma am beɔgum ni sɔnɔ kɛrɛ.

¹⁶ Am ma am ahore jɔ, sanɔa kɛrɛ, ¹⁷ na má am se ka am yaki am nyemesere, ¹⁸ na am da Nyemɛ asi, haari fa kɔ sa kɛrɛ bo i tu am. Kabo Nyemɛ koro ka am yo lɛɛ, dama am ni Yesu Kristo ayo kun n ti. ¹⁹ Má am kanda Awiewiɛ Casi ni, am ma i yo i juma. ²⁰ Nɔanie bo minem deeri i Awiewiɛ Casi n dɔ kan kereeri am ni, má am bu i ŋgbɛɛn, ²¹ ama, am fiiti i kɛrɛ nu na am niɛ, na am de bo i ti kpa ni, na am su i su, ²² na am kete sa ŋgbɛɛnŋgbɛɛn kɛrɛ pɛpɛrɛ.

Awieeri su dɛɛ anɛ yoowa

²³ Ya sere Nyemɛ, yiri n bo i ma ahoreda n ka, i ŋmisi am ahorembaa, ni am ŋunie, ni am sunsunni kɛrɛ casi, adena am wo wo bo fin be mata má am, haari fa kɔ ju sanɔa bo ya Mibiɛ Yesu Kristo bá kpie i nyi ba ni. ²⁴ Yiri bo wɔ fere am ni, yiri la dabuɔ, i yó nyini sam n kɛrɛ.

²⁵ Ya ninbaam, am sere Nyemɛ ma ya gusu, ²⁶ na am bisa ya ninbaam kɛrɛ dɔɔgu ni koro. ²⁷ M susere am wɔ, am niɛ Mibiɛ n ti, na am kan ahin kadasi n kere ya ninbaa yaradayofɔm n kɛrɛ na bu ti.

²⁸ Ya Mibiɛ Yesu Kristo buka am.

Pɔɔlu kadasi nnyɔ su bo i kerɛ fa maari TESALONIKAFOM ni

¹ Mini Pɔɔlu, ni Silivanusi, ni Timoti sukere ahin kadasi n ma ambere Kristo jama n bo am wo Tesalonika mie kpiri n nu na am ti ya Si Nyeme, ni ya Mibie Yesu Kristo dee minem n a.

² Ya Si Nyeme ni ya Mibie Yesu Kristo buka am, na bu ma am ahoreda.

Kabo Yesu ba di minem jore barasu ni

³ Ya ninbaam, wo yo daka ka ya da Nyeme asi, ambere ti, sanja kere. Atin wo nu ka ya yo so, dama am yarada n buka su wo nahore su, na koro bo am koro am bengu n gusu subuka su so o. ⁴ Nyini dee ti, ya fa am fo so o, deke bo Kristo jamam wo kere. Ya fo fa ko kabo am ayo yarada na am la mindi fa ko wuwuruwa n kere bo minem sukere am, ni wahara n kere bo am wo i nu ni. ⁵ Nyini kere ka Nyeme di minem jore ni i nahore atin su a, na i se ka ambere ti ye ni ka am wura i femeya n nu a, wahara n bo am adi i n dee ti. ⁶ Nahore, Nyeme yo sa bo i ko atin su wo, i ma minem bo bu sukere am wahara n gusu di wahara, ⁷ na i ma ambere bo am sudi wahara n ni yere kere nya ya nu. Nyini sam kere ba yo so sanja bo ya Mibie Yesu ba fite angoro ba ni i merkem, ni bu yiko bambaka ni, ⁸ ni sin, na i ba cin minem bo ba kete Nyeme n sui, ni bo ba de ma ya Mibie Yesu labari kpa ni. ⁹ Nyeme cin bu sui haari bu duma ba bo ma, na bu nu ma Mibie ni, ni i yiko bambaka ni. ¹⁰ Nyini cee n bo i ba baari n ye i minem kere wura i kpiri a, na nyini minem kere bo bu yo i yarada n ma i jirima. Ambere mmo wo nyini minem n nu, dama am ayo labari n bo ya fa maari am n yarada.

¹¹ Nyini dee ti, ye ya sere Nyeme ma am sanja kere n a. Ya sere i ka i ma am wo wo bo i ti ye ni ka i dee minem bo wo fere bu n wo ni. Na ya kaaki sere i ka i fa i yiko n buka am, na am yo am kunnu koroowa, ni juma kere bo i ti kpa ko wie. ¹² Nzen am nya yoori so, nyini ma minem ma ya Mibie Yesu duma n jirima a, am dee ti, na i gusu ma am nya jirima. Nyeme ni ya Mibie Yesu Kristo dee ahoroma n ma i yo so a.

2

Sonotie n jore

¹ To, ya ninbaam, m sujojo am do fa ko ya Mibie Yesu Kristo ba n su wo, ni kabo ya tien ya noo na ya ni yiri ko ye n wo. Ya sere am wo, ² ka, ma am kaaki am sunsuni wara am birisi, dama nbem na Mibie n adu mo aba asin n dee ti. Haari nzen be na wo de noanie Nyeme Awiewie Casi n do, wara nzen be jooori nyini jore n so, wara nzen be seeri ka yere akere i kadasi n nu ase so a, ma am de i. ³ Ma am ma be dadaka am fa ko deke be su fieo, dama nyini cee ni ba ma, ma ka sanja n bo minem dongu ba kete ka bu su ma Nyeme ni, na sonotie n bo i bu ma ka pui wo bere n nya yi i nu fite fofoe nu, yiri n bo Nyeme fa i ji ceema sin n nu ni. ⁴ I kete deke kere bo bu fere i ka Nyeme, ni deke kere bo adamande kutu su i, na i kere i nu ka i tara bere kere pepere. Haari na i ko wura tana Nyeme Sereebiri Awuru n nu, na i se ka yiri ti Nyeme a. ⁵ Am tenje ma su ka sanja bo

m woori am dɔ ni, m yo seeri am ahin jɔrɛm kɛrɛ, nzen sɛ? ⁶ Kisa, am si deke bo i kanda i na wɔ nya ba má ni, má ka sanɔa n aju bo i yí i ɲu fite fofoe nu. ⁷ Ama, sɔnotie n bo i bu má ka pui wo bɛrɛ ni, yiri suyo i asiri nu juma wɔ kisa, má ka yiri n bo i kanda i ni, aba acin ayaki atin ni. ⁸ Dɔ na sɔnotie n nyá yi i ɲu fite fofoe nu, ama, sanɔa n bo ya Mibie Yesu bá ni, na i fita kun i, na i baawa n dɛɛ wein n gusu yó i ɲgbɛɛn. ⁹ Tɔ, kabo sɔnotie ni bá ba n yaa. I bá ni Sitana dɛɛ yiko n na i bá yo alekutura sam beberebe fa dadaka minɛm ka nyini sam fite Nyɛmɛ dɔ ɔ, ¹⁰ na i bá bu kɔrɛ ɲgbɛɛnɲgbɛɛn barasu barasu dadaka minɛm bo bu ɲɔɔ ka ɲgbɛɛn ni. Bu ɲɔɔ ka ɲgbɛɛn, dama ba koro má ka bu su atin n bo i ti nahɔrɛ n su na bu nya tiide. ¹¹ Nyini ti, na Nyɛmɛ tá bu nyi, adena bu yó deke kɛrɛ bo i ti kɔrɛ n yarada. ¹² Nyini minɛm sɔ, bo ba ya jó má nahɔrɛ n yarada ni, ama, na ba fa satieyo acici bu tii ni, Nyɛmɛ dí bu jɔrɛ na i cin bu sui.

Kabo Nyɛmɛ ayi am ka am nya tiide ni

¹³ Ya ninbaam, amberɛ bo Mibie n koro am ni, wɔ yo daka ka ya da Nyɛmɛ asi amberɛ dɛɛ ti sanɔa kɛrɛ, dama fite bumboori n ye Nyɛmɛ yiiri am ka am nya tiide a. Deke bo i ma am nya tiide n la ka, Awiewie Casi ni ma am yo Nyɛmɛ mine casim a, na am bita nahɔrɛ atin, na am yo yarada. ¹⁴ Labari kpa n bo ya kan kereeri am na am deeri n dɛɛ ti, ye Nyɛmɛ fereeri am ka am nya tiide a, na am nyá ya Mibie Yesu Kristo dɛɛ jirima woowa n be. ¹⁵ Nyini ti, ya ninbaam, am bita nahɔrɛ atin n kenken, bo ya kaanri i na ya kɛrɛeri i maari am ni, má am kaaki am sin bo i. ¹⁶ Ya sere ya Mibie Yesu Kristo ni i tii, ni ya Si Nyɛmɛ, yiri bo i koro ya, na i dɛɛ ahɔrɔma n nu, na wɔ ma ya ahoresi sanɔa kɛrɛ, ni tama kpiri ni, ¹⁷ ya sere bu ka bu ma am ahoresi buka su, na bu ma am fanɔa, na am yo sakpa, na am jɔjɔ jɔrɛ bo i kɔ atin su sanɔa kɛrɛ.

3

Am sere Nyɛmɛ ma ya

¹ Ya ninbaam, jɔrɛ bo wɔ ka n la ka, am sere Nyɛmɛ ma ya, na Mibie n labari kpa n sandi bara ye ndende na bu de i ni jirima, kabo am deeri i ni. ² Am kaaki sere Nyɛmɛ, na i yí ya fite mine tiem saa nu, dama má sɔnɔ kɛrɛ yo labari kpa n yarada a. ³ Ama, Mibie n la dabuɲu, yiri má am fanɔa, na i yó am kanda bo Sitana koro yo má am pui. ⁴ Ya Mibie n ama ya ahoresi ka am suyo deke n kɛrɛ bo ya ma am nɔɔ ka am yo i ni, am kɔ su suyo i sanɔa kɛrɛ. ⁵ Ya sere Mibie n ka i ma am si kabo Nyɛmɛ koro am barasu, ni kabo Kristo mindiiri barasu ni.

Wɔ yo daka ka sɔnɔ kɛrɛ yo juma

⁶ Ya ninbaam, ya maari am nɔɔ ya Mibie Yesu Kristo dɛɛ duma n nu ka, má am fa am ɲu gɔ ya ninbaam bo bu koro má ka bu yo juma, na bu ti nviɛyafɔm n ɲu, ba kete ka bu su má nɔanɛ n bo ya fa maari am n su lɛɛ. ⁷ Amberɛ ni am tii si tenle su ka, i ti ye ni ka am yo kabo ya yo ni. Am si ka sanɔa bo ya woori am dɔ ni, ya yo ti má nviɛyafɔm. ⁸ Ya di má sɔnɔ be diire ɲgbɛɛn. Ama, ya yoori juma wɔ nahɔrɛ su, wiesu ni kɔɲgue, adena má ya bo be kaari. ⁹ Ya yoori sɔ ni, i ti má ka ya la má atin bo ya se ka am buka ya a, ama, ya yoori sɔ, adena am ɲu i na am gusu sɔn ya su wɔ. ¹⁰ Sanɔa bo ya woori am dɔ ni, ya maari am ahin nɔɔ ni, ka, sɔnɔ kɛrɛ bo i kete ka i yo má juma, má am ma i na i di. ¹¹ Má pui ti ye ya se sɔ a,

dama ya ti labari ka am nbem wo bere bo bu ti nviyafom wo, bu yo ma juma be, se bu nati ngbennngbenn wo, na bu sufa bu noo bo minem jore nu. ¹² Nyini ti, ye ya sutu bu fo ni anyumboro su ya Mibie Yesu Kristo dee duma n nu n a, ka, bu yo anie tara bu nu, na bu yo juma na bu koro bita bu nu. ¹³ Ama, ya ninbaam, ambere yiri, ma am ma am unie yoroki am ni sakpayo. ¹⁴ Sono kere bo i keteeri noanie n bo ya kere i ahin kadasi n nu afa ama am ni, am yi koresi na am si i mi. Ma am dodo i mi, adena nyinse ti i. ¹⁵ Ama, ma am fa i mi yo am kpofa, am tu i fo ka am niwa a.

Awieeri su dee anse yoowa

¹⁶ Ya sere Mibie n ni i tii, yiri bo i ma ahoreda ni, ka, i ma am ahoreda sangha kere fa ko deke kere nu, na i wo am kere do.

¹⁷ Mini Poolu ni m tii sufa m saa sukere ahin kereewa n bisa am dongu a. Kabo sangha kere na m kere lee. ¹⁸ Ya Mibie Yesu Kristo buka am kere.

Ɖoolu kadasi ciciri su bo i kerε fa maari TIMOTI ni

¹ Mini Ɖoolu sukere ahin kadasi n a. M ti Yesu Kristo jaramasa a, Nyeme bo i ti ya Tiidefo ni, yiri ama m noo ka m yo nyini juma n a, i ni Yesu Kristo bo i ma ya tama ni.

² M sukere ahin kadasi n ma woro Timoti wo, a ti ka m wa a nahore su, dama mini ni woro yo yarada kun wo. Ya Si Nyeme, ni ya Mibie Yesu Kristo buka a, na bu si u anunfo, na bu ma u ahoreda.

Am si am nu sa ni minem bo bu kereewa ko ma atin su ni

³ M koro ka a wo Efeso mie kpiri n nu, kabo sangha bo m suko Makedoniya dee awore n nu na m seeri u ni. Mine nbem wo do bo bu kereewa ko ma atin su, i ti ye ni ka a ma bu noo ka bu yaki nyini kereewa ni. ⁴ Se bu na bu yaki kore jorem, ni nana dumam beberebe ni. Nyini jorem fa akuruwa ba a. Bu koro buka ma sono na i yo deke n bo Nyeme koroori ka i yo i. Be koro yo ma kabo Nyeme koro, ma ka i mi ayo i yarada. ⁵ Deke n bo i ti na m maari u ahin noanie n la ka, i fa koro ba a, nyini koro n fite ahorembaa fofe wo, ni sunsunni kpa, ni yarada nahore su. ⁶ Nyini mine n nbem amini ahin kereewam ni, na bu subo anzama ngbennngben. ⁷ Bu koro ka bu yo Nyeme noanie kerefom, bu kan i ni ahoresi wo, ama, bere ni bu tii si ma bu tiengu noanie jooowa n bu.

⁸ Ya si ka Nyeme noanie kpamaawa ni ti kpa a, nzen ya bitaari i kabo i ti ye ni ka ya bita i ni. ⁹ Ya kaaki si nu ka, ba fa ma noanie kpamaawa n ase ma sakpayofom n ti wo, ama, ba fa ase ama minem bo bu ma ma Nyeme noanie kpamaawa n jirima n wo, ni bo bu kete i ni, ni bo bu soro ma Nyeme ni, ni bo bu nati yo satie ni, ni bo bu woowa ti ma casi ni, ni bo bu bu Nyeme ngben ni, ni bo bu nati kun mine ni, ni bo bu kun bu nim ni bu sim mmoo ni. ¹⁰ Fa ko bo bu nati yo sakaraya ni, ni bo bu nati fa bu nu kaaki ka nbaram na bu ni bu bengu nbiesom sangha da ka bara ni bieso dee su ni, ni bo bu tara minem fanga to bu ni, ni bo bu bu kore ni, ni bo bu di kore daani ni, ni sa kere bo i ko ma kereewa kpa atin su ni, bere kere dee ti, ye ba fa noanie kpamaawa n ase n a. ¹¹ Nyini kereewa n fite Nyeme labari kpa n nu wo, bo Nyeme afa ama m ka m kan kere minem ni. Labari kpa n ti Nyeme kpiri n dee wo, yiri ti ye ni ka minem kansi i a.

Ɖoolu daari Nyeme asi fa ko kabo Nyeme siiri i anunfo ni

¹² M da ya Mibie Yesu Kristo asi ka, yiri ye wo ma m fanga, na m koro yo m juma n a. M da i asi ni kabo wo bu m ka m la dabunju, na wo yi m ka m su i ni, ¹³ haari ni bo m yo joo wuruuri i ngasi nu, na m kpieri i nzuko, na m kereeri i wuwuruwa ni, ama, nyini n kere ni, Nyeme siiri m anunfo o, dama m yo nya yo ma i yarada, nyini ti, m yo si ma sa bo m yo i ni. ¹⁴ Na yiri Mibie n ama ma di i ahorma ako asin su, na wo ma ma yo i yarada na m koro minem, kabo ya ni Yesu Kristo ayo kun n dee ti. ¹⁵ Ahin noanie n ti nahore wo, i ti ye ni ka sono kere de i ni bu saa nnyo, yiri la ka, Yesu Kristo baari durunya n nu ka i ba de satiefom tii ji wo. Mini ti sono bo m satie taraari sono kere dee a. ¹⁶ Ama, Nyeme siiri m anunfo. I yoori so o, adena Yesu Kristo koro kere kabo i la sawore beberebe ni mini

bo m satie sunnu taraari sɔno kere deɛ ni. I yoori nyini sɔ ɔ, adena i fa m fa kere minem bo bu ba ka sin ni, na bu yo i yarada nya ngɔɔ bo i la má awieeri ni. ¹⁷ Yiri ti Feme Kpiri a, na i femeya n la má awieeri, i wo bere wo sangga kere, na be gusu koro ɲu má i, yiri ngumi kpein ti Nyeme a, i ti ye ni ka minem kere kansu i na bu ma i jirima. Ami.

¹⁸ M wa Timoti, m sufa ahin noanie n fa wura u saa n nu wo lee, i su kabo Nyeme noanie kanfom du mo jɔjɔri i fa ko u do n su wo. Fa nyini noaniem ni yo ka u biesɔya nengem na a fa kun lue nyunyumi, ¹⁹ na a bita u yarada ni sunsunni kpa. Nbem akete ka bu fa má sunsunni kpa na bu yo sa bo i ko atin su, nyini ti, bu yarada bo bu yo yoori i ni aka ngbeen. ²⁰ Bere nbem la Himenasi ni Alekizanda, bere ye ma fa bu awura Sitana saa nu ka i kere bu ngɔnle, adena bu sɔnsɔn kabo má bu wura Nyeme ngasi nu kun.

2

Kabo i ti ye ni ka ya su Nyeme barasu ni

¹ Deke bo i du mo la ka, m susere am ni anyumboro wo, ka, am sere Nyeme ma minem kere, fa ko deke bo i ti bu mieɛwa su, na am da i asi fa ma sɔno kere. ² Sere Nyeme ma nfemem, ni bo bu wo yiko woobiri n kere, na ya koro wo ni tanalaifɛ, na ya woowa kere ka ya su Nyeme atin n su ni nahɔɛ, na ya wo jirima wo ni ya benɲu. ³ Nyini nyemesere n ti kpa a, na i sun Nyeme nu, yiri ti ya Tiidefo a. ⁴ Yiri koro ka sɔno kere nya tiide a, na bu si nahɔɛ atin ni. ⁵ Dama ya kere si ka

Nyeme kun n kpein wo bere a,

na sɔno kun be gusu wo bere

bo i yo adamande ni Nyeme afien donɲu a,

yiri la Yesu Kristo,

⁶ i wu maari adamande na i de bu kere tii ji.

Kabo i yoori sɔ n kere ka, sangga bo Nyeme koro ka i de adamande kere tii ji lee. ⁷ Nyini ti ye Nyeme yiiri m ka m ba yo Yesu jaramasa, na m kan i labari kpa n kere minem bo bu ti má Yudafoɲ ni, na m kere bu kereewam bo bu ti nahɔɛ ni. M sukan nahɔɛ wo, m bu má kɔɛ.

⁸ Deke kere bo Kristo jamam tien bu noɔ, m koro ka nbiesom ye bu saa su sere Nyeme. Nyini nbiesom ni, i ti ye ni ka bu nyemesu ko atin n su, na má yaafa wara akuruwa be wo bu ahore su. ⁹ M koro ka nbaram gusu di sunɲuruya nyunyumi, bo i se su. I ti má ye ni ka bu di bu tiɲmie sunɲuruya ko sin su, na má bu wura sika, wara aferem bo bu la go agaya, wara suturam bo bu la go agaya. ¹⁰ Ama, bu nyumi kere fite bu sakpa yoowa a, kabo i ti ye ni ka nbaram bo bu se ka bu su Nyeme atin n su n yo ni. ¹¹ I ti ye ni ka nbaram mo bu noɔ na bu yo bu ɲu benle, na bu so bu sui ti kereewam bo i ti ye ni ka bu sɔnsɔn i ni. ¹² M soro má su na bu kere nbiesom kereewam, wara bu la yiko nie nbiesom su. Bu deɛ la ka, bu mo bu noɔ. ¹³ Dama Nyeme du mo yiiri Adam wo ka, ye i nya ba yiiri Awa. ¹⁴ Má Adam ye woo dadakaari i a, ama, i dakaari Awa wo, na wo kete Nyeme noanie ni. ¹⁵ Ama, nzen nbaram laari yarada, ni koro, ni wo casi, na bu bita bu ɲu nyunyumi sangga kere, bu nyá bu tiide fite bu baawu nu.

3

Kristo jama n mɔfɔm ni bukafɔm jɔrɛ

¹ Ahin nɔaniɛ jɔjɔwɔ na ti nahɔrɛ wɔ, ka, sɔnɔ kɛrɛ bo i boro i nyi na i yo Kristo jama n mɔfɔ, i mi koro juma kpa lɛɛ. ² Kristo jama n mɔfɔ ni, wɔ yo daka ka má i la ngasi be, na i ja bara kun n kpein, na i bita i nju, na i la tarabuɔ, na i yo sa bo i la anyunuyi. I ti ye ni ka i de wɔfɔm, na i koro kɛrɛ minɛm Nyɛmɛ nɔaniɛ nyunyumi. ³ I ti má ye ni ka i nu nzan agaya, wara i ti aluwa korofɔ, ama, i yo i nju bɛnlɛ, na i koro tanalaifɛ. I kaaki ti má ye ni ka i koro nɔaniɛ agaya. ⁴ Wɔ yo daka ka i koro bita i awurufɔm nyunyumi, na i ma i nbaam de i nɔaniɛ na bu ma i jirima deke kɛrɛ nu. ⁵ Dama nzen sɔnɔ koro bita má i awurufɔm, i mi yo sɛ koro bita Kristo jama n a? ⁶ I ti má ye ni ka i mi ti Yesu susufɔ fɔfɔrɛ, adena má i wura i nju kpiri na Nyɛmɛ di i jɔrɛ yo i ngbɛɛn kabo i yoori Sitana ni. ⁷ Wɔ kaaki ayo daka ka i mi ti sɔnɔ bo minɛm bo bu ti má Kristo jama n nufɔm ma i jirima, adena, má Sitana nya i taraabiri na i yo sa be bo i di nyinse.

⁸ I ti sɔ ɔ fa kɔ Kristo jama n bukafɔm gusu dɔ. Wɔ yo daka ka bu ti minɛm bo bu la anyunuyi, na má bu yo anɔɔ nnyɔ nnyɔfɔm, na má bu nu nzan agaya, na má bu nyunu boro nɔwaa kpini su. ⁹ Wɔ yo daka ka bu subita Kristo jama n kereewa n bo Nyɛmɛ ayi akere n kenken, na bu la má ngasi be bu sunsunni nu. ¹⁰ I ti ye ni ka bu du mɔ fiiti bɛrɛ Kristo jama n bukafɔm ni na bu niɛ. Na nzen bu la má ngasi be, am ma bu yo bukafɔm n juma ni. ¹¹ I ti sɔ ɔ nbaram gusu dɔ. Wɔ yo daka ka bu ti minɛm bo bu la anyunuyi, na má bu susaaki minɛ duma. Wɔ yo daka ka bu bita bu nju, na bu la dabuɔ deke n kɛrɛ nu. ¹² Kristo jama n bukafɔ, i ti ye ni ka i ja bara kun n kpein, na i koro bita i nbaam, ni i dikafɔm nyunyumi. ¹³ Nyini bukafɔm bo bu yo bu juma na i kɔ atin su ni, bu kpini duma kpa ma bu nju wɔ, na bu kaaki koro jɔjɔ ni ahoresi kabo bu yo Yesu Kristo yarada ni.

Kereewa n bo Nyɛmɛ ayi akere Kristo jamam ni

¹⁴ Kabo m sukɛrɛ ahin kadasi n ma u ni, m la tama ka m bá u dɔ kisa. ¹⁵ Ama, nzen haari ma ba aba má nde, ahin kadasi ni má a si kabo wɔ yo daka ka Nyɛmɛ minɛm wo ti barasu a. Bɛrɛ ti Kristo jama n a, yiri n bo i wo bɛrɛ saɔga kɛrɛ n dɛɛm a, bɛrɛ bita i kereewa n bo i ti nahɔrɛ n kenken a, kabo sɔɔ fa seewa n ni i jantarakɔ n bita i kenken ni. ¹⁶ Be koro kete má ka ya nyɛmɛsu atin n bo i wo asiri nu la má anjusɔ, ka o, “Na wɔ kaaki adamande ayi i nju fofɔe nu.

Na Nyɛmɛ Awiewiɛ Casi n akere ka wɔ yo sa bo i sun Nyɛmɛ nu.
Na Nyɛmɛ mɛrɛkɛm anju i.

Na i susufɔm n akɔ ajɔjɔ i jɔrɛ durunya n kɛrɛ nu.

Na durunya n nufɔm dɔngɔ ayo i yarada.

Na Nyɛmɛ afa i akɔ awo i bi angoro, jirima kɛrɛ woobiri ni.”

4

Nɔaniɛ barasu barasu bo Pɔɔlu fa maari Timoti ni

¹ Awiewiɛ Casi n ajɔjɔ wein ka, ahin awieeri su saɔga n bo ya wo nu ni, minɛ nɛm yáki bu yarada atin ni, na bu su ajinin bo bu dadaka minɛm su, ni bu kereewam ni. ² Nyini kereewam sɔ fite minɛm bo bu ti dadakafɔm na bu nati bu kɔrɛ n dɔ ɔ, bo bu sunsunni akaaki haari na bu yo satie mmɔɔ, na bu sunsunni ma má bu ka ba yo satie. ³ Nyini minɛm sɔ kɛrɛ

minem wo, ka, má bu ja ajaa, na má bu kaaki di diire barasu nbem. Ama, Nyeme ayi nyini diirem n ka ya di bu wo, nyini ti, yere bo ya yo i yarada na ya si kabo nahore atin n ti barasu ni, i ti ye ni ka ya sere Nyeme, na ya da i asi ka, na ya nya di bu. ⁴ Deke kere bo Nyeme ayi i ti kpa a, deke be wo má bere bo ya kete i, ama, i ti ye ni ka ya de i na ya da Nyeme asi, ⁵ dama Nyeme noanie n ni nyemesere ma nyini diire n yo casi wo Nyeme do.

⁶ Nzen a faari ahin kereewam kere ya ninbaam ni, nyini kere ka a ti Yesu Kristo amususifo kpa. Nyini kereewam bo a du mo ade bu ni, na a yo bu yarada, na a si ka bu ti nahore, na a su bu su ni, bu ti ka diire bo i ma u fanga n wo. ⁷ Ama, kete jore ngbeenngbeen bo bu ko má Nyeme atin su ni, na a boro u nyi na a sonson sa bo i ko Nyeme atin n su nahore su. ⁸ Dama sa bo a boro u nyi yo i na i buka anuniembaa n fanga n la kperere kaan, ama, nzen a boro u nyi yo Nyeme dee atin n su sa, i la kperere beberebe, nyini ma a si ka a nya deke kpa kisa, na a kaaki nya deke kpa buka su fa ko fa ba. ⁹ Nyini noanie n ti nahore wo, bo i ti ye ni ka ya de i na ya yo i yarada. ¹⁰ Nyini dee ti, ye ya boro ya nyi, na ya yo juma ni nahore su, dama ya daafi Nyeme nu, yiri wo bere sangha kere a, yiri ti mine kere Tiidefo a, maala bo bu yo i yarada ni.

¹¹ Fa ahin kereewam n fa kere bu, na a ma bu su bu su. ¹² Má a ma be bu u ngbeen ka a ti gbefene n dee ti, ama, ma yaradayofom ni nu u sayoowam na bu son u su. Bere la u noanie jooowa, ni deke bo a yo i, ni kabo a koro minem ni, ni u yarada n bo a la i ni, ni u woowa casi ni. ¹³ Yo anie na a sukan Nyeme Jore Kadasi n na Kristo jama n ti, na a sukan Nyeme jore, na a sukere minem Nyeme atin ni, na m nya ba. ¹⁴ Má a ma u wara fi aceeri n bo Awiewie Casi n fa maari u ni, sangha bo i noanie kanfom jooori na Kristo jama nkpienkpien faari bu saa nanaari u nu sereeri Nyeme maari u ni, ma u cece wo i nu, na a fa i yo juma. ¹⁵ Yo ahin juma ni anyumboro na a fa u nu ma nyinim kere, adena minem kere nu kabo u nyemesu n ko atin su barasu. ¹⁶ Si u nu sa ni u kereewam ni. Ko su suyo ahin sam ni, dama nzen a nya yoori so, woro ni minem kere bo bu ti u noanie ni nya tiide.

5

Kabo i ti ye ni ka Kristo jama n mofa n bita i jama n barasu ni

¹ Má a tien kpian nu, ama, joo i do kabo a joo i si do ni, na a tu ngbefenem fo ka u ninbaam, ² na a fa nbara nkpienm yo ka u nim, na a fa tarawam ni nsungurum yo ka u ninbaam, na u ni bere wo ni ahorembaa casi.

³ Bita nkunafom bo bu la má bukafu be n ni jirima. ⁴ Ama, nzen kunafu la nbaam, wara anumam, i ti ye ni ka bu sunie i dika kabo Nyeme koro ni. Nyini kere ka, bu sufa bu wufom nkato to bu kaari wo lee. Dama nyini n so yo Nyeme fie a. ⁵ Nzen kunafu wo i ngumi na i la má bukafu be, wo fa i tama kere awura Nyeme saa nu lee. Na i susere Nyeme jande wiesu ni kongue ka i buka i. ⁶ Ama, kunafu kere bo i nati yo i kunnu koroowa, haari ni bo i la ngoo mmoo ni, i ti ka wo wu wo lee. ⁷ Fa ahin kereewam kere kere nkunafom, ni bu dikafom, adena má be nu bu ngasi. ⁸ Ama, nzen be cece wo má nu ka i nie i lamosim dika, maala i dikafom, i ti ka i mi akete Kristo atin n lee. Nyini sangha ni, sono bo wo yo má yarada tara i mi co lee.

⁹ Kunafo kere bo wo nya ju ma afo aburasen, ma a kere i duma buka Kristo jama nkunafom su. Bekun, na i ti bo wo du mo aja bieso kun wo, ¹⁰ na minem di i daani ka i yo sakpa a, ma pui ti, i ti bo wo ta nbaam ataari kpa, na wo de wofom i dika, na wo yo i nu kaan ka i su Nyeme minem, na wo buka minem bo bu woori kekereke nu, na wo su amusui kpa.

¹¹⁻¹² Ama, nkunafom bo bu nyunu nya ti ma ni, ma a kere bu duma buka nkunafom n su, dama nzen ajaa konvi ba wurari bu na bu koro ka bu kaaki ja ajaa, nyini sangga, sesesu bo bu faari i na bu diiri i di ni Kristo ni, bu koro su ma i su ni nahore su lee, bu yaki i wo, na bu kaaki bu sin bo Kristo lee. Nyini ti ye Nyeme di bu jore cin bu sui a. ¹³ Bekun, nyini ma bu koro ba yo nvieyafom na bu ba sunati awuru awurum nu, i ti ma ka bu yo nvieyafom ngumi wo, ama, na bu sukpara tere, na bu sufa bu nso suwura minem jore nu, na bu sujoro jorem bo wo ti ma ye ni ka bu joro bu. ¹⁴ Nyini ti, mini do, nzen nkunafom toko ti tarawam, i ti ye ni ka bu ja na bu wu nbaam, na bu bita bu awurum, na ma ya kpofom koro nu ngasi be bo bu koro nya atin joro ya ngbeenngbeen kabo bu koro. ¹⁵ Dama nkunafom nbem adu mo akete Kristo atin n asu Sitana su. ¹⁶ Ama, Kristo susufo bara kere bo nkunafom wo i dika, i ti ye ni ka yiri ni i tii nie bu dika, na ma bu fa bu fie fie Kristo jama n ni, adena Kristo jama n koro nie nkunafom bo bu la ma bukafom be fieo n su.

¹⁷ Kristo jama ni nkpienkpienm bo bu yo mofom juma nyunyumi ni, i ti ye ni ka bu nya bu nkato busu nnyo, maala bere bo bu yo bu juma ni anyumoro ka bu kan Nyeme jore na bu kaaki kere minem Nyeme atin n ni. ¹⁸ Dama ba kere i Nyeme jore Kadasi n nu ka, "Nzen a bita toora subobo ngani, ma a cici i nso." Na ba kaaki akere ka, "I ti ye ni ka jumayofom nya i nkato." ¹⁹ Ma a se ka a de jore be bo ba kpie aso Kristo jama n bukafom n kpien be, ma ka mine nnyo, wara nsan adi jore n daani ka i ti nahore. ²⁰ Ama, bo bu yo satie ni, se bu nahore jama n kere nyunu, adena nyingam kere soro sere. ²¹ M suma u noanie lee, Nyeme ni Yesu Kristo ni merkem kere nyunu, ka, a de ahin kereewam ni, na ma a fa tantambunu, wara ma a koro be tara be fa ko deke kere bo a yo i n su. ²² Ma a koro nde na a fa u saa nana sono be nu, na a sere Nyeme ma i mi ka i yo Nyeme juma, ma a ma u saa n wo be dee satie yoowa n nu. Ma u woowa yo casi.

²³ A la ma laifie sangga sangga n dee ti, ma a nu nzue ngumi, ama, nu nzan mmoo kaan, na i buka u fa ko akunnuyaari n bo i yaki ma u ni.

²⁴ Mine nbem satie yoowa kere kaba da fofoe nu wo, na sono kere nu i, nyini satiem ye Nyeme fa di bu jore a, ama, na nbem gusu dee satie bo bu yo i ba fite fofoe nu kasin. ²⁵ I ti so lee be kun, sakpa ti deke bo sono kere nu i fofoe nu wo, na nzen haari sakpa bo i wo ma fofoe nu ni mmoo, i ti deke bo bu koro fie ma i.

6

¹ Kristo jama nbaam bo bu ti akoom ni, i ti ye ni ka bu ma bu mibiem jirima nyunyumi, adena be koro saaki ma Nyeme duma, wara ya kereewam ni. ² Akoom bo bu mibiem gusu ti yaradayofom ni, i ti ma ye ni ka bu bu bu mibiem ngbeen ka bu kere ti yaradayofom n ti, ama, i ti ye ni ka bu su bu tara mibiem bo bu ti ma yaradayofom ni, dama bere n bo bu sudi bu amusui n kperen n ti bu ninbaam bo bu koro bu wo.

Kereewa bo i ko ma atin su ni njaa koro awaraye jore

Fa ahin kereewam n kan kere u jama n na a se ka bu yo bu. ³ Mine nbem wo bere bo bu kere kereewa nbem bo bu ni ya dee n ti ma kun, na bu sunsun ka ya Mibie Yesu Kristo dee noanie kereewam n ti kore wo, na bu kereewam kaaki su ma Kristo dee atin n su. ⁴ Nyini minem n ti kpirikorofom wo, na bu kaaki si ma pui. Na bu la sunsunni tie, na bu se akuruwa ni minem fa ko noanie kereewam bu. Nyini ma bu si kore a, na bu di aluwa, na bu kpie bu bengu nzuko, na bu la sunsunmase fa ko bu bengu do, ⁵ na bu nati suse akuruwa. Bu la ma sunsunni kpa, na nahore wo ma bu do. Na bu sunsun ka nzen sono su Nyeme atin su, i nya kpere wo. ⁶ I ti nahore wo, sono kere bo i nyunu yi deke bo i la i, na i su Nyeme atin su, i mi nya kpere Nyeme do. ⁷ Dama ya fa ma pui aba ma durunya n nu fen. Ya kaaki koro fa ma pui fite ma fen. ⁸ Nyini ti, nzen ya la diirem ni suturam, i ti ye ni ka ya nyunu yi bu. ⁹ Ama, minem bo bu nyunu aboro nenge kpini su agaya, na bu koro ka bu nya ajeki beberebe ni, bu nyini nenge koro n so bu nge wo, na i nya bu taraabiri fa ko bu konvikiya sunsunni ngbeenngbeen n su. Nyini ma bu kpaasi a, na bu ka ngbeen. ¹⁰ Dama nwaa koro awaraye ti satie kere bunlui a. Nbem wo bere bo bu koro nwaa agaya, nyini so ma bu kaaki bu sin bo Kristo atin n wo, na i fa bu wura ahoresaaki bambaka nu.

Kabo Pɔɔlu maari Timoti nɔɔ ka i yo i juma barasu ni

¹¹ Ama, wɔɔ Timoti, a ti Nyeme sono o, nyini ti, i ti ye ni ka ma a dodo nyini sam kere be. Boro u nyi na a yo sa bo i ko atin su, na a su nyemesu atin n su, na a yo i yarada, na a koro minem, na a la mindi, na a wo benle. ¹² Boro u nyi na a tu ngoni kpa bita u yarada n kenken. Nyini ma a di nasara, na a nya ngoo n bo i la ma awieeri ni, ahin ngoo n ye Nyeme fereeri u ka i fa ma u a, na wɔɔ ni u tii diiri i daani mine beberebe nyunu ni. ¹³ Nyeme ma deke n kere ngoo a, na Yesu Kristo gusu jinaari Gomina Pɔntiyo Pilato nyunu diiri daani kpa, nyini dee ti ye m suma u nɔɔ Nyeme ni Yesu Kristo nyunu n a, ¹⁴ ka, a yo u juma n bo Nyeme afa ama u n ni nahore su, na u woowa ti casi na ma be koro nu u ngasi be, haari fa ko ju cɛn n bo ya Mibie Yesu Kristo ba kpie i nyi ba ni. ¹⁵ Nyeme afa nyini sangga n bo i koro ka Yesu ba n afa ase, nyini sangga n juuri, ye Nyeme ma i ba a. Yiri ngumi nie deke n kere su ye kansi wo i do a. Yiri ti nfeme ngbingbirim kere Feme a, na i ti mibiem kere Mibie. ¹⁶ Yiri ngumi kpein wo bere sangga kere a, na i woobiri n bo i wo n ti wein wo, na be koro dodo ma nyini wein ni. Be nya nu ma i cɛn be da, be gusu koro nu ma i wo mmoɔ cɛn be cɛn be. I dee la jirima ni fanga, sangga kere. Ami.

¹⁷ Se bo bu la ajeki durunya n nu fen n ka ma bu fo, na ma bu fa bu tama go nyini ajekem bo bu ce ma n nu, ama, bu fa go Nyeme nu, yiri bo i ce ya deke n kere ko sin su n na ya fa yo ya koroowa ni. ¹⁸ Se bu ka bu yo sakpa dongu, na bu ce acerim, na deke kere bo bu la i, na bu sukpaaki nu ma nyingam. ¹⁹ Nzen bu nya yoori so, i ti ka ba tien ajeki nɔɔ abo i bu afa ase fa ko fa ba leɛ, adena bu nya ngoo n bo i ti ngoo nahore su ni.

²⁰ Timoti, nie deke bo Nyeme afa ama u ka a nie i dika n su nyunyumi. Cin u nu yaki minem bo bu jojo jooowa ngbeenngbeen na bu bu ma Nyeme, na bu sunsun ka bu si wo, ama, bu si ma pui. ²¹ Dama nbem afun ajina su ka bu la si, nyini dee ti, ba mini Kristo atin ni.

Nyeme buka am kere.

Ɖɔɔlu kadasi nnyɔ su bo i kere fa maari TIMOTI ni

¹ Mini Ɖɔɔlu sukere ahin kadasi n a. M ti Yesu Kristo jamarasa a, Nyeme deɛ koroyanu, yiri Nyeme asunma m ka m kɔ kan kere minem kabo i yo seeri ka minem bo bu ni Yesu Kristo yo kun ni, bu nyá ŋɔɔ.

² M sukere ahin kadasi n ma wɔrɔ Timoti bo a ti ka m wa koroowa n wɔ.

Ya Si Nyeme, ni ya Mibiɛ Yesu Kristo buka u, na bu si u aɲunfɔ, na bu ma u ahoreda.

Kabo Ɖɔɔlu maari Timoti ahoresi ka i yo juma barasu ni

³ M da Nyeme asi, yiri ye m su i ni sunsunni kpa, kabo m nam yo suuri i ni. M sere Nyeme sɔɔ, konɔue ni wiɛsu, na m nati suda i asi ma u. ⁴ M teɲge su kabo a yo suunri ni nyunvuin ni, m wara ado u, m koro ka m ŋu u, adena m ahore jɔ. ⁵ M wara fi má u yarada n bo a yo i nahore su n sa, nyini yarada n gusu ye u nabara Loyisi, ni u ni Yunisi laari i a. Ma yo yarada ka wɔrɔ mmɔɔ la i sɔɔ. ⁶ Nyini deɛ ti, aceeri n bo Nyeme Awiewie Casi n fa ceeri u ni, saɲga bo m faari m saa nanaari u ŋu, na m sereeri Nyeme maari u ni, m koro ka m teɲge u su ka a kaaki ye i su fa yo juma. ⁷ Dama Awiewie Casi n bo i fa maari ya ni, wɔ fa ama má ya ka ya yo serefɔm wɔ, ama, i fa maari ya ka i buka ya faɲga na ya koro minem na ya la tarabuɲu wɔ.

⁸ Nyini ti, má a ma nyinse ti u ka a kan Mibiɛ n jɔre n kere minem, wara má a ma nyinse ti u ka m wo dansaraka nu, Kristo deɛ ti. Ama, wɔrɔ mmɔɔ di wahara fa kɔ labari kpa n kan su, kabo m diiri i ni, na Nyeme ma u faɲga na a koro mindi de i. ⁹ I deeri ya tii ji wɔ, na wɔ fere ya ka ya yo i deɛ tienɲu minem, má ka ya sakpa bo ya yo i n deɛ ti, ama, i deɛ kunnu koroowa ni i ahɔrɔma n deɛ ti a. Saɲga bo i nya yi má durunya ni, ye i yoori ya nyini sakpa n a, Yesu Kristo deɛ ti. ¹⁰ Ama, kisa na Yesu Kristo, yiri bo i ti ya Tiidefɔ n aba durunya n nu ni, ya ŋu Nyeme koro ni. Labari kpa n deɛ ti, ya si ka Kristo akunma yiwee faɲga, na ya koro nya ŋɔɔ n bo i la má awieeri ni.

¹¹ Nyeme ayi m ka m yo Yesu jaramasa na m kan Nyeme labari kpa n kere minem, ¹² nyini deɛ ti ye m di ahin waharam n kere n a. Ama, nyinse ti má m, dama m si sonɔ bo ma daafi i ŋu ni, na labari kpa n bo wɔ fa ama m ni, m si tenle su ka i koro nie i su fa kɔ ju haari jina cɛen. ¹³ Bitá nɔanie n kere bo ma kan akere u na i ti nahore n kenken, na a yo yarada na a koro minem, kabo ya ni Yesu Kristo ayo kun n deɛ ti. ¹⁴ Bitá labari kpa n nyunyumi. I ti aceeri kpiri wɔ, ye Nyeme afa awura u saa nu a. Awiewie Casi n bo i wo ya dɔ n buka u, na a bita i nyunyumi.

¹⁵ A si ka yaradayofɔm kere bo bu wo Esiya deɛ awɔre n nu ni, fa saɲga ni Figelosi ni Hemogenesi n kere, aɲmati ayaki m. ¹⁶ M sere Nyeme ka i si Onesifɔrɔsi dikafɔm kere aɲunfɔ, dama saɲga kere yiri titi m nyunu a. Nyinse ati má i ka m wo dansaraka nu, ¹⁷ ama, i ba juuri Roma mie kpiri n nu fen ni, i nienieeri m busu wɔ ni anyumboro, haari na wɔ ba aɲu m. ¹⁸ M sere Nyeme ka i si Onesifɔrɔsi aɲunfɔ, jina cɛen. Wɔrɔ ni u tii kaaki si buka bo i fa bukaari m barasu, saɲga bo m wo Efeso mie kpiri n nu ni.

2

¹ Nyini dɛɛ ti, wɔɔ m wa, ahɔɔɔma n bo Yesu Kristo ma a diiri i n dɛɛ ti, má a yɔɔɔki u ɔu, yo u ɔu kenken. ² Jɔɔɔ n bo a tiiri i m dɔ, na mine beberebe woori dɔ tiiri i ni, fa wura minɛm bo bu la dabuɔu n saa nu, na bere gusu koro fa kere nyingam. ³ Kabo a ti Yesu Kristo dɛɛ soja kpa ni, yo siriya na wɔɔ m mɔɔɔ di wahara n kabo nyingam di i barasu ni. ⁴ Sɔɔɔ bo i yo soja juma, i cɛɛ wo má juma bo i ti má soja juma nu, se i dɛɛ la ka i yo i soja juma a, na i yo i kpiɛn fiɛ. ⁵ Bekun, sɔɔɔ bo i ɔmati ɔmatiiri ka i nya teremasu na i nya aceeri, má ka i mi asu atin bo bu fa kere nyini dɛɛ ɔmatiirifɔm n su, i koro nya má aceeri ni. ⁶ Dɔɔɔɔɔɔɔ bo i yo juma nahɔɔɔ su ni, wɔ yo daka ka yiri du mɔ nya diire fɔfɔɔɔ n be di a. ⁷ Sunsun fa kɔ deke bo m suse u n su, na Mibiɛ n buka u na a ti i kɛɛ bu.

⁸ Tenje su fa kɔ Yesu Kristo jɔɔɔ n su, ka i fiteeri Fɛmɛ Davidi dɛɛ busu n nu wɔ, ye i wuuri a, na wɔ tenje i yiwee n nu, m labari kpa n lɛɛ, sɔ ye m kan i a. ⁹ Labari kpa n dɛɛ ti, ye m di wahara n a, haari ba wura m jɔɔɔkɔ ase ka m ti satieyofɔ ɔ, ama, Nyɛmɛ dɛɛ nɔaniɛ n yiri, i wo má jɔɔɔkɔ nu. ¹⁰ Nyini ti, minɛm bo Nyɛmɛ ayi bu ka bu ti i dɛɛ minɛm n dɛɛ ti, ma mindi ade deke n kɛɛ, adena bere m mɔɔ nyá tiide n bo i fite Yesu Kristo dɔ ni, na i má bu jirima n bo i la má awieeri Nyɛmɛ dɔ ni. ¹¹ Ahin jɔɔɔɔwa n ti nahɔɔɔ wɔ, bo i ɔa,

“Nzen ya ni yiri sanɔa wuuri,
ya ni yiri bá sanɔa nya ɔɔɔ.

¹² Nzen ya mindi suuri i,
ya ni yiri bá sanɔa di i fɛmɛya n a.
Nzen ya keteeri i,
yiri gusu bá kete ya.

¹³ Nzen yɛɛ la má dabuɔu,
yiri la dabuɔu wɔ sanɔa kɛɛ,
dama i koro kete má i ɔu.”

Kristo jama n mɔfɔ bo Nyɛmɛ da i ɔu ni

¹⁴ Tenje u minɛm su fa kɔ nyini jɔɔɔm n su, na a se bu ka Nyɛmɛ wo u daani, ka má bu se akuruwa fa kɔ nɔaniɛ kereewam bo i la má kɔɔɔɔ, i saaki minɛm bo bu so bu sui ti nyini nɔaniɛ n wɔ. ¹⁵ Boro u nyi na a fa u ɔu ma Nyɛmɛ juma na i sun i nu. Na a yo u juma nyunyumi na má nyinse ti u, na a kere kereewa bo i ti nahɔɔɔ na i kɔ atin su nyunyumi. ¹⁶ Má a so u sui ti jɔɔɔ ɔgbɛɛɔgbɛɛɔm bo bu kɔ má nyɛmɛsu atin su ni, dama i ma minɛm wo dede ni Nyɛmɛ wɔ, na bu yo satie kɔ sin su. ¹⁷ Nyini kereewam sɔ ti ka kambue bo i wie má na i tɛɔki sanɔa kɛɛ wɔ. Mine nnyɔm bo bu kere nyini kereewam n la Himɛnasi, ni Filetosi, ¹⁸ bere kere ka sanɔa bo minɛm wu na bu tenje bu yiwee nu asin n a. Ahin kereewam n ti kɔɔɔ wɔ, nyini kereewa n sɔ ma mine nbem ɔuniɛ ayɔɔɔki bu fa kɔ bu yarada bo bu la i n su wɔ. ¹⁹ Ama, deke bo Nyɛmɛ ayi akere i jama ni, i ti ka fa bumboori seewa a, pui koro kankan má i. Nyini fa bumboori seewa ni, ye ba kɛɛ ahin nɔaniɛm n aɔɔ su n a, ka, “Micera n si minɛm bo bu ti i dɛɛ minɛm ni,” na “Bo bu ɔa bu ti Micera n dɛɛ n kɛɛ, i ti ye ni ka bu yaki satieyo.”

²⁰ Ya si ka awuru kpiri nu la taale ni ayaba barasu barasu kɛɛ, bu faari jete ni sika yoori nbem a, na nbem gusu ti baka ni yakati dɛɛ. Bu fa nbem fa yo juma cɛɛnkpiri cɛɛn, na bu fa nbem gusu yo juma cɛɛn n kɛɛ cɛɛn.

²¹ Nzen sɔnɔ kere bo i yi i ɲu fiteeri nyini kɔre kereewam n nu, Nyeme fá i mi yo ka cɛɛnkpiri ayaba a, dama wɔ fa i ɲu ama Mibie ni, na i yo juma kpa bo i kun kɔre ma i, má pui ti, wɔ sese i ɲu su ka i yo juma kpa ma i Mibie ni.

²² Tara u ɲu fa kɔ ngɛfenem konviki tie sam su. Boro u nyi, na a yo sa bo i kɔ atin su, na a yo Nyeme yarada, na a koro minem, na a la tanalaifie, nyini má a buka minem bo bu su Nyeme ni ahore casi n su a. ²³ Ama, má a fa u nɔɔ bo sinnzinya jɔrem n nu, ni bisaawa ngɛɛnngɛɛnm. A si ka nyini n sɔ kpura mine tii wɔ. ²⁴ Wɔ yo daka ka má Mibie n akɔɔ n suse akuruwa. I ti ye ni ka i yo aye ma sɔnɔ kere, na i koro fa sawɔre kere minem Nyeme jɔre n nyunyumi. ²⁵ Haari minem bo bu se i akuruwa ni mmɔɔ, i ti ye ni ka i fa sawɔre ni bere, na i kere bu atin bo bu fa i, beni, a ɲu ka Nyeme má bu kaaki bu wo na bu si nahɔre atin ni. ²⁶ Nyini ma bu kaaki fa sunsunni kpa na bu ɲmati fite toroku n nu a, bo Sitana n asɔ atara bu na i ma bu yo i koroowa ni.

3

Fa kɔ durunya n awieeri su dɛɛ jɔre

¹ M koro ka a si ka, fa kɔ durunya n awieeri, i yó kekereke. ² Mine yó anyii sam, na bu kóro ɲwaa agaya, na bu fɔ, na bu súnson ka bere ɲgumi wo bere a, na bu kpíe mine nzuko, na bu dé má bu wufɔm nɔanie, na bu sí má aye, na bu kété Nyeme woowa casi n jɔre, ³ na bu kóro má minem, na bu sí má anjunfɔ, na bu sáaki minem duma, na bu lá má tarabuɲu, na bu yó wi, na bu kpó deke kere bo i ti kpa. ⁴ Na bu lá má dabuɲu, na bu yó sa bo bu sunsun má bu, na bu lá karambani agaya, na bu kóro bu tii di tara nyemesu, ⁵ na bu yó bu ɲu ka bu su Nyeme atin n su wɔ, ama, na bu kété Nyeme yiko ni. Má a dodo nyini minem sɔ. ⁶ Bu nbem nati wura awuru awurum nu wɔ, na bu bo nbaram bo bu la má tarabuɲu n anɔɔfie na bu su bu su. Nyini nbaram sɔ satieyo akunma bu, na bu yo bu kunnu koroowam. ⁷ Saɲga kere bu ti kereewam wɔ, ama, bu koro si má nahɔre atin n fieo. ⁸ Kabo Janesi ni Jambaresi yo keteeri jɔre kere bo Moyisi yo jɔjɔri ni, sɔ ye ahin kɔre kerefɔm n gusu akete Nyeme nɔanie n a. Bu sunsunni yo má juma, na ba kete yarada atin n su su ni. ⁹ Ama, bu juma koro kɔ má i nyunu, dama sɔnɔ kere bá si ka bu ti sinnzinm wɔ, bu si má pui. Kabo mine yo siiri ka Janesi, ni Jambaresi yo ti sinnzinm ni.

Pɔɔlu awieeri su dɛɛ nɔanie bo i fa maari Timoti ni

¹⁰ Ama, wɔɔ yiri, a ɲu m kereewa, ni m woowa, ni m sunsunni bo m taraari i ni, ni m yarada ni, ni m sawɔre ni, ni m koro, ni m mindi ni, ¹¹ ni m wuwuruwa bo bu kereeri m ni, ni wahara bo m diiri i n su. A si sam bo bu tuuri m, mie kpirim n bo bu fere bu ka Antiyoki, ni Ikoniyoum, ni Lisitira ni, má wuwuruwa lɛɛ ye minem kereeri m a. Ama, na Mibie n ayi m afite nyinim kere nu. ¹² Sɔnɔ kere bo i koro ka i su Nyeme atin su na i ni Yesu Kristo yo kun, i mi ɲú wuwuruwa, ¹³ na mine tiem ni kerefɔ korefɔm yo satie kɔ sin su, bu dadaka mine, na mine dadaka bere gusu. ¹⁴ Ama, wɔɔ yiri, nahɔre atin n bo bu fa kereeri u, na a yoori i yarada nahɔre su ni, su i su sɔ, dama a si minem bo bu kereeri u nyini atin ni. ¹⁵ A si ka fite u kaan nu kere, ye a sonsɔnri Nyeme Jore Kadasi n kere n ye a siiri i a. Nyini koro ma u alecira a, na a yo Yesu Kristo yarada na a nya tiide. ¹⁶ Nyeme Jore Kadasi n bo ba kere i n kere fite yiri dɔ a, na i la

kpere bo a koro fa kere minem nahore atin ni, na a fa kan sono bo i yo satie ndie, na a fa kere sono atin fa ko deke bo i ko ma atin su, na a fa kere sono na i yo sa bo i ti kpa. ¹⁷ Nyini n kere koro ma sono kere bo i su Nyeme kpama bi a, na i koro yo juma kpa barasu kere.

4

¹ M suma u noanie lee, Nyeme ni Yesu Kristo n nyunu, yiri ba di ngofom ni yiweefom n jore a, na i ba di feme na i nie i minem su. ² Boro u nyi kan Nyeme noanie ni, sukan i sangha kere. Tenge yaradayofom su fa ko kereewa bo i ko atin su. Jaraki bu na bu yaki satieyo. Jojo bu do na bu yo sakpa buka su. Na a yo sawore ni nyini n kere na a kere bu nyunyumi. ³ Dama fa ko fa ba, minem koro ma ka bu so bu sui, na bu ti Kristo kereewa n bo i ko atin su ni. Ama, bu su bu dee koroowam su wo, na bu tien kerefom dongu noo bo bu kere bu dekem bo bu koro ka bu ti i ni. ⁴ Bu kaaki bu sin bo nahore atin ni, na bu so bu sui ti kore jorem. ⁵ Ama, woro yiri, tara u nyi sangha kere, na a mindi ni wahara di, na a boro u nyi kan Yesu labari kpa n jore, na a yo u juma n kere kabo Nyeme koro ka a yo i ni.

⁶ Mini yiri, sangha n aju bo bu yi m ngoo ni, Yesu Kristo dee ti, sangha n aju bo m fite durunya n nu fen. ⁷ Ma boro m nyi atu ngoni Nyeme atin n su, ma yo m juma awie, ma kan labari kpa n ni m yarada kun. ⁸ Kisa Nyeme bita teremasu aceeri nminda m, dama wo de m ka m yo sa bo i ko atin su i do o. Ya Mibie Yesu Kristo, yiri di minem jore ye i ko atin su a, yiri fa nyini teremasu aceeri n ce m jina ceen a, ma mini ngumi, ama, sono kere bo i koro Yesu na i tana ngminda ka i ba n a.

Poolu ni i tii jore lee

⁹ Yo anie na a bra m do kisa kisa. ¹⁰ Dama Keresensi ako Galatiya awore n nu, ye Titosi ako Dalamatiya awore n nu. Demasi anmati ayaki m, wo ko Tesalonika mie kpiri n nu, kisa i koro ka i wo kabo durunya n nufom wo n wo. ¹¹ Luka ngumi wo m do a. Fa Marako na u ni yiri bra, dama i koro buka m ni juma ni. ¹² Ma sunma Tikikusi Efeso mie kpiri n nu. ¹³ A na a ba, bita m ayere tanlee n ba ma m, bo m yakiiri i Torasi mie kpiri n nu, Kapusi dika ni. Fa m kadasim n gusu bita m nu, maala bo ba fa nengendore numa ayo bu ni.

¹⁴ Alekizanda bo i ti tunmi n ayo m satie agaya, Mibie ni to i kaari fa ko sa bo wo yo i n su a. ¹⁵ Si u nyi sa ni yiri, dama wo jina su kekereke akete noanie n bo ya kan i ni. ¹⁶ Cici ri su bo m sukan na m de m tii jore diibiri ni, be ajina ma m sin, bu kere nmati yakiiri m wo. M sere Nyeme ka i fa bu ngasi ce bu. ¹⁷ Ama, na Mibie n ajina m sin a, na wo ma m fanja, na ma koro akan labari kpa n akere minem, na bo bu ti ma Yudafom n kere akoro ati. Na wo de m afite minem bo bu koro ka bu kun m n saa nu. ¹⁸ Yiri Mibie ni yi m fite jore tie kere nu a, na i fa m ko wura i femeya n nu angoro ni laifie a. Jirima bambaka ti i dee sangha kere. Ami.

Awieeri su dee anse yowwa ni

¹⁹ Bisa Pirisila ni i hun Akuyila fa tu Onesiforosika dikafo kere dongu ma m. ²⁰ Irasitusi kaari Korinto mie kpiri n nu wo, na ma yaki Torofimosi gusu Miletosi mie kpiri n nu, dama wo la ma i nyi. ²¹ Yo anie na a bra ka, na fufuku nya ju. Ya ninbaam bisa u dongu, bere la Eyabulusi, ni Pudensi, ni Linosi, ni ya niemabara Kalodiya, ni ya ninbaam nyingam kere. ²² Ma Mibie n wo ni woro. Nyeme buka am kere.

Pɔɔlu kadasi bo i kɛrɛ fa maari TITOSI ni

¹ Mini Pɔɔlu sukere ahin kadasi n a. M ti Nyeme akɔɔ ɔ, na m kaaki ti Yesu Kristo jaramasa. Nyeme ayi m na wɔ sunma m ka m kɔ buka minem bo wɔ yi bu n na bu yarada yo biiwa, na bu si nahɔre fa kɔ Nyeme atin n su. ² Kana Nyeme ba yiiri durunya n ni, i yo seeri ka i má ya ngɔɔ n bo i la má awieeri ni. Nyeme bu má kɔrɛ. Nyini ngɔɔ n tama dɛɛ ti, ye ya la yarada ni si jina kun su n a. ³ Na sanɔa n ba juuri ni, na wɔ yi i nɔanie n afite fofoe nu, na wɔ fa ama m ka m kɔ kan i kere minem. Nyeme ni i tii, yiri bo i ti ya Tiidefɔ ni, maari m nɔɔ ka m kɔ kan i nɔanie n a.

⁴ Mini Pɔɔlu sukere ahin kadasi n ma wɔɔ Titosi a. A ti m wa a, nahɔre su, dama m ni wɔɔ kere asanɔa ayo Yesu Kristo yarada. Ya Si Nyeme ni ya Tiidefɔ Yesu Kristo buka u, na bu ma u ahoreda.

Juma bo Pɔɔlu ŋa Titosi yo i Kereti asien n su ni

⁵ Deke bo i ti na m yakiiri u Kereti asien n su n la ka, m koro ka a yo juma n bo wɔ wie má n wie, na a sese i su, na a yi Kristo jama nkpienkpienm se miem kere su, kabo m seeri u ni. ⁶ Nyini nkpienkpienm kere bo a yi bu ni, i ti ye ni ka bu be la má ngasi be. I ti ye ni ka bu ja bara kun n kpein. I ti ye ni ka bu nbaam yo Kristo yarada, na be koro jaraki má nbaam ka bu nati yo sa ngbɛɛngbɛɛn na bu de má bu wufɔm nɔanie. ⁷ Nyeme afa i juma n awura nkpienkpienm saa nu n dɛɛ ti, wɔ yo daka ka, má bu la ngasi be. I ti má ye ni ka bu ti anukerefɔm, wara bu fa yaa ndende, wara bu nu nzan agaya, wara bu ti aluwa korɔfɔm, wara bu koro ŋwaa agaya. ⁸ Ama, i ti ye ni ka nkpienkpienm kere ti minem bo bu de wɔfɔm, na bu ti minem bo bu koro sakpayo, na bu la tarabuɔ, na bu yo sa bo i kɔ atin n su, na bu ti casi, na bu bita bu ŋu. ⁹ I kaaki ti ye ni ka bu ti minem bo bu bita Nyeme nɔanie n bo i la dabuɔ n kenken, kabo ya kereeri bu ni, adena bu koro fa kereewa n bo i ti nahɔre n fa kere minem na bu nya ahoresi, na bu kaaki koro kan kere minem bo ba kete nyini kereewa n kabo ba mini barasu ni.

¹⁰ Dama minem donɔa wo bɛrɛ bo ba kete kereewa bo i ti kpa ni, na bu sujoɔ jɔrɛ ngbɛɛngbɛɛn na bu sudadaka minem, maala yaradayɔfɔm bo bu toko bita Yudafoam sayoowa ni. ¹¹ Ma bu mɔ bu nɔɔ, dama bu sufa nyini kereewa n bo i ti má ye ni ka bu fa kere ni, sufa saaki awurukpa lɛɛ. Nwaa dɛɛ ti ye bu yo sɔ a. ¹² Haari bɛrɛ Keretifɔm mmɔɔ dɛɛ tienɔa sifo be yo seeri ka, “Bɛrɛ Keretifɔm ti kɔrefɔm wɔ dada kere, na bu ti ka boro nenɔe tiem, na bu ti nviɛyafɔm, ni ayaa kpirifɔm wɔ.” ¹³ Kabo i yo seeri n ti nahɔre wɔ. Nyini dɛɛ ti, jaraki bu, na bu yarada yo fanɔa, ¹⁴ na má bu su Yudafoam nana jɔrem su, na má bu su deke bo minem bo ba kete nahɔre n akpama i n su. ¹⁵ Minem bo bu woowa ti casi ni, deke kere ti casi wɔ bu dɔ, ama, minem bo bu woowa ti má casi na bu yo má Yesu Kristo yarada ni, deke be mmɔɔ ti má casi bu dɔ. Bu sunsunni, ni bu ahore kere ti fin wɔ, na nzen haari bu yo satie mmɔɔ, bu si má ka i ti satie. ¹⁶ Bu ŋa bu si Nyeme, ama, bu sayoowa kere ka bu si má i, dama bu sayoowa kere

ti ciire wɔ Nyɛmɛ dɔ, na bu de má Nyɛmɛ nɔaniɛ ni, na bu koro yo má sakpa be.

2

Kereewa n bo i ti kpa n dɛɛ jɔrɛ

¹ Ama, wɔrɔ yiri, i ti ye ni ka a fa kereewa bo i ti nahɔrɛ na i kɔ atin su, na a sufa kere yaradayofɔm ni. ² Se nbiɛsɔ anyunutifɔm ka, bu bita bu ŋu, na bu yo sa bo i la anyunuyi, na bu la tarabuŋu. Kaaki se bu ka, bu ma bu yarada yo fanja, na bu koro minɛm nahɔrɛ su, na bu la mindi nahɔrɛ su. ³ Se nbara anyunutifɔm gusu ka, bu ma bu woowa kere ka bu soro Nyɛmɛ. Nyini la ka, má bu susaaki mine duma, na má bu ma nzan ja bu. Kaaki se bu ka, bu kere kereewa kpa, ⁴ na bu tu tarawam fɔ ka, bu koro bu hunn ni bu nbaam, ⁵ na bu la tarabuŋu, na bu ma bu woowa ti casi, na bu bita bu awurum nyunyumi, na bu yo sakpa, na bu de bu hunn nɔaniɛ, adena má be koro bu Nyɛmɛ nɔaniɛ ni ŋgbɛɛn. ⁶ Tu ngbɛfɛnɛm gusu fɔ ka, bu tara bu ŋu, ⁷ ni deke kɛrɛ. Wɔrɔ mmɔɔ ni u tii, ma u sayoowa kɛrɛ kɔ atin su, na minɛm ŋu i, na bu sɔn u su. Fa sunsunni kpa ni atin bo i la jirima fa kere minɛm ⁸ kereewa kpa, na be koro kan má jɔrɛ be. Kere bu sɔ, adena minɛm bo bu kete ya kereewa n di nyinse, dama bu ŋu má ŋgasi be bo bu fa saaki ya. ⁹ Se akɔɔm gusu ka, bu de bu mibiɛm nɔaniɛ, na bu yo sa kɛrɛ bo bu mibiɛm koro, na má bu se jɔrɛ be. ¹⁰ Kaaki se bu ka, má bu wɔ awie mumuku, ama, bu kere ka bu la dabuŋu deke kɛrɛ nu. Nzen bu yoori sɔ, bu woowa kpa ni kere minɛm ka, Nyɛmɛ, yiri bo i ti ya Tiidefɔ ni, i dɛɛ kereewa n ti nahɔrɛ wɔ.

¹¹ Dama Nyɛmɛ ayi i ahɔrɔma afite fofɔe nu, na sɔnɔ kɛrɛ nya tiide. ¹² I ahɔrɔma ni kere ya ka ya yaki sam bo bu kɔ má nyɛmesu atin n su a, ni dekem bo bu wura ya konvi durunya n nu ni, na ya tara ya ŋu, na ya yo sa bo i kɔ atin su, na ya bita nyɛmesu atin, ahin durunya n bo ya wo nu ni. ¹³ Ya yo ahin na ya ŋminda deke n bo ya la i tama bambaka ka i fite fofɔe nu, yiri la ya Mibiɛ Yesu Kristo, kabo i fite fofɔe nu ni i jirima woowa ni. Yiri ti ya Nyɛmɛ kpiri, ni ya Tiidefɔ a. ¹⁴ Yiri wu maari ya, adena i ma ya nya ya tii, na i yi ya fite ya satie nu, na i kpakpara yi ya fin kɛrɛ, na i yo ya casi, na ya yo i dɛɛ minɛm bo bu nyunu aboro sakpayo su.

¹⁵ Ahin kereewam kɛrɛ, fa kere yaradayofɔm, na a ma bu ahoresi, na a kan bu ndiɛ. Fa yiko n bo Nyɛmɛ afa ama u n yo sɔ, na má a ma be bu u ŋgbɛɛn.

3

Kabo yaradayofɔm wo ti barasu ni

¹ Tenje yaradayofɔm su ka, bu yo bu ŋu benle ma nfemɛm ni gomina nkpiɛnkpiɛm, ná bu de bu nɔaniɛ, na bu kpa bu ŋu na bu yo sa kɛrɛ bo i ti kpa, ² na má bu saaki minɛm duma, na má bu se akuruwa ni minɛm, ama, bu yo bu ŋu kaan, na bu yo bu ŋu benle ma sɔnɔ kɛrɛ.

³ Má pui ti, yɛrɛ mmɔɔ ni ya tii yo ti sinnzinm wɔ, ya si má Nyɛmɛ jɔrɛ, na ya kaaki de má i nɔaniɛ, na ya mini i atin ni, ya yo ti minɛm bo ya yo deke kɛrɛ bo i wura ya konvi wɔ, na ya suyo ya sa koroowa, na ya la aŋunkpini, na ya si kɔrɛ, na ya yo ti minɛm bo minɛm kpɔ ya a, na ya gusu kpɔ ya beŋgu. ⁴ Ama, haari ni nyini mmɔɔ, Nyɛmɛ bo i ti ya Tiidefɔ ni, yo faari i sakpa, ni i koro kereeri ya, ⁵ na wɔ nya ade ya tii aji. Má

ka ya sakpa yoowa dɛɛ ti, ye i deeri ya tii jiiri a, ama, i anjunfo si dɛɛ ti. Kabo i deeri ya tii n la ka, i Awiewie Casi ni ŋmisiiri ya a, na wo ma ya wo fɔfɔrɛ, ni ŋɔɔ fɔfɔrɛ. ⁶ Na Nyemɛ ama ya Tiidefo Yesu Kristo afa Awiewie Casi n ama ya akɔ asin su. ⁷ Nyemɛ yoori sɔ ni, adena ya yɔ i nbaam, na ya yɔ tama ka ya nyá ŋɔɔ n bo i la má awieeri. Nyemɛ ahɔrɔma n dɛɛ ti, wo de ya ka ya la má ŋgasi be i dɔ, nyini ti ye wo fa ya ayo i nbaam n a. ⁸ Ahin jɔrɛ n ti nahɔrɛ wo.

M koro ka a kere ahin dekem ni anyumboro, adena bo bu yo Nyemɛ yarada ni, bu fa bu sunsunni kerɛ yo sa bo i ti kpa. Ahin kereewam n la kperɛ, na bu kaaki ti kpa ma sɔnɔ kerɛ. ⁹ Ama, má a fa u ŋu wura akuruwa ŋgbɛɛnŋgbɛɛn barasu kerɛ nu, ni ya nana Yudafoɔm dumam, ni aluwa ŋgbɛɛnŋgbɛɛnm fa kɔ Nyemɛ nɔanie kpamaawa n su. Ahinm kerɛ ti ŋgbɛɛn wo, bu kunma kperɛ be. ¹⁰ Sɔnɔ kerɛ bo i fa kpakpaakinu ba, i ti ye ni ka a tu i mi fɔ kpe nnyɔ ɔ, na nzen wo nya de má i, má a bu i wura am nu. ¹¹ Si ka nyini sɔnɔ n sɔ akete kereewa kpa n lɛɛ, na i yo satie bo yiri mmɔɔ ni i tii si ka i ti satie wo.

Pɔɔlu dɛɛ awieeri su nɔanie bo i fa maari Titosi ni

¹² M súnma Aratema, wara Tikikusi u dɔ, nzen bu be baari, boro u nyi na m ni wɔrɔ sa nu Nikopoli miɛ kpiri n nu. M koro ka m wo dɔ fufuku sanɔa a. ¹³ Zena bo i ti jɔrɛdifo ni, i ni Apolosi, bu ba ŋa bu yasu, boro u nyi na a buka bu, na má deke be kpie bu su. ¹⁴ I ti ye ni ka a ma ya minem gusu sɔnsɔn kabo bu boro bu nyi suyo sa bo i ti kpa, na bu buka minem ni deke bo i ti bu miɛɛwam ni, adena má ya minem ni wo wo ŋgbɛɛn.

¹⁵ M labari n kerɛ lɛɛ. Minem bo bu wo m dɔ n kerɛ bisa u. Bisa ya danfom kerɛ bo bu yo Yesu yarada ni. Nyemɛ buka am kerɛ.

Pɔɔlu kadasi bo i kere fa maari FILEMON ni

¹ Mini Pɔɔlu bo Yesu Kristo deɛ ti na kisa m wo dansaraka nu ni, ni ya niwa Timoti sukere ahin kadasi n a. Wɔrɔ Filemon bo ya koro u na ya ni wɔrɔ sanɔa yo juma ni, ya bisa u dɔŋgu. ² Ya kaaki bisa Kristo jama n bo bu tien bu nɔɔ u dika ni, ni ya niwa baabara Afiya, ni ya niwa Akipusi bo ya ni yiri kere ti ka soja ni, Yesu deɛ atin n su ni. ³ Ya Si Nyeme ni ya Mibie Yesu Kristo buka am, na bu ma am ahoreda.

Filemon koro ni i yarada n jɔre

⁴ M niwa Filemon, sanɔa kere bo m sere Nyeme, m wara fi má u sa, m da i asi ma u wɔ. ⁵ Dama ma ti kabo a yo ya Mibie Yesu yarada ni, ni kabo a koro Nyeme minem kere ni. ⁶ M kaaki sere Nyeme ka i ma wɔrɔ ni bo ba yo yarada na am sanɔa su Nyeme ni la wo fie, nyini ma a si nahore su kabo Nyeme afa deke kpa ama ya, Kristo deɛ ti. ⁷ M niwa, koro n bo a bita i ni, wɔ ma m ahore aɔ agaya, na wɔ kaaki ama m ahoresi, dama wɔrɔ deɛ ti, Nyeme minem anya ahoresi.

Kabo Pɔɔlu taraari Filemon jaa maari Onisimɔ barasu ni

⁸ Tɔ, kabo Kristo deɛ ti na a ti m niwa ni, m la ahoresi, na m la atin bo m koro se u ka a yo deke bo i ti ye ni ka a yo i. ⁹ Ama, m koro u n deɛ ti, ye m susere u a, ka a buka m, haari ni bo m jina Yesu Kristo deɛ jaa nu n ni, na i deɛ ti na m kaaki ti dansaraka kisa ni. ¹⁰ Deke bo i ti na m susere u n la ka, m susere u ma m wa Onisimɔ n wɔ, bo Yesu Kristo deɛ ti na wɔ kaaki m wa dansaraka nu n ni. ¹¹ Sanɔa be, i yo kun má kperɛ be ma má u, ama, kisa, i kun kperɛ ma wɔrɔ ni mini kere wɔ.

¹² Yiri bo m koro i ni m ahorembaa kun ni, ye m suma i ba u dɔ n a. ¹³ Kabo Nyeme jɔre kaanwa n deɛ ti na m wo dansaraka n nu ni, má m koro ka i wo m dɔ fen na i buka m, kabo má wɔrɔ wo fen na a buka m ni. ¹⁴ Ama, m koro má ka m yo deke be bo a soro má su, ama, m koro ka wɔrɔ mmɔɔ ni u tii buka m u koroyanu, má ka i yo ka m mie u wɔ. ¹⁵ Beni, Onisimɔ fiteeri u saa nu ni, wɔ ce kaan, adena i ba kaaki ba wo u dɔ sanɔa kere. ¹⁶ Kisa, i ti má u akɔɔ ŋgumi kun, ama, i tara akɔɔ ɔ. I ti ya niwa korowaa a. Koro bo m fa koro i ni, wɔrɔ koro i tara sɔ. I ti u akɔɔ ɔ, ama, Mibie n deɛ ti, i kaaki ti u niwa a.

¹⁷ Nyini ti, nzen a fa i ka m ti u matafɔ, de i kabo má a de m ni. ¹⁸ Nzen wɔ do u ŋgasi be, wara i bita u kaari, ma nyini kaari n yo m deɛ kaari. ¹⁹ Mini Pɔɔlu ni m tii sufa m saa sukere ahin jɔre n a, ka m tɔ kaari n kere bo i bita i n ma u. M kaaki koro se u ka, m kaari su u su, fa kɔ u ŋgɔɔ bo a nyaari i Yesu dɔ ni. ²⁰ Nyini ti, m niwa, m koro ka a yo ahin sakpa n ma m, Mibie n deɛ ti. Kabo ya kere ti nibaa Kristo deɛ ti ni, da m ahore.

²¹ M la ahoresi ka a dé m nɔaniɛ ni, nyini ti ye m sukere ahin kadasi n a. Na kabo ma se ni, m si ka a yó i kɔ tara sɔ. ²² Bo i buka su la ka, m koro ka a yo sɔɔ dɔŋgu se m, dama m la tama ka Nyeme bá de am sere, na i má m kaaki ba am dɔ.

Pɔɔlu awieeri su deɛ anse yoowa ni

²³ M lamoko Ipafarasi bo m ni yiri wo dansaraka nu, Yesu Kristo dɛɛ ti ni, i ɲa m bisa u dɔŋgu. ²⁴ Marako, ni Arisitakusi, ni Demasi, ni Luka kere gusu ɲa m bisa u dɔŋgu, m ni bere sanɲa yo juma. ²⁵ Ya Mibie Yesu Kristo buka am kere.

Kadasi n bo bu kere fa maari HIBURUFOM ni

Nyeme nwanie n bo i jjo fiteeri i Wa n do ni

¹ Dawa sanja Nyeme yo faari i nwanie maari i nwanie kanfom wo, sanja barasu ni atin barasu barasum, na bu sukan i kere ya nam. ² Ama, ahin awieeri su sanja n bo ya wo nu ni, Nyeme afa i Wa n su ye i fa i nwanie n jjo ya so a. Nyeme maari yiri yiiri durunya n a. Na wo se ka, awieeri su, deke n kere ba yo i dee wo.

³ I jirima woowa wein ni kere kabo Nyeme ti a. Kabo Nyeme ti ni, i woowa ti so o. I nwanie n bo i la yiko ni, i fa nyini bita durunya n kere a. I faari i nu fa yoori yoowa, adena Nyeme fa adamande satie ce i. Nyini dee sin, na wo nya ako atana angoro, Micera Kpiri n saa fomboro su. ⁴ Nyeme maari i jinaabiri bambaka bo i tara i merekem dee, na wo kaaki ama i duma bo i tara bu dee ni.

Kabo Nyeme Wa n tara i merekem barasu ni

⁵ Dama kabo Nyeme seeri i Wa n ni, ka,

“Woro ti m Wa a,
nyuma, m kaaki u Si,”

wo se ma i mereke n be so. Bekun, i na

“M yo u Si,

na u gusu yo m Wa.”

⁶ Sasu bekun, sanja bo Nyeme yo na i sunma i Wa kun n kpein n durunya n nu ni, na wo se ka,

“Ma Nyeme merekem kere su i.”

⁷ Fa ko kabo Nyeme jjoori i merekem jore ni, i na,

“Mini, m ma m merekem yo bu juma
kabo anuma, ni sin yo bu juma barasu n wo.”

⁸ Ama, kabo Nyeme jjoori i Wa n do ni, i na,

“Woro ti Nyeme a, u femeya bie n la ma awieeri.

A bita u femeya n ni nahore atin su wo.

⁹ A koro sa bo i ko atin su wo,

na a koro ma sa bo i ko ma atin su a.

Nyini dee ti ye Nyeme ayi u a,

ye wo ma u ahoreda bo i tara u bengum kere n a.”

¹⁰ Na Nyeme akaaki ase i Wa n ka,

“Ya Mibie, bumboori ni, woro yiiri asiengu a.

U sa bo a yoori i dee ti, ye angoro wo bere a.

¹¹ I kere ba ka ngbeen wo,

ama, woro wo bere wo sanja kere.

Angoro n ni asiengu kere yo dawa

kabo sutura yo dawa barasu n wo.

¹² A pondi bu ka sanvuin bo wo do wo,

na a ba kaaki i fofore.

Ama, woro kaaki ma fieo,

na u afo la ma awieeri.”

¹³ Na Nyeme akaaki ase i Wa n ka,

“Ba tana m saa fomboro su fen,
haari m bá ma a kunma u kpofom na a nana bu kere nu.”

Kabo i seeri so ni, wo nya ase ma i merake n be so.

¹⁴ Ye i merakem ti nzum wo? Bu ti awiewiem bo bu su Nyeme wo, na i sunma bu na bu ko buka minem bo bu bá nya tiide ni.

2

Tiide bambaka n jore

¹ Nyini dee ti, wo yo daka ka ya bita Nyeme noanie n bo ya du mo ati i nyunyumi, adena ma ya mini. ² Ya si ka noanie n bo Nyeme yo fa maari i merakem, na bu kan kereeri ya nam ni, i ti nahore wo, na minem bo bu tiiri i na bu keteeri, na ba de ma i ni, bere nyaari suicin n a. ³ Nzen yere gusu keteeri nyini noanie kpiri n bo i kere kabo Nyeme de ya tii ji ni, ya yo se koro fite nu na ya nya ma suicin a? Ahin tiide n bo ya kan i jore ni, Mibie n ni i tii du mo kan kereeri minem a, na bo bu tiiri i n adi i daani, ase ya ka i ti nahore wo. ⁴ Nyini sangga n na Nyeme mmoo adi i daani abuka su, yiri la bo i yoori alekutura sa barasu barasum kereeri i yiko, na i maari minem nyaari i Awiewie Casi n aceerim kabo i koro barasu ni.

Yesu ti adamandem goroo

⁵ Nahore, Nyeme afa ma durunya fofore n bo ya kan i jore, na i suba ni, awura ma i merakem saa nu. ⁶ Ama, be akere i Nyeme Jore Kadasi n awore be nu, ka,

“Ya Micera Nyeme, adamande gusu ti nzu wo,
ye u cee wo i nu a?
Adamande wa ti nzu wo,
ye a nie i dika?”

⁷ Kabo a yoori i ni, a ma i jinaabiri kpieeri su sangga kaan afien ni u merakem dee,

na a nya awura i kpiri na a ma i jirima bambaka,

⁸ na a fa deke kere awura i saa nu.”

Ba kere i Nyeme Jore Kadasi n nu kabo Nyeme afa deke n kere awura adamande saa nu ka i nie i dika ni, nyini kere ka deke be wo ma bere bo i ti ma i dee. Ama, kisa, kabo i ti ni, ya nya nu ma i so. ⁹ Ama, ya nu Yesu kabo Nyeme yoori i ni, i ma i jinaabiri kpieeri su sangga kaan afien ni i merakem dee wo. Na i dee ahorma n nu na wo wu sono kere dee ti. Kisa, wahara n bo i diiri i na i wu n dee ti, Nyeme awura i kpiri, na wo ma i jirima bambaka.

¹⁰ Nyeme yiiri deke n kere a, yiri la deke n kere yiko a. I tiiri ye ni ka Nyeme kpini atin bo i mine beberebe ba nya i jirima woowa n be. Nyini dee ti, ye i ma Yesu ba diiri wahara n a, adena i yo minem mofa bo i ti kabo Nyeme koro ka i ti ni, dama yiri ma bu nya tiide a. ¹¹ Yiri Yesu bo i yo minem casi ni, i ni minem kere bo wo yo bu casi n sangga Si wo. Nyini dee ti, i la ma i nyinse na i fere bu ka i ninbaam n a. ¹² Na wo se Nyeme ka,

“M bo u дума kere m ninbaam.

Na sangga kere bo bu tieenri bu noo,
m di jue kansi u дума.”

¹³ Na wo kaaki ase ka,

“Mini, m daafi Nyeme nu,”

Na wo kaaki ase bekun ka,

“Mini ni nbaam bo Nyeme afa ama m ni, yere yaa.”

¹⁴ Kabo nbaam n ti adamande ni, nyini dɛɛ ti ye yiri mmɔɔ kaakiiri adamande a, adena i wu na i yo sɔnɔ bo i la yiwee yiko ni ngbɛɛn, yiri la Sitana a, ¹⁵ na i de minem tii ji, berɛ kerɛ bo bu ngɔɔ su na bu soro yiwee n dɛɛ ti, na ba kaaki akɔɔm ni. ¹⁶ I ti nahɔre wɔ ka, má merɛkem ye i buka deerɛ bu tii a, ama, Abraham busu nufɔm ye i buka deerɛ bu tii a. ¹⁷ Nyini kerɛ ka, wɔ yo daka ka i woowa ti ka i ninbaam i deke n kerɛ nu wɔ, adena i yo Nyemɛ sayoowa dɔnguyofɔm kpɛn bo i la dabuɲu na i si anɲunfɔ fa kɔ i nyemɛsu n nu, na i fa i ɲu yo yoowa ma minem na Nyemɛ fa bu satie ce bu. ¹⁸ Yiri ni i tii yo diiri wahara, na ba sɔ i ngɛɛ na bu nie ni. Nyini dɛɛ ti, ye i koro buka minem bo bu sɔ bu ngɛɛ na bu nie n a.

3

Kabo Yesu tara Moyisi barasu ni

¹ M ninbaam, amberɛ bo Nyemɛ ayi am ni yerɛ ka matafɔ casim ni, am fa am sunsunni se Yesu ɲu, yiri bo Nyemɛ asunma i na i ti ya sayoowa dɔnguyofɔm kpɛn n ni. Ya su yiri su a, ye ya di i daani kerɛ minem a. ² I yoori i juma n bo Nyemɛ yiiri i ka i yo i n ni nahɔre su wɔ, kabo Moyisi mmɔɔ yo yoori i juma kerɛ Nyemɛ awuru n nu, bukaari Nyemɛ minem ni nahɔre su n wɔ. ³ Kabo sɔnɔ bo i ta awuru n la jirima tara awuru n ni i tii ni, sɔ ye Yesu la jirima tara Moyisi a. ⁴ Awuru kerɛ la i tafɔ, ama, Nyemɛ ti deke n kerɛ tii a. ⁵ Moyisi yo laari dabuɲu yoori i juma kerɛ Nyemɛ awuru n nu, bukaari Nyemɛ minem n ka amususufɔ ɔ, na wɔ kerɛ bu deke bo Nyemɛ koroori ka i bá se bu ni. ⁶ Ama, Kristo yiri ti Nyemɛ Wa a, yiri la dabuɲu Nyemɛ awuru n nu koro bita Nyemɛ minem a. Nzen ya bita ya tama n ni ahoresi, yerɛ ti i awuru n nufɔm a.

Nyemɛ minem ɲumiyi n dɛɛ jɔre

⁷ Nyini dɛɛ ti, kabo Awiewie Casi n se ni,
 “Nyuma, nzen am tiiri kabo Nyemɛ suse,
⁸ má am ma am sui yo tantanantan,
 kabo am nam yo yoori bu sui tantanantan na bu yoori Nyemɛ na bu nie ni,
 sanɲa bo bu wo boro kpantain n nu na bu keteeri i nɔanie ni.
⁹ Na Nyemɛ ase ka,
 ‘Dɔ ye am nam yo yoori m na bu nie a,
 haari ni bo bu ɲuuri sam bo m yoori bu,
 nyini afɔ aburana n kerɛ nu ni,
 bu yoori m wɔ na ba nie.
¹⁰ Nyini dɛɛ ti ye m faari yaa bu ɲu a,
 ye m seeri ka, ba mini atin n a,
 dama ba yo má m sa koroowam ni.
¹¹ Na yaa ati m, na ma tan ndie ka,
 bu ny má atin wura má asien n bo má m ma bu nya ɲumiyi n nu ni.’ ”
¹² M ninbaam, am si am ɲu sa na má am be ahorembaa yo kekereke, na i kaaki i sin bo Nyemɛ, yiri bo i wo berɛ sanɲa kerɛ n dɛɛ atin ni. ¹³ Cɛɛn kerɛ bo ale acin na bu fere i ka, “Nyuma,” am sutu am benɲu fɔ, na má am ma be dadaka am na am yo satie na am sui yo tantanantan. ¹⁴ Nzen ya koro bitaari bumboori su nɔanie n kenken haari kɔ juuri i awieeri, nyini n kerɛ ka ya ni Kristo sanɲa yo juma kun wɔ lɛɛ. ¹⁵ Kabo ba kerɛ i Nyemɛ Jɔre Kadasi n nu ni, ka,
 “Nyuma, nzen am tiiri kabo Nyemɛ suse,

má am yo am sui tantanantan,
kabo am nam yo yoori bu sui tantanantan.”

¹⁶ N̄mam yo tiiri Nyeme n̄oan̄ie n ye bu yoori bu sui tantanantan n a? Má minem kere bo Moyisi yo yiiri bu fiteeri Ijipiti asien n su ni, nzen se? ¹⁷ Ye n̄mam ye Nyeme yo faari yaa bu n̄u afo aburana n a? Má bo bu yo yoori satie na bu wuuri boro kpantain n nu ni? ¹⁸ N̄mam ye Nyeme yo taanri ndie ka, “Bu nya má atin wura má asien n bo má m ma bu nya n̄umiyi n nu n a?” Má bere n bo bu yo keteeri i n̄oan̄ie ni, nzen se? ¹⁹ Deke bo i ti na ya n̄u ka ba wura má asien n su na bu nya n̄umiyi n la ka, ba yo má i yarada.

4

¹ Nyini ti, am ma ya si ya n̄u sa, na má be fun nyini n̄umiyi n bo Nyeme ase ka i fá ma ya na atin toko wo bere ka ya nya i ni. ² Dama yere mm̄o at̄i labari kpa n kabo bere mm̄o yo tiiri i ni, ama, bere ayo má i yarada, nyini dēe ti, ye w̄o kun má k̄pere ama má bu n a.

³ Ama, yere bo ya yo Yesu yarada ni, ya nya nyini n̄umiyi n bo Nyeme seeri ka i fá ma i minem ni. I ti kabo Nyeme seeri n w̄o, i n̄a,
“Na yaa ati m, na ma tan ndie ka,

bu nyá má atin wura má asien n bo má m ma bu nya n̄umiyi n nu ni.”
Fite sanḡa bo Nyeme yiiri durunya n kere wieeri ni, i juma awieeri lee. ⁴ Dama ba kere leso c̄een n j̄ore, Nyeme J̄ore Kadasi n aw̄ore be nu, ka,
“Nyeme yo yiiri i n̄umi, i jumayoowa kere nu w̄o leso c̄een ni.” ⁵ Ya kaaki an̄u ka w̄o j̄ojo nyini j̄ore n s̄o ka, bu nya má atin wura má asien n bo m ma bu nya n̄umiyi n nu. ⁶ Bo bu du m̄o tiiri labari kpa n ni, ba wura má nyini n̄umiyi n nu, dama ba yo má Nyeme yarada. Ama, atin toko wo bere bo nbem nya nyini n̄umiyi ni. ⁷ Nyini dēe ti, na Nyeme ma w̄o ce ka, na wo kpama c̄een f̄of̄ore be, na wo fere i ka nyuma, na wo ma Feme Davidi ajojo nyini c̄een n j̄ore, kabo ba kere i Nyeme J̄ore Kadasi n nu ka,
“Nyuma, nzen am tiiri kabo Nyeme suse,
má am ma am sui yo tantanantan.”

⁸ Nzen má Yosua koro maari Yisarelifom nyaari atin wuraari asien n bo Nyeme ma bu nya n̄umiyi n nu, má Nyeme ayo akaaki ase má ka c̄een n be wo bere bo i ma i minem nya n̄umiyi kun. ⁹ Ama, kabo i ti ni, n̄umiyi c̄een wo bere bo Nyeme bá fa ma i minem. ¹⁰ Dama s̄ono kere bo i nya n̄umiyi Nyeme do, i mi yi i n̄umi fa k̄o i juma su, kabo Nyeme yo yoori i juma wieeri na i yiiri i n̄umi n w̄o. ¹¹ Nyini dēe ti, am ma ya boro ya nyi, na ya nya n̄umiyi n bo Nyeme bá fa ma ya ni. Ama, má am ma ya be kete Nyeme n̄oan̄ie ni, adena má ya fun n̄umiyi ni, kabo Yisarelifom nbem yo keteeri na bu fuunri i ni.

¹² Nyeme n̄oan̄ie n la n̄ḡo na i la fan̄ga. I kaaki wo na tara takobe, i k̄pie wura s̄ono ahorembaa su w̄o, ni i n̄umi, ni i awiewie nu, na i k̄pie k̄paaki buwe sasuubiri, na i k̄o kpura b̄or̄oko nu, na i fiiti s̄ono sunsunni nu, na i si deke bo i ahorembaa koro, deke bo i ti kpa, ni bo i ti má kpa. ¹³ Deke be wo má bere bo i koro fie Nyeme, dama deke be wo má bere bo Nyeme ayi i na i nyumbaa n̄u má i. Yiri ye ya kere bá kan ya sayoowa kere i a.

Yesu ti Nyeme sayoowa d̄on̄guyofom kere k̄pien n a

¹⁴ Kisa, na ya la Nyeme sayoowa dɔnguyofɔ kpɛn bo i la mǎ aɲusu, na wɔ kɔ aɲgoro, na wɔ wura Nyeme dika n nu ni, yiri la Nyeme Wa Yesu, nyini dɛɛ ti, ye am ma ya bita i dɛɛ atin n bo ya ɲa ya yo i yarada n kenken. ¹⁵ Ya dɛɛ Nyeme sayoowa dɔnguyofɔ kpɛn n ti mǎ be bo i koro si mǎ ya aɲunfo ɔ. I koro si ya aɲunfo fa kɔ saɲga bo ya fanga akpɛ su, ni i dɛɛ atin su, dama ɲgeɛ barasu barasu kere bo bu fa sɔ ya ni, bu yo fa sɔori yiri mmɔɔ sɔ ɔ, ama, haari ni nyini n kere ni, wɔ yo mǎ satie be. ¹⁶ Nyini dɛɛ ti, am ma ya fa ahoresi, na ya cin dodo Nyeme femeya tanaabiri ni, yiri ti ahɔromafɔ a, adena i si ya aɲunfo, na saɲga kere bo ya ba koro buka, na i buka ya.

5

¹ Nyeme sayoowa dɔnguyofɔ kpɛn kere, bo Nyeme yo yiiri i minem n nu ka i yo juma ni, i dɛɛ la ka, i jina minem dɛɛ jinaabiri Nyeme ɔ, na i de bu acerim ni yoowam na i fa ma Nyeme fa kɔ minem satie bo ba yo i n dɛɛ ti. ² Yiri mmɔɔ ni i tii koro si minem aɲunfo bo ba si mǎ na ba mini atin ayo satie ni, dama yiri mmɔɔ fanga akpɛ su Nyeme ɔ. ³ Nyini dɛɛ ti, wɔ yo daka ka i du mɔ yo yoowa ma i ɲu fa kɔ i ɲgasi bo wɔ do i ka, ye i nya koro yo yoowa ma minem kere ɲgasi n a. ⁴ Be koro wura mǎ i ɲu kpɛri na i se ka i ti Nyeme sayoowa dɔnguyofom kpɛn, mǎ ka Nyeme ni i tii ayi i mi, kabo i yo yiiri Aaron ni.

⁵ Nyini dɛɛ ti, Kristo gusu awura mǎ i ɲu kpɛri ayo mǎ i ɲu Nyeme sayoowa dɔnguyofɔ kpɛn, se Nyeme yiiri i a, na wɔ se i ka,
 “Wɔrɔ ti m Wa a,
 nyuma, m kǎaki u Si.”

⁶ Ba kaaki akere i Nyeme Jɔre Kadasi n awɔre be nu ka, Nyeme ɲa,
 “Wɔrɔ ti Nyeme sayoowa dɔnguyofɔ,
 kabo Melekisideki busu nu ti n a,
 a wo bere sɔ ɔ saɲga kere, be de mǎ u.”

⁷ Saɲga bo Yesu wo durunya n nu fen ni, i yo sereeri Nyeme ni anyumbo ru, na wɔ bo afere Nyeme na wɔ sun, ka, i de i fite yiwee n nu. I yo yoori i ɲu kaan, na i soro Nyeme n dɛɛ ti, na Nyeme ade i sere.

⁸ Haari ni bo i ti Nyeme Wa ni, Nyeme maari i diiri wahara, adena i si kabo i deeri Nyeme noanie ni. ⁹ Saɲga bo Nyeme ma i tiiri kabo i koro ka i ti ni, ye wɔ ma sɔnɔ kere bo i deeri i noanie n nya tiide bo i la mǎ awieeri n a. ¹⁰ Dama Nyeme yiiri i ka i yo Nyeme sayoowa dɔnguyofɔ kpɛn, kabo Melekisideki yo ti barasu n a.

Fɔtu fa kɔ kabo mǎ ya fa ya yarada n ji ni

¹¹ Mǎ ya la deke dɔɲgu bo ya kan kere am fa kɔ jɔre bo ya jɔjɔ i n su, ama, i ti kekereke kabo ya kan teke am nyi, dama am koro ti mǎ i bu ndende. ¹² Saɲga bo am boori i bu ka am su Nyeme ni, am ace nu, mǎ am aju bo am sukere minem Nyeme noanie ni, ama, am toko tana koro ka bu kere am dekem bo ba du mɔ afa akere am, fa kɔ Nyeme noanie n su. Am toko nu nyufini wɔ, am nya koro di mǎ diire nɔnɔori. ¹³ Dama sɔnɔ kere bo i nu nyufini toko ti baakan wɔ lee, i nya koro si mǎ deke bo i kɔ atin su Nyeme ɔ. ¹⁴ Minem bo bu nyunu ati Nyeme dɛɛ atin n su, bere di diire nɔnɔori a. Ba sɔnsɔn Nyeme noanie ni, na bu su i su kabo i kere ni. Nyini ti ye bu la alecira koro si deke bo i ti kpa, ni bo i ti mǎ kpa n a.

6

¹ Nyini ti, má am ma ya ka Kristo ciciri su nɔani kereewam ngumi su, ama, am ma ya boro ya nyi na ya kɔ mɔ. I ti má ye ni ka ya sukan nyini jɔrem ni sanja kere. Nyini jɔrem ni la kaaki bu wo, fa kɔ bu satie su na bu yo Nyeme yarada ni, ² ni kabo bu bie bu Nyeme nzue barasu, na bu fa bu sa nana yaradayofom ɲu ka Nyeme yo bu kisi, ni kabo mine ba wu na bu tenge bu yiwee nu ni, ni kabo Nyeme ba di mine jɔre na be koro kaaki má i kun ni. ³ Nzen Nyeme soroori su, ya koro kɔ mɔ bo i tara sɔ. ⁴ Minem bo ba yo asi ka Nyeme atin n ti wein, na ba kaaki bu sin abo i ni, bu yo se koro kaaki ba Nyeme dɔ bekun a? Dama bu yo nyaari Nyeme aceerim wɔ, na ba de Awiewie Casi ni. ⁵ Ba yo asi kabo Nyeme nɔani n ti kpa barasu, ni kabo durunya n bo i suba n yiko ti. ⁶ Ama, na ba kaaki bu sin abo i, i ti kekereke bo nyini minem ɲusu koro kaaki ba i dɔ bekun, dama bu sayoowa kere ka bu sukaaki kpama Nyeme Wa n baka jaanu n su bekun wɔ lee, na bu suwura i nyinse minem nyunu. ⁷ Asien kere bo nzue tɔ sanja kere na mine dɔ su, na i yo diire nyunyumi, Nyeme wura nyini asien n abaraka beberebe. ⁸ Ama, asien bo buwe ni wura ɲgbɛɛɲgbɛɛnm fi su na i kunma kperɛ, i ce má, Nyeme yó i ɲgbɛɛn, na i awieeri su, sin bá yara i kere.

⁹ Ama, m ninbaam, haari ni bo ya kan sɔ n kere ni, ya la ahoresi fa kɔ amberɛ dɔ, dama am bita atin kpa n wɔ, yiri la tiide n bo am anya i ni. ¹⁰ Nyeme ti kpa, i wara fi má sakpa n bo am yo i ni, kabo am abuka i minem, na am toko buka bu ni. Nyini kere ka am koro i a. ¹¹ Ya koro ka am kere boro am nyi haari kɔ ju awieeri, adena deke n bo am la i tama n yo yiiwa. ¹² Má am ma nviɛya ti am, ama, minem bo bu yo yarada na bu la sawɔre, na bu nya deke n bo Nyeme seeri ka i fá ma bu ni, am su bu deɛ sayoowam su.

Deke bo Nyeme seeri ka i yó i ni, i kaaki má

¹³ Sanja bo Nyeme seeri Abraham ka i bá yo i kisi ni, be wo má bere bo i tara yiri Nyeme. Nyini deɛ ti, ye i faari i duma taanri ndie maari i a. ¹⁴ Na wɔ se i ka, “M yó u kisi, na u busu nufɔm bá sunnu beberebe.” ¹⁵ Na Abraham amindi haari na wɔ ba anya deke n bo Nyeme seeri ka i má i ni. ¹⁶ Nzen sɔnɔ ɲa i tan ndie, i tan deke bo i tara i mi n wɔ. Deke bo akuruwa nya yoori na bu taanri ndie, wɔ kun akuruwa n kere nɔɔ lee. ¹⁷ Nyeme yo koroori ka i kere i minem ka deke bo i bá ma bu ni, i worɔ má i nɔɔ i busu, nyini ti ye i kaaki taanri ndie n a. ¹⁸ Deke bo i seeri ka i yó i ni, ni i ndie taanwa n ti deke nnyɔ lee, bo bu kaaki má. Nyini kere ka Nyeme koro bu má kɔre a. Nyini ti ye yere bo ya ba i dɔ ka ya nya tiide n la ahoresi bita ya tama n bo ya la i ni anyumboro n a. ¹⁹ Tama n bo ya la i ni, i ti kabo ba kpama lee barasu n wɔ. Nyini ma ya ahorembaa abi kekereke, ye ya kaaki yaki má atin n bo ya bita i n a. Nyini tama n ti bo wɔ sin tani bambaka n bo i kanda n ɲu awura Sɔɔ Casi n nu a. Yiri bita ya a. ²⁰ Dɔ ye Yesu adu ya mɔ awura, ade ya deɛ jinaabiri a. Yiri ti ya Nyeme sayoowa dɔnguyofɔ kpɛn n bo i la má defo fieo, kabo Melekisideki busu nu n ti n a.

7

Nyeme sayoowa dɔnguyofɔ Melekisideki n jɔre

¹ Melekisideki ni, yiri yo ti mie n bo bu fere i ka Salem deɛ feme a, na i kaaki ti Micera Kpiri sayoowa dɔnguyofɔ. Sanja bo Abraham kɔ kuunri

lue ni nfeme nna nbem na i kunmaari bu na i sukaaki ko awuru ni, yiri Melekisideki ni kpaari Abraham atin ye i yoori kisi goori i nu n a. ² Na Abraham ayi dekem kere bo i kun lue n na i deer i ni, deke buru kere nu, na wo yi i kun kun ama Melekisideki. I duma Melekisideki n bu la ka, feme bo i sayoowa ko atin su. I kaaki ti Salem feme wo, i bu la ka, feme bo i fa tanalaife ba. ³ Melekisideki ni, be si ma i si, wara i ni, wara i busu nufom, wara kabo bu wuuri i, wara kabo i wuuri. I yo ti Nyeme sayoowa donguyofo bo wo la ma defo, kabo Nyeme Wa n ti n wo.

⁴ Am nie kabo i yo ti sono bambaka barasu a. Dama ya kere na Abraham yo yiiri deke n kere bo i ko kuunri lue n na i deer i ni, deke buru kere nu, i yiiri kun kun maari yiri Melekisideki n wo. ⁵ Nyeme noanie maawa n kun bo i wo i noanie kpamaawa n nu n kere ka, deke buru kere nu, bu yi kun kun fa ma Levifom, bu ti Nyeme sayoowa donguyofom n dee ti, haari ni bo bu kere ti mine kunm na bu ti Abraham busu nufom ni. ⁶ Melekisideki yo fite ma Levifom dee busu n nu, ama, Abraham yo yiiri deke n kere buru nu kun kun maari i wo, na wo yo kisi ago Abraham nu, yiri Abraham ye Nyeme yo seeri ka i ba yo i kisi n a. ⁷ Sono kere si ka, sono bo i yo kisi go minem nu n tara bo bu de kisi ni. ⁸ Levifom bo bu ti Nyeme sayoowa donguyofom na minem yo yiiri bu deke kere buru nu kun kun maari bu ni, bu ti yiweefom wo. Ama, Melekisideki bo Abraham yiiri i deke kere buru nu kun kun maari i ni, Nyeme Jore Kadasi n kere ka i toko wo bere wo lee. ⁹ Nyini ti, sangga bo Abraham yiiri deke n kere nu buru kun kun maari Melekisideki ni, ya koro se ka i wa Levi bo i ni i busu nufo yo deer i nyini n so ni, bu minem gusu mmoo ato lee. ¹⁰ Dama sangga bo Melekisideki ni Abraham yeeri ni, na Abraham nya wu ma Levi bo i fite i busu nu ni, nyini ti, ya koro se ka Abraham deer i wa Levi dee jinaabiri, ye i yi maari Melekisideki n a.

Nyeme sayoowa donguyofo be bo i ti ka Melekisideki ni

¹¹ Nyeme noanie kpamaawa ni, i yo wo Levifom bo bu ti i sayoowa donguyofom n saa nu a. Ama, nzen ma Levi busu nufom dee sayoowa donguyofom dee juma n koro yoori deke n kere bo ma i ti ye ni ka bu yo i ni, ma Nyeme ayi ma i sayoowa donguyofo bo i ti ka Melekisideki. Ma i kaaki yi i sayoowa donguyofo bo i fite Aaron dee Levifom busu n nu ba. ¹² I ti nahore wo ka, nzen Nyeme akaaki ano fofore fa ko i sayoowa donguyofom dee atin n su, wo yo daka ka i kaaki i noanie kpamaawa n gusu. ¹³ Kabo bu kereri Mibie n nusu jore ni, i fite ano barasu be nu a, nyini ano n nufu be ayo ma Nyeme sayoowa donguyofo juma be fieo. ¹⁴ Sono kere si ka i fite Yuda dee ano n nu wo, ama, fa ko Yuda dee ano n nu, ya ti ma ka Moyisi kereri ka bu be ba yo Nyeme sayoowa donguyofo.

¹⁵ Deke bo i ma ya ti jore n bu nyunyumi n tara nyini su n la ka, Nyeme ayi i sayoowa donguyofo bo i ti ka Melekisideki ama ya. ¹⁶ Ma i nam busu dee ti ye i la atin ka i yo Nyeme sayoowa donguyofo a, se i la ngoo bo i la ma awieeri n dee ti, ye i la atin a. ¹⁷ Dama ba kere i Nyeme Jore Kadasi n nu ka,

“Woro ti Nyeme sayoowa donguyofo bo a la ma defo fieo,
kabo Melekisideki busu n nu ti n a.”

¹⁸⁻¹⁹ Nyeme noanie maawa dawa n la ma kperere ni fanga, dama wo ma ma deke n ati ma kabo ma Nyeme koro ka i ti n a. Nyini dee ti, ye Nyeme ace i ase, ye wo ma ya tama n bo i tara nyini n a. Nyini tama n dee ti, ye ya koro cin dodo Nyeme n a.

²⁰ Nyini sin, na Nyeme atan ndie. Ama, sanja bo Nyeme yo yiiri Levifom n ka bu yo i sayoowa donɔɔyofom ni, wɔ yo atan má ndie. ²¹ Sanja bo Nyeme yiiri Yesu ka i yo Nyeme sayoowa donɔɔyofom ni, i taanri ndie wɔ, ka,

“Mini Micera Nyeme n atan ndie,

m wɔɔ má m nɔɔ,

wɔɔ ti Nyeme sayoowa donɔɔyofom bo a la má defo fieo a.”

²² Nyeme taanri nyini ndie n deɛ ti, nyini ma ya si ka Yesu jina sesesu fɔfɔre n sin ka i ti kpa tara dawa n a.

²³ Deke bo i ma i kaaki wo i ngumi n la ka, Levifom deɛ Nyeme sayoowa donɔɔyofom yo wu wɔ, na bu nbem de bu jinaabiri, nyini deɛ ti ye bu yo sunnu n a. ²⁴ Ama, Yesu yiri, i ti Nyeme sayoowa donɔɔyofom bo i wo bere sanja kere n deɛ ti, be wo má bere bo i koro de i jinaabiri na i yo yoowa.

²⁵ Nyini deɛ ti ye i koro de minem tii ji fieo n a, bere bo i ma bu cin dodo Nyeme ni, dama yiri wo bere sanja kere de bu nyemesere, fa kɔ Nyeme do a.

²⁶ Nyini ti, Yesu ti Nyeme sayoowa donɔɔyofom kpɛn bo i koro yo deke n kere bo wɔ yo daka ka i yo ma ya nahore su a, yiri ti bo i ti casi na i la má ngasi be a, i la má satie be, i woowa wo bere i ngumi ni satieyofom, ye Nyeme awura i kpɛri atara sɔnɔ kere bo i wo angoro n a. ²⁷ Kobo Nyeme sayoowa donɔɔyofom nkɛn nyingam yo ti ni, yiri ti má sɔ. Bere do, ale kere bo i cin, bu du mɔ yo yoowa ma bu ɲu fa kɔ satie bo ba yo i wɔ ka, na bu nya ba yo ma minem satie bo ba yo i. Ama, yiri yiri, yoowa kpekun n kpɛn ye i yoori i a, yiri la bo i faari i ɲu yoori i ni. ²⁸ Kobo Nyeme noanie kpamaawa n kere ni, haari ni bo minem bo bu yiiri bu ka bu yo Nyeme sayoowa donɔɔyofom nkɛnm n akoro ayo má deke n kere bo má wɔ yo daka ka bu yo i ni, bu yiiri bu wɔ. Ama, nyini noanie kpamaawa n deɛ sin, na Nyeme afa i tieɲgu duma atan ndie, na wɔ yi i Wa n ka i yo i sayoowa donɔɔyofom kpɛn. Yiri ti bo Nyeme ma i tiiri kobo i koro ka i ti sanja kere n a.

8

Yesu ti ya Nyeme sayoowa donɔɔyofom kpɛn n a

¹ Deke n bo m koro ka m se n kere la ka, ya la ahin Nyeme sayoowa donɔɔyofom kpɛn n bo i tana angoro, Micera Kpɛri n saa fɔmbɔɔ su. ² I yo i Nyeme sayoowa donɔɔyofom kpɛn juma n dika n nu wɔ, bo i ti Nyeme sereebiri nahore su, Nyeme ni i tii taari nyini dika n a, má adamande taari i a. ³ Nyeme sayoowa donɔɔyofom kpɛn kere bo Nyeme yo yiiri i, i deɛ la ka, i de minem aceerim, ni bu yoowam na i fa ma Nyeme. Nyini deɛ ti ye wɔ yo daka ka ahin Nyeme sayoowa donɔɔyofom kpɛn n gusu la yoowa be bo i yo ma Nyeme n a. ⁴ Nzen má Yesu wo durunya n nu, má i yo má Nyeme sayoowa donɔɔyofom fieo, dama minem bo Nyeme adu mɔ ayi bu ka bu yo sayoowa n wo bere wɔ, kobo Nyeme noanie kpamaawa n kere leɛ. ⁵ Juma n bo Nyeme sayoowa donɔɔyofom yo i ni, i ti kobo i wo angoro n wɔ, ama, i ti má kun. Moyisi deɛ n gusu yo ti sɔɔ, nyini ti ye sanja bo i ɲa i bo Nyeme Sereebiri Nambue n ye Nyeme seeri i ka, “Si nu, na a yo deke n kere kobo m kereeri u buka n su ka a yo i ni.” ⁶ Ama, kisa, Yesu deɛ Nyeme sayoowa donɔɔyofom juma n tara nyingam deɛ ni. So ye sesesu fɔfɔre n bo Yesu afa aba na i yo Nyeme ni minem afien donɔɔn n

tara dawa dɛɛ n a. Dama sesesu fɔfɔre n dɛɛ ti, ye Nyeme ŋa i fa deke n bo i ti kpa na i la má aŋusu n fa ma ya n a.

⁷ Nzen má sesesu n bo Nyeme du mɔ diiri i di n koro yoori deke n kere bo wɔ yo daka ka i yo ni, má i kaaki fa má sesesu fɔfɔre na i di i di kun.

⁸ Ama, na Nyeme aŋu i minem ni ŋgasi, na wɔ se bu ka,

“Micera n ŋa o,

sanɗa suba bo m fá sesesu fɔfɔre

na m dí i di ni Yisarelifom ni Yudafom.

⁹ I ti má ka dawa dɛɛ sesesu ni,

bo m yo faari i na m diiri i di ni am nam ni,

sanɗa bo m yiiri bu fiteeri Ijipiti asien n su ni.

Ba yo abita má i kabo m yo seeri bu ni,

nyini dɛɛ ti, ye m cɛɛ awo má bu nu n a.

Kabo Micera n seeri lɛɛ.

¹⁰ Sesesu n bo m bá di i di ni Yisarelifom la ka,

fa kɔ fa ba,

m fá m noaniɛ n wura bu sunsunni nu,

na bu bíta i bu ahore su,

mini yó bu Nyeme a,

na bu yó m minem.

Kabo Nyeme seeri lɛɛ.

¹¹ Be wo má bere bo i bá kere i lamoko

ka i si Micera ni.

Dama soŋo kere bá si m,

fa i tarakam kɔ tu i nfaŋgafom kere.

¹² M sí bu aŋunfo, na m fá bu satie bo ba yo i n fa ce bu,

na m tɛŋge má i su fieo.”

¹³ Deke bo i ti na Nyeme yo kaanri sesesu fɔfɔre be jɔre ni, i bu la ka, ciciri su dɛɛ n ayo dawa. Deke kere bo i nya yoori dawa wieeri, i cɛ má, i busu míni wɔ.

9

Ciciri su sesesu n ni sesesu fɔfɔre n dɛɛ nyemesu jɔre

¹ Kabo i ti n la ka, ciciri su dɛɛ sesesu n bo Nyeme diiri i di ni, yo la atin kereewa kereewam bo bu fa su Nyeme, na i kaaki la dika bo ba ta i ase durunya n nu fen na bu wo nu su Nyeme. ² Bu yo boori nambue be wɔ, na ba fa sanvuin ati i nu nnyɔ. Anɔ nu dɛɛ soɔ ni, fitana takaabiri, ni teebiri, ni kɔŋɔ bo bu fa ma Nyeme n wo do, bu fere bere n ka Soɔ Casi. ³ Mɔ dɛɛ soɔ ni, bu fere i ka Casi Kere Casi Soɔ. ⁴ Mikun yoowa yooberi n bo ba mata i sika n wo do, nyini yooberi n su ye bu kunkun tulaalɛ nvanvani fa ma Nyeme a. Alaka n bo ba mata i sika n gusu wo do, nyini alaka n kere kabo Nyeme faari sesesu diiri i di n a. Deke bo bu wo alaka n nu n la sika torose n bo ba fa diire n bo bu fere i ka *mana* n awura nu ni, ni Aarɔn kpama n bo i fiefieeri nyawa ni, ni yabue pɛpɛrɛpɛ nnyɔm bo Nyeme akere i noaniɛ maawa burum n ago su ni. ⁵ Na ba yo deke nnyɔ nbem bo bu la lanɗkpete ase alaka n tii su, nyini dekem ni kere kabo Nyeme wo i minem do barasu a, bu fere bu ka *Cerubim*, ba fa bu lanɗkpetem akata dika n bo Nyeme si i minem aŋunfo n su. Kisa, ya koro kere má deke n kere kun kun kabo bu ti barasu.

⁶ Kabo i ti ni, bu nya sese nyini nengem kere su wieeri, nyini sanɗa, Nyeme sayoowa donɗuyofom suwura soɔ n bo i wo anɔ nu n wɔ, na bu

suyo bu Nyeme juma sanƙa kere. ⁷ Ama, Nyeme sayoowa danguyofa kpien ni ngumi koro wura soƙo n bo i wo mo n nu a. Afo kere afo, i wura do kpekun wo, nzen i na i wura do gusu, i bita nengendorembunja a, na i du mo yo yoowa ma i nu ka, na i nya yo ma minem dee satie bo ba yo i na bu si ma ni. ⁸ Deke bo i ti na Awiewie Casi n fa nyini atin n so ni, na i kere ya ka, sanƙa bo bu yo boori nyini nambue na bu sese deke n kere su ni, Nyeme nya teke ma atin na minem kere koro wura Casi Kere Casi Soƙo n nu. ⁹ Nyini n kere bo bu yo yoori i ni, i la bu ma ya kisa. I bu la ka, acerim ni nengem kere bo bu yo fa yoori yoowa suuri Nyeme ni, ba koro ama ma bu sunsuni ati ma kabo ma i ti ye ni ka i ti ni. ¹⁰ Dama nyini yoowa atin n kere diire diiwam, ni deke nuuwam, ni bu yoowam kabo bu nmisi bu nu na bu yo bu nu casi ngumi wo. Nyini n kere la i sanƙa nyaari wo, yiri la bo bu suo i so o, haari ko ju sanƙa bo Nyeme ba yo deke n kere dangu.

¹¹ Ama, kisa, Kristo aba, yiri ti Nyeme sayoowa danguyofa kpien n a, yiri bita atin kpa n bo bu yo seeri ka i fa ba n a. Nyeme Sereebiri Nambue n bo wo wura nu, na i suo i Nyeme sayoowa danguyofa kpien juma ni, nyini nambue n la ma anusu durunya n nu fen, i ti kabo Nyeme koro ka i ti n wo, dama i ti ma deke bo adamande taari i ni bu saa a, wara dekem bo Nyeme yiiri bu durunya n nu fen n be wo. ¹² Ma naanim ni sirim dee mbunja ye i fa wuraari nambue n nu a, ama, i faari i tienggu mbunja a, na wo fa awura Casi Kere Casi Soƙo n nu kpekun n kpein, na wo fa ayo yoowa ama ya, adena ya koro nya tiide n bo i la ma awieeri ni. ¹³ Minem bo fin yo wo bu nu, na bu koro cin dodo ma Nyeme ni, bu fa sirim ni tooram mbunja ye bu fa yoyokoti go bu nu a, na bu yara nambaa, na bu fa nzuin n go bu nu. Nyini sanƙa, ba kpakpara bu fin ayo bu casi lee. ¹⁴ Nzen nyini yoowam bo bu yo bu n ma mine yo casi, nyini yiri, Kristo dee mbunja ni koro yo bo i tara so o. Awiewie Casi ni, yiri bo i wo bere sanƙa kere n dee yiko n nu ma Kristo koro faari i nu yoori yoowa bo i la ma gela be maari Nyeme n a. I dee mbunja ni koro kpakpara yi satiem bo bu ma ya ka ngbeen ya ahore su, ni ya sunsuni nu n a, nyini ma ya koro su Nyeme bo i wo bere sanƙa kere n a.

¹⁵ Kristo yoori so n dee ti, yiri ti afien danguyofa n bo wo fa sesesu fofore n aba, adena minem kere bo Nyeme afere bu n nya deke n bo i diiri i di ka i ma bu ni. Nyini deke n la aja n bo bu di i na i la ma awieeri ni. Yiwee n bo Kristo wuuri ni, nyini de minem tii ji fa ko bu satie ti, na ba do Nyeme ngasi, ni ciciri su sesesu dee atin n su. ¹⁶ Sesesu fofore n bo Nyeme diiri i di ni, i ti kabo sonko toko la ngoo na i kere kabo bu ba kpaaki i aja nu barasu n wo, ma ka wo wu ka, ye bu koro di i aja n a. ¹⁷ Sanƙa bo i toko la ngoo ni, be koro di ma i aja ni, ma ka wo wu ka. ¹⁸ Nyini dee ti, ye haari kana ciciri su sesesu n bo Nyeme diiri i di n ba yo juma, ma ka ba yi nengendore mbunja. ¹⁹ Nyini sanƙa, Moyisi du mo kaanri Nyeme noanie maawam n kere kereeri minem n wo, kabo bu wo Nyeme noanie kpamaawa n nu n ka, na i nya fa tooram ni sirim mbunja na i sanƙa nzue nu, na i fa nyawa ni boe ndore kokore bo ba wu i tani, na i fa bo nu, na i fa yokoti go Nyeme noanie kpamaawa kadasi n su ka, na i nya yokoti go minem kere nu, ²⁰ na i nya se bu ka, "Ahin mbunja ni ti deke bo i kere sesesu n bo Nyeme adi i di ase am ka am bita i noanie n a." ²¹ So ye Moyisi yo fa mbunja n yokoti go nambue n su a, ni nenje n kere bo bu bita yo juma ma Nyeme n gusu. ²² Nahore, kabo Nyeme noanie kpamaawa n kere ni, i ti ka deke kere bo bu nu ya bu yo i casi, ma ka ba fa mbunja ayokoti su

ka. Nyeme fa má bu ngasi ce má bu, má ka ba yi deke mbunja.

Kabo Yesu faari i nu yoori yoowa na i deeri mine dangu fiteeri bu satie nu ni

²³ Nyini deɛ ti, Nyeme Sereebiri Nambue ni, ni dekem n kere bo bu wo nu ni na bu ferema ni angoro deɛm ni, wo yo daka ka bu fa nengendore mbunja yo bu casi. Ama, nengem n bo bu wo angoro n yiri, wo yo daka ka bu fa deke bo i mbunja tara nengendorem deɛ fa yo bu casi a. ²⁴ Kristo awura má dika casi n bo i ferema ni angoro deɛ n nu a, bo minem taari i ni, ama, i wuraari angoro deɛ n ni i tui nu a, ye kisa, wo de ya jinaabiri Nyeme do. ²⁵ Afɔ kere afɔ Nyeme sayoowa danguyofom kpien ni yo wura Casi Kere Casi Soɔ n nu wo, na i fa nengendore mbunja n yo yoowa. Ama, Kristo yiri awura má angoro deɛ dika n nu ka i sufa i nu yo yoowa sangɔ kere sangɔ. ²⁶ Nzen má i na i sufa i nu yo yoowa sangɔ kere sangɔ, má i sudi wahara a sangɔ kere, fite kabo Nyeme yiiri durunya n ba ju ni nyuma. Ama, kabo i ti n la ka, ahin sangɔ n bo deke n kere aba awieeri su ni, na wo ba kpekun n kpein, afa i nu ayo yoowa, adena Nyeme fa adamande satie ce i. ²⁷ Nyeme akpama i ka adamande kere wu kpekun wo, nyini sin, na Nyeme dí i jore. ²⁸ Kabo Kristo gusu yoori lee. Kpekun n kpein ye i faari i nu yoori yoowa, adena i de mine dangu satie bo ba yo i ni. Nyini sin, i kaaki ba bekun. Má mine satie bo ba yo i n deɛ ti ye i bá, ama, i bá de minem bo bu niɛ i atin nu n tii ji wo.

10

Kabo Yesu yoori yoowa kpekun n kpein ni

¹ Nyeme noanie kpamaawa ni, i ferema ni deke kpa n bo Nyeme na i fá ba n wo, ama, má yiri lee. Nyini ti, yoowa n bo bu yo bu sangɔ kere akoro ama má bere bo bu cin dodo Nyeme ni, ati má kabo má i koro ka bu ti ni. ² Nzen má nyini yoowam n kere koro yiiri minem n bo bu su Nyeme n fiteeri bu satiem nu, má bu sunsunni ma má bu ceɛn be ka ba yo satie, má bu yaki nyini yoowam wo. ³ Ama, kabo i ti n la ka, nyini yoowa n bo bu yo i afɔ kere afɔ n tenge bu su fa ko bu satiem bo ba yo bu n su wo. ⁴ Dama tooram ni sirim mbunja koro yi má satie bo i wo adamande ahore su ni, ceɛn be.

⁵ Nyini deɛ ti, sangɔ bo Yesu koro ka i ba durunya n nu fen ni, na wo se Nyeme ka,

“A koro má ka mine fa aceerim
ni nengendorem n yo yoowa ma u,
ama, adamande nuniembaa ye a fa ama m
ka m fa yo yoowa n a.

⁶ U nyunu ayi má yoowam
bo bu yo bu na bu kpie nengendorem kom,
na bu yara bu sayoowa yoobiri n su ni,
ni yoowam n bo bu yo satie na bu yo bu ni.”

⁷ Na wo kaaki ase Nyeme ka,
“Mini yaa, ma ba ka m ba yo u koroowa n wo,
kabo ba kere m nusu jore u noanie kpamaawa n deɛ kadasi n nu ni.”

⁸ I du mo seeri Nyeme ka, “A koro má ka mine fa aceerim ni nengendorem n fa yo yoowa ma u, u nyunu ayi má yoowam bo bu yo na bu kpie nengendorem kom, na bu yara bu sayoowa yoobiri n su ni, ni yoowam n bo bu yo satie na bu yo bu ni.” I seeri soɔ, haari ni bo Nyeme noanie

kpamaawa n kere so ni. ⁹ Na wo se Nyeme ka, "Mini yaa, ma ba ka m ba yo u koroowa n wo." Nyini la ka, Nyeme akun ciciri su dee yoowam kere nso lee, ye wo fa fofore aba. ¹⁰ Nyeme koroowa n lee ye i yoori n a. Kpekun n kpein ye i faari i nu yoori yoowa. Nyini ti ye wo kpakpara ya kere fin ayo ya casi n a.

¹¹ Yudafoam Nyeme sayoowa dongyufofo kere yo i Nyeme juma ceen n kere wo, na i suyo nyini yoowa kun n sanja kere. Haari ni nyini yoowam n kere, bu be koro yi ma minem satie bo i wo bu sunsunni nu ni. ¹² Ama, Yesu yiri yoori yoowa kpekun n kpein wo, bo i yo juma sanja kere, fa ko mine satie bo bu yo i su. Na wo nya ako atana angoro Nyeme saa fomboro su. ¹³ Fite nyini sanja ni, i nminda kabo Nyeme ba ma i kunma i kprofom na i nana bu kere nu. ¹⁴ Nyini yoowa kun n dee ti, wo kpakpara minem fin kere na wo ma ba ti kabo Nyeme koro ka bu ti ni, sanja kere.

¹⁵ Awiewie Casi n gusu kaanri i so kereeri ya. Wo du mo ase ka,

¹⁶ "Micer a na, sesesu n bo m ni bere adi i di

fa ko sanja bo i suba n la ka,

m fa m noanie kpamaawa n wura bu sunsunni nu,

na m kere i go bu ahore su."

¹⁷ Na wo kaaki ase ka,

"M tégge ma bu satiem bo ba yo bu n su,

kabo bu keteeri na ba su ma m noanie kpamaawa n su kun."

¹⁸ To, Nyeme afa satie bo minem ayo i ace bu, nyini la ka, yoowa be wo ma bere bo be yo i fa ko satie su kun.

Am ma ya cin dodo Nyeme

¹⁹ M ninbaam, Yesu dee mbunja n ti ye ya la ahoresi kere ka ya koro cin dodo Nyeme a, na ya koro wura Casi Kere Casi Soo n nu a. ²⁰ Yesu ateke atin fofore bo i ma ngoo nahore su ama ya. Kabo i faari i nu yoori yoowa ni, i ti ka wo teke atin ama ya na ya koro sin tani bambaka n bo bu fa kanda n nu, na ya wura Casi Kere Casi Soo n nu. ²¹ To, kisa na ya la Nyeme sayoowa dongyufofo bambaka bo i nie yere n bo ya ti Nyeme minem n su ni. ²² Nyini dee ti, am ma ya cin dodo Nyeme ni ya ahorembaa kun, na ma ya yo sika be. Yesu mbunja n akpakpara ayi satie kere bo i wo ya ahore su a, na ma ya sunsunni nu suma ya sanja kere ka ya yo satie. Nyeme nzue n gusu bo ba fa abie ya ni ama ya nunie ayo casi a. ²³ Tama n bo ya na ya la i ni, am ma ya bita i ni ya saa nnyo, ma am ma ya fa sika wura nu, dama ya si ka Nyeme yo deke n bo wo fa sesesu adi i di ka i yo i ni. ²⁴ Am ma ya sutu ya bengum fo, na ya buka ya benggu, na koro wo ya afien na ya yo sakpa. ²⁵ Kabo i ti ye ni ka ya sutien ya nso na ya su Nyeme sanja kere ni, ma am ma ya yaki i kabo nbem suyo barasu ni, ama, am ma ya sutu ya benggu fo na bu nya ahoresi buka su, dama ya kere nu ka Micer a n dee ceen n adodo lee.

²⁶ To, kisa na ya si kereewa n bo i ti nahore ni, na nzen ya toko kete i yo satie ni, yoowa be wo ma bere bo ya yo i na Nyeme fa ya satie ce ya kun, ²⁷ ma ka ya nminda ni sere fa ko ceen n bo i suba na Nyeme ba di minem jore, na i fa bo ba kete i noanie n wura sin n bo i ti kekere agaya n nu, na bu ka ngbeen ni. ²⁸ Nyeme noanie kpamaawa n bo i yo fa maari Moyisi ni, nzen sono be keteeri na i yoori satie, na mine nnyo wara nsan diiri daani ka i ti so, nkpienkpienm si ma i mi anjunfo, bu kun i wo. ²⁹ Ye nzen i nya ti so, sono kere bo i buuri Nyeme Wa ni ngbeen na i sunsun ka

Yesu mbunja n bo i yo ya casi n ti ngbeen, na i jojo wura Awiewie Casi n bo i si ya anunfo ni ngasi nu, suicin barasu bono ye am sunsun ka Nyeme fa cin i a? ³⁰ Dama ya si ka Micera n ase ka, "Mini cin bu sui a. Mini to bu kaari a," na wo kaaki ase ka, "Mini di m minem jore a." ³¹ Woro kere bo a to Nyeme saa nu, yiri bo i wo bere sangha kere ni, i la sere agaya.

³² Am tenge su, na am nie sangha bo am du mo nyaari anyunuteke fa ko labari kpa n su ni, haari ni bo am yo diiri wahara agaya ni, am afa ahoresi ade nyini kekereke n kere. ³³ Sangha be bu yo kpie am nzuko, na bu kere am wuwuruwa jama nu. Na sangha be gusu na am asanga adi wahara ni am bengum bu bu kere bu wuwuruwa ni. ³⁴ I ti nahore wo ka, am asi dansarakam anunfo. Bekun, haari nzen mine fiinri am nengem kere bo am la i ni, am ahore ti jowa a, dama am si ka am la deke bo i tara nyinim bo ba de am do ni, nyini deke n yiri wo bere wo sangha kere. ³⁵ Nyini dee ti, ma am ma am njunie yoroki am, dama ahoresi n bo am la i ni, nyini ma am nya aceeri bambaka Nyeme do a. ³⁶ Kisa, wo yo daka ka am la mindi, adena am yo Nyeme koroowa, na am nya deke n bo Nyeme afa sesesu adi i di ka i ma am ni. ³⁷ Dama ba kere i Nyeme Jore Kadasi n nu ka,

"Wo ka kaan, i ce ma,
yiri n bo i suba ni, i ba.

³⁸ M sono bo i yo sa bo i ko atin su m do,
i nya ngoo, i yarada n dee ti,
ama, sono kere bo i kaakiiri i sin boori m,
m ahore jo ma i mi nu."

³⁹ Yere yiri, ya ti ma minem bo bu kaaki bu sin, na bu ka ngbeen ni, ama, ya ti minem bo ya yo Nyeme yarada na ya nya tiide wo.

11

Yaradayo jore

¹ Nzen ya yo Nyeme yarada, ya la ahoresi ka deke n bo ya yo i tama ni, ya nya i, na ya kaaki la ahoresi ka deke n bo ya nyumbaa nu ma i n wo bere nahore su. ² Dawafom yoori Nyeme yarada n dee ti, ye i se ka i nyunu ayi bu sayoowa n a.

³ Ya yo Nyeme yarada n dee ti, ye ya koro fa si ka Nyeme yo jooori noanie wo, ye i fa yiiri durunya n a. Nyini ma ya si ka, dekem bo ya nyumbaa koro nu bu ni, Nyeme afa deke bo ya koro nu ma i ayi bu n a.

⁴ Abeli yo yoori Nyeme yarada n dee ti, ye i koro yoori yoowa bo i ti kpa tara i goro Keen dee n bo i yo maari Nyeme n a. I yarada n dee ti, ye Nyeme nyunu yiiri i aceeri n ye i seeri ka i ti sono bo i yo sa bo i ko atin su i do n a. Abeli ti sono bo wo wu wo, ama, haari ni kisa, i yarada sayoowa toko yo juma ya do.

⁵ Henoki yo yoori Nyeme yarada n dee ti, wo wu ma, na Nyeme afa i ako i bi angoro, nyini ti ye be anu ma i n a, dama Nyeme afa i ako i bi. Ba kere i Nyeme Jore Kadasi n nu ka, sangha bo Nyeme nya fa ma i ko ma i bi angoro ni, Nyeme nyunu yiiri i sayoowa a. ⁶ Nzen sono ayo ma Nyeme yarada, i mi koro yo ma sa bo i yi Nyeme nyi, dama sono kere bo i ba Nyeme do, wo yo daka ka i mi yo yarada ka Nyeme wo bere, na i to mine n bo bu nienie i busu ni nkato nahore su.

⁷ Nowa yo yoori Nyeme yarada n dee ti, ye i yo deeri kabo Nyeme boboori i fa ko sam bo bu ba yo n su n a. I deeri Nyeme noanie n kpaari lee bambaka n ye i ni i dikafom wuraari nu ye ba wu ma n a. I yoori so n dee

ti, nyini kere ka minem bo bu kaari durunya n nu n ti satseyofom a, ama, Nowa yiri, i yarada n dɛɛ ti, Nyemɛ ade i ka i yo sa bo i kɔ atin su i dɔɔ.

⁸ Abraham yo yoori Nyemɛ yarada n dɛɛ ti, sangɔ bo Nyemɛ fereeri i, na i seeri i ka i kɔ asien be bo i seeri ka i fá ma i n su ni, haari ni bo i si má deke bo i sukɔ ni, yarada n dɛɛ ti, ye i yo deeri Nyemɛ nɔaniɛ n ye i fiteeri i nam asien su koori nyini asien n su a. ⁹ Yarada n dɛɛ ti, ye i kɔ juuri asien n bo Nyemɛ ase ka i fá ma i n su n a, dɔ ye i tanaari ka i ti wɔfɔ n a. I ni i wa Izaki, ni i anuma Jakɔbu yo boori nambue woori dɔ sangɔ be su wɔ. Haari ni bo bɛre yo ti minem bo bu nyaari deke n bo Nyemɛ ase ka i fá ma bu n a. ¹⁰ Abraham boroori i nyi nienɛɛri miɛ kpiri n bo Nyemɛ ni i tiɪ ata i na i la má awieeri n a.

¹¹ Abraham yi Saara nmɔɔ yo yoori Nyemɛ yarada n dɛɛ ti, haari ni bo wɔ yo buke na i ti nɔrɔka ni, yarada n dɛɛ ti, ye i koro wuuri baa n a. I yo yarada ka Nyemɛ yó deke n bo i seeri ka i yó i ni. ¹² Haari ni bo má Abraham ti ka sɔnɔ bo wɔ wu ni, yiri nyini sɔnɔ kun n ye i busu nufom asunnu ka asarambaam bo bu wo angoro n a, ni kabo kunma nmiɛ sunnu na i la má nɔ n a.

¹³ Nyini minem kere yoori Nyemɛ yarada a, haari bu ba wuuri. Ba nya má deke n bo Nyemɛ seeri ka i yó ma bu, bu nɔɔɔ su ni. Ama, yarada dɛɛ n ti, bu njuuri deke n ka i wo dede wɔ, na ba de i ni ahorejo, na ba soro su ase ka bu ti wɔfom wɔ, wara nanatiirifom wɔ, durunya n nu fɛn. ¹⁴ Nyini minem kere bo bu seeri sɔ ni, i kere ka, bu boro bu nyi nienɛ bu tienngu asien busu wɔ. ¹⁵ Nzen má bu faari bu ahorembaa seeri asien n bo ba yo ayaki i n su ni anyumbo, má bu koro nya atin bo bu kaaki kɔ nyini asien n su bekun. ¹⁶ Ama, bu yo koroori asien be bo i tara bo bu yo yakiiri i n wɔ, yiri la Nyemɛ dɛɛ woobiri n bo i wo angoro ni, nyini dɛɛ ti, ye i ti má nyinse Nyemɛ dɔ ka bu fereeri i ka bu Nyemɛ n a, dama yiri ye wɔ sɛsɛ miɛ kpiri be su ase bu a.

¹⁷ Abraham yo yoori Nyemɛ yarada n dɛɛ ti, ye i yo faari i wa Izaki ka i fa yo yoowa, sangɔ bo Nyemɛ yo koroori ka i yo i na i niɛ n a. Yiri bo Nyemɛ yo seeri i ka i yó sakpa ma i ni, i soroori su wɔ, ka i fa i wa kun n kpein n yo yoowa ma Nyemɛ, ¹⁸ haari ni bo Nyemɛ yo seeri i ka, “Izaki dɛɛ ti, ye a nya busu nufom a.” ¹⁹ Abraham siiri ka Nyemɛ koro tenge Izaki fite yiwee nu. Nahɔre, i yarada n dɛɛ ti, na Nyemɛ atenje Izaki yiwee nu, dama Abraham dɔ, Izaki ti ka sɔnɔ bo wɔ wu ye wɔ tenge a.

²⁰ Izaki yoori Nyemɛ yarada n dɛɛ ti, ye i yo seeri i nbaa nnyɔm ni Jakɔbu ni Esawu ka, fa kɔ fa ba, Nyemɛ yo bu kisi n a. ²¹ Jakɔbu yoori Nyemɛ yarada n dɛɛ ti, sangɔ bo i ba sudodo ka i wu ni, na wɔ sere Nyemɛ ayo Yosefu nbaam nnyɔ ni kisi, na wɔ miɛ i kpama su ayasu asu Nyemɛ.

²² Yosefu yoori Nyemɛ yarada n dɛɛ ti, sangɔ bo i ba suwu ni, ye i jɔjɔori ka, Yisarelifom bá fite Ijipiti asien n su n a, na wɔ kere kabo bu yo i fuin n barasu.

²³ Moyisi si, ni i ni yo yoori Nyemɛ yarada n dɛɛ ti, bu wuuri i ni, ba soro má nɔaniɛ n bo Ijipitifom femɛ n fa maari ni, na ba fa i afie sara nsan, dama bu njuuri ka i yo nyumi agaya. ²⁴ Moyisi yo yoori Nyemɛ yarada n dɛɛ ti, ye sangɔ bo i ba biiri biɛsɔ, i keteeri ka má bu fere i ka femɛ wa baabara n dɛɛ wa n a. ²⁵ I koroori kabo i ni Nyemɛ minem sangɔ di wahara n tara bo i di fiefie n bo i ce má na i do Nyemɛ nɔgasi ni. ²⁶ Yiri dɔ, nzen bu kpieeri i nzukɔ kabo bu kpie Kristo Tiidefɔ n ni, nyini la kperɛ tara deke kere bo má i nya i Ijipiti asien n su ni, dama i nyunu yo boroori

aceeri n bo i bá nya i Nyeme do ni su a. ²⁷ I yoori Nyeme yarada n deɛ ti, ye i fiteeri Ijipiti asien n su n a, haari ni bo femɛ n faari yaa i ɲu ni, wɔ soro má sere. I ti ka i nie ɲuuri Nyeme wɔ, yiri bo be koro ɲu má i ni, nyini deɛ ti ye i koro mindi jinaari ni nahɔre su n a. ²⁸ I yoori Nyeme yarada n deɛ ti, ye i yo kpamaari Butara cɛɛnkpiri n a, na wɔ kaaki ase Yisarelifom ka, bu kun nbombaam, na bu fa mbunja boroki bu sɔɔ anɔm su, adena Nyeme mereke n bo i kun n ba baari, na má i kun Yisarelifom nbaabieso nkpiɛnm n a.

²⁹ Yisarelifom yo yoori Nyeme yarada n deɛ ti, ye sanɓa bo bu ɲa bu kpɛ kunma kpiri n bo bu fere i ka Kunma Kɔkɔre ni, ye i tiiri nu nnyɔ na atin ada afien, na ba nati asien wuruuwa su asin n a. Ama, sanɓa bo Ijipitifom koroori ka bu kpɛ ni, nzue n diiri bu kere wɔ.

³⁰ Yisarelifom yo yoori Nyeme yarada n deɛ ti, sanɓa bo bu bara yeeri Yeriko mie kpiri n lesɔ ni, na kobe n bo ba ta abara aye mie n kere atɔ.

³¹ Bara sakara n bo bu fere i ka Rahabu yo yoori Nyeme yarada n deɛ ti, sanɓa bo Yisarelifom kuunri i minɛm bo bu keteeri na ba de má Nyeme noaniɛ n ni, ba kun má i, dama yiri yo deeri Yisarelifom koresiyifom wɔfo faari bu fiɛri a.

³² To kisa, m si má kabo m se kun, m la má sanɓa bo m kan fa ko Gedeyon, ni Balaki, ni Samson, ni Yefeta, ni Feme Davidi, ni Samuweli, ni Nyeme noaniɛ kanfom n jɔre n su. ³³ Bu yoori Nyeme yarada n deɛ ti, bu nbem kunmaari bu kpɔfo nfanggafom lue nu wɔ, na nbem ayo sa bo bu ko atin su, na nbem anya deke n bo Nyeme seeri ka i yó ma bu ni, na nbem gusu akata jaram nɔɔ bo ba koro ayo má pui. ³⁴ Na ba fa nbem awura sin bambaka nu ka bu yara bu, ama, na sin n anɔ, wɔ koro ayo má bu pui. Na ba koro ka bu kpɛ nbem takobe ka bu kun bu, ama, na ba fite nu. Haari ni bo nbem ti daburukafom ni, bu nyaari fanga a, na ba tu lue ni asien nbem su sojam, na ba kunma bu. ³⁵ Nbara nbem yo yoori Nyeme yarada n deɛ ti, na Nyeme atɛnɓe bu lamɔkɔm bo ba wu n yiwee nu ama bu. Ama, na ba kere nbem wahara akun bu. Ba saaki má bu nɔɔ na bu yaki bu nu ji, dama bu si ka bu bá tenɓe bu yiwee nu, na bu nya ɲɔɔ bo i la má aɲusu. ³⁶ Na ba yo bu nbem anzasi afin bu ɲgbere, na ba cici bu nbem jɔrɔkɔ, na ba fa bu awura dansaraka nu. ³⁷ Na ba tu nbem yabue abo akun bu, na ba kpɛ ati nbem nu nnyɔ, na ba fa takobe akun bu, na yaari ati nbem na bu sufa nbɔɛm ni sirim ɲuma sufa yo bu suturam kata bu ɲu, na minɛm akere bu wahara ayo bu ɲgbɛɲɲgbɛɲ kere. ³⁸ Bu ti mine kpam bo bu woowa tara durunya n nufom woowa, bu wo má woobiri kun, bu nati yereɲɓi boro kpantain n nu wɔ, ni bukam su, na bu suwura yabue buɛm, ni asiɲɓu kunma n nu suda.

³⁹ Nyeme nyunu yo yiiri nyini minɛm kere sayoowa, bu yarada n deɛ ti, ama, ba nya má deke n bo Nyeme seeri ka i yó ma bu ni. ⁴⁰ Dama Nyeme koro ka i ma yere deke kpa nahɔre su, kana deke n bo i koro ka i yo n yo yiwa, má ka i ni bere abo kun na i ma ya kere ti kabo i koro ka ya ti ni.

12

Kabo Nyeme cin i nbaam sui barasu ni

¹ Nyini minɛm bo bu yo yoori Nyeme yarada n sunnu, ba bara aye ya, na bu nie kabo ya su Nyeme atin n su. Nyini ti, am ma yere gusu yaki deke kere bo i kanda ya na ya koro su má Nyeme ni, na ya yaki satie n bo

ya koro i agaya ni, na am ma ya fa anyumboro na ya su atin n bo i ti ye ni ka ya su i n su. ² Am ma ya suniē Yesu. Yiri ti ya mofa a, na i ma ya yo Nyeme yarada kabo wo yo daka ka ya yo ni. I yo diiri wahara baka jaanu n su, na ba wura i nyinse, ama, haari ni nyini n kere, i cee awo ma nu, dama i nie nyuri fiefie n bo i ba di i ni, nyini ti, ye kisa, i tana Nyeme saa fomboro su i femeya n nu n a.

³ Am nie kabo i yo diiri wahara satieyofom saa nu, na ba koro ma i jore, na i laari mindi barasu a. Am su i su, adena ma am nyunie yoroki am.

⁴ Kabo satieyofom kere am wuwuruwa na am mindi ni, am nya mindi ju ma juubiri bo bu yi am ngoo. ⁵ Kabo am ti Nyeme nbaam na wo tu am fo asi am ahore ni, ma am ma am wara afi nyini ni, bo i na,

“M wa, nzen Nyeme tu u fo, ma a kete,

nzen i cin u sui gusu a, ma a ma u nyunie yoroki u.

⁶ Dama minem bo i koro bu n ye i tu bu fo a,

na minem kere bo wo fa bu ayo i nbaam ye i cin bu sui a.”

⁷ Wahara n bo am sudi i ni, am mindi na am fa i ka am si sucin am sui a. Nyini sukere am ka am ti i nbaam wo lee, dama baa be wo ma bere bo i si cin ma i sui. ⁸ Nzen Nyeme acin ma am sui kabo i cin bo bu ti i nbaam kere sui ni, nyini la ka, am ti ma i nbaam nahore su, am ti ka soma nbaam wo lee.

⁹ Ya sim bo bu wuuri ya ni, bu ba yo, bu cin ya sui wo, na ya ma bu jirima. Nzen i nya ti so yiri, wo yo daka ya de ya Si Nyeme noanie tara bu dee, adena ya nya ngoo. ¹⁰ Sangga bo ya yo ti nbaatumam ni, ya sim yo cin ya sui sangga kaan wo, kabo i ti ye ni ka bu yo ni, ama, Nyeme yiri cin ya sui, i yo i ni kpa dee ti wo, i koro ka ya nya i dee woowa n be wo.

¹¹ Sangga kere bo bu cin ya sui ni, i ti ka ya ahore ti saakiwa a, i yo ma ya fie, ama, nyini n kere sin, minem kere bo Nyeme cin bu sui na bu si ka ba yo sa bo i ko ma atin su, bu nya ahoreda na bu wo wo kpa.

¹² Nyini ti, ma am ma am nyunie yoroki am, ama, am ma am kpekpepe yo kenken. ¹³ Am susu Nyeme atin n su, na am nya fanga, adena ma am gbaraki buka su.

Fotu kabo wo yo daka ka ma ya kete Nyeme noanie n ni

¹⁴ Am kere boro am nyi na am tana laifie ni sono kere, na am wo wo bo i ti casi, dama woro kere bo a ti ma casi, a nyu ma Nyeme. ¹⁵ Am si am nyu sa, na ma be fun Nyeme ahoro ma ni. Am kaaki si am nyu sa, na ma be fa sunsunni tie be ba saaki mine dongu na bu kaaki bu sin bo Nyeme. ¹⁶ Am si am nyu sa, na ma be sukpini nbaram, na ma be gusu yo i nyu ngbeen na i cee wo ma Nyeme su nu, ka Esawu, bo diire dee ti na i toori i tienngu baawu kpien jinaabiri maari i niema ni. ¹⁷ I toori i baawu kpien jinaabiri n dee sin, sangga bo i seeri i si ka, i yo nyini kisi go i nyu ni, na i si akete, haari ni bo i sun ni nyunvuin ni, wo koro akaaki ma deke n bo wo yo i n kun.

¹⁸ Juubiri n bo am aba aju ni, i ti ma deke bo am koro nyu i, i ti ma ka buka n bo Yisarelifom yo ko juuri su na bu fere i ka Sinayi ni. Bu ko juuri su ni, na ba nyu ka i suje sin fofoe, na awosin awura dika n nu, na wo kata liim, na anjuma akpisi dika ni. ¹⁹ Na ba ti awie nga ka i fita ni fanga su, na ba ti akonvi nga ka i sujoko fanga su. Bu tiiri akonvi ni nga so ni, na bu seeri ni anyumboro ka bu koro ma ka bu ti nyini jokoowa n kun.

²⁰ Dama ba koro ade ma noanie n bo Nyeme fa maari bu ni, i na, haari nzen nengendore be faari i nyu kaanri buka ni, bu tu i yabue bo kun i.

²¹ Dekem bo bu njuuri bu buka n su n laari sere agaya n dee ti, na Moyisi mmoo ase ka, "Sere ati m agaya, na m njunie subobo m."

²² Ama, deke bo am aba aju ni, am aba aju buka n bo bu fere i ka Siyon ni su a, ni Nyeme bo i wo bere sanja kere n dee mie kpiri ni, yiri la mie kpiri n bo bu fere i ka Yerusalem na i wo angoro ni, do ye Nyeme mereke akpiim atien bu nco ni ahorejo n a. ²³ Am aba jama n bo bu ti ka Nyeme nbaakpienm, na ba kere bu duma Nyeme dika n nu ni do a. Am aba Nyeme do, yiri bo i di sono kere jore ni. Am aba dawafom woobiri ni, bere bo bu yoori sa bo i ko atin su Nyeme do na wo ma ba ti kabo i koro ka bu ti n wo. ²⁴ Am aba Yesu do o, yiri ti afien donguyofa, yiri ye wo fa sesesu fofore n aba. I mbunja n bo wo fite ago ni, ayo ya casi a, i la kperere tara Abeli dee.

²⁵ Am si am nju sa, Nyeme sujoko am do, ma am kete i, dama sanja bo i yo jokoeri Yisarelifom do durunya n nu fen na bu keteeri ni, wo yaki ma bu. Nyini ti, nzen i wo angoro sujoko ya do, na ya keteeri, ya yo se koro fite nu a? ²⁶ Nyini sanja, i konvi ngumi mmoo ma asien kpisi wo. Ama, kisa, wo se ka, "M kpisi asien n ni angoro n kere kpekun buka su." ²⁷ Kabo i seeri ka i kpisi i kpekun buka su n kere ka, deke n kere bo wo yi bu ni, i ba kpisi yi bu, adena dekem bo be koro kpisi ma bu n ba ka. ²⁸ Nyini ti, kabo Nyeme ama ya atin ka ya ni yiri sanja di i femeya n bo be koro kpisi ma i ni, am ma ya da i asi. Am ma ya kaaki da i asi, na ya bu i, na ya soro i ahore, na ya su i, kabo wo yo daka ka ya su i ni. ²⁹ Dama Nyeme bo ya su i n ti ka sin bo i di deke kere bo i ti ma kpa n wo.

13

Kabo ya yo na i sun Nyeme nu ni

¹ To, kabo Kristo dee ti na am ayo ka nibaa kun ni, am sukoro am benju. ² Am tenje su na am sude wofom. Nbem yo yoori so o haari na ba de merdekem wofa, ama, ba si ma ka bu ti merdekem. ³ Ma am ma am wara fi minem bo bu wo dansaraka nu n sa, am fa i ka am ni bere ye ba sanja anyi am a. Na ma am ma am wara fi minem bo bu sudi wahara n gusu sa, am fa i ka ambere sudi wahara n a.

⁴ Am ma jirima wo am ajaam nu, na bieso n ni bara n kere bita bu nju, na ma be yo ngbeenngbeen, dama Nyeme ba di minem kere jore bo bu kpini nbaram, ni bo bu ko somaya ngbeenngbeen n kere. ⁵ Ma am ma am nyunu boro njwaa koro su agaya, ama, am ma am nyunu yi deke n bo am la i ni, dama Nyeme ase ka, "M yaki ma am ngbeen, m kaaki fa ma am ji ma." ⁶ Nyini ti, am ma ya fa ahoresi, na ya se ka, "Micera ni ti m bukafu,
m soro ma sere.

Adamande koro yo m nzu wo?"

⁷ Am nie am wofom bo bu kan Nyeme jore n kereeri am ni. Am nie kabo bu woori wo kpa barasu, na am son bu yarada bo bu yoori i n su. ⁸ Yesu Kristo kaaki ma, kabo i yo ti ni, i toko ti so o, na i ti so o sanja kere. ⁹ Ma am su kereewa fofore barasu nbem su, na bu ma am mini atin kpa ni. I ti ye ni ka ya de Nyeme dee ahorma n bo i ma ya ahoresi ni, na ma ya de atin bo bu ciirem kere fa ko diire diiwam su, bo bu su nyini ciirem su ni, i buka ma bu. ¹⁰ Sa bo Yesu ayo ama ya n dee ti, ya fa i ka ya la Nyeme sayoowa yoobiri n dee diire bo Yudafoam Nyeme sayoowa donguyofom bo bu yo juma Nyeme Sereebiri Nambue n nu n la ma atin na bu di be. ¹¹ Afo

kere afo, Nyeme sayoowa donyuyofo kpian n fa nengendorem mbunja a, na i fa wura Casi Kere Casi Soo n nu. Na i fa yo yoowa ma Nyeme, fa ko minem satie bo ba yo i n su, na i ma bu nya fa nie n kere fite mie n aheme, na bu yara i sin. ¹² Nyini dee ti, ye Yesu gusu wuuri mie n aheme n a, adena i koro fa i mbunja n yo minem casi. ¹³ Sa n bo wo yo ama ya n dee ti, am ma ya ko i do mie n aheme, na ya su i atin su, na ya ni yiri kere sanja di nyinse n bo i diiri n be. ¹⁴ Dama durunya n nu fen, ya la ma mie be bo ya suwo nu sanja kere, ama, ya boro ya nyi sunienie mie kpiri n bo i ba ba n wo. ¹⁵ Nyini ti, buka n bo Yesu ayo ama ya n dee ti, am ma ya fa kansi fa ma Nyeme sanja kere. Ya saraka yoowa n bo ya fa ma Nyeme n la ka, ya teke ya noo, na ya kan kere minem ka Yesu ti Mibie n a. ¹⁶ Ma am yaki kpayo, am buka am bengum sanja kere, dama nyini saraka yoowam so, ye Nyeme koro a.

¹⁷ Am de am mafom noanie, na am su atin n bo bu fa kere am su, dama bere sukpie daafiri am busu n dee ti, ye Nyeme ba bisa bu kabo bu yoori bu juma n barasu n a. Nzen am deeri bu noanie, bu yo bu juma ni ahoreda a, ama, nzen am ade ma bu noanie, nyini ma bu yo bu juma ni ahoresaaki a, na nyini so gusu buka ma am.

¹⁸ Am susere Nyeme ma ya sanja kere. Yere do, i ti nahore wo ka ya yo sa bo i ko atin su wo, na ya sunsunni nu ma ya ka ya yo sa bo i ko atin su wo sanja kere. ¹⁹ M sere am wo, am boro am nyi sere Nyeme ma m, na i buka m, adena i ce ma, na m kaaki ba am do bekun.

Awieeri su dee nyemesere ni

²⁰ Nyeme ahoredafo n atenge ya Mibie Yesu Kristo i yiwee n nu. Nyeme faari Yesu mbunja n faari sesesu diiri i di n ti ye Yesu yoori ya sasafu kpiri n a. Nyini sesesu n la ma awieeri. ²¹ Nyini ti, m sereeri Nyeme ka i ma am deke kpa n kere bo i ti ye ni ka am nya i, na am yo i sa koroowa, na i kaaki ya wo, na ya yo mine n bo i ahore jo ya nu. Yesu Kristo dee ti, ye i yo nyini n kere a. Yiri ti ye ni ka ya kansi i sanja kere sanja. Ami.

²² M ninbaam, m sere am wo, am yo sawore, na am so am sui, na am de ahin jore n bo i wo ahin kadasi n nu, na m sufa tu am fo ni. Dama jore n bo m sukere ma am n sunnu ma. ²³ M koro ka am si ka, ya niwa Timoti wo ma dansaraka nu kun, ba yaki i, nzen i ba tuuri m nde, na m ba suba, m ni yiri kere ba nie am busu.

²⁴ Am bisa am mafom kere ni Nyeme minem kere donyu ma ya. Ya ninbaa yaradayofom bo bu wo Itali asien n su n kere bisa am donyu.

²⁵ Nyeme buka am kere.

Kadasi n bo YAKOBO akere i ni

¹ Mini Yakobo bo m ti Nyeme ni ya Mibie Yesu Kristo dee akoo ni, m bisa Kristo jamam n kere donju, bere bo ba sandi abara aye durunya n kere nu ni.

Yaradayo ni alecira jore

² M ninbaam, nzen gberegbere be tu am, am ma am ahore jo. ³ Dama am si ka am yarada bo am ayo Nyeme n dee ti, ye nyini gberegbere n tu am a, na am mindi nuuri i awieeri, am koro mindi nu gberegberem bo bu tara nyini n mmoo awieeri. ⁴ Am ma am mindi n sun am nu, adena am woowa kere ti kabo Nyeme koro ka i ti ni na ma pui kpie am su.

⁵ Ama, nzen alecira akpie am nu be su, i ti ye ni ka i mi sere i Nyeme do, yiri bo i ce sono kere aceeri ni i kunnu kun ni, na i wura ma be nyinse ka i mi asere i n dee ti. Nyini ti, nzen be sere Nyeme, yiri ma i mi alecira n a.

⁶ Ama, nzen be sere Nyeme, i ti ye ni ka i mi yo yarada ka deke bo i sere i ni, Nyeme ma i wo, na ma i mi yo sika, dama sono kere bo i yo sika, i ti ka nzue bo anuma bo i ko i sin ba i nyunu wo. ⁷⁻⁸ Nyini sono n bo i yo sika so ni, i sunsunni ti nnyo nnyo o, fa ko Nyeme do, i si ma i jinaabiri. Ma i mi n sunsun ka i nya pui fite Mibie n do.

Fotu fa ko Kristo jama n yaarifom ni nengefom do

⁹ To, ya niwa bo i ti yaarifom, na Nyeme awura i kpiri, i ti ye ni ka i mi ma i ahore da. ¹⁰ Na ya niwa bo i ti nengefom gusu, na Nyeme ayo i kaan, i ti ye ni ka i mi ma i ahore da. Dama i ce ma na i ni i nenje n kere ba wo ma bere, kabo wura pum ce ma, na i ni i nyumi n kere kponkpon barasu ni. ¹¹ I ti so o, kabo wie ba bi, na i kekere n bo kponkpon wura pum na i wu, na i nyumi wie ni. Kabo nengefom n gusu ni i nenje n ti lee. Sanga bo i nyunu aba aboro i juma su ni, i ni i nenje n kere ba wo ma bere kun.

Fotu fa ko sanga bo am wo gberegbere nu ni

¹² Terefie wo sono kere bo gberegbere tu i, na i mi saaki ma i noo n do. Nyini sono n koro mindi nuuri nyini gberegbere n awieeri, i nya ngoo Nyeme do, nyini la aceeri n bo i yo seeri ka i fa ma bere bo bu koro i ni. ¹³ Nzen gberegbere n so n atu be na i ma i wura satie nu, ma i mi se ka, "Nyeme ayo m ye m wura satie nu a." Dama pui koro yo ma Nyeme na i wura satie nu, na i gusu yo ma be na i mi wura satie nu. ¹⁴ Ama, deke bo i ma sono wura satie nu n la i mi ni i tii dee konvikiya a, nyini ma i cin dodo satieyo a, ¹⁵ na nyini konvikiya n nya cin i wura satie nu na i mi yo satie be, na nyini satieyo n nya ba bi wieeri, i fa yiwee ba a.

¹⁶ M ninbaa koroowam, ma am daka am nu. ¹⁷ Aceeri kere bo i ti kpa na i ti kabo Nyeme koro ka i ti ni, i kere fite angoro ya Si Nyeme do o, yiri yiiri deke n kere bo i ta angoro n a. I wo ti i wo wo, na i ma ma awosin yo ma na i kaaki deke be. ¹⁸ I dee koroyanu, na wo fa i noanie n bo i ti nahore n ama ya, ye ya yo i nbaam. I yoori so o, adena ya yo deke n kere bo wo yi bu n tii.

Am de Nyeme noanie n na am yo kabo i kere ni

¹⁹ M ninbaa koroowam, i ti ye ni ka am ti ahin sereya n bu, ka, sɔnɔ kere so i sui ndende na i ti, má i mi koro nde jojo, má i kaaki fa yaa ndende. ²⁰ Dama yaa kere má sɔnɔ na i yo sa bo i kɔ atin su Nyeme dɔ. ²¹ Nyini ti, am yaki sa ngbɛɛngbɛɛn, ni satie kere yo. Am yo am ɲu kaan fa ma Nyeme, na am de i noanie n bo wɔ fa awura am ahorembaa su ni. Dama nyini noanie ni koro de am tii ji a.

²² Am yo kabo Nyeme noanie n kere ni. Má am dadaka am ɲu ka am ati i na am yo má kabo i kere ni. ²³ Dama nzen be tiiri noanie n na i yo má kabo i kere ni, i mi ti ka sɔnɔ bo i fa niɛɛnu nie, na i ɲu i ɲu wɔ, ²⁴ ama, na i nya faari niɛɛnu n seeri, na i kɔ wieeri, a ɲu ka i wara afi kabo i nyunuawa ti barasu. ²⁵ Ama, sɔnɔ kere gusu bo i fiitiiri Nyeme noanie kpamaawa n nu, noanie kpamaawa n bo i ti kabo Nyeme koro ka i ti n na i ma minem nyaari bu tii ni, na nzen i mi boro i nyi su noanie n su, na i mi ti má sɔnɔ bo i ti noanie n na i wara afi i, ama, na i ti sɔnɔ bo i yo kabo noanie n kere ka i yo ni, i mi yiri, Nyeme yó i kisi fa kɔ i sayoowa kere nu.

²⁶ Sasu bekun, sɔnɔ kere bo i ɲa i su Nyeme atin su, na i koro tara má i nɔɔ, i mi daka i ɲu wɔ lee, na i nyemesu atin n ti ngbɛɛn wɔ. ²⁷ Nyemesu atin bo be su i su n na i la má gela be ya Si Nyeme dɔ n la ahin, ka, i mi nie ayikam ni nkunafom su, bere bo bu di yaari ni, na i mi kaaki tara i ɲu na má durunya n nufom ma i yo fin be Nyeme dɔ.

2

Fɔtu fa kɔ tantambunu

¹ M ninbaam, kabo am yo Yesu Kristo yarada ni, yiri bo i ti ya Mibie Jirimafɔ ni, má am fa tantambunu ni am bengɔ. ² Ma m fa i ka, nzen mine nnyɔ nbem ba wurari am tientienbunɔɔ sɔɔ n nu, na kun wura sutura kpakpa ni sika ɲgaa, na nyinga n ti yaarifɔ na i wura sutura titiwa, ³ na nzen am nu kun se bo i wura sutura kpakpa n ka, “Jande, ba tana ahin tanaabiri nyunyumi n su,” na i nya se yaarifɔ n ka, “Wɔrɔ, ka jina dɔ, nzen má nyini, ba tana m jaa bu fen,” ⁴ nyini kere ka am sufa tantambunu atin lee, na am sunsunni tie ma am sufa kpakpaakinu ba lee, má sɔ?

⁵ M ninbaa koroowam, am ti fen. Má Nyeme yiiri yaarifom bo bu wo durunya n nu n ka bu ti ajekɛfom i dɔ, bu yarada n deɛ ti a, na bu nya femeya n bo wɔ se ka i fa ma minem bo bu koro i n a, nzen se? ⁶ Ama, ambere bu yaarifom ngbɛɛn wɔ. Nmam kere am wahara n a? Nmam kaaki cin am kɔ jɔre diibirim n a? Má nengefom n a? ⁷ Má bere jojo wura duma n bo i la anyunuyi ni ngasi nu n a? Yiri ye Nyeme afa ama am na i kere ka am ti i deɛm ni.

⁸ Ba kere i Nyeme Jɔre Kadasi n nu ka, “Koro u bengɔ kabo a koro u ɲu ni.” Nyeme femeya n nu noanie kpamaawa bambaka n lee. Nzen am yo sɔ, nyini ti kpa a. ⁹ Ama, nzen am laari tantambunu, am ayo satie, na Nyeme noanie kpamaawa n kere ka am ti ketemafom wɔ lee. ¹⁰ Wɔrɔ kere bo a suuri Nyeme noanie kpamaawa n kere su, ama, na a saakiiri i kun n kpein mmɔɔ, a saaki noanie kpamaawa n kere lee. ¹¹ Nyeme bo wɔ se ka, “Má a kpini u bengɔ yi” ni, yiri akaaki ase ka, “Má a kun sɔnɔ” n a. Ama, nzen haari a kpini má u bengɔ yi, ye a kunun sɔnɔ, a yo ketemafɔ fa kɔ noanie kpamaawa n su lee. ¹² Am ma am jojoowa ni am sayoowa kere ka am ti minem bo Nyeme bá fa i noanie kpamaawa ni fá dí am jɔre a, nyini noanie kpamaawa n bo i ma minem nya bu tii ni. ¹³ Dama jɔredi

ceen, minem bo bu si má bu benjgum anjunfo ni, Nyeme si má bere mmoo anjunfo. Ama, anjunfo sifom ni, bere dí nasara, joredi ceen ni.

Fotu fa kó yarada ni i sayoowa

¹⁴ M ninbaam, nzen sɔnɔ ŋa i yo Nyeme yarada, na i sayoowa kere má ka i la yarada, nyini yarada ni koro de i tii ji, nzen se? Ai, nyini ti ngbeen wo lee. ¹⁵ Ma m fa i ka, nzen am ninbaa Kristo jama nbem wo bere bo bu la má diire, na bu la má sutura, ¹⁶ na nzen am nu kun seeri i ka, “Kó ni ahoreda. Nyeme ma u na a di, na i ma a nya sutura.” Nzen a seeri so, na a ma má i mi koroowa ni, i kpa la bɔnɔ? ¹⁷ Nyini ti, nzen a la yarada n ngumi, na u sayoowa kere má ka a la yarada, i ti yarada ngbeen wo lee.

¹⁸ Be koro se ka, “Ahin sɔnɔ n yiri yo Nyeme yarada wo, ama, ahin n yiri yo sakpa a.” Tɔ, ye sɔnɔ yo se kere ka i yo Nyeme yarada, bo i yo má sakpa a? Mini yo sakpa a, nyini kere ka m yo Nyeme yarada. ¹⁹ A ŋa a yo yarada ka Nyeme ngumi wo bere a. Nfan. Haari ajinim mmoo si i so o, na bu ŋunie subobo bu ni sere. ²⁰ Woro sinnzin ngbeen ni, a koro ka m kere u ka yarada yoowa bo i kere má sakpa n ti yarada ngbeen wo, nzen se? ²¹ I yo se ye Nyeme deeri ya na Abraham ka i yo sa bo i kó atin su i do a? Abraham sayoowa n dee ti ye Nyeme deeri i so a, dama Abraham yo faari i wa Izaki fa seeri Mikun n yoowa yoobiri n ka i fa i yo yoowa ma Nyeme ni. ²² A ŋu má i? I yarada yoowa fa sanja ni i sakpa yoowa kere yoori kun wo. Na i sayoowa n akere ka i yarada n ti kabo Nyeme koro ka i ti n wo. ²³ So ye deke n bo bu kereri i Nyeme Jore Kadasi n nu n ayo yiiwa a, ka, “Abraham yoori Nyeme yarada n dee ti, na Nyeme ade i ka i yo sa bo i kó atin su i do.” Nyini ti, ye bu fereeri i ka Nyeme danfo n a. ²⁴ Tɔ, m ŋa am anu i e, ka sɔnɔ sayoowa ma Nyeme de i ka i yo sa bo i kó atin su i do a, má ka i mi yarada ngumi ti. ²⁵ I ti so o lee, fa kó bara sakara be bo bu fere i ka Rahabu n do. Dama dawa sanja, yiri yo bukaari Yisarelifom dee koresiyifom n a, na wo kere bu atin na ba foro bu kpofom saa nu. Nyini sayoowa n dee ti, na Nyeme ade i ka i yo sa bo i kó atin su i do o. ²⁶ Tɔ, kabo ŋumi awo má anuniembaa n nu na i ti fuin ni, so ye i ti a, nzen a la yarada na u sayoowa kere má ka a la yarada, yarada ngbeen lee.

3

Fotu fa kó kabo ya bita ya taferema

¹ M ninbaam, má am donju yo am ŋu kerefom. Dama am si ka yere bo ya ti kerefom ni, ya jore diiwa bá yo kekereke agaya a. ² Ya kere ba yo, ya yo sam bo bu kó má atin su wo. Ama, nzen sɔnɔ kere bo i jɔjɔwa kere kó atin su, i mi woowa n ayo kabo Nyeme koro ka i yo n wo lee. I kere ka i mi n la tarabuŋu sa kere nu lee. ³ Am ma ya nie kpɔngɔ. Ya fa karafi wura kpɔngɔm nɔo o, na ya kunma bu fanja na bu yo deke kere bo ya koro ka bu yo i ni. ⁴ Am ma ya nie lee bambaka gusu, i ni i bambaka n kere ni, haari nzen anuma bambaka subo i kó deke be, lee kanfo n koro fa napoku baka n bo i ti kaan ni lee ni, na i kan i kó deke kere bo i koro. ⁵ I ti so lee ni taferema n gusu, i ni bo i ti kaan anuniembaa n nu n kere ni, i koro saaki deke donju.

Nie kabo sin ti barasu a, haari i ti kaan se, i koro je boo bambaka. ⁶ Taferema n ti ka sin wo lee. Bekun, ya ŋuniembaa n nu, i kaaki ti ka satiem bo ba yi durunya n nu n wo, i satie n sa anuniembaa n kere wo. I yo juma ka sin wo, na i saaki sɔnɔ ŋuniembaa n fite ceen n bo bu wuuri

i n fa kɔ ju haari i yiwee cɛɛn. Yiko bo taferema n la i na i yo sɔ n fite cɛɛma sin n nu wɔ. ⁷ Adamande kunma deke n kɛrɛ faŋga, i ajaannam o, i laŋkɛtɛfɔm o, i cinbukunnusufɔm o, ni jombaam o. Na wɔ koro ata bu kɛrɛ. ⁸ Ama, taferema yiri, sɔnɔ be nya koro kunma má i faŋga. I ti deke tiɛ wɔ, bo be koro tara má i. I ti ka wɔ yi ni bɔrɛ bo i kun wɔ. ⁹ Ya fa yiri fa kansí Micera n bo i ti ya Si n a. Na ya kaaki fa yiri saaki minɛm bo Nyɛmɛ ayi bu ka bu ferema ni yiri n a. ¹⁰ Nyini anɔɔ kun n ye kansí ni saaki fite nu a. M ninbaam, wɔ yo má daka ka i ti sɔ. ¹¹ Bura kun koro tiɛ nzue kpa, ni nzue tiɛ, nzen sɛ? Ai, i koro yo má. ¹² M ninbaam, am si ka damba baka koro su má ŋguinmbaa. Cumi baka gusu koro su má damba. I ti sɔ ɔ lɛɛ, bura bo i nzue ti lalaraki, i koro tiɛ má nzue bo i yo fiɛ.

Fɔtu fa kɔ alecira bo i fite Nyɛmɛ dɔ ni

¹³ Ŋma wo am nu bo i la alecira ni si a? I ti ye ni ka i mi kere ka i ti sɔ ɔ, fa kɔ i woowa kpa su, na i yo sakpa, na i wo benle, nyini kere ka i la alecira. ¹⁴ Ama, nzen am susi kɔrɛ ahorembaa su, na am suyo wi, na am bita anyii sunsunni, má am bita fɔ ka am la alecira, na má am bu kɔrɛ jaraki nahɔrɛ n sɔ. ¹⁵ Nyini alecira n sɔ fite má Nyɛmɛ dɔ, ama, i fite durunya n nu fɛn wɔ, i nati má Nyɛmɛ atin su, i ti Sitana dɛɛ wɔ. ¹⁶ Deke bo kɔrɛsi, ni anyii wo, kpakpaakinu ni satie yoowa barasu kɛrɛ wo dɔ ɔ. ¹⁷ Ama, sɔnɔ bo i la alecira n bo i fite Nyɛmɛ dɔ n la ka, i woowa ti casi. Bo i tɔ su n la ka, i koro tanalaifiɛ, na i la wo benle, na i de fɔtu, na i si anjunfɔ agaya, na i yo sakpa beberebe, na i la má tantambunu, na i kaaki la má burukɔnu. ¹⁸ Tanalaifiɛfɔm bo bu yo tanalaifiɛ juma ni, bu ŋkatɔ n la sam bo bu kɔ atin su Nyɛmɛ dɔ n wo.

4

Fɔtu fa kɔ kabo ya da ya ŋu asiŋgu fa ma Nyɛmɛ ni

¹ Nzu ti ma am di aluwa, na am suse akuruwa am ŋuju nu a? I fite ka am sunsunni ti tiɛ, fa kɔ am ahorembaa koroowa beberebe n bo i wo am ŋuniɛmbaa nu, na i kpɛɛ am daafiri n dɛɛ ti a, má sɔ? ² Am koro deke nbem, na am nya má bu n ti, ye am koro ka am kun am bengum n a. Am konviki wura minɛm nɛŋge nu, na am nya má i n ti, ye am se akuruwam, na am di aluwa n a. Am sere má Nyɛmɛ n dɛɛ ti, ye am nya má am koroowa n a. ³ Deke bo i ti na am sere Nyɛmɛ na am nya má i n la ka, am sere ni sunsunni tiɛ wɔ. Am sere dekem ka am fa yo am kunnu koroowa a. ⁴ Amɛrɛ bo am su má Nyɛmɛ ni, am si má ka sɔnɔ kɛrɛ bo i koro durunya n nu nɛŋgem agaya, ti Nyɛmɛ kpɔfɔ ɔ, nzen sɛ? Nyini ti, sɔnɔ bo i fa i ahorembaa se durunya n nu nɛŋgem su, i mi ti Nyɛmɛ kpɔfɔ ɔ lɛɛ. ⁵ Má am sunsun ka deke bo ba kɛrɛ i Nyɛmɛ Jɔrɛ Kadasi n nu n ti ŋgbɛɛn wɔ, ka, “Sɔnɔ kɛrɛ bo i fa i awiewie n bo Nyɛmɛ afa ama i n suuri deke be sin Nyɛmɛ ŋu, Nyɛmɛ si i kɔrɛ agaya.” ⁶ Ama, ahɔrɔma n bo Nyɛmɛ afa ama ya n sunnu. Nyini ti, ye ba kɛrɛ i Nyɛmɛ Jɔrɛ Kadasi n nu ka,

“Nyɛmɛ kete kpirikorofɔm wɔ,

ama, na i fa i ahɔrɔma n ma taramam.”

⁷ Nyini ti, am fa am ŋu ma Nyɛmɛ. Am kete Sitana, na i ŋmáti yaki am.

⁸ Am cin dodo Nyɛmɛ, na i gusu cín dodo am. Amɛrɛ satieyɔfɔm, am yi am saa fite satie nu. Amɛrɛ anɔɔ nnyɔ nnyɔfɔm, am yo am ahorembaa

casi. ⁹ Am satie dɛɛ ti, am ma am ahore saaki, na am sun. Am fa am siri fa kaaki sun, na am fa am ahorejɔ fa kaaki ahoresaaki. ¹⁰ Am da am ɲu asienɲu ma Nyeme, na yiri bá wura am kpiri.

Fɔtu fa kɔ kabo má ya jaraki ya beɲɲum ni

¹¹ M ninbaam, má am jɔjɔ tie ma am beɲɲu. Wɔrɔ bo a jɔjɔ tie ma u lamokɔ, wara a jaraki i, a jɔjɔ tie afa akɔ Nyeme noanie kpamaawa n su ajaraki i lɛɛ. Nzen a nya yoori sɔ, a nya ti má sɔnɔ bo i de Nyeme noanie kpamaawa n lɛɛ, ama, a yo u ɲu ka jɔredifo lɛɛ. ¹² Nyeme ɲgumi ti i noanie n kpamafo a, na yiri ɲgumi kaaki ti i jɔredifo a, yiri bo i koro de minem tii ji na i kaaki koro ma bu ka ɲgbɛɛn ni. Wɔrɔ la ɲma na a jaraki u beɲɲu a?

Fɔtu fa kɔ yanfoya atin su

¹³ Am ti fen, ambere bo am se ka, “Nyuma, wara ahunma, ya kó ahin mie n su, na ya kó yo afo kun dɔ, na ya yó juma, na ya nyá ɲwaa beberebe ni.” ¹⁴ Ambere, haari am si má sa bo i bá yo am ahunma mmɔɔ. Am ni am ɲɔɔ ti ka se? Am ti ka bore wɔ, bo i tɔ na i ce má, na wie ba tie, a ɲu ka wɔ kpɔnkpɔn ni. ¹⁵ Deke bo i ti ye ni ka am se n la ka, “Nzen Nyeme diiri su, ya wó bere, na ya yó ahin ni ahin.” ¹⁶ Ama, kabo i ti ni, ambere koro kpiri wɔ, na am sufɔ. Nyini yanfoya sɔ n kere ti má kpa. ¹⁷ Tɔ, nyini ti, sɔnɔ kere bo i si sakpa bo i yo i, na i yo má i, i mi yo satie wɔ lɛɛ.

5

Fɔtu fa kɔ nenɲefɔm dɔ

¹ Ambere nenɲefɔm, am ti fen. Sa ɲgbɛɛnɲgbɛɛnm bo bu bá tu am n dɛɛ ti, am sun na am subo awie. ² Am ajeke n kere susaaki, na nvɔrem sumuka am suturam n kere. ³ Am sika ni am jete kere suwura ɲgambulaari, na bu ɲgambulaari wurawa ni bá ma Nyeme jaraki am, na i káaki ba yara am ka sin, am ɲuniɛmbaa nu. Am atien ajeke nɔɔ afa ase fa kɔ durunya n awieeri wɔ lɛɛ. ⁴ Sasu bekun, am akete ka am tɔ má jumayofɔm ɲkatɔ, bere bo bu tambu am fiesu nenɲe mbaa ni. Am ti kabo bu kan am ndie a, bu awie bo n kere ato Micera Yikofɔ n sui nu. ⁵ Kabo am wo durunya n nu fen ni, am adi fie, na am ayo am kunnu koroowa. Am adi ayo ɲgbingbiri ka toora dɔdɔɔrifɔm bo bu sukɔ ka bu kpɛ bu kɔm ni. ⁶ Minem bo bu la má ɲgasi be ni, bere n ye am ama ba di bu jɔre acin bu sui akun bu a. Bu kete má am wɔ.

Awieeri su dɛɛ fɔtu jɔrem ni

⁷ Nyini ti, m ninbaam, am yo sawɔre ɲminda fa kɔ cɛɛn n bo Mibie ni bá ni. Am nie kabo dɔdɔɔrifɔ yo sawɔre ɲminda, haari kabo bu fiesu diire bá yo kpakpa barasu. I yo sawɔre ɲminda kpanyini nzue kɔ tu takoku wɔ. ⁸ Am gusu yo sawɔre. Am ma am ahore si, dama Mibie n ba sanɲa n adodo. ⁹ M ninbaam, má am wo waraki su, sukan am beɲɲu ndie, adena má Nyeme bá di am jɔre. Am ti fen, yiri jɔredifo n lɛɛ, yiri jina anɔ n nu n a. ¹⁰ M ninbaam, am ma ya tenɲe su, fa kɔ Nyeme noanie kanfɔm n bo bu yo jɔjɔri Micera n duma n nu ni. Am su bu jaa yiiwa su, kabo bu yo yoori sawɔre mindi diiri wahara ni. ¹¹ Nahɔre, minem bo sa tu bu, na bu la mindi kɔ ɲu i awieeri ni, bere ye ya fere bu ka terefiɛfɔm a. Am tiiri kabo sɔnɔ be bo bu fere i ka Yobo n yo laari mindi barasu, fa kɔ ni wahara

n kere bo i yo diiri i ni. Am si kabo kasin na Micera n abuka i ni. Dama Micera n si anjunfo na i la koro agaya.

¹² M ninbaam, jore bo i buka i kere su n la ka, ma am tan deke be ndie fieo. Ma am se ka am tan asiengu, wara am tan angoro. Nzen u jowowa n bu la ka en, am se ka, "En." Na nzen u jowowa n bu la ka ai, am se ka, "Ai." Adena, ma Nyeme di am jore na i yo am ngbeen.

¹³ Nzen be wo am nu bo sa be atu i, i ti ye ni ka i mi sere Nyeme. Na nzen be wo am nu bo i ahore ajo, i ti ye ni ka i mi di jue kansu Nyeme.

¹⁴ Nzen be wo am nu bo i la ma laifie, i ti ye ni ka i mi fere Kristo jama nkpienkpienm na bu ba sere Nyeme ma i, na bu nunuka i nguin, Mibie n duma n nu. ¹⁵ Nyini nyemesere n bo bu sere i ni yarada ni, i ma tukpakifo n nya laifie, na Mibie ni ma i yasu. Na nzen haari wo yo satie mmoo, Nyeme fa i satie n ce. ¹⁶ Nyini dee ti, am kan am satie bo am ayo i kere am bengu, na am sere Nyeme ma am bengu, adena am nya laifie. Sono bo i yo sa bo i ko atin su Nyeme do ni, i nyemesere la fanga, na i yo juma nahore su. ¹⁷ Nyeme noanie kanfo n bo bu fere i ka Eliya ni, i yo tiiri adamande ka yere wo, na wo sere Nyeme ni anyumboro su, ka, ma nzue to, na nzue n ato ma asien n su afo nsan ni sara nsen. ¹⁸ Na wo kaaki asere Nyeme, ka, i ma nzue n to, na wo to, na asien n diire mbaa kere akaaki ayo.

¹⁹ M ninbaam, nzen am nu kun miniiri nahore atin ni, na am nu kun be faari i kpieeri i nyi baari atin n su, ²⁰ i ti ye ni ka i mi n si nu ka, sono kere bo i yiiri satieyofa fiteeri i satie atin n su, i mi de nyini sono n tii fite yiwee nu, na i ma Nyeme fa i mi satie beberebe n fa ce i.

Kadasi ciciri su bo PETORO akere i ni

¹ Mini Petoro bo m ti Yesu Kristo jaramasa ni, sukere ahin kadasi n na m fa ma ambere Nyeme minem bo wo yi am na am ti wofom na am asandi abara aye, na am wo Pontusi, ni Galatiya, ni Kapadosiya, ni Esiya, ni Bitiniya aworem n nu ni. ² Nyeme koroyanu dee ti, ye wo du mo ayi am ye i Awiewie Casi n ama am ayo i dee minem a, adena am de Yesu Kristo noanie ni, na i mbunja n nmisi am na i yo am casi. Nyeme buka am na i ma am ahoreda ko sin su.

Deke bo ya la i tama ni

³ Am ma ya kansu Nyeme, yiri bo i ti ya Mibie Yesu Kristo Si. Wo si ya anjufo agaya n dee ti, ye wo ma ya yo mine fofore, ye ya la tama wo ni ngoo a, dama i tengeeri Yesu Kristo i yiwee n nu wo. ⁴ Na am nya acerim bo Nyeme afa ase angoro anminda ka i fa ma am ni. I ti aceeri bo i saaki ma, i yo ma fin, na i kaaki wie ma. ⁵ Am ayo Kristo yarada n dee ti, Nyeme la yiko bo i sasa am haari ni bo am ba nya tiide n bo wo sese i su ka am ba nya i awieeri su sanja ni.

⁶ Nyini kere dee ti, ye am la ahorejo n a, haari nzen wo yo daka ka am ahore saaki kaan fa ko kekereke barasu barasu n bo kisa am sunu i ni. ⁷ Nzen am koro mindi deeri nyini kekereke barasu n kere, nyini kere ka am ayo Kristo yarada nahore su a. Kabo am ayo Kristo yarada ni, i la anyunuyi tara sika bo i ka ngbeen ni. Sika yiri, bu fa i wura sin nu wo, na bu nie kabo i ti barasu, so ye Nyeme ma am di nyini waharam n a, na i nie kabo am ayo Kristo yarada n barasu ni. Nzen am ayo i yarada ni nahore su, ceen n bo Yesu Kristo ba yi i nu fite fofoe nu ni, am nya kansu, na bu wura am kpiri, na bu ma am jirima. ⁸ Am nyumbaa nya nu ma yiri Yesu ni, ama, am koro i, haari ni bo am nyumbaa koro nu ma i kisa ni, am yo i yarada a, na am ahore ajo ako asin su, na am si ma kabo am se barasu, ⁹ dama am anya am yarada n kpere, yiri la tiide n bo am anya i ni.

¹⁰ Nyini tiide n jore ye dawa dee Nyeme noanie kanfom fiitiiri i nu na bu si i n a, ye bu kan kereeri minem fa ko sakpa n bo Nyeme ba yo ma am n su n a. ¹¹ Na Kristo Awiewie n bo i wo bu do n adu mo akere bu kabo Kristo, Tiidefo n bo Nyeme ase ka i sunma i n ba diiri wahara ni, ni kabo i woowa ti kpiri barasu ni, i wahara di n sin. Na ba boro bu nyi na bu si kabo yiri Kristo Tiidefo n ti barasu, ni sanja n bo nyini sam ni ba yo ni. ¹² Na Nyeme ama bu asi nu ka jore n bo ba kan i ni, i ti ma ka i buka bere ni bu tii wo, ama, i ti deke bo i buka ambere wo. Yiri ye kisa am ati i afite minem bo bu kan labari kpa n kereeri am do n a. Nyeme maari i Awiewie Casi n fiteeri angoro ba maari bu yiko ye bu kaanri i jore n kereeri mine a. Nyini jorem ye Nyeme meremuk mmoo koro ka bu nie nu na bu si i bu n a.

Kabo i ti ye ni ka ya woowa ti casi barasu ni

¹³ Nyini dee ti, am sese am sunsunni su, na am tara am nu, na am fa am tama kere wura sakpa n bo Nyeme ba yo ma am n nu, sanja bo Yesu Kristo ba yi i nu fite fofoe nu ni. ¹⁴ Am de Nyeme noanie n ka nbaatumam

bo bu de bu si nɔ́anie ni, má am yo am kunnu koroowa, na am suyo satiem n bo am yo bu san̄ga bo am yo si má Nyeme atin ni. ¹⁵ Ama, am ma am woowa kere ti casi, kabo yiri Nyeme woowa ti casi ni, yiri bo wɔ yi am ka i deem ni, ¹⁶ dama ba kere i Nyeme Jɔre Kadasi n nu ka, “Mini, m ti casi wɔ, nyini ti, wɔ yo daka ka amberɛ gusu ti casi.”

¹⁷ Kabo am sere Nyeme, na am fere i ka am Si ni, am tara am ŋu na am bu i fa kɔ deke kere bo am yo i am ŋɔɔ su ni, ahin durunya n bo i ti má am woobiri n nu ni, dama kabo i di minem jɔre fa kɔ bu kere sayoowa su ni, i tambu má nu. ¹⁸ Am si kabo Nyeme ade am tii aji afite am sayoowa ŋgbɛɛnŋgbɛɛnm n bo am nam yo fa maari am n nu ni. Deke n bo wɔ fa ade am tii aji n ti má ka sika wara jete bo bu koro ka ŋgbɛɛn ni, ¹⁹ ama, wɔ fa Yesu Kristo deɛ mbunja n bo i la má anusu na i ti ka bɔmbaa bo i la laifie na i la má fin be n deɛ n wɔ. ²⁰ Nyeme du mɔ yiiri i ka i ba yo sɔ ka, ye i nya ba yiiri durunya n a. Ama, ahin awieeri su san̄ga n bo ya wo nu n ye Nyeme ma wɔ fite fofoe nu, amberɛ deɛ ti a. ²¹ Yiri deɛ ti ye am ayo Nyeme yarada n a. Nyeme tengeeri i yiwee n nu, na wɔ wura i kpiri, nyini deɛ ti ye am yo yarada na am la tama fa kɔ Nyeme dɔ n a.

²² Kabo am ade Nyeme nɔ́anie n bo i ti nahɔre, na wɔ yo am casi ni, nyini ma am koro am bengu bo dadaka wo má nu a. Nyini ti, am sukoro am bengu ni am ahorembaa fofoe ni nahɔre su. ²³ Am akaaki mine fɔfɔrem, i ti má kabo adamande wu baa na i wu ni, ama, bo i wuuri am ni, i wu má. Nyeme faari i nɔ́anie n bo i la ŋɔɔ na i la má awieeri n ye i ma am akaaki mine fɔfɔrem n a. ²⁴ Dama ba kere i Nyeme Jɔre Kadasi n nu ka, “Adamande kere ti ka wura a,
i ce má na i wu.

Na bu nyumi kere ti kabo wura pum yo nyumi barasu n wɔ,
i ce má na i yɔrɔki na i kponkpon.

²⁵ Ama, Micera n deɛ nɔ́anie n wo bere wɔ san̄ga kere.”
Nyini nɔ́anie n ti labari kpa n bo ba kan akere am n a.

2

Nyeme mine n bo wɔ yi bu n jɔre

¹ Nyini deɛ ti, am yaki sa kere bo i ti má kpa, má am kpɔ am bɛngum, má am sisi am bɛngum, má am yo am bɛngum burukoɔnu sa, má am si am bɛngum kɔre, má am kan am bɛngum jɔre saaki bu. ² Kabo baakan koro nyufini ni, am gusu, am koro Nyeme nɔ́anie n bo i ti ka nɔɔ casi ni, nyini buka am ye am koro nyi na am nya tiide a, ³ dama amberɛ ni am tii si kabo Micera n ti kpa barasu. ⁴ Am bra Kristo dɔ, yiri ti ka yabue n bo i la ŋɔɔ n a. Yiri ye fatafɔm ayi i atu n a. Ama, Nyeme ayi i ka i la anyunuyi. ⁵ Amberɛ gusu, am ti ka yabuem n bo bu la ŋɔɔ n wɔ, na Nyeme sufa am ta awuru n bo i Awiewie Casi n wo nu, na am yo i sayoowa dɔnguyofɔ casim, na Awiewie Casi buka am na am yo yoowa bo i sun Nyeme nu, Yesu Kristo deɛ ti. ⁶ Dama ba kere i Nyeme Jɔre Kadasi n nu ka, Nyeme ŋa,
“Am ti fɛn, m sufa yabue bo i la anyunuyi
sufa bo Siyon mie kpiri n bu,
sɔnɔ kere bo i yoori i yarada,
i mi dí má nyinse.”

7 Tɔ, ambere bo am ayo i yarada ni, am anya deke bo i la anyunuyi ni, ama, minem bo bu yo má i yarada ni, ba kere i Nyeme Jore Kadasi n nu ka,

“Yabue n bo bondo tafom n faari i tuuri ni,
yiri ye wɔ kaaki bondo n jaa yabuem n kere tii a.”

8 Na ba kaaki akere i Nyeme Jore Kadasi n nu ka,
“Nyini yabue ni, minem bo bu jaa su,
na bu kpaasi.”

Deke n bo i ti na bu kpaasi n la ka, ba de má Nyeme noanie ni, kabo wɔ yo daka ka i yo lee.

9 Ama, ambere, am ti daanfie n bo Nyeme ayi am wɔ, am ti sayoowa dongyuofom bo am su Nyeme bo i ti am femɛ n wɔ, am ti Nyeme dee mine casim wɔ, am ti Nyeme dee awurunbaam wɔ. Yiri ye wɔ yi am ka am kan i sakpam kere minem a, dama wɔ yi am afite awosin nu, afa am awura i dee wein n bo i la má anusu n nu. 10 Ba kere i Nyeme Jore Kadasi n nu ka,
“Sanja be, am yo ti má i dee minem,
ama, kisa, am ti Nyeme deem wɔ.

Nyini sanja, Nyeme yo si má am anunfo,
ama, kisa, wɔ si am anunfo.”

Kabo Nyeme akoom woowa ti barasu ni

11 M danfo kpam, am ti wofom wɔ, ni minem bo bu la má woobiri durunya n nu fen, nyini dee ti, m sere am ni anyumboro wɔ, má am ma am nyunu boro am ajuniembaa koroowa su, dama am ajuniembaa koroowam sukoro ka bu kunma am wɔ. 12 Am ma am woowa ti kpa, na nzen minem bo bu su má Nyeme n jaraki am fa kɔ satie be su, bu ba nu am sakpa n bo am yo i ni, na bu kansi Nyeme, ceen n bo i bá nie i minem su ni.

13 Ya Mibie n dee ti, am de nfangafom kere noanie, femɛ bo i nie adamande kere su ni, 14 ni nkpienkpienm bo wɔ yi bu ka bu sunie am su ni, am de bu noanie, dama ba fa bu ase ka bu cin minem bo bu yo satie n sui wɔ, na bu kansi minem bo bu yo sakpa ni. 15 Nyeme koro ka am yo sakpa a, na minem bo bu ti sinnzinm na bu si má be ni, na bu si má kabo bu kan. 16 Am ti minem bo am ade am tii wɔ, má am nie ka am anya am tii n dee ti, na am sufie yo satie. Ama, am ma am woowa ti kabo Nyeme akoom woowa ti barasu ni. 17 Am bu sonɔ kere sonɔ, am koro am ninbaam kere, am soro Nyeme, na am bu Romafom femɛ kpiri ni.

Kabo ya son Kristo wahara diiwa n su ni

18 Ambere bo am ti akoom ni, am de am mibiem noanie, na am bu bu nahore su, má ka bo bu ti benle na bu yo am sakpa ni ngumi, ama, haari bo bu ti tie ni mmɔ, am bu bu. 19 Nzen am ayo má satie be, na bu kere am wahara na am mindi deeri i, ka am soro Nyeme n dee ti, nyini ti kpa a. 20 Nzu kperɛ ye am nyá i a, nzen am yoori satie na bu boori am na am mindi deeri i? Ama, nzen am yoori sakpa, na bu kere am wahara, na am mindi deeri i, nyini ti kpa Nyeme do a. 21 Nyini dee ti, ye Nyeme afere am a, dama Kristo ni i tii adi wahara ama am, nyini kere am ka i ti ye ni ka am son i su di i wahara n be. 22 Bu na, yiri,
“Wɔ yo má satie be,

wɔ kaaki abu má kore be.”

23 Bu kpieri i nzuko ni, wɔ wɔro má nzuko ama má bu. Bu kereeri i wahara ni, wɔ se má bu ka bu nu i. Ama, yiri faari i deke kere maari

Nyeme wɔ, yiri bo i di jɔre bo i kɔ atin su ni. ²⁴ Ya satie deɛ ti, ye Kristo deerɩ ya jinaabiri diiri wahara wuuri baka jaanu n su a. I yoori sɔ, adena i kere ka ya wu wɔ, fa kɔ ya satie su, na ya la ngɔɔ bo ya koro yo sakpa. Wahara n bo Kristo diiri i nɔnie nu n deɛ ti, ye am anya laifie a. ²⁵ Am yo ti ka nbɔem bo ba mini wɔ, ama, kisa, am akaaki aba yiri bo i ti am sasafɔ na i nie am dika n dɔ.

3

Kabo i ti ye ni ka nbaram ni bu hunm wo barasu ni

¹ Tɔ, amberɛ nbaram gusu, am de am hunm nɔanie. Na nzen bu nbem nya yo má Nyeme nɔanie n yarada, na am woowa ti kpa, nyini ma bu yo yarada, má ka am nɔanie jɔjɔwa n deɛ ti, ² ama, nzen bu nɔuri ka am woowa ti casi, na am ma bu jirima, nyini ma bu kaaki bu wo na bu su Nyeme a. ³ Deke bo i kere ka am yo nyumi ni, i ti má kabo am yo am nɔ di am tiinjmie sunguruya ni, ni kabo am wura sikam, ni kabo am kara sutura kpakpam n barasu ni, ⁴ ama, deke bo i kere ka am yo nyumi n la wo kpa bo i fite am ahorembaa su, na i saari má ni. I ti ye ni ka am yo am nɔ kaan, na am wo benle, nyini ti deke bo i la anyunuyi nahore su Nyeme dɔ a. ⁵ Dama kabo dawa sanga, nbaram nbem bo bu ti casi na bu la tama ni Nyeme n yo yoori bu nɔ nyumi leɛ, bu deerɩ bu hunm nɔanie wɔ, ⁶ kabo Saara gusu yo yoori leɛ, i deerɩ i hun Abraham nɔanie wɔ, na wɔ fere i ka “M awurufɔbie.” Nzen am yoori sa bo i ti kpa na am soro má sere, am akaaki Saara nbaam wɔ leɛ.

⁷ Amberɛ nbiesɔm, i ti ye ni ka am gusu yo sɔ. Am si kabo am fa ngɔnle bita am yim barasu. Am si ka nbaram fanga ni am deɛ se má, nyini ti, am bu am yim. Dama am ni bere kere sanga nya Nyeme aceeri n a, yiri la ngɔɔ bo i la má awieeri ni. Am bita bu nyunyumi, adena má deke be kanda am nyemesere.

Kabo yaradayɔfm diiri wahara fa kɔ sakpa deɛ ti

⁸ Tɔ, deke bo m koro ka m fa kun jɔre n kere nɔɔ n la ka, am kere fa anɔɔse, na am ceɛe wo am bengɔ nu, na am koro am bengɔ ka am ti nibaam wɔ, na am si am bengɔ anunfɔ, na am yo am nɔ kaan ma am bengɔ.

⁹ Nzen be yo am satie, má am yo tie tɔ i kaari, na nzen be kpiɛeri am nzukɔ, má am wɔrɔ nzukɔ ma i, ama, kabo am yo la ka, am yo bu kisi, dama deke n bo i ti na Nyeme afere am la ka, i yó am kisi wɔ. ¹⁰ Dama ba kere i Nyeme jɔre Kadasi n nu ka,

“Sɔnɔ kere bo i koro ka i nɔ i nɔ fie,

na i wo wo bo i yo fie,

i mi tara i taferema na má i sujɔjɔ jɔre tie,

na má i sudadaka minem.

¹¹ I mi yaki satieyo,

na i yo sa bo i ti kpa,

i mi boro i nyi

na i sukpini tanalaifie busu.

¹² Dama Nyeme nyumbaa ta minem bo bu yo sa bo i kɔ atin su ni,

na i so i sui ti bu nyemesere,

ama, i koro má ka i nyumbaa nɔ bo bu yo satie ni.”

¹³ Nzen am nyunu aboro ka am yo sa bo i ti kpa, nma koro yo am pui a?

¹⁴ Ama, nzen am yo sa bo i kɔ atin su n deɛ ti, ye am sudi wahara, am

terefie lee, má am soro bu, má am ma am ahore saaki. ¹⁵ Ama, am ma Kristo yo am Mibie n na am bu i am ahore su. Na am kpa am nu minda sanja kere, na nzen be ba bisa am fa ko deke n bo i ti na am la tama ni, na am si kabo am bo i nu barasu, ¹⁶ ama, am joo benle, na am bu i mi, na am si am sunsunni nu ka am ayo sakpa, adena nzen minem jooori am ngbeenngbeen fa ko am wo kpa n su ka am su Kristo dee ti, na bu di nyinse. ¹⁷ Dama nzen am yo sakpa na am di wahara na i ti Nyeme koroyanu, i ti ye ni bo am yo satie na bu kere am wahara.

¹⁸ Ya satie dee ti ye Kristo gusu diiri wahara kpekun n kpein a, na yiri bo i yo sa bo i ko atin su n awu, yere bo ya ti satieyofom dee ti, na i yo ya ni Nyeme afien dogu. Bu kuunri i ni, na Nyeme ama i ngoo awiewie n nu, ¹⁹ na wo nya ako akan jore akere awiewiem bo bu wo dansaraka n nu ni. ²⁰ Dawa sanja, bere yo keteeri Nyeme noanie n a, na Nyeme ayo sawore anjinda, sanja bo Nowa sukpa lee bambaka n ni. Nyini lee ni, mine kaan so wurari nu n a, bu mocue nyaari tiide, ye nzue n adi ma bu a. ²¹ Nyini nzue n ti deke bo i kere fa ko Nyeme nzue bieewa bo i ma am anya tiide nyuma n wo. Nyeme nzue bie ti ma deke bo i yi am njunie su fin, ama, i kere ka am si am sunsunni nu ka, am la ma ngasi be Nyeme do, dama Yesu Kristo tengeeri i yiwee n nu n dee ti. ²² Yiri ye wo ko angoro ako atana Nyeme saa fomboro su n a, ye i la yiko nie merkem kere su a, ni yikofom, ni nfangafom barasu kere.

4

Kabo i ti ye ni ka yaradayofom wo ni

¹ To, kabo Kristo diiri wahara i njunie n nu ni, i ti ye ni ka am gusu kpa am nu bita nyini sunsunni ni, dama sono kere bo i diiri wahara i njuniembaa nu yo ma satie kun. ² Nyini dee ti, ma am yo am kunnu koroowa, ama, am yo kabo Nyeme koro ni, haari am ngoo awieeri. ³ Sanja be am yo yoori am kunnu koroowa, deke bo minem bo bu si ma Nyeme n yo i ni, wo se su so. Am yo tara ma am nu, na am yo su konvikiya ngbeenngbeenm, na am nu nzan bo, na am nu nzan yo sa ngbeenngbeen kabo nzan nufom yo ni, na am susu amoem, deke bo Nyeme koro ma i ni. ⁴ Kisa na am ni bere sanja wo ma nyini wo ngbeen ni, jore n amie bu wo, nyini dee ti ye bu kpie am nzuko n a. ⁵ Ama, bere ni bu tii, bu ba jina Nyeme nyunu, na bu kan deke kere bo ba yo i. Yiri ye wo yo siriya ka i di minem bo bu la ngoo ni bo ba wu n jore a. ⁶ Nyini dee ti, ye bo ba wu n gusu tiiri labari kpa n jore kaanwa n a, adena haari ni bo bu wuuri kabo adamande kere wu ni, bu nya ngoo awiewie n nu kabo Nyeme la ngoo ni.

Nyeme amuisufom kpa jore

⁷ Deke n kere suko awieeri lee. Nyini dee ti, ma am fa am nu ji, am tara am nu na am koro sere Nyeme. ⁸ Sa n bo i tara deke n kere n la ka, am koro am benggu ni nahore su, dama koro kata satie dogu su wo. ⁹ Nzen am bengum aseke am wofa, am de bu, ma am njuti. ¹⁰ Nyeme ama am kere aceeri barasu barasu, nyini ti, i ti ye ni ka am fa nyini aceerim buka am benggu. Sono kere suyo i juma nyunyumi kabo Nyeme afa ama am ni. ¹¹ Woro kere bo Nyeme ama u aceeri ka a kan i jore, si ka Nyeme jore ye a sukan i a, woro kere bo Nyeme ama u aceeri ka a fa buka minem, buka bu ni fanga n bo Nyeme afa ama u ni, adena am sayoowa kere nu na Nyeme nya kansu, Yesu Kristo dee ti. Yiri la yiko ni jirima sanja kere sanja. Ami.

Kabo i ti ye ni ka Kristo susufɔm di wahara barasu ni

¹² M danfo kɔam, má am ma wahara kekereke n bo am sudi i n yo am fura nu, dama Nyeme suyo am na i nie a. Má am sunsun ka i ti sa bo wo nya tu má be wo. ¹³ Ama, kabo am sudi Kristo dee wahara n bo i diiri i n be ni, am ma am ahore jo, adena ceen n bo Kristo jirima woowa bo i la má anjusu n bá fite fofoe nu, am ahore jo na i yó am fie. ¹⁴ Nzen bu kpieri am nzuko, ka am ti Kristo deem ti, nyini la ka am terefie lee, dama Nyeme Awiewie Casi n wo am do lee, yiri bo i la jirima woowa n na i la má anjusu ni. ¹⁵ Ama, nzen am be diiri wahara, má i yo ka i mi akun sono, wara wo wo, wara wo yo sa ngbeenngbeen be, wara wo wura minem jore nu, nyini n so ti má kpa. ¹⁶ Ama, nzen sono sudi wahara ka i ti Kristo susufɔm n dee ti, má i mi ma nyinse ti i, ama, i mi kansi Nyeme, ka i ti Kristo dee ti.

¹⁷ Dama sanja naju bo Nyeme dí minem jore. I dú mo bo i bu di i tienngu minem jore wo ka. Ye nzen i nya du mo diiri yere jore, minem n bo ba ka na ba de má i labari kpa ni, bu wie se wo lee? ¹⁸ Dama ba kere i Nyeme jore Kadasi n nu ka,

“Nzen i ti kekere ka minem bo bu ti kɔam nya tiide,
ye satieyofom, ni bo bu má Nyeme ni,
i yó bu se wo?”

¹⁹ Nyini ti, minem bo bu sudi wahara Nyeme koroyanu n dee ti ni, i ti ye ni ka bu boro bu nyi na bu suyo sakpa, na bu fa bu nu wura Nyeme saa nu, dama yiri bo wo yi bu ni, i yáki má bu ceen n be da.

5

Kristo jama n woowa jore

¹ Amberɛ bo am wo Kristo jama n nu, na am ti nkpienm ni, mini mmɔo ti Kristo jama n kpien kun wo, ma nu kabo Kristo diiri wahara barasu ni, na m bá nya i dee jirima woowa n be, sanja bo i bá fite fofoe nu. Nyini ti, m susere am jande wo, ² am nie Nyeme minem bo bu wo am do n su, kabo boesasafɔ nie i nbɔem su barasu ni. Am nie bu dika nyunyumi, má ka bu mie am wo, ama, am koroyanu, dama Nyeme koro ka am yo i a, má am yo i ka nwaa kpini dee ti, ama, am yo i ka am nyunu aboro ka am yo i wo. ³ Bere n bo Nyeme afa bu ama am ka am nie bu su ni, má am mie bu ka am ti bu mibiem wo. Ama, am ma am sayoowa ko atin su, na bu nu i na bu son am su. ⁴ Nzen am yoori so, ceen bo boesasafɔ kpien n bá fiteeri fofoe nu, am nya aceeri bo i la má anjusu na i wie má fieo ni.

⁵ Amberɛ gusu bo am nyunu nya ti má ni, am bu nkpienm ni, na am de bu noanie. Am kere yo am nu kaan na am buka am benngu, dama ba kere i Nyeme jore Kadasi n nu ka,

“Nyeme kete kpirikorofom wo,
ama, na i fa i ahɔɔma n ma tarakam.”

⁶ Nyini ti, am da am nu asienngu fa ma Nyeme yikofɔ ni, na sanja n ba juuri, yiri wura am kpiri a. ⁷ Deke kere bo i mie am, am fa tu Nyeme nyunu, dama yiri cece wo am nu a.

⁸ Am tara am nu sanja kere, má am fa am nu ji. Dama am kpɔfo Sitana ni, i sansan am kabo jara sansan nuundi koro sono na i kpepe i n wo. ⁹ Am yo Nyeme yarada jina kenken na am kete Sitana, dama am si ka am ninbaam bo bu wo durunya n kere nu n gusu sudi wahara n bo am sudi i n be n wo. ¹⁰ Nzen am diiri wahara sanja kaan su, Nyeme sese am su yo am dongu a, yiri má am jina kun su a, na i wura am fanja, na i kpáma am.

Buka kere fite yiri Nyeme do a, Kristo dee ti ye wo fere am ka am ba nya i dee jirima woowa n bo i la ma awieeri n be a. ¹¹ Yiri la yiko sangha kere a. Ami.

Awieeri su dee noani ni

¹² Ya niwa Silivanusi, m si i ka i la dabuŋu am do, yiri bukaari m ye ma kere ahin kadasi kaan n sufa ma am n a, na am ahore si, na m ma am si ka jore n bo ma kere ama am ti Nyeme aceeri wo nahore su, na am jina kenken. ¹³ Kristo jamam bo Nyeme asanga ayi am ni bere kere, na bu wo Babilon mie kpiri n nu ni, ni m wa Marako kere bisa am dongu. ¹⁴ Am bisa am bengu dongu ni koro. Nyeme ma ambere kere bo am ti Kristo deem ni ahoreda.

Kadasi nnyo su bo PETORO akerε i ni

¹ Mini Simon Petoro bo m ti Yesu Kristo akoo na m kaaki ti i jaramasa ni, mini sukere ahin kadasi n ma ambere bo Nyeme ama am ayo Kristo yarada n a, kabo wo ma yere mmoo ayo i yarada ni. Yesu Kristo bo i ti ya Nyeme ni ya Tiidefo ni, i sakpa woowa n dee ti, ye ya kere ayo i yarada.

² Am Si Nyeme ni ya Mibie Yesu n dee ti, Nyeme buka am agaya, na i ma am ahoreda buka su.

Minem bo Nyeme afere bu, na wo yi bu n jore

³ Nyeme la yiko, nyini yiko n nu, wo ce ya deke kere bo wo yo daka ka ya la i na ya nya ngoo na ya su i nahore su. Ya si i n dee ti, ye wo yo nyini n kere ama ya n a. Yiri ye wo yi ya ka ya nya i woowa kpa ni i jirima n a.

⁴ Nyini n dee ti, wo se ka i ce ya acerim bambaka bo bu la ma anusu, adena i yi ya fite durunya n nu satie kere bo i wura mine konviki na i saaki bu n nu, na ya nya Nyeme dee woowa n be.

⁵ Nyini dee ti, kabo am ayo Kristo yarada ni, wo yo daka ka am boro am nyi, na am yo yarada buka su. Ma am yo yarada ngumi, ama, am yo sakpa gusu. Ma am yo sakpa ngumi, ama, am kpini si. ⁶ Ma am kpini si ngumi, ama, am la tarabu. Ma am la tarabu ngumi, ama, am la mindi. Ma am la mindi ngumi, ama, am ma am woowa ko Nyeme atin su. ⁷ Ma am ma am woowa ko Nyeme atin su ngumi, ama, am yo am bengu kpa. Ma am yo am bengu kpa ngumi, ama, am koro minem kere. ⁸ Nzen am la nyini woowam ni, na am woowa ti so nahore su sanja kere, nyini kere ka, kabo am asi ya Mibie Yesu Kristo ni, am woowa la kperε, i ti ma ngbeen.

⁹ Ama, sono kere bo i la ma nyini woowam ni, i mi ti ka sono bo i koro nu ma nyunyumi, wara i ti ka anyinsin wo, na i kaaki ti ka sono bo i wara afi ka Nyeme akpakpara ayi i afite i satie dawam nu ayo i casi. ¹⁰ Nyini dee ti, m ninbaam, kabo Nyeme afere am na wo yi am ni, am boro am nyi, adena am woowa kere ka am ti i dee minem. Nzen am yoori nyinim so, am kpasi ma fieo. ¹¹ Nyini ma am nya aceri bambaka bo am la atin, na am wura Yesu Kristo dee femeya woobiri n nu a, yiri bo i ti ya Mibie ni ya Tiidefo na i femeya n wo bere sanja kere ni.

¹² Nyini dee ti, ye i wo m ahore su ka m sutege am ahin jorem su sanja kere n a, haari ni bo am si bu na am ade kereewam bo bu ti nahore n na am bita bu kenken n ni. ¹³ Mini do, wo yo daka ka m sutege am su so, sanja bo m toko la ngoo ni. ¹⁴ Dama m si ka i ce ma, m ba wo ma bere, kabo ya Mibie Yesu Kristo yi kereeri m ni. ¹⁵ Nyini ma m boro m nyi yo deke kere bo m koro yo i n a, adena sanja bo m ba wo ma bere, na am koro tege nyini jorem su sanja kere.

¹⁶ Ya yo kan kereeri am ka, kabo ya Mibie Yesu Kristo la yiko na i kaaki ba barasu ni, bo ya kan so ni, i ti ma ka ya faari ngonle boori ya tienu kaanri i a, ama, yere mmoo ni ya tii nyumbaa nuuri kabo i la yiko bambaka barasu ni. ¹⁷ Sanja bo ya Si Nyeme yo wuraari i kpiri na i maari i woowa taari wein ni, Nyeme konvi yo fiteeri angoro dika n nu na i jooori i do ni, na yiri bo i woowa la ma anusu n ase ka, "M dee Wa bo m koro i

n lɛɛ, m ahore aɔ i ŋu.” ¹⁸ Yere ni ya tii tiiri kabo akonvi n fite angoro ni, sanɔa bo ya woori i dɔ, Nyeme buka n su ni.

¹⁹ Nyini n kere ma ya la ahoresi buka su, ka jorem bo Nyeme noanie kanfom yo kaanri bu n ti nahore wo. Nyini ti, am boro am nyi na am de kabo bu yo seeri ni, na am su i su. Noanie n bo bu jɔjɔri i n ti ka fitana bo i taari awosin nu n ti n wo, i teke am nyi kɔ ju cɛɛn bo Kristo káaki ba ni, na i fa wein n ba teke am nyi nahore su, kabo alecin na asaakojo tie fa wein ba ni. ²⁰ Jore bo i tara bu kere na am si i n la ka, noanie n kere bo Nyeme fa maari i noanie kanfom na bu kereeri i Nyeme Jore Kadasi n nu ni, be wo má bere bo i koro fa adamande si ngumi na i fa kere nyini noanie n bu. ²¹ Dama má adamande koroyanu ye bu kaanri Nyeme noanie n a, ama, Nyeme Awiewie Casi ni maari bu noo ye bu kaanri noanie n bo Nyeme koro ka bu kan i n a.

2

Korefom bo bu yo bu ŋu ka bu kere Nyeme noanie n jore

¹ Kabo mine korefom woori Nyeme minem nu dawa sanɔa ni, bere bo bu yo bu ŋu ka bu ti Nyeme noanie kanfom ni, so ye kerefɔ korefom bá wo am gusu nu a. Bu fie wo, na bu fá bu deɛ kereewam kere am, kereewa bo bu ma am mini Nyeme atin ni, haari na bu káaki bu sin bo Mibiɛ ni, yiri bo wo to bu tii su ŋkatɔ ni. Nyini ti, bu sayoowam má Nyeme yo bu ngbeɛn anyumbaa kata ni i teke. ² Na mine dongu sɔn bu sayoowa ngbeɛnngbeɛnm su. Bere deɛ ti, mine bá bu atin n bo i ti nahore ni ngbeɛn. ³ Nyini kerefɔ korefom ni, bu nyunu aboro nenɔe su deɛ ti, bu bó bu tieɛnu jore kan ma am a, na bu fá am kpini. Ama, Nyeme daafi má, wo du mo adi bu jore, i bá yo bu ngbeɛn wo.

⁴ Ya si ka Nyeme merekem bo bu yo yoori satie ni, Nyeme ayaki má bu. I faari bu tuuri cɛɛma sin n nu wo, na wo bo bu tobari ase awosin n nu, ka bu suwo dɔ haari jina cɛɛn n bo i bá cin bu sui ni. ⁵ Ya si ka, dawa sanɔa, minem bo bu soro má Nyeme ni, wo yaki má bu, i cin bu sui wo, na wo ma wambu bambaka adi bu kere, ama, na wo de Nowa tii aji, i ni mine nso nbem, yiri kan kereeri minem deke bo i ti sakpa na i kɔ atin su n a. ⁶ Ya si ka Nyeme yo saakiiri Sodom ni Gomora miem ni, i faari sin jiiri su yaraari bu wo, na i kere aje ato nzuin. I yoori so ni, i kere kabo i bá yo minem n bo bu soro má Nyeme n wo lɛɛ. ⁷ Ya si kabo i yo deeri Loti tii jiiri ni, i yo ti sɔno bo i yo sa bo i kɔ atin su Nyeme dɔ o, na i ahore yo ti saakiwa fa kɔ minem bo bu bu má deke be na bu nati yo sa ngbeɛnngbeɛnm ni. ⁸ Nyini sɔno n bo i yo sa bo i kɔ atin su ni, yiri ni nyini minem ni yo sanɔa wo a, cɛɛn kere cɛɛn, na i sunɔa sa ngbeɛnngbeɛnm bo bu yo bu ni, na i sui suti jore ngbeɛnngbeɛn bo bu jɔjɔ bu ni, nyini deɛ ti, na wo di wahara ahoresaaki nu, yiri bo i ahore ti fofoe ni. ⁹ To, nyini n kere kere ka Nyeme si kabo i yó na i dé minem bo bu su i atin su n fite kekereke nu a. Na i si kabo i sucin minem bo bu su má i atin su n sui, kɔ ju sanɔa bo i bá di bu jore ni. ¹⁰ Bere n bo i cin bu sui tara minem kere n la bo bu su anuniembaa koroowa ni dangba sam su, na bu kete ka má Nyeme nie bu su ni.

Nyini minem ni, bu tii ti kekereke, bu soro má be. Haari ngɔɔfom bo bu wo angoro na bu la jirima woowa ni, bu kpie bu nzuko o, bu soro má sere. ¹¹ Haari Nyeme merekem bo bu la yiko ni fanɔa tara nyini minem ni, bu kpie má nyini ngɔɔfom ni nzuko na bu jaraki má bu kere má Mikun

ni. ¹² Nyini minem so, kabo bu koro, ye bu yo a, bu ti ka boro nenje tiem bo mine tara bu na bu kpie bu kom n wo. Bu kpie nzuko fa ko dekem n bo bu si ma bu n su wo. Kabo mine ma boro nenje tiem ka ngbeen ni, so ye Nyeme ma bu gusu ba ka ngbeen a. ¹³ Kabo bu ma minem di wahara ni, bere gusu ba di wahara so o. Bu konvikiya sam bo bu yo bu ni, i yo bu fie wo, bu yo bu wiesu wo, bu fie ma su. Bu ti dangbafom wo, na bu wura am nyinse sangha bo am ni bere tien am noo sudi diire ni, bu sunsunni kere la ka bu daka am. ¹⁴ Bu nyunu boro mine yim kpini su wo, na bu kunnu yi ma bu satieyo. Bu dadaka minem bo bu nya si ma Nyeme atin n nyunyumi n wo, na bu yaki i, adena bu su bu dee kereewam n su. Bu ahorembaa abi nenje kpini su wo. Nyeme ayo bu ngbeen awie lee. ¹⁵ Ba yaki atin n bo i ti kpa ni, ba mini. Atin n bo Baalam bo i si la Beori n yo bitaari i ni, ba son i su lee. I yo koroori njwaa bo minem ma i n wo, na i yo satie. ¹⁶ Ama, na Nyeme akan i ndie, i satie yoowa n dee ti. Ya si ka kaako koro joko ma, ama, Nyeme ama kaako ajoko Baalam do, kabo adamande joko ni. Na Baalam bo i ti Nyeme noanie kanfo ni, na wo yaki sa n bo ma i suyo i na i ti ka i nyunu ti ma koroowa ni.

¹⁷ Nyini minem ti ka bura bo i tie ma nzue wo, na bu kaaki ti ka nzue munaawa bo anjuma fa i sin n wo. Bere ye Nyeme asese awosin n bo i la ma anjusu ase bu n a. ¹⁸ Bu fo yanfoya a, na bu sujoko ngbeenngbeen, na bu fa anjume koroowa na bu fa dadaka minem bo ba kaba afite kore jorem nu na ba nya ace ma ni. ¹⁹ Bu se minem ka bu ma bu nya bu tii wo. Ama, bere ni bu tii bo bu kan so ni, bu ti ka akoom wo, satie bo i ma bu ka ngbeen ni aja bu, dama deke bo wo kunma sono ni, i mi n ti nyini deke n akoo lee. ²⁰ Minem bo bu si Yesu Kristo ni, yiri bo i ti ya Mibie ni ya Tiidefo ni, na i ma ba yaki durunya n nu dee dangba sam ni, na ba kaaki akpie bu nyi ama nyini sam atara bu akunma bu bekun ni, bu awieeri ti tie tara bumboori ni. ²¹ Nzen ma ba si ma woowa bo i ko atin su ni, ma i ti ye tara bo ba kaaki bu sin abo Nyeme noanie maawa n bo ba du mo ade i ni. ²² Kabo bu yoori so ni, nyini kere ka ahin anyunderem ni ti nahore wo, bo bu na,

“Caa kaaki fa deke n bo wo fi i n di bekun wo,”

na bekun,

“Nzen a taraari afa bierei i nzue,

i kaaki ko wura natie nu wo bekun.”

3

Ya Mibie n ba n jore

¹ M danfo kpam, ahin kadasi ni ti kadasi nnyo su bo m sukere ma am a. Ahin kadasi nnyo n kere, m koro ka m tenje am su na am bita sunsunni kpa. ² M koro ka am tenje su fa ko noaniem bo Nyeme noanie kanfom yo seeri bu dawa sangha ni, na am kaaki tenje su fa ko noanie maawa n bo Mibie n bo i ti ya Tiidefo n kaanri i, na i jaramasam seeri am ni.

³ Jore bo i tara bu kere na am si i n la ka, fa ko durunya n awieeri su, mine nbem ba ba, na bu susu anjuniembaa koroowa su, na bu yo am anzasi fa ko am yarada n su, ⁴ na bu se ka, “I seeri ka i kaaki ba bekun, ye i wo ni? Ya nam wo ma bere kun, ama, deke n kere toko ti i tii wo, kabo Nyeme yiiri durunya n ba ju ni nyuma.” ⁵ Bu si tenle su, ama, ba kete ka bu tenje ma su ka, dada sangha, Nyeme yo faari i noo jokoori ye angoro wo bere a, na wo joko na wo kpaaki nzue n ni asien n nu, na asien n afite nzue n nu.

⁶ Nyini nzue n ye i fa saakiiri durunya n a dawa sanġa, sanġa bo wɔmbu nzue n diiri deke n kere ni. ⁷ Ama, anġoro ni asienġu n bo i wo bere ni, Nyeme yo jɔjɔori i noanie bekun wɔ, ka, i bita bu wɔ, na bu wɔ bere haari sanġa bo i bá fa sin saaki i kere. I má i kere wo bere wɔ, ko ju sanġa bo i bá di minem jɔre, bere bo bu soro má i ni, na bu ká ngbeen.

⁸ M danfo kɔam, am si tenle na má am wara fi ahin jɔre kun ni, yiri la ka, cɛen kun ti ka afo akpii wɔ Nyeme do, na afo akpii gusu ti ka cɛen kun wɔ i do. ⁹ Kabo Micera n seeri ka i yo ni, mine nbem bita kan ka i ti niniki. I ti má ka i ti niniki wɔ, ama, i la mindi ni ambere wɔ, i koro má ka be ka ngbeen, ama, i koro ka sɔno kere kaaki i wo wɔ. ¹⁰ Ama, Micera n cɛen ni, i bá kabo awiefɔ ba fura nu na i wɔ n wɔ. Nyini cɛen ni, anġoro ni yó nanmie fanġa su, na i busu míni, na sin yára deke kere bo i wo anġoro ni, na i ká ngbeen. Na asien n ni deke kere bo i wo asien n su n bá wo má bere.

¹¹ Kabo nyini deke n kere bá ka ngbeen sɔ ni, wɔ yo daka ka am ti nzu mine barasum wɔ? Wɔ yo daka ka am woowa ti casi, na am fa am ŋu ma Nyeme ngumi, ¹² na am ŋminda fa ko Nyeme cɛen ni, na am boro am nyi yo sa bo i ma i ba ndende. Nyini cɛen n ye sin yára anġoro n kere na i ká ngbeen n a, na i kekere má deke n kere bo i wo anġoro n koro. ¹³ Ama, ya ŋminda sa bo Nyeme yo seeri ka i bá yo ni, ka, i yí anġoro ni asien fɔfɔre, do ye bu nati yo sa bo i ko atin su ngumi a.

¹⁴ Tɔ, m danfo kɔam, kabo am ŋminda fa ko nyini cɛen n ni, am boro am nyi, adena Nyeme bá ŋu ka am ni yiri noo ayo kun, na am woowa ti casi na am la má ngasi be i do. ¹⁵ Am tenge su ka ya Mibie mindi n deɛ ti, ye mine nyá tiide a. Sɔ ye ya niwa koroowa Pɔolu yo kere maari am a, Nyeme ceeri i Alecira n a. ¹⁶ Wɔ kere ahin n be sɔ i kadasi n kere n nu, ama, jɔre nbem wo nu, bo i ti kekereke na sɔno ti i bu. Nyini ye minem bo bu si má be na bu nya bi má Nyeme su atin su ni, nbem fa bu deɛ ngɔnlɛ kaaki i, ye i ko má atin su n a, kabo bu kaaki kereɛwa nyingam bo bu wo Nyeme jɔre Kadasi n nu n lɛɛ. Kabo bu yo sɔ ni, nyini ma bu ka ngbeen a.

¹⁷ M danfo kɔam, amberɛ, am du mo si nyini ni. Nyini ti, am si am ŋu sa, adena má am sɔn minem bo bu bu má be n su, na am mini atin n bo am su i su ni. ¹⁸ Ama, am ko su, na am subita Yesu Kristo deɛ atin ni, yiri bo i ti ya Mibie ni ya Tiidefo ni, adena am koro di i ahɔɔma, na am si i buka su. Yiri Yesu Kristo ni, i ti ye ni ka minem kere wura i kpiri, kisa ni sanġa kere. Ami.

Kadasi ciciri su bo YOHANE akere i ni

Nɔanie n bo i ma ngɔɔ n dɛɛ jɔrɛ

¹ Ya sukere ma am fa kɔ nɔanie n bo i ma ngɔɔ n su wɔ. Kana Nyeme ba yi durunya n ni, nyini nɔanie n bo i ma ngɔɔ n woori bere wɔ. Deke bo ya ti i, na ya nyumbaa anu i, na ya nie anu i kabo i ti barasu, na ya fa ya saa akan i, ye ya sukere fa ma am n a. ² Nyini nɔanie n la Yesu bo i ma ngɔɔ ni, i yo fiteeri fofoe nu wɔ, na ya nyumbaa anu i, nyini ti ye ya di ngɔɔ n bo i la má awieeri n daani kan i kere am n a. Yiri bo i ma ngɔɔ n bo i la má awieeri n yo woori i Si Nyeme dɔ ɔ, ye wɔ yi i ɔ akere ya a. ³ Deke n bo ya ɔ i, na ya ti i ni, ye ya sukan i kere am n a, adena ya ni ambere la wo fie ni ya benɔu, na ya kere la wo fie ni ya Si Nyeme ni i Wa Yesu Kristo ni. ⁴ Deke n bo i ti na ya sukere ahin dekem ma am n la ka, adena ya nya ahorejo nahore su.

Kabo i ti ye ni ka ya bita wein atin ni

⁵ Ahin labari n bo ya yo tiiri i Nyeme Wa n dɔ n lee, ye ya sukan kere am n a, ka Nyeme ti wein wɔ, na awosin haari kaan sɔ wo má i dɔ. ⁶ Nzen ya ɔ ya ni yiri la wo fie ni ya benɔu, ama, na ya toko wo awosin nu yo satie, ya ti kɔrefɔm wɔ lee, ya bita má nahore. ⁷ Ama, nzen ya bita wein atin kabo yiri Nyeme atin n ti wein ni, ya ni yiri la wo fie ni ya benɔu lee, na i Wa Yesu mbunja ni kpakpara yi ya satie kere bo i wo ya ɔ ni. Nyini ti, am ma ya bita wein n atin ni.

⁸ Nzen ya ɔ ya ya ti má satieyofɔm, ya dadaka ya ɔ wɔ lee, na nahore wo má ya ahore su. ⁹ Ama, nzen ya kan ya satie kereeri Nyeme, i fá ya satie n ce ya a, na i kpakpara yi ya fite ya sa kere bo i kɔ má atin su nu, dama i la dabuɔ, na i yo sa bo i kɔ atin n su. Nyini ti, am ma ya kan ya satie kere kere Nyeme. ¹⁰ Nzen ya ɔ ya yo má satie, ya yi Nyeme kɔrefɔ lee, na i nɔanie n wo má ya ahore su lee.

2

Yesu Kristo ti ya bukafɔ a

¹ M nbaam, m koro má ka am yo satie, nyini dɛɛ ti ye m sukere ahin jɔrɛ n ma am n a, ama, nzen am be yoori satie, ya la sɔnɔ be bo i yo ya ni ya Si Nyeme afien dɔngɔ, yiri la Yesu Kristo bo i yo sa bo i kɔ atin su sanɔa kere ni. ² Ya satie ti, na yiri Yesu ade ya jinaabiri, na wɔ fa i ɔ ayo tie afa ama Nyeme, adena Nyeme fá ya satie ce ya, má yere ngumi dɛɛ satie, ama, durunya n nufɔm kere dɛɛ satie.

³ Am ma ya de Nyeme nɔanie maawam ni, nyini kere ka ya si yiri Nyeme lee. ⁴ Sɔnɔ kere bo i ɔ, i si Nyeme, na i de má i nɔanie maawam ni, i mi ti kɔrefɔ ɔ, na nahore wo má i ahore su. ⁵⁻⁶ Ama, sɔnɔ kere bo i deeri Nyeme nɔanie ni, i mi ti sɔnɔ bo i koro Nyeme nahore su a. Na sɔnɔ kere bo i ɔ i wo ni Nyeme, wɔ yo daka ka i mi wo kabo Yesu wo ti ni. Nyini ye ya fa si ka ya wo ni Nyeme a.

7 M ninbaa koroowam, má nɔaniɛ maawa fɔfɔrɛ ye m sukere ma am n a, ama, nɔaniɛ maawa dawa n bo am du mɔ tiiri i n a. Nyini nɔaniɛ maawa dawa n la jɔrɛ n bo am yo tiiri i sangga bo am boori i bu suuri Yesu su ni. 8 Tɔ, ama, nɔaniɛ maawa n bo m sukere ma am ni, i kaaki ti nɔaniɛ maawa fɔfɔrɛ wɔ bekun, na ya ŋu ka i ti nahɔrɛ wɔ, fite kabo Yesu Kristo wo ti ni, ni kabo am wo ti ni, dama awosin n susin, ye wein nahɔrɛ su wo ta su.

9 Sɔnɔ kere bo i ŋa i wo wein n nu, na i kpɔ i niwa, i mi toko wo awosin nu wo lɛɛ. 10 Sɔnɔ kere bo i koro i niwa wo wein n nu wɔ, i yo má sa be bo i ma i niwa bo i jaa kpaasi. 11 Sɔnɔ kere bo i kpɔ i niwa, i mi wo awosin nu wɔ, na i suyo satiem, dama awosin n ata i nyi, nyini ti, ye i si má dekem bo i yo bu n a.

Sɔnɔ bo i ŋa i si Nyemɛ, i ti má ye ni ka i koro durunya ni

12 M nbaam, deke bo i ti na m sukere ahin kadasi n ma am n la ka, Nyemɛ afa am satie ace am, Yesu Kristo dɛɛ ti.

13 Sim, deke bo i ti na m sukere ma ambere n la ka, am si Yesu, yiri bo i wo bere kana Nyemɛ ba yiiri durunya n kere ni.

Ngbefenem, deke bo i ti na m sukere ma ambere n la ka, am akunma Sitana n dɛɛ ti.

14 M nbaam, deke bo i ti na m toko kere ma am n la ka, am si ya Si Nyemɛ n dɛɛ ti.

Sim, deke bo i ti na m toko kere ma am n la ka, am si Yesu bo i wo bere durunya n bumboori n kere ti.

Ngbefenem, deke bo i ti na m toko kere ma am n la ka, am yarada n ti fanja, na Nyemɛ nɔaniɛ n wo am ahore su, na am akunma Sitana n dɛɛ ti.

15 Tɔ, má am koro durunya n ni, ni deke n kere bo bu wo nu ni. Sɔnɔ kere bo i koro durunya ni, i mi koro má ya Si Nyemɛ lɛɛ. 16 Dama deke n kere bo i wo durunya n nu fen na i wura sɔnɔ konvi, ni deke bo sɔnɔ nyumbaa ŋu i na i koro i, ni deke bo sɔnɔ nya i na i fa fɔ, i fite má ya Si Nyemɛ dɔ, ama, i kere fite durunya n nu fen wɔ. 17 Durunya n ni deke kere bo i wura mine konvi kere la awieeri, ama, sɔnɔ kere bo i yo Nyemɛ sa koroowa, i nya ŋɔɔ bo i la má awieeri.

Kabo ya si ya ŋu sa ni Kristo kpɔfɔ n ni

18 M nbaam, durunya ni sukɔ awieeri lɛɛ. Am yo tiiri ka nzen durunya n ba sukɔ awieeri, Kristo kpɔfɔ ni bá, ama, kisa Kristo kpɔfɔm dɔŋgu ayi bu ŋu fofoe nu. Nyini ti, ya si ka durunya ni sukɔ awieeri lɛɛ. 19 Nyini minem n bo bu ti Kristo kpɔfɔm na ba fite ya nu ni, nahɔrɛ su, bu ti má ya minem. Nzen má bu ti ya minem, má bu ka ya dɔɔ. Ama, ba fite ya nu, nyini ye ya si ka, bu be mmɔɔ ti má ya minem a.

20 Ama, ambere yiri, Kristo n afa i Awiewie Casi n awura am ahore su, na am si deke bo i ti nahɔrɛ ni. 21 Má ka am si má nahɔrɛ n dɛɛ ti, ye m sukere ma am n a, ama, am si i, na am si ka kɔre koro yo má nahɔrɛ.

22 Ŋma ti kɔrefɔm kere tii n a? Kɔrefɔ n la sɔnɔ kere bo i ŋa Yesu ti má Kristo Tiidefo n bo Nyemɛ sunmaari i ni, yiri n bo i yo sɔ n akete ya Si Nyemɛ, ni i Wa n lɛɛ, i mi ni ti Kristo kpɔfɔ n a. 23 Dama sɔnɔ kere bo i keteeri Nyemɛ Wa ni, akete i Si Nyemɛ mmɔɔ lɛɛ. Ama, sɔnɔ kere bo i ŋa Kristo ti Nyemɛ Wa ni, i mi n ade i Si Nyemɛ mmɔɔ lɛɛ. 24 Nyini ti,

nɔɔnɛ n bo am tiiri i saŋga bo am boori i bu suuri Kristo su ni, am ma i wo am ahore su. Nzen am bita nyini nɔɔnɛ ni am ahore su, nyini ma am ni Nyeme Wa ni, ni i Si n yo deke kun a. ²⁵ Deke bo Kristo seeri ka i fá ma ya n la ηƔɔɔ bo i la má awieeri ni.

²⁶ M sukere ahin nɔɔnɛ n ma am, na am si am ηju sa fa kɔ minem bo bu koro ka bu dadaka am ni. ²⁷ Ama, ambere yiri, Awiewie Casi n bo Kristo afa ama am wo am do. Nyini ti, i ti má ye ni ka be fa kereewa be kere am kun, dama Awiewie Casi ni kere am deke kere a, na deke kere bo i kere am ti nahore wo, kore wo má nu. Nyini dee ti, am wo ni Kristo kabo Awiewie Casi n akere am ni.

²⁸ M nbaam, kisa am wo ni Kristo, na ceen n bo i ba yiiri i ηju fiteeri fofoe nu n na ya la ahoresi, na má nyinse ti ya. ²⁹ Am si ka Yesu yo sa bo i kɔ atin n su, nyini ti, am si ka sɔno kere bo i yo sa bo i kɔ atin n su, i ti Nyeme wa a.

3

Bo bu ti Nyeme nbaam ni

¹ Am nie koro bo ya Si Nyeme fa koro ya barasu a. Nyini dee ti, ye i fere ya ka i nbaam n a, i ti nahore ka ya ti i nbaam wo. Durunya n nufom si má ya Si Nyeme, nyini dee ti, ye bu si má ka ya ti i nbaam n a. ² M ninbaa koroowam, kisa ya ti Nyeme nbaam wo, na Nyeme nya yi kere má ya kabo ya bá ti barasu, ama, ya si ka Yesu bá baari, ya ti kabo i ti n wo, dama ya ηju i kabo i ti nbaam. ³ Nyini ti, sɔno kere bo i la tama ka i bá yo kabo Yesu ti ni, i bita i ηju casi, kabo Yesu ti casi ni.

⁴ Sɔno kere bo i yo satie, i mi ti Nyeme nɔɔnɛ kpamaawa n ketefo o, dama satieyo ti Nyeme nɔɔnɛ kpamaawa n kete wo. ⁵ Am si ka Yesu baari durunya n nu, ka i ba yi satie bo i wo ya ηju n wo, ama, yiri ni i tii la má satie be. ⁶ Nyini ti, sɔno kere bo i wo ni Yesu, koro suyo má satie, ama, sɔno kere bo i toko yo satie, nyini kere ka, wo nya ηju má i lee, na i mi kaaki si má i.

⁷ M nbaam, má am ma be dadaka am. Sɔno kere bo i yo sakpa, Nyeme de i ka i mi yo sa bo i kɔ atin su i do, kabo Yesu ti ni. ⁸ Sɔno kere bo i yo satie, i mi ti Sitana dee sɔno o, dama fite durunya n bumboori n kere ye Sitana n yoori satie a. Deke bo i ti na Nyeme Wa n baari durunya n nu la ka, i ba yo Sitana n juma ηgbreen wo. ⁹ Sɔno kere bo i ti Nyeme wa koro suyo má satie, dama Nyeme woowa n wo i mi do, na Nyeme ti i Si n dee ti, i koro suyo má satie. ¹⁰ Deke bo ya fa si minem bo bu ti Nyeme nbaam, ni bo bu ti Sitana n nbaam n la ka, sɔno kere bo i yo má sakpa, wara sɔno kere bo i koro má i niwa, i mi ti má Nyeme wa.

Kabo ya koro ya beŋgu barasu ni

¹¹ Jore n bo am tiiri i saŋga bo am boori i bu suuri Yesu su n la ka, am ma ya koro ya beŋgum. ¹² Má am ma ya yo ka Keen, bo i yo ti Sitana dee wa ni, na i kuunri i niema ni. Nzu ti ye i kuunri i niema n a? I sayoowa ti má kpa n dee ti, na i niema n dee n ti kpa n ti. ¹³ Nyini ti, m ninbaam, nzen durunya n nufom kpo am ka am yo sakpa n dee ti, má am ma i yo am alekutura. ¹⁴ Kabo yere koro ya ninbaam n ti, nyini ma ya si ka ya fite yiwee n nu anya ηƔɔɔ nahore su a. Sɔno kere bo i koro má i niwa toko wo yiwee nu wo lee. ¹⁵ Sɔno kere bo i kpo i niwa ti sɔno kunfo o Nyeme do. Am si ka sɔno kere bo i kun sɔno la má ηƔɔɔ bo i la má awieeri ni. ¹⁶ Yesu

deeri ya dɛɛ jinaabiri wɔ, na wɔ tɔ i ɲɔɔ awu ama ya, nyini ma ya fa si kabo koro ti barasu a. Nyini ti, wɔ yo daka ka ya gusu tɔ ya ɲɔɔ ma ya ninbaam, haari nzen i yo yiwee mmɔɔ. ¹⁷ Sɔnɔ kere bo i la nenge, na i ɲu ka i niwa wo yaari nu, na i si má i anjunfo ka i buka i, Nyeme koro wo má i mi n ahore su lɛɛ. ¹⁸ M nbaam, má am ma ya jɔɔwɔwa n ɲgumi kere ka ya la koro, ama, am ma ya sayoowa kere ka ya koro ya ninbaam nahore su. ¹⁹ Nyini ma ya fa si ka ya su nahore n su a, na i ma ya la ahoresi Nyeme dɔ a, ²⁰ na nzen ya sunsunni maari ya ka ya yo satie, ya si ka Nyeme tara ya sunsunni ni, na i kaaki si deke n kere. ²¹ Nyini ti, m ninbaa koroowam, nzen ya sunsunni ase má ya ka ya yo satie, ya la ahoresi Nyeme dɔ lɛɛ. ²² Na deke kere bo ya sereeri i, ya nya i wɔ, dama ya de noanie maawa n bo Nyeme fa maari ya ni, na ya yo sa bo i sun i nu. ²³ Noanie maawa n bo Nyeme fa maari ya n la ka, ya yo i Wa Yesu Kristo yarada, na ya koro ya ninbaam ni, kabo wɔ se ya ni. ²⁴ Sɔnɔ kere bo i deeri Nyeme noanie maawam n wo ni Nyeme, na Nyeme mmɔɔ wo ni i mi ni. Awiewie Casi n bo wɔ fa ama ya ni, ma ya si ka Nyeme wo ni yere a.

4

Awiewie n bo i ti nahore ni bo i ti kore n jore

¹ M ninbaa koroowam, má am yo minem kere bo bu ɲa Nyeme Awiewie n wo bu dɔ n yarada, ama, am yo bu na am nie ka bu kereewa n fite Awiewie Casi n dɔ, nzen i fite má. Dama korefom dongu bo bu yo bu ɲu ka bu ti Nyeme noanie kanfom n asandi abara aye durunya n nu. ² Nyeme noanie kanfo kere bo i se ka Yesu Kristo kaakiiri adamande baari durunya n nu fen, yiri ye Nyeme Awiewie n wo i dɔ a. Nyini ye am fa si bo Awiewie Casi n wo bu dɔ, ni bo i wo má bu dɔ a. ³ Ama, sɔnɔ kere bo i keteeri ka, Yesu akaaki má adamande ni, Nyeme Awiewie n wo má i mi dɔ, ama, i dɛ kereewa n fite Kristo kpofɔ n dɔ ɔ. Yiri ye am yo tiiri ka i bá durunya n nu, ye kisa wɔ ba n a.

⁴ M nbaam, am ti Nyeme dɛɛ minem wɔ, ye am akunma nyini korefom bo bu yo bu ɲu ka bu ti Nyeme noanie n kanfom ni, dama Awiewie Casi n bo i wo am nu n la yiko tara Sitana n bo i wo durunya n nufom nu ni. ⁵ Nyini korefom bo bu yo bu ɲu ka bu ti Nyeme noanie kanfom ni, bu kan durunya n nu jore kere minem a, na durunya n nufom de kabo bu kere ni, dama bu ti durunya n nufom wɔ. ⁶ Ama, yere yiri, ya ti Nyeme dɛɛ minem wɔ, sɔnɔ kere bo i si Nyeme de kabo ya kere n wɔ, ama, sɔnɔ kere bo i ti má Nyeme dɛɛ de má kabo ya kere ni. Nyini ye ya fa si minem bo bu la Nyeme Awiewie n bo i kere nahore n a, ni bo bu bu kore n fite Sitana dɔ n a.

Ya koro ya benggu kabo Nyeme koro ya ni

⁷ M ninbaa koroowam, am ma ya koro ya niwa, dama koro fite Nyeme dɔ ɔ, na sɔnɔ kere bo i koro i benggu ti Nyeme wa a, na i mi si Nyeme a. ⁸ Nyeme ti koro wɔ, nyini ti, sɔnɔ kere bo i koro má i benggu si má Nyeme. ⁹ Kabo Nyeme kereeri i koro fa kɔ ya dɔ n la ka o, wɔ sunma i kunnu Wa kun n kpein durunya n nu, adena yiri dɛɛ ti na ya nya ɲɔɔ. ¹⁰ Kabo koro ti lɛɛ, má ka yere koroori Nyeme a, ama, yiri koroori ya a, na wɔ sunma i Wa, na wɔ de ya jinaabiri na wɔ fa i ɲu ayo tie afa ama Nyeme, adena Nyeme fa ya satie ce ya. ¹¹ M ninbaa koroowam, kabo Nyeme koro ya sɔ ni, wɔ yo daka ka ya gusu koro ya benggu. ¹² Be nya ɲu má Nyeme, ama,

nzen ya koroori ya bengu, Nyeme wo ya do lee, na nyini ma i dee koro n wo ya do na i ti kabo i koro ka i ti n a.

¹³ Awiewie Casi n bo Nyeme afa ama ya ni, nyini ma ya si ka ya wo ni yiri a, na i gusu wo ni yere a. ¹⁴ Na yere anu kabo ya Si Nyeme n asunma i Wa n ka i ba yo durunya n nufom Tiidefo, ye ya di i daani a. ¹⁵ Sono kere bo i tekeeri i nwo seeri ka Yesu ti Nyeme Wa, Nyeme wo i mi n do, na i mi n gusu wo ni Nyeme lee. ¹⁶ Yere mmoo ni ya tii si kabo Nyeme koro ya barasu, ye ya yo yarada ka i koro ya.

Nyeme ti koro wo, nyini dee ti, sono kere bo i koro i bengu ni, i mi wo ni Nyeme, na Nyeme wo ni yiri. ¹⁷ Nyeme koro wo ya do, i ti kabo i koro ka i ti n wo, nyini ti ye ya ba koro jina i nyunu ni ahoresi, ceen n bo Nyeme ba di durunya n nufom kere jore ni, ma pui ti, kabo Kristo ti ni, ya gusu wo ti so o, durunya n nu. ¹⁸ Sono kere bo Nyeme koro wo i do soro ma sere, dama koro bo i ti kabo Nyeme koro ka i ti ni, i fon yi sere wo, nyini ti, sono kere bo i soro sere, Nyeme koro wo ma i do kabo ma Nyeme koro ka i ti ni, dama sere ni suicin nati a. ¹⁹ Nyeme du mo koroori ya, nyini dee ti ye ya gusu la koro n a. ²⁰ Sono kere bo i na i koro Nyeme, na i koro ma i ninbaam ni, i mi ti korefo o. Nzen i koro ma i niwa bo i nyumbaa nu i ni, i yo se koro Nyeme bo i nyumbaa nu ma i n a? ²¹ Noanie maawa n bo Yesu afa ama ya n la ka, sono kere bo i koro Nyeme, wo yo daka ka i mi koro i ninbaam gusu.

5

Kabo ya kunma durunya n ni

¹ Sono kere bo i yo yarada ka Yesu ti Kristo Tiidefo n bo Nyeme asunma i ni, i mi ti Nyeme wa a, na sono kere bo i koroori baa n wufo ni, i koro baa n gusu. ² Deke wo ya fa si ka ya koro minem bo bu ti Nyeme nbaam n la ka, ya koro Nyeme, na ya de noanie maawam n bo wo fa ama ya ni. ³ Nzen ya deeru Nyeme noanie maawam ni, nyini kere ka ya koro i a. I noanie maawam n gusu ti ma kekereke, ⁴ dama sono kere bo i ti Nyeme wa kunma durunya n wo. Deke bo ya fa kunma durunya n la kabo ya yo Yesu yarada n wo. ⁵ Nma koro kunma durunya n a? Bo i koro kunma durunya n la sono bo wo yo yarada ka Yesu ti Nyeme Wa ni.

Daani diiwa fa ko kabo Yesu Kristo ti Nyeme Wa ni

⁶ Yiri Yesu Kristo yo baari durunya n nu n a, na ba bie i Nyeme nzue, nyini sin, na wo ba awu, na i mbunja afite ago. I baari ni, ma ka bu bieeri i Nyeme nzue n ngumi wo, ama, i wuuri wo, na i mbunja afite ago. Awiewie Casi ni di i daani a, dama Awiewie Casi n ti nahorefo o. ⁷ Deke nsan di i daani a. ⁸ Bu daani diiwa n ti kun wo. Bere la Awiewie Casi ni, ni kabo bu bieeri i Nyeme nzue ni, ni kabo i wuuri na i mbunja fite goori ni. ⁹ So ye Nyeme ni i tii adi i tiengu Wa n daani a. Ya de minem daani diiwa, nyini ti, i ti ye ni ka ya de Nyeme daani diiwa, dama i daani diiwa n la fanga tara minem dee. ¹⁰ Nyini ti, sono kere bo i yoori Nyeme Wa n yarada, i mi la daani difo, yiri la Awiewie Casi n bo i wo i ahore su ni, na sono kere bo wo yo ma i yarada ayi Nyeme korefo lee, dama wo yo ma daani n bo Nyeme adi i fa ko i Wa n su yarada. ¹¹ Nyeme daani diiwa n la ka o, wo ma ya ngoo n bo i la ma awieeri ni, nyini ngoo n wo i Wa n do o. ¹² Sono kere bo i ni Nyeme Wa n ayo kun, i mi la nyini ngoo ni, na sono kere bo i de ma Nyeme Wa ni, i la ma ngoo.

Nyɔɔ bo i la má awieeri n jɔre

¹³ M koro ka amberɛ bo am ayo Nyemɛ Wa n yarada n si ka am la nyɔɔ bo i la má awieeri ni, nyini dɛɛ ti ye ma kɛrɛ ahin kadasi n ama am n a. ¹⁴ Ya la ahoresi ni Nyemɛ, ka, deke kɛrɛ bo ya sereeri i, na i ti i dɛɛ koroowa, i de ya sere wɔ. ¹⁵ Ya si ka deke kɛrɛ bo ya sereeri i, na i de ya sere, ya si ka wɔ yo i ama ya lɛɛ.

¹⁶ Nyini ti, nzen sɔnɔ nyu ka i niwa be ayo satie be bo i kpaaki má i ni Nyemɛ afien fieo, i mi sére Nyemɛ ma yiri n bo wɔ yo satie ni, na Nyemɛ má i nyɔɔ. Ama, satie be wo bɛrɛ bo i kpaaki sɔnɔ ni Nyemɛ afien fieo, m suse má ka am sere Nyemɛ ma minem bo bu yo nyini satie n wɔ. ¹⁷ Sa kɛrɛ bo minem yo i na i ti má kpa ti satie wɔ Nyemɛ dɔ, ama, satieyo nbem wo bɛrɛ bo i kpaaki má sɔnɔ ni Nyemɛ afien fieo.

¹⁸ Ya si ka minem kɛrɛ bo bu ti Nyemɛ nbaam koro suyo má satie, dama Nyemɛ Wa ni nminda i a, na Sitana koro yo má i mi pui. ¹⁹ Ya si ka durunya n nufɔm kɛrɛ wo Sitana n saa nu wɔ, ama, yere ti Nyemɛ dɛɛm wɔ. ²⁰ Ye ya kaaki si ka Nyemɛ Wa n aba na wɔ ba ateke ya nyi wɔ, adena ya si yiri n bo i ti Nyemɛ nahɔrɛ su ni. Ye ya wo ni Nyemɛ n bo i ti nahɔrɛ n ni i wa Yesu Kristo ni. Yiri ti Nyemɛ nahɔrɛ su n a, na i ma nyɔɔ bo i la má awieeri n a.

²¹ Tɔ, m nbaam, am tara am nyu, na má am su amɔɛm.

Kadasi nnyɔ su bo YOHANE akere i ni

¹ Mini bo m ti am kpɛn ni, sukere ahin jɔre n fa ma wɔɔ bara bo Nyeme ayi u, ni u nbaam n a. M koro am nahɔre su, má mini ngumi koro am a, ama, bo bu si nahɔre atin n kere koro am wɔ, ² dama nahɔre n wo ya dɔ ɔ, na i bá wo ya dɔ ɔ, sangga kere bo i la má awieeri.

³ Ya Si Nyeme, ni i Wa Yesu Kristo buka ya, na bu si ya aɔunfo, na bu ma ya ahoreda, na ya su nahɔre atin su ni koro.

Am koro am beɔgu na am si am ɔu sa ni dadakafɔm ni

⁴ Ma ɔu ka am nbaam nbem bita nahɔre n kabo ya Si Nyeme afa i nɔanie n ama ya ni, nyini dɛɛ ti, wɔ yo m fie agaya. ⁵ Kisa, bara, m susere am wɔ, ka am ma ya koro ya beɔgu. Ahin ti má nɔanie maawa fɔfɔre ye m sukere ma am n a, ama, i ti nɔanie maawa kun n bo ya tiiri i sangga bo ya boori i bu suuri Yesu su n wɔ. ⁶ Koro n bo m sujɔɔ i jɔre n la ka, ya wo kabo Nyeme nɔanie maawa n kere ni. Nɔanie maawa n bo am du mɔ tiiri i n la ka, am koro am beɔgu.

⁷ Dadakafɔm beberebe asandi abara aye durunya n nu, bu ɔa Yesu Kristo akaaki má adamande aba má durunya n nu. Bere ti dadakafɔm wɔ, na bu ti Kristo kpɔfɔm. ⁸ Nyini ti, am si am ɔu sa, na má deke n bo ya yi anyumboro afa akere am n ka ngbɛɛn, ama, na am ba nya i kere ɔkato. ⁹ Sɔnɔ kere bo i su má Kristo dɛɛ kereewa n su, na i kere i dɛɛ kereewa kɔ sin nyini ɔu, Nyeme wo má i mi dɔ, ama, sɔnɔ kere bo i su Kristo dɛɛ kereewa n su, ya Si Nyeme, ni i Wa n wo i mi n dɔ lɛɛ. ¹⁰ Nyini ti, sɔnɔ kere bo i baari am dɔ, na i bita má Kristo dɛɛ kereewa ni, má am ma i mi wura am dika, má am yo i anse ni ba mmɔɔ. ¹¹ Dama wɔɔ kere bo a yoori nyininim be sɔ anse, a jina i mi sin fa kɔ i satiem n bo i yo bu n su wɔ lɛɛ.

Awieeri su dɛɛ jɔre ni

¹² Má m la jɔre beberebe bo má m se am, ama, m koro má ka m kere i kere wura ahin kadasi n nu, ama, m la tama ka m bá nie am busu, na ya ɔu ya ɔu, na ya bó anzama, bo ya ahore jɔ ni nahɔre su.

¹³ U niemabara n bo Nyeme ayi i ni i nbaam kere bo bu wo fen n bisa am kere dɔngu.

Kadasi nsan su bo YOHANE akere i ni

¹ Mini bo m ti u kpien ni, sukere ahin jore n fa ma woro m don Gayosi bo m koro u nahore su n a.

² M don koroowa, m nyemesere la ka, Nyeme ma u anjuniembaa nu laifie, na u deke kere ko atin su nyunyumi, kabo ni nyemesu ni suko atin su ni.

³ Dama ya ninbaa nbem baari fen, na ba se m kabo a bita nahore ni, na wo yo m fie agaya. M si ka a su nahore atin n su wo. ⁴ Deke be wo ma bere bo i yo m fie agaya tara bo m ti kabo m nbaam su nahore atin n su ni.

Boro u nyi na a sude u ninbaa Kristo susufom wofa

⁵ M don koroowa, a bita nahore kabo a nati yo sakpa ma u ninbaam bo bu ba u do wofa ni, haari ni bo a si ma bu ni mmoo. ⁶ Bere bo a buka bu ni, ba kan kabo a koro bu n akere Kristo jama n bo bu wo fen ni. Boro u nyi na a buka bu kabo Nyeme koro ni, na bu koro ko deke bo bu suko ni.

⁷ Kristo dee ti, bu nati kan i noanie n kere minem wo, na bu koro ma pui minem n bo bu su ma Nyeme n do. ⁸ Nyini ti, yere bo ya ti Kristo susufom ni, wo yo daka ka ya buka bu ni juma n bo bu yo i ni. Nzen ya bukaari bu, nyini la ka, ya ni bere abo kun sukan Kristo noanie n bo i ti nahore n kere minem wo lee.

⁹ M yo kereri jore be maari Kristo jama ni, ama, Diyoterefesi bo i koro ka i kere ka yiri ti mofa n atana su, wo bo ma jore be nu. ¹⁰ Nyini ti, nzen m baari, m yi i sayoowa fite fofoe nu, dama wo joro jore ngbennngbenn abu kore aso ya, ma nyini ngumi, wo kete ka i de ma Kristo minem wofa, na nzen nbem koro ka bu de minem wofa mmoo, i soro ma su, na i koro ka i fon yi bere bo bu koro ka bu de wofom n fite Kristo jamam n nu ni.

¹¹ M don koroowa, ma a son satieyo su, ama, son sakpayo su. Sono kere bo i yo sakpa ti Nyeme dee wo, ama, sono kere bo i yo satie si ma Nyeme. ¹² Sono kere di daani kpa fa ko kabo Demetirosi bita nahore n wo, na i woowa gusu kere ka i bita nahore wo. Yere mmoo di i daani wo, ye a si ka kabo ya se n ti nahore wo.

Kasin dee anse yoowa ni

¹³ Ma m la jore beberebe bo ma m se u, ama, m koro ma ka m kere i kere wura kadasi n nu. ¹⁴ M la tama ka m ba nie u busu kisa, na ya nu ya nu, na ya bo anzama. ¹⁵ Nyeme ma u ahoreda. U danfom kere bo bu wo fen bisa u dongu. Woro gusu bisa ya danfom kere dongu ma ya.

Kadasi n bo JUDA akere i ni

¹ Mini Juda bo m ti Yakobo niema na m ti Yesu Kristo akoo ni, sukere ahin kadasi n ma ambere kere bo ya Si Nyeme koro am na wo fere am, na Yesu Kristo bita am ni. ² Nyeme si am anjuno agaya, na i ma am ahoreda buka su, na i koro am ko sin su.

Korefo m bo bu yo bu nyu ka bu kere Nyeme noanie n dee jore

³ M ninbaa koroowam, ma m suboro m nyi wo, na m kere kadasi ma am fa ko tiide n bo m ni ambere kere anya i n su ni. Ama, wo yo daka ka m du mo kere am, na m sere am jande ka am boro am nyi tu ngoni bita am yarada n kenken, nyini yarada ni, yiri ye Nyeme afa ama i minem kpekun n kpein n a. ⁴ Dama minem nbem awo awura am nu benle, nyini minem ni, bu soro ma Nyeme, bu kaaki Nyeme ahoroma n bo wo fa ama ya n wo, na bu su bu dee konviki koroowa atin n su, na bu kete Kristo. Yiri ngumi ti ya Tiidefo ni ya Mibie a. Dawa dee Nyeme noanie kanfo m kereeri bu jore, ka, Nyeme di bu jore na i yo bu ngbeen.

⁵ Haari ni bo am adu mo asi ahin jore n kere ni, m koro ka m tenge am su wo, fa ko kabo Micera n yo yiiri Yisarelifom fiteeri Ijipiti asien su ni, ama, kasin na wo ma bo ba yo ma i yarada n kere aka ngbeen. ⁶ Na Nyeme merkem nbem bo bu keteeri ka bu wo ma bu yiko woobiri ni, na bu yakiiri bu jinaabiri ni, bere ye Nyeme awura bu joroko bo bu fite ma nu kun, afa bu ase awosin liim nu n a, ka bu wo do, haari fa ko ju joredi bambaka n ceen. ⁷ So ye Sodom ni Gomorafom, ni miem bo bu bara ye bu n mmoo yoori a, bu faari bu nyu wuraari sakaraya sereyam nu wo, na bu suyo konviki sam bo bu ko ma atin su. Nyini dee ti, na Nyeme acin bu sui, afa bu awura sin n bo i je sangga kere n nu. Nyeme yoori so o, na mine nyu i, na bu fa tu bu nyu fo.

⁸ So ye nyini minem nati cin alele ngbeenngbeen a, na bu suyo dangba sam, na bu kete Nyeme yiko ni, na bu kpie ngoofo m nzuko, bere bo bu wo angoro na bu woowa la jirima ni. ⁹ Haari Mikali bo i ti Nyeme merkem n kere tii ni mmoo, wo yo abo ma su ka i jaraki Sitana kpie i nzuko, sangga bo Moyisi wuuri na bu seeri akuruwa fa ko i nuniembaa n busu ni. Ama, kabo i seeri i n la ka, "Nyeme bisa u." ¹⁰ Ama, ahin minem ni, bere yiri, deke bo bu si ma i ni, nyini ye bu kpie i nzuko a. Haari nzen bu na ba ti deke bu, bu sunsunn ti ka nengdorem dee wo. Bu nyini sunsunn n bo bu bita i na i ti ma kpa ni, nyini ma bu ka ngbeen a. ¹¹ Keto, keto, bu nyu kekereke. Dama ba fa satie atin n bo Keen faari i ni, na njwaa dee ti, bu su Baalam dee dadaka atin n su wo, na ba kete nahore atin kabo Kora yo keteeri ni. Nyini ti, kabo i kaari ngbeen ni, bere gusu ka ngbeen so o.

¹² Nzen am ba tien am noo sudi anooe diire, bu sata am afien kabo fin ta sutura n wo, dama bu ni ambere sangga di a, na bu san ma nya, bu koro ka bere ngumi kunnu yi a, bu la ma kperere be. Bu ti ka nzue bo i muna na anjuma fa i sin n wo. Na bu kaaki ti ka baka bo i su ma suuwa bakam su sangga, na i wu kporo na i bu to n wo. ¹³ Bu nyinse sam bo bu yo bu ni, bu ti kabo tieku nzue bo na i yasu fufuku n wo. Bu kaaki ti ka asarambaa bo

bu jengbe bara ye n wɔ. Nyeme asese awosin liim su anminda bu ka bu kó wo dɔ sanga kere.

¹⁴ Sɔnɔ be bo bu fere i ka Henoki, na i tɔ ya na Adama su nso su ni, Nyeme yo faari i noanie n maari i wɔ, na wɔ yo ajojo nyini jore n ka, “Am ti fen, Micera ni suba ni i merékem akpii akpii buru, ¹⁵ na i bá di sɔnɔ kere jore, na i cín bu sui fa kɔ bu satiem bo ba yo bu n su, ni kabo bu jɔjɔri ngbɛɛnngbɛɛn na bu keteeri Nyeme ni. Bu ti satieyofɔm wɔ, nyini ti, ye bu keteeri Nyeme noanie n a.” ¹⁶ Nyini minem ni sɔ, bu nɔnɔti wɔ sanga kere, na bu sujaraki bu benggu, na bu susu bu konvikiya sa ngbɛɛnngbɛɛn bo bu bita i n su, na bu sufɔ yanfɔya, na bu subo minem anɔɔfiɛ, adena bu nya bu dɛɛ sa koroowam.

Jɔre bobɔɔwam ni atin kereewam ni

¹⁷ Ama, ambere, m danfo kpam, wɔ yo daka ka am tenge su fa kɔ jore n bo ya Mibiɛ Yesu Kristo jaramasam yo seeri am ni. ¹⁸ Bu seeri am ka, “Sanga bo durunya n ba sukɔ awieeri su ni, mine nbem bá ba, na bu yó am anzasi, fa kɔ am yarada n su, na bu sú bu dɛɛ tienɔgu anjuniembaa sa koroowam n su bo bu kɔ má Nyeme atin su ni.” ¹⁹ Ahin minem sɔ, bu sutiti am nu wɔ lɛɛ, bu su adamande dɛɛ ngɔnlɛ su a, Nyeme Awiewie Casi n wo má bu dɔ. ²⁰ Ama, ambere, m danfo kpam, am boro am nyi na am ma am yarada casi n buka su, na am sere Nyeme, Awiewie Casi n dɛɛ yiko nu, ²¹ na am ma Nyeme dɛɛ koro n wo am dɔ. Na am nɔminda fa kɔ sanga bo ya Mibiɛ Yesu Kristo bá si am anjɔfɔ, na am nya ngɔɔ bo i la má awieeri ni. ²² Nbem wo am nu bo bu la sika bu sunsunni nu, am si bu anjɔfɔ, ²³ nbem gusu, am cin yi bu fite sin nu, na am de bu tii ji, na nyingam gusu, am si bu anjɔfɔ, ama, am si am nɔ sa haari na má am ma bu sutura fin mmɔɔ ta am.

Awieeri su dɛɛ nyemesere

²⁴⁻²⁵ Nyeme ngumi ti ya Tiidefɔ a, ya Mibiɛ Yesu Kristo dɛɛ ti. Yiri koro bita am na am kpaasi má a, yiri koro fa am ba jina i jirima bie n nyunu a, na am la má ngasi be na i ma am ahorejo a. Yiri ye i ti ye ni ka ya kansi i na ya wura i kpiri a, yiri ti yikofɔ a, yiri ti fanɔgafɔ a, yiri yo woori bere a, yiri toko wo bere kisa ni sanga kere a. Ami.

SAYIKEREWA bo Yesu yi kereeri YOHANE ni

¹ Ahin jore n ye Nyeme seeri Yesu Kristo ka i yi kere i akoom fa ko sam bo i ce ma na bu ba yo n a. Na Yesu asunma i mereke i akoo Yohane do, na i ko se i jore ni. ² Jore n bo Nyeme ni Yesu Kristo yi kereeri Yohane na i nyuri i ni, nyini ye wo di i daani akere i n a.

³ Sono kere bo i kaanri ahin kadasi ni, terefie wo i do. Na minem kere bo bu tiiri i jore na bu deeri i, terefie wo bu do, dama sangha n addo bo nyini sam kere ba yo.

Kabo Yohane kereeri kadasi yoori Kristo jama n anse ni

⁴⁻⁵ Mini Yohane akere ahin kadasi n na m fa ma Kristo jama asese nso n bo bu wo Esiya awore n nu n a. Nyeme bo i wo bere, na i yo woori bere, na i ba wo bere sangha kere ni, ni i awiewie busu nsom n bo bu wo yiri Nyeme kpiri n nyunu ni ma am ahoreda, na am di bu ahorama. Bekun, Yesu Kristo, yiri bo i di i daani na i la dabunju ni, na yiri ti bo i du mo tengeeri yiwee nu ni, na i kaaki ti durunya n nu nfemem kere tii ni, ma am ahoreda, na am di i ahorama. Yiri koro ya, na wo fa i mbunja ade ya afite ya satie kere nu, ⁶ na wo yo ya i femeya n nu minem na ya yo i sayoowa donguyofom, na ya su i Si Nyeme. Yiri Yesu Kristo ni, yiri ti ye ni ka ya wura i kpiri a, i dee la yiko sangha kere. Ami.

⁷ Am nie, i fite angoro yinyingu n nu ba,
na sono kere nyumbaa ba nyi,
fa sangha ni minem bo bu woori i kpie n kere.
Yiri ti, durunya n nufom kere sun.

I ti so o. Ami.

⁸ Ya Mi Nyeme Feme Kpiri bo i wo bere ni, na i yo woori bere, na i ba wo bere sangha kere n ase ka, "Mini ti mofa, na m kaaki ti kasinfo."

Kabo Yohane nyuri Kristo ka alele nu ni

⁹ Mini Yohane ti am niwa bo m ni ambere kere sangha di wahara ni mindi Yesu dee ti, na ya ti i femeya n nu minem ni. Nyeme noanie n bo ma kan i ni, ni Yesu daani n bo ma di i n dee ti, na ba fa m ako aji mie be bo i wo lui bambaka n bo i wo tieku n nu na bu fere i ka Patamosi n su. ¹⁰ Ya Mibie n dee een ni, na Nyeme Awiewie Casi n awura m nyu, na ma ti akonvi bambaka be nga m sin, ka awie dee su. ¹¹ Na wo se m ka, "Kere deke n kere bo a nyi i n wura kadasi n nu, na a fa ma Kristo jama asese nsom bo bu wo ahin mie kpirim n su ni, bere la Efeso, ni Samirina, ni Peregamon, ni Tiyatira, ni Saradisa, ni Filadelfiya, ni Lawodikaya."

¹² Na ma ce anie m sin ka m nyu sono n bo i jajo m do ni, m ce nieeri ni, na ma nyu fitana takaabiri nsom bo bu ti sika ni. ¹³ Na ma nyu be ka adamande wa ni, i wo bu afien, i wura tanlee tintiin yorom, na wo fa sika dambara abo i hoe su. ¹⁴ I tiinjmie kere ti fofoe papasi ka gise wo, na i nyumbaa kere je ka sin fofoe. ¹⁵ Na i jaa gbagbaa kere boro ka jawii bo ba fa awura sin nu na wo boro sonsoen, na i konvi bo awie kabo nzu beberebe songi na i bo awie barasu ni. ¹⁶ I bita asarambaam nso i saa fomboro nu, na takobe nana afite i noo nu. I nyunu je kabo wie ba bi na i je n wo.

¹⁷ M ɲuuri i sɔ ni, na ma kaba ada i jaa bu asiɲgu ka ma wu dɛɛ su wɔ, na wɔ fa i saa fɔmbɔrɔ anana m ɲu, na wɔ se m ka, “Má a soro sɛɛ. Mini ti deke kɛɛ bumboori ni i awieeri a. ¹⁸ Mini ti bo i wo bɛɛ sanja kɛɛ n a. Nɛ fɛn. M yo wuuri wɔ, ama, kisa, ma tenje yiwee nu. M la ɲɔɔ bo i la má awieeri. Mini bita yiwee ni Yiweefɔm Woobiri kadombaa a. ¹⁹ Nyini ti, kɛɛ sam bo a ɲu bu ni, ni bo bu suyo kisa ni, ni bo bu bá yo ahin dɛɛ sin ni. ²⁰ Asarambaa nsom bo a ɲu bu m saa fɔmbɔrɔ n bu la ka, Kristo jama asese nsom n merɛkɛm. Na fitana takaabiri nsom bo bu ti sika ni gusu bu la ka, Kristo jama asese nsom ni.”

2

Nɔɔniɛ n bo bu fa maari Kristo jama n bo i wo Efeso ni

¹ Na wɔ se m ka, “Kɛɛ kadasi fa ma merɛkɛ n bo i niɛ Kristo jama n bo i wo Efeso miɛ kpiri n nu ni, na a se bu ka, ‘Ahin nɔɔniɛ n fite mini bo m bita asarambaa nsom m saa fɔmbɔrɔ nu ni, na m kaaki nati fitana takaabiri nsom bo bu ti sika n aften n dɔ ɔ. ² M si am sayoowam, m si kabo am ayo am juma ni anyumbo barasu, ni kabo am la mindi barasu ni, na m si kabo am de má satieyofɔm ni. Na m kaaki si kabo am ayi kɔɛsi aɲu minɛm bo bu ɲa bu ti m jaramasam, ama, bu woowa kere ka bu ti má sɔ, na am aɲu ka bu ti kɔɛfɔm ni. ³ Mini dɛɛ ti, am ayo sawɔɛ amindi am wahara nu, am nya fie má, am toko su m su.

⁴ Ama, jɔɛ kun bo m fa jaraki am la ka, kisa am koro má m kabo am yo koro m ni. ⁵ Nyini ti, am bu am tii nu fɔ na am si deke bo am akpaasi ni, na am kaaki am wo, na am yo sam bo am yoori bu bumboori ni. Nzen am akaaki má am wo, m bá cin yi am fitana takaabiri n deke bo i taka ni. ⁶ Ama, am sa kun bo i yo m fie n la kabo am koro má Nikolaitafɔm sayoowam ni, mini mmɔɔ koro má bu sayoowam ni.’

⁷ Sɔnɔ kɛɛ bo i koro ka i ti ahin jɔɛ n bu, i ti ye ni ka i mi so i sui na i ti kabo Awiewiɛ Casi ni suse Kristo jamam barasu ni. Sɔnɔ kɛɛ bo i di nasara, m má i atin na i di baka n bo i ma ɲɔɔ n dɛɛ suuwa na i wo Nyɛmɛ dika n nu ni.”

Nɔɔniɛ n bo bu fa maari Kristo jama n bo i wo Samirina ni

⁸ Na wɔ se m ka, “Kɛɛ kadasi fa ma merɛkɛ n bo i niɛ Kristo jama n bo i wo Samirina miɛ kpiri n nu ni, na a se bu ka, ‘Ahin nɔɔniɛ n fite mini bo m ti deke kɛɛ bumboori ni i awieeri ni, na m yo wuuri na ma tenje yiwee nu ni dɔ ɔ. ⁹ M si kabo am adi wahara agaya barasu, ni kabo am ti yaarifɔm ni, ama, am ti nenɲefɔm wɔ Nyɛmɛ dɔ. Na m si kabo minɛm kpɛ am nzukɔ ni, bo bu yo bu ɲu ka bu ti Yudaɲɔm, ama, bu ti má Yudaɲɔm ɲɲba, bu ti Sitana dɛɛ jama n wɔ. ¹⁰ Am dí wahara kisa, ama, má am soro sɛɛ. Am ti fɛn, Sitana wúra am nbem saraka na i yó am na i niɛ na am ɲɲ kekereke leburu. Ama, am su m ni nahɔɛ haari am bá wu, na m tó am ɲkato, yiri la ɲɔɔ bo i la má awieeri n a.’

¹¹ Sɔnɔ kɛɛ bo i koro ka i ti ahin jɔɛ n bu, i ti ye ni ka i mi so i sui na i ti kabo Awiewiɛ Casi ni suse Kristo jamam barasu ni. Sɔnɔ kɛɛ bo i di nasara ɲɲ má yiwee kpe nnyɔ su n kun.”

Nɔɔniɛ n bo bu fa maari Kristo jama n bo i wo Peregamon ni

¹² Na wɔ se m ka, “Kɛɛ kadasi fa ma merɛkɛ n bo i niɛ Kristo jama n bo i wo Peregamon miɛ kpiri n nu ni, na a se bu ka, ‘Ahin nɔɔniɛ n

fite mini bo m la takobe nana n do o. ¹³ M si deke bo am woori ni, am woobiri n ti Sitana femeya tanaabiri wo, ama, am toko su m ni nahore wo, am ayaki ma m yaradayo, haari ni sanja bo bu kuunri Antipasi bo i diiri m daani nahore su am mie n nu, deke bo Sitana wo ni. ¹⁴ Ama, m la jore nbem bo m fa jaraki am, am nbem bita Baalam kereewa atin n wo. Yiri yo kereeri Feme Balaki, ye i maari Yisarelifom yoori satie diiri tie nie, na ba yo sakaraya. ¹⁵ Am nbem gusu ti so o, bu su Nikolaitafom dee atin kereewa n su wo. ¹⁶ Nyini ti, am kaaki am wo, ma nyini, m ba am do kisa, na m fa takobe n bo i wo m noo nu kun lue ni minem bo bu yo so ni.

¹⁷ Sono kere bo i koro ka i ti ahin jore n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni. Sono kere bo i di nasara, m ma i mi diire n bo bu fere i ka *mana* * ni, na i wo fiewa nu ni. Na m kaaki ma i mi yabue fofoe be, ba kere duma fofore su, be koro si ma duma n bo i wo su ni, ma ka yiri n bo i de i ni si i a.”

Noanie n bo bu fa maari Kristo jama n bo i wo Tiyatira ni

¹⁸ Na wo se m ka, “Kere kadasi fa ma mereke n bo i nie Kristo jama n bo i wo Tiyatira mie kpiri n nu ni, na a se bu ka, ‘Ahin noanie n fite mini Nyeme Wa n do o, mini bo m nyumbaa je ka sin fofoe, na m jaa gbagbaa kere boro ka jawii dee su ni. ¹⁹ M si am sayoowam, m si kabo am la koro barasu, ni kabo am su m ni nahore su ni, ni amusui bo am su i ni, na m kaaki si kabo am la mindi, na m si kabo kisa am boro am nyi tara bumboori ni.

²⁰ Ama, jore bo m fa jaraki am la ka, am amo am noo ye am nie Yezebeli, bara n bo i yo i nu ka i ti Nyeme noanie kanfo ni. I kere m akoom wo na i daka bu, na bu suyo sakaraya, na i ma m minem di tie nie. ²¹ Ma se i ka i kaaki i wo na i yaki somaya ko ni, wo kete ka i kaaki ma. ²² Nyini ti, m ma i da tukpaki kekereke, na i ni minem bo bu yo sakaraya n di wahara agaya, nzen ba kaaki ma bu wo ayaki ma sam bo bu ni yiri yo bu ni. ²³ Na m kun i nbaam, na Kristo jama ase se n kere si ka, mini fiiti si deke bo i wo sono kere ahore su, ni i sunsunni nu. Na m fa sono kere sayoowa to i kaari.

²⁴ Ama, ambere Tiyatirafom nbem bo am aka, na am su ma i kereewa atin n su ni, ambere asonsom ma deke bo nbem fere i ka Sitana asiri nu sa bambaka ni. M suse am wo lee, m so ma am soori nonoori buka ma su. ²⁵ Ama, atin bo am bita i ni, am bita i kenken haari sanja bo m ba kaaki ba.

²⁶⁻²⁸ Sono kere bo i di nasara na i yo m sa koroowa ko juuri awieeri, m ma i yiko kabo m Si ama m yiko ni, na i nie daanfie daanfie kere su. Na i bita bu kekereke kabo nanjasi fa bulaari koroma tu bo i naanim barasu ni, na i fufu bu kabo bu fufu yakatise barasu ni. Na m ma i asaakojo.’

²⁹ Sono kere bo i koro ka i ti ahin jore n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni.”

3

Noanie n bo bu fa maari Kristo jama n bo i wo Saradisa ni

¹ Na wo se m ka, “Kere kadasi fa ma mereke n bo i nie Kristo jama n bo i wo Saradisa mie kpiri n nu ni, na a se bu ka, ‘Ahin noanie n fite mini bo m la Nyeme awiewie busu nso n na m bita asarambaam nso m saa nu do o. M si am sayoowam, am wo ka am la ngoo, ama, am ti fuinm wo. ² Nyini ti, am yasu na am bita deke n bo am toko la i n kenken, ma nyini, i wu wo.

Dama ma ɲu ka am sayoowam n akpie su Nyeme do. ³ Am tenge su, kabo am yo tiiri Nyeme noanie n na am deeri i ni, am kaaki am wo na am bita i, nzen am ayasu ma, am si má sanɲa bo m bá ni, dama m bá fura am nu ka awiefɔ deɛ su wo.

⁴ Ama, m la mine nbem bo bu wo Saradisa Kristo jama n nu, bo ba saaki má bu sutura ayo má bu fin, bu sayoowam nu. Bere bá wura tanlee fofoe na m ni bere sanɲa nati a, dama bu ti ye ni so o. ⁵ Sono kere bo i di nasara, i wúra nyini tanlee fofoe n be so o. Na m yí má i mi duma fite má ɲɔɔ kadasi n nu, ama, m bá jina m Si ni i merékem nyunu, na m sé bu ka i ti m deɛ sono o. ⁶ Sono kere bo i koro ka i ti ahin jɔre n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni."

Nɔanie n bo bu fa maari Kristo jama n bo i wo Filadeleftiya ni

⁷ Na wo se m ka, "Kere kadasi fa ma meréke n bo i nie Kristo jama n bo i wo Filadeleftiya mie kpiri n nu ni, na a se bu ka, 'Ahin noanie n fite mini bo m ti casi na m ti nahorefo, na m bita Feme Davidi kadombaa n bo i kere ka m la i deɛ yiko n be wo, na nzen m tekeeri ano, be koro tu má i, na nzen m tuuri i gusu, be koro teke má i. ⁸ M si am sayoowam, am nie, ma teke ano ama am bo be wo má bere bo i koro tu i. M si ka am la má fanɲa agaya, ama, haari ni nyini mmoo, am fite má m sin, am toko bita m noanie n ni nahore wo. ⁹ Am yaki bo bu su Sitana n na bu yo bu ɲu ka bu ti Yudafoɲm ni, bu ti korefoɲm wo, bu ti má Yudafoɲm ɲgba. M má bu ba kutu am nyunu na bu si ka m koro am. ¹⁰ Am ade m noanie ni, na am amindi n deɛ ti, m yí am fite kekereke n bo Nyeme bá fa yo durunya n nufom kere na i nie ni.

¹¹ M cé má, m káaki ba kisa. Atin n bo am bita i ni, am bita i kenken na má be fin am ɲkato ni. ¹² Sono kere bo i di nasara, m fá i yo jantaraká Nyeme Sereebiri Awuru n nu na i wó nu do sanɲa kere. Na m kéré Nyeme duma mata i, na m kéré Nyeme mie n duma, mie n bo i fite angoro Nyeme do na bu fere i ka Yerusalem fofore, na m káaki kere m duma fofore n gusu mata i mi ɲu.' ¹³ Sono kere bo i koro ka i ti ahin jɔre n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni."

Nɔanie n bo bu fa maari Kristo jama n bo i wo Lawodikaya ni

¹⁴ Na wo se m ka, "Kere kadasi fa ma meréke n bo i nie Kristo jama n bo i wo Lawodikaya mie kpiri n nu ni, na a se bu ka, 'Ahin noanie n fite mini bo m ti Ami na m la dabuɲu, na m di daani ni nahore su n do o. Mini ni Nyeme du mo yo woori bere a, ye ya yiiri deke n kere a. ¹⁵ M si am sayoowam, am ti má niniki, am kaaki ti má kekere, nzen má am ti niniki wara kekere, má m koro. ¹⁶ Ama, am ti boboroki n deɛ ti, m puuti am m noo nu butu. ¹⁷ Am ɲa am ti nenɲefom wo, deke be kpie má am su, ama, am si má ka am la anjuno, na am si má ka am ti yaarifom, na am kaaki si má ka am ti anyinsinm, na am kaaki si má ka am nati am ɲunie ɲgbeen wo. ¹⁸ Nyini ti, m koro ka m tu am fo, na am bra m do ba to sika kpa bo ba fa awura sin nu na wo fite casi ni, adena am yo nenɲefom nahore su, na am ba to sutura fofoe m do, na am fa kata am ɲu, na má mine ɲu ka am nati am ɲunie ɲgbeen na i la nyinse. Na am ba to anyumaa ayiri m do, na am fa wura am nyumaa nu na am koro ɲu asi nyunyumi. ¹⁹ Bo m koro bu ni, bere ye m jaraki bu na m cin bu sui a, nyini ti, am boro am nyi na am kaaki am wo. ²⁰ Am ti fen, m jina soo ano n sin subobo, sono kere bo i

ti m konvi nga na i tekeeri ano ni, m bá wura i mi do, na m ni yiri sánnga di diire.

²¹ Sóno kere bo i di nasara, m má i atin na i bá tana m bi m femeya bie n su, kabo ma di nasara na m ni m Si sannga tana i femeya bie n su ni.'

²² Sóno kere bo i koro ka i ti ahin jore n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni."

4

Kabo bu su Nyeme i femeya n nu barasu ni

¹ Nyini sin, na wo yo m ka alele dee su, na ma nu ka ano be ateke angoro. Na ma ti akonvi nga ka awie dee su sujoko m do, i ti akonvi n bo i du mo joko ni m do n wo. I nga, "Fun bra angoro fen, na m kere u sam bo bu bá yo ahin sin."

² Jina nu n bere na Awiewie Casi n aba awura m nu na ma nu ka femeya bie wo angoro, be tana su. ³ Bo i tana femeya bie n su je piepieu kabo cenceri nbem je barasu wo, nbem je fofoe na nbem je kokore, na i femeya bie ni, deke be je piepieu angoro kabo nzue ba muna na ayi kpie nu ni. ⁴ Femeya bie aburanyo ni nna nbem taka bara ye i femeya bie ni, na nkpienkpienm aburanyo ni nna tana biem su, bu wura tanlee fofoen na bu butu sika kere. ⁵ Na femeya bie ni sukpese ka nzue dee su, na i sutientien, na i suyo nanmie. Fitana nso taka femeya bie n nyunu wo je su, bere la Nyeme awiewie busu nsom ni. ⁶ Deke be gusu da femeya bie n nyunu ka nzue bambaka dee su, i nyunu da cain ka nienu wo.

Deke ngwofe nna nbem gusu abara aye femeya bie ni, bu la anyumbaa beberebe, bu nyunu ni bu sin n kere. ⁷ Ciciri su dee n ti ka jara a, nnyo su n ti ka toora, nsan su n nyunuawa ti ka adamande wo, na nna su n ti ka kajiri bo i sutu landi. ⁸ Bu kun kun kere la lanjpete nsen nsen wo, bu la anyumbaam bu juniembaa nu, ni bu njunie kere su. Na bu sudi jue kongue ni wiesu kere, ka,

"Casi, casi, casi la ya Mi Nyeme Feme Kpiri,

i yo woori bere, na i toko wo bere, na i bá wo bere sannga kere ni."

⁹ NZen bu nya sudi jue na bu fa kansi, ni jirima, ni anse ma yiri n bo i tana femeya bie n su ni, na i wo bere sannga bo i la má awieeri ni, ¹⁰ nyini sannga, a nu ka nkpienkpienm aburanyo ni nna n sukutu i nyunu, na bu su i, yiri bo i wo bere na i la má awieeri na i tana femeya bie n su ni. Na bu yi bu kere, sufa se femeya bie n nyunu, na bu sudi jue, ka,

¹¹ "Ya Micera ni ya Nyeme, woro ti ye ni ka
a de kansi a, ni jirima, ni yiko.

Dama woro yiiri deke n kere a,

u koroyanu ye a maari deke n kere la ngwo a."

5

Kadasi n ni Bombaa n jore

¹ Na ma nu ka kadasi nyanyaawa be wo yiri n bo i tana femeya bie n su n saa fomboro n nu, kerewa wo i kunnu ni i sin kere su, ba fa wie mene amie amata i busu nso. ² Na ma nu Nyeme mereke fanjgafu be ka i subo ndoori fanga su ka, "Nma ti ye ni bo i koro cin nmanji wie mene n na i teke kadasi n a?"

³ Ama, angoro, ni asienngu, ni bo bu wo asien bu, be awo má bere bo i koro teke kadasi ni, na a ba kan ka i koro nie nu. ⁴ Be awo má bere bo i

ti ye ni bo i koro teke kadasi ni, na a ba kan ka i koro niε nu n dεε ti, na ma sun ni nyunvuin ηgba. ⁵ Na nkpienkpienm n nu kun, ase m ka, “Má a sun. Niε fen, Fεmε Davidi anuma kpiri ni, bo bu fere i ka Yudafom busu nu jara n adi nasara, i koro cin ηmanji wiε mεne nso n na i teke kadasi ni.”

⁶ Na ma ηu Bombaa be, i ti ka ba kpιe i kōm wō, i jina femeya biε n afiεn. Deke ηgōōfō nnam, ni nkpienkpienm n abara aye i. I la mbie nso wō, i nyumbaa gusu ti nso wō. Bere la Nyeme awiewie busu nsom bo wō sunma bu durunya n kere nu ni. ⁷ Na wō kō yiri n bo i tana femeya biε n su n dō, na wō de kadasi n afite i saa fōmbōrō nu. ⁸ I kō deeri kadasi n ni, na deke ηgōōfō nnam, ni nkpienkpienm aburanyō ni nnam n akutu i nyunu. Bu kere la biεku, na bu kere bita sika ayaba bo wō yi ni ayiri kunkuunwa nvanvani ηgumi wō. Ayiri kunkuunwa nvanvani n ti nyemesere bo Nyeme dεε mine sere i wō. ⁹ Na ba di jue fōfōre ama yiri Bombaa n ka, “Wōrō ti ye ni ka a de kadasi ni,
na a ηmanji wiε mεne n a,

dama wōrō ye bu kpιeeri u kōm, ye a fa u mbunja ade minem tii aji a.

Adamande kere, ni daanfie kere, ni aniem kere,
ni asien barasu barasu kere bo bu wo durunya n nu ni,
bu nbem ayo Nyeme dεε minem.

¹⁰ A fa bu ayo u femeya n nu minem,
na bu yo u sayoowa dōηguyofom,
na bu niε durunya n kere su.”

¹¹ Na ma niε aηu Nyeme merεkem beberebe, akpii akpii buru nō, ka, ba bara aye femeya biε ni, ni deke ηgōōfō nnam, ni nkpienkpienm ni. Na ma ti ka ¹² ba ye bu konvi su sudi jue, ka,
“Bombaa n bo bu yo kpιeeri i kōm ni,
yiri ti ye ni ka i de yiko a, ni nenje, ni alecira, ni fanga,
ni jirima, ni kpiri, ni kansi a.”

¹³ Na ma ti ka deke kere bo bu wo aηgoro, ni asienηgu, ni bo bu wo asien bu, ni bo bu wo nzue nu, ni deke kere bo Nyeme ayi bu, ka bu sudi jue, ka,

“Yiri n bo i tana femeya biε n su n ni Bombaa ni,
bere ti ye ni ka bu de kansi a, ni jirima, ni kpiri, ni yiko,
sanja kere sanja.”

¹⁴ Na deke ηgōōfō nnam n ase ka, “Ami.”

Na nkpienkpienm n akutu asu Nyeme ni Bombaa ni.

6

Wiε mεne bo bu fa mata kadasi n jōre

¹ Na ma ηu ka Bombaa n aba acin aηmanji wiε mεne nso n bo bu fa mataari kadasi n nu kun. Na ma ti deke ηgōōfō nnam n nu kun konvi ηga, kabo nzue tientien barasu ni, ka, “Fite.”

² M niεeri na ma ηu ka, kpōηgō fofoe lεε. Bo i fun i n bita taa ni awie, na ba butu i femeya kere, na wō kō ka luekunfō na i di nasara.

³ Na Bombaa n acin aηmanji wiε mεne nnyo su ni, na ma ti ka deke ηgōōfō nnyo su ni suse ka, “Fite.”

⁴ Na kpōηgō kōkōre afite, na ba ma i funfō n takobe tintiin, na ba ma i yiko ka i yi tanalaifite fite durunya n nu, na minem kun bu beηgum.

⁵ Na Bombaa n acin aηmanji wiε mεne nsan su ni, na ma ti ka deke ηgōōfō nsan su n suse ka, “Fite.”

M niɛeri na ma ŋu ka, kpɔŋɔ biri lɛɛ. I funfo n bita deke bo bu bita sunsun diire ni i saa nu. ⁶ Na ma ti akonvi be ŋga deke ŋɔɔfo nnam n nu, i ŋa, “Ŋgani ayaba ŋgboroko kun ti jumayofɔ lekun ŋkatɔ. Na abuwe ayaba ŋgboroko nsan ti jumayofɔ lekun ŋkatɔ. Ama, má am saaki ŋguin ni nzan ni.”

⁷ Na Bombaa n acin anmanɔi wie mɛnɛ nna su ni, na ma ti ka deke ŋɔɔfo nna su n suse ka, “Fite.”

⁸ M niɛeri na ma ŋu kpɔŋɔ nzuin faa, i funfo n duma la Yiwee, na bo bu fere i ka Yiweefɔm Woobiri n gusu su i su. Na Nyɛmɛ ama bu durunya kpaaki nu nna buekun yiko ka bu fa lue, ni ahɔɛ, ni tukpaki, ni boro nengɔɔre tiem, na bu kun bu.

⁹ Na Bombaa n acin anmanɔi wie mɛnɛ nnu su ni, na ma ŋu minem awiewie Mikun yoowa yoobiri n bu, bere la minem bo bu yo kuunri bu fa ko bu Nyɛmɛ jɔre kaanwa, ni bu daani diiwa n dɛɛ ti. ¹⁰ Na bu sutien faŋga su ka, “Ya Mi Nyɛmɛ Fɛmɛ casi, nahɔrefo, cɛɛn nzu ye a dí minem bo bu yo kuunri ya n jɔre na a cín bu sui ma ya?”

¹¹ Na Nyɛmɛ awura bu kun kun kɛre sutura fofoe, na wɔ se bu ka, “Am yi am ŋumi kaan ka, na bu bá kun am beŋgu akɔm, ni am beŋgu Kristofɔm kɛre ko wie ka, kabo bu yo kuunri am barasu ni, na m dí bu jɔre.”

¹² Na ma ŋu ka Bombaa n acin anmanɔi wie mɛnɛ nsen su ni, na asien akpisi faŋga su, na wie akaaki biri didiki ka nambiri ŋuma, na sara n akaaki kɔkɔre ka mbunja dɛɛ su. ¹³ Na asarambaam afite angoro ati atɔɔ kabo anjuma ba kpisi damba baka na i poorim titi tɔɔ barasu ni. ¹⁴ Na angoro n kɛre anyanya kabo bu nyanya bie ni, na wɔ mini, na bukam, ni nzue nu lui bambakam kere ayasu bu tanaabiri. ¹⁵ Na durunya n nu nɛmɛm, ni tereterefɔm, ni soja nkpienkpienm, ni nengefɔm, ni nfaŋga-fɔm, ni akɔm, ni sɔnɔ kɛre akɔ afie yabue ŋgbingbirim buem nu, ni yabue bambakam bu, bukam su. ¹⁶ Na ba se ka, “Má bukam bereki go ya ŋu, na má yabue ŋgbingbirim kata ya ŋu, má i ti ye, adena má sɔnɔ n bo i tana femeya bie n su n ŋu ya, na má Bombaa n gusu cin ya sui. ¹⁷ Dama cɛɛn bo Nyɛmɛ ni Bombaa ni cin sɔnɔ kɛre sui n aju, ye ŋma koro jina bu nyunu a?”

7

Yisarelifɔm minɛ akpii yaa ni akpii aburana ni nna n jɔre

¹ Nyini sin na ma ŋu merɛkem nna, ka bu jina durunya n awɔre nna n kɛre nu na bu kanda anjuma, na má i kpie asien n su, ni tieku nu, wara i kpie go baka su. ² Na ma ŋu merɛke be ka i fite wie afiiri, i bita deke be bo Nyɛmɛ bo i wo bere sangɔ kɛre n fa se i minem nyaari. Na wɔ tien faŋga su aɔɔɔ merɛke nnam bo Nyɛmɛ ama bu yiko ka bu saaki asien n ni tieku n do, ³ na wɔ se bu ka, “Má am se ka am saaki asien n ni tieku n ni bakam ni, má ka ya ba ase Nyɛmɛ minem kɛre ŋuma su nyaari awie ka.”

⁴ Na wɔ kan minem bo ba se bu nyaari bu ŋuma su ni, na wɔ kɛre m bu nɔ, bu kɛre ko yasuri mine akpii yaa ni akpii aburana ni nna a, bu fite Yisarelifɔm dɛɛ busu n kɛre nu wɔ.

⁵ Yuda dɛɛ busu nufɔm ti mine akpii buru ni akpii nnyɔ bo ba se bu nyaari, na Ruben dɛɛ busu nufɔm ti mine akpii buru ni akpii nnyɔ, na Gadi dɛɛ busu nufɔm ti mine akpii buru ni akpii nnyɔ. ⁶ Na Aseri dɛɛ busu nufɔm ti mine akpii buru ni akpii nnyɔ, na Nafatali dɛɛ busu nufɔm

ti mine akpii buru ni akpii nnyo, na Manase deɛ busu nufom ti mine akpii buru ni akpii nnyo. ⁷ Na Simeyon deɛ busu nufom ti mine akpii buru ni akpii nnyo, na Levi deɛ busu nufom ti mine akpii buru ni akpii nnyo. Na Izaki deɛ busu nufom ti akpii buru ni akpii nnyo. ⁸ Na Zabulon deɛ busu nufom ti mine akpii buru ni akpii nnyo, na Yosefu deɛ busu nufom ti mine akpii buru ni akpii nnyo, na Benjamin deɛ busu nufom ti mine akpii buru ni akpii nnyo.

Jama beberebe bo ba nya tiide n jɔre

⁹ Nyini sin na ma ŋu jama beberebe, bu la má nɔ, bu fite durunya asien n kere su, ni adamande kere nu, ni durunya daanfɛ n kere nu, ni durunya aniem kere nu, ka, bu jina yiri n bo i tana femeya bie n su n ni Bombaa n nyunu. Bu wura tanlɛ fofoe yorom, bu bita kpakpa nyawam bu saa nu. ¹⁰ Na ba bo afere faŋga su ase ka,

“Nyeme bo i tana femeya bie n su n ni Bombaa n ama ya nya ya tii a.”

¹¹ Na merekem n kere ajina abara aye femeya bie, ni nkpienkpienm, ni deke ŋɔɔfo nnam ni, na ba dada bu nyunu su asienɔ Nyeme bo i tana femeya bie n su n nyunu, na ba su i. ¹² Na bu suse ka,
“Ami. Kansi, ni kpiri, ni alecira,
ni anse, ni jirima,
ni yiko, ni faŋga
ti ya Nyeme deɛ wɔ saŋga kere saŋga. Ami.”

¹³ Na nkpienkpienm n nu kun abisa m ka, “Ŋmam ye a ŋu ka bu wura tanlɛ fofoe yorom n a, ye bu fite ni wɔ?”

¹⁴ Na ma se i ka, “M mibiɛ, wɔɔ si a, mini si má.” Na wɔ se m ka,
“Bere ti minem bo ba fite anyumboro kekereke nu n a, bere ye ba ŋmisi bu sutura Bombaa ni mbunja n nu ayo bu fofoe n a.

¹⁵ Nyini deɛ ti, ye bu jina Nyeme Serebiri Awuru n nu,
i femeya bie n nyunu ye bu su i koŋgue ni wiesu n a,
na Nyeme bo i tana i femeya bie n su n wó bu do na i yó bu kanda.

¹⁶ Ahɔɛ ni nzuehɔɛ tí má bu kun cɛen be,
wie bó má bu,
na i kekere gusu wúra má bu.

¹⁷ Dama Bombaa n bo i wo femeya bie n afien ni yó bu sasafɔ a,
na yiri fá bu ko bura nzue bo i tie
na i ma ŋɔɔ bo i la má awieeri n a.

Na Nyeme núnuka bu nyunvuin kere bu nyunu.”

8

Wie mene nso su n jɔre

¹ Saŋga bo Bombaa n cin ŋmangiiri wie mene nso su n ni, na deke kere ato amuna angoro n nu, haari miɛ aburasan.

² Na ma ŋu mereke nsom bo bu jina Nyeme nyunu ni, na ba fa awie fitaawa nso ama bu.

³ Na ma ŋu mereke nyiŋga ka i bita sika ayaba, bo bu fa ayiri kunkuunwa nvanvani go nu na bu kunkun i ni, na wɔ ko ajina Mikun n yoowa yoobiri n bi. Na ba ma i ayiri kunkuunwa nvanvani beberebe ka i fa buka Nyeme minem nyemesere su, na i fa kunkun Mikun yoowa yoobiri n bo bu fa sika mata su, na i wo femeya bie n nyunu ni. ⁴ Na ayiri kunkuunwa nvanvani n ŋmisini n ni Nyeme minem nyemesere n ayasu mereke n saa nu afun

ako Nyeme nyunu. ⁵ Na mereke n ayi sin Mikun n yoowa yoobiri n su, na wo fa awura ayaba n nu, na wo yi, na wo fa atu asandi durunya n nu. Na nzue sukpara sutientien, na i sujeje, na i sukpekpese, na asien n akpisi.

Awie nso n bo bu kan i n jore

⁶ Na mereke nsom n bo bu bita awie fitaawam n asese bu nju su ka bu kan awiem ni.

⁷ Na mereke n bo i du mo n akan i dee awie ni. Na nzue yabue, ni sin, sanja ni mbunja ato durunya n nu, na sin aje durunya n kpaaki nu nsan buekun, ni bakam kere bo bu wo durunya n nu kpaaki nu nsan buekun, ni wura mone kere.

⁸ Na mereke n bo i to su nnyo su n akan i awie ni, na deke be, i ti ka buka bambaka wo, ye wo so sin su a, na ba fa i atu tieku n nu, na tieku n kpaaki nu nsan buekun akaaki mbunja. ⁹ Na deke ngwofom kere bo bu wo tieku n nu kpaaki nu nsan buekun awu, na lee bambakam bo bu wo tieku n nu kpaaki nu nsan buekun gusu asaaki.

¹⁰ Na mereke n bo i to su nsan su n akan i awie ni, na asarambaa bambaka bo i je sin ka wura sin afite angoro aba ato kunmam ni nzuetim bo bu wo durunya n nu kpaaki nu nsan buekun nu. ¹¹ Asarambaa n duma la Wiwi, na nzue n bo i wo durunya n nu n kpaaki nu nsan akaaki wiwi, nzue n ti wiwi n dee ti, na minem doggu bo bu nuuri nyini nzue n awu.

¹² Na mereke n bo i to su nna su n akan i awie ni, na deke be aba ato wie, ni sara, ni asarambaam kere kpaaki nu nsan buekun su asaaki bu, na ba kaaki biri tuum. Wiesu ni kongue n kpaaki nu nsan buekun, ayo ma wein.

¹³ Na ma nie, na ma nju ka kajiri be sulaandi tu angoro, na ma ti kabo i tien barasu ni, i nja, "O! keto, keto, keto wo sono kere bo i wo durunya n nu n nju, kabo mereke nsanm bo ba ka n koro ka bu kan bu awiem ni, na bu tiiri."

9

¹ Na mereke nnu su n akan i awie ni, na ma nju ka asarambaa be afite angoro n aba ato asienju. Na ba ma i kadombaa ka i teke kunma n bo i ko ngongu na i la ma awieeri ni. ² Na wo teke nyini kunma n ni. I tekeeri i ni, na nmisini afite kunma n nu, i ti ka sin bambaka torowa nmisini wo. Na nmisini n bo i fite kunma n nu n ama wie ni angoro n kere asi biri didiki. ³ Na lalom afite nmisini n nu asandi ade asien n su, na Nyeme ama bu yiko, ka bundaanim dee su. ⁴ Na wo se bu ka ma bu di wura ni diire mbaa wara bakam, ama, bu kan minem n bo bu la ma Nyeme anyari seewa bu nju su ni. ⁵ Wo ma ma bu yiko ka bu kun minem wo, ama, bu kere bu wahara sara nnu. Wahara ni ti kabo bundaani kan sono na i yo ya n wo. ⁶ Nyini sanja ni, adamande sun kpini yiwee busu na bu wu, ama, bu nya ma i.

⁷ Lalom n ti ka kongom bo ba cici bu ka bu ko lue dee su wo, deke be wo bu tii su, ka sika kere dee su, na bu nyunuawa ti ka adamande dee su. ⁸ Bu ndore ti tintiin kabo bara bo i la tiinjie tintiin ti n wo, na bu jee ti ka jara dee. ⁹ Deke be kata bu hoe su peperepe ka bulaari dee su, na bu lanjpetem suyo nanmie kabo kongom ni bu torokum n beberebe sunmati ko lue na bu yo nanmie n wo. ¹⁰ Bu lo, bo bu fa kan n ti ka bundaani dee su wo. Bu la yiko bu lo n nu, bo bu fa kere mine wahara sara nnu. ¹¹ Bu feme n la mereke n bo i nie kunma ngongu n bo i la ma awieeri n su ni. Hiburu

anɛ nu bu fere i ka, Abadon, ye Giriki anɛ nu bu fere i ka, Apolin, i bu la ka, saakifo.

¹² Tɔ. Ciciri su dɛɛ ahoresaaki n asin, nnyɔ wo sin suba.

¹³ Na mereke nsen su n akan i awie n na ma ti akonvi be nga ka i fite Mikun yoowa yoobiri n bue nna n kere, ba fa sika amata su na i wo Nyeme nyunu ni. ¹⁴ Na akonvi n ajojo mereke nsen su n bo i bita awie n do, i na, “Ko mereke nnam bo bu wo kunma kpiri n bo bu fere i ka, Yufarati n do, na a nyanɔi bu ji.”

¹⁵ Na wo nyanɔi mereke nnam bo ba du mo akpa bu nu anminda nyini cɛɛn n gbingbin na bu kun mine bo bu wo durunya n nu kpaaki nu nsan bukun ni. ¹⁶ Na ma ti kabo bu sojam bo bu fun kponɔɔ no ti, bu no ko yasuuri akpii akpii busu yaa nnyɔ o.

¹⁷ Deke n bo i yo m ka alele ni, m nuuri kponɔɔm, ni bo bu fun bu ni, ka bulaari peperepe be kata bu hoe su, nbem boro kokore ka sin wo, na nbem ti biri ka bura nzue, na nbem ti ka ndere nzue, kponɔɔm tii dika ti ka jara tii wo. Na sin, ni nmisini, ni ferewita sufite bu noo nu. ¹⁸ Ahin deke kekereke nsanm ni kuunri mine n bo bu wo durunya n nu kpaaki nu nsan bukun n a, bere la sin, ni nmisini, ni ferewita n bo i fite bu noo nu ni. ¹⁹ Dama kponɔɔm n yiko kere wo bu noo, ni bu lom nu wo. Bu lom ti ka woom wo, bu la atiiim, ye bu fa kere mine wahara a.

²⁰ Minem bo ahin wahara n akun ma bu na bu kaari ni, ba kaaki ma bu wo, ba yaki ma amɔɛm su, ni dekem bo ba fa sikam, ni jetem, ni jawiim, ni yabuɛm, ni bakam ayo bu ka bu amɔɛm, nyini dekem koro nu ma asi, na bu koro ti ma asui, na bu koro nati ma ni, ba yaki ma bu su. ²¹ Ba kaaki ma bu wo fa ko kabo bu kun minem ni, ni kabo bu di ayiri ni, ni kabo bu yo sakaraya ni, ni kabo bu wo awie ni.

10

Mereke ni kadasi kaan n jore

¹ Na ma nu mereke fanɔafo be bekun ka i fite angoro sujura ba. Na yinyingu akata i nu ka tani dɛɛ su. Na ayi bo i kpie angoro n abara aye i tii, i nyunu ti ka wie wo, na i jaam ti ka sin taferema. ² I bita kadasi kaan be i saa nu, i ti tekeewa a. Na wo fa i jaa fomboro atien tieku n su, na wo fa i jaa bie atien asien n su. ³ Na wo tien fanɔa su kabo jara nuundi ni, na nzue tienwa nso n abo i nu. ⁴ Nzue n tienri kpe nso ni, ma m na m kere wo, na ma ti akonvi be nga angoro. I na, “Ma a kere jooowa n bo nzue tienwa nso n ase ni. Ma a kan kere be.”

⁵ Na mereke n bo m nuuri i ka i jina tieku n ni asien n su, n aye i saa fomboro su akere angoro, ⁶ na wo tan Nyeme bo i la ngoo na i wo bere sangga kere ni, yiri bo i yiiri angoro, ni asien, ni tieku, ni deke kere bo bu wo nu ni, na wo se ka, “Nyeme nminda ma kun. ⁷ Ama, sangga n bo mereke nso su n ba sukan i awie n ye Nyeme asiri nu jore ni yo yuiwa, kabo i yo seeri i akoom bo bu ti i noanie kanfom ni.”

⁸ Na akonvi n bo i jooori m do angoro n nu n ajojo m do bekun, i na, “Ko de kadasi kaan n bo wo teke na i wo mereke n bo i jina tieku n ni asien n su n saa nu.”

⁹ Na ma ko mereke n do, na ma se i ka, “Fa kadasi kaan n ma m.” Na wo se m ka, “De na a kpeɛɛ i, i yo u noo nu mamari ka wie wo, ama, i to u kunnu, i yo wiwi wo.”

¹⁰ Na ma de kadasi kaan n mereke n do, na ma kpese i. I ti mamari m nɔɔ nu ka wie wo, m miiri na wo yo wiwi m kunnu. ¹¹ Na wo se m ka, “Kaaki jɔɔ sam bo Nyeme ase ka bu ba tu mine barasu dongu, ni daanfie barasu dongu, ni nfemem dongu.”

11

Daanidifo nnyom jɔre

¹ Na ba fa deke be bo bu bita sunsun ama m, i ti ka kpama a, na ba se m ka, “Ko sunsun Nyeme Sereebiri Awuru n ni Mikun n yoowa yobiri ni, na a kan minem bo bu wo nu do su Nyeme ni. ² Ama, ma a sunsun awore n bo i bara yeri Nyeme Sereebiri Awuru n kere na ba ta kobe abara aye i n buka su, dama ba fa nyini fofoe n ama minem bo bu su ma Nyeme ni, na bu nati saaki Nyeme mie casi ni, sara aburana ni nnyo afien. ³ M sunma m daanidifo nnyom ni, na bu fa botɔ kara ka tani dee su, bo i kere ka bu wo ahoresaaki nu, na bu kan m nɔanie n kere minem, nyini cɛen akpii kun ni yaa nnyo ni aburasen n nu.”

⁴ Daanidifo nnyom ni, bere la nguinmbaa baka nnyom, ni fitana takaa-biri nnyom bo bu jina Nyeme bo i dee la asien nyunu ni. ⁵ Sɔnɔ kere bo i koro ka i yo bu sa be, sin fite bu nɔɔ nu ba yara bu kpɔfɔm. Nyini ti, nzen be na i yo bu sa be, kabo i ti ye ni ka i wu lee. ⁶ Bu la yiko bo bu koro kanda nzuem angoro na ma nzuem tɔ, sanɔa bo bu wo Nyeme nɔanie n kan su ni, na bu la yiko bo bu koro ma nzuem kaaki mbunja, na bu kaaki la yiko bo bu koro ma alɔɔba tɔ durunya n nu, sanɔa kere bo bu koro.

⁷ Nzen bu ba diiri bu daani kaanri Nyeme jɔre n wieeri, na boro nenɔɔre n bo i fite kunma n bo i ko ngonɔ na i la ma awieeri ni kun lue ni bere, na i kɔnma bu, na i kɔn bu. ⁸ Na bu fuin ka da mie bambaka n atin afien. Nyini mie n nufɔm sayoowa ti tie wo, nyini ti ye bu fa bu sunsun Sodomfɔm wara Ijipitifɔm n a. Nyini mie n nu ye minem kpamaari bu Mibie baka jaanu n su n a. ⁹ Bu fuin ni ka da bere lesan ni wie sin, na minem, ni daanfien, ni aniem, ni asienm kere bo bu wo durunya n nu, bu nu nbem sin na bu nie bu, na bu du ma su na be se bu. ¹⁰ Bu yiwee n dee ti, durunya n nufɔm siri taari, na bu go agore, na bu ce bu bengum acerim, dama nyini Nyeme nɔanie kanfo nnyom bo ba wu n akere bu kere wuwuruwa.

¹¹ Lesan ni wie sin n dee sin, na Nyeme ayi i nɔmi bo i ma ngɔɔ n ago bu nu, na ba yasu ajina, na sere ati sɔnɔ kere bo bu nuuri bu ni. ¹² Na bere Nyeme nɔanie kanfo nnyom n ati akonvi bambaka be ka i jɔɔ angoro nu, i na, “Am fun bra angoro fen.” Na ba wura yinyingɔ n nu ako angoro, bu kpɔfɔm jina sunie bu. ¹³ Jina n nu bere na asien akpisi fanga su, na mie bambaka n kpaaki nu buru buekun afufu, na wo kun mine akpii nso, na sere ati minem bo bu kaari ni, na bu sukansi Nyeme bo i wo angoro ni.

¹⁴ Tɔ. Na nnyo su dee ahoresaaki n gusu asin, bo i tɔ su nsan su ni suba kisa.

Awie nso su n jɔre

¹⁵ Na mereke nso su n akan i awie ni, na akonvim atien fanga su angoro n nu, bu na,

“Durunya n nu femeya kere fanga ti ya Micera
ni Kristo Tiidefo n dee wo.

I dee femeya ni wo bere sanɔa kere a.”

¹⁶ Na nkpienkpien aburanyo ni nnam n bo bu tana bu femeya biem su Nyeme nyunu n ada bu nyunu su asiengu na bu subo tuntun Nyeme. ¹⁷ Bu na,

“Ya Mi Nyeme Kpiri bo a la ma anusu ni,
woro bo a wo bere na a yo woori bere ni,
ya da u asi, dama a de u yiko bambaka n
ye a sunie durunya n kere su a.

¹⁸ Durunya n nufom kere afa yaa,
ye sangha aju bo u gusu ahore ayasu,
na a di minem bo ba wu n jore.

Na sangha n akaaki aju bo a to u akoom nkato,
bere bo bu ti Nyeme noanie kanfom ni,
ni u minem kere bo bu su u ni,
nfanngafom ni tarakam kere.

Ye sangha n akaaki aju bo a saaki bere n bo bu saaki durunya ni.”

¹⁹ Na Nyeme Sereebiri Awuru n bo i wo angoro n ateke, na ma nu Nyeme alaka n bo i kereeri ka wo fa sese su adi i di n ka i wo do, na nzue sukpepe na i sutientien, na i suyo nanmie, na asien sukpisi, na nzue yabue ngbingbiri sutoto.

12

Bara ni Sitana n dee jore

¹ Na alekutura sa be ayo angoro do. Bara be awo do, wo fa wie akara ka tani dee su, na sara gusu awo i jaa bu, asarambaa buru ni nnyo butu i tii ka femeya kere dee su. ² I bita akunnu, na baawu yaari afa i na i subo awie.

³ Na alekutura sa be gusu ayo angoro do, m nuuri woo tie kokore bambaka be, i tii ti nso wo, na i la mbie buru, femeya kere nso butu atii nso kun kun n kere su. ⁴ Na wo fa i lo abaandi asarambaam kpaaki nu nsan buekun aji asiengu. Na wo ba ajina bara n nyunu, adena i wuuri baa n na i kaba fa baa n mi. ⁵ Na bara n awu baabieso, bo i ba nie daanfie daanfiam kere su, na i bita bu kekereke kabo nanjasi fa bulaari koroma tu bo i naanim barasu ni. Na ba fa baa n ako yiri Nyeme ni, i femeya tanaabiri n do. ⁶ Na bara n anmati ako boro kpantain awore be nu, bo Nyeme asese i su ama i na bu sunie i dika haari ko ju een akpii kun ni yaa nnyo ni aburasen.

⁷ To, na Nyeme mereke Mikali ni i jamam, ni woo tie ni i dee jamam sukun lue ni bu bengu angoro. ⁸⁻⁹ Ama, na Mikali ni i dee jamam n akunma woo tie n ni i dee jamam ni, na ba fon bu afite angoro, ba nya ma woobiri do kun. Na ba fa woo tie bambaka n ni i dee jamam n kere aji asiengu. Yiri ti dada dee woo tie n a, yiri la Sitana, bu kaaki fere i ka Dadakafu, yiri dadaka durunya n nufom kere n a.

¹⁰ Na ma ti akonvi bambaka be nga ka i sutien fanga su angoro. I na, “Kisa, ya nu kabo ya Nyeme n la fanga na i de i minem tii ji,
na i di i femeya ni.

Kisa, ye Kristo Tiidefo n akere i yiko a,
dama ba fon ayi Sitana angoro aji durunya n nu fen,
yiri bo i ti saakifo na i jina Nyeme nyunu
na i jaraaki ya ninbaam kongue ni wiesu ni.

¹¹ Bombaa n dee mbunja, ni bu daani diiwa

ye bu fa kunmaari i a,
 ba soro má bu yiwee,
 bu soroori su wɔ, ka bu wu.
¹² Nyini ti, angoro ni ambere kere
 bo am wo angoro ni,
 am ma am ahore jo,
 dama Sitana la má am fanja kun.
 Ama, ahoresaaki bá tɔ asien n ni tieku n su,
 dama Sitana ajura am do.
 Yaa ti i agaya,
 dama i si ka i sanja sunnu má kun.”

¹³ Sanja bo woo tie n nju ka ba yi i angoro aji asiengu ni, na wɔ nya nmati afɔn bara n bo i wuuri baabiesɔ n ka i tara i. ¹⁴ Ama, na Nyeme ama bara n kajiri bambaka lanƙpete nnyɔ, adena i tu ko boro kpantain n awɔre n bo wɔ sese su ama i ni, na i nie i dika afɔ nsan ni kpaaki nu, na má woo tie n tu i. ¹⁵ Na woo tie n apuuti nzue afite i nɔɔ nu ka wɔmbu nzue dɛɛ su, na má i sɔ bara n kɔ. ¹⁶ Ama, na asien n ade bara n aji, i kpaaki nu nnyɔ ɔ, na nzue n bo i songi fiteeri woo tie n nɔɔ nu n awura asien bu, nyini ti, nzue n atu má bara ni. ¹⁷ Woo tie n atu má bara n dɛɛ ti, na yaa ati i agaya, na wɔ kaaki ka i kɔ kun lue ni bara n busu nufɔm, bo ba de Nyeme noanie maawam n na bu di daani ni Yesu labari kpa n ni. ¹⁸ Na woo tie n akɔ ajina tieku n nɔɔ su.

13

Boro nengendɔre nnyɔm jɔre

¹ Na ma nju boro nengendɔre be ka i sufite tieku n nu, i la atii nso wɔ, na i mbie ti buru, mbie n kere butu femeya kere, ye duma kereɛwa be bo i kpie Nyeme nzuko n wo atii kun kun n kere su. ² Boro nengendɔre n bo m njuuri i n ti ka awɔba a, ama, i jaa ti bambaka, na i la fanja, na i nɔɔ ti ka jara dɛɛ. Woo tie n afa i dɛɛ yiko, ni i femeya, ni i fanja afa ama i. ³ Na ma nju ka ba kpie boro nengendɔre n kun tii, i ti ka ba kpie i kom wɔ, ama, kani n awie, na wɔ yo durunya n nufɔm kere alekutura na bu susu i su. ⁴ Na bu kere sukutu na bu su woo tie ni, dama wɔ fa i yiko ama boro nengendɔre ni, na bu sukutu na bu su boro nengendɔre n gusu, na bu suse ka, “Nma ti ka boro nengendɔre n a? Nma ni yiri koro kun lue na i kunma i a?”

⁵ Na ba ma boro nengendɔre n atin ka i jɔjo kpiri koroya jɔjɔri, na i jɔjo wura Nyeme ngasi nu, na ba ma i atin ka i la yiko haari sara aburana ni nnyɔ. ⁶ Na i jɔjo sukpie Nyeme nzuko, na i susaaki i duma ni i dika ni, ni bo bu wo Nyeme dika n nu angoro n kere. ⁷ Na wɔ nya yiko ka i kun lue ni Nyeme minem na i kunma bu, na wɔ kaaki anya yiko na i nie adamande kere, ni daanfie kere, ni aniem kere, ni asien barasu kere bo bu wo durunya n nu. ⁸ Minem kere bo bu wo durunya n nu ni su i wɔ, má ka minem n bo ba du mɔ akere bu duma agɔ ngɔɔ kadasi n nu, na durunya n boori i bu ni. Kadasi n ti Bombaa n bo ba kpie i kom n dɛɛ wɔ.

⁹ Sɔnɔ kere bo i koro ka i ti ahin jɔre n bu, i ti ye ni ka i mi so i sui na i ti.

¹⁰ “Sɔnɔ kere bo Nyeme ase ka bu wura i dansaraka,
 bu wura i wɔ,
 na sɔnɔ kere bo Nyeme ase ka bu kun i ni takobe,

bu kún i wò.”

Nyini dɛɛ ti, i ti ye ni ka Nyemɛ minɛm fa sawɔrɛ ni mindi ni yarada na bu fa su Nyemɛ.

¹¹ Na ma ɲu boro nɛngɛndɔrɛ n be bekun ka i fite asien n nu, i la mbiɛm nnyɔ, bu ti kabo Bɔmbaa dɛɛ ti n wò, ama, i jòjò kabo woo tie n jòjò n wò. ¹² I jina bumboori dɛɛ boro nɛngɛndɔrɛ n jinaabiri wò, na i la i yiko n kɛrɛ, na i sumie durunya n nufɔm kɛrɛ ka bu su bumboori dɛɛ boro nɛngɛndɔrɛ bo ba kpɛ i tii ni, i ti ka ba kpɛ i kɔm wò, ama, kani n awie. ¹³ Na boro nɛngɛndɔrɛ nnyɔ su n ayo alekutura sam beberebe, na i ma sin fiteeri aɲgoro ba tɔɔri asiɛɲgu wò, na minɛm aɲu i. ¹⁴ Alekutura sam n bo i nya yiko yoori bu bumboori dɛɛ boro nɛngɛndɔrɛ n nyunu n dɛɛ ti, na wò dadaka durunya n nufɔm. Na wò se bu ka bu ta amɔɛ na i ferema ni boro nɛngɛndɔrɛ n bo bu faari takobe fɔndɔɔri i ni, ama, i toko la ɲɔɔ. ¹⁵ Na boro nɛngɛndɔrɛ nnyɔ su n anya atin, na wò ma amɔɛ ɲumi, na wò nya ɲɔɔ na i koro jòjò na i koro kun minɛm kɛrɛ bo ba kete ka bu su má i ni. ¹⁶ Na i sumie mine barasu kɛrɛ, nfaɲgafɔm ni tarakam, nɛngɛfɔm ni yaarifɔm, minɛm bo ba de bu tii, ni akɔɔm, na wò ma ba se bu nyaari bu saa fɔmbɔɔ wara bu ɲuma su. ¹⁷ Sɔnɔ kɛrɛ bo i la má nyini nyaari seewa n be, koro tɔ má deke be na i kaaki koro to má deke be gusu, dama nyini nyaari seewa n ti boro nɛngɛndɔrɛ n duma, wara i duma lamba.

¹⁸ Sɔnɔ koro si má boro nɛngɛndɔrɛ lamba n bu, má ka i mi la alecira, i ti adamande duma a. I lamba n ti yaa nsen ni aburasɛn ni nsen wò.

14

Bɔmbaa n ni minɛm bo wò de bu tii aji n jɔrɛ

¹ Na ma nie aɲu Bɔmbaa n ka i jina Siyon Buka n su. Mine akpii yaa ni akpii aburana ni nnam wo i dɔ. Berɛ ye ba kɛrɛ Bɔmbaa n ni i Si Nyemɛ duma aɔɔ bu ɲuma su n a. ² Na ma ti ka mine nbem sudi jue aɲgoro, i yo naɲmie kabo nzue songi na i yo naɲmie n wò, na i yo kabo nzue tientien na i yo naɲmie ni, na i sun kabo bu bo bieku na i sun barasu ni. ³ Na mine akpii yaa ni akpii aburana ni nnam n jina femeya bie n nyunu, ni nɛɲge ɲɔɔfɔ nnam ni, ni nkpiɛnkpiɛnm n nyunu, na bu sudi jue fɔfɔrɛ. Be wo má berɛ bo i koro sɔnsɔn i, má ka berɛ ɲgumi bo Nyemɛ ade bu afite durunya n nufɔm n nu ni. ⁴ Berɛ la minɛm n bo bu ni bara be ada má, na bu ti casi ni. Berɛ la wo deke kɛrɛ bo Bɔmbaa n kɔ na bu su i su ni. Berɛ ye Nyemɛ ade bu tii aji afite durunya n nufɔm nu n a, na ba yo i ni Bɔmbaa n dɛɛ ciciri su minɛm. ⁵ Kɔrɛ be mmɔɔ wo má bu nɔɔ nu. Na bu kaaki la má ɲgasi be.

Mereke nsanm jɔrɛ

⁶ Na ma ɲu mereke be bekun ka i wo tu su aɲgoro, na i sukan labari kpa n bo i la má awieeri n jɔrɛ kere adamande kɛrɛ, ni daanfɛ kɛrɛ, ni aniɛm kɛrɛ, ni asien barasu kɛrɛ bo bu wo durunya n nu ni. ⁷ Na mereke n aye i konvi su atien faɲga su agaya ase ka, “Am soro Nyemɛ na am wura i kpiri, dama sangɔ n aɲu bo i dí minɛm jɔrɛ. Am su Nyemɛ bo i yiiri aɲgoro ni asien, ni tieku ni nzue ni.”

⁸ Na mereke nnyɔ su n afite asu ciciri dɛɛ n su, na i suse ka, “Wò kpaasi, Babilɔn mie kpiri n akpaasi, yiri bo i maari durunya n nufɔm kɛrɛ nuuri i nzan n na bu yoori sa ɲgbɛɛnɲgbɛɛn ni.”

⁹ Na mereke nshan su n afite ago ciciri deem su. Na i sujojo fanga su suse ka, “Sono kere bo i suuri boro nengendore n ni i amoe ni, na wo se bu njuma su wara bu saa fomboro su n nyaari, ¹⁰ Nyeme fa yaa bu nu, na i cin bu sui agaya, na i ma sin ni ferewita to bu nu na bu di wahara agaya, i mereke casim n ni Bombaa n nyunu. ¹¹ Na nmisini sufite nyini sin n bo i kere bu wahara n nu ko angoro sanja kere, i la ma awieeri. Minem kere bo bu suuri boro nengendore n ni i amoe n na wo se bu nyaari ni, bu nya ma numiyi, kongue ni wiesu kere.”

¹² Nyini ti, i ti ye ni ka Nyeme minem la mindi, bere bo bu de i noanie maawam ni, na bu bita bu yarada n kenken fa ko Yesu do ni.

¹³ Na ma ti ka akonvi be sujojo angoro suse m ka m kere ka, “Terefie wo minem n bo bu suuri Mibie n na bu wuuri n do fite kisa fa ko.”

Na Nyeme Awiewie Casi n asoro su ka, “I ti nahore wo, bo ba wu ni, bu yi bu nuni, bu nkato ye bu sudi i n a, dama bu sakpayo su bu su a.”

Kabo Nyeme di durunya n nufom kere jore ni

¹⁴ Na ma nie anu yinyingu fofoe be angoro n su, be tana su, i ferema ni adamande wo, i butu sika femeya kere, i bita goroku nana i saa nu. ¹⁵ Na Nyeme mereke n be bekun afite Nyeme Sereebiri Awuru bo i wo angoro n nu, na i sutien fanga su suse yiri n bo i tana yinyingu n su ka, “Durunya n nu alembaa n abi, fa u goroku n fa wura nu na a kpie i, dama sanja n a ju.” ¹⁶ Na yiri n bo i tana yinyingu n su n afa i goroku n ada awura durunya n nu na wo kpie alembaa ni.

¹⁷ Na mereke n be bekun afite Nyeme Sereebiri Awuru bo i wo angoro n nu, i gusu bita goroku nana be.

¹⁸ Na mereke n be bekun bo i nie sin su afite Mikun yoowa yoobiri n dika, na wo tien fanga su ase nyini mereke n bo i bita goroku n ka, “Fa u goroku n fa kpie durunya n nu baka suuwam go, dama baka suuwa n aboro.”

¹⁹ Na mereke n afa i goroku n ada awura durunya n nu akpie baka suuwam n kere atien bu noo ago kunma bambaka n bo bu miemie yiiri baka suuwa nzue n nu ni. Nyini kere kabo Nyeme ahorembaa ayasu na i cin minem sui. ²⁰ Na ba tientien baka suuwa n su, kunma bambaka n bo i wo mie n aheme n nu, na mbunja asongi afite kunma n nu. Nzen kpoggo wura nu, na i ko se ka wo dodo ngonggo dika, i tii nyaari ngumi ko ka. I tintiin gusu waari agaya.

15

Merekem bo bu bita awieeri su kekereke ayaba nsom jore

¹ Na ma nu alekutura sa bambaka be angoro, ka Nyeme mereke nso nbem bita kekereke barasu nso n bo bu ti awieeri su dee ni. Nyini kekereke n dee sin, Nyeme fa ma yaa kun.

² Na ma nu deke be, i ti ka nzue bambaka a, i je ka nieenu wo, wo sanja ni sin. Na ma nu minem bo ba kunma boro nengendore n ni, ba ko ayaki i ni i amoe n ni i duma lamba. Bu jina tieku n bo i je ka nieenu n su, bu bita biekum n bo Nyeme afa ama bu ni. ³ Na ba di Nyeme akoo Moyisi ni Bombaa n dee jue, ka, “Ya Mi Nyeme Feme Kpiti,

woro ti adamande kere feme durunya n nu a.

U sayoowa ti bambaka na i ti alekutura.

U sayoowa kere ko atin su wo, na i ti nahore.

4 Micera, nma wo bere bo i soro má u a,
na i wura má u kpiri a?

Dama wɔrɔ ngumi ti casi a.

Adamande kere bo bu wo durunya n nu,
bu bá kutu u na bu kánsi u,
dama u nahore sam n afite fofoe nu.”

5 Nyini sin, na ma nju Casi Kere Casi Soɔ n bo i wo Nyeme Sereebiri Nambue n nu, na i wo angoro n ka bu suteke i. 6 Na mereke nsom n bo bu bita kekereke nsom n afite Nyeme Sereebiri Awuru n nu, bu wura sutura fofoe papasi, ba fa sika dambara abo bu hoe su. 7 Na deke ngɔɔfɔ nnam nu kun, afa sika ayabam n nso afa ama Nyeme mereke nsom n ni. Ayabam n ayi ni Nyeme ahorembaa yasu, bo i kere ka Nyeme bo i la ngɔɔ na i la má awieeri n afa yaa agaya. 8 Na Nyeme yiko ni i jirima woowa n ama Nyeme Sereebiri Awuru n ayi ni nmisini, bo be akoro awura má awuru n nu, fa ko ju sangba bo mereke nsom fa kekereke nsom n fa jiiri durunya n nu n ko wieeri.

16

Ayabam bo bu kere ka Nyeme afa yaa n jɔre

1 Na ma ti akonvi bambaka be nga Nyeme Sereebiri Awuru n nu, i sujɔɔ mereke nsom do, i na, “Am ko na am ko kaaki Nyeme ahore yasu ayaba nsom n go durunya n nu.”

2 Na mereke ciciri su n ako akaaki i ayaba n ago durunya n nu, na kani tiem, bo bu yo ya agaya, akpie minem bo bu la boro nengendore n nyaari seewa n na bu su i amɔe n ni.

3 Na mereke nnyɔ su n akaaki i ayaba n ago tieku nzue n nu, na tieku nzue n akaaki ka sɔno bo wo wu mbunja. Na deke ngɔɔfɔ kere bo bu wo tieku n nu awu.

4 Na mereke nsan su n akaaki i ayaba n ago kunmam nzue ni buram nzue nu, na i kere akaaki mbunja. 5 Na ma ti ka mereke n bo i nie nzue n su n ase ka,

“Nyeme, wɔrɔ ti casi a,
wɔrɔ bo a wo bere na a yo woori bere ni,
kabo a cin minem sui so ni,
u sayoowa ako atin su.

6 Dama ba kun u dee minem, ni u noanie kanfom
na bu mbunja afite,
ye u gusu ama bu nzuem n akaaki mbunja na bu nu.
I ti ye ni ka a yo bu so o.”

7 Na ma ti akonvi be nga ka i fite Mikun yoowa yoobiri n bi, i na,
“Ya Mi Nyeme Feme Kpiri,
kabo a di bu jɔre ni, i ti nahore wo, na i ko atin su.”

8 Na mereke nna su n akaaki i ayaba, n ago wie n nju, na Nyeme ama i kekere agaya suyara minem ka sin dee su. 9 Na sin n kekere ayara minem, na ba kpie Nyeme nzuko, yiri bo i la yiko na i ma bu di nyini wahara ni, na ba kete ka bu kaaki má bu wo na bu ma i jirima.

10 Na mereke nnu su n akaaki i ayaba n ago boro nengendore n femeya bie n su, na i femeya asien n kere asi biri didiki. Na minem sukan bu saa, yaari n ti. 11 Kambue n ni yaari n bo i wo bu nju n dee ti, ye bu sukpie Nyeme bo i wo angoro ni nzuko a, haari ni nyini mmoo, ba kaaki má bu wo na bu yaki bu satie ni.

¹² Na mereke nsen su n akaaki i ayaba n ago kunma kpiri n bo bu fere i ka Yufarati n su, na nzue n kere anu, na wo kpie atin ama nfemem bo bu fite wie afiri ni. ¹³ Na ma nu awiewie tie nsan nbem, bu ti ka pontirim wo, kun sufite woo tie n nco nu, kun sufite boro nengendore n nco nu, na kun gusu sufite sono bo wo yi i nu ka i ti Nyeme noanie kanfo n nco nu. ¹⁴ Bu ti Sitana dee awiewie barasu nbem wo, na bu suyo alekutura sam, na bu ko durunya n nu nfemem kere do ko tien bu nco, na bu cici lue nminda ya Mi Nyeme Feme Kpiri n jina ceen.

¹⁵ Ya Mi Nyeme na o, "Am ti fen, m ba ni yo am fura nu ka awiefo dee su wo, terefie wo sono kere bo i nminda fa ko m ba n dee su, i fa ma i nu ti ma, na i wura i sutura, adena ma i nati i bu ngbeen, na ma mine nu i, na nyinse ti i."

¹⁶ Na Sitana awiewiem n atien nfemem nco dika n bo bu fere i Hiburu anie nu ka, *Amagedon* n ni.

¹⁷ Na mereke nso su n akaaki i ayaba n ago anjuma n nu. Na akonvi bambaka be ajojo afite femeya bie n nu, Nyeme Sereebiri Awuru n nu, i na, "Wo yo awie."

¹⁸ Na nzue sukpekpese, na i sutientien, na i suyo nanmie, na asien sukpisi fanga su. Kabo Nyeme yiiri adamande ni, be nya nu ma nyini asien kpisiwa n nusu so. ¹⁹ Na mie kpiri n ati nu nsan, na miem kere bo bu wo durunya n nu n atoto, dama Nyeme atenge Babilon mie kpiri n jore su, nyini ti ye wo fa yaa i nu, sucin i sui n a. ²⁰ Na lui bambakam kere bo bu da nzue afien, ni bukam kere amini. ²¹ Na nzue yabuem sutoto minem nu, i kun kun nconori la nma. Na minem sukpie Nyeme nzuko, dama nzue yabue n bo i toto ni sukere bu wahara agaya.

17

Bara sakara n jore

¹ Na Nyeme mereke nsom n nu kun, bo i bita ayaba nsom n nu kun, aba m do, aba ase m ka, "Bra fen, na m kere u kabo Nyeme cin bara sakara tie n sui ni, yiri bo i tana kunma nzue beberebem n su ni. ² Yiri ye durunya n nu nfemem akpini i afa ayo bu soma, na wo fa i sakaraya asa durunya n nufom kere, na bu gusu akpini i afa ayo bu soma."

³ Na Awiewie Casi n dee yiko nu, na mereke n afa m ako boro kpantain nu. Na ma nu bara be ka i tana boro nengendore kokore be su, dama kerewa nbem bo bu kpie Nyeme nzuko n wo boro nengendore n njunie kere su. I la atii nso, na i mbie ti buru. ⁴ Bara n adi sunjuruya anyonyondi i nu, i wura sutura kokore nyunyumi, na wo wura i kom, ni i saam, ni i suim jorokom, ni lalankundim, ni afere nyunyumim, ni sikam, ni afere fofeom bo bu la go agaya. I bita sika kopu i saa nu, wo yi ni dangba ni i sayoowa ngbeenngbeen n wo. ⁵ Ba kere i asiri nu dama i njuma su, nyini dama n bu la ka, Babilon mie kpiri, bo i ti sakaram kere ni, na i kaaki ti saa ngbeenngbeen yofom kere bo bu wo durunya n nu n ni. ⁶ Na ma nu ka bara n anu Nyeme minem mbunja abo, ni minem bo bu di Yesu daani n dee ti na ba kun bu ni gusu mbunja abo.

M nuuri i so ni, na wo yo m alekutura. ⁷ Na mereke n abisa m ka, "Nzu ti ye a ma wo yo u alekutura? M kere u asiri nu jore bo i wo bere fa ko bara n ni boro nengendore n bo bara n tana su, na i la atii nso ni mbiem buru ni. ⁸ Boro nengendore n bo a nuuri i ni, ti deke bo i yo woori bere wo, ama, kisa i wo ma bere kun. Wo ka kaan na i fite kunma ngongo n bo

i la má awieeri n nu, na i kó di wahara na i ká ḡgbēen. Na durunya n nufóm bo bu duma wo má ḡḡo kadasi n nu, fite san̄ga bo Nyeme nya yi má durunya ni, bu ba ḡuuri i, i yó bu alekutura, dama i yo woori bere, ye kisa, i wo má bere kun, na i bá kaaki ba cēen be.

⁹ Nyini dēe ti, sōḡo kere fa i alecira ni sunsunni na i ti ahin jore n bu. Boro neḡgendore n tii nso n ti buka nso bo bara n afun atana su wɔ. Bu gusu kaaki ti nfemem nso wɔ. ¹⁰ Bu nu nnu akpaasi, nsen su n toko wo bere, nso su n nya ba má, ama, i ba baari, i ce má, i femeya ni kpási wɔ. ¹¹ Boro neḡgendore n bo i yo woori bere, ama, kisa i wo má bere kun ni, yiri ti femē n bo i buka su mocue su n a, ama, i ti nfeme nsom nu kun wɔ, na i kó di wahara na i ká ḡgbēen.

¹² Mbie burum bo a ḡuuri bu n ti nfeme burum bo bu nya di má femeya, ama, bu nyá yiko na bu dí femē buka boro neḡgendore n su san̄ga kaan so. ¹³ Nyini nfeme burum n yó bu n̄okun, na bu fá bu fan̄ga ni bu yiko kere na bu fá ma boro neḡgendore ni. ¹⁴ Bu kún lue ni Nyeme Bōmbaa ni, ama, i ni i minem ni kúnma bu, dama yiri ti mibiēm kere Mbie, na i ti nfemem kere Feme. I minem bo bu wo i dɔ n la bo wɔ fere bu ni, ni bo wo yi bu na bu jina i sin nahore su ni.”

¹⁵ Na mereke n ase m ka, “Kunmam nzue n bo a ḡuuri i ni, na bara sakara n tana su ni, ti durunya n nu minem, ni durunya n nu asien barasu barasu kere, ni daanfie kere wɔ lēe. ¹⁶ Mbie burum bo a ḡuuri bu ni, ni boro neḡgendore ni, bu bá kpɔ bara sakara ni, bu dé i nen̄ge kere na i ká i bu ḡgbēen, na bu dí i ḡuniēmbaa kere, na bu yára bo wɔ ka n sin. ¹⁷ Dama Nyeme maari bu yoori kabo i koro a. I maari bu yoori bu n̄okun na bu fa bu femeya n kere buka boro neḡgendore, na i dí femeya n ko ju san̄ga bo Nyeme noanie ni bá yo yiiwa ni.

¹⁸ Bara n bo a ḡuuri i n la mie kp̄iri n bo i ti durunya n nu nfemem kere tii n a.”

18

Kabo Babilon mie kp̄iri n kpaasi barasu ni

¹ Nyini sin, na ma kaaki aḡu mereke be ka i fite angoro sujura, i la yiko agaya, na i woowa n ata wein abara aye durunya n kere. ² Na wɔ ye i konvi su atien fan̄ga su ka,

“Wɔ kpaasi. Babilon mie kp̄iri n akpaasi.

Wɔ kaaki awiewie tiem, ni ajinim,

ni deke ḡgbēenḡgbēenm,

ni anuma tiem woobiri wɔ.

³ Dama durunya n nufóm kere nuuri i nzan ye bu k̄ori somaya yiri dɔ a.

Na durunya n nu nfemem kere ko kp̄iniiri yiri yoori bu soma.

Na kabo i la ajekē na i koro tara má i ḡu ni, durunya n nu watafóm gusu nya bu ajekē fite i dɔ o.”

⁴ Na ma kaaki ati akonvi be ḡga bekun, ka i sujɔjo angoro n nu, i ḡa, “M minem, am fite mie n nu,

na má am yo bu satie yoowa n be,

na má wahara n bo i suba bu dɔ n tu am.

⁵ Dama mie n nufóm satie yoowa n aju Nyeme dɔ angoro, na i wara koro fi má bu satie yoowa n sa.

⁶ Sam bo bara n yoori bu ni, yo i gusu so,

to i kaari i n̄usu nnyo.

Ma i n̄u kekereke tara kabo i yo ma minem n̄uuri kekereke ni.

7 Kabo i yo wurari i n̄u kpiri na i diiri i tii barasu ni,
kere i kekereke na i ahore gusu saaki so.

Dama i n̄a, 'Ma di femε, m ti má kunafo,
m ahore sáaki má cεn be.'

8 Nyini dεε ti, lekun ye kekereke bá to i n̄u a.
Yiri la tukpaki, ni ahoresaaki, ni ahε.

Na sin yára i,

dama Micεra Nyεmε n bo i cin i sui n la yiko agaya."

9 Na durunya n nu n̄femem bo bu kɔ kpiniiri i na bu ni yiri diiri bu tii ni, bu n̄u kabo sin je i, na bu n̄u kabo n̄misini yasu kɔ angoro barasu, na bu sún, na bu bó awie. 10 Kekereke n bo wɔ tu i n dεε ti, i ma bu sere wɔ, na bu jina dede, na bu nya suse ka,

"Keto, keto, am nie ahin miε bambaka ni.

Babilon bo i ti miε kpiri n lεε

ye ba kaba acin i sui, ye i kere aka n̄gbεen,
anyumbaa kata ni i teke n nu bere n a."

11 Na watafom bo bu wo durunya n nu ni susun, na bu sukoko miε ni, dama be to má bu gɔori n kun. 12 Be to má bu sika, ni jete, ni afere barasu nbem bo bu yo nyumi na bu la gɔ ni. Be to má bu suturam barasu barasu bo bu yo nyumi na bu la gɔ ni. Be to má bu bakam bo bu fa yo biε kpakpam ni, ni bu ayaba barasu kere bo bu fa sui jee yo bu ni, ni deke kere bo bu fa baka fa sense bu, ni deke kere bo bu fa jawii bulaari, ni yabue fa yo bu na bu la gɔ agaya. 13 Be kaaki to má bu toro nen̄ge barasum bo bu la nvanvani, ni ayiri kunkuunwa nvanvani, ni baka nyunvuin nvanvanifo, ni nzan, ni nguin, ni kpɔnɔ samene, ni diire, ni naanim, ni nbɔem, ni kpɔn̄gɔm, ni kpɔn̄gɔ torokum, ni akɔm, ni domuεm. 14 Na watafom n ase i ka,

"Dekem bo a yo koro bu agaya n kere

an̄mati ayaki u,

u ajekem, ni u nen̄ge kpakpam kere bo a la bu

ako ayaki u,

a nyá má i be kun."

15 Watafom bo bu yoori nen̄gefom nyini miε n dεε ti ni, bu kó jina dede wɔ, dama sere ti bu fa kɔ kekereke n bo wɔ to miε n nu ni, na bu ahore saaki agaya na bu sun. 16 Na bu se ka,

"Keto, keto, am nie ahin miε bambaka ni.

I yo kara sutura barasu barasu nyunyumi,

na i la sika jɔrɔkɔm,

ni aferem barasu barasu

bo bu yo nyumi na bu la gɔ agaya ni.

17 Nyini nen̄ge n kere akaba aka n̄gbεen,

anyumbaa kata ni i teke n nu bere n a."

Na lee bambaka kanfom, ni leefom, ni lee wurafom, ni bo bu juma nati tieku nzue n su n kere ako ajina dede. 18 Na bu jina nie kabo miε ni suje sin barasu na n̄misini yasu kɔ angoro ni, na bu bo awie se ka, "Miε bɔno wo bere bo i ju ahin miε bambaka n a?"

19 Na bu susasa tuturi gɔ bu tii su na bu kere ka bu ahore asaaki agaya, na bu susun, na bu suse ka,

"Keto, keto, am nie ahin miε bambaka n ni.

Dama minem kere bo bu la lee bambakam na bu juma nati tieku nzue n su n

nya bu nengem fite nyini mie n dee ajekere n nu wo.

Ye wo kaba aka ngbeen,

anyumbaa kata ni i teke n nu bere n a.

20 Ambere bo am wo angoro nu,

ni Nyeme minem, ni Yesu jaramasam, ni Nyeme noanie kanfom,

am ma am ahore jo

fa ko kabo mie kpiri n aka ngbeen barasu bere ni,

dama Nyeme subisa i noo nu ma am a."

21 Na Nyeme merere fangafo be n afa yabue bambaka, na wo fa atu aji tieku nzue n nu, na wo se ka,

"So ye Nyeme fa Babilon mie kpiri n

fa ji wuum a,

na i busu be ba nu ma.

22 Be ti ma deke be nga mie n nu kun,

i bieku kanfo o, i jue difo o, i tere kanfo o, ni awie kanfom.

Na jumayofa barasu be mmoo gusu wo ma mie n nu kun,

be ti ma ngani san yabue be nga mie n nu kun.

23 Na fitana haari kun n kpein

je ma mie n nu een be na be nu i.

Be ti ma konya ni konyafan kuyigindi nga mie n nu kun,

dama watafom bo bu yo wo nyini mie n nu

yo ti nfangafom wo durunya n kere nu,

na mie nufom yo boboyaya sam dadaka durunya n nufom kere.

24 Nyeme acin mie n nufom sui a,

dama bere yo kuunri Nyeme minem, ni i noanie kanfom n a,

ni minem kere bo ba kun bu durunya n nu ni, bere yiiri bu mbunja."

19

1 Nyini sin, na ma ti akonvi be nga angoro, ka jama beberebe akonvi, bu na,

"Haleluya, ya kansi Nyeme,

ya Mi Nyeme n ama ya nya tiide a,

yiri ti kpiri ni yikofa a.

2 I di jore ni i atin su, ni nahore wo.

Wo di bara sakara n jore,

yiri bo i maari durunya n nufom kere kpini nbaram

na bu ko somaya

na bu yo sa ngbeenngbeenm kere,

na wo cin i sui, dama yiri yo kuunri Nyeme akoom n a."

3 Na jama n bo bu wo angoro n akaaki aye bu konvi su atien ase ka, "Haleluya.

Sin n bo i sudi mie ni nmisini n suyasu sukoo angoro

haari ni saha bo i la ma awieeri."

4 Na nkpienkpien aburanyo ni nnam, ni deke ngoofo nnam sukutu

sukansi Nyeme bo i tana femeya bie n su ni, na bu se ka,

"Ami. Haleluya."

Nyeme Bumbaa n konyaya jore ni

5 Na akonvi be afite femeya bie n nu, i na,

"Ambere Nyeme akoom kere,

tarakam ni nfangafom,
bo am soro Nyeme ni,
am kere kansu i duma.”

⁶ Na ma ti akonvi be nanmie nga, i ti ka jama beberebe suyo nanmie wo, na i yo nanmie, kabo nzue songi na i yo nanmie ni, na i kaaki ti kabo nzue tientien na i yo nanmie ni, i nga,

“Haleluya,

Ya Mi Nyeme Feme Kpiri n
adi i femeya n kisa.

⁷ Am ma ya ahore jo na ya yo ya kunnu koroowa,
na ya wura i kpiri,

dama sangja n aju bo Bombaa ni ja i konya ni,
konya n gusu asese i ngu su anminda i.

⁸ Nyeme ama i sutura casi fofoe papasi ka i fa kara.”

Sutura fofoe papasi n la Nyeme minem sakpa yoomam ni.

⁹ Na mereke n ase m ka m kere ka, “Terefie wo minem bo Bombaa n abaandi bu ka bu ba di konyaya diire n be i do.”

Na wo kaaki ase ka, “Ahin noanie ti nahore wo, i fite Nyeme do o.”

¹⁰ Na ma kutu i jaa bu asiengu ka m su i, na wo se m ka ma m yo so, ama, m kansu Nyeme ngumi. Na wo kaaki ase m ka, “M ti u bengu akoo, ni u ninbaam bo bu di Yesu daani kere mine n be wo.” Jore n kere bo Nyeme noanie kanfom kaanri i ni, bu diiri ahin Yesu n daani wo.

Sono n bo i fun kpongɔ fofoe n jore

¹¹ Na ma ngu ka angoro ateke, kpongɔ na ma ngu kpongɔ fofoe be, bu fere bo i tana su n duma ka, Bo i la Dabunja ni Nahorefo, i di minem jore kabo i ti ye ni ka i di bu nahore su wo, na i kun i lue ni nahore su. ¹² I nyumbaa kere je ka sin fofoe, na i butu femeya kere beberebe i tii su. Duma kerewa be mata i, be si ma nyini duma ni, ma ka yiri ngumi si a. ¹³ I wura sutura yorom barasu be bo ba fa i awura mbunja nu, na bu fere sono n duma ka Nyeme Noanie. ¹⁴ Na Nyeme sojam bo bu wo angoro n fun kpongɔ fofoe su i su, bu wura sutura casi fofoe papasi. ¹⁵ Takobe nana bo i fa kunma durunya n nufom wo i noo nu, na i bita bu kekereke kabo nanjasi fa bulaari koroma tu bo i naanim barasu ni, na i tientien bu su kabo bu fa baka suuwa go kunma nu na bu miemie yi i nzue ni, dama Micera Nyeme Kpiri n afa yaa agaya. ¹⁶ Ba kere i duma i sutura n su, ni i jaa soowa su ka, “Nfemem kere Feme ni mibiem kere Mibie.”

¹⁷ Na ma ngu mereke be ka i jina wie n su, na wo ye i konvi su atien fanga su ase anumam kere bo bu tu angoro na bu di nie n ka, “Am bra na am ba tien am noo na am di ahin diire beberebe n bo Nyeme sufa ma am ni, ¹⁸ am ba di nfemem juniembaa, ni sojam nkpienn juniembaa, ni nfangafom juniembaa, ni kpongɔ nie, ni minem bo bu fun kpongɔm n juniembaa, ni adamande barasu kere juniembaa, bo bu ti akoom ni bo ba de bu tii, ni bo bu ti mine ngbingbirim, ni bo bu ti mine kan kanm ni.”

¹⁹ Na ma ngu boro nengendore n ni durunya n nu nfemem, ni bu sojam, ka, ba tien bu noo acici na bu kun lue ni yiri n bo i tana kpongɔ fofoe n su ni, ni i jama nbaam. ²⁰ Na ba tara boro nengendore n ni korefo n bo i yo i ngu ka i kan Nyeme noanie ni. Yiri yo yoori alekutura sam boro nengendore n nyunu, na wo dadaka minem bo bu deeri boro nengendore n anyaari seewa na ba su i amoe ni. Na ba fa boro nengendore n ni korefo n ni bu ngoo aji sin n nu, bo i je ka ferewita na i da ka tieku ni. ²¹ Minem

bo bu kaari ni, na yiri n bo i tana kpɔŋɔ n su n afa takobe n bo i wo i nɔɔ nu n akun bu kere. Na anumam kere adi niɛ na bu kunnu ayi.

20

Kabo bu nyi Sitana afo akpii kun n jɔre

¹ Na ma ŋu mereke be ka i fite aŋgoro suba, i bita deke nbem i saa nu, kun la kadombaa bo i tu kunma ŋoŋɔ bo i la má awieeri ni, na kun gusu la jɔrɔko bambaka faŋgafo be. ²⁻³ Na wɔ tara woo tie ni, dada dɛɛ woo tie n bo i ti Sitana ni, na bu kaaki fere i ka Dadakafɔ ni, na wɔ fa jɔrɔko n acii i, na wɔ fa i atu kunma ŋoŋɔ n bo i la má awieeri n nu, ka i wɔ dɔ haari afo akpii, na wɔ tu kunma n aɔ ni, na wɔ ta akata su, na má i koro fite na i dadaka durunya n nufɔm bekun, ama, i wo dɔ haari afo akpii n ba ju. Nyini sin, na bu nyáŋgi i ji kaan.

⁴ Na ma ŋu femeya biɛm, Nyɛmɛ ama bo bu tana sum n atin ka bu di minɛm jɔre. Na ma kaaki aŋu bere bo bu yo wuuri Yesu ti ni. Minɛ yo kpiɛri bu tii a, dama bu yo kaanri Nyɛmɛ jɔre na ba di Yesu daani n dɛɛ ti. Bere keteeri ka bu su má boro nɛŋgendɔre n ni i amɔn a, bere la bo bu kaaki keteeri ka bu de má i nyaari seewa bu ŋuma wara bu saa su n a, ye ba teŋge bu yiwee n nu anya ŋɔɔ, na bu ni Kristo Tiidefo n saŋga di femeya afo akpii. ⁵ Ahin ti yiwee teŋge ciciri su n a. Ama, minɛm bo ba wu na ba ka ni, bere teŋge má haari kɔ ju afo akpii n awieeri. ⁶ Bere n bo bu du mɔ teŋgeeri bu yiwee nu ni, na bu ti minɛ casim n ni, terefie wo bu dɔ, bere ŋú má yiwee nnyɔ su n kun, bere yó Nyɛmɛ ni Kristo Tiidefo sayoowa dɔŋguyofɔm a. Na bu ni yiri saŋga di femeya n afo akpii.

Kabo Nyɛmɛ kunmaari Sitana ni

⁷ Afo akpii n nyaari kɔ juuri, na Nyɛmɛ má bu yi Sitana n dansaraka sɔɔ n nu ji. ⁸ Na i kó dadaka adamande barasu barasu kere bo bu wo durunya n nu ni, Gogi ni Magogi asien n kere, na i tien bu kere nɔɔ na bu kó kun lue. Bu sunnu beberebe ka kunma ŋmie wɔ. ⁹ Na ba tereki abara aye durunya n deke kere, na ba bara aye mie n bo Nyɛmɛ koro i agaya ni, deke bo i minɛm wo ni, ama, na sin afite aŋgoro aba ayara bu. ¹⁰ Na ba fa Sitana n bo i dadaka bu n aji cɛɛma sin n nu, bo i je ka ferewita na i da ka tieku ni, deke bo bu faari boro nɛŋgendɔre n ni kɔrefɔ n bo i yo i ŋu ka i kan Nyɛmɛ nɔanɛ n jiiri nu ni. Dɔ na bu dí wahara, kɔŋgue ni wiesu saŋga kere.

Kabo Nyɛmɛ dí minɛm jɔre awieeri su ni

¹¹ Na ma ŋu femeya bie bambaka fofoe be, ni bo i tana su ni. Na aŋgoro ni asienɔu kere amini i nyunu, bu wo má bere kun. ¹² Na ma ŋu minɛm bo ba wu ni, nfaŋgafɔm ni tarakam kere, ka bu jina femeya bie n nyunu. Na ma kaaki aŋu ka be suteke kadasim, na be gusu suteke kadasi bo i ti ŋɔɔ dɛɛ ni. Nyini kadasim ye bu fa diiri minɛm bo bu wuuri n jɔre a, bu sayoowa kere bo bu yo yoori wo nyini kadasim n nu. ¹³ Na tieku n awɔɔ minɛm bo ba wu n ama, na Yiwee, ni Yiweefɔm Woobiri n awɔɔ minɛm bo ba wu n ama, na Nyɛmɛ afa bu sayoowa bo bu yo yoori adi bu jɔre. ¹⁴ Na wɔ fa Yiwee, ni Yiweefɔm Woobiri n aji sin n nu, bo i je ka ferewita na i da ka tieku ni. Ahin sin ni ti yiwee nnyɔ su n a. ¹⁵ Na ba fa sɔɔ kere bo i duma awo má ŋɔɔ kadasi n nu aji sin ni.

21

Angoro ni asien fɔfɔre n jɔre

¹ Na ma ɲu angoro fɔfɔre ni asien fɔfɔre, dama angoro dawa n ni asien dawa n kere wo má bere kun, na ma ɲu ka tieku nzue n gusu wo má bere kun. ² Na ma ɲu mie casi ni, Yerusalem fɔfɔre n ka i fite Nyeme do angoro sujura ba asienɲu, wo sese i ɲu su ka konya bo i sukɔ ajaa. ³ Na ma ti akonvi bambaka be ɲga femeya bie n nu, i ɲa, “Am nie fen, Nyeme woobiri wo adamandem do, na i wó bu do.

Na i fá bu yo i minem.

Yiri ni i tii wó bu do na i yó bu Nyeme a.

⁴ Yiri núnuka bu nyunvuin kere bu nyumbaa nu a, yiwee wo má bere kun, ahoresaaki wó má bere kun, minem sún má kun, na minem dí má yaari kun, dama deke dawam kere asin.”

⁵ Na bo i tana femeya bie n su n ase ka, “Nie fen, m suyo deke kere fɔfɔre.” Na wo kaaki ase m ka, “Kere ahin noanie ni, dama i ti nahore wo, na i la dabuɲu.” ⁶ Na wo se m ka, “Wo yo awie, mini ti mɔfo a, na m kaaki ti kasinfo, mini ti deke kere bumboori ni i awieeri a. Sono kere bo nzuehɔe tiiri i, m má i nu nzue n bo i ma ɲgoɔ ni, na i mi tó má kaari. ⁷ Sono kere bo i diiri nasara, m má i ahin aceerim ni, na m yó i Nyeme, na m fá i yo m wa. ⁸ Ama, serɛfom, ni minem bo ba yo má m yarada, ni dangba yofom, ni mine kunfom, ni nbara kpinfo, ni somaya kɔfom, ni bo bu di ayiri ɲgbɛɲɲgbɛɲ, ni munzueyifom, ni amɔe sufom, ni kɔrefom kere, bu woobiri la cɛema sin n bo i je ka ferewita na i da ka tieku ni. Nyini yiwee ni ti yiwee nnyo su n a.”

Yerusalem fɔfɔre n jɔre

⁹ Na mereke kun aba m do, i ti mereke nsom bo bu bita awieeri su deɛ kekereke ayaba nsom nu kun wo, na wo ba ase m ka, “Bra, na m kere u Bombaa n konya ni.”

¹⁰ Na Awiewie Casi n deɛ yiko nu, na mereke n afa m ako buka bambaka n bo i ti lenlenge n tii su, na wo kere m Yerusalem mie kpiri n bo i ti casi ni, i fite Nyeme do angoro sujura ba. ¹¹ Na i je na i ta wein kabo Nyeme jirima woowa n ti ni, na i sujeje kɔkɔre ni sosofura nzue ka afere nyunyumi barasu be bo i da cain ka nieɲu. ¹² Ba ta kobe bambaka bo i wo angoro abara aye mie ni, na i la anɔ buru ni nnyo, anom kere su la mereke kun kun bo bu jina ɲminda. Ba kere Yisareli anɔ barasu buru ni nnyo n duma ago anɔ n kun kun kere su. ¹³ Kobe n bue nna n kere la anɔ nsan nsan, nsan wo wie afiiri, na nsan wo wie atɔori, na nsan nsan wo gbɛɲɲgbɛɲ bue nnyo n kere. ¹⁴ Mie n kobe n ajaari seewa yabue n ti buru ni nnyo ɔ, ye bu nya taari kobe n taka su. Ba kere Bombaa n jaramasa buru ni nnyom duma ago yabue n kun kun kere su.

¹⁵ Na mereke n bo i joɔori m do n bita sika kara i saa nu, bo i fa sunsun nie kabo mie n ti bambaka barasu, ni kabo kobem n anom ti tetere barasu, na i kaaki sunsun nie kabo kobe n angoro ti barasu. ¹⁶ Mie n ataari n ti ka soɔ langba deɛ su wo, i tintiin, ni i tetere kere se wo. Na mereke n afa i sika kara sunsunwa n asunsun mie ni, i tintiin su ti kilo akpii nnyo ni yaa nna wo, nyini ti, i tintiin, ni i tetere, ni i angoro kere se wo. ¹⁷ Na mereke n asunsun kobe n gusu, kabo adamande bo ajaari ni, na i angoro ako ayasu ka ajaari boowa kun kun ko ju yaa ni aburana ni nna. ¹⁸ Bu faari yabue

nyunyumi barasu be bo bu fere i ka jasapa ni taari kobe n a, na ba fa sika bo i da cain ka niɛnu, ata mie n ni i tii. ¹⁹ Yabue n bo bu fa seeri mie n kobe n ajaari n ti yabue barasu nyunyumi, na i kere busu wo i ngumi ngumi. I ti kabo Nyeme sayoowa donyuyofɔ kpien n sana i tanlee su na i wo i hoe su ni. Bu fere bu ka jasapa, ni safiri, ni agata, ni emeradi, ²⁰ ni oniki, ni caniliya, ni krisolite, ni berili, ni topasi, ni krisoparasi, ni jasinti, ni ametisiti. ²¹ Bu faari afere fofoe nyunyumi barasu be fa yoori ano buru ni nnyom n a. Bu faari sika fa yoori mie n atin natiwa kere a, na i da cain ka niɛnu.

²² Ma ɲu má Nyeme Sereebiri Awuru be mie n nu, dama ya Mi Nyeme Feme Kpiri n ni Bombaa n ade Nyeme Sereebiri Awuru n jinaabiri a. ²³ Mie n koro má wie ni sara na bu ta wein ma i, dama Nyeme jirima woowa ni ti i wein a, na Bombaa n ti i fitana. ²⁴ Na durunya n nu adamande barasu kere sunati i wein nu wo, na durunya n nu nmemem fa bu ajeke kere ba wura nu. ²⁵ Mie n ano ni teke wo sanja kere, dama ka kongue wo má do. ²⁶ Na adamande barasu kere bo bu wo durunya n nu ni fá bu nenge kpakpam ni bu jirima na bu fá wura nu. ²⁷ Ama, deke kere bo i ti má casi wúra má mie n nu, ni minem bo bu su amœm, ni minem bo bu bu kœm ni. Má ka minem bo bu duma wo Bombaa ni ngoo kadasi n nu ni ngumi wúra nu a.

22

¹ Na mereke n akaaki akere m kunma nzue bo i ma ngoo, i da cain kabo niɛnu ti n wo, i songi fite Nyeme ni Bombaa n femeya bie n nu wo, ² na i susongi mie n atin n afien ni. Kunma n bue nnyo n kere, baka n bo i ma ngoo n jinjina aheme. Na i susu suuwa barasu buru ni nnyo afo kere, sara kere ni i suuwa. Na bu sufa i nyawa n tuntun durunya n nu adamande kere torem. ³ Deke bo Nyeme ayo i noo ngbeen wó má mie n nu. Ama, Nyeme ni Bombaa n femeya bie ni wó do, na i akoom n susu i. ⁴ Bu ɲu i nyunuawa dika kabo i ti barasu, na i kere i duma go bu ɲuma su. ⁵ Awosin wó má do, be koro má fitana do, na bu kaaki koro má wie do, dama ya Mi Nyeme Feme ni i tii yo bu wein a. Na bu dí femeya bo i la má awieeri.

Kabo Yesu seeri ka i cé má, i káaki ba ni

⁶ Na mereke n akaaki ase m ka, "Ahin noaniem n ti nahore wo, na i ti deke bo sono yo i yarada. Ya Mi Nyeme Feme bo i faari i Awiewie Casi n wuraari i noanie kanfom nu ni, yiri asunma i mereke n ka i ba se i akoom fa ko sa bo i yó kisa bere n a."

⁷ Ya Mibie Yesu ɲa, "Am so am sui. I cé má, m bá kisa. Terefie wo sono kere bo i deeri noanie n bo i wo ahin kadasi n nu na i jojo fa ko sa bo i bá yo n ɲu."

⁸ Mini Yohane tiiri, ye m ɲuuri ahin deke n kere, m tiiri na m ɲuuri i so ni, na ma kutu mereke n bo i kereeri nyini dekem n jaa bu ka m su i. ⁹ Na wo se m ka, má m yo so, ama, m kansi Nyeme ngumi. Na wo kaaki ase m ka, "M ti u benju akoo, ni u ninbaam bo bu ti Nyeme noanie kanfom, ni bo bu de noanie n bo i wo ahin kadasi n nu n be wo." ¹⁰ Na wo kaaki ase m ka, má m se ka m fie noanie n bo i wo ahin kadasi n nu na i jojo fa ko sa bo i bá yo n su, dama i cé má, i kere yó kisa. ¹¹ I ɲa sono kere bo i yo satie, ma i ko su yo i satie, sono kere gusu bo i yo i dangba sa ni, ma i ko su yo i dangba sa ni, na sono kere gusu bo i yo sakpa, ma i ko su yo i sakpa ni, na sono kere gusu bo i ti casi, ma i ko su wo i casi wo.

¹² Ya Mibié Yesu ɲa, “Am so am sui. I cé má, m bá kisa, na m bá tɔ sɔnɔ kéré kaari kabo i jumayoowa ti barasu. ¹³ Mini ti mɔfɔ a, na m kaaki ti kasinfɔ, mini ti deke kéré humboori ni i awieeri n a.”

¹⁴ Terefié wo minem bo ba ɲmisi bu suturam ayo casi n dɔ, adena bu koro nya atin di baka n bo i ma ɲɔɔ n dɛɛ suuwa ni, na bu fa mié n aɔ n wura mié n nu. ¹⁵ Ama, dangba yofom, ni bo bu di ayiri ɲgbɛɛɲgbɛɛn, ni bara kpɛnifom, ni somaya kɔfom, ni mine kunfom, ni amɔɛ sufom, ni bo bu bu kɔrɛ bu nɔanié jɔjɔowa ni bu sa yoori nu n kéré koro wura má mié n nu.

¹⁶ “Mini Yesu asunma m mereké n ka i ba se am ahin jɔrɛ n a, ambere bo am wo Kristo jamam n nu ni. Mini ti Feme Davidi anuma a, na m ti asaakojo bo i ta ni.”

¹⁷ Awiewié Casi n ni konya n ɲa, “Bra.”
Sɔnɔ kéré bo i ti ahin, ma i mi gusu se ka, “Bra.”

Na sɔnɔ kéré bo nzuehɔɛ ati i,
na i koro ɲɔɔ nzue ni,
i bra na i ba de nu ɲgbɛɛn.

Awieeri su n jɔrɛ

¹⁸ Mini Yohane subɔbɔ sɔnɔ kéré bo i ti ahin kadasi n nu jɔrɛ fa kɔ sa n bo i bá yo n lɛɛ, ka sɔnɔ kéré bo i faari nɔanié be bukaari su, Nyemé fá kekereke n kéré bo i wo ahin kadasi n nu n buka i mi su. ¹⁹ Na sɔnɔ kéré gusu bo i yiiri nɔanié n bo i wo ahin kadasi n nu n be, Nyemé yí i mi n aceeri na i nya má baka n bo i ma ɲɔɔ n dɛɛ suuwa n be, na i má i wura má mié casi n nu, kabo ba kéré bu jɔrɛ ahin kadasi n nu.

²⁰ Yiri n bo i di ahin jɔrɛm kéré daani n ase ka, “Nahɔrɛ. I cé má, m bá kisa.”

Ma i yo sɔ. Ya Mibié Yesu, bra. Ami.

²¹ Ma ya Mibié Yesu buka Nyemé minem kéré. Ami.